



Nicholas Garry.



John Carter Brown.

Sternus £52.10. Cat bill - XII/95





18. 17. 180.

Sernang
n^o. 570.

HISTOIRE DV CANADA

ET
VOYAGES QUE LES FRERES
Mineurs Recollets y ont faicts pour
la conuersion des Infidelles.

DIVISEZ EN QUATRE LIVRES.

Où est amplement traité des choses principales ar-
riuées dans le pays depuis l'an 1615 iusques à la pri-
se qui en a esté faicte par les Anglois. Des biens &
commoditez qu'on en peut esperer. Des mœurs,
ceremonies, creance, loix, & coustumes merueil-
leuses de ses habitans. De la conuersion & baptes-
me de plusieurs, & des moyes necessaires pour les
amener à la cognoissance de Dieu. L'entretien or-
dinaire de nos Mariniers, & autres particularitez
qui se remarquent en la suite de l'histoire.

Fait & composé par le F. GABRIEL SAGARD,
THEODAT, Mineur Recollet de la Province de Paris.




A PARIS,

Chez CLAUDE SONNIYS, rue S. Iacques, à l'Escu de
Basse, & au Compas d'or.

M. DC XXXVI.

Avec Privilège & Approbation.

Cur





A TRES-AVGVSTE
ET

SÉRENISSIME PRINCE
HENRY DE LORRAINE,
ARCHEVESQVE ET DVC
de Rheims , premier Pair de
France, n'ay Legat du S. Siege,
& Abbé des deux Monasteres
S. Denis, & S. Remy, &c.



ONSEIGNEVR,

*Il n'y a rien qui
charme tant les affe-
ctions des hommes, & qui les attache
plus puissamment aux grands Princes
que la vertu & bon exemple qu'ils doi-*

A ij

uent à leurs suiets. Vostre naissance de la tres-ancienne, tres Auguste & royalle maison de Lorraine, vous est d'un si grand aduantage que ie ne m'estonne point de l'opinion de plusieurs que vostre grandeur sera vn iour vn saint. La perfection peut estre petite au commencement, mais elle s'esleue cōme les Cedres du Liban, & va tousiours croissant à mesure qu'elle est arrousée des benedictions du Ciel, que le Seigneur verse abondamment en vous dōt on en voit tous les iours des effects.

L'histoire nous apprend (Monseigneur) qu'autrefois il n'estoit pas permis à aucun d'aller saluer les Roys de Perse, que l'on n'eust quelque chose à leur donner, non pour les enrichir: car ils estoient des plus grands & puissans Princes de toute la terre, mais seulement pour obliger les suiets à rendre quelque tesmoignage de l'affection

EPISTRE.

5

qu'ils portoient à leur Prince.

C'est pourquoy considerant les grandes obligations & bienveillances tres-estroutes que vostre sainte & Royale maison, a acquis sur tous les Religieux du monde dont elle a tousiours esté le support & l'asyle assure, i'ay pris la hardiesse de presenter aux pieds de vostre grandeur cest ouurage avec son Autheur, qui sera s'il vous plaist pour vn assure tesmoignage de l'affection que i'ay à vostre seruice, & vne foible recognoissance de l'obligation que vous ont les Recolleets de vostre ville de saint Denis, & moy en particulier m'ayant autrefois fait l'honneur me commander de luy discourir des mœurs des Sauvages, & du pays de Canada.

S'en est vn traicté (Monseigneur) & des choses principales qui s'y sont passées pendant quatorze ou quinze

années que nos Peres y ont demeuré pour la conuersion du pays. Si vostre grandeur le reçoit comme ie l'en supplie en toute humilité (orné sur son frontispice de vostre Auguste nom) il sera bien venu & chery de tout le monde. Et verra-on qu'à l'imitation de tous les Princes de vostre maison, vous cherissiez la conuersion des infidelles comme ils ont tousiours esté portez pour l'accroissement de l'Empire de Iesus-Christ, l'extirpation des heresies, la paix & le salut des peuples.

Ce sont ces vertus là (Prince tres-illustre) qui vous acquereront vn grand Empire dans le Ciel, & vous feront aymé de tous les courtisans du Paradis. La terre n'est qu'un petit point, & ce petit point diuisé en tant d'autres que ie m'estonne comme les Princes, à qui Dieu a donné vn cœur si relené puissent mettre leur affection à chose

fibasse, & comme vn neant deuant les yeux de Dieu.

La vostre n'y est point attachée (Monseigneur) vos pensees sont toutes autres, & croy pour moy ayant considere la douceur & bonte de vostre naturel, qu'un iour on dira le cœur de ce Prince estoit tout en Dieu, ce n'est point ma croyance seule, mais de beaucoup d'autres qui sçauent qu'il est permis aux grands de paroistre avec un grand esclat exterieur, tandis que leur interieur traite de paix avec ce Dieu duquel ils sont les images.

Aggreez donc, Monseigneur, s'il vous plaist, mes bonnes volontez, & receuez ce petit present de la mesme affection que ce grand Prince recut le verre d'eau d'un pauvre villageois: ce n'est point à la valeur du don qu'on regarde, mais à l'affection du cœur d'où il part, mon histoire mal polie ne

merite pas de vous estre offerte n'y qui
employe aucune heure de vostre loisir,
la lecture vous en seroit ennuyeuse
comme mon stile grossier trop impor-
tun, mais puis que vostre clemence ne
desdaigne personne pour petit qu'il soit
& ne mesprise le donneur pour son pe-
tit don, suffit que vostre grandeur luy
fasse l'honneur de le recevoir avec vn
doux accueil, & le protege à l'encon-
tre de tous ses ennieux, & les langues
mesdisantes de ceux qui comme des
araignes veneneuses tirent du venin
de la fleur d'où l'abeille succe le miel.
C'est la tres-humble priere que ie fais
à vostre excellence qui est la sagesse, la
bonté & la courtoisie mesme, & tel-
lement accomplie que pour faire vn
Prince aussi parfait que vous estes,
il faudroit recueillir ceste perfection
de plusieurs. Ce sont dons que Dieu
vous a faits lesquels ie prie sa diuine

EPISTRE.

9

*bonté vous accroistre, & conseruer
ses benedictions en vostre Auguste
maison, qui suis.*

MONSEIGNEVR,

A Paris ce 1. Septembre 1636.

Vostre tres-humble & tres-
affectionné seruiteur en
L. C. F. GABRIEL SA-
GARD Recollet.



AV LECTEUR.



E grand Appelles (amy Lecteur) que la venerable antiquité a admiré entre tous les plus excellens Peintres de son tēps estoit tellement amateur de la perfection de ses œuvres qu'il les exposoit à la censure d'un chacun pour en cognoistre les fautes, & en corriger tous les deffauts, mais comme il arriue ordinairement que les plus impertinens s'emportent facilement en toutes choses, il arriua que le cordonnier fut de fort bonne grace repris par cet admirable Appelles qu'ayant iugé du soulier, il vouloit encor controller le reste du vestement.

A l'exemple de cet excellent

Peintre i'ay librement présenté au publique le premier crayon de mon voyage des Hurons dédié au tres-valloureux & puissant Prince Monseigneur le Comte d'Harcourt Generalissime de l'armée Nauale du Roy, lequel a esté parfaitement bien receu, & veu en diuerses nations estrangeres, car tant s'en faut que les personnes sages & de bon esprit, & ceux qui ont quelque cognoissances dans le pays y ayent trouué à redire, qu'au contraire ils m'ont supplié de l'amplifier, & de descrire l'histoire entiere des choses principales qui se sôt passées en tout le Canada, pendant quatorze ou quinze années que nos freres y ont demuré pour la conuersion du pays, la lecture de laquelle vous sera d'autant plus vtile qu'elle vous

portera à vne recognoissance envers ce Dieu de tout le monde qui vous a fait naistre dans vn pays Chrestien, & de parens Catholiques. Les plus deuots y trouueront dequoy occuper leurs bonnes œuures & charité à l'endroit de tant de pauures ames elgarées & esloignées du chemin de salut. Les affligez leur consideration endurant pour le Paradis, où les pauures barbares ne souffrét que pour l'enfer. Les esprits curieux, & qui n'ont autre but que leur propre diuertissement y verront dequoy se satisfaire allechez par l'aggreable aspect & diuersité des choses y contenuës, & ceux qui ont voyagé dans le pays comme a fait depuis moy le R. P. Brebeuf Iesuite, pourront auoir le mesme sentiment que ce bon Pere tesmoigna de

mon premier Liure, lequel il iugea non seulement digne de voir le iour, mais s'offrit d'en donner son approbation s'il eut esté nécessaire.

Ie peux donc à bon droit dire que ce Volume peut profiter non seulement aux deuots, & personnes portées à la pieté, mais à tous ceux qui ne sont portez que d'une simple curiosité de cognoistre les choses estrangeres & non communes. Pour les esprits blessez ou enyurez du mal-heureux peché d'enuie qui perce iusques aux plus fortes & secretes murailles du monde, il m'est indifferét qu'ils m'ayent en consideration ou en mespris, suffit que l'on sçache que ce sont personnes qui ne sçauoient souffrir en autrui le bien qu'ils ne peuvent faire eux mesmes.

On me pourra dire que ie deuois auoir emprunté vne plume meilleure que la miéne pour polir mes escrits, & les rendre recommandables, mais c'est dequoy ie me soucie le moins, & vous assure que quand bien ie l'aurois pu faire ie ne l'aurois pas fait, car il n'est pas raisonnable qu'un pauvre frere mineur comme moy, se pare des riches thresors de l'eloquence d'autrui, & puis ie n'ay pas entrepris de contenter les amateurs de beaux discours, mais d'edifier les bonnes ames qui verront en cette Histoire vne grande exemple de patience & modestie en nos Sauvages, vn cœur vrayement noble, & vne paix & vnion admirable, car que seruent tant de mots nouueaux & inuentez à plaisir sinon pour vuider l'ame de la deuo-

tion & la remplir de vanité. Il n'y a pas iusques à de certaines deuotes & petites seruantes de Iesus-Christ, qui veulent pindariser & faire les sçauantes en matiere de bien dire. Il vaudroit bien mieux, disoit saincte Therese, qu'elles vissent du langage des hermitresses, sceussent peu parler & bien operer, que de s'amuser à ces cajoleries ou discours, affetez.

On demanda vn iour à Demosthenes par quel moyen il estoit plus excellent que les autres en l'art de bien parler, il respondit en consommant plus d'hyule que de vin. Ie pourrois rendre la mesme responce à ceux qui m'interrogeroient du moyen d'auoir pu traualler à mon Histoire, estant si occupé d'ailleurs en d'autres commissions. Que la lampe m'a seruy

de Soleil, & qu'à peine ses rayons m'ont ils veu composer mes écrits qui portent le pardon de mes fautes s'il s'en trouue dans le corps de ce Liure, car il est bien difficile qu'ayant l'esprit partagé en tant d'endroits & preoccupé de tant de differentes affaires il ne s'y soit glissé quelques redites ou trop de sentences & d'exemples, qui portent la rougeur au front de ceux qui se qualifient du nom de Chrestiens, & vivent presque en payés. Tout le monde abonde en son sens & en ses sentimens, quelqu'un me dira que j'ay plustost allegué les sentences des sages payés que non pas des vertueux Chrestiens. Je l'ay fait pour ce qu'elles me sembloient plus à nostre confusion, car quand ie considere la vie & mœurs d'un Phocion ou
d'un

d'un Socrates, où les riches docu-
mens d'un Marc Aurelle, & d'un
Seneque Payens, ie suis plus esmeu
pour la vertu que non pas par la
consideration d'un saint Iean
Baptiste, où les belles sentences de
quelque autre Saint qui n'ayent
point eu de vices. De mesme ie
reste plus confus en la pensée de la
vie d'une sainte femme, que d'un
saint homme, à raison de la fra-
gilité du sexe feminin, qui me
donne quelque esperance de pou-
voir paruenir à la vertu, l'homme
ayant naturellement plus de cou-
rage, & la femme moins de reso-
lution.

Mon intention a tousiours esté
bonne, & ne voudrois pour rien
auoir offensé qui que ce soit, car
pour la reprehension que ie fais
aux vices, personne ne s'en peut
é

offencer que les viciex mesmes
desquels ie ne dois pas craindre le
mespris, n'y appeter les loüanges:
Si j'ay parlé aduantageusement
pour mes Sauvages contre ceux
qui negligeoient leur conuersion,
ç'a esté par deuoir, & non pour
interest que de celuy de mon
Dieu. J'ay blasmé le peu de soin
qu'on a eu du pays, & ie les ay deu
faire pour la mesme intention, &
faire veoir les choses comme elles
se sont passées pour y apporter les
remedes, car ç'a esté vne chose bien
deplorable que quelques Mar-
chands des Compagnies ancien-
nes, auant cette nouuelle, qui a
pris tout vn autre esprit y ayent
apporté si peu de soin, & plustost
nuits que fauorisez nos pieux des-
seins de les conuertir, rendre se-
dentaires, & peupler le país.

Ie remonstre avec raison combien il seroit necessaire pour le bien du public d'imiter en quelque chose les loix Chinoises, & regler les pauvres & vagabonds, non contre la charité que ie dois aux vrais pauvres & membres de Iesus-Christ, mais pour remedier aux abus qui se glissent sous ce nom de pauvres; car en verité il se trouue en beaucoup de choses de la tromperie, qui seroit besoin de cognoistre pour le soulagement des vrais pauvres, & corriger les abus.

Ie fais mention des trois Ordres establis par saint François, non pour en releuer le lustre; car il parle assez de soy-mesme, mais pour nostre repos & contenter ceux qui en desirent sçauoir les distinctions i'auois aussi dessein d'insérer en ce

volume plusieurs pieces importantes touchant nostre establissement & mission és terres du Canada avec nos Dictionnaires & phrases de parler és langues Canadoise, Algoumequine, & Huronne; mais l'ayant veu grossir suffisamment sous ma plume, j'ay creu avec le conseil de nos amis qu'il valloit mieux laisser toutes ces pieces & ces Dictionnaires pour vn autre Tome à part, que de grossir trop inconsiderément celiure, autrement il m'eust fallu contre le sentiment de plusieurs retrancher de mon liure de belles authoritez, lesquelles si elles ne plaisent aux vns, pourront contenter les autres, car il y a des esprits qui se delectent au meslange, & en la diuersité, principalement les simples pour lesquels j'escris, &

non pour les doctes qui n'ay de-
quoy leur satisfaire.

Voyla, amy Lecteur, mon pe-
tit labeur, l'Histoire du Canada
que ie vous prie d'aggréer &
prendre en bonne part: Si elle ne
merite vostre entretient, qu'elle
aye part à vostre amitié qui la def-
fendra contre tous ses envieux.
La bonne vefue au temple ne fut
pas mesprisée pour son petit de-
nier, ie n'ay pû faire mieux, où il
m'eust fallu du temps pour r'ap-
peller mon esprit, & mes pensées
souuent esloignées du cours de
ma plume, & embarrassées aux de-
voirs de l'obeïssance que i'ay tous-
jours preferés à mes propres inte-
rests, pourueu que Dieu soit loué,
& mes pauvres Canadiés assiste,
c'est tout ce que ie demande, &
puis souhaiter avec vos bonnes

prieres , lesquelles i'implore à ce
que Dieu me fasse la grace de pra-
tiquier pour son amour les mes-
mes vertus que les barbares exer-
cent pour l'amour d'eux-mesmes,
& qu'à la fin ie vous puisse voir
dans le Paradis, où nous conduise
le Pere, le Fils, & le saint Esprit.
Amen.



Approbation des Docteurs.

Nous soubsignez Docteurs
 en Theologie de la Faculté
 de Paris, certifions auoir leu le li-
 ure intitulé , *Histoire de Canada*,
 Composé par le Frere GABRIEL,
 del'Ordre des Recollets, auquel
 nous n'auons rien trouué contrai-
 re à la Foy Catholique, Apostoli-
 que & Romaine, ny aux bonnes
 mœurs , en foy dequoy nous
 auons signé le present tesmoigna-
 ge, ce vnziesme Iuillet mil six cent
 trente. six.

LE MAISTRE.

PEAN.

é iiij

Permiſſion du P. Cōmiſſaire general.

N OVS ſoubſignez Frere CHERVBIN DE MARCIGNY de l'Ordre des Fr. Mineurs Recollets, Pere des Prouinces de S. François, & de S. Bernardin en France, & Commiſſaire Ceneral en cette Prouince de S. Denys du meſme Ordre, permettons à Fr. Gabriel Sagard, Profes dudit Ordre, & de ladite Prouince, de faire imprimer vn liure intitulé, *Histoire du Canada, où les voyages que les FF. Mineurs Recollets y ont faiets en diuers temps pour la conuerſion des Sauvages, avec vn Dictionnaire des langues Françoisse, Hurône, & Canadienne.* En gardant ce qui eſt determiné par le ſacré Concile de Trente, Ordonnances du Roy, & Conſtitutions de l'Ordre touchant l'impreſſion des liures. Faiet en noſtre Conuent de l'Annunciation de la glorieuſe Vierge à Paris, ſous noſtre ſein, & ſeau de la Prouince, le 19. iour du mois de May l'an de grace 1635.

DE CHERVBIN DE MARCIGNY,
Commiſſaire General.

Permission des Superieurs.

L'Ay soubigné Erere ANTOINE
DES MOYNES, Diffiniteur de
la Prouince de Paris, Ordre de S.
François des FF. Mineurs Recollects,
certifie auoir veu, & leu par le com-
mandement de nostre Reuerend P.
Prouincial, le R. P. Ignace Legault,
vn liure intitulé, *Histoire du Canada,*
où les voyages que les FF. Mineurs Recol-
lects ont faits en diuers temps pour la con-
uersion des Sauvages en l' Amerique, avec
vn Dictionnaire des langues François,
Algonmequine, Huronne, & Canadien-
ne: faict & composé par Fr. GABRIEL
SAGARD, Religieux de la mesme Prouin-
ce & du mesme Ordre, & n'y auoir trou-
ué rien de contraire à nostre sainte
Foy, ny aux bonnes mœurs, ains l'ay
iugé fort vtile, & profitable d'estre
mis en public, pour exciter les cœurs
des fidels Catholiques, Apostoliques,
& Rômain, à assister ces pauvres ido-
latres, touchant leur conuersion au
vray Dieu. Faict en nostre Conuent
de S. Germain en Laye, ce iour S. De-
nys Arcopagite 9. Octobre 1635.

FR. ANTOINE DES MOYNES.



I'Ay soubssigné Theologien, Predicateur,
& Confesseur des Peres Recollets de la
Prouince de saint Denys en France, certifie
auoir leu le liure intitulé *Histoire du Canada,*
& *voyages que les FF. Mineurs Recollets y ont*
faicts pour la conuersion des sauvages, avec un
Dictionnaire des langues Françoisse, Canadoise,
Algonnequine, & Huronne: fait & composé
par le Frere GABRIEL SAGARD, Religieux de
nostre mesme ordre & Institut. Auquel ien'ay
rien trouué contraire à la Religion Catholi-
que, Apostolique, & Romaine, la lecture
duquel fera recognoistre aux ames Chre-
stiennes l'extreme obligation qu'elles ont à
Dieu du don de la Foy, voyans la barbarie és
mœurs prophanes, & brutalité de vie de ces
peuples: ce que les Chrestiens seroient si
Dieu ne les auoit pollis par la cognoissance
de son nom & lumiere de la foy. I'ay iugé
que ce liure pourroit estre vtile au public.
En foy dequoy i'ay signé de ma main, ce
vingt septiesme iour de Decembre 1634. A
nostre Couuent de Paris.

F. ANGE CARRIER.
qui supra.



Extrait du Privilege du Roy.

PAR Grace & Privilege du Roy, donné à Paris le 17 iour de May 1635. signé par le Roy en son Conseil, CROISET, & scellé du grand seau de cire jaulne, il est permis à Fr. GABRIEL SAGARD THEODAT, Religieux Recollet, de faire imprimer un livre intitulé, *Histoire du Canada, où les voyages que les Freres Mineurs Recollets y ont faicts en divers temps pour la conversion des Sauvages, avec un Dictionnaire des langues Françoises, Huronne, & Canadienne.* Et défenses à tous Imprimeurs & Libraires de ce Royaume, pays & terres de nostre obcissance d'Imprimer ledit livre, d'en vendre, ny distribuer d'autre impression que de celle que ledit Fr. GABRIEL SAGARD THEODAT, aura faict imprimer durant le temps de six ans, à compter du iour que la premiere impression sera achenée, sur peine de confiscation des exemplaires, de deux mille livres d'amende, & de tous despens, dommages, & interests, ainsi que plus au long est contenu audit Privilege.

Achené d'imprimer pour la premiere fois le dernier Aoust 1636.

Et ledit Fr. GABRIEL SAGARD, a trans-
porté le droit de son Privilège à CLAUDE
SONNIVS Marchand Libraire à Paris, pour
en jouir selon la teneur d'iceluy.

HISTOIRE



HISTOIRE DV CANADA,

ET

VOYAGES DES PERES
RECOLLECTS EN LA
nouuelle France.

LIVRE PREMIER.

*Diuers motifs des voyageurs & de l'inten-
tion des FF. Mineurs Recollects à l'en-
treprinse de leurs voyages ez pais des
Canadiens & Hurons.*

CHAPITRE I.



A pratique de voyager
d'un pais en vn autre est
fondée sur diuers motifs &
desseins. Les vns y sont
poussez par vne certaine
instabilité & inquietude
d'esprit qui ne leur permet d'arrester long-
temps en vn mesme lieu, comme vn Cain le-

A

quel après auoir commis ce meschant acte de fratricide, qu'il tua par enuie de ce qu'il estoit plus homme de bien queluy, & fauori de Dieu, en demeura tout troublé & plein d'inquietude (effect du peché) qui le rendit vagabond & errant par le monde, sans sçauoir où il alloit que pour penser euit le courroux & la vengeance de Dieu avec la mort, qui à toute heure il apprehendoit & luy aduint en punition de son forfait.

*Genes 12.
& 26.*

Les autres voyagent par necessité comme vn Abraham & son fils Isaac pour euit la famine, sortent de la terre de Chanaan, l'un pour aller en Egypte, & l'autre en la terre des Philistins, car la famine & la necessité est vne marastre si pressante & facheuse, qu'elle conduit les plus foibles au tombeau & contrainct les plus robustes à de longs voyages, pour trouuer remede à leur necessité.

Les autres sortent de leur pais attirez par le profit & gain temporel, comme les Marchands qui courent d'un pôle à l'autre, la mer & la terre, l'Orient & l'Occident, le Septentrion & le Midy, pour paruenir à leur desir insatiable d'amasser richesses.

*Epimenide
Peintre,*

D'autres sont portez d'un desir d'apprendre en voyageant, comme vn Epimenide Peintre, lequel partit de Rhodes, & s'en alla en Asie, la où il demeura long temps, puis s'en reuint à Rhodes, sans que iamais personne luy entendit dire aucune chose de ce qu'il auoit veu & faict en Asie; dequoy s'es-

merueillant les Rhodiens, le prièrent qu'il leur voulist conter quelque cas de ce qu'il auoit veu; ausquels il respondit en telle sorte: i'allay dix ans sur la mer pour me faciliter à patir, ie demeuray autre dix ans en Asie pour apprendre à peindre, & six autres estudiay en Grece pour accoustumer à metaire, & partant n'esperez pas grand discours de moy; ce qu'ayant dit il se teüt; & laissa les autres dans leur bon appetit, ce qui me fait resouuenir de ce qui m'a esté dit depuis peu, que la Royne d'Espagne à present regnante, ayant esté pour entrer dans l'un de nos Coments & sceut qu'il estoit l'heure du silence, se donna la patience d'attendre dans l'Eglise que les Religieux l'appellassent, sans s'en plaindre d'un petit mot.

Il y en a d'autres qui veulent courir les mers & la terre pour se rendre plus illustres & diuins entre les hommes, par la cognoissance des choses les plus belles & magnifiques de l'univers, comme vn Appollonius Thianeus, lequel ayant tournoyé toute l'Asie, l'Afrique & l'Europe, depuis le pont du Nil où fut Alexandre, iusques en Gades où sont les colonnes d'Hercules, estant arriué en Ephese au Temple de Diane, les Prestres de la Deesse luy demanderent, quiestoit la chose de laquelle il s'esmerueilloit plus par le monde: car il est certain que l'homme qui a beaucoup veu, note plus vne chose que l'autre. Et combien que ce Philosophe fust

Apollonius
Thianeus.

plus estimé en fait qu'en parole, si leur fit-il ceste responce digne d'estre nottée.

Responce
d'Appolo-
nius Thia-
neus.

Prestres sacrez, i'ay cheminé longuement par les Royaume des Gaulois, des Anglois, des Espagnols, des Germains, des Latins, des Lidians, des Hebrieux, des Grecs, des Parthes, des Medes, des Phrigiens, de Corinthiens, & des Perses, mesme par le grand Royaume des Indiens, que i'appelle le Royaume sur tous les autres Royaumes, car luy seul vaut mieux que tous les autres ioincts ensemble: mais ie vous aduise qu'ils sont tous differens; à sçauoir, en langages, personnages, bestes, metaux, eaux, chairs, coustumes, loix, terres, edifices, vistemens, contenances, & sur tout en Dieux & en temples, pour ce qu'il y a autant de difference d'un langage à autre, comme les Dieux & les temples d'Europe sont differens à ceux d'Asie. Toutesfois entre toutes les choses que i'ay veües, de deux seules suis esmerueillé. La premiere est, que par tout où i'ay esté, i'ay tousiours veu le superbe cōmander à l'humble, le querelleux au pacifique, le tyran au iuste, le cruel au pitoyable, le couïard au hardy, l'ignorant au sçauant; & le pis encores, i'ay veu les plus grand larrons pendre les plus innocens. La seconde chose dont ie me suis esmerueillé, est qu'en tant de pais que i'ay trauersé, ie n'ay sçeu parler à vn homme perpetuel, ains les ay trouué tous mortels, prenans fin aussi-tost le moindre, que le plus

grand : car maints sont mis du soir en la sepulture , que le iour pensoient auoir la vie plus assurée.

Il y en a d'autres qui voyagent par vne sainte deuotiō de visiter les Saints lieux, cōme vn S. Hierosme la terre Sainte. Et les autres pour porter le flambeau de l'Euangile par tout le monde , suiuant le commandement que le Sauueur donna à ses Apostres. Allez par tout le monde, & preschez l'Euangile à toute creature. C'est ce dernier motif qui sous la sainte obediace nous a fait entreprendre le voyage des Hurons & Canadiés, non à la maniere d'Appollonius, pour y polir nos esprits & en deuenir plus sages & cōsiderables entre les hommes, mais pour en secourant nos freres du Canada, y porter le flambeau de la cognoissance du fils de Dieu, & en chasser les tenebres de la barbarie & infidelité, afin que comme nos peres de nostre Seraphique ordre de S. François uoient les premiers porté l'Euangile dans les Indes, Orientales & Occidentales, & arboré l'estendart de nostre redemption és peuples qui n'en auoient iamais ouy parler ny eu cognoissance , à leur imitation nous y portassions nostre zele & deuotion, afin de faire la mesme conqueste, & eriger les mesmes trophées de nostre salut , où le diable auoit demeuré paisible iusques à present.

C'en a donc pas esté pour aucun autre interest que celuy de Dieu & la conuersion des

Marc 161
v. 15.

Sauuages, que nous auons visité ces larges
Prouinces, où la barbarie & la brutalité y
ont pris tels aduantages, que la suite de ce
discours vous donnera en l'ame quelque
compassion de la misere & auéglement de
ces pauures peuples, où ie vous feray voir
quelles obligations nous auons à nostre bon
I E S V S, de nous auoir deliurez de telles te-
nebres & brutalité, & poly nostre esprit ius-
qu'à le pouuoir cognoistre, aymer, & espe-
rer l'adoption de ses enfans: vous verrez
comme vn tableau de relief & en riche taille
douce, la misere de la nature humaine, vitiée
en son origine, priuée de la culture de la foy,
destituée des bonnes mœurs, & en proye à la
plus funeste barbarie que l'esloignement de
la lumiere celeste peut grottesquement con-
cevoir. Le recit vous en fera d'autant plus
aggreable par la diuersité des choses que ie
vous raconteray auoir remarquées pendant
plus de quatorze années que nos freres y
ont demeuré, que ie me promets que la com-
passion que vous prendrez de la misere de
ceux qui participent avec vous de la nature
humaine, tireront de vos cœurs des vœux,
des larmes, & des soupirs, pour coniuurer le
Ciel à lancer sur ces cœurs des lumieres cé-
lestes, qui seules les peuuent affranchir de la
captiuité du diable, embellir leurs raisons de
discours salutaires, & polir leur rude barba-
rie de la politesse des bonnes mœurs, afin
qu'ayant cognu qu'ils sont hommes, ils puis-

sent deuenir Chrestiens, & partiziper avec vous de cete foy qui nous honore du riche tiltre d'enfans de Dieu, coheritiers avec nostre doux IESVS, de l'heritage qu'il nous a acquis au prix de son sang, ou se trouuera cette immortalité veritable, que la vanité d'Apollonius après tant de voyages, n'auoit peu trouuer en terre, où aussi elle n'a garde de se pouuoir trouuer.

Comme les Religieux ont par tout esté les premiers employez à la cōqueste des ames, & de la Missiō des P.P. Recollets en Canada.

CHAPITRE II.

LA diuine prouidence a disposé ainsi des choses, que tous ceux qu'il a enuoié à la conqueste des ames fidelles, ont esté Apostres ou gens Apostoliques. La doctrine & sainteté desquels il a pleu à Dieu de confirmer par miracles autentiques & irreprochables.

Or depuis l'an 600 la pluspart des peuples infidelles ont esté conuertis à la creance de IESVS Christ, par des Religieux faisans profession d'obeissance, pauvreté & chasteté, & si vous prenez la peine de lire les historiens vous verrez qu'il n'y a coin où l'Euangile ait esté preschée depuis quatre cens ans, que ce n'ait esté des Religieux de S. François qui en ayent fait l'ouuerture aux despens de leur

Depuis 400 ans des P.P. Mineurs ont planté la foy pres- que par tout.

propre vie.

Les Religieux ont donc cet auantage & cet honneur d'auoir passé les mers & s'estre exposez à vne infinité de perils pour porter l'E-uangile de nostre Seigneur en toutes les nations de la terre habitable, ou ils ont exercé indifferemment toutes les fonctions de Curé ou Pasteur, administrans tous les Sacremens, comme il estoit bien necessaire, puis qu'eux seuls s'estoient employez & s'emploient à la con-ersion des infidelles & barbares, de sorte que la gloire que l'Eglise a receu en la conuer-sion des Indes & le contentement de tous les bons Chrestiens vient du trauail & du soin des Religieux & les Euesques qui y sont à present y ont esté establis par les Papes pour continuer heureusement nos premieres conquestes & faire ce que faisoient auparauant les Religieux dont quelques particuliers auoient esté les premiers Euesques comme ils y auoient esté les premiers Predicateurs apres les Apostres & mesme ont publié l'Euägile ou nous n auons pas cognoissance que les Apostres ayent penetré.

A la verité le temps qui deuoit nous auoir rendu sages, n'a pû qu'après de longues années faire cognoistre à nos Marchands François, qui auoient la traicte & le gouuernement du grand fleuve de Canada (descouuert depuis l'an 1535. par Jacques Cartier) que sans l'ayde de quelque colonies de bnos

& vertueux Catholiques, ils n'y pouuoient guerres aduancer. La seule auarice leur faisoit passer la mer pour en rapporter des pellete-ries, & les huguenots & heretiques partici- poient egale-ment du profit avec les Catho- liques; si les Catholiques auoient vn Prestre, les huguenots auoient vn Ministre, & pen- dant qu'ils s'amusoient à leur dispute, les Sauvages restoient confirmez dans leur irre- ligious pour voir & se scandalizer des dispu- tes de religion, car ils ne sont pas bestes ius- ques là, qu'ils ne voyent bien nos differents & ceux qui font le signe de la S. Croix ou non, comme ils m'ont dit quelquefois.

En ces commencemens que les François furent vers l'Acadie; il arriua qu'un Prestre & un Ministre moururent presque en mesme temps, les matelots qui les enterrerent par vne impieté raille de les mettre tous deux dās vne mesme fosse, pour veoir si morts ils de- meureroient en paix puis que viuants ils ne s'estoient pū accorder, toutes choses se tour- noient en ritée, les Catholiques sans deuotion s'accommodoiēt aysement à l'humour des hu- guenots, & ces heretiques malicieux se main- tenoient dans leur vie libertine, point d'obsta- cle ny d'empeschement à leur tyrannie qui for- çoit mesme les Catholiques d'assister à leurs prières & chans de Marot, autrement ils n'estoiēt point ad mis dans leurs vaisseaux ny employez en leurs manufactures, dequoy ie

me suis souuentres fois plaint, mais en vain, car Dieu n'est pas respecté iusques là, que son Eglise ait par tout le dessus.

Point d'a-
uancement
en Canada

C'estoit vne chose digne de compassion de veoir tant de desordres, la terre ne se cul-
tuoit point, le país ne s'habituoit pas, & point du tout de conuersion ny d'enuie de conuertir, & neantmoins à ouyr les Marchands vous eussiez dit qu'ils n'aspiroient rien tant que la gloire de Dieu, la conuersion des Sauvages & le bien du país, ie veux bien croire qu'ils eussent quelque bonne volonté & eussent esté bien ayse d'y voir de l'aduancement, mais tousiours sans effect, à cause de leur interest temporel auquel ils estoient attachez principalement.

Ces belles apparences firent resoudre le sieur Honel Secretaire du Roy, personnage tres-affectionné au seruice de nostre Seigneur d'estre de la partie, & s'associer avec eux, mais comme il estoit homme iudicieux & dans le dessein d'une personne qui ne respiroit rien moins que ses propres interests, il recognut aussi-tost les deffauts de la compagnie, à laquelle il proposa que sans Religieux rien ne se pouuoit aduancer ny esperer, & que leur intention principale deuoit estre la gloire de Dieu & la conuersion des Sauvages autrement Dieu ne beniroit point leur labeur, car il faut premierement chercher le Roiaume de Dieu & sa iustice, & puis toutes choses nous seront administrées.

Ces Messieurs trouuerent ces propositions bonnes, aduoierent leur manquement, & le prierent de faire choix avec eux, des Religieux les plus vtils & de moindre charge à la compagnie pour cette Mission. La memoire encore toute recente des grands fruiçts que les Recollets auoient operé dans l'Amerique Orientale & au Royaume du Toxu que d'autres disent Voxu, qu'ils auoient depuis n'agueres conuertý à la foy, leur fist ietter l'œil sur eux & s'adresser au R. P. Chapoin Prouincial des Recollets de la Prouince de S. Denis, pour obtenir de luy quelque Religieux pour vne si necessaire & glorieuse Mission.

S'adressant à vn Pere si zelé, ils n'en pouuoient esperer que tout contentement, aussi en receurent ils les fruiçts qu'ils esperoient, i'auois l'honneur pour lors d'estre son compagnon & d'auoir part à ses soins, aussi me fist il la faueur de m'en communiquer ses sentimens, & la bonne volonté qu'il auoit pour le seruice de nostre Seigneur en ceste affaire, i'eusse bien desiré deslors d'estre de la partie, si m'a bonne volonté & mon insuffisance eussent merité cette grace, mais il en falloit de meilleurs que moy & capables d'vn plus grand seruice, & par ainsi il me fallut auoir patience iusqu'en vn autre temps, que Dieu couurit d'vn voile mes imperfections, & furent nommez pour la Mission, le R. Pere Denis Iamet, pour Commissaire le

P. Jean Dolbeau, pour successeur en cas de mort, le P. Joseph le Caton, & le P. F. Pacifique du Plessis, qui furent les quatre premiers Religieux qui passerent la mer pour la conuersion des peuples du Canada.

Mais pour ce que la chose estoit d'importance & qu'elle ne pouuoit estre bien faicte que par les voyes ordinaires & bien seantes aux Religieux de S. François. Nous eumes recours à sa Sainteté pour en auoir les permissions necessaires, lequel agreant nostre zele en escriuit à son Nonce residant en Cour de France, duquel nosdits Religieux destinez pour la Mission receurent avec sa benediction, vne permission verbale d'aller dans les terres infidelles & Canadiennes pour travailler à leur conuersion, en attendant le Bref que par negligence on ne reçut que deux ou trois ans apres nostre entrée au Canada; comme il se verra cy apres.

Mission de
Paul V.
donnée par
le Cardinal
Bentiuole.
aux PP. Re-
collects.

*CVYDO BENTIVOLE, Par
la grace de Dieu & du S. Siege Apostolique
Archeuesque de Rhodes, de la part de nostre
S. Pere le Pape Paul cinquiesme au Tres-
Chrestien Roy de France & de Nauarre,
Louys treiziesme, Nonce Apostolique, &c. &
specialement choisi, commis & député de par
nostre S. Pere Paul cinq, pour Iuge ou Com-
missaire en ces quartiers. A.N. bien aimé*

le Venerable Pere Ioseph le Caron Prestre,
Religieux profez Recollect de l'Ordre de S.
Francois, Prouince de Paris, ou S. Denis, &
à tous autres Peres & Freres Recollects pro-
fez dudit Ordre de S. Francois constituez en
l'ordre sacré de Prestre & Confesseurs ap-
prouuez par l'ordinaire, lesquels sont sur le
point de receuoir Mission & obediencie de
leur Pere Prouincial, pour s'acheminer avec
vous en quelques contrées des Payens & in-
fidelles pour moiennner leur conuersion à la
vraye foy & Religion Catholique, où que
vous pouuez prendre avec la permission &
licence du susdit Pere Prouincial, salut &
sincere dilection en nostre Seigneur. Vous
pourrez scauoir qu'autrefois le Reuerendis-
sime Archeuesque Comte de Lyon, Ambas-
sadeur de sa Majesté Tres-Chrestienne vers
Nostre S. Pere, ayant requis le S. Siege Apo-
stolique & supplié sa Saincteté, que sous le
bon plaisir de sadite Saincteté, & avec les
conditions cy-dessous escrites, il fut loisible
au Reuerend Pere Prouincial des Religieux
Recollects du susdit Ordre S. Francois, d'en-
uoyer quelques Religieux du mesme Ordre
& de sa Prouince de S. Denis en France,
lesquels fussent suffisans & idoines pour

prescher & estendre la foy Catholique dans les terres & regions infidelles, & d'autant que cest æuvre estoit de foy meritoire, & qu'il auoit pleu à sadite Sainteté de nous donner plein pouuoir de cōceder les moyens competens & necessaires pour l'execution de tout ce que dessus par les causes & raisons sus alleguées, par autorité & commission Apostolique, nous auons donné & accordé, donnons & accordons à vostre R. P. Provincial, & à vous qui auçz esté nommez, choisis & deputez par luy, les facultez & priuileges suinauts, desquels vous pourrez vous seruir & preualoir au cas que dans ces lieux, il ne se trouue personne qui en aye de semblables & dont le temps ne soit encore expiré, & pour le temps seulement que vous, frere Ioseph Caron & vos associez demeurerez dans ces pays de payens & infidelles, & sont les susdit Priuileges de la teneur vertu & pouuoir qui s'ensuit, sçauoir est, de recevoir tous les enfans nés de parens fidelles & infidelles, & tous autres de quelque condition qui soyent, lesquels apres auoir promis de garder, & observer tout ce qui doit estre gardé & observé par les fidelles, voudront embrasser la verité de la foy Chrestienne & Catholique, de bap-

riuer mesmes hors les Eglises en cas de ne-
cessité, d'entendre les confessions des peni-
tens, & icelles diligemment entendues,
apres leur auoir imposé vne penitence sala-
taire selon leurs fautes, & enioint ce qui doit
estre enioint en conscience, les destier & ab-
soudre de toutes sentences d'excommunica-
tion & autres censures & peines Ecclesia-
stiques, comme aussi de toutes sortes de cri-
mes, excez & delicts, mesme des reservez au
Siege Apostolique, & de ceux qui sont con-
tenus dans les lettres lesquelles ont accou-
stumé d'estre leuës le iour du Ieudy saint,
d'administrer les Sacremens d'Eucharistie,
Mariage & extreme Onction, de benir tou-
tes sortes de paremens, vases & ornemens
où l'onction sacrée n'est pas nécessaire, de
dispenser gratuitement les pouueaux con-
uertis qui auroient contracté ou voudroient
contracter Mariage en quelque degré de
consanguinité & affinité que ce soit, sauf au
premier & second, ou entre ascendants & des-
cendants, pourueu que les femmes n'ayent
point esté rauies, que les deux parties qui
auroient contracté ou voudroient contracter
soient Catholiques, & qu'il y ait iuste cause
tant pour les mariages des-ia contractez,

que pour ceux que l'on desire contracter, de
clarer & prononcer les enfans nais & issus
de tels Mariages legitimes. D'auoir un
Auel que vous puissiez porter avec bien-
seance, & sur iceluy celebrer es lieux decens
& honestes où la commodité des Eglises
vous manquera.

En foy & tesmoignage de tout ce que
dessus, nous auons commandé les presentes
lettres soubscrites & soubsignées de nostre
main, estre faites signées & scellées de no-
stre sceau par nos aimez Louys Sauannius,
nostre Auditeur & Docteur en l'un & l'autre
droict, & Messire Thomas Gallot Clerc
à Paris licentié es droicts canon & civil,
Notaire public & iuré tant de l'autorité
Apostolique que de la venerable Cour Epis-
copale de Paris, & suivant l'Edit du Roy
descriit & immatriculé es Registres de l'E-
uesché & Cour de Parlement de Paris, de-
meurant ausdit Paris rue neuue Nostre Da-
me, & nostre Notaire en ce quartier. Donné
à Paris l'an de Nostre Seigneur mille six
cens dix-huict le vingtiesme du mois de
Mars. Ainsi signé G. Archeuesque de Rho-
des Non. Apostolique, & plus bas par
commandement du susdit Illustrissime &
Reueren-

Reuerendissime Seigneur, Nonce Apostolique & Commissaire delegué. Th. Gallot Notaire public comme dessus, & Louys Sauannius Auditeur.

En suite de la permission de la Sainteté donnée à nos Peres, j'ay trouué coppie d'une lettre patente du Roy, par laquelle sa Maïesté donne la mesme permission à nostre R. P. Prouincial de la Prouince de S. Denis, priuatiuement à tous autres, de pouuoir enuoier des Religieux Mineurs Recollects dans les terres du Canada pour la conuersion des Sauvages, & qu'aucun autre du mesme ordre n'y puisse aller qu'avec sa permission & sous son obediencce, pour euitier aux desordres & confusions que la diuersité des commissions & superiorité pourroit apporter, dont voicy la teneur de la patente.

LOUIS PAR LA GRACE DE DIEU
Roy de France & de Nauarre. *Patentes du Roy pour les Recollects.*
A tous ceux qui ces presentes lettres verront, salut. Les feuz Roys nos predecesseurs se sont acquis le tiltre & qualité de Tres-Chrestien en procurant l'exaltation de la sainte foy Catholique, Apostolique & Romaine, & en la defendant de toutes oppressions. maintenant les Ecclesiastiques en leur ius, & rece-

vans en leur Royaume tous les Ordres de Religieux, qui avec une pureté de vie se mettoient à enseigner les peuples & les endoctriner tant de vive voix que par exemple. Et soit ainsi que nous soyons remplis d'un extreme desir de nous maintenir & conserver ledit tiltre de Tres-Chrestien, comme le plus riche fleuron de nostre couronne, & avec lequel nous esperons que toutes nos actions prospereront, voulans non seulement imiter en tout ce qui nous sera possible nosdits predecesseurs, mais mesmes les surpasser en desir d'establir ladite foy Catholique, & icelle faire anoncer és terres loingtaines, barbares & esträgeres où le S. Nom de Dieu n'est point innoqué. Nostre cher & deuot Orateur, le Pere Prouincial de la Prouince de S. Denis en France, des Religieux de S. François de l'estroicte obseruance vulgairement appellez Recollets, se soit cy-deuant, & en secondant nos desirs, offert d'enuoyer és pais de Canada, des Religieux dudit Ordre, pour y prescher le saint Euangile & amener à la sainte foy, les ames des habitans dudit pays, qui sont errantes & vagabondes dans leurs fantasies, n'ayans aucune cognoissance du vray Dieu, & à cest effect y en ayant ex-

uoÿé nôbre, leur labeur (par la grace de Dieu)
n'auroit point esté inutile, au contraire quel-
qu'un desdits habitans de Canada reco-
gnoissans leur vieil erreur ont embrassé avec
ardeur la sainte foy, & y ont receu le saint
Baptême, nouuelle qui nous a esté aussi ag-
greable qu'aucune qui nous peust arriuier, &
ne reste à present qu'à affermir ce qui a esté
commencé par lesdits Religieux, ce qui ne
peut mieux estre qu'en permettant ausdits
Religieux de continuer, ensemble de s'habi-
tuer audit pays & y bastir autant de Con-
uents qu'ils iugeront estre nécessaires selon
les temps & lieux, tous lesquels Conuents,
Monasteres & Religieux seront sous l'obe-
dience dudit Pere Prouincial de la Prouince
de saint Denis en France & non d'autre,
& ce pour empescher toute cōfusion qui pour-
roit suruenir, si chaque Religieux à son pre-
mier mouuement se portoit de passer audit
pays de Canada, à quoy desirans remedier
pour l'aduenir, nous auons dit & déclaré, di-
sons & declaron par ces presentes signées de
nostre main, nostre intention & volonté
estre que le Pere Prouincial de ladite Prouin-
ce de saint Denis en France seul, puisse &
luy soit loisible d'enuoyer audit pays de Ca-

nada, autāt de ses Religieux Recollets qu'il iugera estre necessaire, & quād bon luy semblera, ausquels Religieux Recollets nous auons permis & permettons par cesdites presentes de soy habituer audit pays de Canada, & y faire construire, & bastir, vn ou plusieurs Couuents & Monasteres, selon, & ainsi qu'ils iugeront estre à faire, & auquel pays de Canada aucuns autres Religieux Recollets ne pourront aller, si ce n'est par l'obedience qui leur sera donnée par ledit Prouincial de laditte Prouince de saint Denis en France, & ce afin d'euitier toute dissentiō qui pourroit suruenir, faisant deffence à tous les Maistres des ports & haures de permettre qu'aucuns Religieux de l'Ordre de S. François s'embarquent pour passer & aller audit pays de Canada, sinon sous l'obedience dudit Prouincial & de celuy qu'il commettra pour superieur. Et en tesmoignant plus particulièrement nostre affection enuers lesdits Religieux, nous auons iceux ensemble leurs Couuents & Monasteres pris en nostre protection & sauuegarde. SI DONNONS en mandement à nostre tres-cher & aymé cousin le sieur de Montmorancy Admiral de France ou ses Lieutenants sur tous les ports

& haures de cestuy nostre Royaume, & à tous nos autres iusticiers, & officiers qu'il appartiendra, que le contenu cy-dessus ils ayent à faire garder & observer de point en point selō sa forme & teneur, & faire publier ces presentes par tous les ports & haures, & lieux de leurs iurisdiccions, sans permettre qu'il y soit contrenu. Mandon en outre à nostre Viceroy de Canada, ses Lieutenans ou autres nos Officiers des lieux, qu'ils ayent à maintenir lesdits Religieux Recollects de ladite Prouince de saint Denis en France audit pays, sans qu'ils y en puissent recevoir aucuns qui n'ayent l'obedience dudit Prouincial de la Prouince de France, tenant au surplus la main à l'exécution de ceste nostre volonté, nonobstant quelconque lettres à ce contraires, auxquelles nous auōs desrogé & desrogeons par cesdites presentes. Car tel est nostre plaisir. En tesmoing dequoy nous auons faict mettre nostre seel à cesdites presentes.

DONNE,

Voila toutes les pieces principales & necessaires, quel'on pouuoit desirer des puissances souueraines iointes à l'autorité de nostre R. P. Prouincial, pour pouuoir affermir & rendre asseurée vne si glorieuse & meritoire

Mission, de laquelle le S. Esprit auoit esté le premier auteur & inspirateur comme d'une œuvre qui estoit toute de luy & non des hommes, car qui peut aller à IESVS si Dieu ne l'attire.

De l'embarquement des quatre premiers Recollects, qui annoncerent la parolle de Dieu en Canada. La maniere de cabaner des Montagnais, où le P. Dolbeau hyerna & le P. Ioseph aux Hurons.

CHAPITRE III.

CES bons Peres s'estant tous disposez par frequentes oraisons, & bonnes œuvres à une entreprise si pieuse & meritoire, se mirent en chemin pour commencer leur glorieux voyage, à pied & sans argent à l'Apostolique selon la coustume des vrais freres Mineurs, & s'embarquerent à Honfleur l'an 1615. le 24. d'Auril enuiron les cinq heures du soir que le vent & la marée leur estoient fauorables.

Dieu qui leur auoit donné ce bon sentimēt & la volonté d'entreprendre ce penible voyage, leur fist aussi la grace de passer ce grand Océan & d'arriuer heureusement à la Rade de Tadoussac où ils prirent quelques heures de repos, & de là coulerent dans le port à la fa-

neur de la marée où ils mouillerēt l'ancre le 25. de May iour de la translation de nostre Pere S. François qui fut pris à bonne augure.

Si tost que ces bons Peres furent à terre ils rendirent graces à Dieu de les auoir assisté & conduit si à propos au port de salut , & ayans donné vn peu de respis à leur corps fatigué des tourmentes & vapeurs de la mer, ils considerent la contrée, laquelle ils trouuerent d'abord fort sterile, seiche, deserte & pleine de montagnes & rochers avec vne solitude si profonde qu'il leur sembloit estre au milieu des deserts de l'Arabie pierreuse, ils auoient desja veüs plus de cent cinquante lieues de país aussi miserable & affreux, & doutoient encore que le reste du Canada fut de mesme, neantmoins à tout euenement ils se resolurent d'y demeurer sous l'esperance que nostre Seigneur leur feroit descouurir quelque lieu propre pour si establis, comme il a faict avec le contentement & consolation interieure de tous ceux qui y ont faict quelque seiour.

Il me souuient que lors que i'estois en mer pour le mesme voyage, que plusieurs huguenots sembloient auoir pris à tasche de me decrier la laideur du país, & disoient qu'à la premiere venë i'en conceurois vn desplaisir fort grand, à l'encontre de tous ceux qui m'auoiēt porté à vn si laborieux voyage où rien n'estoit capable de pouuoir contenter en son obiet, les yeux n'y l'esprit de qui que ce fut; mais au contraire ie m'y trouuay fort satisfait & pre-

nois vn singulier plaisir de voir ces solitudes, comme i'eusse peu faire les aspres deserts de la Thebayde où residioient anciennement ces grands peres Hermites & Anacorettes.

Le R. Pere Dolbeau après auoir seiourné vn iour ou deux à Tadoussac, partit pour Kebec dans la premiere barge qui se mit à voile, & les autres peres cinq ou six iours apres dans d'autres vaisseaux pour le mesme lieu. Dés qu'ils arriuerent au Cap de Tourmente & veu ces belles prairies esmaillées en Esté de quantité de petites fleurettes, les bonnes terres de Kebec, & l'agreable contrée où est à present basti nostre petit Couuent, ils reprirent nouveau courage, iugerent la contrée bonne & capable d'y bastir, non seulement vn Monastere de pauvres freres Mineurs, mais d'y establir des Colonies, voir de tres-bonnes villes & villages s'il plaisoit au Roy d'y contribuer de ses liberalitez royales & aux Marchands vne partie du profit qu'ils en retirent tous les ans, qui leur vaudroit au double à l'aduenir.

La premiere chose que ce bon Pere fist estat arriué à Kebec, fust de rendre graces à Dieu, disposer vne Chapelle pour y celebrer la S. Messe, & des chambrettes pour se loger, mais comme en vn pais tres-pauvre beaucoup de choses lay manquans, il auoit recours à la patience du pauvre Iesus dans la Creche de Bethleem. Il y dit la premiere Messe le 25. iour de Iuin de la mesme année & nos autres Reli-

gieux en suite, avec des contentemens d'esprit qui ne se peuuent expliquer, les larmes leur en decouloient des yeux de ioye, il leur estoit aduis d'auoir trouué le Paradis dans ce pais sauuage où ils esperoient attirer les Angles à leur secours pour la conuersion de ce pauvre peuple plus ignorant que meschant.

Mais comment & par quelle inuention pourrons nous faire comprendre à vne infinité de Prestres & Religieux, les merites & les graces qui accompagnent inseparablement ceste diuine Mission, la pluspart craignent le patir & ne veulent mettre en compromis leur petite consolation. Toute la France bouillonne de Religieux, de Beneficiers & de Prestres seculiers, mais peu se peinent pour le salut des meschans. Il y en a vne infinité qui demeurent icy oyssifs mangeans le bien des pauvres & courans les benefices, que s'ils passioient aux Indes & dans les pais infidelles y pourroient profiter & pour eux & pour autrui, mais il y a tousiours ce mais, nous ne voulons rien endurer, fuyons le martyre & prenons des excuses qu'il y a assez à traualler icy où la vanité & le vice a pris tel pied qu'il semble incorrigible & se va dilatant comme vne mauuaise racine. Il y resteroit tousiours assez d'ouuriers neantmoins quand la moitié de tous les Religieux & des Prestres seculiers seroient enuoiez prescher la foy aux Gentils, qui manquent de ce que nous auons trop icy, mais il faudroit que ceste election se fist des plus vertueux, pour

qu'un aveugle conduit par un autre aveugle ne tombent tous deux dans la fosse.

Nos Religieux de Kebec, ayans tout leur petit fait disposé dans l'habitation, adviserent aux moyens de profiter non seulement aux François, auxquels ils seruoient des-jà de Chappelains, Curez & Religieux, leur conferrans tous les Sacremens, mais principalement aux Sauvages, pour le salut & la conuersion desquels ils s'estoient particulièrement acheminéz en leur pais.

P. Dolbeau
aux Montagnais.

Le P. Dolbeau tousiours plein de zele, prit le premier l'effor pour les Montagnais, car il ne pouuoit viure sans exercer la charité laquelle Dieu auoit infusé dans son ame. Il partit le second iour de Decembre pour y cabaner, apprendre leur langue, les catechiser & courir les bois avec eux, mais ayans par la grace de Dieu surmonté toutes les autres difficultés qui se rencontrent en semblables occasions, la fumée qui est en grande abondance dans leurs cabanes, notamment lors qu'il fait un temps nebuleux & de neige, luy pensa perdre la veüe qu'il n'auoit des-jà guere bonne, & fut plusieurs iours sans pouoir ouurir les yeux qui luy faisoient vne douleur extreme, tellement que dans l'apprehension que ce mal augmentast il fut contraint de les quitter après deux mois de temps & reuenir à l'habitation viure avec ses freres, car nostre Seigneur ne demandoit pas de luy la perte de sa veüe, ains qu'en le seruant il mesnageat pru-

demment sa santé laquelle est necessaire dans vn si grand trauail.

Or quelqu'vn me pourroit demander la raison pourquoy il auoit plustost choisi l'Hyuer, temps fort incommode & fascheux pour aller avec eux, que la saison d'Esté plus gaye & supportable à la piqueure des mousquites pres: La principale raison qu'on en peut donner est à mon aduis, que les Montagnais n'ont pas dequoy viure en Esté comme ils ont en Hyuer, car l'Esan qui est leur principale manne ne se prend que pendant les grandes neiges qui tombent en abondance dans les montagnes du Nord, où ils font leur chasse au poil, & à cause d'icelles montagnes les Sauvages qui les hantent sont appelez Montagnais.

Ie ne sçay si ie me trompe, mais il me semble que ces pauures gens viuent encore de la mesme sorte de nos premiers parens après le péché. Ils n'ont ny maison ny buron & ne s'arrestent en aucun lieu qu'où ils trouuent dequoy viure, la viande faillie ils leuent le camp qu'ils posent en autre endroit où ils croient trouuer de la beste, ou du poisson & quelques racines, qui est ce dequoy ils viuent principalement.

Le Pere Ioseph le Caron touché du mesme zele du Pere Dolbeau, choisit pour son lot le pais des Hurons auquel il s'achemina avec quelqu'vns de la nation qui estoient descendus à la Traicte. De la façon qu'il fut traicté en son voyage & receu dans le pais ie n'en sçay pas les particularitez pour ne m'y estre pas

trouué, mais il m'a assuré qu'il souffrit en chemin, autant que son naturel pouuoit porter, car outre toutes les difficultez des autres qu'il luy fallut deuorer, il eut tousiours l'auirõ en main & nageoit comme les Sauvages, à quoy ie n'ay iamais esté obligé, autrement ie fusse mort en chemin, i'appelle mort en chemin non la mort, mais vne peine qui m'eust esté insupportable, puis que exempt de cest incommodité arriuant au port il ne me restoit plus que la peau & les os, dont ie m'estonne de la nature mesme, laquelle à son dire est tousiours sur le point de mourir & ne peut mourir tant elle se flatte elle mesme. O mon Dieu que nous faisons souuent gagner le Medecin sans cause vraye que de la seule imagination, qui nous persuade souuent des grands maux où il n'y en a que de bien petirs.

Le bon Pere fut grandement bien receu des Hurons à leur mode, & luy tesmoignerent l'ayse & le contentement qu'ils auoient de sa venue. Ils pensoient le loger dans leurs cabanes pour pouoir iouir plus commodément de sa presence & de ses diuines instructions, mais comme cela repugnoit à sa modestie religieuse, après les en auoir humblement remercié, & remonstré que les choses qu'il auoit à traiter avec Dieu pour leur salut, denoient estre negociées en lieu de repos & hors le bruit des enfans, ils luy en accommoderent vne à part à la portée de la fleche hors de leur village, où les Sauvages l'alloient iournellement

visiter & luy de mesme leur rendoit leur visite dans leurs cabanes & par les bourgades où il se trouuoit souuent avec eux.

Il se transporta iusques à la nation des petuncux où il eut plus de peine que de consolation en la conuersation de ses barbares, qui ne luy firent aucun bon accueil ny demonstration que son voyage leur aggreant, peut estre par l'induction de leurs Medecins ou Magiciens, qui ne veulent point estre contrariez ny condamnez en leurs sortises. De maniere qu'apres quelque peu de seiour ce bon Pere fut contrainct de s'en retourner à ses Hurons, où il seiourna iusque au temps qu'ils descendirent à la Traicte. Tellement que tout ce qu'il pû faire en ce premier voyage, fust seulement de cognoistre les façons de faire de ce peuple, d'apprendre passablement leur langue & les disposer à vne vie plus honneste & civile, qui n'estoit pas peu traouillé en ce premier essay, car il ne faut pas tousiours reprendre & arguer au commencement, mais bien edifier & doucement captiuer en attendant le temps propre à la moisson, qui doit estre arrousee des benedictions du Ciel & fomentée d'une sainte & aggreable conuersation.

Comme le Pere Ioseph revint en France, & de son retour en Canada avec le P. Paul Huet. Des dangers qu'ils coururent en chemin, & de la sainte Messe qu'ils celebrerent pour la premiere fois à Tadoussac.

CHAPITRE IIII.

Retour du
Pere Io-
seph en Ca-
nada.

LE Pere Ioseph ayant passé vne année entiere dans le pais des Hurons & fait tout ce qui estoit en luy pour les disposer à vne vraye conuersion à laquelle peu de choses repugnent. Il iugea par les choses qu'il auoit veues & recognues estre expedient de faire vn voyage en France, pour en donner aduis à Messieurs de la compagnie, afin qu'ils y pourueussent & donnassent les ordres necessaires pour vne si belle moisson, de laquelle ils pourroient recueillir plus de couronnes & de gloire, que de toute autre action qu'ils embrassoient pour le Canada.

Ce bon Pere partit donc de son village, pour Kebec le 20. de May 1616. dans vn des Canots Hurons, destinez pour descendre à la Traicte, & firent tant par leurs diligences qu'ils arriuerent aux trois Riuieres le premier iour de Iuillet ensuiuant, où ils trouuerent le P. Dolbeau qui si estoit rendu dans les barques

des Nauires nouvellement arriuees de France pour la mesme Traicte.

Après qu'ils se furent entresaluez & rendu les actions de graces à Dieu nostre Seigneur. Le bon Pere Dolbeau leur aprit comme dès le 24. iour du mois de Mars passé, il auoit ensepulturé vn François nommé Michel Colin, avec les ceremonies vsitées en la sainte Eglise Romaine, qui fut le premier qui receut cette grace là dans le país.

La Traicte estant finie, tous se rendirent à Kebec l'vnzième de Iuillet, d'où au 20. du mesme mois apres auoir inuoqué l'assistance du S. Esprit, le pere Ioseph se mit en chemin avec le Pere Denis Iamet pour Tadoussac, & de là pour la France dans les mesmes Nauires nouvellement arriuees, qui furent conduits d'un vent si fauorable, qu'en moins de sept semaines ils se rendirent à Honfleur, où ayās rendu graces à ce Seigneur, qui les auoit preserué de tant de perils & hazards où ils estoient exposez pour son seruice, ils partirent pour Paris, où nous les irons reprendre presentement apres que ie vous auray dit, que le 15. du mesme mois, le P. Dolbeau donna pour la premiere fois l'Extreme-onction à vne femme nommée Marguerite Vienne, qui estoit arriuee la mesme année dans le Canada avec son mary pèsans s'y habituer, mais qui tomba bientôt malade apres son débarquement, & mourut la nuit du 19. puis enterrée sur le soir avec les ceremonies de la sainte Eglise.

Arriuee du
P. Ioseph
en France;

L'Extreme
onction
donnée
pour la pre-
miere fois.

Messieurs de la Societé furent fort aysé de voir le bon Pere Ioseph comme vne personne de creance, & d'apprendre de luy mesme du succez de son voyage, du bien qu'il leur faisoit esperer pour le spirituel & temporel du pais, & du zele qu'il auoit pour la conuersion des Sauuages, neantmoins avec tout cela, il ne peut obtenir d'eux autre chose qu'un remerciement de ses trauaux & vne reiteration de leur bonne volonté à l'endroit de nos Peres, sans autre effect.

C'est ce qui obligea ce bon Pere de chercher ailleurs le secours qu'il n'auoit pû trouuer en ceux qui y estoient obligez, & de penser de son retour en Canada en la compagnie du P. Paul Huet, puis que de parler de peuplades & de Colonies, estoit perdre temps, & glacer des cœurs des ja assez peu eschauffez, iusques à ce qu'il pleut à nostre Seigneur inspirer luy mesme les puissances superieures d'y donner ordre, puis que les subalternes n'y vouloient entendre, & ne s'interessioient qu'à leur interest propre.

Tres-mal satisfaits & avec peu d'esperance pour l'aduenir, ils se mirent en chemin pour repasser la mer, & partirent du port de Honfleur dans le Nauire du Capitaine Morel Dieppois l'vnzième iours de Mars 1617. Il est vray que l'on a quelque fois le temps propre & favorable nauigeant en mer; mais c'est dans vne inconstance si grande & vne bonace si subitement changeante, que l'on n'a pas a peine
gousté

gousté de l'agréable faueur d'un petit zephir qui enfle doucement vos voiles, quel'on experimente les furies de la mer, les flots bondissans, & la cholere de quelque orage qui vous va menacant d'une prochaine ruine.

C'est l'humeur de la mer, & l'instabilité des vents, qui vous mettent souuent dans les extremitez du desespoir en l'esperance, & de la ioye dans la tristesse; ô bon Iesus la Croix & la douceur s'entresuiuent tousiours, & comme fidelles ne se quittent iamais que pour vn peu, cest Lyra & Rachelle, la laide & la belle, le bon & le mauuais temps, le Soleil & la gresle.

Nos pauures voyageurs n'y pensoient pas lors Bancs de
qu'apres auoir vogué heureusement vn long- glaces,
temps, ils se trouuerent enuironnez des glaces,
enuiiron soixante lieuës au deça du grand banc,
qui leur fermerent entierement le passage de
plus de cent lieuës d'estenduës, sans qu'il y eût
apparence aucune de pouoir percer de si fortes
murailles, ou d'exquiuier le mal-heur de ses
rencontres, car les vents en auoient détaché
des pieces & morceaux, qui sembloient des
villes & chasteaux, puissans au possible, & qui
eut pû sans vne assistance particuliere de Dieu,
euitier le choq de ses montagnes de glaces.

Tous pleuroient & s'affligeoient, & n'y Apprehen-
auoit celuy, qui ne fut dans les affres de la sion des
mort: ô bon Dieu disoient ils, ayez pitié de passagers,
nous, nous sommes perdus sans vostre secours,
car les maux nous enuironnent de toutes parts,
& puis les meilleurs Catholiques s'adressans à
nos Peres, les prioient de les confesser & se

mettoient en estat comme s'ils deussent mourir, la femme du sieur Hebert ne se contenta pas d'estre elle mesme bien disposée, elle esleua encore ses deux enfans par les coutils pour recevoir leur benediction qu'un chacun implorait.

Chose estrange, comme si le diable eut mis en ruine totale de tous, plus les Catholiques se mettoient en estat de salut, & s'humiloient devant Dieu, & plus les perils & dangers sembloient augmenter & les menacer d'une prochaine ruine.

Aux bons iours de Pasques mesme & à l'Ascension, Pentecoste & autres festes principales, c'estoit lors qu'ils n'esperoient plus autre sepulture que le ventre des poissons, puis que plus grands & eminents estoient les dangers & les tourmentes, que plus grandes estoient les festes.

On avoit desja prié Dieu pour eux à Kebec les croyans morts & submergez, lors que Dieu leur fist la grace de les deliurer & leur donner passage pour Tadoussac, où ils arriuerent à bon port le 14. iour de Juin, après avoir esté treize semaines & un iour en mer dans des continuelles apprehensions de la mort, & si fatiguez qu'ils n'en pouvoient plus.

D'exprimer les actions de graces qu'ils rendirent à Dieu, à la Vierge & aux Saints, il seroit impossible, puis que leur obligation estoit comme des morts ressuscitez en vie par leur beneficence. Le P. Ioseph monta à Kebec dans les premieres barques appareillées, pour aller

promptement afferuer les hyuernants de leur deliurance, & comme Dieu auoit eu soin d'eux au milieu de leurs plus grandes afflictions & les auoit protégé.

Le P. Paul resta à Tadoussac, où il celebra la *Sainte* S. Messe pour la première fois dans vne Chap- *Messe dite* pelle qu'il bastit à l'ayde des Matelots & du *à Tadoussac.* Capitaine Morel, avec des rameaux & fueillages d'arbres le plus commodement que l'on peut. Pendant le S. Sacrifice deux hommes decemment vestus estoient à ses costés avec chacun vn rameau en main pour en chasser les mousquites & cousins, qui donnoient vne merueilleuse importunité au Prestre, & l'eussent auéglé ou faict quitter le S. Sacrifice sans ce remede qui est assez ordinaire & autant vtile que facile.

Le Capitaine Morel fist en mesme temps tirer tous les canons de son bord, en action de grace & resiouissance de voir dire la sainte Messe où iamais elle n'auoit esté celebrée, & après les prières faictes, pour rendre le corps participant de la feste aussi bien que l'esprit, il donna à disner à tous les Catholiques, & l'après midy on retourna derechef dans la Chapelle, chanter les Vespres solennellement, de maniere que cet aspre desert en ce iour là fut changé en vn petit Paradis, où les louanges diuines retentissoient iusques au Ciel, au lieu qu'auparauant on n'y entendoit que la voix des animaux qui courent ces aspres solitudes.

Lors qu'on batissoit la Chappelle, il y auoit plaisir de voir les Sauvages se mettre en peine

pourquoy on vouloit là cabaner, (pensant que ce fut pour vne habitation,) & disoient qu'est-ce que l'on pensoit faire de se mettre en lieu si miserable, où eux mesmes ne se cabanoient iamais (à cause des excessiues froidures) sinon pour la Traicte & la pesche, & aucunement pour la chasse, qui n'estoit bonne que dedans les bois; mais quand ils eurent appris que c'estoit pour y chanter les loüanges de nostre Dieu, & pour le remercier d'auoir deliuré nos freres du peril des glaces, ils approuuerent nostre dessein & y voulurent assister eux mesmes, (en dehors) avec vne attention & vn silence plus loüable que celuy des heretiques, qui en grondoient entre leurs dents.

Cette Chappelle a subsisté plus de six années sus pied, bien qu'elle ne fust bastie que de perches & de rameaux comme i'ay dit, mais la modestie & retenüe de nos Sauuages n'est pas seulement considerable en cela, mais ce que i'admire encore dauantage, est: qu'ils ne touchent point aux barques ny aux chaloupes, que les François laissent sur la greue pendant les hyuers; modestie que les François mesme n'auroient peut estre pas en pareille liberté, s'ils n'auoient l'exemple des Sauuages.

Le iuste
gemit & le
reproüé se
resioüit,

Il me semble que la Tourterelle & le Rossignol sont le vray symbole des reproüez & predestinez, car la premiere ne fait que pleurer & l'autre de se resioüir. Le iuste pâtit & le reproüé se resioüit, l'un est tousiours heureux & l'autre tousiours mal-heureux, mais ce tousiours n'est qu'un moment deuant l'éternité. O

mon Dieu voicy vne verité cognüe de bien peu de personnes, car on ne faiet estat aujour- d'huy, que de ceux qui ont dequoy & qui sont en faueur, ô richesses & richars vous perirez, vous mourrez & ferez enseuelis aux enfers, si vous vsez mal des biens que Dieu vous a don- né. Et vous ô Roys, oyez & entendez, & vous ô Iuges de la terre apprenez, que ceste puissance laquelle vous exercez maintenaut, vous a esté donnée par ce Dieu tout puissant, qui deman- dera cõpte de toutes vos œures, & espluchera vos pensées, d'autant que vous estans les Mini- stres de son Royaume, n'avez iugé selon droi- ture & equité, ny gardé la loy de iustice, moins aussi cheminé conformement à la volonté de vostre Dieu, pourquoy bien tost & fort horri- blement, il s'apparoistra à vous, à cause de la ri- gueur du iugement, qui sera faiet à ceux là qui commandent : car la misericorde est pour les pauvres: mais les puissans seront punis puissam- ment, pourquoy gardez vous, vous autres qui aspirez au commandement, puis qu'il vous doit seruir de condamnation.

Le bon Capitaine Morel, fort homme de bien & tres-bon Catholique, estoit celuy par le moyen duquel nos Peres maintenoient vn chacun dans leur deuoir & en bon Chrestien, car l'exemple d'un Chef sert d'un grand com- mandement aux suiets, mais tous n'ensuiuoiet pas neantmoins ses traces & ses conseils, pour ce que tous n'estoient pas Catholiques & ser- uiteurs de Dieu comme luy, comme il a bien tesmoigne du depuis, aux despens de sa propre

Du Capi-
taine Mo-
rel mort
pour la foy,

vic; en vn voyage qu'il fit au Leuant, auquel ayant esté pris par les infidelles & barbares, on m'a dit qu'il fut par eux cruellement traité, & enfin empallé pour n'auoir voulu renier la foy comme auoient faicts plusieurs de ses compagnons mariniens, & partant peut estre conté au nombre des Martyrs.

J'ay dit cy-dessus qu'il semble que Dieu n'en veuille qu'aux bons, & laisse en prosperité les meschans, comme les prisonniers des Hurons qu'on engraisse pour le feu, mais c'est ce qui nous doit encourager, & non point affliger, disans avec l'Apostre en toute humilité. A Dieu ne plaise que ie me glorifie en autre chose qu'en la Croix de mon Sauueur.

Du Capitaine Cananée.

A mon voyage de la nouuelle France, ie communiquay souuent avec vn bon Catholique nommé le Capitaine Cananée, qui auoit receu des disgraces en mer autant qu'homme de sa condition. Il auoit esté pris & repris des Pirates tant d'Alger qu'autres, qui l'auoient mis au blanc, & réduit à seruir ceux qu'il auoit pû auparavant commander. Retournant de Canada pour la France le sieur de Caen general de la flotte luy donna le gouuernement & la conduite d'un petit nauire, avec 12. ou 13. Matelots Catholiques & huguenots pour conduire à Bordeaux.

Le desirois fort passer dans son bord, tant pour la deuotion que i'auois à la sainte Magdeleine de laquelle le vaisseau portoit le nom, que pour le contentement particulier que ie receuois à la communication de ce bon & ver-

tuez Capitaine, mais ledit sieur de Caen general, & le sieur de Champlain avec quantité de nos amis me dissuaderent de m'embarquer dans vn si petit vaisseau, plus aysé à perir qu'un plus grand, outre l'incommodité du balotage.

Je me resolus donc à leur conseil & me teins à ce qu'ils en voulurent, pendant que ce pauvre Cananée print vers la manche la route de Bordeaux, d'où nous ne l'eusmes pas à peine perdu de veüe, qu'il fut enleué par les Turcs, & mené en captiuité, où il est mort comme ie croy en bon Chrestien, après auoit souffert au delà des forces humaines, & gagné le Paradis par la Croix.

Faute d'alimens necessaires, la pluspart des François tomberent malades à Kebec. Deux de tuez par les Sauvages qui auoient encore dessein sur les autres. & d'un huguenot qui voulut trop tard differer sa conuersion.

CHAPITRE V.

Les affaires du Capitaine Morel estant expédiées à Tadoussac, on se mist sous voile Grande di- pour Kebec, où la necessité de routes choses sette à commençoit à estre grande & importune aux Kebec. hiuernants, qui ne furent neantmoins guerres soulagez pour la venue des barques, qui ne

leur donnerent pour tout rafraichissement, à 50. ou 60. personnes qu'ils estoient, qu'une petite barrique de lard, laquelle un homme seul porta sur son espaule depuis le port iusques à l'habitation, de maniere qu'auant la fin de l'année, ils tomberent presque tous malades de la faim, & d'une certaine espeece de maladie qu'ils appellent le mal de la terre, qui les rendoit miserables & languissants, & ce par la faute des chefs qui n'auoient pas fait cultiuer les terres, ou eumoyen de le faire.

Le P. Dolbeau va en France.

Tout l'equipage estant arriué à Kebec, chacun se consola le mieux qu'il peut des biens de Dieu, car il n'y en auoit guere d'autre, force croix & peu de pain. Le retour du P. Ioseph minuta un autre pareil voyage au P. Dolbeau qui croyoit y pouuoir operer dauantage, & représenter mieux les necessitez du pais, mais il eut affaire avec les mesmes esprits, & tousiours aussi mal disposez au bien, & partant ny fist rien dauantage que perdre ses peines & s'en retourner derechef en Canada en qualité de Commissaire avec le frere Modeste Guines, aussi mal satisfait de ses Messieurs qu'auoit esté le P. Ioseph.

Exercice des Religieux.

Ce peu d'ordre les fist à la fin resoudre de re-commander le tout à Dieu, sans se plus attendre aux marchands, & faire de leur costé ce qu'ils pourroient, puis qu'il n'y auoit plus d'esperance de secours. En suite de quoy un chacun des Religieux se proposa un pieux & particulier exercice avec l'ordre du R. P. Commissaire, les uns d'aller hyuerner avec les Monta-

gnais, les autres d'administrer les Sacremens aux François, & ceux qui ne pouuoient dauantage chantoient les loüanges de nostre Dieu en la petite Chappelle, instruisoient les Sauuages qui les venoient voir & vacquoient à la sainte Oraison, & à ce qui estoit des fonctions de Religieux.

Pendant le voyage du P. Dolbeau, le P. Ioseph fist le premier Mariage qui se soit fait en Canada avec les ceremonies de la S. Eglise, entre Estienne Ionquest Normand, & Anne Hebert, fille aînée du sieur Hebert, qui depuis vn an estoit arriué à Kebec, luy sa femme, deux filles & vn petit garçon, en intétion de s'y habiter, & y perseuererent encores à present, nonobstant les grâdes trauerses des anciens marchâds, qui les ôt traictez avec toutes les rigueurs possibles, péians peut estre leur faire perdre l'enuie d'y demeurer & à d'autres mesnages de s'y aller habiter qu'en condition de seruiteurs ou plustost d'esclaves, qui estoit vne espee de cruauté aussi grande que de ne vouloir pas qu'un pauvre homme iouisse du fruit de son travail. O Dieu par tout les gros poissons mangent les petits.

Messieurs les nouueaux associez ont à present adoucy toutes ces rigueurs & donné tout suiet de contentement à ceste hōnelle famille qui n'est pas peu à son ayse, & promettēt encores de tres-favorables conditions & vn bon traictement à toutes les autres familles qui s'y voudront aller ranger, qui de pauvres icy, se peuuent rendre là facilement accommodés, s'ils sont gens de bien

Premier mariage fait en Canada.

Famille d'Hebert molestée.

& soigneux de travailler, car les mauuais, ny les faincants, ne sont bons nulle part.

Pour vn surcroy de mal-heur, avec les maladies & les necessitez qui estoient tres-grandes dans l'habitation, on estoit menacé de huiſt cens Sauuages de diuerſes nations, qui s'estoient assemblez és trois riuieres à dessein de venir surprendre les François & leur couper à tous la gorge, pour preuenir la vengeance qu'ils eussent pû prendre de deux de leurs hommes tuez par les Montagnais environ la my. Auriel de l'an 1617.

Mais comme entre vne multitude il est bien difficile qu'il n'y aye diuers aduis. Cette armée de Sauuages pour auoir esté trop longtemps à se resoudre de la maniere d'affaillir les François, en perdirent l'occasion, plus par diuine permission, que pour difficulté qu'il y eut d'auoir le dessus de ceux qui estoient desja plus de demi morts de faim & abbatus de foiblesse. Le Capitaine la Forjere (que i'ay fort cognu) fin & cault entre tous les Sauuages & capable de conduire quelque bonne entreprinſe, voyant leur coup failli; & bien certain que les François auoient retrouvé les corps morts sur le bord de la riuiere, & ſçeu le mauuais dessein de leur assemblée, vint à l'habitation où vn nommé Beauchefne commandoit pour lors, & faisant de l'effaré & comme ne ſçachant pas que les François eussent desja esté aduertis; dit qu'il luy vouloit parler en secret & à tous ceux de ses gens qui auoient de l'esprit, c'est à dire, quelque autorité,

charge ou office au Conseil , & que les autres n'en entendissent rien: voyez la finesse du bon homme , pour descouurir vne chose qu'on sçauoit des-ja & qu'il ne pouuoit taire qu'en se rendant coupable.

Il leur dit-donc , comme deux François auoient esté tuez par des Sauuages particuliers qu'il ne cognoissoit point , & de plus qu'il y auoit aux trois Riuieres enuiron huit cens ieunes hommes de diuerses nations, assemblez pour leur venir courre sus & se rendre maistre de l'habitation , & que pour son particulier il n'auoit iamais esté consentant d'vne si meschante resolution, de laquelle il les auoit bien voulu aduertir, afin qu'ils se donnassent sur leur garde , & que pour vn plus euidant tesmoignage de sa fidelité , il vouloit cabaner auprès d'eux , & moyenner quelque accommodement entr'eux & les Sauuages.

Nos Peres, & tous ceux du Conseil, iugerent bien à la contenance du bon homme & en tous ses discours, qu'il traictoit pour son interest particulier, d'estre continué dans l'amitié des François ausquels il n'auoit peu nuire, & n'estre pas déclaré ennemy de ceux de sa patrie qu'il sembloit abandonner pour se ioindre à nous, mais d'vn procedé si subtil & vne inuention si gentille, qu'il eut par ceste sagesse des presens de toutes les deux parties.

Or après plusieurs allées & venues, l'armée sauuagesse considerant, que difficilement pourroient ils prendre les François sans ar-

mes, comme ils eussent pû faire quelque temps auparavant, & n'ayans plus de quoy viure, ny moien de chasser ny pescher, pour n'en estre la saison. Ils enuoyerent le mesme la Foriere demander pardon & reconciliation avec les François, avec promesse de mieux faire à l'aduenir, ce qu'ils obrindrent d'autant plus facilement que la paix estoit necessaire à l'une & à l'autre des parties. En suite ils enuoyerēt quarante Canots de femmes & d'enfans pour auoir de quoy manger, disans qu'ils mouroient tous de faim, ce que considéré par ceux de l'habitation, ils leur distribuerent ce qu'ils purent, vn peu de pruneaux & rien plus, car la necessité estoit grande par tout entre nous aussi bien qu'entre les Sauvages : laquelle fut cause de nous faire tous filer doux & tendre à la paix.

La chose estant reduite à ce point, il ne restoit plus qu'à conclure les articles, mais pource que les Sauvages demeueroient tous-jours à leur ancien poste, on enuoya sauf conduire à leurs Capitaines pour descendre à Kebec, où ils arriuerent chargez de presens & de complimens avec des demonstrations de vraie amitié, pendant que leur armée faisoit alte à demi lieuë de la.

Les harangues ayans esté faictes & les questions necessaires agitées avec vne ample protestation des Montagnais qu'ils ne cognoissoient les meurtriers des François; ils offrirent leurs presens & promirent qu'en tout cas ils satisferoient à ceste mort, Beauchefne &

sous les autres François estoient bien d'auis de les receuoir à ceste condition; mais le P. Ioseph le Caron & le P. Paul Huet, s'y opposerent absolument, disans qu'on ne deuoit pas ainsi vendre la vie & le sang des Chrestiens pour des pelleteries, & que ce seroit tacitement autoriser le meurtre, & permettre aux Sauuages de se vanger sur nous & nous mal-traiter à la moindre fantasie musquée qui leur prendroit, & que si on receuoit quelque chose d'eux, que ce deuoit estre seulement en deposit, & non en satisfaction, iusques à l'arriuee des Nauires, qui en ordonneroient ce que de raison. Ainsi Beauchefne ne receut rien qu'à ceste condition.

De plus nos Peres insisterent que les meurtriers deuoient estre representez, mais ne l'ayant pû obtenir sur l'excuse que les Sauuages faisoient de ne les cognoistre point. Ils leur demanderent deux ostages pour assurance qu'ils les representeroient venans à leur cognoissance, & en estant interpellé, ce qu'ils promirent faire; puis nous donnerét les deux ostages qui furent deux garçons, l'un nommé Nigamon, & l'autre Tebachi, assez mauuais garçon bien qu'il fust fils d'un bon pere, pour le premier il estoit assez bon enfant & se porta tousiours au bié. Nos Peres l'instruirent à la foy & aux lettres pendant tout un Hyuer qu'il demeura avec nous, & à l'arriuee des Nauires il eut esté bien ayse d'aller en France pour y viure parmi les Chrestiens, mais ny luy ny eux ne le peurent obtenir des

marchands, non plus que pour plusieurs autres; pour le second il s'enfuit après auoir esté quelque temps à l'habitation, de quoy on ne se mit guere en peine, aussi ny auoit il guere d'esperance de pouuoir faire d'un si mauuais garçon un bon Chrestien.

Les Nauires qu'on attendoit au Printemps arriuerent fort tard particulierement le grâd, dans lequel commandoit le sieur du Pont Graué, le petit arriua assez fauorablement, mais si peu muni de victuailles qu'il n'en auoit quasi que pour son voyage, cependant on ne scauoit plus que manger, tout le magasin estoit desgarni & n'y auoit plus de champignons par la campagne, ny de racines dans le iardin; on regardoit du costé de la mer & on ne voyoit rien arriuer, la saison se passoit, & tous desesperoient du salut du sieur du Pont & d'estre secourus assez à temps. Les Religieux estoient assez empeschez de consoler les autres pendant qu'eux mesmes patissoient plus que tous. Leur recours principal estoit à la sainte Oraison & aux larmes qui leur seruoient en partie de pain, & taschoient de cōsoler les pauures hyuernés en leur preschant la patience & d'esperer en Dieu qui n'abandonne iamais les siens au besoin, & comme le Pere Paul leur eut recommandé de prier pour ledit sieur du Pont, pendant que luy mesme diroit la sainte Messe à son intention, ils se prirent tous à plore & se lamenter avec tant de vehemence qu'ayant flechi Dieu à exaucer leurs vœux, il leur fist la

grâce de voir peu de iours apres ledit sieur du Pont avec le grand Nauire qu'ils pensoient estre perdus, estre dans leur port asseuré, ce qui leur causa vne ioye telle que l'on peut penser.

Si iamais ils deussent louer Dieu ce fut lors, car le subiect y estoit grand & puissant, comme de personnes secouruës au temps qu'ils croioient tout perdu & les choses plus desesperées, les louanges qu'ils en rendirent à Dieu furent accompagnées non plus de larmes de tristesses, mais de ioye avec vn tel excès qu'ils en estoient comme hors d'eux mesmes, dont la nature par ses deux passions fut quasi estouffée & comme n'ayant plus de sentiment. Le sieur du Pont entra dans la Chapelle avec les autres pour y rendre luy mesme ses vœux & accompagner leur deuotion comme il fist avec vn rare exemple, car comme ils auoient esté dans le hazard de mourir de faim, luy d'autre costé auoit pensé perir dās les eauës, & estre enseuely dans le ventre des poissons.

De ceste quantité de malades que la nécessité auoit alité, n'en mourut neantmoins aucun. Desespoir
d'vn heretique.
fors vn huguenot Escossois, qui selon les apparences ne deuoit pas si tost mourir, ie croy que ce pauvre homme estoit heretique plus tost par respect humain, & peur de desplaire à son maistre qu'autrement, puis qu'estant d'vne religion si contraire à la nostre il desiroit neantmoins auoir le P. Paul à sa mort & non plustost, comme si Dieu luy eut donné

parolle & choix de l'heure de sa conuersion, & en auoit fort enchargé la dame Hebert, laquelle ne voulant manquer à vne œuvre si charitable & qui concernoit la conuersion & le salut d'une ame égarée, en fist son deuoir & pria le Pere de s'y trouuer, ce qu'il fist à l'instant mesme, mais comme il pensa luy parler de son salut & de se remettre dans le giron de la S. Eglise par vne vraye conuersion à Dieu, il luy respondit d'une voix affreuse, souuent reitérée; mon Pere il est trop tard, il est trop tard, & n'en pû iamais tirer autre responce pendât trois quarts d'heure de temps qu'il demeura là aupres de luy, & mourut ainsi desesperé de la misericorde de Dieu, rendant son ame miserable entre les mains de Sathan, qui l'emporta au profond des enfers en punition de son ingratitude & pour auoir refusé la grace au temps que Dieu la luy presentoit. Pour nous apprendre à nous autres, de n'attendre point si tard nostre conuersion & l'amendement de nostre vie, peur de ne pas trouuer Dieu quand nous le chercherons, s'il ne nous a trouué quand il nous a cherché.

Le sieur du Pont ayant mis ordre à tout ce qui estoit necessaire pour l'habitation & consolé vn chacun de ses victuailles, il monta aux trois Riuieres pour la Traicte, où le P. Paul fist dresser vne Chappelle avec des rameaux pour la sainte Messe qu'il y celebra tout le temps qu'on fut là. Il excita aussi Beauchesne & tous les autres François de faire les feux de la S. Pierre, & de tirer en l'honneur du Saint
tous

sous les perriers de la barque. Le Borgne de l'Isle Capitaine Algoumequin y estoit present, mais comme on luy vint à dire de se retirer de derriere le perrier qu'on alloit tirer, il s'en scandaliza & n'en vouloit rien faire, disant que les vrais Capitaines n'auoient point de peur, mais on le contraignist pourtant de se retirer, qui fut bien à la bonne-heure pour luy & pour les François, car le perrier creua & ietta sa culasse par le mesme endroit d'où on l'auoit faict sortir, & s'il luy fut mes-arriué nonobstant l'aduertissement qu'on luy auoit donné, ceux de sa nation l'eussent creu tué à dessei, & nous eussent faict la guerre vnis avec tous les autres Sauvages, lesquels quoy que moins armez que les François estoient capables de nous troubler & venir à main armée iusques à l'habitation, où on n'est pas si fort qu'on aye besoin d'ennemis plus forts que les mouiquites & la faim.

La traicte estant finie, & les Sauvages partis, chacun rentra dans les barques qui se rendirent promptement à Kebec, où il fut iugé à propos & necessaire aux PP. Paul & Pacifique du Plessis, de faire vn voyage en France dans les premiers Nanires qui se mettroient sous voile, pour le bien du païs, ce qu'ils executerent comme bons Religieux, la mesme année, & reuindrent la suiuaute avec le pere Guillaume Poulain, sans auoir pû gaigner sur l'esprit des marchands non plus que les autres Religieux precedens.

Du premier Jubilé gagné en la nouvelle France. De la mort de Frere Pacifique, & du commencement de nostre Couuent de saint Charles en Canada, avec vne lettre du P. Denis Iamet Commissaire traittant de nostre établissement.

CHAPITRE VI.

IL ne suffit pas au malade d'auoir vne bõne medecine pour se faire quitte de son mal, il la faut aualler si l'on en veut recenoir guérison. Dieu est mort pour tous, mais tous ne cooperent point à la grace, & par ainsi tous ne seront pas saueuz. le m'esioüy maintenant en mes souffrances pour vous, & accomplis le reste des afflictions de Iesus-Christ, en ma chair pour son corps, qui est l'Eglise, disoit le S. Apostre aux Coloss. 1.

Le R. P. Dolbeau comme vn bon pere spirituel qui a soing de ses ouailles, apporta de France, vn Jubilé obtenu de nostre S. Pere le Pape pour la nouvelle France, lequel il publia le 29. Iuillet 1518 dans la Chappelle de Kebec, (car il n'y a pas encor d'Eglise) & en fist faire la procession pour l'ouerture cinq ou six iours après son arriüée, au grand contentement & consolation d'vn chacun, pour estre le premier qui se soit iamais gagné dans le Canada.

Le P. Ioseph qui des-jà auoit passé vne année entiere dans le pais des Hurons , desira aussi d'aller hyuerner avec les Montagnais pour apprendre leur langue & les instruire par après en la foy , il partit le 9. de Nouembre 1618. avec vn ieune garçon François , qui desiroit se rendre capable de seruir vn iour de truchement à la compagnie des marchands. Les peines & les incommoditez qu'ils souffrirent furent tres.grandes à la verité, car outre qu'il leur falloit souuent changer de place, & faire tous les iours de nouueaux trous dans le profond des neiges pour se pouuoir coucher & y passer les longues nuits de l'hyuer, la fumée & les grands froids luy donnoient encor bien de la peine, mais beaucoup plus la faim & la necessité, lors que manquans de chasse, ils ne sçauoient dequoy se rassasier, & cela leur arriuoit assez souuent par le mauvais mesnage des Sauvages , car lors qu'ils auoient dequoy ils faisoient iour & nuit bonne chere & bon feu, sans se soucier du lendemain, mais quand tout estoit dissipé, & que la chasse & la pesche ne leur en disoit point, vous eussiez veu alors des gens bien empeschez à contenter des ventres qui n'auoient point d'oreilles.

Quand on veut aller demeurer ou hyuerner avec les Sauvages errants, on se met sous la conduite d'un de leur chef de famille, lequel a soing de vous nourrir & heberger comme son domestique, ou comme son enfant, car de se mettre au commun on ne seroit

pas bien, & si on n'y pourroit subsister l'gucment, pour ce qu'ils se separent souuent pour la chasse, les vns d'un costé & les autres d'un autre, & par ainsi ne pouuant faire vostre cas à part, faudroit que mourussiez de faim ou que retournaissiez avec les François.

Celuy avec lequel le P. Ioseph hyuerna se nommoit Choumin, qui signifie en langue Montagnaitte vn Raisin, les François l'appelloient le Cadet à cause qu'il est fort propre & net de sa personne, sent peu son Sauuage, & rend tout le seruice qu'il peut aux François qu'il ayme cordialement & veritablement, & non feintement ou avec dissimulation commel'on faict pour le iour d'huy.

Bonté d'un
Monta-
gnais.

Pendant cet hyuernement, la femme de Choumin accoucha d'un garçon qu'il voulut estre nommé Pere Ioseph, qui estoit le plus grand signe d'amitié qu'il eut pû tesmoigner à ce bon Pere, car en effect il l'aymoit de cœur & d'affection. Il luy dit doncques: Pere Ioseph mon frere, (ainsi l'appelloit-il) voila ma femme qui est accouchée d'un garçon, comment l'appellerons nous, ie voudrois bien qu'il se nommast Pere Ioseph. Aquoy le Pere luy repartiست qu'il vaudroit mieux qu'il luy donnast le nom de Monsieur du Pont l'un des Capitaines & chefs de la Traicte, qui seroit vn bon moyen de se faire aymer de luy & de profiter en les visites. Car disoit le Pere Ioseph, mon amitié t'est des ja toute acquise & t'aymeray tousiours sans cette gratification, & en outre ie suis pauvre & hors de la puissance de te

pouuoir faire du bien comme peut Monsieur du Pont, aduise donc bien à ce que tu dois faire, afin que tu ne t'en repente point par apres : car ie se dis derechef que ie t'ayme & ne te peux faire riche. Il n'importe, respondit Choumin, j'ayme bien Monsieur du Pont & tous les François, mais ie t'ayme encor plus qu'eux tous. C'est pourquoy ie veux qu'il se nomme Pere Ioseph, & quand il sera grand ie te le donneray pour l'instruire & demeurer avec toy; car ie ne veux point qu'il soit marié, ains qu'il soit habillé & viue comme toy.

Et puis luy monstrant son autre fils qui estoit celuy qui a esté depuis baptizé à nostre Couuent de Kebec, & travaillé par le demon, luy dit : en voicy encor vn autre que ie te donneray quand il sera vn peu plus grâd pour enuoyer en France, & veux qu'il soit baptizé, & viue encor comme toy, sans femme & en mesme habit. Ils eurent plusieurs autres entretiens sur ce sujet, dans lesquels le P. Ioseph prenoit occasion de luy parler de Dieu & de nostre croyance, & le Sauvage de l'entretenir de leurs resueries & superstitions ausquelles il recognoissoit luy-mesme par les raisons du Pere, vn grand auuglement. Puis fut conclud que le nouveau né se nommeroit Pere Ioseph, & y est encore appelé par les François & par tous ceux de sa nation.

Le 30. de Nouembre parut sur leur orizon la mesme Commette qui paroissoit en France, iusqu'au 22. de Decembre, qu'elle ne se vit plus, tellement qu'on pouuoit donner là, la

Commette
qui parut
en Canada.

mesme interpretation qu'on en donnoit icy. Plusieurs escriuains ont employez leur plume & leur temps pour d'escrire des effects des Commettes, & bien que soit chose naturelle & contingente selon les Astrologues, si est-ce qu'il nous font croire qu'elles sont ordinairement comme vn signal donné de Dieu, de plusieurs grands mal-heurs qui nous doiuent arriuer, comme les euenemens passez & presens nous le tesmoignent assez, car depuis la derniere qui parut l'an 1618 nous n'auons veu que guerres & miseres dans vne partie des Prouinces de la Chrèstienté & en verrons encores de bien grandes, car le glauiue de Dieu n'est pas encores rengainé, ny ses verges iettées au feu, ce sera pour quand il vous plaira Seigneur, qui cognoissez les meschans & ceux qui molestent vostre Eglise & vostre peuple.

L'Hyuer estant passé, & le Printemps pluuiieux commençant à descouvrir les terres par tout auparauant couuerte de neiges, le bon Pere Ioseph prit congé de ses Sauvages & en partit pour reuenir entre ses freres l'vnzième de Mars, 1619.

Mort de F.
Pacifique.

La vie & la mort sont entre les mains de Dieu, & personne n'est certain de l'heure de son trespas, non plus que de son salut, ou de sa condamnation, car comme dit l'Apostre, personne ne sçait s'il est digne d'amour ou de hayne, du feu ou de la gloire, du bien, ou du mal, de l'enfer ou du Paradis, car pour parfait qu'on soit il y a tousiours à craindre, iusques à

ce qu'on aye passé le pas, mais pas espouuentable: l'instant de la mort, qui nous doit faire trembler au seul resouuenir de nos pechez, bien-heureux sont les morts qui sont morts au Seigneur & qui ont vescu en leur vie comme ils ont desiré d'estre trouué en la mort, car comme nous ne mourons qu'une fois, il faut tascher de bien mourir, & on ne peut bien mourir qu'en bien viuant, comme a fait nostre bon frere Pacifique decedé à Kebec le 23. d'Aoust l'an 1629.

Ce bon Religieux estoit doié de beaucoup de belles vertus & des qualités requises en vn vray frere Mineur, mais il auoit sur toutes la charité en singuliere recommandation, car quand il estoit question d'assister le prochain il y alloit comme vn homme pour gagner des pistoles, mais des pistoles du Paradis. I'ay quelquefois veu les Superieurs le reprendre de ceste trop grande ardeur, mais il les prioit de si bonne grace que cognoissant ceste grâde compassion qu'il auoit dans son ame, laquelle s'estendoit iusques aux animaux mesmes auxquels il ne pouuoit faire de mal, ils le laissoient faire ses œuvres de charité, & à la fin estant tombé malade Dieu le voulant remunerer de ses trauaux passez, il deceda le dit 23. iour d'Aoust après auoir receu tous ses Sacrements en grande deuotion, & fut enterré à la Chapelle de Kebec avec les ceremonies de la S. Eglise, regretté d'un chacun & pleuré presque de tous, tant des Chrestiens que des Sauvages, qui perdirent en luy vn grand support &

Le 7. Septembre de la mesme année 1619. plusieurs de nos amis nous ayans assuré de quelques aumosnes, & entr'autres le sieur des Boues grand Vicaire de Pontoise nostre Syndique (encor que la qualité ne luy en fut donnée que l'année d'après) & le sieur Houel Secrétaire du Roy, nos deux principaux bienfacteurs pour le Canada, l'on commença d'amasser les materiaux & de joindre la charpenterie de nostre Couuent de nostre Dame des Anges, où le Pere Dolbeau fist mettre la premiere pierre le 3. iuin 1620.

Nos Religieux trouuerent l'inuention de faire construire vn four à chaux, qui leur seruit merueilleusement pour adoucir les frais de nostre bastiment. Il n'y eut que les journées & l'entretien de dix ou douze ouuriers que nous eusmes peines de faire payer par de nouvelles questes, que nous fismes à Paris & par tout ailleurs chez de nos amis, car les marchands ne nous y assistoient presque en rien (excepté le sieur du Pont Graué en ce qu'il pouuoit de son particulier,) & se contentoient de nous donner la nourriture de six Religieux comme ils y estoient obligez dès nostre entrée audit pais, & depuis par Articles accordez par Monseigneur le Duc de Montmorency Viceroy de Canada, &c.

Lesdits de Caen ou leurdite societez sera tenuë de nourrir six Peres Recollects à l'ordinaire, compris deux qui seront souuent aux

des couuertes dans le païs parmy les Saunages. Faict & arresté double, entre nous soubsignez esdits noms, à Paris le huiëtiesme iour de Nouembre 1620. Dolu de Caen, ainsi signé.

Or en ce temps là estoit pour Commissaire de nos Peres de Canada, le R. P. Denis Iamet, lequel apportoit tout le soing possible à l'auancement tant pour le spirituel que pour le temporel du païs, & pour ce que la lettre qu'il en escriuit à Monsieur le grand Vicaire de Pontoise le sieur des Boues, vous en peut dire les vrayes particularitez mieux que ie ne scaurois de mon inuention & de ma plume bai-guaiente, ie l'ay icy d'escrite pour vostre contentement.

Lettre du P. Denis Iamet Recolleët,
au sieur des Boues, grand Vicaire de
Pontoise.

Pax Christi.

MONSIEUR,
Comme il n'y a rien qui charme & agréé mieux aux esprits genereux que les hautes entreprises, aussi n'ayment ils personne que ceux qui pouffez de mesme generosité, secondent leurs volontez. Vous sçanés, Monsieur, que cest nostre dessein, ie le vous ay manifesté sans vous en rien cacher, il est petit en

son principe, mais si Dieu y continuë ses benedictiōs, il sera sans doute grand, puisque Dieu vous a imprimé en l'ame le desir de bien faire en la nouvelle France, (comme vous faictes sous les iours en l'ancienne,) & de seconder ceux qui pour l'amour de Dieu, & du salut des ames, quittent la douceur de leur patrie pour s'establiir en un pays Sauvage & inculte; afin qu'en cultivant les terres, l'on trouue moyen de cultiuier les ames. Je ne puis que ie ne vous honore. & que ie ne prie Dieu cent & cent fois pour vostre prosperité, & santé, & que ie ne vous escriue de nostre voyage & comment nos entreprises ont mieux reussy que nous ne pensions, en nostre partement, donc nous nous diuisames en deux bādes. Je partis le premier avec l'un de nos freres appellé F. Bonauenture, dans le premier Nauires qu'on nomme la Sallemāde, nous sortismes du Haur de Honfleur le Dimanche de la Passion, & arriuāmes le Samedi des Octaues de l'Ascension, dans le port de Tadoussac, qui est vn port naturel, où ils ont accoustumé de retirer les Nauires, cependant qu'avec les barques ils montent à mont la riuierre pour traicter avec les Sauvages. A nostre arrivée, nous sceumes que le sieur du Pont Graué Capitaine pour les Marchāds dans l'habitation, auoit commēcé à nous faire

bastir vne maisō (laquelle depuis nostre arrivēe nous auons faict achener) dont ie fus fort re-
sioüy tār pour l'asiette du lieu, que de la beau-
té du bastiment, le corps du logis donc est faict
de bone & forte charpente, & entre les grosses
pieces vne muraille de 8. & 9. poudes iusques
à la couuerture, sa logueur est de trente-quatre
pieds, sa largeur de vingt-deux, il est à don-
ble estage : nous diuisions le bas en deux : de la
moitié nous en faisons nostre Chappelle en at-
tendant mieux : de l'autre vne belle grande
chambre, qui nous seruira de cuisine & où lo-
gerons nos gens : au second estage nous auons
vne belle grande chambre, puis quatre autres
petites : dans deux desquelles que nous auons
faict faire tant soit peu plus grandes que les
autres, y a des cheminées pour retirer les ma-
lades, à ce qu'ils soient seuls : la muraille est
faicte de bonne pierre, bon sable & meilleure
chaux que celle qui se faict en France, au des-
sous est la caue de vingt pieds en carré, &
sept de profond.

Nous auons aussi faict faire trois guarittes
pour la deffence de nostre logis, vne de cinq
pieds en carré, dans le milieu du pignon qui
regarde le Septentrion, & deux autres de qua-
tre pieds aux deux coings d'iceluy qui regar-
de le Midy, nous ferons vne demy lune de-

want nostre porte avec des baïses fortes, afin qu'elle ne soit aisée à attaquer. Quant à l'astier du lieu elle est des plus belles du pays, car le fonds de la terre est tres-bon, & sans pierre aucune, les arbres y sont clairs & pourtant aisés à déserter, nous auons du costé du Septentrion la petite Riuere, qui neantmoins n'est pas petite, principalement quand la Mer est pleine, mais elle se nomme ainsi en comparaison de la grande, d'as laquelle elle se va emboucher, nous auons un fossé du costé de l'Orient, & fort profond, & large, un autre du costé de l'Occident, dans lesquels y a des ruisseaux d'eau qui se vont presque rencontrer du costé du Midy, il ne s'en faut pas plus de 50 pieds: si bien que nous sommes presque comme dans une Isle de fort belle estendue. Tout le pays de-ça & de-là la Riuere est de mesme façon de terre, nous auons aussi la commodité des prés le long de ceste petite riuere, au bord de laquelle nous sommes bastis: ne faut qu'arracher certaines broussailles qui rompent le fauchage quand on fauche, si bien que la nourriture du bestail nous sera fort aysée: nous auons amené un Asne & une Anesse pour nostre commodité, nous nourrissons aussi des Pourceaux, un couple d'Oyes masle & femelle, sept paires de volailles, quatre paires de Canes.

Quand aux Vaches & Cheures, nous ne sommes pas en volonté d'en nourrir que l'année prochaine que nous serons mieux accommodés: outre la riuere qui est fort poissonneuse & les fosses, nous ferons faire quatre autres fosses de douze pieds de large en hault, de six en bas & de huit de profond, tant pour faire euacuer les eaux qui degoustent de tous costez dans nostre caue, que pour nous fortifier contre tous ennemis.

Nous auons trois Maistre Charpentiers avec un Maistre Masson & son fils, quatre autres hommes pour trauailler à la terre, & des viures pour les bien nourrir un an, au bout duquel si nous sommes assistés nous prendrōs cinq ou six bons deserteurs qui ne cesseront de deserter la terre, & esperons que dans deux ans nous pourrōns nourrir douze personnes sans rien mandier de la France, par ce que nous auons du grain suffisamment pour faire du pain, & de la biere, & des cochōs asés pour faire lard sans les autres viandes, que nous nourrirons comme Poules, Oyes, Cheures & Vaches, sans aussi l'abondance du poisson qui se pesche es Riuieres, & l'abondance des Canards & Oyes sauvages qui viennent tout deuant nostre Couuent, depuis la fin d'Aoust iusques à la Toussaints, sans en fin l'anguille

que nous sallerons au commencement de Septembre, & l'Elan que nous aurons pour un peu de pain des Sauvages; quand les neiges seront grandes, & autre mille petites commodités: toute sorte de legumage, d'herbages & racines viennent grandement bien, nous sommes esloignés environ vne petite demy lieüe de l'habitation, la chaux se faiët à cinq cens pas de nous, rien ne nous manque graces à Dieu, que moyen d'entretenir pour deux ans six ou huit bons garçons pour trauailler à la terre. Pour nous au bout de quels nous pourrös entretenir des familles sans beaucoup de frais, & aussi peu à peu peupler le pais & faire ce que nous pretendons, sçauoir est vn seminaire pour y nourrir & instruire les enfans des Sauvages, nous en aurons des ja plus de six si nous auös moyen de les nourrir, se seroit vne belle amorce pour en prendre dauantage, nous nous sommes cötentés d'un ieune enfant aagé de douze ans, lequel nous auons enuoyé en France par l'un de nos Peres, qui le donnera à quelque personne pieuse pour le faire instruire.

Je vauß escriis clairement de tout, afin que vostre pieuse volonté que vous auß aux peuples de la nouuelle France, sçache & cognoisse qu'encore que nostre entreprise soit petite

en son commencement, qu'elle est pourtant
pour deuenir grande avec le temps, si Dieu
nous continuë ses benedictions, & si nous
sommes seconde^x des gens de bien, (le sieur
Guers Commissionnaire de Monseigneur de
Montmorency Vice-Roy de ce pais de la nou-
uelle France, porteur de la presente) vous dira
de bouche ce que ie vous e^{cris}, ie vous repete
donc la priere que ie vous fis estant chez vous,
laquelle tendoit à vous persuader de vous
ioindre avec nous, vous ne serez pas des moin-
dres, ains le premier & chef de l'entreprise.
Nous vous prions d'accepter le tiltre & qua-
lité de Syndic & Procureur du seminaire de
Canada, & cependant qu'en France vous au-
rez le soin de nous amasser, nous serons en Ca-
nada à prudemment employer le tout, nous
vous rescrirons tous les ans par des hommes
dignes de foy, comment le tout se passera, &
ne croyez pas que ceste charge vous soit à peine
pource que nous trouuerons assez de gens de
bien, qui feront tout ce que leur commander^{ez},
pour nous seulement nous serions trop-heureux
si un homme de merite comme vous prenoit la
qualité de chef de l'entreprise de Canada, &
croyons qu'à vostre exemple plusieurs se ran-
geroient de nostre part, & serions des merueil-
les deuant six ans.

L'année prochaine le R. P. Georges, retournera en France pour nos affaires, vous cognoistrez quel homme c'est, ce qu'il peut, & l'esperance que nous auons de faire choses grandes, si dès ceste année vous nous voulez ayder, & de ioindre vos pieuses volōtez avec les nostres vous vous adresserés à Monsieur Houel, le quel ledit sieur Guers vous fera voir, nous restons trois Religieux Prestres en la nouvelle France, avec le F. Oblat que vous auez veu, resolu ne de iamais abādonner ledit pais, ains d'y faire ce que nous pourrons pour le seruice de Dieu, du Roy, & du bien public, ce qui nous releue le cœur est le bon commencement que nous voyons, & l'apparence belle de faire de grands fruiets, si le tout ne reüssit pour n'estre secondez nous ne laisserons pas d'auoir gloire deuant Dieu, & deuant les hommes, ie souhaitte avec passion que vous soiez le premier participant de ce bien.

Nottez s'il vous plait Monsieur, qu'il y a treize ans que l'habitation subsiste sans que iamais aucuns estrangers & moins encore les Sauuages qui nous desirent, & nous recoinēt à bras ouuerts, ayent rien attenté à l'encontre, en laquelle habitation nous auons semblablement vne maison & Chappelle, où nos Peres ont faict depuis six ans & font tous les iours le ser-

le service Diuin pour la consolation des François qui sont en icelle, j'espere des lettres de vous l'année prochaine, qui m'apprendront vostre dernière resolution; cependant nous vivrons en esperance que Dieu fera reüssir par vostre moyen cét auguste dessein, & offrirons à sa diuine misericorde iournellement nos prieres pour tous ceux qui y contribueront, & particulierement pour vous, à qui ie suis & seray toute ma vie, Monsieur, tres-humble & obeïssant seruiteur en Iesus, Denis Jamet, Indigne Commissaire des PP. Recollets de Canada. De Kebec ce 15. d'Aoust 1620.

On peut cognoistre en abrégé par cette lettre tout l'estat de nos Religieux en Canada, lequel ie déduiray plus amplement cy-apres, mais par ce qu'il est porté en icelle que nos Religieux y ont fortifié nostre maison, faict labourer les terres & nourry du bestail pour nostre Seminaire, qui sembleroit contreuenir à nostre profession, i'ay trouué à propos de ne vous donner en cela autre responce que celle que ledit sieur grand Vicairé fist à celle cy-dessus, laquelle vous esclaircira de vos doutes, & vous assurera que la nécessité nous y ayât contraint pour y pouoir esleuer & instruire les enfâs des Sauvages, & les Peres mesmes en la loy de Dieu, il y a eu du merite, & non du manquement, autrement il nous eut fallu tout quitter & abandonner la conuersion des Sauvages, qui eut esté vne grande faute.

LETTRE DE MONSIEVR
le grand Vicaire de Pontoise, au
Pere Denis Iamet Commissaire
des PP. Recollets en Cana-
da.

M On Reuerend Pere,
I'ay receu vostre lettre dattée de
Kebec en Canada du quinzième Aoust mil
six cens vingt, pour responce ie vous diray
que i'ay grandement admiré la prouidence
Diuine, de ce que comme vous me fistes ce
bien de me voir icy allant en Canada, ie
vous feis entendre mon sentiment sur
ceste entreprise, & vostre Reuerence me res-
moigna auoir le mesme, lors que nous en trai-
ctons & deliberions ensemble à Pontoise, y
craignant beaucoup d'obstacles. Dieu neant-
moins l'exécutoit exactement en Canada, ce
qui est comme vn petit miracle, qui me faict
bien esperer; ie louë & remercie nostre Sei-
gneur, qu'avez pratiqué le dire de S. Paul
que ie vous auois tant repeté. Prius quod
animalè deuidè quod spiritale. *Ayan*

une maison à part hors l'habitation, qui sera
un Conuent où vous & vos Peres & Freres
seruirez à Dieu, en l'observance reguliere, en
prieres, contemplations, sacrifice & peniten-
ce, & qui pourra servir d'un Seminaire de
Sauvages, & d'un lieu pour exercer la chari-
té vers les malades. Et en quatriesme lieu se-
ra une forteresse comme ie vous disois. Vne re-
marque que i'ay faict, que anciennement les
Monasteres, estoient Conuents de personnes
religieuses, qui seruoient à Dieu iour & nuict,
& les ieunes y estoient instruits cōme il se voit
en la Regle de S. Benoit, & en la vie de S. Ar-
selme, & estoient aussi hospitaux, ce qui appert
en tous les anciens Monasteres, ausquels il y a
ioint un hospital ou le lieu où il souloit estre,
& l'on voit dedans les chartres en ces mai-
sons là, des legs laissez par les fondateurs &
bien-faicteurs, tant pour les Religieux, &
tant pour l'hospital, puis c'estoient forteresses,
pour se preualoir cōtre les incursions des enne-
mis, soit de la part des infidelles ou autres, en
signe dequoy nous les voyons encore aujour-
d'huy clos & fermes de murs crenetez, ac-
compagnez de machicoulis & de tours, qui
estoit des fortifications du passé. Nous
voyons cela à saint Denis en France, à saint
Germain des prés, à sainte Geneviefue, au

Temple, à saint Martin des Champs, à Paris, & en plusieurs autres lieux ; C'est pourquoy vous deuez Zeler ces quatre choses soient en vostre maison, & faicte tres bien, de faire cultiuier la terre & mesnager pour vous ayder à fournir aux choses necessaires à vne telle entrepryse, i'en ay communiqué avec des plus celebres Docteurs en Theologie, seculiers & reguliers reformez, lesquels n'y trouuent aucune difficulté ny scrupule nonobstant vostre regle, par ce que c'est en ordre & a ceste fin d'y planter nostre sainte foy, ce qui ne se pourroit pas faire autrement selon l'experience que vous en auz depuis six ans, que vos Peres sont là sans y auoir faict beaucoup de fruit, faute de prendre ceste voye pour introduire le Christianisme au milieu de ses Sauuages, qui ne cognoissent & n'adorent aucune Diuinité. C'est vn dessein tres-auguste, que dis-je, il est tout diuin. C'est vn œuure d'un incomparable merite, mais aussi il est besoin d'estre particulierement aydé de Dieu, car Nisi Dominus ædificauerit domum in vanum laborauerunt qui ædificant eam. Non est volentis neque curientis miserantis sed Dei, il faut estre tout Apostolique & demander instamment à Dieu. Que fa-

ciat nos Idoneos Ministros, pour ex-
cuser vne si haute & diuine entreprinse, &
que tous ceux qui vous assistent là les Fran-
çois soient pierres vifues fondamentales
pour le bastiment de ceste nouuelle Eglise que
vous voulez assembler là à nostre Seigneur.
Il est besoin que leur vie puisse edifier & in-
struire à salut ces Sauuages, & dauantage en
vos Sacrifices tenant nostre Seigneur, luy
demander misericorde pour ces infidelles, à
ce qu'il leur ouure le cœur pour receuoir la
saincte foy & qu'il y prenne pied, comme
vous le prenez pour luy dans leurs terres.
Quæ adaperiat Dominus cordi illo-
rum in lege sua & in præceptis suis fa-
ciat eos ambulare. Et dresserez vous vos
exercices & disciplines à ceste fin, enuoyant
continuellement des aspirations & souspirs
vers Dieu, à ceste intention le demandant à
la diuine bonté avec prostrations & quelque-
fois les bras esleuez ou les bras estendus en
Croix. Et quand vous sortez de ces redouta-
bles Autels du grand Dieu vinant, soufflez
en la face de ces Sauuages cest esprit de vie,
que vous y venez receuoir, leurs mettant
quelque fois vos mains lesquelles viennent
de toucher & contracter ces Diuins Misteres
du precieux corps & sang de nostre Seigneur,

les mettant, dis-je, sur leurs testés, d'autre fois leur imprimer au front ce signe terrible de nostre redemption la Croix, car mon Reuerend Pere, fides, est donum Dei, bel qui sommes nous pour penser faire un œuvre & de si importante consequence, ny mesmes un de moindre sans le concours de Dieu. Il nous faut croire que nous y nuyrions plustost par nos pechez que d'y seruir, c'est son œuvre Domini est salus, Domini est assumption nostra. Il nous y faut toutesfois employer diligemment & fortement. Qu'elle ioye à la mort d'auoir acquis un grand peuple à Iesus Christ. Qu'elle gloire dans le Ciel de zèrer après soy, ces Nations. Ie vous rends infinies graces de ce que vostre Reuerence a daigné m'y donner part, m'honorant de la commission que m'auex adressée par la vostre, ie l'ay acceptée & accepte tres-volontiers m'en iugeant fort indigne, i'en espere toutesfois quelque bon succès, veu que Dieu fait ordinairement ses œuvres de rien, & par de foibles & quasi contraires moyens, comme ie fais tel. Et sa diuine Maiesté, vous ayant inspiré de vous seruir de moy en ce S. œuvre, ie luy recommande & faitz recommander, par tous ses seruiteurs & seruantes. Pour le temporel, i'ay baille à Monsieur Houel 200. escus

pour commencer un Seminaire de six peus
Sauuages dès ceste année presente, lequel
s'appellera le Seminaire de S. Charles, au
moins que ce grand Reformateur vous prote-
ge, ie vous enuoyrai tous les ans pareille som-
me pour ce suiet, & bien dauantage pour
vous accroistre & dilater, car i'espere l'année
prochaine vous enuoyer plus de mille escus. Le-
dit sieur Houel m'a dit, qu'il vous enuoye
pour plus de 1200. liures de viures & cōmo-
ditez des aumosnes qu'il auoit à vous, c'est un
bon seruiteur de Dieu, homme d'honneur &
de merite, qui s'employe fidèlement & insa-
tigablement pour ceste affaire, Monsieur
Guerre vous dira le reste de ce que i'ay fait
& feray Dieu aydant, car ie suis du tout dedié
à vous servir & assister en ceste Apostolique
entreprise. Je prie nostre Seigneur la benir, &
vous conseruer longuement & heureusemēt,
pour y travailler fidèlement & aduantageu-
sement, & demeure, Mon R.P. Vostre bien-
humble & tres-affectionné à vous servir.
Charles des Boues, Grand Vicaire de Pon-
toise. De Pontoise ce 27. Feurier 1621.

*Comme le R. P. George fut député Commis
des habitans du Canada vers le Roy, & de
la Requeste qu'il presenta à sa Maïesté,
pour les affaires dudit Canada.*

CHAPIRE VII.

IE n'ay point obserué ny le temps ny l'année que le R. P. George passa en Canada, ny le seïour qu'il y a faict, non plus que de son gouvernement, mais i'ay remarqué qu'il y estoit en grande estime par les lettres, que le Roy luy faisoit l'honneur d'escrire, dont on peut inferer de son merite. Or comme les affaires du Canada n'ont iamais esté bien prises, & qu'il y a tousiours eu des desordres causez de son premier fondemēt, qui n'auoit pas esté entrepris par les Marchands pour la gloire de Dieu (comme i'ay dit en quelque endroit de ce volume.) Le sieur de Champlain & tous les principaux habitans François du Canada, y desirans remedier & apporter quelque ordre dans ces desordres, firent vne assemblée generale, en laquelle ils deputerent le R. P. George vers sa Majesté tres-Chrestienne, pour luy en faire les tres-humbles remonstrances, & negotier enuers icelle tout ce qu'il cognoistroit estre expediēt au bien & à l'aduancement du Canada, s'en

rapportant à sa prudence, à laquelle ils passeront acte & procuration autentique pour luy valoir & seruir en temps & lieu, dont ci voicy coppie qui meseruirà plus que suffisante de tout ce que i'ay escrit des mesmes desordres qui ont duré iusqu'à la venuë de cette nouvelle compagnie qui fait & promet quelque chose de mieux, dont ils auront de la gloire.

SCACHENT TOVS QV'IL Délégation du P. Geor-
ge.
appartiendra. Quel'an de grace 1621. le 18.
iour d'Aoust, du Regne de tres-haut, tres-
puissant & tres-Christien Monarque Lonys
13. du nom; Roy de France, de Nauarre & de
la nouvelle France dite Occidentale, du Gouver-
nement de haut & puissant Seigneur
Messire Henry Duc de Montmorency & de
Dampville, Pair & Admiral de France, Gouver-
neur & Lieutenant general pour le Roy
en Languedoc, & Viceroy des pays & terres
de la nouvelle France dite Occidentale, de la
Lieutenance de noble homme Samuel de
Champlain, Capitaine ordinaire pour le Roy
en la Marine, Lieutenant general esdits pays
& terres dudit seigneur Viceroy, que par
permission dudit sieur Lieutenant se seroit
faicte vne assemblée generale de tous les
François habitans de ce pais de la nou-
uelle France, afin d'aniser des moiens les

plus propres sur la ruyne & desolation de tout ce pais , & pour chercher les moiens de conseruer la Religion Catholique, Apostolique & Romaine en son entier. L'autorité du Roy inuiolable & l'obeissance deuë audit Seigneur Viceroy , après que par ledit sieur Lieutenant, Religieux & habitans, presence du sieur Baptiste Guers Commissaire dudit seigneur Viceroy , a esté conclud & promis de ne viure que pour la conseruation de ladiëte Religion, obeissance inuiolable au Roy & conseruation de l'autorité dudit Seigneur Viceroy, voyant cependant la prochaine ruine de tout le pays , a esté d'une pareille voix deliberé, que l'on feroit choix d'une personne de l'assemblée pour estre député de la part de tout le general du pays , afin d'aller aux pieds du Roy , faire les tres humbles submissions auxquelles la nature christianisme & obligation, rendent tous suieçts redevables , & presenter avec toute humilité le Cahier du pays , auquel seront contenus les desordres arrivez en ce pays , & notamment ceste année mil six cens vingt-un. Et aussi qu'iceluy député aille trouuer nostre-dieu seigneur Viceroy , pour luy communiquer semblablement des mesmes desordres , & le supplier se ioindre à leur complainte.

pour la demande de l'ordre necessaire à
tant de mal-heurs, qui menacent ces ter-
res d'une perte future, & finalement
pour qu'iceluy député puisse agir, requérir,
conuenir, traicter & accorder pour le Gene-
ral dudit pays, en tout & par tout ce qui
sera l'aduantage dudit pays. Et pour ce
tout d'un pareil consentement & de la mes-
me voix cognoissant la sainte ardeur à la
Religion Chrestienne, le Zele inuiolable
au service du Roy, & de l'affection passionnée
à la conseruation de l'autorité dudit sei-
gneur Viceroy, qu'a tousiours constamment
& fidellement tesmoigné le Reuerend Pere
Georges le Baillif Religieux de l'ordre des
Recollets, ioint sa grande probité, doctrine
& prudence. Nous l'auons commis, depu-
té, & delegué, avec plain pouuoir & charge
de faire, agir, représenter, requérir, conuenir,
escrire & accorder, pour & au nom de tous
les habitans de ceste terre, suppliant avec tou-
te humilité sa Maiesté, son conseil, & nostre-
dit seigneur Viceroy, d'agreer ceste nostre de-
legation, conseruer & proteger ledit R. Pere
en ce qu'il ne soit troublé ny molesté de quel-
que personne que ce soit, ny sous quelque pre-
texte que ce puisse estre, à ce que paisiblement
il puisse faire, agir & poursuivre les affaires

du pais, auquel nous donnons derechef pou-
voir de reduire tous les adus à luy donnez
par les particuliers en vn cahier general, &
à iceluy apposer sa signature avec ample
declaration que nous faisons, d'auoir
pour agreable & tenir pour vallable
tout ce qui sera par iceluy Reuerend Pe-
re fait, signé, requis, negocié & accor-
dé pour ce qui concernera ledit pays, & de
plus luy donnons pouuoir de nommer &
instituer vn ou deux Aduocats au Con-
seil de sa Maiesté, Cours souveraines &
Iurisdctions, pour & en son nom &
au nostre, escrire, consulter, signer plaider
& requerir de sa Maiesté & de son Con-
seil, tout ce qui concernera les affaires de
ceste nouuelle France. Si requerons hum-
blement tous les Princes, Potentats, Sei-
gneurs, Gouverneurs, Prelats, Iusticiers &
tous qu'il appartiendra, de donner assistance
& faueur audit Reuerend Pere, & empêcher
qu'iceluy allant, venant, ou sejournant en
France, ne soit inquieté ou molesté en ceste
delegation avec particuliere obligation de re-
cognoissance, autant qu'il sera à nous possi-
bles. Donné à Kebec en la nouuelle France
sous la signature des principaux habitans,
faisans pour le general, lesquels pour auten-

siquer d'auantage ceste delegation, ont prié le tres-Reuerend Pere en Dieu Denis Iamet, Commissaire des Religieux, qui sont en ces terres d'apposer son sceau Ecclesiastique ce iour & an que deffous, signé Champlain, Frere Denis Iamet Commissaire, Frere Ioseph le Caron, Hebert Procureur du Roy, Gilbert Courseron Lieutenant du Prenoist, Boullé, Pierre Reye, le Tardif, I. le Groux, P. Desportes, Nicolas Greffier de la Jurisdiction de Kebec. & Greffier de l'ass'mblée, Guers Commissionné de Mon'eigneur le Viceroy & present en ceste eslection, & seellée en placard du scel dudit Reuerend Pere Commissaire.

Le bon Pere Georges ayant ses despeches & pris les aduis de tout ce qu'il auoit à faire, s'embarqua dans les premiers Nauires frettez pour le voyage de la France, où estant arriué il employa la viuacité de son esprit, à faire valoir sa commission & remonstrier que si sa Maiesté n'auoit vn soin particulier du Canada & de contribuer aux frais necessaires, pour pouuoir mettre le pays en bon estat, que iamais on n'en tireroit gloire ny profit non plus que d'une terre abandonnée & deserte, quoy que bonne. de soy & de grande esperance, & afin d'y pouuoir plus

pressamment persuader le Roy, il luy faic
vne deduction des richesses du pays en la Re-
queste & és aduis suinans qu'il luy presenta,
lesquels s'ileussent esté accomplis & effectüés
de point en point, comme on luy auoit faict
esperer, la nouvelle France, seroit à present un
beau & riche pays, & la pluspart de ses peu-
ples conuertis, au lieu que ce n'est encor
qu'un desert presque inhabité, sinon d'un
peuple errant dont la pauureté & la faine-
antise, rendent également leur conuersion
difficile.

AV ROY.

SIRE,

Les pauvres Religieux Recollets habi- ^{Requête}
tuez à Kebec en la nouvelle France vous re- ^{présentée}
monstrent très-humblement, que depuis six ^{au Roy.}
années en ça, qu'il a plu à Dieu se servir
de leur ministère sous l'autorité de vostre
Maiesté, tant au voyage de ceste terre
estrangere, descouvertures du pays, qu'en la
conuersion des peuples plus Sauvages en la
cognoissance de Dieu, qu'en leur conuer-
sion ciuile. Ils ont differé de donner leur
aduis touchant cette entreprise, jusqu'à
ce que l'experience secondant leur bonne
volonté, ils peussent avec tant plus de cer-
titude qu'il importe de ne parler aux Roys
que d'affaires bien digerées & meurement
considerées, proposer à vostre Maiesté ce
qui est necessaire en ceste affaire: & bien
qu'il semblast estre de leur deuoir, dès
les premieres années de leur sejour audit
pays, aduertir vostre Maiesté de ce qui

estoit à faire pour la continuation de cet auguste dessein. Ils ont estimé que les lettres annuelles qu'ils ont escrit depuis leur arriuée suffisoient, iusques à ce que le pays & les peuples leur feussent dauantage cogneus, afin que selon qu'ils trouueroient tant de la disposition des peuples que des profits que l'on pourroit esperer de la terre, ils iugeassent ce qui seroit plus à prepos; or est il qu'à present que la hantise des peuples les a rendus scauans en leur recherche, & que les voyages qu'ils ont fait de cinq à six cens lieues dans les terres en la compagnie du sieur de Champlain, Lieutenant sous vostre autorité de Monseigneur de Montmorency Viceroy du pays, leur ont acquis la cognoissance tant desirée des peuples de diuerses contrées. Et voyans les grands & manifestes profits, qui peuuent reussir à la gloire de Dieu, augmentation du sceptre & de l'Empire des François, contentement singulier de vostre Maiesté & profit & utilité de tous ses suietts. Les supplians ont iugé estre expedient, voire grandement necessaire de declarer ce que en conscience ils recognoissent estre de toute ceste entreprise, afin qu'il plaise à vostre Maiesté leur accorder le contenu leur en memoire cy attaché.

Les supplians doncques sont avec la grace de Dieu, SIRE, dans vne terre nommée par le commun Canada, mais mieux la nouvelle France, en vn lieu appellé Kebec, basti par la diligence & industrie singuliere du sieur Champlain, fort auant dans le fleuve de saint Laurens. Où ayant sejournez, ils ont appris les richesses de ce quartier & speciallement de ce fleuve accompagné de plusieurs belles & fertiles Isles, peuplé d'une telle abondance de toutes sortes de poissons qu'elle ne se peut descrire, bordée de costaux plains d'arbres fructiers, comme noyers, chastagniers, pruniers, cerisiers, & vignes agrestes, avec quantité de prairies qui ornent & embellissent ses vallons, le reste de la terre garny & peuplé de toute sorte de chasse & plus qu'il n'y en a en France, & avec plus grand proffit en ce que non seulement ils ne manquent de gibier & bestes fauves ordinaires en ces pais, mais ont de plus des Esclans ou Orignals, Castors, Renards noirs, & autres animaux dont la pelleterie donne accès & esperance au bien futur d'un tres grand commerce : d'auantage la bonté de ceste terre a esté de plus en plus recognüe par les voyages que les supplians y ont fait, qui leur ont porté la cognoissance de plus de

tr cent mille ames disireuses du labourag
& faciles d'attirer à la cognoissance de Dieu,
pour n'estre liez à aucun culte, Par la cōduite
de q^uels peuples, les fleuues, riuieres, lacs
de largeur & longueur indicibles ont esté re-
cognus par les supplians; mais comme le
bien ne s'aquier sans peine, il n'y a point de
doute que outre les grands labours des sup-
plians en ses découuertes & leur seiour
dans le pays, ce qui leur donne le plus de
trouble n'est pas seulement de s'estre trouué
sans assistance d' aucune commodité, ains
seulement de viures par ceux qui sont asso-
ciéz en ce commerce, ausquels seuls fait
aduoüer ceste obligation, mais que ces ter-
res & leur abondance reconnues par l'estran-
ger, ils sont en perpetuelle trainie de sur-
prises n'attendans que l'heure que l'on vien-
ne couper la gorge à tous ceux qui res-
dent audit Kebec. Car il ne faut pas
tant s'effrayer aux paupieres abatuës des
Lyons, que l'on ne sçache qu'ils mordent
en dormant, & que les ennemis de vo-
stre Couronne, bien qu'ils semblent en-
dormis ne viennent à l'appas de si grandes
esperances de gain & de profit. En effect,
SIRE, qui ne se hazarderoit de venir posse-
der vne terre si riche laquelle donne de ses

flancs des mines de fer & d'acier, qui rendent quarante-cinq pour cent, du plomb trente, du cuiure dix-huict, & qui en promet d'or & d'argent, terre qui donne par vſure toutes ſortes de ſemences, & laquelle dès à preſent donne les materiaux propres pour la conſtruction de toutes ſortes de vaiſſeaux fourniffant le Mertrain, Lantes, planchages pour fenestragés & lambri, & de plus les Gommés, Bray & Raiſine. En outre la pelleterie cy-deſſus mentionnée. Les cendres & la potaſſe de quoy ſeul il ſe peut faire trafic de plus de cent mille eſcus, & ce qui eſt plus conſiderable, un autre qui poſſederait ladite terre pourroit de là tenir en bride & contraincte plus de mille vaiſſeaux de voſtre Eſtat qui viennent annuellement aux peſches dont ils emportent les huilles, les moluës, baleines & ſaulmons dont vos ſuieſts ſe ſeruent. Il eſt vray que l'approche qu'ont faiſt vne fois les Anglois, qui couperent la gorge à la flotte des Ieſuites accompagnée du ſieur de Poitrincourt ſ'en allant en l'Accadie, donne aux ſupplians des apprehenſions qui leur ſont tant plus grâdes qu'ils regretteroient de voir le tilire auguſte de nouvelle France, changé en un autre, ſoit de nouvelle Holande, Flandre, ou Angleterre: car d'eſtimer qu'il y ait rien qui reſiſte à pre-

sent à leur entreprise, c'est se flatter en l'attère
d'un mal-heur inévitable s'il ny est remedié,
& bien que cela arrive ce ne sera sans en avoir
esté long-temps menacez, sans mettre en ligne
de compte les menées & entreprises de ceux
de la Rochelle, qui tous les ans apportent ar-
mes & munitions aux Sauvages, les animâs
à couper la gorge aux François, & ruiner leur
habitation, ce qui n'est pas peu considerable.
Les supplians ont donc jugé estre de leur con-
science de donner averti à vostre Maiesté de
l'intérest qu'elle a en la conservation de ceste
terre qui promet en la cōtinuation des labours
precedens un passage favorable pour aller à la
Chine, ce qui est autant ou plus facile à con-
server & maintenir, S I R E, sous vostre do-
minatiō, qu'il est aysé à l'estranger imprimer
sur le front de la France, une tache perpetu-
elle & indelebile pour n'avoir sçeu conserver
une terre qui estoit à l'augmentation de sa
gloire, laquelle conservation depend de l'en-
tretien de la Religion par l'autorité de la Ju-
stice, quād elles y seront toutes deux appuyées
& maintenües par la force d'une garnison
establie en un fort, qui fiant bastir sur la
croupe d'une Montagne, qui tiendra plus de
dix-huict cens lieues de pays suiect, attendu
qu'il n'y a aucun abord recogneu que l'entrée

dudit fleuve de S. Laurent. Ce qui fera reussir le commerce & le rendre grandement profitable, & par ainsi vostre gloire augmentée & une nouvelle fleur adionstée à la Couronne Françoisé.

Sur ces considerations, SIRE, plaise à vostre Majesté accorder aux supplians le cōtenu en leurs articles cy attachez pour la conservation dudit pays, accroissement & entretien de la Religion Chrestienne en iceluy, & ils continueront leurs labours & leurs prieres pour l'augmentation de vostre Empire & la prosperité de vostre Maieité. Outre que les ames qui seront par ce moyen conduites au Christianisme rendront leurs prieres, leurs biens & leurs vies tributaires de son Sceptre.

J'aurois encores icy descrit tout au long les articles presentez à sa Majesté, mentionnez en la susdite Requeste, mais pour estre aussi peu necessaire comme ils ont eu peu d'effect, ie me suis contenté d'en poser icy les principales & generales, sans m'arrester à celles des particuliers, qui ne pourroient de rien servir à mon suiect, suffit que l'on sçache que sans interest, nos Religieux ont fait tout ce qu'ils ont pû pour le bien, honneur & salut du país.

*Tres-humbles remonstrances & memoires
des choses necessaires pour l'entretien &
execution de l'entreprise faicte en la nou-
uelle Frâce presentées au Roy, & du temps
qu'elle a esté descouuerte.*

Memoires
presentez à
sa Maieité.

Comme iamais l'homme ne peut acquerir la fin d'aucune chose que par les moyens propres & conuenables à icelle, estant ainsi que le principal but & l'intention particuliere de sa Maieité vise à la conuersion des ames, d'où depend l'augmentation de son Empire & de sa gloire, il est vray qu'il est impossible d'y paruenir que par les moyens essentiels pour l'execution d'une si sainte entreprise, qui sont d'assister la religion de la iustice, & toutes deux de la force, l'une ne pouuant subsister sans les autres & toutes trois bien associées se trouuent les pilliers & plus solides fondemens d'un Estat. Partant sa Majesté outre plusieurs autres considerations est d'autant plus interessée à la cōseruation de la nouuelle France, sous son Empire par le moyen de ces trois arcouboutans, que nul autre Prince de la Chrestienté n'y peut rien pretendre, les François en ayant faict les descouuertes depuis cent seize ans, & continué iusques à present, car dès l'an mil cinq cens quatre, les Normands y allerent, au rapport mesme & par l'aduen des histoires

estrangees, & apres eux Jacques Cartier en l'an mil cinq cenz trente-quatre & trente-cinq par l'expres commandement de François Premier. Depuis le Marquis de la Roche fist ce voyage en l'an mil cinq cens nonante-cinq, pouruiuy en l'an mil six cens par Chauuin, qui fist bastir vne demeure à Tadoussac, & en l'an mil six cens trois, le sieur de Monts accompagné du sieur de Champlain, qui firent des nouvelles descouuertes & des bastimens es lieux esquels il ne s'en estoit iamais veu, toutesfois abandonnées, puis apres iusques en l'an mil six cens huiet que le sieur de Poitrincourt avec des Peres Iesuites entreprist le voyage, où ils furent desconfits par les Anglois, qui pensoient triompher des trauaux & peines des François. Mais en la mesme année le sieur de Champlain vint donner dans ces terres iusques au lieu de Kebec, qui est aduancé de plus de cent lieues dans le fleuue de S. Laurens, où il fist l'habitation qui y est à present, & de là passa à plus de six cens lieues dans ces terres nouvelles, où il a descouuert plusieurs belles contrées habitables dont l'on peut tirer de grandes richesses & commoditez dès à present, en esperer beaucoup plus à l'aduenir, d'où se void l'interest que sa Majesté a de se preualoir de la possession legitime de ceste terre, qui luy est d'autant plus asseurée que par la confession mesme des Cartes estrangees, ce droit luy est acquis & cédé priuatiuement à tous autres, & de là resulte l'obligation necessaire de sa Maiesté à la contribution & assistance esperée pour la manutention

de ce païs, qui ne se peut mieux conseruer que par ces trois moyens, de la Religion, la Iustice & la force, qui y seront (s'il plaist à sa Maiesté) establies & par elle entretenues suiuant ces articles & memoires que les pauvres Religieux Recollects habituez en ladite terre luy en presentent, protestât toutesfois qu'ils ne l'auroient jamais entrepris & d'entrer en vne si grande cognoissance d'affaires, que l'on pourroit estimer outrepasser les bornes de leur institution & de leurs vœux, n'estoit la necessité de l'affaire, & qu'il ne se treuve autres personnes dans le païs qui puissent donner ces aduis & ayent plus d'interest de faire ces tres humbles remonstrances, pour la gloire de Dieu en la conuersion des ames & pauvres nations qui s'y perdent sans cognoissance de leur Createur & sans Religion & culte aucun, ioinct la consideration qu'ils ont de l'vtilité visible & augmentation asseurée de l'Empire de sa Majesté, qui luy feront agreer s'il luy plaist, ce qui luy est demandé, sçauoir.

Pour le regard de la Religion.

Que defences seront faictes à tous suiets de vostre Maiesté, faisant profession de la Religion pretendue reformée d'y habituer ou y entretenir aucunes personnes de quelque natio. que ce soit de ladite religion pretenduë reformée, sur les peines qui seront iugées raisonnables.

Qu'il plaise à sa Maiesté fonder vn Seminaire de 50. enfans des Sauuages, pour six ans seule-

nient à raison de 50. escus pour chacun, qui se-
 ront par an 2500. escus, après lequel temps de
 six ans ils pourront estre entretenus voire vn
 plus grand nombre, du reuenu des terres qui
 seront cultiuées pendant ledit temps, lesquels
 enfans sont tous les iours offerts aux supplians
 par leurs parens, pour estre instruits & esleués
 en la Religion Chrestienne, & pour ce donner
 vne Abbaye pour le reuenu y estre employé, la
 nourriture des Religieux de ladite Abbaye, &
 l'entretien preallablement faict.

Qu'il plaise à sa Maiesté donner ausdits sup-
 plians de quoy auoir des liures, ornemens, vste-
 cilles, meubles, viures, & de quoy entretenir
 vne douzaine d'hommes pour leur labourer de
 la terre & entretenir du bestail pendant lesdi-
 tes six années seulement.

Pour le regard de la Iustice.

Il est grandement necessaire que sa Maiesté
 accorde que la iustice y soit exercée avec tant
 plus de puissance que les commencement des
 peuplades sont plus importans, afin d'euitier les
 reproches de nos voisins, & aussi pour ne per-
 mettre que sous l'autorité de sa Maiesté il se
 commette des voleries, meurtres, assassinats,
 paillardise, blasphemés, & autres crimes des-ja
 par trop familiers entre quelques François
 habitans en ladite terre &c.

Et pour le regard de la Force.

Celle cy estant l'humeur radicalle qui soustient les deux precedentes. Il plaira au Roy de donner dequoy bastir vn fort dans le pays, vne Tour à Tadoussac, lieu qui est l'vnique abord des vaisseaux, & l'entretien pour six ans d'vne garnison de cinquante hommes propre pour la construction & conseruation dudit fort.

Finalement qu'il plaise au Roy donner au sieur de Champlain de son Arsenal des canons, poudres & munitions & augmenter son autorité & ses pensions de luy & sa famille, son appointement de deux cens escus n'estant suffisant pour vn tel entretien, &c.

Voyla tout ce qui est des principales affaires que le R. Pere Georges negotia au Conseil & avec les Gens du Roy apres en auoir parlé à sa Majesté & présenté les Articles cy-dessus, mais qui ont autant aduancé le Canada qu'on a contribué à l'exécution & accomplissement d'icelles.

Voyage des Peres Guillaume & Irenée Recollets, pour le Canada. D'un Sauvage baptisé & mort sur mer, & de quelques ceremonies des Montagnais pour les malades.

CHAPITRE VIII.

Les visites des Superieurs dans les Ordres sacrez, sont tellement importantes & necessaires que sans icelles, l'ordre delaissé d'estre ordre & se peruertit par ce delaissement. Ce fut la raison pour laquelle nos Peres assemblez au Chapitre tenu l'an 1622. firent election du R. P. Guillaume Galleran pour Commissaire du Canada auquel on donna pour Compagnon le R. P. Irenée Piat qui dés long-temps desiroit s'employer à la conqueste des ames des pauvres Sauvages C'estoit vn choix qu'on ne pouuoit faire meilleur & qui eut fait beaucoup s'il eut esté bien assisté, mais sa Maieité, ny contribuant rien, ou fort peu, les marchands n'ont pas eu assez de puissance non plus que de bonne volonté pour parfaire vn si grand œuvre que de reduire ces peuples & rendre le país florissant, comme il se pourroit faire si on y employoit les despences superflues qui se font icy tous les ans, en ballets, jeux & banquets, & en tant d'habits mondains, qui montent

iusques à l'excès , d'où sensuit la ruine de beaucoup de bonnes familles.

Auec la benediction du R. P. Prouincial ils s'acheminèrent à Dieppe enuiron la my May, où ils furent fauorablement receus dans les vaisseaux par le sieur Guillaume de Caen General de la flotte bien que de contraire Religion, car au reste il est homme polly, liberal & de bon entendement scachant parfaictement bien commander en mer. Vne chose en leur voyage leur fist grandement admirer la diuine prouidence en l'ordre qu'il tient voulant sauuer les hommes. Il y auoit vn an & plus qu'vn Sauvage Canadien auoit esté amené à Dieppe lors qu'estant tombé malade il desira s'en retourner en son pays en la compagnie de nos Peres, sans pour cela monstrier aucune inclination pour le Baptesme.

Vn Cana-
dien est
baptisé puis
meurt.

Estant embarqué il eut de merueilleuses tentations ou plustost imaginations qui augmentoient grandement son mal. Il eut opinion que le Maistre du vaisseau le vouloit faire mourir, de maniere que s'il remuoit vne corde il croyoit que c'estoit pour le pendre, & s'enfuyoit se cacher au fond du Nauire, s'il alloit à luy il pensoit que c'estoit pour le ietter dans la mer & se prenoit à crier, & par ces continuelles inquietudes d'esprit il se mit si bas & s'afoiblit de telle sorte qu'il fut contraint d'en garder le liêt, & chercher remede à sa santé, mais qui fut tout extraordinaire, car s'imaginant que mangeant beaucoup &

incessammēt seroit le vray moyen de sa guarison, il crioit tousiours à la faim, mangeoit sans relache, & empiroit à mesure qu'il croyoit se mieux porter du corps, tandis qu'interieurement Dieu illuminoit son ame & le tiroit des tenebres pour le mettre à la grace.

Le Pere Irenée qui auoit pris soin de luy, l'oyoit souuent plaindre la nuit & s'escrier en son patois François qu'il escorchoit au moins mal : Moy pourquoy point Chrestien, moy pourquoy point Baptisé, & est à noter qu'estant en France il auoit esté souuent sollicité des Huguenots d'embrasser leur pretendue Religion, ce qu'il ne voulut iamais faire, Dieu le reseruant pour son Eglise & pour son Palais celeste, où les Heretiques n'ont aucune part ny ceux qui sont hors de l'Eglise, car hors icelle il n'y a point de salut.

Le Pere Irenée le voyant si perseueramment demander le S. Baptême, creut qu'il y auoit là quelque chose de Dieu & qu'il ne deuoit point negliger cette ame laquelle sa diuine Majesté vouloit sauuer, la difficulté estoit de luy faire entendre les mysteres de nostre S. Foy, & tirer de luy la confession d'un Dieu mort pour nous en Croix, mais il n'y auoit point là de truchement qu'il pût faire, pour ce, comme i'ay dit ailleurs, qu'ils n'ont point de mots propres pour leur faire entendre nos mysteres, & si le pasteur malade scauoit fort peu de François.

Le Pere luy fist neantmoins comprendre au mieux qu'il pût, plus par signes que par pa-

roles, car Dieu n'oblige pas à l'impossible, après quoy il luy présente vne Image du crucifiement de nostre Seigneur, qu'il prist avec grande reuerence en ostant son bonnet, & la mist auprès de luy, & souuent luy faisoit la mesme reuerence, mais ce qui estoit de merueilleux, est que iamais il ne mägeoit qu'il ne ioignit premierement les mains & remuoit les levres, comme faisoit mon grand Sauuage Huron, ils s'armoient du signe de la S. Croix & disoit humblement ces diuines paroles, Iesus ayez pitié de moy.

Et comme il se sentit diminuer de force & en des apprehensions de mourir sans auoir receu le S. Baptisme, il recommença de plus bel & avec des affectiōs plus pressantes à prier qu'on eut à luy donner, autrement qu'il estoit perdu. Le Pere Irenée luy fit dire par le Truchement qu'on apprehendoit que si nostre Seigneur luy rendoit la santé, qu'il retournerast derechef viure en son ancienne vie Sauvage & delaisast là le Christianisme, il protesta que non, & qu'il vouloit viure & mourir en nostre sainte Religion.

Là dessus on prist assurance du General qu'il contribueroit à sa nourriture s'il reuenoit en cōualeſſence, peur que la necessité le contraignit de retourner à son ancien poste, c'est à dire vie barbare, puis on le baptisa. Chose admirable le Pere Commissaire ne luy eust pas plustost conféré ce Sacrement apres vn acte de contrition qu'on tira de luy, qu'il rendit son ame à Dieu le Createur comme

il n'eust attendu que cette application pour
passer de cette vie en l'autre : Ce qui me faict
dire avec S. Paul, ô grandeur des merueilles de
Dieu, combien vos voyes sont inscrutables,
voicy vn Sauvage qui sort de son pays, il tombe
malade, il est baptisé, il meurt & le voyla sauué
plus heureusmēt que beaucoup de Chrestiens
qui vivent & meurent en infidels.

Le corps ayant esté ensevely & exposé hon-
nestement sur le tillac, les Peres dirent l'Office
& les prieres accoustumées, apres lesquelles il
fut ietté dans la mer vne grosse pierre attachée
à son pied pour le faire couler au fond : il n'y
eut qu'une seule chose en quoy on manqua,
qui fut de n'auoir retenu de ses cheveux & de
ses ongles, mais de ses cheveux principalemēt
selon qu'ils ont de coustume, pour les mōstrer
à ses parens & à tous ceux de sa Nation, à fin de
leur oster toute sinistre opinion qu'on l'eust
tué ou submergé, car cōme ils sont assez soup-
çonneux d'eux mesmes, il ne falloit que ce
manquement là, pour les mettre en rumeur :
(nous dirent quelques Sauvages de nos amis)
on ne laissa pas neantmoins de faire des pre-
sents aux plus prochains parens du deffunt,
pour leur oster tout sujet de plainte, & nous
mettre en assurance de ce costé là.

Tandis qu'on estoit occupé à l'enterrement
du deffunt le Nauire suiuoit sa routte & aduā-
ça iusques à Tadoussac où ils arriuerent fort
heureusmēt, sinon qu'ils frayerent vne roche
entrant au port, qui les pensa perdre, de quoy
eschappez, ils rendirēt graces à Dieu & mouil-
lerent l'anchre pour le repos d'une si longue

navigation, pendant laquelle le P. Guillaume resta toujours sain & gaillard, & le P. Irenée au contraire presque toujours malade & incommodé, voyla cômte tous n'ont pas vne mesme grace naturelle ny la force & vertu de pouuoir supporter l'air de la mer & la violéce des tourmêtes qui causent à la pluspart des maux de cœur fort grands, lesquels neantmoins se guerissent en abordât la terre, si plustost ils ne quittent, cômte ils font, & puis reuiennent, mais souvent avec de furieux vomissemens.

Le R. P. Guillaume monta à Kebec dans les premieres barques & de là à nostre Conuêt, & le P. Irenée resta pour les dernieres afin d'affister toujours les passagers & personnes Catholiques. Il trouua là vne fort grande Croix que depuis quelque-temps nos Religieux auoient fait faire pour l'y esleuer en signe de Victoire, mais les grâds débats suruenus entre les Nauires des deux societez en empescha l'execution iusques à l'arriuée dudit P. Irenée qui la benist solénellement & la fit esleuer à l'ayde des hommes que Monsieur le General luy presta. Il y eut des Huguenots mesme qui s'y employerent d'affectiō, pendât que d'autres plus peruers s'emoquoier. Ils edifierent aussi vne Chapelle de rameaux d'arbres, où ledit Pere dit la S. Messe au grand contentement de l'oname & tous les bōs Catholiques qui se trouuerent là presens.

Le Sieur de Caen ayant donné l'ordre necessaire à Tadoussac, partit pour Kebec avec le P. Irenée, lequel après vn peu de repos, voulut se rendre miserable avec les miserables & aller hy-

ternier avec les Montagnais pour apprendre
 leur langue; car c'est le principal sujet pour-
 quoy on s'y abandonne, & pour cest effect, il
 contracta amitié avec vn barbare qui luy sem-
 bloit honneste homme, lequel après quelque
 petit present, luy promist place & nourriture
 dans la cabane avec tout son emmeublemēt qui
 consistoit simplement en deux busches de bois,
 l'une pour luy servir de cheuet & l'autre pour
 luy servir de cloison & le separer aucunement
 des autres, qui ont accoustumé de toucher tous
 pells mesle les vns parmy les autres sans separa-
 tion.

Voila donc le bon Pere logé, mais en tel lieu
 qu'on ne voyoit que pauvreté, le Ciel estoit sa
 couverture & la terre nuë son liēt mollet: pour
 toute vasselle il n'auoit que son escuelle d'es-
 corce & sa cueiller, & le reste estoit bien peu de
 chose, encor se sentoit il bien-heureux, ô mon
 Iesus d'auoir rencontré vn si bon hôte.

Mais il arriua par mal-heur peu de iours
 après sa venue vne maladie inopinée au frere de
 ce Sauvage, pour laquelle il fallut faire altē au
 milieu des bois par l'espace de dix ou douze
 iours, pendant lesquels on chercha par tout des
 remēdes à ce mal qui ne pū estre si tost guery, Sauages
consultent
 car les Medecins ny les Apoticairez n'y sont pas le diable,
 là des plus sçauans. Il fallut donc auoir recours à
 l'Oracle & voicy comment. Le bon homme fist
 dresser au milieu de sa cabane vne espede de
 tour ronde avec des paux picquez en terre re-
 doublez en dehors avec des couuertes & des
 escorces de bouleaux pour la rendre noire &

obscure, car le diable fuit par tout la lumiere.

Cela estant fait, il fit entrer dedans vn Maistre Pirottois ou Magicien, pour s'informer du diable qui auoit donné ce mal à son frere, afin de l'en punir & guarir le malade par le moyen de ceste punition, car ils sont tellement superstitieux en leurs maladies, qu'ils croient qu'elles leurs sont ordinairement données par autrui, ou causées par le malin esprit, qui en effect leur en donne souuent d'imaginaires, qui se guerissent par des pareilles imaginations, & voyla ce qui met le diable en credit.

Or le bon homme ne faisoit pas moins des fiennes pour descouurir les auteurs de la maladie de son frere, que le Maistre Pirottois dans sa petite tour, car il faisoit des gestes & des grimaces admirables, il se demenoit, il se frappoit le visage avec vne forme de tambour de basques dans lequel y auoit quelque petits cailloux ou grains de bled d'Inde, & au dessus estoient peintes des figures de diable; il heurloit il tempestoit, & faisoit des cris espouuantables, qui eussent fait peur à des personnes peu asseurées & encores moins accoustumées à ces chariuaris, & puis tout à coup l'vn & l'autre faisoient des pauses & demouroient vn petit espace de temps dans vn profond silence, au milieu duquel le malade interrogeoit son medecin, de l'auteur de son mal, qui luy en contoit à plaisir & tousjours des bourdes qu'il scauoit gentiment controuuer en charlatan raffiné.

A la fin apres auoir encor bien tintamarre & fait des inuocations à ce demon, il fut conclud

par le Piretois que le mal auoit esté donné par vn Sauvage fort esloigné de là, surquoy resolution fut prise qu'on l'enuoyeroit tuer par l'un des freres du malade (car ils estoient plusieurs) afin de tirer par ceste mort, la vengeance de sa malice & la guerison du malade comme j'ay dit. Voyla comme le diable se iouë de ses pauvres miterables, & comme par ses pernicieux conseils, il les destruiet de sorte qu'ils ne peuuent mesme multiplier ny croistre en nombre à cause de ses tueries, non plus qu'en lumiere & connoissance de leur mal-heur.

Le Pere Irenée estonné d'un si meschant conseil, & que sa presence ny ses remonstrances ne pouuoient en rien moderer ny diuertir ces mauuais desseins (comme nouveau Apostre parmy vn peuple gentil) il quitta là tout & s'en retourna au Couuent pour y cathechiser les François, n'ayant pû assez tost corriger les barbares qu'il faut supporter & souuent dissimuler leur façon de faire avec vne grande patience & douceur d'esprit, attendât le temps propre pour recueillir le fruit de la charité, car les forteresses du diable ne se prennent pas du premier coup n'y tousiours avec violence.

C'est vne methode de laquelle nous vsons mesme parmy les gros Chrestiens, car d'abord allez parler de Dieu à vn homme grandement auare ou addonné à ses plaisirs, il vous rebutera & tournera le dos, il y faut apporter de grandes précautions, encor a on bien de la peine de gagner quelque chose sur leur esprit en dissimulant leur desfant. Il me souuient à ce propos

Vn auare
rendu
deuot,

d'un certain gentil hōme autāt auare & indeuot que sa femme estoit pieuse & sainte. Il fuyoit les Religieux & sa femme les accueilloit, il ne parloit que d'escus & sa femme que de vertus, bref les Religieux ne pouuoient auoir d'entrēe chez luy qu'il ne leur tournast aussi tost les talons, peur qu'on luy parla des choses de son salut, ou de faire quelque aumône aux pauvres, qui ne voyoient que Madame.

Il arriua neantmoins que nous l'abordames vn soir comme il estoit à table, de se retirer il n'y auoit point d'apparence, ni nous de coucher deuant la porte estant en si bonne maison, donc par ceremonie il fut contrainct de nous offrir le couuert, car il cognoissoit nostre ordre. Or que croyez vous qu'elle fut sa premiere pensée, elle fut iustement de nous dire qu'il eut bien desiré que les douze plus gros de ses villageois fussent conuertis en or enfermez dans sa caue. Voyla vn merueilleux souhait & qui sentoit bien de son auarice, & tout le reste de son entretien ne fut que de semblables discours & des guerres où il auoit vicilly; mais la cōclusion en fut tres-bonne après nos applications & ses reflections, car il nous fit promettre vn soing de le voir plus souuent & de prier Dieu pour luy, puis nous cōduit luy mesme dans la chambre & nous fist faire du feu, ce qui ne luy estoit iamais arriué, de quoy Madame ioyeuse au possible rendit graces à Dieu de la conuersion de son mary qu'elle n'auoit iamais veu dans vne si grande deuotion.

Des travaux de nos Religieux allans à l'Esplan, & d'un second voyage que fist le Pere Irenée aux Sauvages où ils observerent quelque ceremonies pour auoir bon vent.

CHAPITRE IX.

LE Pere Ioseph voyant le P. Irenée plustost de retour qu'il n'esperoit, prist luy mesme sa place & s'en alla passer le reste de l'Hyuer avec les Montagnais, afin de gagner tousiours temps & disposer aucunement ce peuple grossier au bien qu'on desiroit d'eux. Or il ne fut pas long temps que les Sauvages prirent plusieurs Esclans, desquels ils en dedierent vn pour nos pauvres Religieux de Kebec, qu'ils enuoyerent aduertir par vn de leurs hommes pour le venir querir à dix ou douze lieues de Kebec.

Le P. Irenée y voulut aller avec nostre bon frere Charles, & quelque François que leur presta le sieur de Champlain. Il faisoit pour lors vn fort grand froid, le temps fort serain, & la terre par tout couverte de cinq ou six pieds de neiges, c'est ce qui les contraignit après auoir fait provision d'un peu de galettes pour viure en chemin, de s'accommoder chacun d'une paire de raquettes attachées sous leurs pieds pour s'enfoncer dans les neiges, & avec cela ils se

Vont querir vn Esplan,

mirent à la suite de leur Sauvage qu'ils ne perdoient point de veüe, à cause qu'il n'y a aucun sentier ny chemin en tout le país.

Mais comme il alloit vn peu trop viste pour de pauures Religieux & n'auoit pas la discretion de cōsiderer que nos habits nous sont fort incommodes à marcher pendant les vents & le mauuais temps; le Pere ordonna qu'il iroit le dernier & le plus mauuais marcheur le premier, & avec cest ordre ils allerent plus commodément & allegrement.

En tout le chemin ils ne trouuerent ny maison ny tauerne pour se chauffer, & pour leur nourriture il fallut se contenter d'vn peu de leur galettes, car il la falloit menager, pour qu'il en restat iusques à la fin du voyage. La reception que leur firent les Sauvages estoit plus accompagnée de complimens que de bonnes viandes, car estant iour de ieusne, il leur fallut aller coucher sans soupper pour n'y auoir ny poisson ny castor pour les regaler, la chair d'Esplan dont ils auoient à foison n'estant pas pour pareil iour.

Le matin venu rien ne les empêcha de s'esueille que le travail du chemin qui les auoit vn peu assoupy & appesanty. Après qu'ils eurent prié Dieu, les Sauvages leur donnerent à chacun vn morceau de la beste qu'ils accommoderent à part, chacun dans vn morceau de la peau & des vieilles couuertutes qu'ils auoient apportées, puis ayans proprement liez leur paquets, chacun traîna le sien avec vne corde par dessus les neiges, qui est vne bonne inuention.

car de les porter sur le dos il eut esté bien difficile & quasi impossible.

Si le temps n'eust point changé, ils n'eussent eu que demy mal, mais quatre ou cinq heures apres qu'ils furent partis, il s'esleua vn si grand vent avec des pluyes si fascheuses, qu'elles leur gasterent tout le chemin; puis la nuict suruenant il leur fallut loger emmy les bois dans vn trou qu'ils firent au fond des neiges, où ils auoient l'eau qui les incommodoit autant que la pluye qui faisoit fondre la neige: pour leur repas ils eussent bien pû cuire de la viande, mais ils n'auoient ny pain, ny sel, & mouroient de froid; de maniere qu'ils passerent la nuict fort esueillez, & dans vn extreme soucy comment ils passeroient le lendemain la riuere qui commençoit à lascher, & les neiges à se fondre, ce qui rendoit le chemin presque insupportable à gens chargez, & si mal accommodez.

Ils n'eurent pas à peine passé ceste riuere qui conduit au Saut de Montmorency & le bois en suite, que le temps se changeant, ils furent accueillis d'vn froid si extreme accompagné d'vn vêt impetueux qui rouloit la neige par monceaux, qu'ils en penserent estre au mourir. La peine leur en estoit double, car avec leurs raquettes ils ne pouuoient marcher sur les glaces du grand fleuve, & sans icelles ils ne pouuoient passer les grands monceaux de neiges qui leur bouchoient le passage, de maniere qu'ils se trouuoient fort empeschez.

Le bon frere Charles qui sembloit le plus

robuste, fut neantmoins le premier abbati, car il demeura cōme immobile presque sans sentiment, dequoy s'apperceuant le Pere Irenee, tout mal qu'il estoit courut à luy pour le consoler & l'exhorter de prendre courage, non toutesfois si efficacement que l'Ange le bon Helie accablé de lassitude sous vn genievre, lors qu'il fuyoit la persécution de Isabelle, & ayant trouué vn petit morceau de pain dans sa pochette, gellé & dur comme pierre, il en escraça vn petit entre deux cailloux, qu'il luy fist aualler pour luy faire reuenir le cœur, & en effect cela luy profita.

Après quoy ils en trouuerent vn autre couché de son long sur la neige, lequel ils remirēt sus pieds au mieux mal qu'ils purent, non sans beaucoup de peine: car en fin ne pouuāt quasi se soutenir, ils furent contrains de trainer son paquet & prendre part dans son travail, tellement que les malades aydoient aux infirmes, & ceux qui estoient bien empeschez à trainer leur fardeau, portoient encore celuy des autres, & ne falloit point marchander, ains tousiours peiner, afin qu'en agissant du corps, le froid & le vent ne les fist geler tout debouts.

Mais, ô bonté diuine, qui n'abandonnés iamais les vostres iusques au dernier point, alors qu'ils pensoient estre perdus vous les secourustes par le moyen du bon Pere Paul Huet comme ie diray presentement. Ce bon Religieux ayant dit les Vespres à la Chapelle de Kebec, comme nous auions accoustumé toutes les Festes & Dimanches, monta sur la montagne pro-

chaine pour voir s'il descouueroit nos voya-
geurs comme il fist de fort loing. Les ayans
apperceus comme vn autre Abraham qui se te-
noit sur les chemins pour accueillir les pelerins,
il accourut promptement au Conuent prendre
vn peu d'eau de vie avec vn peu de vin que l'on
garde exprés pour semblables necessités, qu'il
leur porta en grand haste, & à mesure qu'il en
rencontroit quelqu'vn, il luy donnoit vn peu
de ses rafraischissemens & le consolait au mieux
qu'il luy estoit possible iusques au Pere Irenée,
qui estoit des derniers, auquel ayant donné vn
peu de vin, comme reuenud d'vne extasé, les lar-
mes luy en tomberent des yeux à grosses gout-
tes, ou d'ayse, ou d'estonnement, ear comme il
m'a dit luy-mesme, ce petit doigt de vin tres-
rare dans le pays, fist comme vn miracle en luy,
le changeant tout en vn autre homme, & de
plus le bon Pere Paul se chargea de son paquet
iusques au Conuent, où ils arriuerent sur le
soir fort heureusement, à leurs maux passez
prés.

Il est tres-veritable que Dieu faißt des gra-
ces particulieres à ceux qui vont entre les Infir-
mies, qu'il ne faißt pas à ceux qui demeurent
en leur maison, & sans icelles il ne seroit pas
possible d'y subsister, ny de pouuoir resister
long-temps à tant de trauaux & d'austeritez,
que de pauures pieds nuds, pauures Euangeli-
ques, & pauures en tous les biens & commodi-
tez de la terre, sont contrains d'y souffrir iour-
nellement. Je confesse que ie ne pourrois pas
viure icy vn mois sans tomber malade, comme

J'ay vescu parmy les Hurons vn an entier & pleine santé, & que s'il y auoit des Religieux par deçà qui vescuissent de la sorte, tout le monde les auroit en admiration, mais il n'y en a point qui en approchent.

Autre voyage du Pere Irenée.

Le Pere Irenée projecta vn autre voyage long du grand fleuve vers les contrées de Tadoussac, pour y sonder le cœur des peuples qui l'habitent, & voir s'il y pourroit faire quelque chose pour leur salut, autre que celuy de son voyage precedent, mais qui ne luy reüssit guere mieux à son extreme regret. Il se mist donc sous la conduite de son Sauvage ordinaire, lequel avec tout plein d'autres y deuoient descendre dans deux chaloupes de compagnies. Les sieurs de Champlain & du Pont Graué leur firent à tous present de quelques galettes afin qu'ils prissent vn soin particulier dudit Pere, & en donnerent encor d'autres pour luy particulierement, lesquels ils mesnagerent comme les Hurons firent de mon biscuit, car si tost quelles furent en leur possession, ils se mirent après, & le iour & la nuict, & ne cesserent point que tout ne fut dissipé & mangé iusques aux miettes.

De remede à cela il n'y en a point, il faut laisser manger son bien, & ne dire mot pour ce qu'autrement ils vous appelleroient Onustey, auare & chiche, il vous est neantmoins permis de faire comme eux, & vzer de vos biens avec eux, mais tous ne peuuent viure comme les bestes, qui mangent le iour & la nuict pendant qu'elles ont de quoy, & par ainsi il faut laisser

passer la feste sans en estre, encor qu'elle soit à vos despens.

Preuoyant ce mauuais mesnage i'auois serré vn peu de biscuit dans vn petit sac que ie tenois caché sous mon manteau pour me seruir dans la necessité, mais il fut bien tost descouuert & mangé sur le champ, & par ainsi nous demeurâmes à deux de jeu, aussi bien pourueus l'un comme l'autre, d'un rien du tout, sinon du mais qu'ils auoient cachez par les champs en descendant; & voila comme ils seroient bons freres Mineurs s'ils estoient bons Chrestiens; car ils ont bien peu de soin du lendemain, s'appuyans sur la diuine Prouidence, qui nourrit les oyseaux du Ciel.

Il y a vne chose à remarquer en eux, que lors qu'ils ont peur, ou songent à quelque malice, ou bien qu'ils preuoyent quelque danger ou peril, c'est alors qu'ils chantent principalement, tellement que l'on peut prendre à mauuaise augure quand les Sauvages chantent seuls par les bois, ou à la campagne, sinon que ce soit pour vn simple diuertissement d'esprit, comme ils font quelquefois.

Au premier giste que ce bon Pere fist avec ses Sauvages, il leur fallut entrer dans les fanges iusques à my jambes, pour ce que leurs chaloupes ne peurent aborder la terre ferme, qui estoit bien auant dans les marests, & puis le mauuais temps, le froid, & les pluyes en rendoient le lieu quasi inaccessible. Le bon naturel du Sauvage du Pere fut remarquable, en ce qu'ayant vne espee de bas de peau d'Esan aux

Humanité
d'un Sau-
uage.

jambes, il les vouloit deschauffer pour luy faire prendre, & le deffendre aucunement du froid qu'il luy voyoit souffrir, mais il l'en remercia bien humblement, ayment mieux qu'il s'en seruit luy-mesme, que luy qui faisoit profession d'aller pieds nuds & viure en Apostre.

Le Sauvage le pria donc de s'arrester là, pendant qu'il yroit dans le bois prochain, d'où il rapporta son col chargé de busches, qu'il accommoda dans les plus mauuais endroits par où le Pere deuoit passer pour gagner la terre ferme, & arriuer au lieu où l'on deuoit cabaner: Voyez vn peu ie vous prie le bon naturel de ce Sauvage, & combien nous serons blasmables deuant Dieu de nostre peu de charité.

Estoit-ce pas encore vne action bien loüable au fils du Capitaine la Forrier, lequel voyant le pauvre Pere Ioseph le Caron fatigué du mauuais chemin & presque transsi de froid, le pria de tenir le deuant afin de marcher plus à l'ayse, & trouuant des lieux propres, il luy allumoit du feu pour le reschauffer, & luy rendoit tout le seruice possible à vn pauvre Sauvage: Je ne sçay ce que vous en penserez, mais j'ay receu tant de secours d'aucuns, que ie ferois plus volontiers le tour du monde avec eux, qu'avec beaucoup de Chrestiens & d'Ecclesiastiques mesmes.

Le Pere Irenée estant esueillé partit de ce marts avec ses Sauvages pour Tadoussac, où ils arriuerent à nuict close avec bien de la peine, tant à cause du mauuais vent, que pour la difficulté qu'ils eurent de doubler la ruiere du Saguenay,

& d'aborder les barques Françoises qui estoient là à l'ancre, attendant la flotte de France qu'on esperoit dans peu de jours.

Or le lendemain matin les Sauvages du Pere ayant esté abouchez par vn autre plus grand nombre qui estoient là attendans d'autres de leurs amis pour aller à la guerre, ils furent persuadez d'estre de la partie, & de renvoyer ledit Pere dans son Cōuent iusques à vn autre temps qu'ils le reprendroient pour son dessein, tellement qu'il fallut qu'il s'en retournast dans vn canot de Montagnais sans pouuoir passer plus outre, marry que son voyage ne luy auoit mieu x succédé.

Ces Montagnais allerent le iour & la nuit tandis qu'ils eurent le vent propice, mais leur ayans manqué ils prirent terre, & dresserent vne suerie pour purger leurs mauuaises humeurs (s'en ay descrit la methode au second liure de ce volume) pendant que le Pere accommodoit à part sa petite cuisine qui ne luy réussit guere bien. Il auoit vn petit paquet de ris qui est la meilleure prouision que l'on puisse auoir entre les Sauvages, il s'estoit aussi muni d'un petit chaudron à Kebec pour luy seruir, mais il fut bien tost égarré, non sans soupçon qu'il luy eust esté enleué par les Sauvages, & fallut qu'il se seruit d'un des leur qui leur seruoit à faire griller des pois, mais qui rendit son ris d'un si mauuais goust, qu'il ne fust possible à personne d'en pouuoir manger, non pas mesme les chiens pour affamez qu'ils fussent, ce fust là le moyen de coucher à la legere, & n'estre point trop assoupis le matin.

Les sauvages en leur suerie, firent d'une pierre deux coups; car parmi les chants qu'ils y font d'ordinaire, ils y en adiousterent d'autres, avec de grands tintamarres & des chimaгрées dignes de leurs personnes, pour obtenir vn vent propre à leur navigation. Durant ce temps là deux ieunes sauvages estoient en sentinelle pour prendre garde au vent, lesquels peu d'heures apres accoururent promptement à la cabane où se tenoit le Sabbat, disant, Cessez, cessez, voila bon vent, & tous cessèrent, & se resioüirent du secours de leur Manitou, disans au Pere, que ce n'auoit pas esté son Iesus, qui leur auoit enuoyé vn vent si souhaitable, mais leur bon Manitou, par le moyen de leur ceremonie.

Dieu, qui est ialoux de son honneur les fist bien-tost repentir de leur trop prompte venterie, car ils ne furēt pas à deux ou trois lieues de là, qu'il s'esleua vn vent si impetueux & extraordinairement contraire & violent, qu'ils penserent tous perir, & furent reiettez d'où ils estoient partis, heureux d'auoir pû gagner terre, où ils eurent tout loisir de penser au peu d'effect de leur ceremonie, comme au pouuoir de nostre Dieu, qui seul leur pouuoit donner le temps qu'ils desiroient, ainsi que leur fist entendre le Pere en la reuence qu'il eut respondant à leur folle croyance.

Puis il leur dit, Vous auez eu recours à vostre Manitou pour auoir vn vent propre, & il vous en a donné vn contraire & vous a trompé. Or à present ayons recours à Iesus, & vous

verrez qu'il nous exaucera & fera paroistre
son pouuoir par dessus tous les Demons, ce
qu'ils firent en la personne dudit Pere, & Dieu
tres-bon, qui veut estre recognu, prié, & ado-
ré de ses creatures, leur en donna vn en bref
tres-excellent, par le moyen duquel ils se ren-
dirent allegrement à Kebec, comme s'ils y
eussent esté conduits de la main d'vn Ange,
d'où le Pere Irenée ayant appris que ie reue-
nois des Hurons, vint au deuant de moy dans
vn canot de Montaignais, où il faillit à se per-
dre par la faute de son Pilote qui dormoit lors
qu'vn coup de vent l'eut fait tourner s'en des-
sus dessous, si le cordeau qui gouuernoit la
voile ne se fust rompu par la violence du
vent.

Fin du premier Liure.



HISTOIRE DV CANADA, ET VOYAGES DES PERES RECOLLECTS EN LA nouvelle France.

LIVRE SECOND.

*Commencement du voyage de l'Authheur
pour les Hurons. Rencontre d'un Pirate
Holandois, & du danger qu'ils coururent
estant eschiuez.*

CHAPITRE I.



OSTRE Congregation se
tenant à Paris, Nos Peres
toucheront & illumineront de cest
esprit divin qui conduit les
Apostres. entre les peuples
Gentils, donneront ordre au
Pere Nicolas Viel & à moy, d'aller secourir
nos

nos freres qui seuls auoient la mission de la
 conuersion du Canada, pendant que d'autres
 se disposoient pour les lieux Saincts que nos
 freres ont en leur gouuernemēt avec plusieurs
 Couuents en Leuant, où ils ont liberté de ser-
 uir Dieu, mais avec peine à cause de l'auarice du
 Turc, qui leur fait souuent des auaries. Cōme
 enfans obeissans & suiets de la S. Eglise, après
 nous estre recommandez à Dieu & inuoué la
 benediction du saint Esprit, nous fumes rece-
 uoir celle de Monseigneur le Nonce residant
 à Paris, lequel approuuant nostre zele & fauo-
 risant nostre pieux dessein, nous octroya toute
 l'autorité & puissance qu'il pouuoit auoir
 dans l'estendue de toutes les terres Canadien-
 nes, s'offrant encores de luy mesme d'en escrire
 à sa Saincteté & d'obtenir d'elle pour nous sa
 Benediction Apostolique & tout pouuoir de sa
 part par vne bulle expresse, si le Nauire fretté
 & des-jà tout prest à faire voile, ne nous eut
 contrainct à vn humble remerciement, & nous
 contenter de sa bonne volonté, & du pouuoir
 que nous donnoit sa Seigneurie, sans nous
 mettre en peine d'autre escrit.

Munis de la benediction, des Conseils & de
 l'autorité d'un si grand Prelat, nous receumes
 aussi celle de nostre Reuerend Pere Prouincial
 & partisme de nostre Couuent de Paris le 18.
 iour de Mars l'an 1623. à l'Apostolique, à pied
 & sans argent selon la coustume des pauures
 Mineurs Recollects, & arrivasmes à Dieppe
 en bonne santé, où à peine pûmes nous pren-
 dre quelque repos, qu'il nous fallut embar-

quer le mesme iour peu auant my-nuict, avec vn vent assez bon; mais qui par sa faueur incôstante nous laissa bien-tost, & fusmes surpris d'un vent contraire iognant la coste d'Angleterre, qui causa vn mal de mer fort fascheux à mon compagnon qui l'incommoda grâdemét, & le contraignit de rendre le tribut ordinaire à la mer, qui est l'vnique remede & la guerison de ces indispositions maritimes. Graces à nostre Seigneur nous auions del-ja scillonné pour le moins cent lieues de mer auant que ie me ressentisse beaucoup de ces fascheuses maladies, mais après ie m'en trouuay tellement travaillé qu'il me sembloit n'auoir iamais tant souffert corporellement au reste de ma vie, comme ie souffris pendant trois mois six iours de navigation qu'il nous fallut (à cause des vents contraires) pour trauerser ce grand & espouuentable Ocean, & arriuer à Kebec, demeure des Mineurs Recollects.

Rade de la
Rochelle.

Or pour ce que le Capitaine de nostre vaisseau auoit commission d'aller charger du sel en Broüage, il nous y fallut aller necessairement & passer debât la Rochelle, à la rade de laquelle nous nous arrestames deux iours, pendant lesquels nos gens allerent negotier en ville pour leurs affaires particulieres. Il y auoit là bon nombre de Nauires Hollandois tant de guerre que marchands, qui alloient charger du sel en Broüage & à la riuere de Suedre proche Marenne: nous en auions del-ja trouué en chemin enuiron 30. ou 40. en diuerses flottes, & aucun n'auoit couru sus-nous, entant que nostre pa-

uillôn nous failloit cognoistre: il y eut seulement vn Pirate Holandois qui nous voulut attaquer & rendre combat, ayant des-ja à ce dessein ouuert ses sabors, faict boire & armer ses gens; mais pour n'estre pas assez forts, nous gagnames le deuant à petit bruit & nous sau-
nâmes à la vaille. Ce miserable traïsnoit des-ja quand & luy, vn autre Nauire chargé de sucre & autres marchandises qu'il auoit volé à des pauvres marchands François venans d'Espagne.

Vn Pirate
Holandois.

De la Rochelle on prend d'ordinaire vn Pilote de louage pour conduire les Nauires qui vont à la riuere de Suedre à cause de plusieurs lieux dangereux incognus aux Pilotes estrangers. Celuy que nous prîmes à la Rochelle tout expérimenté qu'il se disoit, pensa neantmoins nous faire perdre, car n'ayant voulu ietter l'anchre par vn temps de brume comme on luy conseilloit, se fiant à sa sonde, il nous ietta sur des sables où nous demeurâmes eschoiez depuis les quatre ou cinq heures du soir, iusques au lendemain matin, que la marée nous remit sus pied & en estat de voguer. Je vous laisse à considerer en cette disgrâce qu'elle pou-
noit estre la pensée d'un chacun, & si elle n'estoit pas capable d'affliger les plus resolu, car le Nauire estoit tellement couché, que si Dieu par sa bonté ne nous eut preserué & calmé du tout le temps, c'estoit faict du Nauire & de nous tous.

Le Capitaine & conducteur du Nauire estoit doublement affligé, car il se voyoit à la veille de

perdre non seulement le corps, l'honneur & les biens, mais en suite tout l'equipage, aucun duquel n'eut le courage de boire ny de manger, eucore que le souper fust prest & seruy : pour moy i'estois fort debile & eusse volontiers pris quelque chose, mais la crainte de mal edifier me retint, me fit ieusner comme les autres, & demeurer en priere toute la nuit avec mon compagnon : nos Matelots parloient des-ja de ietter en mer le Pilote Rochelois, qui nous auoit eschoué, pendant qu'une partie de l'equipage vouloient se saisir de l'esquif pour chercher leur seureté, si le Capitaine courageux ne les en eut empesché & menacé d'un coup de pistolet le premier qui s'y ingereroit. Il les contraignit detrauailler pour le salut de tous, leur fist poser les quatre anchres & estre sur leur garde attendant l'assistance & misericorde de nostre Seigneur.

Le louë Dieu, qu'ayant pitié de ma foiblesse, il me fist la grace d'estre fort peu esmeu pour le danger present & eminent, ny pour tous autres que nous auons eu pendant nostre voyage, car il ne me vint iamais en la pensée (me confiant en sa diuine misericorde) que deussions perir, autrement il y auoit grandement à craindre pour moy, puis que les plus experimentez Pilotes & Mariniers n'estoient pas sans crainte & apprehension, vn desquels indigné du peu de peur que ie tesmoignoïs pendant une furieuse tourmente de huit iours, me dit vn peu en cholere qu'il doutoit que ie fusse Chrestien de n'aprehender pas en des perils &

dangers si eiminens ; ie luy respondis que nous estions entre les mains de Dieu, qu'il ne nous aduiendroit que selon la sainte volonté, que ie m'estois embarqué en intention d'aller gagner des ames à nostre Seigneur au pais des Sauuages, d'y endurer mesme le martyre si telle estoit la sainte volonté. que si la diuine misericorde vouloit que ie perisse en chemin ie ne m'en deuois point affliger, que d'auoir tant d'apprehension n'estoit pas vn bon signe : mais qu'vn chacun deuoit plustost tascher de bien mettre son ame avec Dieu, & après faire ce qu'on pourroit pour se deliurer du naufrage, puis laisser le reste du soing à Dieu.

Après estre deliuré du peril de la mort & de la perte du Nauire qu'on croyoit inneuitable, nous mismes la voile au vent, & arriuâmes d'assez bonne heure à la riuere de Suedre, où l'on deuoit charger du sel de Maraine. Nous nous desbarquâmes & n'estans qu'à deux bonnes lieues de Broüage nous y allâmes passer quelque iours de repos, avec nos freres de la Province de la Conception, qui y ont establi vn Conuent, lesquels nous y receurent & accommoderent avec beaucoup de charité.

Nostre Nauire estant chargé, & prest de se remettre sous voile, nous retournâmes nous rembarquer avec vn nouveau Pilote de Maraine qui deuoit nous reconduire au port de la Rochelle, mais Dieu adorable en ses iugemens, permit que ce Pilote nous pensa encor eschouer, ce qu'indubitablement auroit esté sans le grand iour qui fist voir le fond de l'eau, cela

luy osta la presumption & vanité insupportable de laquelle enflé, il s'estimoit le plus habile Pilote de cette mer, aussi estoit il de la pretenduë Religion, & des plus opiniastres, ainsi qu'estoit le premier qui nous auoit eschoué, quoy que plus retenu & modeste.

Vers la Rochelle il se voit grande quantité de Marsoins, desquels nos Mattelots ne firent point estat, comme de ceux qui se prennent en pleine mer. Ils pescherent forces seiches lesquelles accommodées sembloient des blanches d'œufs durs fricassez, ils prindrēt aussi des Grondins avec des lignes & hameçons qu'ils laissoient trainer après les galleries du Nauire, ce sont poissons vn peu plus gros que des rougets, lesquels nous seruoient à faire du potage.

Des Grondins poissons.

L'on dit que ce poisson est appellé Grondin d'autant qu'estant hors de la mer il ne cesse de gröder comme vn petit pourceau, cōtre l'ordinaire des poissons qui ne criēt iamais, mais à cause de mon mal de mer qui me donnoit peu de relasche ie n'y prins point garde, ny à beaucoup d'autres choses qu'en autre saison i'eusse curieusement obseruées.

Ce poisson n'estoit point trop à mon goust à cause de mô degoust, mais beaucoup moins la discourtoisie d'vn Chirurgien huguenot qui seul auoit le soin de nous assister, car nous n'en pouuions tirer vne seule bonne parole, non pas mesme ceux de sa pretenduë religiō, qui ne pouuoient approuuer sa mauuaise de-reglée & melancolique humeur, qui domine

d'ordinaire en ceux qui ont l'ame assise en mauuais lieu.

Passant deuant la Rochelle on renuoya le nouueau Pilote qui nous auoit ramené de Brouïages, on remplit nos batiques d'eau douce dans l'Isle de Rez, puis ayant mis les voiles au vent, & le cap à la route de Canada, nous cinglames par la Manche en haute mer à la garde du bon Dieu & à la mercy des vents, qui nous furent fauorables & discourtois selon leur inconstance.

Des larrons & pirates. D'un Matelot tué par accident. Tourmente fort grande. Prise d'un Nauire Anglois. Des Baleines & du poisson appellé Dorade beau par excellence.

CHAPITRE II.

ON se plaint, mais avec raison du grand nombre de voleurs & de larronneaux, qu'é guise de chenilles courrét aujourd'huy presque toute la surface de la terre, dôt les vns semblent honnestes gens & passent pour des gros Messieurs, & ceux là sont les pires de tous, car ils desrobent beaucoup & font pendre ceux qui prennent le moins. Les autres moins dangereux sont ceux qui comme Hibous ne vont que de nuit, sont assez mal couuerts & aussi peu courtois; ont tousiours

Des larrons
& Pirates.

la mine morne, triste & pensive comme gens de mauuaise cōscience, mais il y en a vne troisieme espeece entrē les deux, qui sont les filous, les tireurs de laine, les emmielleux, les caioleurs, les subtils, ceux qui vous font acroire que le blanc est le noir, font des querelles d'Allemands entr'eux puis seignent de se battre pour attaquer ceux qui veulent meriter le hola, & puis crient les premiers aux voleurs; ce sont ces batteurs de pauē qu'il faut apprehender. O qu'il est bon de ne se fier auiourd'huy qu'en Dieu, toute la terre est couuerte de liens & de pièges contre les gens de bien & ceux qui marchent dans la candeur & la simplicité. C'est le regne des meschans & de ceux qui tirent le sang & la substance du peuple, desquels Dieu fera vengeance vn iour & n'aura non plus de pitié d'eux qu'ils en ont eu du peuple.

Or de mesme que la terre a ses larronneaux, voleurs & brigands, la mer a ses pirates, escumeurs de mers & forbans, & si les vns sont bien meschans sur la terre, les autres ne leur cedent en rien sur les eaux, car ils brisent les furieux flots de la mer & courent les vastes campagnes de cet element impitoyable avec la mesme gayeté qu'ils feroient sur la terre sans apprehender ny la mort ny le fond des abismes, qui les va tousiours menassans d'un prochain peril ou naufrage, dequoy ils ne se soucient non plus que s'ils n'auoient point d'ame à perdre ny d'enfer à redouter.

De ces pirates vous en voyez (comme les vo-

leurs sur la terre) qui font les honnestes marchands pour n'estre point soupçonnez, & surprendre quand ils trouuent leur coup disposé, autrement ils se tiennent sur la mine de gens de bien. Les autres sont sans dissimulation & veulent bien qu'on les cognoisse pour tels qu'ils sont, car comme il n'y a que des coups à gagner chez eux, ils sçauent bien qu'on est tousiours à la deffense contre eux, & ce fut vn de ceux là qui nous vint menacer à deux ou trois cens lieues de mer, auquel il ne fut rien respondu pour n'estre alors en estat de deffence, mais parti d'aupres de nous, on rendit le pont de corde & chacun se tint sur ses armes, pour rendre combat au cas qu'il fut reuenu, mais il nous laissa aller, ayant bien opinion qu'allant en Canada on n'auoit pas grand richesse, & que de nous vouloir oster nos viures il n'y eut pas grand gain pour eux non plus que pour nous de contentement qui nous eut obligé à nous bien battre. Toutesfois il fut encore trois ou quatre iours à roder les mer à nostre veüe pour descouurir la proye.

Rencontre
d'un Pirate.

Il arriua vn accident dans nostre Nauire le premier iour du mois de May qui nous affligea fort. C'est la coustume en ce mesme iour, que tous les Matelots s'arment au matin, & en ordre font vne salue descouperie au Capitaine du vaisseau, vn bon garçon peu dressé aux armes par imprudence donna vne double ou triple charge à vn meschant mousquet qu'il auoit, & pensant le tirer il se

Vn homme
tué par accident.

creuz & tua le Mattelot qui estoit à son costé & en blessa vn autre legerement à la main. Il n'ay iamais rien veu de si resolu que ce pauvre homme blessé à mort : car ayant toutes les parties naturelles emportées , & quelque peaux des cuisses & du ventre qui luy pendoient , apres qu'il fut reuenu de pafmoison à laquelle il estoit tombé du coup, luy-mesme appella le Chirurgien, & l'enhardit de coudre sa playe & d'y appliquer ses remedes, & iusques à la mort parla avec vn esprit aussi sain & arresté, & d'une patience si admirable, que l'on ne l'eust pas iugé malade ny blessé à sa parole. Le bon Pere Nicolas le confessa & peu de temps apres il mourut : puis il fut enuveloppé dans sa paillasse, & mis le lendemain sur le tillac où nous dismes l'Office des morts, & toutes les prieres accoustumées, puis le corps ayant esté mis sur vne planche fut fait glisser dans la mer, puis vn tizon de feu allumé & vn coup de canon tiré qui est toute la pompe funebre qu'on rend d'ordinaire à ceux qui meurent sur mer.

Depuis nous fusmes battus d'une tempeste si grande par l'espace de sept ou huit iours continuels, qu'il sembloit que la mer se deust ioindre au Ciel, ou que tout l'Océan se deust bouleuerfer, de maniere que l'on auoit de l'apprehension qu'il se deust rompre quelque membre du Nauire pour les grands coups de mer qu'il receuoit à tout

moment on que les vagues furieuses qui donnoient iusques par dessus la Dunette l'abyssassent sans ressource, car elles auoient desia rompu & emporté les galleries avec tout ce qui estoit dedans: c'est pourquoy on fut contraint de caler le voile & d'abandonner le Nauire à la violence de la tourmente, & des flots qui nous balotoient d'une estrange façon sans que nous sceussions où les vents nous iettoient, pour ce qu'il estoit impossible pour lors de prendre les eleuations ny par le Soleil, ny par le Nord, & de nous sauuer encore moins, si Dieu nostre vray Nocher ne nous eust protégé & saué par vne grace speciale de cest euident naufrage. Cependant s'il y auoit quelque coffre mal amarré on l'entendoit rouller & quelques-fois la marmite estoit renuersée, & en disnans ou soupans si nous ne tenions bien nos plats ils voloient de la table à terre & les falloit tenir aussi bien que la tasse à boire selon le mouuement du Nauire que nous laissons aller à la garde du bon Dieu, puis qu'il ne gouuernoit plus, & n'y pouuions remedier. Pendant ce temps là les plus deuots passagers prioient Dieu & se mettoient en bon estar, mais pour les Matrelots ie vous assure qu'ils ne tesmoignerent iamais moins de deuotion sinon quelqu'un, encore estoit-ce en cachette peur d'estre mocqué, mais quand c'est tout à bon qu'il faut perir, c'est alors que tout le monde se met en son deuoir, mais souuent trop tard par vne inuention du

Diable qui nous fait differer nostre conuer-
sion. Il est tres-bon de ne se point troubler
voire tres-necessaire pour chose qui arriue,
à cause que l'on est moins apte à se tirer du
danger, mais il ne s'en faut pas monstrier plus
insolent, ains se recommander à Dieu, &
travailler à ce à quoy on pense estre expedi-
ent & necessaire à son salut & deliurance.

Marsoins
preffage de
tempestes.

Or ces tempestes bien souuent nous estoient
presagées par les Marsoins qui pour lors en-
uironnoient nostre vaisseau par milliers se
iouians d'une façon fort plaisante, dont les
vns ont le museau mouffé & gros, & les
autres pointus & allongé commes cannes.

Au temps de cette tourmente ie me trou-
uay vne fois seul avec le Pere Nicolas dans
la Chambre du Capitaine où ie lisois pour
mon contentement spirituel les Meditations
de saint Bonaventure, ledit Pere n'ayant
pas encore acheué son Office le disoit de
genouïls proche la fenestre qui regarde sur la
gallerie comme vn coup de mer rompit va-
aiz du siege de la Chambre, entra dedans,
souffleua ledit Pere & m'envelopa vne partie
du corps qui m'ayant esbloüy me fist prom-
ptemēt leuer en sursaut & à tastons ouvrir la
porte pour donner cours à l'eau, me resou-
uenant auoir ouy dire qu'un Capitaine avec
son fils se trouuerent vn iour noyez d'un
coup de mer qui entra dans leur Chambre
comme cet autre estoit entré dans la nostre.

Nous eusmes aussi par fois des ressaques

usques au grand masts, c'est à dire que le Naui^{re} puisoit à mesme dans la mer & s'en falloit peu que le reste n'allast au fond, mais lors que cela arriuoit au plus fort mesme de nos prieres on quittoit tout pour manœurer, & puis on continuoit ses deuotions qui ne sont pas si eschauffées en mer que l'on ne prenne tousiours garde aux vents & aux flots qui nous enuoyent par fois de merueilleux rafraischissemens qui donnoient à rire aux moins mouillez & pitié aux mieux trempz. Bon Iesus que la vie des Mariniers est vne vie estrange & merueilleuse, car s'ils ont quelquesfois vne heure de bon temps ils en ont d'autres qui sont bien discourtoises & pleines de difficultez, ie l'ay ouy dire, & ie le croy qu'il y a neantmoins plus de vieux Mariniers que de vieux Laboureurs, pour vous dire que nonobstant tout ce qui se passe peu perissent, & que l'on n'est pas si tost en terre que l'on veut retourner en mer où la santé se trouue fortifiée par le vomissement & la diette.

Quand la tempeste nous prit nous estions bien auant au delà des Isles Astôres qui sont Isles riches & bien peuplées appartenant au Roy d'Espagne, desquelles nous n'approchâmes pas plus près que d'une tournée au dire de nostre Pilote.

Ordinairement apres vne grande tempeste vient vn grand calme, comme en effet nous en auons quelquesfois de bien importuns, qui nous empeschoient d'auancer chemin,

*Exercice
en temps
calme.*

durant lesquels les Matelots iottoient & dansoient sur le tillac; puis quand on voyoit sortir de dessous l'Orizon vn nuage espais, c'estoit lors qu'il falloit quitter ces exercices, & prendre garde d'un grain de vent qui estoit enueloppé là d-dans, lequel se desserrant grondant & sifflant, estoit capable de renuerfer nostre vaisseau s'en dessus dessous, s'il n'y eust eu des gens prests à executer ce que le maistre du Nauire commandoit.

Or le calme qui nous arriua apres cette grande tempeste nous seruit fort à propos, pour tirer de la mer, vn grand tonneau de tres-bonne huile d'oliue, que nous apperceusmes flottant sur les eäuës assez proche de nous, nous en apperceusmes encore vn autre deux ou trois iours apres: mais la mer vn peu trop agitée pour lors nous en priua. Ces tonneaux cōme il est à presūmer, estoient de quelque Nauire brizé en mer par les furieuses tourmentes, & tempestes que nous auions souffertes peu de temps auparavant.

Prise d'un
Nauire An
glois.

Quelques iours apres nous rencontrâmes vn petit Nauire Anglois, qui disoit venir de la Virginie, & ie croy de quelqu'autre contrée des Indes Occidentales, car il auoit quantité de Palmes, du petun, de la cochenille & des cuirs, qui ne sont pas frequens à la Virginie. Il estoit tout dematé & en assez pauvre equipage pour son retour en Angleterre & Elcosse d'où ils estoient pour la pluspart, car il ne leur estoit resté de la tour-

mente passée, que le seul masts de mizanne qu'ils auoient accommodé à la place du grand masts qui s'estoit brizé avec tous les autres. Il pensoit s'esquiuier mais comme nous estions assez bons voilliers, nous allasmes à luy & luy demandasmes selon la coustume de la mer vstée par ceux qui se croyent les plus forts: D'où est la Nauire? il respondit d'Angleterre, on luy repliqua: amenez, c'est à dire, abaissez vos voiles, *Abus sur* sortez vostre chaloupe, & venez nous faire voir vostre congé, pour en faire l'examen, que si on est trouué sans le congé de qui il appartient, on le fait passer par la Loy. & commission de celuy qui le prend: mais il est vray qu'en cela, comme en toute chose, il se commet souuent de tres-grands abus, pour ce que tel feint estre marchand, & auoir bonne commission, qui luy-mesme est Pirate & marchand tout ensemble, se seruant des deux qualitez selon les occasions & rencontres.

De mesme nos Mariniers eussent bien desiré la rencontre de quelque petit Nauire Espagnol, où il se trouue ordinairement de riches marchandises, pour en faire curée, & cōtenter aucunement leur conuoitise, comme si prendre le bien d'autrui sur mer n'estoit pas larcin & volerie obligeant à la damnation eternelle, aussi bien que le prendre sur terre, car la malice reciproque des Nautonniers n'excuie point que le larcin sur mer ne soit peché, & si c'est par coustume

on se damnera par coustume: car le Commandement qui dit, Tu ne desroberas point s'entend nulle part, ny en la mer ny en la terre. Or bien que la chose soit ainsi le mal ne s'en diminuë point pourtant, & va tousjours pullulant à mesure que les hommes vieillissent. Cela se voit à l'œil qu'aujourd'huy il n'y a plus de fidelité entre les hommes, & que chacun tasche de tromper son compagnon, c'est pourquoy il s'en faut donner de garde, & n'approcher d'aucun Navire en mer, qu'à bonnes enseignes, de peur qu'un forban ne soit pris par un Pirate. Que si demandant d'où est le Navire on répond, de la mer, c'est à dire, escumeur de mer, & qu'il faut venir à bord, & rendre combat, si on n'ayme mieux se rendre à la mercy & discretion du plus fort où qui semble l'estre, ie dis, qui semble l'estre, car on y est souuent trompé.

C'est aussi la coustume en mer, que quand quelque Navire particulier rencontre un Navire Royal, de se mettre au dessous du vent, & se presenter non point coste à coste, mais en biaisant & mesme d'abatre son enseigne (il n'est pas neantmoins de besoin d'en avoir en si grand voyages) sinon quand on approche de terre, ou quand il se faut battre.

Pour reuenir à nos Anglois, ils vindrent en fin à nous, scauon leur Maistre de nauire, un vieil Gentil homme & quelques autres des principaulx, non toutesfois sans vne grande

grande contradiction, car ils apprehendoient le
mesme traitement qu'ils ont accoustumé de
faire aux François, quand ils ont le dessus, c'est
pourquoy leur Chef offrit en particulier à no-
stre Capitaine, moy seul present, tout ce qu'ils
auoient de marchandises en leur Nauire, pour-
ueu que la vie sauue on les laissast aller en leur
pais avec vn peu de viures, ce que nostre Capi-
taine refusa disant, qu'il ne vouloit rien d'eux
s'ils estoient gens de bien, mais que s'il trou-
uoit du contraire, qu'il leur feroit subir la Loy
de la mer, après auoir deuëment faict examiner
leur patente. Neantmoins à force d'importu-
nité nous firent accepter (attendant le iuge-
ment de leur cause,) vn baril de petun, & vn au-
tre de patates, ce sont certaines racines des In-
des, en forme de gros naueaux, rouges & iau-
nes; mais d'vn goust beaucoup plus excellent,
que toute autre racine que nous ayons par de-
ça. Et me donnerent à moy, vn cadran solaire,
que ie ne voulois accepter peur de leur en in-
commoder.

Le Capitaine de nostre vaisseau, cōme sage,
ne vouiut rien determiner en ce faict, de soy-
mesme, sans l'auoir premierement communi-
qué aux principaux de son bord, & nous pria
à en dire nostre aduis, qui estoit celuy que prin-
cipalement il desiroit sũire, pour ne rien faire
contre sa conscience, ou qui fust digne de repre-
hension. Pendāt que nous estions en ce conseil,
on auoit enuoyé partie de nos hommes dans ce
Nauire Anglois, pour y estre les plus forts, & en
amener vne autre plus grande partie des leurs

Des patates
racines,

dans le nostre, avec tous les Chefs, excepté le Capitaine, lequel estant fort malade mourut dans son Navire quelques heures après la prise.

Les Anglois
sont ren-
voyé quit-
tes.

Après auoir veu tous les papiers de ces pauvres gens, & trouué près d'un boisseau de lettres, qui s'adressoient à des particuliers d'Angleterre, on conclud qu'ils ne pouvoient estre forbans, bien que leur congé ne fut que trop vieux obtenu, & qu'on eut trouué quelques boettes de poison dans leur coffre, qui eussent pû faire soupçonner de mauvais dessein, attendu qu'outre qu'ils estoient peu de monde, & encor fort foiblement armez, ils auoient quelques chartre-parties, puis toutes ces lettres les mettoient hors de soupçon de ce costé là, & par ainsi furent renuoyez en leur Navires quites & absous, après nous auoir accompagné les trois iours consecutifs qu'on fust à consulter leur affaire.

Des Balei-
nes.

Je me recreois par fois, selon que ie me trouuois disposé, à voir ietter l'esluent aux Baleines, & iouer les petits balenots qui se recreoient en temps calme, d'une façon fort plaisante. Les grandes Baleines desquelles j'ay veu vne infinité particulieremēt à la Baye de Gaspey, nous importunoient plus qu'elles ne nous recreoient par leur soufflemens & les diuerses courses des Gibars après elles, qui nous estoit vne interruption de repos sans remede. Gibar est proprement le masle de la Baleine, auquel on a donné le nom de Gibar, pour vne bosse qu'il semble auoir, ayant le dos fort esleué, où il porte vne nageoire. Il n'est pas moins grad que les

Baleines, mais non pas si espais ny si gros, & a le museau plus long & plus aigu, & vn tuyau sur le front, par où il iette l'eau de grande violence, quelques vns à cette cause, l'appellent souffleur.

Toutes les femelles Baleines portent & font leurs petits tous vifs (non pas en masses ou en œufs comme les autres poissons) & les allaitent, couurent & contre-gardent de leurs nageoires. Les Gibars & autres Baleines dorment tenans leurs testes vn peu esleuées, tellement que cetuyau est à descouuert & à fleur d'eau. Ces monstres se voyent & descouurent de fort loin par leur queue qu'elles monstrent, souuēt s'enfonçās dās la mer, & aussi par l'eau qu'elles iettent par leurs esuans, qui est plus d'vn poinçon à la fois, & de la hauteur de deux lances; & de cette eau que la Baleine iette, on peut iuger ce qu'elle peut rendre d'huyle. Il y en a telle d'où l'on en peut tirer iusqu'à plus de 4. cens barriques, d'autres six vingts poinçons, & d'autres moins, & de la langue on en tire ordinairement cinq & six barriques des communes: Plin rapporte, qu'il s'est trouué des Baleines de six cens pieds de long, & 360. de large, & d'autres disent de l'estenduë de plus de trois arpens de terre, s'il est vray semblable comme ils l'asseurent, il y en a desquelles on en pourroit tirer beaucoup d'auantage. Mais ce qui est admirable en ce monstre est, qu'estant d'vne grandeur & grosseur si demesurée, surpassant tout autres poissons & animaux marins, il a neamoins le gosier si petit & estroit, qu'il n'y scauroit passer que la grosseur d'vn macreau à la fois, dont

Des femelles Baleines,

Grosseur des Baleines,

on peut admirer le double miracle de Ionas que Dieu fist eslargir ce gozier pour luy donner passage, & le conserua viuant dans ce ventre l'espace de trois iours, qu'après reslargissant ce meisme gozier, il l'en fist sortir sain comme il y estoit entré.

A mon retour des Hurons i'en vis tres-peu en comparaison de l'année precedente, & n'en pû conceuoir la cause, sinon la grande abondance de sang que rendit la blessure d'une grande Baleine, que par plaisir le sieur Goua Commis de nostre vaisseau, luy fist d'un coup d'arquebuse à croc, chargée d'une double charge: ce n'est néanmoins ny la façon, ny la maniere de les auoir: car il y faut bien d'autre inuention & des artifices desquels les Basques se scauent seruir, mais pour ce que diuers Auteurs en ont escrit, ie n'en fais point icy de mention pour abreger, & ne repeter ce que d'autres ont déjà dit.

La premiere Baleine que nous vismes en pleine mer estoit endormie, & passant tout auprès on detourna un peu le Navire, craignant qu'à son reueil elle nous causast quelque accident. l'en vis une entre les autres esponentablement grosse, & telle que le Capitaine & ceux qui la virent, dirent assuremēt n'en auoir iamais veu de plus grosse. Ce qui fit mieux cognoistre sa grosseur & grandeur est, que se demenāt & soutenant contre la mer agitée, elle faisoit voir une partie de son grand corps. Je m'estonnay fort d'un Gibar, lequel avec sa nageoire ou de sa queue, car ie ne pouuois pas bien discerner ou recognoistre duquel c'estoit, frapport si furieu.

sement fort sur leau, qu'on le pouuoit entendre de plusieurs lieux, & me dit on que c'estoit pour estonner & amasser le poisson, pour après s'en gorger.

Je vis vn iour vn poisson de quelque 10. ou 12. pieds de longueur, & gros à proportion, passer tout ioignant nostre Nauires: on me dit que c'estoit vn Requies, poisson fort friât de chair humaine, c'est pourquoy il ne fait pas bon se baigner où il y en a, pource qu'il ne manque pas d'engloutir les personnes qu'il peut attraper, ou du moins quelque membre du corps, qu'il coupe aysement avec ses 3. 4. 5. & 6. rangées de dents qu'il a en gueule fort aigues & dangereuses, comme auoit la teste de celuy que i'ay veu à Paris dans vn cabinet de pieces rares, dont la veüe me fist croire ce qu'on dit de ce poisson que n'estoit qu'il luy conuient tourner le vètre & la teste de costé pour prédre sa proye, à cause que comme vn Esturgeon, il a sa gueule sous vn long museau, il deuoreroit tout: mais il luy faut du temps à se tourner, & par ainsi il ne fait pas tout le mal qu'il feroit s'il auoit sa gueule autrement disposée.

Des Requies.

En quelque endroit de la mer vers l'Isle de terre neufue, l'un de nos Matelots herpôs vne Dorade que les habitans voisins du Peru tenoient anciennement pour vn Dieu & l'adoroient, à cause de sa rare beauté qui surpasse celle de tous les autres poissons de la mer; car il semble que la nature se soit particulièrement délectée & ait pris plaisir à l'embellir de ses diuerses & viues couleurs: de sorte qu'il esblouit pres-

De la Dorade poisson.

que la veuë des regardans, en se diuersifiant & changeant comme le Cameleon, & selon qu'il approche de sa mort il se diuersifie & se chäge en les viues couleurs. Il n'auoit pas plus de 3. pieds de lógueur, & sa nageoire qu'il auoit dessus le dos, luy prenoit depuis la teste iusqu'à la queue toute dorée & couuerte comme d'un or tres-fin: côme aussi la queue, ses aislerôs ou nageoires, excepté que par fois il paroissoit de petites taches de la couleur d'un tres-fin azur, & d'autres de vermillôn, puis côme d'un argeté; le reste du corps estoit tout doré, argenté, azuré, vermillonné, & de diuerses autres couleurs: il n'estoit pas guere large sous le ventre ny sur le dos; mais il estoit haut & bien proportionné à sa grandeur: nous le mangeâmes, & trouuâmes tres bon, sinon qu'il estoit un peu sec. Quand il fut pris il se iouïoit à nostre vaisseau, car le naturel de ce poisson suit volontiers les Nauires, à l'entour desquels il se iouë, mais on en void peu en la mer du Canada.

Nous tirâmes aussi de la mer un poisson mort long d'un pied, ressemblant à une perche qui auoit la moitié du corps entierement rouge; mais aucun de nos gês ne pût dire ny iuger quel poisson ce pouuoit estre; i'ay aussi quelquefois veu voler hors de l'eau des petits poissons, enuirôn la longueur de 4. ou 5. pieds, fuyâs de plus gros poissons qui les poursuioient, car Dieu le Createur qui les a créés petits, leur dône de petites aïles pour se pouuoir garantir des plus grands, mais leur vol est aussi bref comme leurs aïles sont facilement deséchées, & pour un sur-

croÿ de mal-heur, pensans se sauuer en l'air il y a souuét des oyseaux aux aguers, qui les surpré-
nent en volât, & par ainsi ils ne sont point asséu-
rez ny en l'air ny en la mer, non plus que l'hom-
me de bien qui est persecuté par tout, de ses en-
nemys, pendant que le meschant vit en repos,
& iouit de la substance des petits.

Nos Mattelots herpônerent vn gros Marsoin
femelle, qui en auoit vn autre petit dâs le ven-
tre, lequel fut lardé & rosty en guyse d'vn le-
uraut, puis mangé avec sa mere, qui se trouue-
rent tres-bons & nous consolèrent fort pour
estre las de salines & priués de rafraischissemés.

*Du grand Ban. De l'Isle aux oyseaux. Des
Elephans de mer & de la Baye de Gaspey.
Ceremonies des Mattelots és monts nostre
Dame, & du grand fleuve S. Laurens.*

CHAPITRE III.

ENtre la partie Occidentale du Canada & Du grand
nous, il y a vn lieu en mer qui s'appelle le Ban
grand Ban, où nombre de vaisseaux tant Fran-
çois que estrangers, vont faire la pesche de mo-
luës tous les ans, comme vers la terre ferme &
Isles d'icell Ce grand Ban, sont hautes mon-
tagnes assisees en las profonde racine des abismes
des eaux, lesquelles s'esleuent près de la surface
de la mer, iusques à 20. 60. 40. & 30. brassées
d'eauë, peu plus ou moins, selon que la sonde se
rencontre tombant sur lesdites montagnes ou
à costé.

On le tient de forme ouale, long de plus de six-vingts lieues, d'autres disent de 260. de large, passé lequel on ne trouue plus de fond non plus que par de çà, bien qu'il ne soit esloigné de la plus prochaine terre, qui est le Cap de Raze tenant à l'Isle de Terre neufue, que de 30. ou 40. lieues au plus.

Auant que venir à ce grand Bande 25 à 30. lieues loin, il se voit de certains oyseaux par troupes, qui s'appellent marmets, qui donnent vne certaine cognoissance au Pilote, qu'il n'est pas loin de l'escore ou bord dudit Ban, & qu'il est temps de tenir le plomb prest, pour sonder de fois à autre, iusqu'à ce que l'on paruienne à ceste escore où l'on trouue fond. Et pour vne autre certaine marque que l'on est sur le Ban, est le nombre infiny d'oyseaux, que l'on y voit, qui sont, comme fauquets, maupoules, huans, maunes & quelques autres qui n'en bougent presque, pour ce qu'ils y trouuent de quoy viure, & non en pleine mer.

Orie m'esmerueille, avec plusieurs autres, qu'ils peuent faire leurs nids & esclorre leurs petits, estans si esloignez de la terre, sinon qu'ils quittent la mer & se retirent à la mesme terre au temps qu'ils sont prests à faire leurs œufs. Il y en a qui asseurent après Plin, que sept iours auant & sept iours après le Solstice d'Hyuer la mer se tient ealme, & pendant ce temps-là les Alcyons (ce sont oyseaux qui presagerent par leur prise la Couronne Royale de Ierusalem appartenir à Godefroy Duc de Lorraine,) font leurs nids, leurs œufs & esclœnt leurs petits, & que la nauigation en est beau-

Des Alcyons, oyseaux.

coup-plus assurée : mais d'autres ne l'assurent neantmoins que de la mer de Sicile, c'est pourquoy ie laisse la chose à décider à plus sage que moy : Seulement ie dis que Iesus-Christ le Dieu de paix voulut naistre au monde au temps que tout estoit tranquille sur la terre, car le Temple de Ianus estoit fermé à Rome, & la mer dans son calme.

Nous prîmes à Gaspé vn deses fauquets avec vne longue ligne à lain, de laquelle y auoit des entrailles de moluës fraiches, qui est l'inuention dont on se sert pour les prendre. Nous en prîmes encor vn autre de certe façon; vn de ces fauquets grandement affamé, voltigeoit à l'entour de nostre Navire cherchant quelque proye: l'vn de nos Matelots aduisé, luy presenta vn harang qu'il tenoit en sa main, & l'oyseau affamé y descendit & le garçon habile le prit par la patte & fut pour nous. Nous le nourrismes vn assez long-temps dans vn seau couuert, où il ne se demenoit aucunement, mais il scauoit fort bien pincer du bec quand on le vouloit toucher. Plusieurs appellent communement cet oyseau happesoye, à cause de leur auidité à recueillir & se gorger des testes & foyes des moluës que l'on iette en mer apres qu'on leur a ouuert le ventre, desquels ils sont si frians qu'ils se hazardent à tout, pour en attrapper. Ils ressemblent aucunement au pigeon, sinon qu'ils sont encore vne fois plus gros, ont les pattes d'oyes & se re-

A prendre
fauquets
oyseaux.

paissent de poisson, comme font plusieurs autres especes d'oyseaux qui suiuent les vaisseaux pescheurs de moluës pour y trouuer dequoy viure.

Des fletans
& moluës.

Sur le grand Ban nous eumes le plaisir de la pesche d'une quantité de moluës & quelques gros fletans qui leur font vne furieuse guerre. Ils sont de la forme d'un turbot ou barbuë, mais dix fois plus grands, & qui ne leur cedent point en bonté, grillez par tranches on botiillis dans vn chaudron. Cela est admirable combien les moluës sont aspres à l'amorce, car elles aualent tout ce qui tombe dans la mer, bois, fer, pierres & toute autre chose que l'on retrouve par fois dans leur ventre quand elles ne l'ont pû reietter. Cette auidité est la cause principale pourquoy on en prend si grande quantité tous les ans, car elles n'ont pas plustost apperceu l'amorce qu'elles l'engloutissent; mais il faut estre soigneux de tirer promptement la ligne, autrement elles ont la propriété de reuomir lain en renuersant leur entrailles, & s'eschapent.

Du grand
Ban,

Je ne sçay d'où en peut proceder la cause, mais il fait vn continuel temps pluuieux, humide & froid sur ce grand Ban, aussi bien en plein Esté comme en autre saison, & hors de là on voit vn temps tout autre. Ces mauuais qualitez seroient fort ennuyeuses si elles n'estoient adoucies & compensées par la recreation & le diuertissement de la pesche, qui vous donne d'un poisson frais raiuissamment bon.

Vne chose entr'autres, me donnoit de la peine en mes indispositions, vne grande envie de boire vn peu d'eau douce & nous n'en auions point, car la nostre s'estoit corrompue & empuantie par la longueur du temps, que nous estions en mer, & si ie ne pouuois yser de cidre, ny de vin, non plus que beaucoup d'autres rafraichissemens, sans me trouuer mal du cœur qui m'estoit comme empoisonné & souuent bondissant contre les meilleures viandes, estre couché ou assis me donnoit quelque allegement lors que la mer n'estoit point trop haute, mais estant fort enflée nous estions bercez d'une merueilleuse façon. O que ie trouuois les Matelots heureux d'auoir tousiours bon appetit, estre gais & ioyeux, & ne sentir point ces bondissantes & empoisonnées douleurs du cœur.

Douze ou quinze lieuës de chemin apres auoir passé le grand Ban, nous rencontrames le Ban-Auert, ainsi nommé (me dirent les Marinsiers) pour ce qu'aux moluës qu'on y pefche, il s'y trouue des petits boyaux qui remuent comme vers que ie voulu voir moy-mesme, pour en pouuoir parler avec experience; & remarquay de plus, que ces moluës ont ordinairement vne peau noire en dedans, & ne sont si bonnes ny si excellentes que celles du grand Ban.

Ceux qui partent du Ban pour entrer au Golphe S. Laurens; prennent diuersement leur route, les vns plus à droite, & les autres

Degoust
que i'auois
en mer.

Du Ban-Auert.

plus à gauche, selon qu'il plaist à vn chacun, car en cela personne n'est contraint comme on pourroit estre à quelque petit destroit. Nous passames tout ioignant le Cap Breton (estimé sous la hauteur de 45. à 46. degrez & demy, & esloigné de cent lieuës du grand Ban) entre ledit Cap Breton, & l'Isle S. Paul laquelle est inhabitée, & en partie pleine de rocherons, bouleaux, sapinieres, & autres meschans menüs bois, comme sont la plupart des terres maigres & steriles qu'on appelle terre neufues, qui s'ont toutes les premieres qu'on trouue d'icy en Canada, & sont du Canada mesme.

Cap Bre-
ton.

Le Cap Breton que nous auions à main gauche, est vne grande Isle en forme triangulaire d'environ 80. ou 100. lieuës de circuit, terre haute esleuée qui me representoit l'Angleterre selon qu'elle se presente à mon obiect; pendant les quatre iours que pour cause des vents contraires nous lonniâmes contre la coste. Neantmoins on m'a assuré qu'il y a en icelle nombre de montagnes fort hautes, & des precipices fort affreux, & que la terre y est par tout couuerte de toutes sortes d'arbres propres à bastir, & de fort bons Ports pour les Nauires, mais ce qui me sembloit fort aduantageux pour la couseruation du pays, & le Golfe S. Laurens, est vn Terre pozé à la pointe du Cap qui regardel'Isle S. Paul. Il est de forme quarrée fort esleué & plat par dessus, ayant la mer de trois costez, & vn fossé naturel qui le separe de la

terre ferme. Ce lieu semble auoir esté fait par industrie humaine pour y bastir vne forteresse au dessus qui seroit imprenable, mais les choses ne se font qu'avec le temps, il faut penser aux choses plus necessaires les premieres, y passer des familles pour cultiuer, & des Religieux pour trauailler à la conuersion des sauuages que l'on tient fort sages dans leur barbarie, & fort honnestes & posez en leur conuersation. Au resté accommodez en leurs vestemens & cheuclure comme les Montagnais & autres Sauuages de la terre Neuue.

Estans entrez dans le Golfe ou grande baye S. Laurens, nous trouuames dès le lendemain matin ce tant renommé Rocher que Dieu a estably & pozé au milieu de ce Golfe, pour la retraite d'une infinie multitude d'oyseaux de diuerses especes qui le couurent, par tout en telle quantité qu'on ny scauroit presque poser le pied, sans marcher sur lesdits oyseaux, sur leurs nids, ou sur leurs œufs.

Cette voliere ainsi establie par la diuine prouidence, est esloignée dix-sept ou 18. lieues du Cap Breton, & sous la hauteur d'environ 47. degrez & trois quarts. Il est plat au dessus vn peu en talus, coupé à l'entour comme vne muraille, de circuit environ vne petite lieue, en forme ouale & difficile à monter, nous auions proposé d'y aller querir des oyseaux s'il eut fait calme, mais la mer vn peu trop agitée nous en empescha &

priua de ce contentement.

Quand il y fait vent les oyseaux s'esleuent facilement de terre, autrement il y a de certaines especes qui ne peuuent presque voler, & qu'on peut aysement assommer à coups de bastons, comme auoient faits les Matelots d'un autre Nauire, qui auant nous en auoient emplis leur Chaloupe, & plusieurs tonneaux de leurs œufs; mais ils y penserent tomber en foiblesse pour la puanteur extreme des ordures desdits oyseaux, me dit vn honneste homme qui estoit en la compagnie.

Ces oyseaux comme il est croyable, ne viennent que de poisson, & bien qu'ils soient de diuerses especes, les vns plus gros, les autres plus petits, ils ne font pour l'ordinaire plusieurs troupes, ains comme vne armée es-paillie volent ensemblement au dessus de l'Isle & es environs, & ne s'escartent que pour s'egayer, esleuer & se plonger dans la mer. Il y auoit plaisir à les voir librement approcher & voler à l'entour de nostre vaisseau, & puis se plonger pour vn long temps dans l'eau cherchant leur proye.

Leurs nids sont tellement arrangez dans l'Isle selon leurs especes, qu'il n'y a aucune confusion, ains vn tres bel ordre.

Les grands oyseaux sont arrangez plus proches de leurs semblables, & les moins gros ou d'autres especes avec ceux qui leur conuiennent, & de tous en si grande quantité, qu'à peine le pourroit-on iamais per-

suader à qui ne l'auroit veu. l'en mangeay d'un que les Martelots appellent Guillaume ou autrement Tangeux, & ceux du pays Apponath, de plumage blanc & noir, & gros presque comme vn canard, avec vne courre queuë & de petites ailles qui ne cedoit en bonté à aucun gibier que nous ayons par deçà, ce sont de bons pescheurs pour les poissons, qui prennent & portent sur leurs Isles pour manger. Il y en a d'une autre espee plus petits que les autres & sont appelez Godels, mais les plus grands nommez Margaux d'un plumage tres-blanc sont en vn canton de l'Isle separez des autres, & tres-difficilles à prendre pour ce qu'ils mordent comme chiens à ce qu'on m'a dit.

Proche de la mesme Isle, il y en a vne autre plus petite & presque de la mesme forme sur laquelle quelqu'un de nos Martelots estoient montez en vn autre voyage precedent, lesquels m'assurerent y avoir trouué sur le bord de la mer des poissons fort grands & gros comme vn bœuf, & qu'ils en tuerent vn de plusieurs coups de leurs armes par dessous le ventre & la gorge, ayans auparauant frappé en vain vne infinité de coups sur les autres parties de son corps sans l'auoir pû blesser pour la dreté de sa peau, bien que d'ailleurs il soit quasi sans desfence, & si massif & pesant que l'on peut sauter dessus, & le cheualer sans crainte: car il ne se peut plier, & si il aduance fort peu à cause que les pieds sont faits en nageoires & ne s'appuyé que sur

Elephant
de mer ou
belle à la
grand dent.

certainz mognons qu'il a au milieu des iam-
bes qui luy sont fort courtes, il iette aussi sa
teste de costé & d'autre en marchant, qui fait
que de la dent il peut offencer ceux qui ne
se tiennent pas assez derriere. On dit qu'il y
en a vne grande quantité en l'Isle de Sable
qui est à quelque 60. lieues dans la mer, &
qu'il s'y trouue aussi force taureaux & des
vaches que les Espagnols y deschargerét en
vn debris qui leur arriva passant par là, dont
nos gens de Lacadie font à present leur
profit.

Ce poisson est appellé par les Espagnols
Maniti, & par d'autres Hippotame. c'est à
dire, cheual de riuere, & pour moy ie le
prends pour l'Elephant de mer : car outre
qu'il ressemble à vne grosse peau enflée, il
a encor deux pieds qui sont ronds, avec qua-
tre ongles faicts comme ceux d'un Elephant;
à ses pieds il a aussi des aillerons ou nageoi-
res, avec lesquelles il nage, & les nageoires
qu'il a sur les espauls s'estendent par le mi-
lieu iusques à la queue.

Il est de poil tel que le loup marin, sçauoir
gris, brun, & vn peu rougeastre, il a la teste
petite comme celle d'un bœuf, mais plus
descharnée, & le poil plus gros & rude,
ayant deux rangs de dents de chacun costé,
entre lesquelles y en a deux en chacune part,
pendant de la machoire superieure en bas,
de la forme de ceux d'un ieune Elephant,
desquelles cet animal s'ayde pour grimper
sur les rochers (à cause de ces dents, nos

Mariniers

Mariniers l'appellent la beste à la grand dent.) Il a les yeux petits, & les oreilles courtes, il est long de vingt pieds, & gros de dix, & est si lourd qu'il n'est possible de plus. La femelle rend ses petits comme la vache, sur la terre, aussi a-elle deux mammelles pour les allaiter: en le mangeant il semble plustost chair que poisson, quand il est frais, vous diriez que ce seroit veau: & d'autant qu'il est des poissons cectases, & portans beaucoup de lard, nos Basques & autres Mariniers en tirent des huiles fort bonnes, comme de la Baleine, & ne rancit point, ny ne sent iamais le vieil; il a certaines pierres en la teste, desquelles on se sert contre les douleurs de la pierre, & contre le mal de costé. On le tue quand il paist de l'herbe à la riue des riuieres ou de la mer, on le prend aussi avec les rets quand il est petit; mais pour la difficulté qu'il y a à l'attrapper, & le peu de profit que cela apporte, outre les hazards & dangers où il se contendroit de mettre, cela fait qu'on ne se met pas beaucoup en peine d'en chasser. Nostre P. Ioseph me dit auoir veu les dents de celuy qui fut pris, & qu'elles estoient fort grosses, & longues à proportion.

Le lendemain nous eumes la veüe de la montagne, que les Matelots ont surnommée Table de Roland, à cause de sa hauteur, & les diuerses entre-coupures qui sont au sommet d'icelle. Puis peu à peu nous approchâmes des terres jusques à Gaspey, qui est estimé sous la hauteur de 48. degrés deux tiers de latitude, où nous posâmes l'anchre pour quelques iours. Cela nous

Baye de
Gaspey.

fut vne grande consolation: car outre la necessité que nous auions de nous approcher du feu, à cause des humiditez de la mer, l'air de la terre nous sembloit merueilleusement soüef: toute cette Baye estoit tellement pleine de Baleines, qu'à la fin elles nous estoient fort importunes, & empeschoient nostre repos par leur cōtinuel tracas, & le bruit de leur esuents. Nos Mattelots y pescherent grande quantité de houmars, truites, macreaux, moulès, & autres diuerses especes de poissons, entre lesquels y en auoit de fort laids, qui nous sont icy incognus.

Cette Baye de Gaspey peut auoir à son entrée trois à quatre lieues de largeur, qui fuit à Norrouest enuiron 4. ou 5. lieues, où au bout il y a vne riuere, qui va assez auant dās les terres, où ie pensay aller dans vne chaloupe auec quelques Mattelots, qui y furent querir vne barque qu'on y auoit cachée dès l'année precedente.

Petit iardin
à Gaspey.

Toute cette contrée est fort montagneuse, haute & presque par tout couuerte de meschans bois, qui faict cognoistre la sterilité de la terre & qu'on n'en pourroit à peine tirer aucun profit. Il y a seulement vn petit iardin deuant la ra de, en lieu vn peu esleué, que les Mattelots cultiuent quand ils sont là arriuez, & y sement de l'ozeille & autres petites herbes, qui leur seruēt à faire du potage, en faisant leur pesche & la seicherie de moulès sur le gallay.

Ce qu'il y a de plus commode & consolatif. après la pesche & la chasse, qui y est mediocrement bonne, est vn beau ruisseau d'eau douce,

tres-bonne à boire, qui se descharge au port dans la grand mer, de dessus les hautes montagnes qui sont à l'opposite, sur le sommet desquelles me promenant par fois, pour contempler de l'autre costé l'embouchure du grand fleuve S. Laurens, par où nous deuions passer pour Tadoussac, i'y vis quelques lapins & perdrix, comme celles que i'ay veuës du depuis dans le pais des Hurons: & comme ie desirois m'employer tousiours à quelque chose de pieux & qui me fournit d'un renouvellement de ferveur à la poursuite de mon dessein, ne pouuäs plater d'autres Croix, i'en grauois avec la pointe d'un couteau dans l'escorce des plus grands arbres, avec des noms des Iesus, pour marque que nous prenions possession de ceste terre au nom de Iesus-Christ nostre Maistre, ou le seul & vray Dieu seroit dorenavant adoré.

Nos gens ayans mis ordre à toutes leurs affaires & disposé vn grand eschafaut pour la pesche de la moluë qu'ils auoient hautement pris sur vn particulier pescheur arriué le premier, ils laisserent nostre Nauire au port pour leur seruir, & nous embarquames dans vne pinace nommée la Magdelaine pour Tadoussac, mais le vent & la marée, nous furent tellement contraires, que nous fusmes trois iours à pouuoir doubler le Cap, & puis le temps se remit au beau, nous donna moyen de ranger tousiours la coste à main gauche, & en suite les monts nostre Dame, qui contiennent environ vingt cinq lieües de longueur, pour lors encore en partie couuerts de neige, bien qu'il n'y en eue

plus par tout ailleurs.

Ceremo-
nies aux
monts no-
stre Dame.

Or les Matelots qui ne demandent ordinairement qu'à rire & se recreer, pour adoucir & charmer aucunement les travaux qu'ils souffrēt en voyageant, font icy des ceremonies dignes de leur esprit à l'endroit des nouveaux venus, & lesquelles les Religieux n'ont encor pû abolir. Vn d'entr'eux contrefaict le Prestre, qui feint de les confesser en marmotans quelque mots entre ses dents, puis les baptize à sa mode en leur versant sur la teste vne grande platée d'eau fresche, les presche, les exhorte, & leur faict tant de mal que pour en estre bien tost quitte, ils sont contraincts de se rachapter de quelque bouteille de vin, ou d'eau de vie, à discretion. Que si on pense faire le retif on empire d'autant son marché, car cinq ou six Matelots empoignent le galand, & le plongent la teste la premiere dans vn grand bacquet plein d'eau, comme ie vis faire à vn grand garçon, qui ne vouloit obeir à la loy, laquelle porte, que cōme le tout se faict selon leur coustume ancienne & par recreation, ils ne veulent pas qu'aucun se desdaigne de passer par icelle, ains gayement & de bonne volonté s'y soumettre, j'entends les personnes seculiers & de mediocre condition auxquels seuls on faict observer la loy.

L'Isle d'Anticosly, où l'on tient qu'il y a des Ours blancs monstrueusement grands & qui deuorent les hommes comme en Noruegue, est longue d'environ 35. ou 40. lieues, sous la hauteur de 50. degrez. Nous l'auons à main droite, qui est au Nord est de Gaspey, & en

Suite des terres plattes couuertes de sapinieres & autres petits bois, iusques à la rade de Tadoussac.

Cette Isle avec le Cap de Gaspey opposite, font l'emboucheure de cet admirable fleuve, Grand fleuve de S. Laurens. que nous appellons de saint Laurens, admirable en ce qu'il est l'un des plus beaux fleuves du monde, ancien & non pas du nouveau où il y en a encores de plus grande estendue selon que nous en apprend l'histoire & les personnes qui ont grandement voyagé en ce país, qui nous ont esté de long-temps incognus. I'ay veu & parlé à des ieunes hommes dans les contrées Canadiennes, qui m'ont asseuré auoir voyagé aux Moluques & vers les Antipodes, & n'y auoir veu aucune Riuere comparable à celle du Canada, donc celles du nouveau monde sont les plus grandes du monde, & celle de saint Laurens la plus grande du Canada.

Il a à son entrée à ce qu'on peut iuger, près de 25. à 30. lieues de largeur, plus de deux cens brassées de profondeur, & plus de 800. lieues de cognoissance, & au bout de 400. lieues, elle est encore aussi large que les plus grands fleuves que nous ayons dans l'Europe, remplie (par endroits) d'Isles & de Rochers innombrables, & pour moy ie peux asseurer que l'endroit le plus estroict que i'ay veu passe la largeur de 3. & 4. fois la riuere de Seine, & ne pense point me tromper: mais ce qui est plus admirable, quelqu'vns tiennent que cette riuere prend son origine, de l'un des lacs, qui se rencontrent

au fil de son courant, ce que ie ne puis comprendre & n'y a point d'apparence.

Mais pour le Lac des Skekaneronons, il a ce me semble deux descharges opposites, l'une qui produit vne grande riuere, qui se va rendre dans le grand Lac des Hurons, & l'autre beaucoup plus petite, qui prend son cours du costé de Kebec, & se perd dans vn Lac qu'elle rencontre à 7. ou 8. lieues de sa source. Ce fut par ce chemin là, que mes Sauvages me ramenèrent des Hurons pour retrouver nostre grand fleuve des Algonnequins, qui conduit par les Sauts à Kebec.

Du port de Tadoussac, & de la riuere du Saguenay. Village de Canadiens. Insolence des Sauvages dans nostre barque. De l'Isle aux allouettes. Marsoins blancs. Cap de tourmente, & du Saut appellé de Montmorency.

CHAPITRE IIII.

Continuans nostre route, nous passames deuant le Bic, c'est vne montagne fort haute & pointüe, qui paroist par dessus toutes les autres & qu'on descouure en beau temps de plus de dix à quinze lieues loin. De là nous allames poser l'anchre à la rade de Tadoussac, qui est à vne lieue du port, & pres de 80. ou cent

lieuës del'emboucheure de la riuere, puis le lendemain matin à la faueur de la marée nous doublâmes la pointe aux vaches & entraâmes au port, qui est iusques où peuuent aller les grâds vaisseaux, où on tient des barques & chaloupes expres pour les descharger & porter le tout à Kebec, où il y a de là encor enuiron 40. ou 50. lieuës par la riuere, car d'y penser aller par terre c'est ce qui ne se peut esperer, ou du moins semble il impossible, pour estre le pays tout remply de hautes montagnes, rochers & precipices espouuentables.

Ce lieu de Tadoussac est, comme vne anse de terre à l'entrée de la riuere du Saguenay, où il y a vne marée fort estrange pour sa vitesse, où quelquefois il vient des vents impetueux, qui ameinent de grandes froidures: c'est pourquoy il y fait plus de froid qu'e plusieurs autres lieux plus esloignez du Soleil de quelque degré.

Ce port (sous la hauteur de 48. degrez deux tiers) est petit, & n'y pourroit qu'enuiron 20. ou 25. vaisseaux au plus, la grand riuere en cest endroit a de large enuiron 6. a 7. lieuës, il y a de l'eau assez, & est à l'abry de la riuere du Saguenay, & d'une petite Isle de rochers, qui est presque coupée de la mer, le reste sont montagnes hautes esleuées où il y a peu de terre, mais force rochers & sables remplis de bois, comme sapins & bouleaux, puis vne petite prairie & vne forest assez agreable, mais de petite estendue.

Tout ioignât la petite Isle de rochers à main droiëte tirant à Kebec, est la tres-belle & pro-

Part de
Tadoussac.

Riuere du
Saguenay.

fonde riuere du Saguenay , bordée des deux costez de hautes, steriles, & affreuses môtagnes, parmy lesquelles habitent les Etechemins en assez petit nombre, pour auoir esté presque tous tuez en diuerfes guerres & rencontres, qu'ils ont eües avec les Canadiens deuant lesquels il n'ozent plus paroistre à present , & se tiennent cachez.

Ceste Riuere est d'une profondeur incroyable, comme de 150. ou 200. brassées, & contient demie lieue de large en des endroits, & vn quart en son entrée, où il y a vn courant si grãd, qu'il est trois quarts de marée couru dedans la riuere qu'elle porte encore dehors: c'est ce qui fait grandement apprehender, ou que son courant ne reiette & empesche d'entrer au port, ou que la forte marée n'entraîne dans la riuere, comme il est vne fois arriué au sieur du Pont graué, lesquels y pensa perdre à ce qu'il nous dit, pource qu'il n'y pû prendre fonds, ny ne scauoit comment en sortir, car ses anches ne luy purent seruir, ny toutes les industries humaines, il n'y eut que la seule assistance particuliere de Dieu, qui le sauua & empêcha de se briser cõtre les môtagnes & rochers.

Village de
Canadiens.

Entre le port & la rade, au lieu appellé la pointe aux vaches, estoit dressé au haut d'une terre esleuée vn village de Canadiens, fortifié de fortes pallissades pour la crainte de leurs ennemis qui tenoient la campagne. Pendant que nostre Nauire estoit là, attendant le vent & la marée propre pour entrer au port, ie descendis à terre, pour visiter ce village, & entray par tout

dans les Cabanes des Sauvages lesquels ie trouuay assez courtois pour n'auoir rien appris de nostre courtoisie, & m'asseant aupres d'eux ie prenois plaisir à leurs petites façons de faire, & à voir trauailler les femmes, les vnes à matachier & peindre leurs robes, & les autres à coudre leurs escuelles d'escorces, & faire plusieurs autres petites iolietez avec des pointes de porcs espics, teintes en rouge cramoisy que ie trouuois admirables.

A la verité ie trouuay leur manger de fort mauuaise grace & desgoutant iusques au dernier point, comme n'estant accoustumé à ces mets Sauvages, quoy que leur courtoisie & ciuilité non sauuage m'en offrit, comme aussi d'un peu d'eau de riuere à boire, qui estoit là dans un chaudron fort mal net, de quoy ie les remerciai humblement, car outre que ie n'auois point de soif, il n'y auoit guere d'appetit à une eau si mal nette, bien que le Sauvage qui n'auoit autre chose à me presenter, ne fut guere content de mon refus, non plus que moy de ne le pouuoir contenter. Je demande neantmoins pardon à nostre Seigneur de ne l'auoir pas satisfait, & confesse mon peu de mortification en une chose ou on pensoit m'obliger & témoigner de la beneuolence.

Toutes mes visites faites, ie m'en allay au port par le chemin de la forest avec quelques François que i'auois de compagnie: mais à peine y fûmes nous arriuez, & entrez

dans nostre barque, qu'il pensa nous y arriuer vne disgrâce. Ce fut que le principal Capitaine des Sauvages nommé la Forrière, estant venu nous voir dans nostre barque & peu content du petit present de figues que nostre Capitaine luy auoit fait, au sortir du vaisseau les ietta dans la riuere par despit, & aduisa les Sauvages d'entrer, tous fil à fil dans nostre barque, & d'en emporter toutes les marchandises qui leur faisoient besoin, & de les payer à leur volonté, sans se soucier du mescontentement des François, puis qu'on ne l'auoit pas contenté,

Ils y entrerent donc tous avec tant d'insolence & de brauade, qu'ayans eux mesmes ouuerts les coutils & tiré hors de dessous les tillacs ce qu'ils voulurent, ils n'en donnerent pour lors de pelleteries qu'à leur volonté, sans que personne leur osast contredire ny resister. Le mal pour nous fut, d'y en auoir laissé entrer trop à la fois, veu le peu de gens que nous restions, car nous n'y estions pour lors que six ou sept, le reste de l'equipage ayant esté enuoyé ailleurs pour affaires, c'est ce qui fit filer doux à nos gens, & les laisser faire de peur d'estre assommés ou iettez dans la riuere comme ils en cherchoient l'occasion, si tant soit peu on les eut voulu mal traiter.

Le soir tout nostre equipage estant de retour, les Sauvages ayans crainte, ou marris du tort qu'ils auoient fait aux François, tindrent conseil & aduiserent entr'eux, en

quoy & de combien ils les pouuoient auoir trompez, & s'estans cortifez apporterent autant de pelleteries & plus, que ne valoit leur larrecin & toute la fraude qu'ils auoient faite, ce que l'on receut avec promesse d'oublier tout le passé, & de continuer tousiours dans l'amitié ancienne, & pour assurance de paix on tira deux volées de canon, & puis on leur fit boire vn peu de vin, ce qui les contenta fort, & nous encor plus: car à dire vray, on craint plus de mescontenter les Sauvages (à cause des pelleteries) qu'ils n'ont d'offencer les François.

Ce Capitaine Sauvage m'importuna fort pour auoir nostre Chapelet & la Croix qu'il appelloit Iesus, & me faisoit signe qu'il le porteroit à son col, mais n'en ayant point d'autre il me le fallut refuser à mon grand regret, car ce bon homme me resmoignoît assez d'amitié, & semble quelque deuotion à cette Croix, de laquelle ie ne me pouois deffaire qu'en me priant d'vn obiet qui me consoloit fort parmy mes autres Croix.

Pendant que nous fusmes là, on pescha grande quantité de harangs & des petits oursins que nous amassions sur le bord de la riuere & les mangions en guise d'huiſtres. Ce sont poissons ou petites huiſtres iaunes & rougeatres enfermées dans vne escaille assez tendre, presque rouge & bleue ayant des pointes comme vn gros marron enfermé dans sa coque verte.

Quelqu'vns croient en nostre Europe que

Oursins &
harangs.

le harang frais meurt à l'instant qu'il sort de son element, mais ils se trompent, car i'en ay veu sauter vifs sur le tillac vn assez long-temps & mouroient. Les loups marins se gorgeoient aussi par fois en nos filets des harangs que nous y prenions, sans les en pou- uoir empescher, & estoient si fins & rusez qu'ils sortoient leurs testes hors de l'eau pour se donner garde d'estre surpris, & voir de quel costé estoient les pescheurs, puis ren- troient dans l'eau, & pendant la nuict nous oyons souuent leurs voix, qui ressembloient presque à celles des chats-huants; chose contraire à l'opinion de ceux qui ont dit & escrit, que les poissons n'auoient point de voix.

Poisson qui
a voix.

Isle aux
alloüettes. A vne petite lieue de là sur le chemin de
Kebec, est l'Isle aux alloüettes, ainsi nom-
mée pour le nombre infiny qui s'y en trouue
tous les ans, enuiron le mois de Septembre,
comme d'autres sortes de gibiers & coquilla-
ges. L'on me donna l'vne de ses alloüettes
en vie laquelle auoit son petit capuce en te-
ste comme celles d'icy, mais elle estoit vn peu
plus petite, & de plumage plus grisade & re-
leué, elles sont d'vn mesme manger que les
nostres, & ne different en rien au goust com-
me i'ay peu sçauoir par le grand nombre qui
s'en est mangé là durant que i'y estois.

Cette Isle n'est presque couuerte que de
sable, qui fait que l'on en tuë vn grand nom-
bre, car donnant à fleur de terre, le sable en
tuë plus que ne fait la poudre de plomb.

tesmoin celuy qui en tua trois cens & plus
l'un seul coup d'arquebuze.

Proche de là est l'Isle aux lievres, ainsi
nommée pour y en auoir esté pris au com-
mencement qu'elle fut descouuerte, mais à
présent ils y sont bien rares. Sur ce mesme
chemin de Kebec, nous trouuames aussi en
diuers endroits plusieurs grandes troupes
de marsoins, blancs comme neige par tout le
corps, lesquels proches les vns des autres, se
socioient, & se sousleuans hors del'eau, mon-
troient ensemblement vne partie de leurs
grands corps, qui me sembloient gros quatre
fois comme les noirs, & à cause de cette pe-
santeur & que ce poisson n'est bon que pour
en tirer de l'huile, l'on ne s'amuse point à
cette pescherie. Par tout ailleurs nous n'en
auons point veu de blancs ny de si gros; car
ceux de la mer sont noirs, & bons à manger,
& beaucoup plus petits.

Marsoins
blancs.

Il y a aussi en chemin des echos admirables
qui repetent tellement les paroles, & si di-
stinctement qu'ils n'en obmettent vne seule
syllabe, & diriez proprement que ce soient
personnes qui contrefont ou repetent tout
ce que vous dites & proferez.

Echos,

Il nous est arriué aucunes fois que nostre pi-
racc appelée la Realle, demouroit à sec de
la mer, & falloit que nous attendissions la
marée pour nous remettre sur pieds, qui
estoit la cause que nous auancions si peu, &
que les Mattelots non plus que ceux qui gou-
vernoient se soucioient assez peu d'arriuer

si tost à Kebec où ils n'y trouuoient pas mieux
leur compte que là.

Nous passames ioignant l'Isle aux Coudres
laquelle peut contenir enuiron vne lieuë &
demie de long, où on tient qu'il y a quantité
de lapins, perdrix & autre gibier en saison.
elle est quelque peu esleuée par le milieu, de
forme presque sur-ouale & basse tout au
tour, ie la trouuois assez agreable à cause de
bois dont elle est couuerte, distante de la
terre du Nord d'environ demie lieuë
qui est la largeur d'un des bras de la riuere

Cap de
Tourmente.

De l'Isle aux Coudres, costoyans la terre
nous fusmes au Cap de Tourmente, distan
de Kebec 7. ou 8. lieuës: Il est ainsi nomm
d'autant que pour peu qu'il fasse de vent, l'
mer s'y esleue comme si elle estoit pleine. E
ce lieu l'eau commence à estre douce, & le
terres & prairies y sont assez bonnes & capa
bles d'une bonne habitation pour du bestai
à faute de laquelle, de mon temps, les hy
uernans de Kebec y alloient amasser le foin
pour le bestail de l'habitation. A deux lieuës
de là nous trouuâmes l'Isle Dorleans, qui
peut auoir enuiron cinq ou six lieuës de lon
gueur en plusieurs Isles. qu'elle comprend
esloignée d'une bonne grande lieuë de
Kebec.

Ces Isles sont belles & agreables pour la
diuersité des bois, prairies, vignes & noyer
qu'il y a en quelques endroits, puis pour le
plaisir de la chasse, & du gibier qu'il y a en
abondance, de maniere que l'on peut dire

bon droit que c'est icy le commencement du beau & bon pays, de la grande riuere : car en tout le deça on ne trouue qu'un tres pauvre & miserable pays, sec, sterile, montagneux & plein de rochers, à la reserve du Cap Breton.

Au bout del'Isle du costé du Nord vne lieüe & demie de Kebec, il y a vn Saut ou cheute d'eau appelé de Montmorency, qui tombe avec grand bruit & impetuosité de 20. ou 25. brasses de haut dans le fleuve qui le reçoit d'une riuere venant des montagnes quel'on voit dans les terres, mais esloignée de plusieurs lieux. Comme c'estoit le premier que nous trouuames ie l'admirois & regardois souuent pendant qu'un doux zephir enfant fauorablement nos voiles nous portoit à Kebec, où nous arriuames la veille de S. Pierre S. Paul sur les cinq heures du soir en tres bonne santé & assez bien mouillez d'une pluye qui nous tomboit du Ciel, dequoy nous louames Dieu & primes port au lieu accoustumé.

Saut de
Montmorency,

De Kebec. Demeure des Recollets. Du peu de progrès que les François y ont faitz pour le temporel, & la cause qui a retardé la conuersion des Sauvages.

CHAPITRE V.

Arriuée à
Kebec.

AYans posé l'anchre, & mis ordre à ce qui nous concernoit, nous descendîmes à terre, saluames les Chefs de l'habitation qui nous estoient venu receuoir au Port, & nous entrâmes dans la Chapelle, où nous rendîmes actions de grace à nostre Seigneur de la diuine assistance, & en suite poullez d'un desir extreme de voir nos Freres dans leur petit Couuent, nous pensâmes prendre congé du sieur de Champlain pour nous y rendre au plustost, mais la charité, outre les pluyes continuelles & l'obscurité du temps, nous en empeschèrent, & nous retint à coucher iusques au lendemain matin que nous y fûmes conduits par vn des Matelots de l'habitation.

Il sembloit que cette affection nous eut fait naistre des ailles aux piedstant nous allions viste, & ne pensions desia plus à tous nos maux passez. Mon Dieu, il bien vray, vostre ioug est doux & suau à ceux qui ont bonne volonté, & n'est penible qu'à ceux qui

qui n'ont point d'affection pour vostre seruice. Nous trouuames tous nos Religieux en tres-bonne santé Dieu mercy, lesquels tresioyeux de nostre venuë, & nous au reciproque de leur bonne disposition, apres le *Te Deum*, & les actions de graces accoustumées rendues à nostre Sauueur dans nostre Chappelle, nous receumes la charité & bon accueil que nous pouuions esperer de si bons Religieux, discourumes de nostre voyage, & en quelle contrée nous pourrions dauantage auancer la gloire de nostre Seigneur, après quoy nous primes resolution le P. Ioseph, le P. Nicolas & moy de passer aux Hurons, comme au meilleur endroit & où il y auoit plus à profiter pour son seruice.

Et en attendant que les barques montassent à la Traicte, ie consideray tous les enuiron de nostre petit Conuent, & la maison de Kebec, bastie sur le bord d'un destroit du fleuve saint Laurens, qui n'a en cet endroit qu'environ vne petite demie lieüe de largeur, au pied d'une montagne, au sommet de laquelle est le petit fort de bois basti pour la deffence du pais. Ceste maison de Kebec est à present vn assez beau logis, enuironné d'une muraille en quarré, avec deux petites tourelles aux coins d'enhaut que l'on y a faictes depuis peu pour la seureté du lieu, mais au bout du compte il est tres-facile de prendre le fort & la maison sans canon, car il n'y a rampars ny murailles, qui vous puisse empescher d'emporter le tout à coups de main.

Maison de
Kebec,

Il y a vn autre logis au dessus de la terre haute en lieu fort commode, qui y a esté basti par le

Maison
d'Hebert.

deffunct Hebert, où la femme & ses enfans nourriſſent quantité de beſtail, qu'il y auoit faiët paſſer de France. Ils ont auſſi vn grand deſert ioignant leur maiſon, auquel ils ſont tous les ans quantité de bled d'Inde & des pois, qui ſe traictent par après aux Sauuages pour des pelletteries. le vis vn ieune pommier, qui auoit eſté apporté de Normandie, chargé de fort belles pommes, & des ieunes plantes de vignes, qai y eſtoient tres-belles, & tout plein d'autres petites choſes, qui teſmoignoient la bonté de la terre.

Riuere de
S. Charles.

Nôſtre petit Conuent conſacré en l'honneur de Dieu & de Nôſtre-Dame des Anges, eſt à demie lieuë de là, en vn tres-bel endroit, & autant agreable qu'il ſ'en puiſſe trouuer, baſty ſur vne petite riuere, que nous appellons de S. Charles, & les Montagnais Cabirecoubat, à raiſon qu'elle tourne & faiët pluſieurs pointes, par laquelle les barques peuuent aller de pleine mer iuſqu'au premier Saut, aſſez eſloigné au delà de nôſtre Conuent, & les chaloupes en toutes ſaiſons. En baſſe mer, il y a vn bon iet de pierre de nôſtre maiſon à la riuere, mais au flux de pleine Lune, le chemin en eſt racourcy, car elle ſ'enfle de plus de 15. pieds de hauteur, & ſ'eſtéd par conſéquent au large. J'ay admiré l'inſtinct naturel de quelques petits cochonets (ſauf reſpect) que l'on nourriſſoit proche de là, eſquels auoient vne parfaite cognoiſſance des flux & reflux, car quand ils vouloient paſſer dans la prairie ils attendoient ſur le bord de l'eau que la marée fut baſſe, puis paſſoient, & deſirant re-

retourner à la maison (car personne n'en prenoit
soin & se conduisoient d'eux mesmes) ils ve-
noient de mesme se rendre sur le bord de l'eau,
& repassoient après le reflux, & non iamais au
flux, plustost ils attendoient là de pied cōy tous
ensemble la plus basse eauë.

Puis que ie vous ay parlé de ces petit animaux
il faut que ie vous die encor ce petit mot en ge-
neral, qu'ils sont sociables & veulent compa-
gnie. Après que tous eussent esté mangé vn ex-
cepté, cet vn ayant perdu ses compagnons, s'a-
costa d'une asneffe, qui auoit aussi perdu son
asnon, & viuoit vagabonde parmy les bois
tout l'Esté, tantost vers Kebec, puis vers nostre
Conuent, sans auoir de retraicte, qu'au fort des
neiges, que nos Religieux la resferroient dans
vne petite estable. Ces patures bestes bien dis-
semblables, & d'espees bien differentes prirēt
telle amitié par ensembles, que depuis iamais
elles ne se separerēt, si vous en voyez l'une vous
estiez assuré de voir l'autre à trois pas de là:
i'en ay moy mesme veu faire des gageures a-
uec des nouueaux venus, quil'ont admiré avec
moy, & confessé que nous sommes bien mise-
rables nous autres, de nous entre-quereller &
viure en discorde, tādīs que les animaux moins
semblables, s'associent & viuent en paix, tesmoin
la chatte, qui en l'an 1634. alaicta deux souris au
Royauine de Naple, si l'histoire que i'en ay leu
est veritable.

Nostre petite riuere, que i'appelle petite en
comparaison de la grande, produit vne douce
manne aux Sauuages, du bon poisson & l'an-

Fleurs.

guille en Automne, de laquelle ils font secherie pour leur prouison d'Hyuer, pendant que les neiges grossissent pour l'Eslan. Les petites prairies qui la bordent, sont esmaillées en Esté de plusieurs belles fleurs, particulièrement de celles que pour estre tres-rouges & esclatantes, nous auons surnommées Cardinales, & des Martagons, qui portent quantité de fleurs en vnetige, qui a près de six, sept à huit pieds, de haut, desquelles les Sauvages mangēt l'oignon cuit sous la cendre, ou en lagamité. Nous en auons apporté vn plain baril en France, avec des plantes de Cardinales, comme fleurs rares & rauissantes, mais elles n'y ont point profité, ny paruenues à la perfection qu'elles ont dans leur propre climat, & à la fin nous sont manquées.

Nostre
Jardin,

Nostre iardin est aussi tres-beau & d'un bon fond de terre, car les plantes de vignes, toutes nos herbes & racines y viennent tres-bien, & mieux qu'en beaucoup de iardins que nous auons en Frâce, & n'estoit le nombre infiny de mousquites & cousins, qui s'y retrouuent comme en tout autre endroit du Canada pendant l'Esté, ie ne sçay si on pourroit rencontrer vn meilleur & plus agreable seieur, car outre la beauté & bonté de la contrée avec le bon air, nostre logis est fort commode en ce qu'il contient, ressemblât neantmoins, plustost vne maison de Noblesse des champs, que non pas à vn Monastere de freres Mineurs, ayans esté contraincts de le bastir de la sorte, tāt à cause de nostre pauureté, que pour se fortifier en tout cas,

De nostre
Conuent.

contre les Sauvages, s'ils vouloient nous offencer, ou voler nos ornemens.

Le corps de logis est au milieu de la court comme vn donjon, puis les courtines & rāpars faits de bois, avec quatre petits bastiōs de mesme estosse, aux quatre coins, esleuez enuiron de 12. ou 15. pieds de raiz de chauffée, sur lesquels nos Religieux ont dressé des petits iardins à fleurs & à sallades, d'où ils peuuent aller à nostre Chappelle bastie de pierres, au dessus de la maistresse porte du Conuent, enuironné d'un beau fossé naturel, qui circuit après tout lalentour de la maison & du iardin avec le verger, qui est d'assez grāde estenduë tout fermé de pallissades de pieux.

Nous auons deuant la porte de nostre Conuent vne autre grande estenduë de terre, qui nous a esté donnée en eschange par le sieur Herbert pour d'autres terres que nous auons desfrichées proche de l'habitation. Elle s'estend en longueur depuis nostre Conuent, iusqu'au lieu appelé la Gribane & la prairie, au delà d'icelle le long de la riuierē S. Charles. Et en largeur la longueur de quatre arpens, sans comprēdre le iardin du P. Denis, contenant vn arpent ou enuiron, deserté & labouré, clos & fermé de pallissades de pieux, situé enuiron le milieu du chemin de nostre Conuent, a l'habitation proche vne fontaine.

La quantité de framboiziers, qui sont aux terres deuant nostre Conuent, y attirent tant de tourterelles en la saison, que c'est vn plaisir d'y en voir des arbres tout couuerts. Les chasseurs

de l'habitation y vont aussi souvent giboyer & chasser, comme en vn tres-bon endroit, & où ils ont le canard & l'outarde & tout plein d'autre gibier, avec l'anguille; qui ne leur manque pas en la saison, dont les Sauvages nous faisoient quelquefois part.

Si nos Religieux veulent aller de nostre Couuent de Kebec, ou ceux de Kebec venir chez nous, il ya à choisir de chemin, par terre ou par eau, selon le temps & la saison, qui n'est pas vne petite commodité, de laquelle les Sauvages se sçauent aussi seruir pour nous venir voir, & instruire avec nous du chemin du Paradis.

Bastimens
de la nou-
uelle Fran-
ce.

Tellement que tout bien pris & considéré, tous les bastimens de la nouuelle Frâce, ne consistoient (au téps que i'y estois) qu'au petit fort, à la maison des marchands, à celle de la vesue d'Hebert, & à nostre petit Couuent. Du depuis on en a commencé vn pour les R.R. PP. Iesuites, & quelques autres bastimens; pour d'autres familles, desquelles ie ne me suis point informé, & ne parle que de ce dequoy ie suis assuré, pour ne me point mesprendre.

Mais pour ce que beaucoup ont desiré sçauoir la propre situation du pais. Le R. P. le Leune a supputé de combien le Soleil se leueit plustost sur l'orison de Paris, que sur celuy de Kebec, & a trouué, que c'estoit de 6. heures & vn peu d'auantage, c'est à dire qu'à Paris, on a le iour enuiron 6. heures & vn quart plustost qu'à Kebec: si bien que quand vn Dimanche nous contons 5. heures du matin, on n'est encor à Kebec, qu'à 10. heures 3. quarts du Samcdy au soir, & s'ils

Ont a Kebec 8. heures du matin, nous auons à Paris 2. heures & 1. quart après midy. On tient aussi, que ce lieu de Kebec est par les 46. degrés & demy de latitude, plus Sud que Paris, de près de 1. degrez, & en mesme paralelle de la ville de la Rochelle, & nonobstât ces approches du Soleil, qui deuroiét auoir rendu Kebec plus chaud que Paris de ces 2. degrez, l'Hyuer y est neantmoins plus long & le pais plus froid, à cause de son assiette & de la disposition du lieu, couuert par tout de bois & forests, de plusieurs cétaines de lieues d'est & d'ouest, & du costé du Nord environ 5. ou 6. lieues de nous, d'une grande chaisne de Môtagnes, d'où il viét vn vent de Nor-ouest qui nous fait presque transir de froid quand il donne, car il n'y a froid plus cruel & insupportable que celuy du vent, comme nous l'experimentons souuent, allans par la campagne avec nos pieds nuds, que i'ay eu gellés plusieurs & diuerses fois, & tousiours en voyageât & obeïssât, car ces maladies là, ne s'aquiescent point au coin du feu, ny enuveloppé dans sa couuerture.

Nous habitôs aussi les bords de 2. fleues, dôt l'un est estimé incomparablement plus grand qu'aucun qui soit en l'Europe, & l'autre est souuent glacé, & tout gelé, voyla. (comme on dit) les vrayes causes & alimés du froid, qui se pourront amender en decourant les terres, & habitâs le pais, car les bois qui engendrēt les frimas & les gelées, diminuans, diminuerōt les froids, cōme il se voit par experiēce en la maison de la dame Hebert, où les terres sōt pluſtoſt deschargées de neiges & le froid moindre, qu'à celles

de nostre Conuent plus reserrez dans les bois.

Quelques particuliers mal affectiōnés ont eu fort bōne grace de dire, que les Religieux y ont bien peu aduancé pour le spirituel, ie voudrois bié voir qu'ils y eussent plus fait pour le tēporiel, car au contraire que nous leurs ayons nuis, il nous desplaisoit assez de voir que toutes leurs plus grādes merueilles se sont tousiours passées en parolles & promesses, & presque point d'effect, iusque là, que les anciēnes societez depuis plus de vingt années en ça, qu'ils ont possédé le païs pour l'habiter & faire valoir, n'y ont pas ensemencé vn seul arpēt de terre. Il n'ya eu que nos Religieux pour esprouuer la terre, & la seule & vniue famille d'Hebert, qui y a fait tra-uailer, tellemēt que si on eut māké vne seule année d'y porter des viures de France. tous les François de l'habitation eussent pery de faim, cōme il pensa arriuer lors que les Anglois s'en rendirēt maistres, auquel temps ceux qui com-mādoient à Kebec, eussent bié desiré nous faire souffrir les premiers, & tirer si peu de bled d'Inde qui nous restoit de nostre iardin, après en auoir fait de bonnes aumosnes aux plus necessiteux, & voyla leur charité, qui nous vouloit faire porter la peine deuē à leur negligēce & peu de soin.

Mais si nous voulons penetrer plus auant & voir de quel genre de deuotiō, ils se sont portez à la conuersion des Sauuages, nous trouuerons que nous n'auōs eu aucun plus grād empeschement que de la part des François, car outre la mauuaise vie de plusieurs, la pluspart ne desiroient pas en effect, qu'il s'y fit aucune conuer-

sion tant ils apprehendoient qu'elle en diminuat le traficque du castor, seul & unique but de leur voyage. O mon Dieu, le sang me gelle quand ier'entre en moy-mesme, & considere qu'ils faisoient plus d'estat d'un castor que du salut d'un peuple qui vous peut aymer.

Et l'indeuotion est arriuee iusques là qu'une personne de condition (Catholique de profession) interressée dans le party, nous dit, au P. Nicolas, & à moy, que si nous pensions rendre les Canadiens, & Montagnais sedentaires proches de nous, comme nous en auions le dessein pour les pouuoir commodement instruire & maintenir dans nostre creance, qu'ils les en chasseroient à coups de bastons, & les feroient retirer au loin hors de toute cognoissance de leur traite, & voyla comme nous estions fauorisez, & quel secours nous pouuions esperer de personnes si peu sentans le bien.

Il est pourtant necessaire, & toutes les autres nations Chrestiennes qui ont subiugué des pays infidelles l'ont ainsi pratiqué, que les peuples que l'on veut instruire en la Loy de Dieu, soient reduits à viure ensemble en bastissans des bourgs, villes & villages sous de bons Chefs, autrement comment voudroient ils qu'on les rendit iamais Chrestiens, les Religieux peuuent ils tousiours courir avec eux Hyuer & Esté, les bois & les montagnes, & quelquesfois en des pays fort esloignez, chargez de leurs ornemens & petites commoditez, ce seroit vouloir rendre

Faut rendre
les Sauua-
ges seden-
taires.

les Religieux autant Sauvages que les Sauvages mesmes, & s'ils ne pourroient jamais long-temps perseuerer dans cette fatigue, ny les Sauvages deuenir gueres autres que tousiours barbares, les Religieux les venans à quitter, puis que les François mesmes, mieux instruits & esleuez dans l'Ecole de la Foy, deuiennent Sauvages pour si peu qu'ils vivent avec les Sauvages, & perdent presque la forme du Chrestien, si cela est, comme il est vray semblable, pourquoy voudroit on que l'on hasardat imprudemment le saint Baptisme à des personnes qu'on sçait asseurement (estans errants comme il sont) qu'ils ne pourroient viure en Chrestiens, l'experience nous la fait voir en ce que la plupart des Sauvages que nos Freres ont baptisez en Canada, & puis renuoyez hyuerner entre leurs patens pour y profiter, y ont au contraire presque oublié la pratique du Chrestien, & fussent deuenus derechef Sauvages sans le soin que l'on a pris de les redresser: Et c'est pourquoy ie dis que l'on ny fera jamais grand profit, si on ne suit nostre premier dessein, qui est de les rendre sedentaires, & y entremesler parmy eux, des familles de bons & vertueux Catholiques, pour leur monstrier la pratique & l'exemple des choses qu'ils auront apprises des Religieux, & qu'ils ont peine de conceuoir en leur esprit, sans cest exemple exercée des bons seculiers parmy la menagerie.

Bon exemple de seculiers necessaire.

C'est donc à nostre tres grand regret &

desplaisir, que les choses ny ont pas si heureusement auancées comme nos esperances nous promettoient foiblement fondées sur des colonies de bons & vertueux Catholiques que les Marchands y deuoient establir, plusieurs suiuant les promesses qu'ils en auoient fait sauuages au Roy en prenant le traité, & par ainsi les baptisez Peres Recollects ont fait beaucoup (n'estant point assisté & au contraire contrarié) d'en auoir baptisé plusieurs, & disposé vn grand nombre qui ne demandent qu'un peu de secours, à faute duquel nous auons esté contraincts de differer le saint Baptisme de beaucoup, & d'attendre l'assistance & faueur que Messieurs les nouveaux associez nous font esperer pour le maintenir & conferer avec fruit.

Les choses ne se font point trop tard quand elles se font bien. On tient que nos Peres des Indes, ont employé iusques à treize ou quatorze années, auant que d'auoir pu conuertir le Royaume de Voxu, & qu'on a esté près de 38. ans auant que de rien faire au pays du Bresil; C'est le Iardin de Dieu, duquel les fruits meurissent en leur temps, quand ils sont arrousez de la benediction du Tres-haut, que nous deuous attirer en nos ames par la patience & la perseuerance, au bien encommencé.

Faut du temps pour conuertir.

*Du Cap de Victoire, & comme nous nous
acheminames au pays des Hurons. Du
gouvernement des Sauvages allans en
voyages. Comme ils cabanent & tirent
du feu de deux petits bastons, & des tra-
vaux que nous souffrimes en chemin.
Avec l'importunité des mousquites &
consins.*

CHAPITRE VI.

A Pres auoir esté rafraichis par quelques
iours avec nos Freres, & iouï de leur
douce conuersation dans nostre petit Con-
uent, nous montames avec les barques par
le mesme fleuve S. Laurens pour la traite du
Cap de Victoire, d'où il y a de Kebec enui-
ron cinquante lieues. On nous separa dès
l'entrée chacun dans vne barque particuliere
pour y contenir les Matelots en leur deuoir
& prendre soin des prieres qui se font soir &
matin en tous les bords où les Catholiques
dominent ; le desagreois assez au Capitaine
de mon vaisseau dans ce soin, car estant de la
pretenduë, il eut bien desiré ou que nous
eussions assisté à ses Pseaumes, ou que nous
fussions descendus à la proue, & luy auoir
le dessus qui estoit deu à l'Eglise, mais ie ne
le pû trouuer bon, & tismes chacun sa par-

ric à la poupe en paix, & sans dissention, car hors l'intereſt de la Religion, il eſtoit honneſte homme, accommodant, & couſin d'un ſieur de Caen, lors noſtre Admiral.

Par tout le chemin nous eumes la recreation d'une tres-belle veüe, d'un beau païſage, & la conſolation d'un temps fort doux, où nous vimes les terres par tout plattes, belles & vnies, un peu ſablonneuſes neantmoins couuertes de tres-beaux bois, la riuere fort poiſſonneuſe, & par tout grande, large & profonde plus qu'aucune de noſtre Europe.

Dans l'entretien de mes penſées, il m'arriuoit (d'un ſi bel obiet) de grands ſouhairs d'y voir des villes & villages Laſtis, & où l'air & la chaffe ſont egaleement bonnes, mais ces penſées n'enſantoient en moy qu's des regrets de mon impuiſſance. Tous les ſoirs on poſoit l'anchre, & aux heures du iour que les vents nous eſtoient contraires on faiſoit alte, & pendant ce temps là on s'alloit promener ſur la greve, & dans les bois clairs & ouuerts, qui nous eſtoient d'une ſinguliere conſolation.

Nous paſſames aux trois riuieres que ie contemplay curieufement pour eſtre un ſejour fort agreable & charmant. Les François ont nommé ce lieu les trois riuieres, pour ce qu'il ſort des terres une aſſez belle riuere, qui ſe vient deſcharger dans le grand fleuve de ſainct Laurens par trois principales emboucheures, cauſées par pluſieurs petites

Isles qui se rencontrent à l'entrée de ce fleuve, & puis nous trouuames le Lac S. Pierre qui contient environ six ou sept lieues de longueur & trois ou quatre de large par endroits, & près de quatre brasses de profondeur, duquel l'eau est presque dormante & fort poissonneux, environné de petites collines, ruisseaux & petites riuieres qui s'y deschargent & rendent le lieu agreable, & plein d'Isles ou Isles.

A l'issuë du Lac, nous entrâmes peu apres, au port du Cap de Victoire, & y posâmes l'anchre le iour de la sainte Magdelene environ les six à sept heures du soir, où desia s'estoient cabanez le long du riuage, grand nombre de Sauvages de diuerles Nations pour la traite des castors avec les François. Cette contrée est tres belle & autant plaisante qu'aucune qui soit en tout le Canada, iusques à la riuere des prairies, d'où il y a d'icy environ douze lieues, & de Kebec plus de soixante. On voit du port six ou sept Isles toutes de front, couuertes de beaux arbres d'une egale hauteur, qui couurent le Lac S. Pierre & la riuere des Ignierhonons (nation Hyroquoise) qui se descharge icy dans le grand fleuve, vis à vis du port, beau, large & fort spacieux.

La traite estant faite & les Hurons prests à partir, nous les abordâmes en la compagnie du sieur de Caen general de la flotte, lequel nous fit accepter chacun pour vn canot moyennant quelque petit present de haches,

cousteaux, & canons ou petits tuiaux de verre qu'on leur donna pour nostre despence. Toute la difficulté fut de nous voir sans armes qu'ils eussent désiré en nous plustost que toute autre chose, pour guerroyer leurs ennemis, mais comme les espées & les mousquets n'estoient pas de nostre gibier, nous leur fismes dire par le Truchement que nos armées estoient spirituelles, avec lesquelles nous les instruirions & conseruerions à l'encontre de leurs ennemis moyennant la grace de Dieu, & que s'ils vouloient eroire nos conseils, les Diables mesmes ne leur pourroient plus nuire: Cette responce les contenta fort, & nous eurent dans vne tres haute estime, tenans à faueur de nous auoir comme nous de les accompagner, & seruir en vne si belle occasion.

Le voyage de la France icy, nous auoit esté bien penible, mais sans comparaison celuy que nous allions entreprendre quoy que plus court, nous le deuoit estre beaucoup dauantage pour tant de perils eminens qui vous auoisinent en chemin, tous les iours de la mort. Nous inuocuames sur nous la grace du S. Esprit, l'assistance de la Vierge, & des Saints, puis nous primes congé des Chefs de la traite, & nous rendimes avec nos petits paquets dans les cabanes de nos Hurons tout prests à partir & se mettre en campagne.

Or la raison pour laquelle il nous fallut necessairement separer & nous mettre cha-

cun dans vn canot à part fut pour ce qu'ils sont fort petits, & qu'il ny peut à chacun que cinq ou six personnes avec les marchandises. Mes hommes estoient cinq en nombre & ie faisois le sixiesme, l'vn seruoit de gouverneur que i'auois derriere mon dos tellement près de moy, qu'avec le bout de son grand auiron il m'attrapoit souuēt le sommet de la teste que ie tenois baissée le plus que ie pouuois pour euites ces rencontres, heureux qu'il ne me frapport pas à dessein. l'estois quasi en ploton assis à costé d'un nageur, puis deux autres nageurs estoient assis deuant moy à costé l'un de l'autre, & le cinquiesme barbare tenoit le deuant du Nauire, qui dans l'occasion se tenoit debout, les jambes au large & l'auiron en main pour euites aux dangers de quelques perilleux passages, & en cest equipage nous fusmes conduits iusques dans leur pays, sans plus reuoir nos Freres en chemin que les deux premieres soirées que par hazard nous cabanames avec le P. Ioseph, mais pour le P. Nicolas ie ne le trouuay pour la premiere fois, qu'à deux cens lieues de Kebec, à la nation que nous appellons les Ebicerinys ou Sorciers, & les Hurons Squekaneronons.

Noistre premier giste fut à la riuere des prairies, qui est à cinq lieues au dessous du saut saint Louis, où nous trouuames desia d'autres Sauuages cabanez, qui faisoient festin d'un grand ours qu'ils auoient poursuivy & pris dans la riuere, comme il
pensoit

pensoit se sauuer aux Isles voisines : Ces barbares faisans bonne chere , se resiouissoient honnestement , chantoient tous ensemblement , puis alternatiuement , d'un chant si doux & agreable que i'en demeuray tout estonné & rauy d'admiration : de sorte que depuis ie n'ay rien ouy de plus armonieux entr'eux ; car leur chant ordinaire est assez mal gracieux.

Nous cabanames assez proche d'eux & fis-
mes chaudiere à la Huronne , mais pour ce
coup ie ne pû encor m'ager de leur sagamité ,
pour ce qu'elle me sembloit trop fade & des-
goustante , & me fallut ainsi coucher sans
souper , car ils auoient mangé en chemin
tout le petit sac de biscuit que i'auois pris aux
barques pour mon voyage , sans s'informer
s'il me feroit besoin ou non , comme gens qui
n'ont pas grand soucy du lendemain , & puis
me voyant si deliberé & contant dans ma
misere , ils croyoient que leur sagamité me
sembleroit bõne à la fin du cõpte , & par ainsi
qu'il n'y auoit pas grand danger de s'accom-
moder pour m'incommoder de mon biscuit ,
duquel ils firent place nette le mesme iour
de nostre partement.

Nostre lit fut la terre nuë dressé à l'ensei-
gne de la Lune , avec vne pierre pour mon
cheuet plus que n'auoient les Sauuages , qui
n'ont accoustumé d'auoir la teste plus haute
que les pieds : Nostre cabane fut faite de deux
rouleaux d'escorces posées sur quatre petites
perches picquées en terre & accommodées

en penchans au dessus de nous. Le matin venu on fit chaudiere pour partir, mais ie m'abstins encor de la sagamité pour cette seconde fois, iusques à la troisieme qu'estant deuenu fort foible & abbatu, ie commençay d'en manger vn petit & de m'y accoustumer en me faisant violence.

Mais pour ce que la façon de faire des Sauuages, & leur maniere de s'accommoder ailleurs en voyage est presque tousiours de mesme, ie vous diray succinctement cy apres leur methode, & comme ils s'y gouernent, apres que i'auray donné vn petit mot d'auis à ceux qui ont à faire de longs voyages avec eux; & se mettre sous leur conduite plus asseurée dans le pays que celle des François, qui n'oseroient encor d'eux-mêmes se hasarder par les bois, & s'esloigner de l'habitation sans guide.

Comme il
se faut gou-
uerner
voyageant
avec les
Sauuages.

Il se faut donc resoudre dès le commencement à la patience & de souffrir beaucoup, pour ce qu'à toute heure les suiets s'en presentent. Il se faut aussi estudier à la douceur & monstrier vne face ioyeuse & modestement contante, & chanter par fois des Hymnes, & Cantiques spirituels, tant pour sa propre consolation, le soulagement de ses peines, que pour le contentement & edification de ces Sauuages, qui prennent vn singulier plaisir d'ouyr chanter les louanges de nostre Dieu, plustost que des chansons profanes, contre lesquelles ie leur ay veu quelquesfois monstrier de la repugnance. O bon

Iesus , qui condamne les mauuais Chre-
stiens chanteurs de chansons dissoluës &
mondaines.

Surtout si on a quelquefois de l'impac-
tience , il l'a faut estouffer au dedans de soy-
mesme sans la faire paroistre au dehors , &
n'estre point songear , chagrin , turbulent ,
non plus qu'esuenté , pour ce qu'ils mes-
prisent fort ces mauuaises qualitez , en vn
bon esprit , comme nous en vn homme qui
s'estime sage.

Vne ou deux bouteilles d'eau de vie se-
roient fort necessaires pour se fortifier le
cœur en chemin , desquelles ils faudra faire
part à ces Sauvages , avec vn tel mesnage
toutesfois qu'elles puissent durer iusques
à la fin du voyage : car on se sent quelques-
fois si foible & abbatu du cœur , que faute
de cette regale , on souffre de grandes debi-
litez & affadissemens d'estomach. Passant
par les Nations qu'on trouue en chemin , il
est fort à propos qu'on leur traite tousiours
quelque petit morceau de poisson , ou vian-
de , pour festiner au soir apres le trauail , car
pour ces petites courtoisies & liberalitez ,
on reçoit souuent d'eux de beaucoup plus
grandes : Ils vous nourrissent au reste du
temps , ils portent vos pacquets & vos
hardes , vous exemptent de nager , & vous
ayment , respectent , & cherissent comme
Capitaines & bons amys , & si dauanture
vous tombez malades en chemin ils vous
porteroient sur leurs espaules plustost que

vous abandonner, & avec tout cela on partit encore assez, c'est pourquoy on a besoin de leur amitié & qu'ils vous ayent en quelque estime, si on y veut faire fruit & auoir du contentement avec eux.

Trouaux en
chemin.

Les dangers & perils qu'on rencontre en chemin sont si grands & frequens qu'ils ne se peuuent presque expliquer, car premierement en quatre-vingt ou cent sauts qu'il y a de la riuere des prairies aux Hurons, il y en a vne quantité que l'on ne se hasarderoit iamais si la sage conduite des Sauvages ne vous en donnoit l'assurance. Il faut aduouër que le marcher pieds nuds & sans sandales, comme j'ay fait par tout le voyage, allant & venant, à l'imitation de nostre Seraphique Pere saint François, & des premiers Religieux de nostre sacré Ordre, qui ont parcouru toute la terre habitable en cet estat, m'estoit d'une grande peine, contraint d'arrêter faire à cause qu'estant sur terre nous rencontrions souvent des rochers, des lieux fangeux, & des arbres tombez qu'il nous falloit à toute heure enjamber, & nous faire quelquesfois passage avec la teste & les mains par les bois tordus, hailliers & brossailles, sans sentier, ny chemin, mais ie ne sçay si on pourroit souffrir vne plus rude mortification que des mauuais vents de l'estomach que les faibles gens rendent presque continuellement dans leurs canots, qu'en gnye de pots de chambre ils se seruoient de leurs es-

celles à potage, ce qui seroit capable de se desgouter du tout de si desagrecables compagnies, si on ne se mortifioit pour l'amour d'un Dieu, & la gloire d'un Paradis qui merite chose plus grande.

La piqueure des mousquites cousins & mouchérons desquels il y a de trois ou quatre sortes, comme ie diray à la fin de ce Chapitre, est un autre tourment si grand qu'il semble autant de petits Demons, desquels ie pensay perdre la veüe, comme i'en fus offensé au visage, aux iambes & aux mains, sans m'en pouuoir garantir pour diligence que i'y apportasse, c'est pourquoy estre chaussé, & auoir de bons gands, & un voile sur la face eut esté bien necessaire. S'il faisoit de la pluyë ou des orages, nous ne pouuions nous en deffendre, ny le iour, ny la nuict, car alors elle nous tomboit à plomb sur le dos, & nous couloit par dessous comme de petits torrens au panchant des montaignes, mais le pis est quelle nous ostoit le moyen de faire chaudiere & prendre nostre refection.

Comme apprentif la peine m'en estoit double, car ne scachant encor la langue sinon fort peu de mots, ie ne pouuois qu'à peine declarer mes pensées & manifester mes necessitez : Dieu seul estoit celuy en qui ie me consolais, & à l'humanité de mes Sauuages qui se manifestoit assez dans la compassion, qu'ils auoient de

moy & à l'assistance qu'ils m'apportoient, mais ce qu'ils pouuoient estoit bien peu de chose, sinon leur bonne volonté qui me contentoit fort, & m'encourageoit à la patience, laquelle j'apprenois d'eux mieux qu'en Eschole du monde, de maniere que ie peu dire avec verité que j'ay trouué plus de bien en eux que ie ne m'estois auparavant imaginé, ny moy, ny beaucoup d'autres: car vous diriez icy parlant d'un Sauvage que c'est parler d'une beste brute, d'un loup rauissant, ou d'une personne sans esprit, sans raison & sans humanité, comme un tas de meschans coquins qu'on laisse impunement viure entre les Chrestiens, ce qui n'est point entre les Sauvages qui ont tous de l'humanité enuers ceux qui ne leur sont point ennemis, soient estrangers ou autres.

L'heure de se cabaner venue, mes Sauvages cherchoient une place propre pour y passer la nuit, où aisement se pût trouver du bois sec à faire du feu, sinon ils s'accommodoient ou la necessité les contrainoit quelquesfois bien, & quelquesfois mal, selon les occurrences. Le lieu choisi on y portoit le canot, nos paquets & tout ce qui estoit de nostre equipage, puis tous se mettoient en besongne & travailloient à ce qui estoit necessaire pour le logement: Les uns alloient chercher du bois sec, & moy avec eux, les autres sept ou huit per-

ches pour dresser la cabane, & d'autres prenoient le soin de battre le fuzil & mettre la chaudiere sur le feu, qu'ils attachoient en vn baston piqué en terre, pendant qu'un autre cherchoit deux pierres plates pour concasser le bled d'Inde sur vne peau estenduë contre terre, dequoy on faisoit la sagamité.

L'hostellerie dressée & les rouleaux d'écorces estendus sur la charpente, qui panchoit en voute, on serroit les paquets le long de la cabane contre les bois, & le canot en dehors, puis vn chacun prenoit place le dos appuyé contre les sacs & la marchandise à l'entour du feu qu'on estendoit de long afin qu'un chacun y pût participer, & en prendre pour petuner tandis que la chaudiere bouilloit.

La sagamité estant cuite toujours fort claire, on dressoit à chacun son potage dans les escuelles d'écorces que pour ce suiet nous portions quant & nous, avec chacun vne cuilliere de bois grande comme vn petit plat, de laquelle on se sert à manger cette menestre soir & matin, qui sont les deux fois seulement que l'on fait chaudiere par iour, sçauoir quand on est cabané au soir, & au matin auant partir. Si nous estions par trop pressés de partir, on la faisoit deux heures auant iour, que tout endormy on m'esueilloit pour manger, ou seulement sur le midy, ou bien on attendoit iusqu'au soir, sans rien manger de tout le iour que cette seule fois.

Lors que nous nous rencontrions deux menages en vn mesme giste, ce qui arriuoit souvent; Nous nous cabanions par ensemble, l'un faisant vn des costez de la cabane couuert de ses écorces, & l'autre s'accommodoit de l'autre, & chacun faisoit sa chaudiere à part, puis tous ensemblement les mangions l'une apres l'autre sans aucun debat ny contention, car ils ont cela de bon qu'ils ne se font aucun reproche, & ne disent point mon disner est meilleur que le vostre, vous estes trop grand train au prix de nous qui sommes peu, car en toutes choses ils s'accordent admirablement bien, & font leur petit festin comme les repas d'une troupe de bons Religieux, où l'on n'entend qu'une voix de paix ou vn silence Religieux.

Pour moy qui n'auois pas encore le cœur bien fait à toutes ces faulx, ie me contentois pour l'ordinaire de la sagamité des deux qui m'agreoit dauantage, bien qu'à l'une & à l'autre il y eut tousiours des salletez & ordures à cause en partie qu'on se seruoit tous les iours de nouvelles pierres, & assez mal nettes pour concasser le bled.

D'escumer le pot iamaïs il ne s'en parle non plus que de lauer la viande, ou le poisson, auant de le mettre au pot. Ils traiterent vn morceau de venaison à la petite Nation, mais comment pensez vous qu'ils le couperent, ce fut de le tenir contre terre avec leur pieds sales, & à mesure qu'ils en couppoient quelque piece ils la iettoient dans la chaudiere sans autre sel que le sable qui y tenoit attaché.

Les escuelles desquelles nous nous seruions, n'estoient iamais nettoiyées que du doigt qui essuyoit le reste de la sagamité, dont aucunes ne pouuoient sentir gueres bon, qui seruoient à tomber de l'eau dans leur Canot, & pour boire & manger comme i'ay dit. I'ay admiré l'honnesteté de leur action en tombant de l'eau sur terre, car outre qu'ils se retiroient à l'escart, ils s'acroupissoient avec beaucoup de modestie à l'exemple des anciens hommes d'Egypte, qui en faisoient de mesme, plus ciuils & honnestes que les femmes des vns & des autres, qui se tiennent debout en semblable necessité sans se beaucoup escarter.

Ils faisoient par fois chaudiere de bled d'Inde non concassé, & bien qu'il fut tousiours fort dur, pour la difficulté qu'il y a de le faire cuire entier, il m'agreoit dauantage au commencement, pour ce que ie le prenois grain à grain, & par ainsi ie le mangeois nettement & à loisir en marchant & dans nostre Canot. Aux endroits de la riuiera & des lacs où ils pensoient auoir du poisson, ils y laissoient traîner après leur Canot, vne ligne à lain, de laquelle ils accommodoient de la peau de grenouille escorchée, avec quoy ils prenoient du poisson, qui seruoit à donner goust à la sagamité, mais quand le temps ne les pressoit point trop, comme lors que nous descendimes pour la traicte, le soir ayans cabané, vne partie d'eux alloit tédre leurs rets dans le fleuve ou és lacs, ausquels ils faisoient par fois de fort bonnes prises, comme de brochets, esturgeons, poissons blancs & des car-

pes, qui ne sont neantmoins telles, ny si bonnes, ny si grosses que les nostres de deça, puis plusieurs autres especes de poissons qu'on ne cognoist point icy.

Le bled d'Inde que nous mangions en chemin, ils l'alloient querir de deux en deux iours au fond des bois & en des certains lieux escartez, où ils l'auoient caché en descédans, dans de petits sacs d'écorces de bouleau: car autrement ce leur seroit trop de peine de porter tousiours quant & eux tout le bled ou les farines, qui leur sont necessaire pour leur voyage, & m'estonnois grandement comme ils pouuoient si bien remarquer tous les endroits où ils l'auoient caché sans se mesprendre aucunement, bien qu'il fust souuent fort esloigné du chemin, & bien auant dans les bois, sous quelques mottes ou enterré dans le sable.

La maniere & l'inuention qu'ils auoient à tirer du feu, & laquelle est pratiquée par tous les peuples sauuages & barbares, est telle & si admirable qu'elle ne se peut assez admirer, & louer le diuin Autheur d'une telle merueille. Ils prenoient deux bastons de bois de saulx, tilleul ou d'autre espee, secs & legers, puis en accommodoient vn, d'environ la longueur d'une coudée ou peu moins, & espais d'un doigt ou environ, & ayans sur le bord de sa largeur caué de la pointe d'un cousteau ou de la dent d'un castor, une bien petite fossette, avec vn petit cran à costé, pour faire tomber à bas sur quelque bout de mesche ou chose propre à prendre feu, la poudre reduite en feu qui deuoit tomber

du trou, ils mettoient la pointe d'un autre baston du mesme bois, gros comme le petit doigt ou peu moins, dans ce trou ainsi commencé, & estans contre terre le genouil sur le bout du baston large, ils tournoient l'autre entre les deux mains si soudainement & si long-temps, que les deux bois estans bien eschauffez, la poudre qui en sortoit à cause de cette continuelle agitation se conuertissoit en feu, duquel ils allumoient un bout de leur corde seiche, qui conferue le feu comme mesche d'arquebuse: après avec un peu de menu bois sec, ils faisoient du feu pour faire chaudiere.

Mais il faut noter que tout bois n'est pas propre à faire du feu, ains du particulier, & que nous pouuons rencontrer icy. Or quand ils auoient de la difficulté d'en tirer, ils deminçoient dans ce trou un petit de charbon, ou un peu de bois sec en poudre, qu'ils prenoient à quelque souche: s'ils n'auoient un baston large comme j'ay dit, ils en prenoient deux ronds, & les lioient ensemble par les deux bouts, en la maniere d'une nauette de Tessier, & estans couchez le genouil dessus pour les tenir en estat, mettoient entre deux la pointe d'un autre petit baston du mesme bois, qu'ils tournoient par l'autre bout entre les deux mains comme cy-dessus.

Nos Montagnais, à ce qu'on dit, se seruent d'une autre sorte de fusil, qui n'est neantmoins fait comme les nostres: ils ont pour meche la peau de la cuisse d'un Aigle avec du duuet qui prend feu aisement, ils battent deux pierres de mine ensemble comme nous faisons une pierre

à fuzil, auëc vn morceau de fer ou d'acier : au lieu d'allumettes ils se seruent d'un petit morceau de tondre, c'est vn bois pourry & bien seiché, qui brusle aisement & incessamment iusques à tât qu'il soit consommé, ayant pris feu ils le mettent dans de l'escorce de cedre puluerisée, & soufflant doucement cette écorce s'enflamme. Voyla comme ils font du feu.

Pour reuenir à nostre voyage, nous ne faisons chaudiere que deux fois le iour, qui estoit peu pour moy, en ce temps encor mal accoustumé à ceste maniere de viande, car i'en vsois à chaque fois si peu que les deux repas ne meritoient pas le nom d'un bien petit, c'est pourquoy i'estois tousiours fort foible sans auoir moyen de me fortifier, patissant plus que mes Sauvages, qui estoient accoustumez à cette façon de viure, ioint que petunans assez souuët durant le iour, cela les consoloit, les fortifioit & leur amortissoit aucunement la faim & non pas à moy, qui n'en ay iamais voulu vser pour d'une habitude onereuse, de laquelle on ne se fait pas quitte quand on veut, & scay des personnes extremement marries d'en auoir iamais vû, pour ce qu'il nuyt plus icy pris en fumée, qu'il ne profite à des personnes qui ont autre chose à disner, ou qui ne sont point incommodées des humiditez du cerueau, car alors il de-seiche mediocrement pris, masché, ou en fumée.

L'humanité de mon hoste estoit remarquable, en ce que n'ayant pour toute couuerture & habillement, qu'une peau d'ours assez petite,

encor m'en faisoit il part de la moitié, la nuit quand il pleuvoit, sans que ie l'en priasse, & mesme me dispoisoit la place au soir où ie deuois reposer la nuit, avec quelques petits rameaux de cedre, où à faute d'iceux la petite natte de ioncs, qu'il auoit accoustumé de porter en de longs voyages: & compatissant à mes travaux des-ja assez grands, il m'exemptoit de nager & de tenir l'aviron, qui n'estoit pas me descharger d'une petite peine, outre le service qu'il me rendoit de porter mes pacquets par tous les Sauts, bien qu'il fust des-ja assez chargé de ses marchandises, & à son tour du Canot qu'il portoit sur son espaule, parmy de si facheux & penibles chemins, où il luy falloit faire diuers voyages.

Vn iour ayant pris le deuant comme estoit ma coustume pendant que mes Sauvages deschargeoient le Canot & portoient les marchandises au de-là des Sauts, ie me trouuay à l'improuiste esgaré, en vne grande estendue de terre tremblante sous mes pieds, proche d'un lac, que nous deuions passer: estonné de ceste nouveauté, ie m'en retiray fort doucement & à petit pas, sur vn rocher qui estoit là auprès, peur de plus grand inconueniét, car il n'y auoit point là lieu de seureté pour moy. Il y a plusieurs Autheurs, qui assurent qu'il y a des Isles qui flottent sur les eaux, & mesme Herodote fait mention d'une semblable, située pres la ville Botis, non loing du Nil, mais on s'en peut donner de garde, comme de celle cy, car comme elles ne sont pas tout à fait destachées de la

terre ferme, sinon quelqu'un, au premier pas on s'en peut tirer & se mettre en chemin assuré.

Nous rencontrions aussi par fois de furieux boubiers, desquels nous receuions de grandes incommoditez & des peines n'ompareilles d'en pouuoir sortir, que les iambes toutes embourbées, comme il arriua à vn certain François, lequel s'il n'eust eul les iambes escarquillées au large eut enfoncé iusques aux oreilles, comme il enfonça iusques aux reins. On a aussi bien de la peine de se faire passage avec la teste & les mains parmy les bois touffus, où il s'y en rencontre aussi grand nombre de pourris & tombez les vns sur les autres, qu'il faut eniamber & monter par dessus, sans craindre la suite & l'importunité d'un nombre sans nombre de mousquites & cousins, qui vous font vne continuelle & tres cruelle guerre, pire que celle des loups, qui se contentent de la premiere brebis, & non ces animaux de la premiere piqueure.

Des mous-
quites.

Je suis aussi comme assuré que sans l'estamine, qui me couuroit la face & le visage, que j'estois pour en perdre la veüe, comme l'en fus playé par toutes les parties descouvertes sans y auoir pû apporter de remede non plus que plusieurs François, qui en deuindrent auueugles pour plusieurs iours, tant est pestiferé & veneneux la piqueure de ces petits demons, à qui n'a encor pris l'air du pais.

Ces bestioles ne paroissent neantmoins pas tousiours, mais au temps le plus chaud, & lors

qu'il ne faict point de vent, autrement qui en pourroit iamais souffrir l'importunité & les morsures malignes, qui rendent les personnes semblables à des lepreux, laids & hideux à ceux qui les regardent. Je ne sçay; car pour moy ie cōfesse, que c'est le plus rude martyre que i'aye souffert dans le païs, la faim & la soif, la lassitude & la fièvre, ne sont rien en comparaison, ces petites bestes ne vous font pas seulement la guerre pendant le iour, mais mesme la nuict, elles se jettent dans vos yeux, elles entrent dans vostre bouche, passent par dessous vos habits, & perce mesme l'estoffe qui ioint vostre chair, de leur long esguillon, le bruit vous en est aussi fort importun, car il desrobe souuent vostre attention, vous empesche de prier Dieu, de lire, d'escrire & de faire vos exercices avec quelque repos, se fourrent par tout, & principalement dans les chambres, où le vent ne domine point, c'est ce qui nous obligeoit d'y brusler souuent de l'encens, la fumée duquel les faisoit rassoir, & puis reuenoient de plus bel qu' auparauant.

Il y en a de trois ou quatre sortes, dont les vns s'appellent en Montagnais sentimeou, en Huron tachiey ou teschey, & en François cousins, ce sont ceux qui ont ces longs esguillons tres-deliez & menus. Il y en a encore d'une autre espeece au païs de nos Montagnais, que ie n'ay point veu chez nos Hurons, ny par toutes leurs contrées, si petites, qu'à peine les peut on voir, mais importunent & mordent comme petits diabolins, qui est le nom propre que leur donnent les Montagnais, à sçauoir mani-

touchis; & les François mouches-quilles, ou mouchequites, qui ne viennent que vers le mois d'Aoust, & n'ont pas longue durée.

Au païs des Hurons, à cause qu'il est descouvert & habité, il y a peu de ces cousins, sinon aux forests & lieux où les vents ne dominent point, pendant les grandes chaleurs de l'Esté, car en autre saison il ne s'en voit nulle part, non pas mesmes dans les sapiniers, c'est pourquoy ne les craignez point.

Suite de nostre voyage aux Hurons. De la nation des Ebicerinys. De celle de bou & des cheueux releuez. Comme ils chantent les malades, & de la maniere que les femmes se gouuernent ayant leur mois.

CHAPITRE VII.

NOus passames par plusieurs nations Sauvages, mais nous y arrestames assez peu à chacune, aux vnès vne nuit, & aux autres quelques heures seulement, pour tousiours aduancer chemin, sinon aux Ebicerinys & Sorciers, où nous seiournames deux iours entiers, tant pour nous reposer de la fatigue du chemin, que pour traicter avec eux de la marchandise de nos Hurons, pour de leurs pelleteries.

La rencontre que nous fismes icy du P. Nicolas, pour estre la premiere depuis nostre partement

tement de Kebec, nous obligea puissamment de nous entrecaresser & nous resioiir en nostre Seigneur de ceste heureuse entrecueü, laquelle fut suiue d'un festin que ce bon Pere ordonna à la façon du pais, qui me sembla excellent au de là de toute la bonne chere, que i'ay iamais faict en nostre Europe, mais pource que la merueille ne s'est pas portée iusques dans vn tel excès, que ie doie apprehender de le dire, figurez vous quels pouuoient estre les mers de ce festin, vn peu de poisson blanc, avec des citrouilles du pais, le tout cuit ensemblement en de l'eau pure, sans autre fausse que du bon appetit, qui ne pouuoit manquer à vn homme, qui auoit très-mal souppé & encor plus mal couché, mouillé dessus & dessous d'un grand orage, qui nous auoit duré toute la nuit. Pour de la boisson il ne s'en parle point, que de la belle eau claire du Lac, qui estoit là deuant nostre cabane, non plus que de linge, de pain & de sel, qui ne leur sont point en v sage, ny beaucoup d'autres choses que nostre Europe nous fournit abondamment.

Les François appellent ordinairement les Ebicerinys le peuple sorcier, non qu'ils le soient tous, mais pour ce que c'est vne nation, qui faict particuliere profession de consulter le diable en leur necessité. Lors qu'ils le veulent communiquer & apprendre quelque chose de luy, c'est ordinairement dans vne petite tour d'écorces, qu'ils dressent à l'escart dans les bois, ou au beau milieu de leurs cabanes, & là estans enfermez, ils inuoquent leur demon &

Des Ebicerinys.

reçoivent les oracles plus souvent faux que vray. Il y en a beaucoup qui feignent luy parler, & auoir sa communication, pour estre estimez Pirotos & Magiciens, qui ne luy parlent pas pour tout, & ne predisent que bourdes & menfonges, car le diable, pour se faire plus estimer, se faict rechercher, & ne se familiarise point à tous.

Ces Sorciers sont fort coustumiers de donner des sorts, & causer de certaines maladies, à ceux contre lesquels ils ont quelque hayne, qui ne se peuent guerir que par d'autres sorts & remedes extraordinaires, dont il y en a du corps desquels, ils font sortir des grands serpens & des longs boyaux, & quelquefois seulement à demy, puis rentrent, qui sont toutes choses diaboliques & inuentées par art magique, à cela près, & excepté la communication qu'ils ont avec les demons, ie les trouuois assez bonnes gens, fort humains & courtois en leur conuerfation, & d'un esprit capable de quelque chose de bon, s'ils estoient cultuez & instruits en la loy de Dieu.

Pour leurs habits & leur cheuelure, ils les portent à la mode des Algonnequins courans, mais ie me suis fort estonné de voir des hommes entr'eux, porter en teste vn petit capuce
 Du capuce
 des Ebice-
 rins.
 puce rond, comme celuy d'un Chanoine, faict de petites lanieres de fourrures, larges d'un trauers de doigts, proprement assemblez & cousus iusques au bas du col, puis esparpillées à l'entour des espaules, qui leur battoient environ vn pied de long en guise

d'un petit camaïl: ie ne sçay qui leur en a donné l'inuention ny sur quel modelle ils les ont pris, car auant nostre arriuée aux Hurons, ils en portoiēt des-ja & puis les nostres sont plus profonds & quarrez, tant y a qu'ils estoïēt fort bienfaicts.

Auec ce petit capuce qui ne leur sert qu'en hyuer & pour de longs voyages, quelques-uns s'accommodent encores de certaines manches de castors qui leur prennēt par derriere les espaules attachez d'une petite cordelette, & des bas de chausses attachez à leur ceinture qui leur seruent contre le grand froid du Nord qui est tel qu'on n'en pourroit supporter les atteintes sans ses deffences desquelles ils se seruent quand ils y voyagent.

Quelques uns portent des bonnets de chanure & d'escorce du bois ati fort bien tissus ou ils faconnent deux manieres de cornes au dessus qu'ils croyēt leur donner bonne grace: car plus les choses sont desguisées plus ils les estiment riches & belles, cest ce qui a donné suiet à nos Marchands François de bigarer les capots qu'ils leur traictēt de diuerses couleurs, de houlpes & de faulx passemens.

On dit que les Arrabes ont quelque chose d'approchans de nos Sorciers tāt en leur vie que en leurs vestemens, en leur vie en ce qu'ils sont presque tous errants, & en leurs vestemens en ce qu'ils n'ont presque aucune conformité & s'accommodent chacun selon que la pauureté leur permet, l'un est

tout nud & l'autre vn peu couuert. Quelques Arrabes portent des Turbans, quelques autres des capuces qui les fait sembler des maſquestant ils sont mal faits & grotesquement accommodez.

Il y a vne certaine Nation entre eux lesquels on appelle Arrabes à la barrette, non qu'ils en portent tous, mais le chef seulement. Ce nom leur est venue de ce qu'vnde nos Religieux ayāt par mégarde perdu sa calotte vers le fleuve Iordain, vn Arrabe l'ayant ramassée la porta à son Capitaine disant qu'elle venoit d'vn fr̃c (s'ils appellent indifferēment franc, toutes les nations Chrestiennes, François, Espagnols, Italiens & autres qui ne sont point nays suiets & esclaves du gr̃d Turc.) Ce Capitaine fit estat de cete calotte & s'en seruit vne année entiere apres quoy il la rendit au Gardien de nostre Conuēt de Ierusalē, mais à la charge de luy en rendre vne neuue, & tous les ans retourne porter sa barrette pour en rauoir vne autre, laquelle coustume a tellement preualu qu'on n'oseroit luy auoir refusé, le bon heur est qu'il n'y a que le Chef à contenter, car ceux de la troupe portent de hauts bonnets pointus ou pyramidales & non ronds & cornus comme ceux de nos Bisserriniens.

Dans ce village des Ebicerinys, ie perdis tous les memoires que i'auois dressés, des pais & chemins que i'auois obserués depuis nostre embarquement de Dieppe, & ne m'en apperceus qu'à la rencontre de deux Canots Sauvages, de la nation de bois, nation fort

éloignée & auant dans les terres vers la mer du Su, à mon aduis, ils sont dépendans des cheueux releuez & comme vne mesme nation, aussi sont ils nuds entre les hommes, comme l'enfant sortant du ventre de sa mere, de quoy mes Hurons sembloient auoir horreur, bien qu'ils ne fussent gueres plus honnestes eux mesmes, car dans nostre Canot ils ne faisoient non plus difficulté de se tenir nuds, & pour chose que ie leur en die, ils me respondoient, que c'estoit pour leur commodité, & pour n'estre embarrassés de rien en nageant non pas mesme de leur brayer.

Ces gens de bois, auoient à leur col de petites fraizes de plumes blanches, & leurs cheueux accommodez de mesme parure. Leur visage estoit peint par tout de diuerses couleurs en hayle fort ioliuement, les vns l'auoient d'un costé tout vert & de l'autre rouge, autres sembloient auoir tout le visage couuert de passemens naturels parfaictement bien faicts, & autres tout autrement, car chacun a liberté de s'accommoder comme il veut, & de suiure la mode aussi folle & de moindre coutange que celle d'icy. Mes Hurons se fardoient aussi le iour qu'ils deuoient arriuer en quelque nation, mais ils y estoient vn peu grossiers, & n'auoient pas ceste gentillesse ny l'inuention de plusieurs petites iolietez qu'auoient ces gens de bois.

Le lendemain après midy nous trouuâmes vn village d'Algoumequins, auquel nous

reposames enuiron trois heures , pendant lequel temps , il se fist vne chanterie de malade dans vne cabane , avec tant de bruit de la voix , du son des tortues & du frapement de certains bastons , que ie ne sçauois qu'en iuger , car i'estois encore nouveau dans le païs. A la fin ie fus curieux de m'approcher & voir par la fente de la cabane que ce pouuoit estre, là où ie vis (ainsi que i'ay veu du depuis par plusieurs fois aux Hurons , pour semblables occasions) dix ou douze hommes, my partis en deux bandes, assis contre terre & arrangez des deux costez de la cabane & deuant chacune bande estoit vne longue perche platte, large de trois ou quatre doigts , couchée de long sur la terre à leurs pieds sur lesquelles il frapportoient continuellement avec chacun vn baston en main, à la cadence du son des tortues & des chansons, qu'ils entonnoient & poursuiuoient alternatiuement, d'un ton le plus haut qu'ils pouuoient , pensans par là , d'autant plustost obtenir ce qu'ils desiroient, que plus ils feroient de bruit.

Loki ou Medecin estoit au haut-bout avec sa grande tortue en main , qui battoit la mesure, & commençoit les chansons que les autres poursuiuoient à pleine teste , mais avec tant d'ardeur qu'il sembloit qu'ils deussent s'esgorger, suioient de peine & estouffoient de chaleur. Pendant ce sabbat, cette harmonie de demons, deux femmes tenoient vn petit garçon, pleurant couché tout nud le ventre en haut sur la

terre, vis à vis de Loki, lequel de temps en temps, à quatre pattes s'approchoit de l'enfant avec des cris & hurlemens comme d'un furieux taureau, puis le souffloit au ventre, & après estant retourné à sa place, recommençoient leur tintamarre & charivari, qui finit par un festin, qui se dispoisoit pendant la cérémonie au bout de la cabane : de sçavoir que devint l'enfant, & s'il fut guery ou non, s'y on y adiousta encore quelque autre façon de faire, i'en en ay rien sçeu du depuis, pour ce qu'il nous fallut partir incontinent après auoir repeu, traicté & un peu reposé.

De cette nation, nous allames cabaner en un village d'Andatahouats, que nous disons, Cheueux ou poil leué, qui s'estoient venus camper proche la mer douce, à dessein de traicter avec les Hurons & autres qui retournoient de la traicte de Kebec, & fusmes deux iours à negotier avec eux, pendant lesquels ie fus visiter la pluspart de leurs cabanes, pour apprendre leur façon de faire, & qu'elle estoit leur humeur, mais ie les trouuay un peu trop serieux, & assez peu courtois, comme gens qui ne demandoient qu'à bien vendre & d'acheter à bon prix.

Ils auoient leurs cheueux parfaitement bien releuez, peignez & agencez sur le front, plus droits que ne souloient autrefois porter nos Courtisans, cela leur donnoit assez bonne grâce avec le reste de leur Matachias, mais la nudité entiere de leurs corps, de laquelle ils n'ont

Nation des
Cheueux
releuez.

ny honte ny vergongne, m'estoit d'un grand desplaisir, qui m'empéchoit de les voir librement. Neantmoins ils ont telle habitude à cela, que les femmes & filles traictent & demeurent parmy eux, avec la mesme liberté que s'ils estoient vestus, sans que l'on puisse appercevoir, que cela fasse de mauuais effects en elles.

Je vis la mesme nuit vne quantité de Sauvages pescher l'anguille à la clarté du feu, en un coin du grand Lac, duquel ils tiroient à chaque coup un de ces longs poissons, qui emplirent à la fin leur Canot, c'estoit vne façon de pescher que ie n'auois encores point veüe, & laquelle neantmoins est fort pratiquée par nos Montagnais, depuis la my-Aoust, iusques à la Toussaincts, comme celle des loups marins en May & Iuin, à sept lieües de Kebec.

Les Sauvages & Sauvageſſes du Bresil & de tous les pais circonuoisins ne se seruent non plus de vestemens que nos Cheueux releuez, & demeurent nuds, hommes, & femmes comme les enfans sortans du ventre de leur mere. Mais les femmes & filles des Cheueux releuez plus honnestes & vergongneuses, ont un petit cuir à peu près grand comme vne seruiette, duquel elles se couurent les reins iusques au milieu des cuisses, & tout le reste du corps est descouuert, à la façon de nos Huronnes.

Il y a un grand peuple en cette nation, &

la plupart des hommes sont grands guerriers, chasseurs, & pescheurs. Je vis là beaucoup de ieunes femmes qui faisoient des nattes de ioncs grandement bien tissues & embellies de diuerses couleurs; qu'elles traittoient apres pour d'autres marchandises à des barbares de diuerses nations qui abordoient en leur bourgade. Ils sont errants, sinon quelqu'vns d'entr'eux qui bastissent des villages au milieu des bois, pour la commodité qu'ils trouuent d'y bastir & les fortifier, & tous ensemble font la guerre à vne autre nation nommée Assistagueronon, qui veut dire gens feu: car en langue Huronne Assista signifie de feu, & Erónon signifie Nation. Ils sont esloignez d'eux à ce qu'on tient, de neuf ou dix iournées de canots, qui font enuiron deux cens lieuës & plus de chemin; ils vont par troupes, en plusieurs regions & contrées, esloignées de plus de cinq cens lieuës, comme il est ayse à coniecturer en ce qu'on en a veu quelquesfois à la traite de Kebec, & puis de là se transporter par les Nations iusques au delà de celles des Puants, qui fait d'vn lieu à l'autre plus de cinq cens lieuës de pays, où ils trafiquent de leurs marchandises, & en changent pour des pelleteries, peintures, pour celeines, & autres fatras desquels ils sont fort curieux pour s'accommoder.

En general le pays des Algoûmequins desquels ils sont alliez & font partie; quand à l'esten duë, tirant de l'Orient à l'Occident,

Pays des
Algoûme-
quins.

au rapport du sieur de Champlain, contient près de 450. lieues de longueur, & deux cens par endroits de largeur du Midy au Septentrion, sous la hauteur de quarante & vn degré de latitude, iusques à quarante huit & 49.

Cette terre est comme vne Isle que la grande riuere de saint Laurens enceint, passant par plusieurs Lacs de grandes estenduës, sur le riuage desquels habitent plusieurs Nations, parlans diuers langages, aucuns ont leur demeure arrestée, & autres non. Entre lesquels on en remarque quelqu'vnes qui se percent les narines ausquelles ils pendent des patinotres bleuës, qui peuuent estre pierreries, & d'autres qui se decouppent le corps par rayes & compartimens, où ils appliquent du charbon & autres couleurs qui leur demeurent pour tousiours.

Femmes
ayans leurs
mois.

Les femmes de toutes ces Nations vivent fort bien avec leurs maris, & particulièrement celles des Cheveux releuez, lesquelles ont cette coustume entr'elles, qu'ayans leur mois, elles se separent d'avec leurs maris, & les filles d'avec leurs peres & meres, & autres parens, & se retirent en de certaines petites cabanes ou huttes qu'on leur accõmode en lieu escarté & esloigné de leur village, où elles seiournent & demeurent seules tout le temps de ces incommoditez, sans auoir aucune compagnie d'hommes, lesquels leur portent des viures, & ce qui leur est necessaire iusques à leur retour, si elles mesmes

n'en portent suffisamment pour leur provision necessaire, comme elles font ordinairement, ou de leurs compagnes.

Entre les Hurons & autres peuples sedentaires, les femmes ny les filles ne sortent point de leur maison ou village pour semblables incommoditez : mais elles font leur manger en de petits pots à part pendant cetemps là, & ne permettent à personne d'en manger, ny de prendre ses repas avec elles : de sorte qu'elles semblent imiter les Iuifues, lesquelles s'estimoient immondes pendant le temps de leurs fleurs ; Je n'ay pû apprendre d'où leur estoit venue cette coustume de se separer ainsi, quoy que ie l'estime pleine d'honnesteré, & loüable en ce que elles mesmes nous en aduertissoient (avec vn peu de honte pourtant) peur que mangeassions de leur menestre qu'elles croyoient nous deuoir causer de l'incommodité, au contraire de celles d'icy qui n'en sont pas plus nettes, & s'en taisent neantmoins. O pauuereté, misere & infirmité du corps humain, que tu es suiet à de maux & incommoditez, plus que les animaux de la terre mesme, & cependant il n'y a pas moyen de l'humilier, & luy faire sentir la bassesse & le mespris, que merite vne carcasse infecte, que veut estre venerée comme vne Deesse par les fols amoureux de ce temps.

*De nostre arrivée au pays des Hurons.
Comme une multitude de Sauvages me
vindrent au deuant, & la façon que ie
fus receu, traité & gouverné en la ca-
bane de mon Sauvage.*

CHAPITRE VIII.

*Naïfueté &
verité de
cette hi-
stoire.*

PVis qu'avec l'assistance de nostre Dieu auquel ie rend graces infinies, nous sommes arrivez si près du pays de nos Hurons, il est doresnavant temps que ie commence à en traiter plus amplement, & de la façon de faire de ses habitans, non à la maniere de certaines personnes, lesquelles descriuans leurs histoires, ne disent ordinairement que les choses principales, & les enrichissent encore tellement, que quand on en vient à l'expérience, on n'y voit plus la face de l'Auteur: car i'ecris non seulement les choses principales, comme elles se sont passées, mais aussi les moindres & plus petites, avec la mesme naïfueté & simplicité que i'ay accoustumé.

C'est pourquoy ie prie le Lecteur d'auoir pour agreable ma maniere de proceder, & d'excuser si pour mieux faire comprendre l'humeur de nos Sauvages, i'ay esté contraint d'inserer icy plusieurs choses qui sembleront inciuiles & extrauagantes, d'autant que l'on

ne peut pas donner vne entiere cognoissance d'un pays estrange, ny ce qui est de son gouvernement, qu'en faisant voir avec le bien, le mal & l'imperfection qui s'y retrouue: autrement il ne m'eust fallu decrire les mœurs des Sauvages, s'il ne s'y trouuoit rien de Sauvage, mais des mœurs polies & ciuiles, comme les peuples qui sont cultivez par la Religion & pieté, ou par des Magistrats & Sages, qui par leurs bonnes loix eussent donné quelque forme aux mœurs si difformes de ces peuples barbares, dans lesquels on void bien peu reluire la lumiere de la raison, & la pureté d'une nature espurée.

Deux iours auant nostre arriuee aux Hurons, nous trouuâmes la mer douce, sur laquelle ayans trauersé d'Isle en Isle, & pris terre au pays tant désiré, par un iour de Dimanche, feste saint Bernard, enuiron midy, que le Soleil donnoit à plomb: le me prosterné deuant Dieu, & baissé la terre en laquelle ce souverain Monarque m'auoit amené, pour annoncer sa parole & ses merueilles à un peuple qui ne le cognoissoit point, & le prié de m'assister de ses graces, & d'estre par tout ma guyde pour faire toutes choses selon ses diuines volontez, & au salut de ce peuple; puis mes Sauvages ayans serré leur canot dans un bois qui estoit là aupres, me chargerent de mes hardes & pacquets qu'ils auoient tousiours auparauant portez, par les fauts, car la longue distance qu'il y auoit de là au bourg, & la quantité de leurs marchan-

dites desquelles ils estoient plus que suffisamment chargez, ne leur pû permettre de faire dauantage pour moy, dans cette occasion.

Ie portay donc mon paquet & mes hardes, non sans vne tres-grande peine, tant pour la pesanteur, l'excessiue chaleur qu'il faisoit, que pour vne foiblesse & debilité grande que ie ressentois en tous mes membres depuis vn long temps, ioint que pour m'auoir fait prendre le deuant, comme ils auoient accoustumé (à cause que ie ne pouois les suiure qu'à toute peine) ie me perdis du chemin, & me trouuay vn long temps seul egaré dans les bois & par les campagnes, sans sçauoir où i'allois, car les chemins sont si peu battus en ces pays-là, qu'on les perd aisément si on n'y prend garde de prez. A la fin apres auoir bien marché & trauersé pays, Dieu me fit la grace de trouuer vn petit sentier que ie suivy quelque temps, apres quoy ie rencontray deux femmes Huronnes proche d'un chemin croisé, lesquelles s'arrestèrent tout court pour me contempler: de me parler elles ne pouuoient, ny moy leur demander lequel des deux chemins ie deuois prendre pour aller au bourg que ie pretendois, car ie n'en sçauois pas mesme le nom, ny de quel costé estoient allez mes gens, dequoy elles me tesmoignoient de la compassion par leur soupir ordinaire, Et hon, & hon. En fin inspiré de Dieu ie pris à main gauche du costé de la mer douce, esperant

d'y rencontrer, sinon mes hommes ou mon village, du moins quelques pefcheurs pour me donner adrefse.

Au bout de quelque temps comme i'allois d'un pas afsez vifte ie fus apperceu de mes Sauvages qui m'attendoient bien en peine que i'estois deuenu, affis à l'ombre fous vn arbre vn peu à cofté du chemin dans vne belle grande prairie, ma veüe les confola fort, comme leur rencontre me refiouit grandement, car ie faisois defia estat de coucher feul dans la campagne, & de viure de feüilles & de racines, comme les anciens Hermites, en attendant l'affiftance de Dieu, duquel i'efperoieftre conferué de la main des Hiroquois qui couroient pour lors les frontieres, car ils m'euffent enuoyé en l'autre monde par le feu & les tourments, & m'euffent mangé au lieu des vers, comme ils font leurs ennemis.

Ie m'aproyay donc de mes gens, lefquels m'ayans fait ftoir aupres d'eux, me donnerent des cannes de bled d'Inde à fuccer pour me fortifier & me faire reprendre haleine; Ie pris garde comme ils en vfoient, car celam'estoit vn peu nouueau, & les trouuay d'un afsez bon fuc, puis ayant repofé quelques temps & repris nouuelle force, nous pourfuiuifmes noftre chemin iufques à vn petit hameau, où les habitans nous donnerent des prunes rouges refsemblans à nos damas violets, mais fi rudes & afpres au gouft que ie n'en peu manger du tout, en lieu ie

cueillay vn plain plat de fezolles dans leur desert, qui nous seruirent pour vn second festin dans nostre cabane, l'escorce en estoit desia bien dure, mais la sauce, en fut encor plus maigre, car il n'y eut, ny sel, ny huile, ny graisse, plus douce neantmoins que le fiel, & le vinaigre, du Fils de Dieu en la Croix.

Ville de S.
Gabriel.

Le Soleil commençoit desia à quitter nostre prison & nous priuier de sa lumiere, lors que nous partismes de ce petit hameau, vne partie de nos hommes se separerent apres leur auoir fait la courtoisie de quelques fers à fleches, puis moy Sauuage & moy, avec vn autre, tinsmes le chemin de *Teguanonkaye*, autrement nommé *Queuindehian*, par quelques François la Rochelle, & par nous, la ville de saint Gabriel, pour estre la premiere ville du pays dans laquelle ie sois entré, elle est aussi la principale, & comme la gardienne & le rempart de toutes celles de la Nation des Ours, & où se decident ordinairement les affaires de plus grande importance. Ce lieu est assez bien fortifié à leur mode, & peut contenir enuiron deux ou trois cens mesnages, entrente ou quarante cabanes qu'il y a. A l'aprophe de ce bourg vn grand nombre de Sauvages de tous aages, sortirent au deuant de nous avec vne acclamation, & vn bruit populaire si grand, que i'en auois les oreilles toutes estourdies, & fus ainsi conduit iusques dans nostre cabane, où la presse y estoit desia si grande que ie fus contraint de gaigner

de gagner le haut de l'establie pour me libérer & faire quite de leur empeschement.

Le pere & la mere de mon Sauvage me firent vn fort bon accueil à leur mode, & par des caresses extraordinaires me tesmoignerent l'aïse & le contentement qu'ils auoient de ma venue, & me traiterent avec la mesme douceur & amitié de leurs propres enfans, me donnant tout suiet de louer Dieu en leur humanité & bienveillance. Ils prirent aussi soin de mes petites hardes afin que rien ne s'en perdit, & m'aduertirent de me donner garde des larrons & trompeurs, particulièrement des Qui ne ont tateronons qui sont les plus rusez de tous, & en effet ils me caressoient fort pour m'attraper, par des inuentions qui feroient leçon, à celles des fins coupeurs de bources d'icy.

C'est vne chose digne de consideration & bien admirable que les Sauvages n'estans conduits que de leur naturel, quelques corrompus qu'il soiēt, s'entr'aymēt neantmoins d'un amour si cordial & sincere, qu'ils s'entr'appellent ordinairement les vns les autres pere, frere, oncle, nepueu ou cousin, comme s'ils estoient tous d'une mesme famille & parenté. Mon Sauvage qui me tenoit en qualité de frere, me donna aduis d'appeller sa mere Sendoue, c'est à dire maman, ma mere, puis luy & ses freres Ataquain, mon frere, & le reste de ses parens en suite, selon les degrez de consanguinité, & eux de mesme m'appelloient leur parent. La bonne femme

Suis bien
receu dans
la cabane,

Amitié en
tre Sauvages

disoit Ayein, mon fils, & les autres Ataqueu, mon frere, Sarassée, mon cousin, Hiuoittan, mon nepueu, Houiatinoron, mon oncle, Aystan, mon pere: selon l'aage des personnes i'estois ainsi appellé oncle, ou nepueu, &c. & de peu de personnes qui ne me tenoient en cette qualité de parens, i'estois appellé Yatoro, mon compagnon mon camarade, & de beaucoup Garihouanne grand Capitaine, i'en vsois de mesme à leur endroit comme iay dit, & par ainsi nous viuions en très-grand paix & douceur d'esprit.

Le festin qui nous fut fait à nostre arriuée, fut d'un peu de bled d'Inde pillé, qu'ils appellent Otter, avec un petit morceau de poisson boucané à chacun, cuit en l'eau, car c'est tout la sauce du pays, & mes sezolles nous seruirent pour le lendemain: dès lors ie trouuay bonne la sagamité qui estoit faite dans nostre cabane, pour estre assez nettement accommodée, ie n'en pouuois seulement manger lors qu'il y auoit du poisson puant demincé parmy, ou d'autres petits, qu'ils appellent Auhaitique, n'y aussi de Leindohy, qui est un bled puant, duquel ils font neantmoins grand estat: nous m'agions par fois des citrouilles du pays, cuites dans de l'eau, ou bien sous les cendres chaudes, que ie trouuois fort bonnes, comme semblablement des espics de bled d'Inde que nous faisons rostir deuant le feu, & d'autres esgrenez, grillez comme pois dans les cendres: pour des menues champestres nostre Sauuagesse m'en ap-

portoit souuent au matin pour mon desien-
ner, ou bien des cannes d'honneha à succer,
& autre chose qu'elle pouuoit: & auoit ce
soin de faire dresser ma sagamité la premiere,
dans l'escuelle de bois ou d'escorce la plus
nette, large comme vn plat bassin, & la cueil-
lier avec laquelle ie mangeois, grande come
vne sauciere, & longue comme vne à dresser
porage.

Pour mon departement & quartier, ils me *Mon de-
partement,*
donnerent à moy seul, autant de place qu'en
pouuoit occuper vn petit mesnage, qu'ils fi-
rent sortir à mon occasion, dès le lendemain
de mon arriuee: en quoy ie remarquay parti-
culierement leur bonne affection, & comme
ils desiroient en tout de me contenter, &
m'assister avec toute l'honnesteté & le respect
deu à vn grand Capitaine & chef de guerre,
tel qu'ils me tenoient. Et pour ce qu'ils n'ont
point accoustumé de se seruir de cheuet, ie
me seruois la nuit d'vn billot de bois, ou d'v-
ne pierre sous ma teste, & au reste couché
simplement sur la natte sans couuerture n'y
forme de couche, & en lieu tellement dur,
que le matin me leuant, ie me trouuois tout
rompu & brisé de la teste & du corps.

Le matin, apres estre esueillé, & prié vn peu *Comme
i'emploiois
la iournée.*
Dieu, ie desieunois de ce peu que nostre Sau-
uagesse m'auoit apporté, puis ayant pris mon
cadran solaire, ie sorrois de la ville en quel-
que lieu à l'escart pour pouuoir dire mon of-
fice en paix, & faire mes petites prieres & me-
ditations ordinaires hors du bruit: estant

j'apprenois
la langue
du pays.

environ midy ou vne heure, ie me rendois
de rechef à nostre cabane, pour disner d'un
peu de sagamité, ou de quelque citrouille
cuite; après disner ie lisois dans quelque pe-
tit liure que j'auois porté, ou bien j'escriuois,
& obseruant soigneusement les mots de la
langue que j'apprenois, j'en dressois des me-
moires que j'estudiois, & repetois deuant
mes Sauvages, lesquels y prenoient plaisir &
m'aydoient à m'y perfectionner avec vne as-
sez bonne methode, me disant souuent,
Auicel, pour Gabriel, qu'ils ne pouuoient
prononcer, à cause de la lettre B. qui ne se
trouue point en tout leur langue, non plus
que les autres lettres labiales, *Asschoin ag-
nanra, & Sçatongu*: Gabriel, prends ta plu-
me & escris, puis ils m'expliquoient au mieux
qu'ils pouuoient ce que ie desirois sçauoir
d'eux.

Et comme ils ne pouuoient par fois me fai-
re entendre leurs conceptions, ils me les de-
monstroient par figures, similitudes & de-
monstrations exterieures, par fois par dis-
cours, & quelquesfois avec vn baston, traçant
la chose sur la terre au mieux qu'ils pou-
uoient, ou par le mouvement du corps, n'es-
tans pas honteux d'en faire quelquefois de
bien indecens, pour se pouuoir mieux don-
ner à entendre par ces comparaisons, plustost
que par longs discours & raisons qu'ils eus-
sent pu alleguer, pour estre leur langue assez
pauvre & diserteuse de mots en plusieurs
choses, & particulièrement en ce qui est des

myfteres de nostre ſaincte Religion, leſquels nous ne leur pouuions expliquer, n'y meſme le Pater noſter, ſi uon par periphraſe, c'eſt à dire, que pour vn de nos mots, il en falloir vſer de pluſieurs de leurs: car entr'eux ils ne ſçauent que c'eſt de Sanctification, de Regne celeſte, du tres-Sainct Sacrement. Les mots de Gloire, Trinité, S. Eſprit, Paradis, Enfer, Eglife, Foy, Eſperance & Charité, & autres infinis, ne ſont pas en vſage chez-eux.

De ſorte qu'il n'y a pas beſoin de gens bien ſçauans pour le commencement; mais de perſonnes bien craignans Dieu, patiens, & pleins de charité: & voyla en quoy il faut principalement exceller pour conuertir ce pauvre peuple, & le tirer hors du peché & de ſon auement.

Ie ſortois auſſi fort ſouuent par la bourgade & les viſitois en leurs cabanes & ménages, ce qu'ils trouuoient tres-bon, & m'en aymoient d'auantage, voyans que ie traitois doucement & affablement avec eux, autrement ils ne m'euffent point veu de bon œil, & m'euffent creu ſuperbe & deſdaigneux, ce qui n'euff pas eſté le moyen de rien gagner ſur eux; mais pluſtoſt d'acquérir la diſgrace d'un chacun, & ſe faire hayr de tous: car à meſme tēps qu'un eſtranger a donné à l'un d'eux quelque petit ſuiet ou ombrage de meſcontentement, il eſt auſſi toſt ſçeu par toute la ville de l'un à l'autre: & cōme le mal eſt pluſtoſt creu que le bien, ils vous eſtiment tel pour un temps, que le meſcontant vous a deſpeint.

Nostre bourgade estoit de ce costé là la plus proche voisine des Hyroquois, leurs ennemis mortels; c'est pourquoy on m'aduertissoit souuent de me tenir sur mes gardes, de peur de quelque surprise pendant que j'allois au bois pour prier Dieu, ou aux châps cueillir des meures châpestres: mais ie n'y rencôtray iamais aucun dâger ny hazard (Dieu mercy) il y eut seulement vn Huron qui bandit son arc contre moy, pensant que ie fusse ennemy: mais ayant parlé il se rassura, & me salua à la mode du pays, Quoie, puis il passa outre son chemin, & moy le mien.

Soin que
les Hurons
ont des def-
functs.

Ie visitois aussi par fois leur cimetiére, qu'ils appellent Agosayé, admirant le soin que ces pauures gens ont des corps morts de leurs parens & amis deffuncts, & trouuois qu'en cela ils surpassoient la pieté des Chrestiens, puis qu'ils n'espargnent rien pour le soulagement de leurs ames, qu'ils croient immortelles, & auoir besoin du secours des viuans. Que si par fois j'auois quelque petit ennuy, ie me recreois & consolais en Dieu par la priere, ou en chantant des Hymnes & Cantiques spirituels, à la louange de sa diuine Majesté, lesquels les Sauuages escoutoient avec attention & contentement, & me prioient de chanter souuent, principalement apres que ie leur eûs dict, que ces chants & Cantiques spirituels estoient des prieres que ie faisois à Dieu nostre Seigneur, pour leur salut & conuersion.

Pendant la nuit i'entendois aussi aucune-

fois, la mere de mon Sauvage pleurer, & s'affliger grandement, à cause des illusions du Diable. L'interrogeay mon Sauvage pour en scauoir le suiet, il me fit responſe que c'estoit le Diable qui la trauailloit, par des songes & representations fascheuses de la mort de ses patens, & amis deffuncts. Cela est particulièrement commun aux femmes plustost qu'aux hommes, à qui cela arriue plus rarement, bien qu'il s'y en trouue aucuns qui en sont trauaillez, & en deuient fols & furieux, selon leur imagination, & la foiblesse de leur esprit, qui leur fait adiouſter foy, & faire cas de ces refueries diaboliques, & d'une infinité de fatras qu'il leur met dans l'esprit.

Venuë du Pere Nicolas en la ville de saint Gabriel. Et comme le Pere Ioseph & nous fismes bastir vne cabane. De nostre pauureté & nourriture ordinaire, & du vin que nous fismes pour les saintes Messes.

CHAPITRE IX.

IL se passa vn assez long-temps apres mon arriuée auant que i'eusse aucune cognoissance, n'y nouuelle du lieu où estoient ar-

riez mes confreres , iusques à vn certain iour que le Pere Nicolas accompagné d'vn Sauvage, me vint trouuer de son village, qui n'estoit qu'à cinq lieuës de nous. Je fus fort resiouy de sa venuë, & de le voir plein de santé (luy qui estoit d'vne complexion si foible) que Dieu luy auoit conseruée au milieu de tant de trauaux & de disettes qu'il auoit souffertes depuis nostre partement de la traite iusques à cette entreneuë, avec son barbare mal gracieux & chiche au possible en son endroit, qui le faisoit presque mourir de faim.

Mes Sauvages au contraire plus doux & courtois, firent voir par le bon accueil qu'ils firent à ce bon Pere, & à tous les François qui me vindrent voir, combien estoit defferante leur bonne humeur de celle de ce melancolique, car outre qu'ils les receurent avec vne face ioyeuse & contante, ils les firent incontinent seoir, peruner & manger en attendant le manifique festin du soir qui fut fait de farine qu'ils appellent eschionque, de laquelle ils furent tous plus que suffisamment rassasiez & non point enyurez, car ils ne beurent que de l'eau pour toute boisson, & coucherent sur la terre nuë.

Le lendemain matin nous primes resolution le Pere Nicolas & moy avec quelques François d'aller trouuer le Pere Ioseph à son village esloigné du nostre 4. ou cinq lieuës, car Dieu nous auoit fait la grace que sans l'auoir premedité nous nous

mismes à la conduicte de trois personnes, qui demeuroident chacun en vn village d'égale distance les vns des autres, faisans comme vn triangle, qui nous fust à bon augure & vne memoire de la tres-saincte Trinité, vn seul Dieu en trois personne, Peres, Fils, & S. Esprit, également bons, sages & puissans.

Or d'autant que i'estois fort aymé de Oonchiarey mon Sauvage, de la plulpart de ses parens & de tous ceux de la bourgade, ie ne scauois comment l'aduertir de nostre dessein, ny qu'elle excuse prendre pour luy faire agreer ma sortie, nous trouuames en fin moyen de luy persuader que i'auois quelque affaire d'importance à communiquer à nostre frere Ioseph, & qu'allant vers luy il falloit necessairement que i'y portasse tout ce que i'auois, qui estoit autant à luy comme à moy mesme, afin de prendre chacun ce qui luy appartenoit, le bon ieune homme se contenta de ceste raison, sous esperance de nous reuoir bien tost, & ainsi satisfait, nous primes congé de luy & partimes pour le village du Pere Ioseph.

Nous nous seruimes d'vn Sauvage pour guide & pour porter nos paquets, moyennant quelque petite courtoisie que nous luy donnâmes, mais le plaisir fut d'vn François nommé la Crietie, seruiteur du sieur de Champlain, lequel ayant apperceu dans le bois à vingt pas de nous, vn arbre tout couuert de tourterelles, & les voulans tirer, il tourna tant de fois à l'entour del'arbre qu'il effara les oyseaux, & luy mesme s'égara, de sorte qu'il nous fallut faire

courir nostre Sauvage après luy, qui s'enfuyoit comme vn perdu à trauers les bois ; pensant nous suivre dans vn sentier contraire, & le ramener au lieu mesme où il nous auoit laissé assis, tellement qu'il eut bien de la peine, n'eut point de tourterelles & nous fit bien perdre du temps.

N'ayans pas trouué le Pere Ioseph dans son petit hameau, nous le fumes trouuer à demie lieue de là, au bourg de Quieunonascaran, où ie ne vous scaurois expliquer la ioye & le contentement que nous eulmes de nous reuoir tous trois ensemble, qui ne fut pas sans en rendre graces à Dieu, le priant de benir nostre entreprise pour sa gloire, & pour la conuersion de ces pauvres infidelles. La beauté du pais & l'honnesteté du grand Capitaine, chez lequel nous logeames par plusieurs iours, nous fist faire eslection de la contrée pour nostre retraite, où à grand peine eumes nous le loisir de nous entrecaresser, que ie vis mes Sauvages (ennuyez de mon absence,) nous venir retrouver, ce qu'ils reitererent par plusieurs fois, & nous nous estudions à les recevoir & traicter si humainement & ciuilement, que nous les gaignasmes, en sorte, qu'ils sembloient debatre de courtoisie à recevoir les François en leur cabane, lors que la necessité de leurs affaires les iettoit à la mercy de ces Sauvages, que nous experimentames auoir esté vtils, à ceux qui doiuent traicter avec eux, esperant par ce moye de nous insinuer au principal dessein de leur conuersion, seul motif d'vn si long & facheux voyage.

Le desir de profiter & d'avancer la gloire de Dieu, nous fist resoudre d'y bastir vn logement part, & separé pour prendre possession de ce lieu au nom de Iesus-Christ, afin d'y faire les fonctions & exercer les Ministeres de nostre Mission: ce qui fut cause que nous priames le Chef, qu'ils appellent Garihouia Andionxra, cest à dire, Capitaine & Chef de la Police, de nous le permettre, ce qu'il fist avec l'aduis de son Conseil, mais avec bien de la peine, ayans au prealable fait leur possible pour nous le persuader, disans qu'il vaudroit beaucoup mieux, que logeassions dans leur cabanes & parmi leurs familles, pour y estre mieux traittez qu'en vn lieu escarté, où personne n'auroit soin de nous.

Nous obtinsmes en fin ce que nous desirions, leur ayans fait entendre qu'il estoit aussi nécessaire pour leur bien; car estans venus de si loing d'un pais, pour leur faire entendre ce qui concernoit le salut de leurs ames, & le bien de la feliçité eternelle, avec la cognoissance d'un vray Dieu, par la predication de l'Evangile, il n'estoit pas possible d'estre assez illuminez du Ciel pour les instruire, parmi le tracas de la menagerie de leurs cabanes, ioint que desirant leur conserver l'amitié des François, qui traittoient avec eux, nous aurions plus de credit à les conserver ainsi à part, que non pas quand nous serions cabanez parmi eux.

De sorte que s'estans laissez persuader par ces discours & autres semblables, ils nous dirent de prier ce grand Dieu, que nous appel-

lions Pere & nous disions ses seruiteurs , afin qu'il fist cesser les pluyes, qui pour lors estoient fort grandes & importunes , pour pouuoir nous accommoder la cabane que nous desirions : si bien que Dieu fauorisant nos prieres après auoir passé la nuict suyuant dans vne petite cabane au milieu des champs, à le solliciter de ses promesses, il nous exauça, & les fist cesser si heureusement , que nous eulmes vn temps fort serain , dequoy ils furent si estonnez & ravis d'admiration, qu'ils le publièrent pour miracle, dont nous rendimes graces à Dieu. Et c'est qui les confirma dauantage en ceste croyance fut qu'après auoir employé quelques iours à ce pieux travail & mis à sa perfection , les pluyes recommencerent , de sorte qu'ils publièrent par tout la grandeur de nostre Dieu.

Le ne puis obmettre vn gentil debat qui arriua entr'eux, à raison de nostre bastiment, d'vne ieune garçon lequel n'y trouuait pas de bonne volôté, se plaignoit aux autres de la peine & du soin qu'ils se donnoient pour des personnes qui ne leur estoient point parens , & eüst volontiers desiré qu'on eüst delaisé la cabane imparfaicte , & nous en peine de loger à descouuert, mais les autres Sauuages portez de meilleure affection, ne luy voulurent point acquiescer, & le reprirent de sa patesse & du peu d'amitié qu'il tesmoignoît à des personnes si recommandables, qu'ils deuoient cherir comme parens & amys bien qu'estrangers, puis qu'ils n'estoient venus que pour leur propre bien & profit.

Ces bons Sauvages ont ceste loüable coustume entr'eux, que quand quelqu'vns de leurs concitoyens n'ont point de cabane à se loger, ils vnanimement prestent la main & luy en font vne, du moins ils la mettent en tel estat d'aysement de luy mesme il la peut paracheuer: & pour obliger vn chacun à vn si pieux & charitable office, quand il est question d'y travailler, la chose se decide tousiours en plein conseil, puis le cry s'en faict tous les iours par la ville ou bourgade; afin qu'vn chacun s'y trouue à l'heure ordonnée, iusques à entiere perfection l'œuvre, ce qui est vn tres-bel ordre & fort utile pour des Sauvages, que nous croyons sont en effect, moins polis que nous.

Mais pour nous qui leur estions estrangers arriuez de nouveau, comme disoit ce ieune homme, c'estoit beaucoup de se monstrier si humain que de nous en bastir vne, avec vne si commune & vniuerselle affection, veu qu'ils ne donnent ordinairement rien pour rien aux estrangers, si ce n'est à des personnes qui le méritent, ou qui les ayent bien obligez, quoy qu'ils commandent tousiours particulierement aux François, qu'ils appellent Agnonha, c'est à dire gens de fer en leur langue, ou qui se seruent de fer, ou le fer mesme, car ils nommoient quelquefois les haches Agnonha, qu'ils appellent autrement Atouhoin. Les Montagnais nous donnent le nom de Mistigoche, ou, Ouemichtiouchion, c'est à dire vn homme qui est dans vn canot de bois, ou batteau de bois, ou coffre de bois, selon l'interpretation d'aucun. Nom

qu'ils donnerent aux premiers Europeans, qui les aborderent dans des nauires ou batteaux de bois, desquels ils n'auoient iamais veu auparavant, car les leurs ne sont faicts que d'escorces & fort petits. Mais pour le nom que nous donnent les Hurons, il vient de ce qu'auparuant nous, ils ne sçauoient que c'estoit de fer & n'en auoient aucun vsage, non plus que de tout autre metal ou minéral, sinon en quelque endroit ils auoient du cuire rouge, duquel j'ay veu vn petit lingot vers la mer douce, que le Truchement Brulé nous apporta, d'une nation esloignée 80. lieues des Hurons.

Nostre cabane fust bastie à la portée du pistolet de la bourgade, en vn lieu que nous mesmes auions choisi pour le plus commodé, sur le costeau d'un fond, où passoit vn beau & agreable ruisseau, de l'eau duquel nous nous seruions à boire & à faire nostre sagamité, excepté pendant les grandes neiges de l'Huer, que pour cause du mauuais chemin, nous prenions de la neige es enuiron de nostre cabane, pour faire nostre manger, & ne nous en trouuâmes point mal Dieu mercy. Il est vray qu'on passe d'ordinaire les sepmaines & les mois entiers sans boire & sans estre alteré, car ne mangeant iamais rien de fallé ny espicé, & son manger quotidien n'estant, que de ce bled d'inde bouilly en eau, ceste menestre sert de boisson & de mangeaille, & si on peut estre quelquefois alteré, c'est lors qu'on mange de la viande, ou qu'on vay en voyage par terre, & peux asseurer qu'en vn an, que j'ay demeuré aux Hurons,

ie n'y ay pas beu neuf ou dix fois au plus, ce qui me faict dire avec saint Iean Climacus, que le beaucoup boire, vient d'habitude & non de necessité, & par ainsi on peut à bon droit reprendre les grands beueurs, & ne souffrir ce vice à la ieunesse, qui est ordinairement suiuy des autres.

Ie me trouuois aussi fort bien de ne manger point de sel, ny rien de salé, encor que ie n'en eusse point l'habitude, que depuis que i'estois entré aux Hurons, d'où on n'en peut esperer que de plus de trois cens lieues loin. A mon retour en Canada, ie me trouuois mal au commencement d'en manger, pour l'auoir discontinué vn trop long-temps, mais ie m'y suis racoutumé du depuis, ce qui me faict croire qu'il n'est nullement necessaire à la conseruation de la vie, n'y à la santé de l'homme, & qu'aysement s'en pourroit passer qui voudroit, il n'y auroit que de la peine au commencement & point à la fin.

Nostre pauvre cabane pouuoit auoir enuiron vingt pieds de longueur & dix ou douze de large, faicte en la forme d'un berceau de iardin, couuerte d'escorce par tout, excepté au faicte où on auoit laissé vne fente & ouuerture, d'un bout à l'autre de la cabane, pour sortir la fumée, estant acheuée de nous mesmes au mieux qu'il nous fut possible, nous fîmes des cloisons de pieces de bois, separant nostre cabane en trois, dont la premiere partie du costé de la porte nous seruoit de chambre & de cuisine, pour faire tout ce qui estoit de nostre petit

meſnage & pour noſtre repos de la nuit, que nous prenions contre la terre, ſur vne petite natte de ioncs, avec vn billot de bois pour chéuet, & quelques buſches que nous auions accommodées chaoun deuant nos couchés pour n'eſtre veus. Ce lieu nous ſeruoit auſſi de ſalle, pour receuoir & entretenir les Sauvages, qui nous venoient voir iournellement.

La ſeconde chambre, qui eſtoit la plus petite eſtoit celle où nous ſerriſſions nos vſtencilles & petits emmeublemens. Et la troiſieſme, dans laquelle nous auions dreſſé vn Autel avec des piéces de bois piquées en terre, nous ſeruoit de Chappelle, laquelle a eſté la ſeconde qui ſe ſoit iamais baſtie aux Hurons & païs circonuoisins où la ſaincte Meſſe ſe diſoit tous les iours, au grand contentement & conſolation de nos ames, car auparauant nous, ny Preſtres, ny Religieux n'y auoit mis le pied, que le ſeul P. Ioffeph le Caron, qui y dit la premiere Meſſe vers la bourgade de Toenechain. Et peur de la main larronneſſe des barbares, nous tenions les petites portes d'eſcorces toujours fermées & attachées avec des cordelettes, n'ayans pas moyen de les mieux accommoder.

A l'entour de noſtre logis, bien que la terre, fuſt vn peu maigre & ſablonneuſe, nous y accommodames vn petit iardin, fermé de palliſades pour en oſter le libre accès aux enfans. Les pois, herbes & autres petites choſes que nous y auions ſemées, y profiterent aſſez bien & euſſent faiât dauantage, ſi la terre eut eſté bien labourée, mais il nous fallut ſeruir d'vne vieille hache,

hâche en lieu de besche & d'un baston courbé & pointu, pour tout le reste des instrumens.

Si nostre iardin n'estoit point tant bon, nostre cabane estoit encore moindre, car pour auoir esté faicte hors de saison, l'escorce se decieua toute & si fist de grandes fentes, de sorte qu'elle nous garantissoit peu du point des pluies, qui nous tomboient par tout, sans nous en pouuoir garâtir ny le iour ny la nuit, non plus que des neiges pendant l'Hyuer, desquelles nous nous trouuions par fois couuerts le matin en nous leuant. Si la pluye estoit aspre elle nous esteignoit nostre feu, nous priuoit du manger & nous causoit tant d'autres incommoditez que ie puis dire avec verité, que iusques à ce que nous y eumes un peu remedié, qu'il n'y auoit pas un seul petit coin en nostre cabane, où il ne pleust comme dehors, ce qui nous contraignoit d'y passer les nuits entieres sans dormir, cherchans à nous tenir & ranger debouts ou assis en quelque petit coin pendant ces orages, qui tomboient encores sur nous.

Ce nous estoit vne grande incommodité à la verité, mais quand ie considere ce que nostre Seigneur a dit de luy mesme. Les Renards ont des tanières, & les oyseaux ont des nids pour se retirer, mais le Fils de l'homme n'a pas où reposer son chef, ie trouue que nous estions grandement bien logez, & que nous aurions tort de nous en plaindre, car la gloire des vrais freres Mineurs est, d'estre vrayement pauvres avec Iesus. Il n'y a que ceux qui sont pauvres malgré eux, qui deussent se plaindre de l'estre, disoit

Aristides Athenien , car le bon Religieux est toujours content , & se plaint rarement des choses mesmes qui l'oppressent & le mettent en necessité.

La terre nuë ou nos genouïls, nous seruoient de table à prendre nos repas , ainsi comme les Sauvages, non en posture de Singe , mais assis sur des buches de bois, qui estoit quelque chose de plus que les barbares. Les nappes ny les seruiettes ne sont point en vſage en ces pais là, & n'auions autre linge pour essuyer nos doigts après l'eau , que les seules feuilles de bled d'Inde, car nostre linge n'estoit que pour la Chapelle , lequel nous mesnagions fort, pour estre en pais disetteux & esloigné de tout secours. Nous auions quelques coulteaux , mais ils ne seruoient aux repas, pour ce que nous n'auions point de pain à couper , & si rarement de la viande, que nous, auôs passé des six semaines & 2. mois entiers sans en mâger vn seul morceau, que quelques petites pieces de chien, d'ours, ou de renard, qu'on nous donnoit en festin, excepté vers Pasques & en l'Automne, que quelques François nous firent part de leur chasse.

La chandelle de quoy nous nous seruions la nuit, n'estoit que de petits cornets d'escorce de bouleau, qui estoient de peu de durée, & la clarté du feu nous seruoit pour lire , escrire & faire autres petites choses, pendant les longues nuits de l'Hyuer, qui nous estoient fort incommodés.

Nos viandes ordinaires estoient de mesme celles des Sauages, & n'y auoit autre différen-

et sinon à la netteté avec laquelle elles estoient préparées, nous y meslions aussi souuēt des petites herbes champestres, que nous trouuions dans les prairies & par la campagne, cōme de la mariolaine sauuage, de la pourcelene, & d'une certaine espee de baume avec de petits oignons qui donnoit goust à nostre sagamité, les Sauvages n'en vouloient neantmoins point manger, & disoient que cela sentoit trop le mauuais, pour ce qu'ils n'y sent d'aucunes herbes, & par ainsi ils ne nous en demandoient pas, comme ils faisoient lors qu'il n'y en auoit point, & nous leur en donnions volontiers, aussi ne nous en refusoient ils pas en leurs cabanes quād nous leur en demandions, & d'eux mesmes nous en offroient volontairement, mais rarement en acceptions nous, sinon pour leur complaire & ne les point mescontenter.

Si au temps que les bois estoient en seve, nous auions quelque indisposition ou debilité du cœur, on faisoit vne fente dās l'escorce de quelque gros fouteau & avec vne escuelle on amassoit la liqueur qui en distilloit, qu'on beuuoit comme vn remede de bien peu d'effect, & qui affadit plustost qu'il ne fortifie, mais on se sert de tout où la necessité contraint.

Auant que ie partis pour la mer douce, le vin des Messes que nous auions apporté de Kebec, dans vn petit baril de deux pots estant failly, nous en fimes d'autre des raisins du païs, qui fut très bon & boullut en nostre petit baril & en deux autres bouteilles que nous auions, de mesme qu'il eust pū faire en des plus grands

vaiffeaux, & si nous en euſſions encore eu d'autres, il y auoit moyen d'en faire vne aſſez bonne prouiſion, pour la grande quantité de vignes & de raiſins, qui ſont en ce pais là. Les Sauuages en mangent bien le raiſin, mais ils ne les cultiuent point & n'en font aucun vin, pour n'en auoir l'inuention ny les inſtrumens propres. Nostre mortier de bois & vne ſeruiette de noſtre Chappelle nous ſeruiſſent de preſſoir & vn Anderoqua ou ſceau d'eſcorce, nous ſeruit de cuue, mais nos petits vaiſſeaux n'eſtans pas capables de contenir tout noſtre vin nouveau, nous fuſmes contraincts, pour ne point perdre le reſte d'en faire du raiſiné, qui fut auſſi bon que celuy que l'on faiſt en noſtre Europe, le quel nous ſeruit aux iours de recreation, & pour la bien venue des François, à en prendre vn petit ſur la poincte d'vn couſteau.

Des visites des Sauvages & à quelle intention. Leur maniere de saluer. L'estime qu'ils font des François. De la vengeance. De la Nation des testes pellées, & comme nous gouvernions les François & visitions les Sauvages.

CHAPITRE X.

L'Homme est vn animal sociable, qui ne peut viure sans compagnie, mais il faut qu'il fasse election de gens de bien, s'il le veut estre luy-mesme, pource que les esprits se communiquent facilement & nous rendent souvent tels que sont ceux avec lesquels nous frequentons. Avec les Saints vous serez Saints, & avec les peruers vous serez peruertis, disoit le S. Prophete.

Pendant le iour, nous estions continuellement visitez d'un grand nombre de Sauvages & à diuerses intentions; car les vns y venoient comme amis & pour s'instruire de leur salut, d'autres pour auoir le contentement de nous voir & s'entretenir de discours avec nous, quel qu'vns pour observer nos ceremonies & nostre gouvernement. Les enfans pour apprendre leur creâce & les lettres; & d'autres pour nous demander quelque chose, lors principalement que i'y estois, car le Pere Ioseph & le Pere Ni-

Sauvages
nous visi-
toient à di-
uerses in-
tentions.

colas auoient trouué cette inuention pour se dépetrer des Sauuages trop importuns, de leur dire qu'ils estoient pauvres quant à eux, & que tout ce qu'ils auoient m'appartenoit, l'en pensois faire de mesme à leur endroit pour auoir paix, mais estans deux contre moy, ie perdis mon procez & fus tousiours cru riche, & de rien en effect, car tout nostre vaillant ne consistoit qu'à vn peu de rassades, quelques cousteaux & des petites aleines qu'on nous auoit donné à la traicte, pour viure en la campagne, & parmy les nations qui n'auoient point de charité pour nous.

Nous faisoient des
présens.

Il y en auoit plusieurs malicieux, qui ne venoient que pour nous desrober de nos petits emmeublemens sous pretexte de visite, comme d'autres plus charitables, nous apportoient des petits présens de bled d'Inde, citrouilles, fezolles, & aucunes fois des petits poissons boucannez ou frais: & reciproquement nous leur en rendions d'autres, comme aleines, espingles, fers à flèches, ou vn peu de rassade, pour leur col ou leurs oreilles, & comme ils sont pauvres en meubles, quand ils empruntoient de nos chaudorons, ils nous les rendoient tousiours avec quelque reste de sagamité pour remerciement, & s'il escheoit de faire festin pour vn deffunct, plusieurs nous enuoyoient nostre plat, comme ils faisoient au reste de leurs parens & amys.

Nous prioient de
festin.

Ciceron escrit, que Caton le Censeur estant sur le point de mourir, se repentit d'auoir

esté manger chez vn sien amy qui l'en auoit prié, disant qu'il auoit faict en cela, non en bon Citoyen Romain, mais en presomptueux barbare, pour ce qu'à dire vray nul homme vertueux & genereux peut aller manger chez autrui, qu'il ne perde sa liberté & ne mette sa reputation & grauité en tres-grand peril, quoy qu'en puissent dire ceux qui ne cherchent que la bonne chere; sous pretexte d'amitié & de visite Cette raison & plusieurs autres nous empêchoient d'aller que rarement, aux festins des Sauvages desquels ils nous prioient souuent avec instance, mais à la fin nostre retenuë leur seruit de quelque chose, car par ce moyen ils ne perdirent iamais le respect & la croyance qu'ils nous auoient, ny nous la modestie & le bon exemple que leur deuions.

Pour retirer nos François du mal & les induire au bien, nous auions accoustumé de les faire assembler dans nostre cabane toutes les festes & Dimanches, (ceux qui vouloient) & leur remonstrans ce qui estoit de leur deuoir, leur donnions aussi la consolation d'une sainte liberté Chrestienne & religieuse, pour leur seruir d'amorce à la vertu; & ces recreations estoient toutes spirituelles, desquelles mesmes les Sauvages restoient edifiez, comme de les ouyr chanter tous ensemblement, des Hymnes, des Pseaumes & des Cantiques spirituels, à la gloire & loüange de nostre Seigneur.

La veille des Roys, selon qu'il se pratique par toute la Chrestienté, nous tirames au sort

Faisons
assembler
les François.

Fismes une
royauté.

avec des febues du bresil, pour l'election d'un Roy, car iusqu'alors iamais cette ceremonie ne s'estoit pratiquée dans le pais des Hurons. Or comme le sort m'escheut d'estre le premier à qui cest honneur ait arriué, il en fallut faire la ceremonie plus solemnelle & magnifique, aux despens de la communauté, avec vn festin qui n'auoit point de prix, mais qui manqua de vin, car il n'y eut pour toute boisson, que de la belle eau claire, de laquelle peu gouterent: pour les viandes il y eut vn meilleur ordre, les citrouilles n'y furent point espargnées, le bled d'Inde n'y manqua point, & le poisson boucané y fust assez commun, le tout meslé, deminsé, cuit & bouilly dans vne grande chaudiere, de laquelle vn chacun eut à suffisance.

Leur maniere de saluer.

Quant quelque particulier Sauvage de nos amys nous venoient visiter, entrans chez nous, la salutation estoit ho, ho, ho, qui est vne salutation de ioye, & la seule voix ho, ho, ne se peut faire que ce ne soit quasi en riant, principalement quand on leue la derniere syllabe, tesmoignans par là, la ioye & le contentement qu'ils auoient de nous voir; car leur autre salutation *Quoye*, qui est comme si on disoit, quest-ce, que dites vous, se peut prendre en diuers sens, aussi est-elle commune enuers les amis & ennemis, qui respondent de mesme, *Quoye*, ou plus gracieusement, *Tatoro*, qui est à dire; mon amy, mon compagnon, mon camarade, ou disent; *Ataquen*, mon frere, & aux filles

Eadse, ma bonne amie, ma compagne, & quelquesfois aux vieillards, *Taistan*, mon pere, *Houatinoron*, mon oncle, &c.

Mais lors que mes Sauvages de saint Gabriel, nous venoient voir, entrans chez nous, ou les rencontrans par la ville, leur salutation ordinaire estoit *Iesus Maria*, ou plustost *Iesus Mana* ou *Ana* ne pouuans dire mieux, on me dira que la lettre M. est labiale, il est vray, mais les enfans à force de s'y estre exercé la prononçoient assez bien. Je leur auoir appris à prononcer ces diuins Nôs pour salut, afin de les former tousiours au bien, car il faut commencer par les choses les plus aysees, pour arriuer aux plus difficiles.

Ils nous demandoient souuent à petuner, pour espargner le petun qu'ils auoient dans leur sac, car ils n'en font iamais dégarnis: mais comme la presse y estoit grande & que cela sentoit de son auarice, nous ne leur en pouuions donner à tous, & nous en excusions, en ce qu'eux mesmes nous traitoient ce peu qu'en auions, & cette raison rendoit contans les esconduits, mais qui pourroit en auoir assez pour tous, feroit beaucoup pour les attirer tous en vostre cabane, car c'est leur miel, leur sucre, & leur mets plus delicieux.

Le Diable rusé fait le singe par tout, & contrefait mesme les choses les plus saintes, non pour nous ayder, mais pour nous tromper. Il a inuenté des idoles pour contrecarter

Le Diable
singe des
œuvres de
Dieu.

les Images que Dieu, a commandées, & a donné l'inuention d'une maniere de confession aux Indiens du Perou, qui les fait estimer gens de bien par les autres infidèles, comme aux Puritains d'Angleterre, & aux Lutheriens d'Allemagne, l'ombre de quelque ceremonie de l'Eglise Romaine qui leur fait croire; mais faussement, qu'ils sont enfans de Dieu, & que les seuls Calvinistes sont heretiques, cōme il me fut dit en la maison d'un Comte d'Allemagne reprenant une personne Catholique qui s'estoit mise au service de ce Huguenot. Ce malin esprit a contre-fait entre nos Hurons la louable & ancienne coutume que nous auons de saluer de quelque deuote priere ou pieux souhait, celuy que nous entendons éternuer, car ils saluent ceux qui éternuent, non deuotement comme nous, mais avec des imprecations & maledictions qu'ils souhaitent à tous ceux qui leur sont ennemis, ce qui m'estonnoit fort au commencement, & ne pouuois penser qu'autre en fut l'inuenteur que le Diable mesme.

Nous les en auons quelquesfois repris, mais ils ne pouuoient croire qu'il y eut de l'offence pour la hayne irreconciliable qu'ils ont à l'encontre des Nations qui leur sont ennemies, car pour les personnes de leur propre nation ils en sçauent assez bien endurer & supporter un tort ou iniure quand il eschet, & non d'un étranger, duquel s'ils ne se vengent à l'instant mesme pour estre en

lieu où ils ne se voyent les plus forts, & qu'ils semblent dissimuler leur mal talent, ne vous y fiez pas neantmoins qu'à bonne enseigne pour beau semblant qu'ils vous fassent; peur que lors que vous y penserez le moins, ils ne vous prennent au despourueu, & vous rendent au double ce que vous leur aurez presté, non deux coup pour vn, ny deux iniures pour vne, mais la mort pour vn desplaisir, car tuer vn homme ou vn moyneau, n'y a pas grande difference entr'eux & de blesser ou donner vn coup d'aïron, ils ne s'en tiennent pas souuent là, c'est pourquoy il fait bon estre sage par tout, & ne donner suiet à personne de s'offencer s'y on n'en veut estre payé à la fin, comme l'exemple suiuant vous fera voir.

Deux François (comme i'ay rapporté au Chap. 5. du 1. liure) vn peu trop temeraires, offencerét vn iour deux Canadiens assez mal à propos, dequoy ces Canadiens ne firent pour lors aucun semblant, à cause du lieu qui ne faisoit pas pour eux, & dissimulerent cet affront iusques au temps de s'en pouoir venger sans telmoins. Or il arriua à quelque sepmaines de là que ces deux François qui ne pensoient desia plus au desplaisir qu'ils auoient faits à ces deux Sauuages, s'en allerent à la chasse, vers l'Isle d'Orleans, ce qu'estant sçeu par ces Indiens qui ne les perdoient point de memoire, les allerent prendre au despourueu, les assommerent à coups de haches, & ietterent les corps dans la ri-

Exemple
de deux
François
tuez.

uiere, sans qu'on pût sçauoir que long-temps apres qui en auoient esté les meurtriers, à la fin on descourrit les homicides, qui pour cela ne l'aïssoient pas d'estre les bien venus parmy ceux de leur natiō, encore qu'ils s'abstinissent de venir plus à Kebec, peur d'y trouuer leur chastiment.

Les François exageroient prou la faute comme en effet elle estoit tres-grande, & disoient assez la punition que meritoit l'enormité d'une telle meschanceté, mais pour cela les Sauvages ne donnoient ny chastiment ny reprimande à ces meurtriers, qui n'estoient pas gens à ces viandes là, & puis ils sçauoient bien que tost ou tard la faute leur seroit pardonnée, & qu'un present de castors, au pis aller, les garantiroit du supplice, & de la peine qu'on n'a encores osé entreprendre sur eux.

Neantmoins il fut aduisé entre les Chefs François, qu'il falloit monstrier à ces barbares un grand ressentiment de leur faute pour en empêcher d'autres pareilles, & pour cet effet firent assembler en un conseil general, tous les Sauvages qui se trouuerent pour lors à la traite, où les meurtriers ayans esté grandement blasmez, furent en fin pardonnez à la priere de ceux de leur nation, qui promirent un amendement pour l'aduenir, moyennant quoy le sieur Guillaume de Caen general de la flotte, assisté du sieur de Champlain, & des Capitaines de Nauires, prit une espée nue qu'il fit ieter au milieu du

grand fleuve saint Laurens en la presence de nous tous , pour assurance aux meurtriers Canadiens , que leur faute leur estoit entierement pardonnée , & ensevelie dans l'oubly , en la mesme sorte que cette espée estoit perduë & ensevelie au fond des eaux , & par ainsi qu'ils n'en parleroient plus.

Mais nos Hurons qui sçauent bien dissimuler & qui tenoient bonne mine en cette action , estans de retour dans leur pays , tournerent toute cette ceremonie en risée , & s'en mocquerent disans que toute la cholere des François auoit esté noyée en cete espée , & que pour tuer vn François on en seroit dorelnauât quite pour vne douzaine de castors , en quoy ils se trompoient bien fort , car ailleurs on ne pardonne pas si facilement , & eux mesme y seront quelques iours trompez s'ils font des mauuais , & que nous soyons les plus forts.

Pendant l'Hyuer les Ebicerinys se vindrent cabaner au pays de nos Hurons à trois lieues du bourg de saint Ioseph , d'où nous les allions quelquesfois voir , & comme ils sont assez bonnes gens ainsi que j'ay dit ailleurs , ils nous rendoiēt nos visites , & se trouuoient souuent dans nostre cabane , pour nous considerer & s'entretenir de discours avec nous , car ils sçauent les deux langues , la Huronne , & la leur ; quoy que tres-differentes , ce que n'ont pas les Hurons , lesquels ne sçauent ordinairement que la leur ma-

Ebicerinys
cabanez
aux Hurons.

ternelle, sans se mettre en peine d'en apprendre d'autre, ou par negligence, ou pour le peu de necessité qu'ils ont des autres nations ayans dans leur pays presque tout ce qui leur fait besoin, & pour le reste on leur apporte, ou bien ils voyagent en pays connus quoy qu'esloignez, d'où ils rapportent ce qui leur manque.

Ces Sauvages Ebicerinys nous donnerent auis d'une certaine Nation, à laquelle ils vont tous les ans une fois à la traite, n'en estans esloignez qu'environ une Lune ou Lune & demye de chemin, tant par terre que par lacs & riuieres. A laquelle vient aussi trafiquer un certain peuple qui y aborde par mer, avec de grands bateaux ou Nauires de bois, chargez de diuerses especes de marchandises, comme haches faites en queues de perdrix, des bas de chausses avec les souliers y attachez, souples neantmoins comme un gland, & plusieurs autres choses qu'ils eschangent pour des fourures & pelletteries.

**Nation des
testes pel-
lées,**

Ils nous dirent de plus que ces personnes là, ne portoient ny barbe ny cheveux que fort peu, lesquels pour cette raison nous auons surnommez Testes pelées, & nous asseurerent aussi que leur ayans parlé de nous, ils leur tesmoignerent un grand desir de nous voir, ce qui nous fit coniecturer que ce pouuoit estre quelque peuple & Nation policée & habitée vers la mer de la Chine, qui borne ce pays vers l'Occident, comme il est aussi

borné de la mer Océane enuiron les 40. degrez vers l'Orient, & esperions y faire vn voyage à la premiere commodité avec ces Ebicerins, comme ils nous le faisoient esperer moyennant quelque petit présent, si l'obedience ne m'eust rappellé en France: car bien que ces Sorciers ne veuillent pas mener de François seculiers en leur voyage, non plus que les Montagnais, & Hurons au Saguenet, de peur de descouurir leur mesleure & plus excellente traite avec les pays, d'où ils rapportent tous les ans quantité de pelleteries: ils ne sont pas si reseruez en nostre endroit, sçachant desia par experience, que nous ne nous meslons d'aucun autre trafic que de celuy des ames, que nous nous efforçons de gagner à Iesus-Christ, sans interest du temporel.

Quand nous allions en visite chez les Sauvages, ils en estoient bien aysez & la tenoient à honneur & faueur, se plaignans de ne nous y voir pas assez souuent, & c'estoit à qui nous attireroit premier à son foyer, sans trop d'importunite pourtant, car ils tiennent les empressements onereux & de mauuaises graces, & estans assis au milieu d'eux, où ils nous donnoient tousiours bonne place, ils nous escoutoient fort attentiuement, nous interrogeoient fort paisiblement, & se resioissoient fort honnestement, accompagnans souuent ces visites de quelque petit present, ou d'un reste de sagamité, disant: *Chatoronchesta*, avec vous faim, *Sega*, man-

Visitiōs les
sauuages.

gez, mais pour mon particulier i'en prenois fort rarement, tant à cause qu'il sentoit pour l'ordinaire trop le poisson puant, que pour ce que les chiens y mettoient souuent leur nez, & les enfans leur cueillier avec quoy ils mangeoient à mesme.

Presentent
à peiuner.

Comme par deçà l'on presente à boire aux amis, les Sauvages qui n'ont que de l'eau à boire pour toute boisson, & qui boient fort rarement, presentent le petunoir tout allumé à leurs amis, & à tous ceux qui leur rendent quelque visite, & nous tenans en cette qualité, ils nous en presentoient de fort bonne grace. Mais comme ie n'en ay iamais voulu vsfer, ie les en remerciois avec la mesme grace, & n'en prenois nullement, de quoy ils restoient au commencement fort estonnez, pour ny auoir personne en tous ces pays là qui n'en vse, pour à faute de vin, & d'espices, eschauffer cet estomach, & aucunement corrompre tant de cruditez prouenant de leur mauuaise nourriture.

Portions
des rac-
quettes aux
pieds.

Pendant les grandes neiges, nous estions souuent contrains de nous attacher des racquettes sous les pieds, ou pour aller au village, ou pour aller querir du bois, d'autant que n'y ayant sentier ny chemin frayé, nous n'eussions pû facilement nous retirer des neiges avec nos sandales de bois. Les Sauvages en vsent de mesme comme choses aysees, car avec icelles l'on n'enfonce point, & si on fait bien du chemin en peu de temps, & plus qu'on ne feroit sans icelles.

Ces

Ces Agnonra, comme nos Hurons les appellent, sont deux ou trois fois grandes comme les nostres. Les Montagnais, Canadiens, & Algomequins, hommes & femmes avec icelles suivent la piste des animaux qu'ils font harceler & arrester par leurs chiens, puis l'abattent à coups de fleches, & d'espée emmanchées au bout d'une demie picque, qu'ils sçauent dextrement darder : apres ils se cabanent, se consolent & se resiouissent là du fruiet de leur traual, & sans ces raquettes ils ne pourroient courir l'eslan, ny le cerf, & par consequent il faudroit qu'ils mourussent de faim en temps d'Hyuer, si les autres bestes ne suppleoient.

Lors que pour quelque necessité ou affaire particuliere, ils nous falloit aller d'une bourgade en vne autre, nous allions librement loger & manger en leurs cabanes, auxquelles ils nous receuoient & traitoient fort humainement, bien qu'ils ne nous eussent aucune obligation, car ils ont cela de propre d'assister les passans, & recevoir courtoisement entr'eux toute personne qui ne leur est point ennemie : & à plus forte raison ceux de leur Nation, qui se rendent l'hospitalité reciproque, & assistent tellement l'un l'autre, qu'ils pouruoient à la necessité d'un chacun, sans qu'il y ayt aucun pauvre mendiant parmy leurs villes, bourgs & villages, comme j'ay dit ailleurs, de sorte qu'ils trouuoient fort mauuais entendans dire qu'il y auoit en France grand nombre

Logions
dans leurs
cabanes.

de ces necessiteux & mendiants, & pensoient que cela fut faute de charité, & nous en blasmoient grandement, disans que si nous auions del'esprit on donneroit bon ordre à cela, les remedes estans faciles.

Mais comme vne amitié requiert vne autre amitié, & vn don vn autre present, il est plus que raisonnable que nous autres qui leur sommes estrangers, & auxquels ils n'ont aucune obligation, qu'allans loger chez eux, & viuans à leurs despens, nous leur donnions tousiours quelque chose, pour y estre tousiours les biens venus, autrement ils vous estimeroient *Onastey*, c'est à dire, chiche & auare, & à la fin vous n'y seriez pas si bien receus que du passé. Vn peu de petun, de rassades, quelques aleines, ou autres petites choses, vous peuuent conseruer leur amitié, & l'affection de vous receuoir tousiours courtoisement & traicter amiablement, comme i'ay esté par toutes leurs terres.

*Du pays des Hurons , nombre du peuple ,
De leurs villes , villages , & cabanes ,
& comme nous deuons renoncer à nostre
patrie pour viure en paix en celle d'au-
truy.*

CHAPITRE XI.

Bien que nostre vraye patrie soit le Para- Amour du
dis, auquel seul nous deuons aspirer, pays.
& non aux choses de la terre. Si est-ce que
l'amour du pays de nostre naissance nous est
si naturel qu'encores que nous nous voulions
resoudre de l'abandonner, si ne pouuons
nous pourtant l'oublier, disoit le Sertorius
Romain. C'est pourquoy Soerates pour
aucunement moderer l'imperfection & la
passion de cette inclination naturelle, de-
fendit à ses Disciples de dire cestuy-cy, ou
celuy là est mon pays, afin qu'ils ne peus-
sent dire, cecy est à moy, & cela est à toy, pen-
sant par là couper la source de toutes les
querelles, procès, & débats, qui demeure-
roient esteins à son aduis, si toutes choses
estoit possédées en commun.

Et à ce propos Plutarque au liure d'exil, ra-
conte que Hecules le Thebain, ayant esté
interrogé par les Sidoniens de quel pays il

estoit naturel, respondit ainsi. Je ne suis pas de la grande cité de Thebes, ny de la tres-renommée Athenes, ny moins de Lycaonie, ains suis naturel de toute la Grece. Grandement fut estimé par les Grecs cette responce d'Hercules, pour s'estre nommé naturel de Grece. Mais beaucoup plus fut prisée celle de Socrates, ayant esté enquis par le grand Sacrificateur Archites d'où il estoit auquel il respondit: Je ne suis de Thebes comme The-siphonte, ny des Athenes comme Agefilaus, ny de Lycaonie comme Platon, moins de Lacedemone comme Lycurgus, mais suis né au monde, & naturel de tout le monde.

Leçon aux
Religieux.

C'est vne leçon qui deuroit servir à beaucoup & particulièrement aux Religieux, car qu'est-il de besoin que l'on sçache, ce Frere est de ce pays là, de cette ville là, il est de bonne maison, il est pauvre, il est riche, puis qu'ayant renoncé au monde & à tout ce qu'il y pretendoit, il ne doit plus rien auoir à démêler avec iceluy. C'est aussi vne vaine curiosité aux seculiers de s'en vouloir informer, pour esgaler l'honneur qu'ils leur rendent non au pois de leur vertu, mais à l'once de ce qu'ils ont quitté, comme si l'honneur n'estoit deu qu'aux apparences exterieures à l'exclusion des vertus internes, lesquelles Dieu seul cherit sans distinction du pauvre ou du riche.

Or nos Hurons encores barbares n'ont pas esté instruits en vne si bonne escole qu'ils voulussent penser en vn seul Paradis, ils disent franchement leur qualité & au delà, &

croient que ce leur soit honneur de haut
loïer leur pays, quoy qu'assez mal garny en
comparaison de plusieurs autres contrées,
qui se retrouuent plus vers le Sû, mais com-
me il n'est pas encores des pires, ie vous en
feray la description telle que ie l'ay deu sca-
uoir, laquelle vous sera d'autant plus vtile
que vous aurez de volonté d'y voyager.

Premierement il est situé sous la hauteur
de quarante quatre degrez & demy de lati-
tude, & selon aucuns le Soleil se leue fix ou
sept heures plus tard sur leur Orison que sur
celuy de Paris, tellement qu'il est icy enui-
ron six heures du matin, qu'il n'est encor
aux Hurons que vnze heures ou minuit du
iour precedent, si la supputation en est bien
faite, laquelle ie rapporte simplement com-
me ie l'ay apprise.

Ce pays est tres-beau & agreable, fort de-
ferté & trauersé d'estangs, & de lacs, avec
des beaux ruisseaux qui se desgorgent de-
dans ce grand lac, que nous appellons la mer
douce. Il est plein de belles collines, cam-
pagnes, & de tres-belles & grandes prairies
qui portent quantité de bon foin, auquel
les François mettent le feu sur le pied quand
il est sec, non pour en profiter, mais pour se
recreer.

Il y a aussi en plusieurs endroits quantité de Froment &
froment sauvage, qui a l'espic comme seigle, poix saua-
& le grain comme de l'auoine: i'y fust trom- ges.
pé, pensant au commencement que i'en vis,
que ce fussent champs ensemancez de bon

grain : ie fus de mesme trompé aux pois sauvages où il y en a en diuers endroits aussi espais, comme s'ils y auoient esté semez & cultiuez : & pour monstrier euidentement la bonté de la terre, vn Sauvage du village de Toenchen ayant planté dans vn coin de son champ vn peu de pois qu'il auoit apporté de Kebec, rendirent en quantité leur fruitz deux fois plus gros que leur semence, dequoy ie m'estonnay, n'en ayant point veu par tout ailleurs de si beaux.

Belles for-
ests.

Il y a de belles forests, peuplées de gros chesnes, fouteaux, herables, cedres, sapins, ifs, & autres sortes de bois beaucoup plus beaux, sans comparaison, qu'aux autres prouinces du Canada que nous auons veües : & sont tousiours d'autant plus belles, le pays plus beau, & les terres meilleures, que plus on auance tirant au Sû : car du costé du Nord les terres sont plus sablonneuses, le pays plus montagneux, & les forests plus desgarnies de gros bois, sinon de cedres qui croissent mesme iusques dans les veines des rochers comme ie vis voyageant sur la mer douce, pour la peiche du grand poisson.

Prouinces
des Hurons

Il y a plusieurs contrées ou prouinces au pays de nos Hurons qui portent diuers noms, & sont gouvernées par diuers Capitaines ou chefs generaux & particuliers dependans & independans, celle où commandoit le grand Capitaine Atironta s'appelle Renarhonon, celle d'Entauaque s'appelle

pelle Atigagnongueha , & la Nation des Ours qui est celle où nous demeurions sous le grand Capitaine Auoindaon s'appelle Atingyahointan , & en cette estendue de pays il y a enuiron vingt ou vingt cinq tant villes que villages , dont vne partie ne sont point clos ny fermez , & les autres sont fortifiez de longues boises de bois à triples rangs , à la hauteur d'une longue picque entrelassées les vnes dans les autres & redoublées par dedans de grandes & grosses escorces de huiët à neuf pieds de haut , par dessous il y a de grands arbres esbranchez posez de leur long sur les troncs des arbres faits en fourchettes , fort courtes pour les tenir en estat , puis au dessus de ces pallissades & fermetures , il y a des galeries ou guerittes qu'ils appellent Ondaqu , lesquelles ils garnissent de pierres entemps de guerre pour ruer sur l'ennemy , & d'eau pour esteindre le feu qu'il y pourroit appliquer. On y monte par vne eschelle assez mal façonnée & difficile , qui est faite d'une longue piece de bois charpentée de plusieurs coups de haches , pour tenir ferme du pied en montant.

Les villes & villages de nos Hurons sont permanans , & ne se changent point sinon lors que trop esloignez des bois , ils ont de la peine d'en auoir. Et en second lieu quand leurs heritages sont tellement amaigris & desleichez (à faute de fumier)

Transportent leur villages.

qu'ils ne peuvent plus produire leur bled à la perfection ordinaire, ce qui arriue de dix, vingt, trente, & quarante ans, plus ou moins selon les contrées, la bonté des territoires, ou l'esloignement des forests, au milieu desquelles ils batissent tousiours leurs bourgs & villages pour les commoditez qu'ils en recoiuent, car auparauant que tous les bois des environs soient consommés, il y va vn grand temps, de maniere qu'il n'y auroit plus qu'à trouuer l'industrie de fumer les terres, ou de semer en de nouvelles places leur bled d'Inde, qu'ils ont accoustumez de planter tous les ans dans les mesmes trous des années precedentes, qu'ils seroient comme nous, des eternitez en vn mesme lieu, car pour le bois ils ont l'inuention de l'amener en temps d'Hyuer, par sus les neiges, attaché sur de certaines traînées ou planchettes de cedre fort commodement.

Des cabanes.

Leurs cabanes qu'ils appellent Ganonchia, sont faites comme i'ay dit en façon de tonnelles ou berceaux de iardins, couuertes d'escorces d'arbres, longues de vingt cinq à trente toizes plus ou moins, selon qu'il eschet (car elles ne sont pas toutes d'une egale longueur) & larges de six, laissant par le milieu vne allée de dix à douze pieds de large, qui va d'un bout à l'autre de la cabane, aux deux costez de laquelle il y a vne maniere d'estable, qu'ils appellent Endicha, de mesme longueur & de la hauteur

de quatre ou cinq pieds, où ils couchent en Esté, pour euter l'importunité des putes dont ils ont en quantité, & en Hyuer au bas sur les nattes deuant le feu arrangez les vns ioignans les autres pour estre plus chaudement, les enfans au lieu plus commode & les pere & mere après, & n'y a point d'entre-deux ou de separation, ny pied, ny cheuet, non plus en haut qu'en bas, & ne font autre chose pour se reposer, que de s'estendre en la mesme place où ils se trouuent assis, & s'affubler la teste dās leur robe, sans autre couuerture, ny liēt, qui est vne façon de se coucher aysée, & qui se continuē à petit fraiz.

Ils emplissent de bois sec pour brusser en Hyuer, tout le deffous de sēs establies, mais pour les grosses busches, qu'ils appellent Ane-incuny, qui seruent à entretenir le feu posées à terre par l'vn des deux bouts & esleuées de l'autre sur vne pierre, où bout de tizon, ils en font des piles deuant leurs cabanes, ou les serrent au dedans des porches; qu'ils appellent Aque. Toutes les femmes s'aydent à faire ceste prouision de bois, qui se fait dès les mois de Mars & d'Auril, & avec cet ordre en peu de temps chaque mesnage estourny de ce qui luy est necessaire.

Ils ne se seruent que de tres bon bois, ay mās mieux l'aller chercher bien loin, qu'auoir moins de peine & en auoir de mauuais ou qui fasse fumée, c'est pourquoy ils entretiennent tousiours vn feu clair & bien fait avec peu de bois, que s'ils ne rencontrent point d'arbres,

Où ils couchent.

Où ils serrent le bois.

secs à leur gré, ils en abbatent de ceux qui ont les branches mortes, lesquelles ils mettent par esclats & couppent de longueur comme les cotrets de Paris. Pour le fagotage, ils ne s'en seruent point du tout, non plus que du tronc des gros arbres qu'ils abbatent, lesquels ils laissent là pourrir sur la terre faute de scie pour les scier, ou d'industrie pour les mettre en pieces, qu'ils ne soient secs & pourris, pour nous qui n'y prenions pas garde de si près, nous nous seruions du premier venu, sans employer tout nostre temps à en aller chercher si loing, car c'estoit à nous mesmes à y pouruoir, & non aux Sauuagesses, qui ne nous en donnoient que par courtoisie ou par presents reciproquez d'autres de pareille valeur, sinon lors que nous estions logez dans leurs cabanes.

Des cabanes & mesnages.

En vne cabane il y a plusieurs feux, & à chaque feu il y a deux mesnages, l'un d'un costé, & l'autre de l'autre, & telle cabane aura iusqu'à 8. 10. ou 12. feux, qui font 24. mesnages, & les autres moins, selon qu'elles sont longues ou petites, & où il fume à bon escient, qui faict que plusieurs en recoiuent de tres-grandes incommoditez aux yeux, n'y ayant fenestre ny aucune ouuerture, que celle qui est au faiste de leur cabane par où sort la fumée.

Ces cabanes n'ont aucune cloison ou separation, qui puisse empescher de porter sa veüe d'un bout à l'autre & voir ce qui s'y passe, neantmoins ils y demeurent tous en paix & sans aucune confusion ny bruits, chacun dans son departement avec ce qui leur appartient, qui

n'est ny enfermé, ny clos de clefs ou de serrures. Aux deux bouts il y a à chacun vn porche, & ces porches leur seruent principalement à mettre leurs grandes cuues ou tonnes d'escorce, dans quoy ils serrent leur bled d'Inde, après qu'il est bien sec & esgrené. Au milieu de chacun de leur logement il y a deux grosses perches suspendues, qu'ils appellent *Ouaronta*, où ils pendent leur cramaliere, & mettent leurs fourures, viures & autres choses, pour des souris, & pour tenir les choses seichement.

Pour le poisson duquel ils font provision pour leur Hyuer, après qu'il est boucané & bien deseché, ils le serrent en des tonneaux d'escorce, qu'ils appellent *Acha*, excepté *Leinchatnon*, lequel ils n'esuentrent point & le pendent au haut de leur cabane attaché avec des cordelletes pour des souris & d'une mauuaise odeur qu'il rend en temps chaud, telle que personne ne la pourroit souffrir icy.

Crainte du feu, auquel ils sont assez suiets, ils serrent ordinairement ce qu'ils ont de plus precieux dans des tonneaux d'escorces, qu'ils enterrent en des fosses profondes qu'ils font au coin de leur foyer, puis les couurent de la mesme terre, & par ce moyen sont conseruez non seulement du feu, mais aussi de la main des larrons, pour n'auoir autre coffre ny armoire en tout leur mesnage que ces petits tonneaux. Il est vray qu'ils se font fort peu souuent du tort les vns aux autres; mais encore s'y en pourroit il trouuer de meschans, qui vous feroient du desplaisir s'ils en trouuoient l'occa-

Leur cachette.

sion, car l'obiet, esmeut la puissance, dit le Philosophe, & l'occasion fait le larron.

*Des exercices ordinaires des Hurons, & des
pauvres mendiants & vagabons, & com-
me les Canadiens cabanent & courent les
bois.*

CHAPITRE XII.

Du travail.

CE bon Legislateur des Atheniens Solon, fist vne Loy, d'ont Amasis Roy d'Egypte auoit esté iadis Auteur; laquelle obligeoit vn chacun de monstrier tous les ans d'où il viuoit par deuant le Magistrat, autrement à faute de ce faire il estoit puny de mort. Et le bon Empereur Marc Aurelle, faisant mention de l'ancienne diligence des Romains, escrit qu'ils s'employeroient tous avec telle ardeur aux labours & travaux, qu'ils ne peurent oncques trouuer en toute la Cité de Rome vn homme oisif, pour porter vne lettre à deux ou trois iournées.

C'estoit vne occupation sans exemple & qui tesmoignoit le bon ordre de leur Republique, dans lesquelles on ne doit iamais souffrir ceux qui pouuans gagner leur vie par vn honneste travail, ne font mestier que de volleries & brigandages, comme cela n'est que trop ordinaire par toute la France & particulièrement à Pa-

ris, où souuent ils passent pour honnestes gens, mais le pis est que comme ils ne se contentent pas de la mediocrité à laquelle ils preferent le luxe & la delicatesse, ils mettent souuent vostre vie en hazard, pour l'auoir avec la bource.

Les Chinois desquels nous deurions imiter les Loix (quoy que Payens) ont aussi trouué l'inuention de bannir d'entr'eux les faincants & paresseux, par vne ordonnance inuiolablement obseruée, à tous les pauures, sous tres-griues peines, de mandier par les ruës, & à qui que ce soit de leur donner, n'y ayant que les seuls Religieux Chinois à qui il est permis de quester, & chercher leur vie de porte en porte, comme par deçà les FF. Mineurs.

Loix des
Chinois
contres les
faincants.

Mais pour ce qu'il sembleroit que ce seroit tout à fait bannir la charité & l'humanité du milieu d'eux, ils ont des Hospitaux Royaux en grand nombre par tout le Royaume, pour loger, nourrir, & entretenir les vrayz pauures, s'entend ceux qui n'ont aucun moyen de traualler & gagner leur vie, & non les autres qui peuuent faire quelque chose, lesquels sont contraincts de seruir pour leurs despens, ce qui est plus que raisonnable, car qu'elle apparence y auroit il de nourrir du bien des pauures, ceux qui ont de la santé assez pour n'estre point pauures & viure honnestement accommodé.

C'est pour la mesme raison que les Aueugles n'y sont point exempts de traualler, ny admis dans les Hospitaux, s'ils ne sont vieux & cassez, & ne leur est non plus permis de tracasser &

Les Aueu-
gles sont
employez.

mandier par les rues, ny par les Temples, comme ils font à Paris, au grâd destourbié de ceux qui prient Dieu. Mais on les oblige chez les Cordiers & Potiers d'estain, pour tourner les rouës, & faire plusieurs autres exercices où il ne faut point d'yeux. Nous voyons mesmes nos vieilles Hurônes, qui pour auoir la veuë debile, ne demeurent pas pour cela tousiours oysseuses; elles s'employent d'elle mesmes à esgrener le Maiz hors des épics, à filer, pleurer les morts, & à plusieurs autres petites occupations compatibles à leurs infirmitéz.

Estropiez
employez

On employe les manchots & estropiez en d'autres choses selon leurs incômoditez, & les culs de iattes à faire des espingles & esguilles, à coudre des habits & faire plusieurs autres petits exercices des mains. Mais pour les playez & ulcerez, il est croyable qu'ils y sont moins frequens que par deçà, puis que la mendicité leur est interdite, & que s'ils entrent dans les Hospitaux, leurs playes sont visitées & eueillées de près, pour euiteir aux tromperies & artifices, desquels plusieurs gredins & caymans vzent, pour entretenir leurs playes & tirer la quinte-essence des boudées. Que si on y prenoit garde de près, on feroit souuent icy des miracles sans miracles, en des personnes que l'œil gueriroit sans médicament, & m'estonne comme à Paris, & aux autres bonnes villes de la France, il n'y a des Chirurgiens gagez pour y donner ordre, puis que les abus y sont si frequens que personne n'en peut douter, du moins les vrayz pauvres & malades seroient

secours & les trompeurs chastiez ou banis.

Nos Sauvages ne sont point en peine de dresser des Hospitaux pour les malades, ny de deffendre la mandiciré aux vagabonds, car chacun a soin de ces malades, & aucun n'est tellement vagabond qu'il doive viure aux despens d'autrui. Ils ne sont point neantmoins si exacts obseruateurs, que d'employer le temps avec vn soin si particulier des anciens Romains, mais encores ont ils quelques occupatiōs & exercices particuliers, ausquels ils s'adonnent & employent aucunement le temps. Les hommes vont à la chasse, à la pesche, à la guerre, à la traite, & font des cabanes & canots ou les outils propres à cela; le reste du temps à la verité ils le passent en oyfueté, à iouier, dormir, chanter, dancier, petuner, ou aller en festin, & ne veulent s'entremettre d'aucun ouurage qui soit du deuoir de la femme sans grande necessité, & par ainsi iouissent de beaucoup de repos qu'on ne iouyt pas icy.

Ce n'est pas neantmoins en cela que consiste leur bon-heur, principalement, mais c'est en ce qu'ils n'ont aucune passion pour les biens & richesses de la terre, qu'ils possèdent comme ne les possedans point, ainsi que dit l'Apostre. N'ont aucun procès, noises ou débats, pour les deffendre, & ne scauent que c'est de condamnation, de luges, de tailles, subides, ny de prison, que pleust à Dieu qu'ils fussent conuertis, mais à mesme temps qu'ils seront faiets Chrestiens, ie crains bien fort qu'ils perdront leur simplicité & repos, non que la Loy de Dieu

porte ceste necessité, mais la corruption glissée entre les Chrestiens se communique facilement entre les barbares conuertis, qui succent avec la doctrine des Saints, le mauuais esprit de ceux qui les frequentent.

Ils ont l'exercice du ieu tellement recommandable & coustumier, qu'ils y employent vne bonne partie du temps qui leur reste des autres occupations plus serieuses, ausquelles ils s'addonnent assez peu souuent, & que la necessité ne les y contraigne. Ils sont fort beaux ioueurs & patiens, car encorés que la chance ne leur en die point, ils ne s'en faschent pas, & perdent aussi gayement du moins exterieurement, que s'ils estoit en chance, dont i'en ay veu quelqu'un s'en retourner en leur village tout nuds, chantans alaigrement après auoir tout perdu au nostre, & est vne fois arriué qu'un Canadien perdit (après toutes les hardes) & sa femme & ses enfans contre le sieur Du Pont Graué, lequel les luy rendit après volontairement, & de fort bonne volonté, car il n'eust pas voulu se charger d'un tel attirail, qui luy eust apporté plus de peine que de profit, & neantmoins, il estoit en luy de les retenir sans que le Sauvage l'eut pû trouuer mauuais.

**Ieu des
Sauuages.**

Les hommes ne s'adonnent pas seulement au ieu de ioncs nommé *Aescara*, qui sont trois ou quatre cens petits ioncs blancs, également coupez de la grandeur d'un pied ou enuiron, mais aussi à plusieurs autres sortes de ieu, côme de prendre vne grande escuelle de bois, & dans

icelle

icelle auoir cinq ou six noyaux ou petites bou-
lettes vn peu plattes de la grosseur du bout du
petit doigt & peintes de noir d'vn costé &
blanche ou iaune de l'autre, & estans tous assis
à terre en rond, à leur accoustumée, prennent
tour à tour selon qu'il eschet, ceste escuelle
auec les deux mains qu'ils esleuent vn peu de
terre, & à mesme temps l'y reposent & frap-
pent vn peu rudement, de sorte que ces bou-
lettes se remuans, ils voyent comme au ieu des
dez de quel costé elles se reposent & si elles
font pour eux ou non, & pendant que celuy
qui tient l'escuelle la frappe & regarde à son
ieu, il dit continuellement & sans intermission,
Tet, Tet, Tet, Tet, pensant que cela excite &
faict bon ieu pour luy; encor que cela ne sert
que d'vn amusement, plus tolerable que les
choleres de nos ioueurs de cartes & de dez,
qui s'emporent à leurs premieres passions.

O bon Iesus, il n'y a pas iusqu'à vn tas de
mauuais garçons, qui ne cessent de blasphemer
au ieu, comme si offencer vn Dieu nous deuoit
faire profiter ou plustost perir dans ses disgraces.
Ah mal-heureux! qui as pris l'habitude de
iurer, tous les vices doiuent estre abhorrez,
mais celuy du blaspheme plus que tous les au-
tres, car il n'y a vice qui ne puisse causer quel-
que delectation & non iamais le blaspheme, &
par consequent moins excusable que les
autres, qui tous nous meinent à la damna-
tion.

Pour le ieu ordinaire des femmes & filles, *Ieu des*
auquel s'entretiennent aussi par fois des hom- *femmes.*

mes & garçons avec elles, est particulièrement avec cinq ou six noyaux, comme ceux de nos abricots, noirs d'un costé & jaunes de l'autre, lesquels elles prennent avec la main comme on faict les dez, puis les iettent vn peu en haut, & estans tombez sur vne peau qui leur sert de tapis, elles voyent ce qui faict pour elles, & continuent à qui gagnera les coliers, oreillettes, ou autres bagatelles de leurs compagnes, & n'ont jamais de monnoye d'or ou d'argent, car ils n'en ont aucune cognoissance ny vsage, de maniere que quand il est mesme question de trafique ou achapt de marchandise, ils ne font qu'eschanger vne chose pour vne autre.

Portent les
momons,

Je ne puis obmettre aussi qu'ils pratiquent en quelqu'vns de leurs villages, ce que nous appellons en France porter les momons: car ils enuoyent le cartel de defy aux autres villages, pour les faire venir iouer avec eux & gagner leurs vstencilles s'ils peuuent, & cependant les festins ne manquent point, car pour la moindre occasion la chaudiere est sur le feu, particulièrement en Hyuer, qui est le temps auquel principalement ils festinent & se resiouissent ensemblement pour passer plus doucement la rigueur de la saison.

Aiment la
peinture,

Ils aiment la peinture, & y reussissent assez industrieusement pour des personnes qui n'y ont point d'art, ny d'instrumens propres, & font des representations d'hommes, d'animaux, d'oyseaux & autres grotesques, tant

en relief, de pierres, bois, & autres semblables matieres, qu'en platte peinture sur leur corps, qu'ils font non pour idolatrer, mais pour contenter leur veüe, embellir leurs callumets & orner le deuant de leurs cabanes.

Pendant l'Hyuer, du filet que les femmes & filles ont disposé, les hommes en font des Font des filets à pescher. rets & seines pour pescher & prendre le poisson iusques sous la glace, par le moyen des trous qu'ils y font en plusieurs endroits, dont en voicy la methode.

Ils font à grands coups de hache vn trou assez grandelet dans la glace d'un lac ou de la riuiere; ils en font d'autres plus petits, d'espaces en espaces, & avec des perches ils passent vne fiscelle de trous en trous par-dessous la glace: ceste fiscelle aussi longue que les rets qu'on veut tendre, se va arrester au dernier trou, par lequel on tire, & on estend dedans l'eau toute la rets qui luy est attaché. Quand on les veut visiter, on les retire par la plus grande ouuerture, pour en recueillir le poisson, puis il ne faut que retirer la fiscelle pour les retendre, les perches ne seruans qu'à passer la premiere fois la fiscelle.

Ils font aussi des fleches avec le cousteau fort droictes & longues & n'ayans point de cousteaux, ils se seruoient anciennement des Font des fleches, pierres tranchantes, & les empennent de plumes, de queue & d'aisles d'Aigle, par ce qu'elles sont fermes & se portent bien en l'air. Ils accommodent la pointe avec de nos fers

qu'on leur traicte à Kebec, ou bien avec vne pierre acérée qu'ils collent dans le bout de la fleche fendüe avec vne colle de poisson tres-forte. Ils font les cordes de leurs arcs, avec des boyaux ou nerfs d'animaux, de mesme celles des raquettes, qui leur seruent pour aller sur la neige au bois & à la chasse, puis des massues de bois pour la guerre, assez bien faictes, & des pavois de cedre, qui leur courent presque tout le corps, & d'autres plus petits faicts de cuir bouilly.

Ils font aussi des voyages par les lacs & riuieres, qui sont frequentes dans le pais, iusques en des nations fort esloignées, où ils traictent & eschangent de leurs marchandises pour d'autres, qui leur sont besoin & desquelles leur pais manque, mais ils n'entreprenent pas ordinairement ces voyages de longs cours, inconsideremment & sans en auoir premierement eu la permission des Chefs, lesquels en vn conseil particulier, ont accoustumé d'ordonner tous les ans, la quantité d'hommes qui doivent partir de chaque ville ou village, pour ne les laisser desgarnis de gens de guerre, & quiconque vouldroit partir autrement le pourroit faire à toute rigueur, mais il en seroit blasmé & estimé mal aduisé & inciuil.

J'ay veu plusieurs Sauuages des villages circonuoisins venir au bourg S. Ioseph, demäder congé au Capitaine Onorotandi, frere du grãd Capitaine Auoindaon, pour auoir la permission d'aller au Saguenay : car il se disoit Maistre supérieur des chemins & riuieres qui y condui-

sent, s'entend iusques hors le païs des Hurons. De mesme il falloit auoir la permission & con-
gé d'Auindaon, pour aller à Kebec, & comme
chacun entéd d'estre le maistre en son païs, aussi
ne laissent ils passer aucun d'une autre nation
par leurs terres, pour la traicte, sans estre reco-
gnus & gratifiez de quelque present : ce qui se
faict sans difficulté, autrement on leur pourroit
donner de l'empeschement & faire du desplai-
sir, si on vouloit.

Sur l'Hyuer que le poisson se retire sentant
le froid, comme au mois de luillet & d'Aoust
sentant le chaud, les Sauvages errants comme
sont les Canadiens, Algomquins, Etéchemins
& autres, quittent les riués de la mer & des ri-
uières & se cabanent dans les bois, là où ils sca-
uent qu'il y a de la venaison. Pour nos Hurons,
Honquerons & autres peuples sedentaires, ils
ne quittent point leurs villes & villages, que
pour les raisons que i'ay deduites cy-dessus, au
chapitre precedent.

Lors que ces peuples errants ont faim, ils con-
sultent l'Oracle, & après s'en vont l'arc en la
main & le carquois sur le dos, la part que leur
Medecin leur a indiqué, ou ailleurs où ils pen-
sent ne point perdre leur temps. Ils ont des
chiens qui les suyuent, & nonobstant qu'ils n'a-
yent point, toutesfois ils scauent fort bien
descouvrir le giste de la beste qu'ils cherchent,
laquelle ayant trouuée ils la poursuient cou-
rageusement & ne l'abandonnent iamais qu'ils
ne l'ayent terrassée, & en fin l'ayant naurée à
mort, ils la font tant harceler par leurs chiens,

qu'il faut qu'elle tombe, lors ils luy ouurent le ventre, baillent la curée aux chiens, festinent & emportēt le reste. Que si la beste pressée de trop près rencontre vne riuiera, la mer, ou vn lac, elle s'eslance librement dedans, & nos Sauuages après où ils luy donnent le coup de la mort s'ils ont des canots prest, comme ils firent à Gaspey, vn iour auant mon arriuée.

Or pour ce que plusieurs pourroient penser qu'estans les Montagnais errants, ils viuent en bestes en leur hibernement, ie vous ay icy mis l'ordre qu'ils y tiennent, qui est vne coustume loüable, car voulans se departir & courir les montagnes & les bois, ils font vne reueuë de la quantité de femmes vefues, petits enfans & de personnes qui ne peuuent auoir leur vie par le moyen de la chasse, & les departent par les familles egalelement, ostans des enfans où il y en a beaucoup, pour les mettre où il y en a moins, & ainsi des autres personnes inutiles. Et pour ce qui est des hommes & garçons capables de la chasse, s'il y a quelque famille qui en manque, on en tire de celles qui en ont trop, pour en accommoder de moins accommodées. Il n'y a que les filles de mauuaise vie, à qui on a peine de trouuer place, pour autant qu'elles sont en opprobre parmy ceux de leur nation, comme les filles desbauchées icy.

Tout cest accommodement estant fait, si les neiges sont assez hautes, ils donnent ordre qu'en chaque famille il se fasse des traînes de bois, d'environ vn pied de large, & huit ou dix de long, vn peu courbées par le bout de

deuant, sur lesquelles ils chargent tous leurs paquets viures & emmeublement avec les petits enfans, qui ne peuuent marcher, si les meres n'ayment mieux les porter sur leur dos emmaillottés sur vne petite planchette, à la façon de nos Huronnes, & en ceste maniere courent les bois s'ils ne prennent les riuieres.

Estant arriuez au lieu où ils doiuent camper. Les ieunes femmes & filles ayans la hache en main vont par ces grandes forests, couper quinze ou vingt perches, plus ou moins, selon la grandeur de la cabane qu'ils ont à faire. Cependant les vieilles femmes & aucunes fois les hommes, en ayans designé le plan, vident la neige avec leurs pelles, qu'ils font & portent expres pour ce suiet. La place se faict ronde ou en quarré à la volonté du maistre Architecte, profonde selon la hauteur des neiges de deux, trois, iusques à quatre pieds, de maniere, que la neige leur sert comme d'une muraille qui les enuironne de tous costez, excepté par l'endroit où on la fend, pour faire la porte que l'on tient fort basse.

Les perches estans apportées on les plante sur le haut de la neige, puis on iette sur ces perches qui s'approchent vn peu par en haut, quatre ou cinq rouleaux decorces cousues ensemble commençant par le bas, comme font les recouureurs des maisons, la neige que l'on a à dos, est après couuerte de petites branches de cedre ou de pin, de-

quey la maison est aussi pauée, haute ou basse selon qu'il eschet, car en aucunes on s'y tient facilement debout & en d'autres non. L'huis du logis n'est autre qu'une meschante peau d'Eslan attachée à deux perches, qui seruent de porte, dont les iambages du palais, sont la neige mesme, soustenue de quelque bois.

Je ne scay si l'on pourroit assez exagerer la peine & les incommoditez que l'on souffre dedans ces chetifs palais, où l'on experimente par fois les deux extremittez, vn extreme chaud tel que l'on est à demy rosty, ou vn extreme froid, tel que l'on est à demy glacé, & puis les chiens vous importunent sans cesse pour auoir place aupres de vous, mais la fumée selon les vents en est insupportable, comme la faim quand la chasse n'est pas bonne, vn autre puisant diuertissement d'esprit.

S'ils n'ont dessein que demeurer vne seule nuit en vn mesme lieu, ou deux, ou trois au plus, ils n'y apportent point tant d'invention, particulièrement lors qu'ils n'ont point de petits enfans, car à peine font ils de cabanes, & si ce sont chasseurs, ils se contentent de coucher sur la neige au pied d'un arbre, ou pour le plus ils font vn trou dans la neige, auquel ils font du feu & se couchent aupres, dormant là aussi gaillardement, que nous scaurions faire icy sur vn bon liect.

Ils se cabanent ordinairement plusieurs menages ensemble, & ne se seruent que d'un feu à deux, à la maniere de nos Hurons, mais il y a cela

de différeçe que nos cabanes Huronnes sont bonnes & solidés, grandes & spacieuses, & pour ce ordinairement froides si on n'en bouchoit les aduenues, là où les Montagnaites sont petites, basses, reserrées, & facilement eschauffées, si on y apporte tant soit peu de foin.

J'ay admiré les grands voyages que nos Montagnais, & Canadiens font quelques-fois, tant par mer, par les riuieres, que par terre, pour traiter les marchandises qu'ils ont eues des François, ils vont iusques vers les Flamands du costé de la Virginie, & en la Virginie mesme, où sont habitez les Anglois, & en beaucoup d'autres pays du costé du Saguenay, par des chemins fort difficiles & dangereux, & entreprendront (chose incroyable) d'aller dix, vingt, trente & quarante lieues par les bois, sans rencontrer ny sentiers, ny cabanes, & sans porter aucuns viures, sinon du petun, & vn fuzil, avec l'arc au poing, & le carquois sur le dos. S'ils sont pressés de la soif, & qu'ils ne rencontrent point d'eau ils ont l'industrie de faire vne fente dans l'escorce des plus gros fouteaux qui sont en feuë, & en succent la douce & agreable liqueur qui en distile, comme nous fouldions faire pour semblable necessité, & les affadiffemens & debilité du cœur.

Les escorces de bouleau avec quoy ils cabanent sont enuiron de 8. à 9. pieds de longueur, & enuiron trois pieds de largeur qu'ils portent roulées comme vne peau de

parchemin, ayant aux deux bouts à chacun vne baguette platte cousüe qui les tiennent en estat & les empeschent de faire de faux plis.

Des canots Pour leurs canots ils font assez petits, mais lors qu'ils en ont besoin de plus grands ils traitent des chaloupes Françoises, avec lesquelles ils vont libremēt sur les riuages de la mer, comme ils font encores avec leurs petits canots, mais avec moins d'assurance, ceux de nos Hurons sont de huit & neuf pas de long, & enuiron vn pas, ou vn pas & demy de large par le milieu, & vont en diminuant par les deux bouts comme la nauette d'un Tessier, & ceux là sont des plus grands qu'ils fassent, car ils en ont encores d'autres plus petits desquels ils se seruent selon l'occasion & la difficulté des voyages qu'ils ont à faire.

Ils sont fort suiers à tourner si on ne les sçait bien gouuerner, car ils ne sont simplement faits que d'escorce de bouleau renforcés par le dedans de petits cercles de cedre blanc bien proprement arrangez, & sont si legeres qu'un homme seul en porte aysement vn sur sa teste, ou sur son espaule, comme ils font ordinairement par la campagne. Chacun peut porter la pesanteur d'une pippe plus ou moins, selon qu'il est grand ou petit, & si l'on fait aussi d'ordinaire par chacun iour, quand l'on est pressé 25. ou 30. lieues dedans pourueu qu'il ny ait point de faut à passer, qu'on aille au gré du vent & de l'eau,

car ils vont d'une vitesse & legereté si grande que ie m'en estonnois, & ne pense pas que la poste pût guere aller plus viste, quand ils sont conduits par de bons nageurs.

Ils vont à la traicte en de certaines Nations, d'où ils rapportent de grosses coquilles de limaçons de mer, qu'ils rompent par petits morceaux, & les polissent sur vn grès ou autre pierre dure, fort industrieusement les vnes en quarré gros comme vne noix, & les autres vn peu en rondeur gros comme vn pois chiche & plus, qu'ils percent avec ie ne sçay quel instrument avec grand peine & travail pour la durescé de ces os desquels ils font des chaines & brasselets. Les Capitaines & quelques particuliers en sçauent si bien accommoder leur petunoirs, que vous diriez que ce soit l'œuvre d'un excellent graueur, tant ces petits grains de pourcelaine y sont gentiment enchassez.

On auoit tasché de leur faire passer de l'ynuoire pour de la pourcelaine, mais il n'y a pas eu moyen pour ce que la pourcelaine est tout autrement dure, blanche & luisante quel'ynuoire, & par ainsi aysée à discerner. Les Brasiliens, Floridiens & autres peuples & nations Americaines en vsoient anciennement, auant la venuë des Espagnols, & de quoy ils faisoient autant d'estat pour se parer que nous faisons icy des perles fines, mais à present ils portent leur pensée bien plus haut à mesure qu'ils descouurent de plus grandes richesses, & qu'ils ont changé de maniere de

des vignols

viure, & embrasse nostre Religion.

Quand nos Hurons ont leur petunoir ou calumets de terre rompus, ils prennent vne pierre trenchante, & d'icelle se font tant de taillades sur le bras qu'ils en tirent du sang suffisamment pour tremper les deux bouts du calumet rompu; puis les presentent vn peu au feu, & apres les reioignent & laissent seicher à loisir. C'est vn secret d'autant plus admirable que les pieces recollées de ce sang, sont apres plus fortes que les autres qui n'ont point receu de fraction. Il me semble qu'on en dit de mesme d'une iambe rompuë bien remise.

L'admirois egallement ce secret avec leur patience, car vous eussiez dit qu'ils decoupoient la chair d'un autre, ou qu'ils fussent sans sentiment, car ils ne faisoient pas vne petite mine, mais e'estoit encor bien d'avantage de les voir eux-mesmes consommer vn morceau de tondre ou de mœlle de sureau allumé sur leur bras nuds comme si rien ne les eut touché, & apres nous monstroient les marques & cicatrices de leur brulure qui leur restoient pour tousiours sur les bras. Ce sont ordinairement les ieunes garçons qui s'adonnent à ce ieu là pour estre estimez courageux; car pour les grands ils ont fait leur experience, & se mocquent de quelque douleur que ce soit pourueu qu'elle ne les oblige au liét.

Pendant que ie demeurois aux Hurons l'on me fit recit d'un François, aussi peu sage

qu'il vouloit estre estimé patient, lequel estant deffié par vn Sauvage à qui pourroit mieux endurer le feu, se firent attacher leur deux bras nuds par les coudes & par les poignets avec des ligatures, puis mirent vn gros charbon de feu allumé entre-deux, & le soufflerent tant (chacun de son costé) qu'ils le consommerent, car qui eut retiré son bras ou secoué le feu, eut esté estimé moins courageux, tant y a que tous deux en sortirent à leur honneur, mais au despens de leur propre chair qui commençoit à se griller.

Experience
d'un Fran-
çois & d'un
Sauvage.

P'eusse volontiers demandé à ce François s'il en eut bien voulu souffrir autant pour l'amour de Dieu, qu'il auoit fait pour sa vanité, mais ie crains bien fort qu'il m'eut dit que non, & que Dieu n'auoit point tant de credit chez luy, aussi y a il plus de barbarie que de metire en toutes ces actions là, si elles ne sont faites purement pour l'amour de Dieu, ou pour s'exercer au martyre, comme nous lisons qu'ont faits autrefois de nos Saints Freres, fols selon le monde, & sages selon Dieu.

Des femmes , & en quoy s'occupent ordinairement les Huronnes.

CHAPITRE XIII.

Vertus des
femmes.

C'Est vn tres-excellent honneur à la femme d'estre appellée le Sexe deuot dans les Sainctes lettres ; mais la plus rauissante loüange que luy puisse attribuer le Sage, est de l'appeller le support des pauures, la consolation des affligez, & le refuge des indigens. Où il n'y a point de femmes le pauvre gemit, dit Salomon : nous voulant donner à entendre, que les pauures n'ont que faire où n'y a point de femmes, & de fait nous les voyons plus secourables que les hommes, ont plus de compassion, sont plus charitables, & frequentent d'auantage les Sacremens, les Hospitiaux, & les prisons, personne n'en peut douter, puis que leurs pratiques ordinaires, & les exercices continuels des sainctes femmes, en sont des tesmoignages plus que suffisans. Je ne parle pas seulement des femmes de mediocre condition, & qui ne peuent apprehender l'horreur des cachots, n'y la puanteur des Hospitiaux, mais des Dames les plus releuées de condition iusques à la Reyne mesme la plus excellente & vertueuse Princesse de la terre, laquelle abaissant la hauteſſe de sa dignité

Pieté de la
Reyne.

Royale, fait quelquefois l'office des plus vertueux & deuots Religieux, enuers les pauvres agonisans, aux Hospitaux, & en lieux où elle se rencontre, les encourage à la mort, les exhorte à la patience, & au resouuenir des douleurs qu'un Dieu a souffert pour nous en Croix. C'est cette tres-admirable Princesse qui d'un profond ressentiment de son ame, nous dit vn iour dans son petit cabinet; O mon Dieu, falloit il que les Religionnaires passassent la mer pour ayder à perdre les ames des Canadiens, que ces bons Religieux taschent de conuertir à Dieu, par leurs prieres & bons exemples.

Il est vray qu'il ne se voit rien de comparable à vne femme vraiment deuote & spirituelle, elle entreprend tout pour l'amour de son espoux Iesus Christ, elle souffre tout pour le mesme amour, puis vous la voyez tantost faire l'office de Marte, puis celuy de Magdelene. Elle sçait mesnager ses heures pour tous & les donne toutes à Dieu, car soit qu'elle vaque à l'Eglise, à son mesnage, en compagnie, ou rendre les visites, comme son intention est sainte, tous ses pas & ses actions sont contées deuant Dieu; mais que ne peut la grace enuers celles qui ont bonne volonté, puis que la nature vitiée de son origine peut meime par frequens actes, changer nos mauuais inclinations en de bonnes habitudes, & nous rendre de vicieux vertueux, comme les anciens Philosophes nous ont fait voir en l'honnesteté de leur vie, & en la pa-

tience aux iniures & au mespris qu'ils enduroient mieux que nous.

Que pleust à Dieu que le nombre des bonnes femmes fust le plus grand nombre; les pauvres ne seroient plus pauvres, & les affligez desolez, car chacun trouueroit support en la pauvreté, & consolation dans ses detresses, le Ciel nous feroit ouuert, & verrions à la fin vn Dieu, qui fait plus d'estat de l'humilité d'une pauvre femmelette, que de la science d'un Docteur indigent.

Je neveux neantmoins point tellement releuer la vertu propre & naturelle des femmes au dessus de celle de l'homme, que ie n'accorde qu'il y en a de tres-mauuaises, mondaines, auares, & criardes comme des furies, mais peu en comparaison des bonnes à mon aduis

**Exercices
des femmes
Huronnes**

Nos Huronnes bien que Payennes sont à la verité vn peu trop desbauchées, mais au reste elles ont les mesmes aduantages de celles d'icy; Elles font paisiblement leurs petites ouurages, & s'occupent à ce qui est de leur charge & office, sans que iamais on y entende aucune noise ou debat, quelque faict qui leur en puisse arriner.

Elles trauaillent ordinairement plus que les hommes, encores qu'elles ny soient point forcées ny contraintes. Elles ont le toin de la cuisine & du mesnage, de semer & cultiuier les bleds, faire les farines, accommoder le chanvre, & les escorces, & de faire la prouision de bois necessaire. Et pour ce qu'il reste
encor

encor beaucoup de temps à perdre, elles l'employent à iouer, aller aux dances, & festins, à deuiler & se recreer, & faire tout ainsi comme il leur plaist du temps qu'elles ont de reste, qui n'est pas petit, puis que tout leur mesnage ne consiste qu'à mettré le pot au feu, & à quelque, petit fatras, n'estans obligées à tout ce qui est du trauail exterieur, comme estoient iadis les femmes d'Egypte, lesquelles exerçoient la marchandise, tenoient tauerne, & faisoient tout ce qui est de l'office des hommes, au lieu que leurs marys viuoient en faineants & dormoient en paresseux.

Elles n'assistoient non plus en aucun de leurs conseils, ne sont admises en plusieurs de leurs festins, & n'ont la pêne de faire les cabanes & canots, n'y plusieurs autres choses qui sont du debuoir de l'homme, où les Canadiennes & Montagnaites au contraire, ont vne particuliere obligation de coudre les canots avec de l'escorce apres que les hommes en ont fait le corps, tistres les raquettes apres qu'ils en ont fait le bois, ce sont elles qui vont querir les animaux, apres que les chasseurs les ont tuez, les escorchent & passent les peaux, bref ce sont elles qui vont querir le bois qu'ils bruslent, font la cuisine, & ont le soin de tout le mesnage. Ce sont elles aussi qui mettent la chaudiere à bas, distribuent les portions & seruent le mary le premier, puis elles & ses enfans selon leur uage.

I'ay appris cette autre petite particularité des Montagnais, que les ieunes filles à marier, & les femmes, qui n'ont point encore eu d'enfans n'ont rien en maniemment, & ne mangent point dans les plats de leurs marys, c'est à dire qu'on leur fait leur part comme aux enfans. S'il arriue qu'ils s'y rencontrent quelque François du commun, il est seruy le dernier. Si des Religieux les seconds apres le mary, où aux Hurons i'estois seruy le premier en la cabane de mon Sauvage.

Mais les Montagnaites à ce que i'ay pû apprendre sont vn peu friandes, car s'il y a vn bon morceau c'est ordinairement pour elles, particulièrement le py des ieunes esclans femelles, desquels elles ne font point de part à leurs marys, & leur sont comme maistresses en plusieurs choses.

Ie ne sçay si elles sçauent filer, mais nos Huronnes ont trouué l'inuention de filer le chanure sur leur cuisse, n'ayant pas l'usage de la quenouille ny du fuseau, & de ce filet les hommes en font leurs rets, & seines pour la pesche, mais en telle quantité qu'ils en trafiquent encore à nos Montagnais, & en plusieurs Nations estrangeres pour d'autres marchandises. Lors que ie vis pour la premiere fois de ces hommes assis en guenon contre terre, laisser les rets, le bout attaché à l'vn des bois de leur cabane, ie leur demanday si c'estoit là de l'ouurage des hommes (car ie ny voyois point

travailler les femmes) ils me dirent que ouy, sinon que les femmes leur en accommodoient le filer. Elles pillent aussi le maiz pour la cuisine, & en font de rostis, duquel elles tirent la fine fleur pour leurs marys, qui vont l'Esté trafiquer en des Nations éloignées.

Le mortier dans quoy elles pillent le bled, est fait d'un gros tronc d'arbre d'herable ou d'autre bois dur, couppé de mesure, haur de deux pieds, qu'elles creussent petit à petit avec des charbons, ou du tondre ardent, qu'elles entretiennent dessus, & le renouvellent tant qu'il soit assez large & profond, puis ont des bastons longs de six à sept pieds, & gros comme le bras, qui leur seruent de pillons plus faciles que s'ils estoient plus courts, ainsi que j'ay expérimenté, car c'estoit assez souvent qu'il nous falloit battre nous mesme nostre bled d'Inde pour viure, & pour traiter nos François qui nous venoient voir, aux festes pour la sainte Messe, & peu souvent pour se confesser, sinon quelqu'un.

Elles ont l'industrie de faire de fort bons pots de terre, qu'elles cuisent dans leur foyer fort proprement, & sont si forts qu'ils ne se cassent point au feu sans eau comme les nôtres, mais ils ne peuvent aussi souffrir longtemps l'humidité ny l'eau froide, qu'ils ne s'attendrissent & ne se cassent au moindre heurt qu'on leur donne, autrement ils durissent beaucoup. Les Sauvageſſes les font

prenans de la terre propre, laquelle elles nettoient & pétrissent très-bien entre leurs mains, & y mélangent, ie ne sçay par quelle science, vn peu de graiz pillé parmy, puis la masse estant reduite comme vne boule, elles y font vn trou au milieu avec le poing, qu'elles agrandissent tousiours en frappant par dehors avec vne petite palette de bois, tant & si long-temps qu'il est nécessaire pour les parfaire: ces pots sont de diuerses grandeurs, sans pieds & sans ances, & tous ronds comme vne boule, excepté la gueulle qui sort vn peu dehors.

Font des
nattes de
ioncs.

A la fin de l'Automne, elles font des nattes de ioncs, & de feuilles de maiz, dont elles garnissent les portes de leurs cabanes pour se garantir du froid, & d'autres pour s'asseoir dessus, le tout fort proprement. Les femmes des Cheueux releuez, y apportent encore quelque autre chose de plus gentil, car elles baillent des couleurs aux ioncs, si viues, & font des compartimens d'ouvrages avec telle mesure, qu'il ny a que redire, & de quoy admirer, mesme entre nous.

Elles corroyent & adoucissent les peaux des castors, d'ellans, de cerfs, de loutres & autres, avec la mesme perfection qu'on sçauroit faire icy, desquelles elles font leurs manteaux & brayers, & y peignent des passemens & bigarures de diuerses couleurs, qui leur donnent fort bonne grace, & trompent souuent l'œil & la pensée des nouueaux

venus, tant ils semblent naturels, egaux & bien faits.

Elles font semblablement des paniers de Font des
rions, & d'autres avec des escorces de bou- paniers.
leaux, puis des hottes & tonneaux, dans
quoy elles serrent leurs prouisions. Elles
font aussi comme vne espece de gibeciere de
cuir ou sac à petun, sur lesquels elles font
des ouurages digne d'admiration, avec du
poil de porc espic coloré & teint en rouge,
noir, blanc, & bleu, cramoisy, qui sont
les couleurs qu'elles font si viues, que les no-
stres ne semblent point en approcher.

Les Hurons & Canadiens font bien les Font des
escuelles de nœuds de bois, pour ce que cela escuelles.
est de longue haleine, mais les femmes s'ex-
ercent à faire celles d'escorces, pour boire
& manger, & dresser leurs viandes & pota-
ges. De plus, les escharpes, carquans & bras-
selets qu'elles & les hommes portent, sont
de leurs ouurages : & nonobstant qu'elles
ayent beaucoup plus d'occupation que les
hommes, lesquels trenchent du Gentilhomme
entr'eux, encores aiment elles grandement
leurs marys, vivent par ensemble fort
douceement, ne s'ympatientent iamais contre
leurs enfans, ne querellent point leurs voi-
sins, & ne sçauent que c'est de iurer, de ma-
niere que dans vne cabane où il y aura peut-
estre dix ou douze mesnages, à peine y en- Paix au
tendrait-on vn seul petit bruit, & s'ils rient mesnages
ou se recreent, c'est tousiours avec de la re- des Sauua-
tenuë, & non point à gorge desployée, car ges.

toutes leurs ioyes, leurs ieux, de mesmes que les pleurs & lamentations des femmes Canadiennes, qui se barbouillent de noir au temps des funeraillles, se font & tiennent tousiours dans vn modeste & honnesteste comportement de la voix & des pieds, tellement que s'ils estoient Chrestiens, il n'y a point de doute, que Dieu se plairoit avec eux, mieux qu'avec nous miserables qui le chassons de nos maisons, par nos tumultes, nos querelles, & nos debats, qui ne trouuent iamais de fin parmy la pluspart des familles Chrestiennes. C'est pourquoy i'ay bien peur qu'à la fin il ne nous arriue le chastiment des Iuifs, desquels les pechez ont esté la gloire des Gentils, disoit l'Apostre, car perseuerans dans nos malices & impietez, le Soleil de Dieu nous sera osté, la vraye Religion sera arrachée du milieu de nous, nous n'aurons plus de foy, & tout sera pour les peuples barbares qui se rendront dignes du Paradis à nostre exclusion.

*Comme ils defrichent , sement , & culti-
uent les terres , & comme ils faisoient
anciennement cuire leurs viandes dans
des chaudières de bois & d'escorces.*

CHAPITRE XIV.

TV mangeras ton pain à la sueur de ton
visage, & non point à la sueur d'au-
truy, dit le Seigneur en la Genese, car Dieu
n'approuue point les faineans, n'y ceux
qui veulent faire bonne chere aux des-
pens d'autruy. J'ay long-temps pratiqué,
& encore plus admiré la maniere de viure
de nos Hurons, & Canadiens, à la verité
estrange à ceux qui n'y sont point accou-
stumez, mais admirable, & telle que tous
les pauvres necessiteux qui sont par tout en
tres-grand nombre, la deuroient imi-
ter dans l'honnesteré, puis que souuent
faute de preuoyance & d'inuention, ils
se trouuent reduits & accablez sous le
pesant faix d'une extreme pauureté, de
sorte qu'ils viuent languissant, & meu-
rent sans pouuoir mourir, au lieu que
nos Barbares dans vn pays sauuage & peu
cultué, viuent contans, gays & ioyeux,

& tellement satisfait, qu'ils ne croient pas vne autre vie meilleure que la leur, & neantmoins elle ne consiste entre nos Sedentaires, qu'au bled d'Inde principalement, lequel il sçauent tellement bien diuersifier, & accommoder en diuerses fauces dans la pure eau, qu'ils y trouuent du goust, de la delicatesse, & vne nourriture plus que suffisante pour les maintenir forts, & les conseruer en santé.

Et ne faut point alleguer que les pauvres ne sont point accoustumez à cette vie sauuagesse, & que ce seroit leur prescrire vne maniere de viure bien miserable, puis qu'ils en meinent souuent vne autre plus deplorable, qui est de mourir de faim, & de viure en langueur. Les Sauuages sont hommes comme nous, & de mesme nature, & moy-mesme ay vescu de leur seule viande, sans sel, sans pain, & sans vin, plus d'vne bonne année entiere, sans me trouuer mal ny incommodé qu'un petit du cœur, auquel ie suis suiet naturellement, & non de leur viande.

Ne dites donc point que ces viandes sont incipides, & de peu de goust, il suffit qu'elles sont capables de nourrir l'homme, & le tirer de la necessité. Et quoy les riches ont ils tousiours les viandes au gré de leur appetit, helas il y en a qui les destrempent souuent dans les larmes, & les amertumes, ausquels sont suiets les plus esleuez, mortifiez vous donc pour l'amour

de Dieu, & destrempez tous les grains de ce bled d'Inde dans les playes & les douleurs d'un Iesus, nay pauvre & mort pauvre pour vous, & ie vous assure de sa part, que les choses qui vous auront semblé ameres & difficiles au commencement, vous seront à la fin douces & faciles.

Diogenes disoit, que la vertu ne peut habiter en cité ny en maison riche, c'est donc vne grande disposition à la vertu que la paupreté, laquelle estant bien prise, nous rend imitateur de celuy qui a dit de luy mesme. Les renards, & les oyseaux ont des nids & des tanieres pour se reposer, mais le Fils de l'homme n'a pas où reposer son chef. Les Sauvages errants plus misérables que les sedentaires, sembleroient à la verité imiter en quelque chose nostre Seigneur, en ce qu'ils n'ont aucune demeure arrestée, provision, ny rente assurée, mais ils ne sont pas Chrestiens, & n'ont point Dieu pour objet de leurs actions, cest pourquoy il n'y a point de merite pour eux, ny de recompense à recevoir, au contraire des vrayes Chrestiens pauvres, qui peuvent en toute action agrandir leur couronne & leur merite. Ayans la nourriture & les vestemens pour nous couvrir, nous nous contentons, disoit l'Apostre à son disciple Timothée.

Chaque mesnage de nos Hurons & Canadiens, tant de ce peu qu'il a, vit de ce qu'il peut pescher, chasser & semer, car toutes les terres, forests & prairies non defrichées, sont en commun, & est permis à qui veut de les defricher & ensemençer, & cette terre ainsi defri-

chée, demeure à la personne autant d'années qu'il la cultive, & estant entierement abandonnée du maistre, s'en sert par apres qui veut & non autrement.

Ils les defrichent avec grand peine & travail, pour n'auoir des instrumens propres & commodes, car nos Hurons n'ont pour tout outils que la hache & la petite pelle de bois, faicte comme vne oreille, attachée par le mollet au bout d'un manche, où celles de nos Montagnais ressemblent aucunement à celles des batteliers vn peu creusées.

Ils esmondent les branches des arbres qu'ils ont coupez, & les bruslent au pied d'iceux, & par succession de temps en ostent les racines, puis les femmes nettoient bien la terre & bescchent de deux en deux pieds ou peu moins, vne place en rond, où elles sement au mois de May à chacune neuf ou dix grains de maiz, qu'elles ont premierement choisi, trié & fait tremper par quelque iours dans de l'eau, & continuent ainsi tant qu'ils en ayent assez pour deux ou trois ans de prouision, soit pour la crainte qu'il ne leur succede quelque mauuaise année, ou bien pour l'aller traicter & eschanger en d'autres nations, pour des pelleteries, ou autres choses qu'il leur font besoin, & tous les ans sement ainsi leur bled aux mesmes places & endroits, qu'elles rafraischissent avec leur petite pelle de bois, le reste de la terre n'est point labourée, ains seulement nettoyée des meschantes herbes, de sorte qu'il semble que ce soient sous chemins, tant ils sont soigneux de tenir

tout net, ce qui estoit cause qu'allant par fois
 seuls de nostre village à vn autre, ie m'esgarois
 ordinairement dans ces champs de bled; plu-
 tost que dans les prairies & forests.

Le bled estant donc ainsi semé, à la façon que
 nous faisons les febues, d'un grain fort seulemēt
 vn tuyau ou canne, & la canne rapporte deux
 ou trois espics, & chaque espic rend cent, deux
 cens, quelquefois 400. grains, & y en a tel qui
 en rend plus. La canne croist à la hauteur de
 l'homme, & plus, & est fort grosse, (excepté en
 France & mesme en quelque endroit du Ca-
 nada, où il ne vient pas si bien ny si haut, ny le
 grain n'est du tout si bon qu'au pais de nos Hu-
 tons & es contrées plus meridionales.) Le
 grain meurt en quatre mois, & en de certains
 lieux en trois: après ils le cueillent, & le lient
 en paquets par les feuilles releuées cōtre mōt,
 qu'ils pendent arrangez le long des cabanes du
 haut en bas, en des perches accommodées en
 rattelier, qui descendent iusqu'au bord deuant
 les estables, & tout cela si proprement aiancé,
 qu'il semble que ce soient tapisseries tendues
 le long des cabanes, & le grain estant bien sec
 & bon à serrer, les femmes & filles l'esgrent,
 nettoient & mettent dans des sacs ou tonnes à
 ce destinées & posées en leur porche, ou en
 quelque coin de leurs cabanes.

Ils sement aussi force citrouilles du pais, &
 les esleuent avec grande facilité, par ceste in-
 uention. Les femmes Huronnes en la saison,
 vont aux forests voisines amasser alentour des
 vieilles souches, quantité de poudre de bois

Maniere de
 semer les
 citrouilles.

pourry, puis ayans disposé vne grande caisse d'escorce, y font vn liét de ladicte poudre, sur lequel ils sement de la semence de citrouilles, qu'ils couurent apres d'un autre liét de la mesme poudre, & sur icelle sement derechef des semences, iusques à 2. 3. & quatre fois autant qu'ils veulent, en telle sorte neant moins qu'il y reste encor plus de quatre ou cinq bōs doigts de vuide dans la caisse, pour donner lieu au germe des semences, apres ils couurent la caisse d'une grande escorce, qu'ils posent sur les deux perches suspenduës à la fumée du feu, laquelle eschauffe petit a petit tellement ceste poudre & en suite les semences, qu'elles germent en fort peu de iours, estant grandelettes & propres à planter, on les prend par bouquets avec leur poudre, on les separe, puis on les plante dans les champs en lieux disposez, d'où apres on en cueille le fruit en sa saison.

Pain des
Hurons.

La moisson du bled estant faicte, nos Sauvages en vsent en diuerses façons, car pour le manger en pain ou petits gâteaux, ils luy font premierement prendre vn bouillon dans de l'eau, puis l'essuyent & font vn peu seicher: ensuite apres ils le broient dans le grand mortier, & paistrissent avec de l'eau tiede comme on faict la paste, de laquelle ils font des petits gâteaux espais d'un bon ponce, qu'ils font cuire sous les cédres chaudes, enuoloppez de feuilles de bled, & a faute de feuilles le lauent & nettoient apres qu'il est cuit: s'ils ont des fezoles ils en font cuire dans vn petit pot, & en meslent parmy la paste sans les escacher, ou bien des

raizes, des bluës, framboises, meures champêtres, & autres petits fruiçts secs & verts, pour luy donner goust & le rendre meilleur; car il est fort fade de soy, si on n'y mesle de ces petits ragousts.

Ils font encor d'une autre sorte de pain, que nous appellions pain masché; ils cucillent vne quantité d'espics de bled, auant qu'il soit bien sec & meur, puis les femmes, filles & enfans avec les dents en destachent les grains, qu'ils creientent avec la bouche dans de grandes escuelles, qu'elles tiennent auprès d'elles, après on l'acheue de piler dans le grand mortier: on en pestrit la paste, & en faict des tourtelets qu'on enuoloppe dans des feuilles de bled, pour les faire cuire sous les cendres chaudes à l'accoustumée; ce pain masché est le plus estimé entre eux, mais pour moy ie n'en mangeois que par nécessité & à contre cœur, à cause que le bled auoit esté ainsi à demy masché, pilé & pestry, avec les dents des femmes, filles & petits enfans. Ils font vne troisieme espece de pain, qu'ils appellent d'un nom particulier Coinkia, car les autres susdits, avec celuy duquel nous vsons par deça, & mesmes le biscuit, ils l'appellent Andataroni; ils reduisent la paste comme deux balles iointes ensemble, les enuoloppent de feuilles qu'ils lient par le milieu d'une cordelette, avec laquelle ils auallent ce pain dans vne chaudiere d'eau bouillante, & l'y laissent prendre plusieurs bouillons, estant euit, ils l'en retirent & le mangent sans le faire passer par le feu.

Ce pain de maiz & la sagamité qui en est faicte, est de fort bonne substance & nourrit merueilleusement, comme on peut voir en ce que ne beuuant iamais que de l'eau pure, mangeant peu souuent de ce pain, encore plus rarement de la viande, n'v sans presque que des seuls sagamitez, avec vn bien peu de poisson, on se porte fort bien, & si tous ces apprests se font à fort peu de frais, sans qu'il y ait necessité d'y adiouster de la viande, du poisson, beurre, sel, huyle, herbes ou espices, si on ne veut, car ce bled porte presque toute la sauce quand & luy, c'est ce qui me fait souhaiter d'affection, d'en voir beaucoup de terres cultivées en France, pour le soulagement des pauures, qui y sont par tout en tres-grand nombre, & vont tousiours multiplians à mesure que les miseres du siecle croissent.

Ils le diuersifient & accommodent en plusieurs façons, pour le trouuer bon en menestre & potage, car comme nous sommes curieux de diuerses sauces pour contenter nostre appetit, aussi sont ils soigneux d'inuenter de nouuelles manieres d'accommoder leur menestre, dont i'ay traité amplement en mon premier volume, intitulé le grand voyage des Hurons, imprimé à Paris, chez Denis Moreau rue S. Iacques, où ie renuoye ceux qui s'en voudront seruir & vser de ce bled pour leur viure.

Nos Hurons se seruent aussi des vieux os de poisson reduits en poudre, pour donner goust à leur sagamité, quand ils n'ont autre chose à mettre dans leur pot, mais les Canadiens &

Algoumequins souverainement plus gueux, magent iusques à la raclure des peaux d'Esslans & de Castors, qu'ils reduisent en masse dure comme pierre, i'y fus trompé, car pensant auoir traicté vn morceau de viande boucannée des Algoumequins, qui estoient venus hyuerner à la Prouince des Ours, elle deuint à force de bouillir ce qu'elle estoit auparauant, tellement que personne n'en pû manger & la fallut ieter. Ils font aussi pitance de glands, qu'ils font bouillir en plusieurs eaves pour en oster l'amertume, & les trouuois assez bons: ils mangent aussi aucunes fois d'une certaine escorce de bois cruë, ressemblant à la saulx, de laquelle i'ay mangé à l'imitation des Sauvages; mais pour des herbes ils n'en mangent ny cuites ny crues, sinon de certaines racines qu'ils appellent Sondhratates & autres semblables.

Auparauant l'arriüée des François au païs Chaudiere de bois;
des Canadiens, Montagnais & Algoumequins, tout leur meuble n'estoit que de bois, d'escorces & de pierres, de ces pierres ils en faisoient les haches & cousteaux, & du bois & de l'escorce ils en fabriquoient toutes les autres vstenciles & pieces de mefnage, & mesme les plats, chaudières, bacs, ou auges à faire cuire leur viande, laquelle ils faisoient cuire ou plustost mortifier en ceste maniere.

Ils mettoient vne quantité de grais ou cailloux dans vn grand feu, puis les iettoient tous bruslans dans le plat ou chaudiere d'escorce pleine d'eau, en laquelle estoit la viande ou le poisson à cuire, & à mesme temps les en reti-

roïet, & en remettoïët d'autres en leur place, & à succession de temps, l'eau s'eschauffoit & cuisoit aucunement la viande, de laquelle ils faisoient après leur repas.

Il y a eu de mesme des Religieux, qui mesprisans le fer & l'airain, se seruoïët de pots de bois. Il y en auoit vn en Egypte, qui réplissoit vn pot de bois, l'exposoit aux rayons du Soleil, lequel rassemblant ses rayons en vn, à cause de la concavité du pot, eschauffoit aysement la partie intérieure, si bien que ce pot de bois venoit à bouillir & cuire les viandes, sans neantmoins que ceste ardeur le bruslat: ceste inuention estoit bonne seulement en Esté, & lors que le Soleil dardoit à plomb ses rayons sur la terre, mais l'autre methode inuentée par nos Sauvages, se pouuoit pratiquer en toute saison & à toute heure, ayans de l'eau, du bois & du feu.

Pour les Hurons & autres peuples sedentaires, ie croy qu'ils auoient, comme ils ont encores, l'usage & l'industrie de faire des pots de terre, d'as quoy ils cuisoïët leur viande chair ou poisson, comme i'ay dit au chapitre vnziesme. Quelqu'vns ont voulu dire, ce que i'ay peine à croire veu l'usage des bacs & auges susdits, que les Montagnais auant la venue des François, auoient encor le mesme usage de faire des pots de terre, lesquels ils auoient quitté du depuis, pour se seruir de nos chaudières, & que leurs haches estoient comme celles des autres peuples vne pierre trenchante, accommodée dans vn baston fendu, avec quoy ils abbattoient les bois, comme nous en labourions nostre petit iardin.

à l'indinet au païs des Hurons , où toutes sortes d'outils nous manquoient , fors la hache, les cousteaux & les chaudrons, que nous y auions porté de Kebec.

On remarque aussi qu'eux & les Algonmequins, ont autrefois labouré les terres & habité en des bourgades comme nos Hurons, mais du depuis les Hiroquois leurs ennemis mortels les en ayans dechassez, ils furent contraincts courir les bois, & se rendre vagabonds & errants parmy les terres, fuyans la persecution de leurs ennemis, lesquels s'estans saisis de leurs bourgades les fortifierent , & depuis abandonnerent, ne les ayans pû conseruer, comme il se voit encore en vn lieu sur la haute terre, qui est auprès de nostre petit Couuent, que l'on appelle le fort des Hiroquois.

De leurs festins & conuiues tant de paix que de guerre, & des ceremonies qu'ils y obseruent.

CHAPITRE XV.

Svetone Tranquile, raconte que l'Empereur Octaue Auguste defendit à Rome l'exercice du ieu, & que nul ne peut inuiter autrui à manger chez soy, pour autant disoit-il; qu'aux ieux, aucun ne s'abstient de blasphemer contre les Dieux, & aux festins de maledire

de son prochain, ce que ce victorieux peuple observa religieusement vn long-temps, plus admirable en cette victoire de foy mesme, se priuant de son propre contentement, pour obeir aux loix, que d'auoir subiugué l'ennemy par le fer où les plus vicieux peuuent remporter de signalées victoires, pendant qu'eux mesmes se laissent vaincre de leurs propres appetits.

Je ne voudrois pas néanmoins absolument condamner les honnestes entretiens & petites recreations, qui se font quelquefois entre parens & amis par vn pieux diuertissement, puis que cela sert à entretenir l'amitié & beneuolence mutuelle, comme vn autre sobauecs enfans, mais il faudroit qu'ils imitassent ceste mesme vertu & l'exemple, nō de quelques auares Chrestiens, mais des anciens Payens, qui donnoient aux pauures & souffreteux, les reliefs de leurs festins & banquets, qui par ce moyen se rendoient meritoires où les nostres sont ordinairement vicieux.

Le Philosophe Aristide en vne oraison qu'il fist des excellences de Rome dit: que les Princes de Perse, auoient ceste coustume de ne s'affoir iamais à table pour disner ou soupper, iusques à ce que aux portes de leurs Palais, leurs trompettes eussent sonné, & ce afin que là, toutes les vefues & orphelins s'y assemblasent, pour ce que c'estoit vne ley entr'eux, que tout ce qui demeueroit des tables royales fust pour les personnes necessiteuses. Et Plutarque en sa politique confirmant la mesme

chose pratiquée entre les Romains, dit : qu'ils ordonnerent, que tout ce qui demeureroit des banquets & conuiz, qui se faisoient és nopces & triumphes, fut donné aux pauvres, veſues & orphelins.

Voila des Loix qui ne doiuent point eſtre appellées payennes, bien qu'ordonnées & pratiquées par les Payens meſmes, mais pluſtoſt religieuſes & Chreſtiennes, puis qu'elles ſont fondées en charité, de laquelle nous faiſons particulierement profeſſion ; en receuant le baptême.

Nos Sauvages, à la verité, ne ſont pas gens de ſi grande chere, qu'ils ayent beſoin de faire ſonner leurs tortuës, pour inuiter les pauvres à venir manger les reſtes de leurs feſtins, car outre qu'ils n'ont point de pauvres, ils n'ont auſſi point de ſuperflu. Ce n'eſt pas comme és maiſons de beaucoup de riches auaricieux, leſquels s'ils traittent leurs amis avec quelque abondance, ils ſe ſeruent des reliefs à leurs autres repas, & n'en ſont point de part aux pauvres que les vers & la putrefaction ne les y contraignent. Action digne de chaſtiment & non point de merite, car on ne doit rien donner aux pauvres, qui ne ſoit honneſte & bon s'il ſe peut, autrement ceſte offrande eſt reiectée de Dieu, comme celle de Cain, qui donnoit le pire de ſon troupeau en ſacrifice, où le bon Abel faiſoit choix du meilleur, imité à preſent de pluſieurs bonnes dames, & de perſonnes de merite, qui ſe priuent ſouuent des mets les plus delicieux de leur table, pour en faire part aux

pauvres malades & necessiteux, qu'ils enuoyét visiter iusques dans les cachots & où ils sçauent qu'il y a de la necessité.

Quand quelqu'un de nos Canadiens ou Hurons, veut faire festin à ses amis, il les enuoye inuiter de bonne heure comme l'on fait icy, mais personne ne s'excuse là, dont vous en voyez tels, sortir d'un festin pleins comme un œuf, qui du mesme pas s'en vont à un autre, où ils se racheptent s'ils ne peuvent manger, car ils tiendront à affront d'estre esconduits s'il n'y auoit excuse vraiment legitime, & que ce fut un festin à tout manger.

Comme ils
vont en
festin.

Le monde estant inuité, on met la chaudiere sur le feu, grande ou petite selon la quantité des viandes & le nombre des personnes qui doiuent estre de la feste, tout estant cuit & prest à dresser, on va derechef faire la seconde semonce, par ces mots Montagnais, comme à la premiere fois Kinatomigaouin, ie te prie de festin, & s'ils sont plusieurs Kinatomigaouinaon, ie vous prie de festin, lesquels respondent ho ho ho, & entr'eux Ninatomigaouinano, nous sommes priez de festin. Mais les Hurons disent d'un ton plus graue & puissant en inuitant au festin; Saconcheta Saconcheta (qui est un mot qui ne derine point neantmoins du nom de festin, car agochin entr'eux, veut dire festin) lesquels s'y en vont à mesme temps avec leur escuelle & la cueillier dedans, qu'ils portent grauement deuant eux avec les deux mains. Si ce sont Algomquins qui fassent le festin, les Hurons portent leurs escuelles garnies d'un peu

de farine pour mettre dedans le brouet, à raison que ces Aquanaques en ont fort peu souvent, & puis c'est leur coustume.

Entrans dans la cabane chacun s'assied sur les nattes ou la terre nuë, ou pour le plus sur de petits rameaux d'arbres ou de cedre, les hommes au haut bout & les femmes en suite, également des deux costez iusques au bas. Tout estant entré on dit les mots, après lesquels il n'est permis à personne d'y plus entrer, soit-il des conuiez ou non, ayans opinion qu'autrement il y auroit du malheur en leur festin, qui est ordinairement faict à quelque intention, bonne ou mauuaise.

Les mots du banquet sont prononcez hautement & intelligiblement deuant toute l'assemblée par le maistre du festin, ou vn autre à ce député, en ces termes: vous qui estes icy assemblez, ie vous fais sçauoir que c'est N. qui faict le festin, nommant la personne & l'intention pourquoy il est faict, & tous respondent du fond de l'estomach, ho. puis poursuivant sa harangue dit les mots qui precedent le manger, à sçauoir: Nequare, la chaudiere est cuite, & de mesme tout le monde respond, ho, en frappant du poing contre terre, Gagnenon youri, il y a vn chien de cuit: si c'est du cerf, ils disent Sco noton youri, & ainsi des autres viandes, nommant l'espece ou les choses qui sont dans la chaudiere, les vnes après les autres, & tous respondent ho, leuans la derniere sillabe à chaque fois, puis frappent du poing contre terre d'autant plus gaillardement qu'ils estiment ce fe-

stin & l'excellence des viandes, qui leur doivent estre servies.

Les Montagnais ont cela de particulier, qu'en disans les mots du festin, ils annoncent aussi si c'est vn festin à tout manger, car quand ce n'est pas à tout manger ils remportent le reste chacun à sa cabane, pour leur femmes & leurs enfans, qui est vne coustume loüable.

Cela faict les officiers vont de rang en rang prendre les escuelles de tous, les vnes après les autres, qu'ils emplissent du brouet avec leurs grandes cueillieres, & recommencent tousiours à remplir, tant que la chaudiere soit nette, & si c'est vn festin à tout manger, il faut qu'un chacun auale tout ce qu'on luy a donné, & s'il ne peut pour estre trop saoul, qu'il se rachapte de quelque petit present enuers le maistre du festin & fasse acheuer son escuelle par vn autre, tellement qu'il s'y en trouue, qui ont le ventre si plein, qu'il leur bande comme vn tabourin.

Ce grand Philosophe Platon cognoissant le dommage que le vin apporte à l'homme, quand il est pris avec excez, disoit : qu'en partie les Diex l'auoient enuoyé ça-bas, pour faire punition des hommes, & prendre vengeance de leurs offences, les faisans (après qu'ils sont yures) quereller & se tuer l'un l'autre ; comme il n'arriue que trop souuent par deça, entre gens de petite condition & de petit esprit. Chose si hideuse, que pour en faire abhorrer le vice, les Lacede-

moniens souloient faire voir à leurs enfans, leurs esclaves pleins de vin.

Or nos barbares en leurs festins sont exempts de ses malheurs là Dieu mercy, car on n'y presente iamais ny vin, ny biere, ny citre, & si quelqu'un demande à boire, ce qui arrive fort rarement, on luy donne de l'eau toute claire, non dans vn verre, mais dans vne esuelle ou à mesure le chaudron, qu'il auale gaillardement, & par ce moyen sont exempts d'iuognerie, qui est vn grand bien & pour le corps & pour l'esprit, car il est croyable, que s'ils auoient l'usage du vin, qu'ils se rendroient intemperés comme nous, & puis feroient des furieux, comme on a veu en quelques Montagnais, coëffez d'eau de vie que les Matelots leur traitent.

Nos Sautiages ont ie ne sçay quoy de prudent & venerable dans leurs desbauches, qu'ils ne s'emancipent point aysement en parolles & disputes, vont aux festins d'un pas plus modeste & representans ses Magistrats, s'y comportent avec la mesme modestie & silence, & s'en retournent en leurs maisons & cabanes avec la mesme sagesse: de maniere que vous diriez voir en ces Messieurs-là, allant à leur brouet, les vieillards de l'ancienne Lacedemone.

Valerius Leo, donnant vn iour à soupper à Iules Cesar en la ville de Milã, seruit à table des asperges où l'on auoit mis d'une huyle de senteur, au lieu d'huyle commun, il en mâgea simplement sans faire semblant de rien, & tança ses amis qui s'en offendoient, en leur disant qu'il leur deuoit bien suffire de n'en manger point si

Modestie
de Iules
Cesar.

cela leur faisoit mal au cœur, sans en faire honte à leur hôte, & que celuy qui se plaignoit estoit bien incivil & mal appris.

Personne ne se plaint du mauvais goust des viandes aux festins de nos Canadiens, on ne dit point elles sont trop cuittes, elles sont mal nettes, trop espicées, mal salées, la sauce en est amere & d'un goust fade, qui me faict bondir le cœur & me raut l'esprit du corps, non : mais on y mange simplement les viandes servies & telles que le maître les donne, sans faire la mine & se plaindre de chose qui soit, pour n'estre estimé impertinent, croyans que le cuisinier & celuy qui traicte ont tasché de bien faire, & que de les blasmer seroit se rendre blasmable soy mesme.

Festins de
diuers
especes.

Ils font quelquefois des festins où l'on ne prend que du petun avec leur petunoir, qu'ils appellent Anondahoin : & en d'autres où l'on ne mange rien que des petits pains de bled d'Inde, cuits sous les cendres chaudes. Aucunefois il faut que tous ceux qui sont au festin soient assis à plusieurs pas l'un de l'autre, & qu'ils ne se touchent point. Autrefois quand les festineux sortent, ils doiuent faire vne laide grimasse à leur hôte, ou à la malade, à l'intention, de laquelle le festin aura esté faict. A d'autres il ne leur est permis de lascher du vent 24. heures, par vne opinion qu'ils en mourroient incontinent après, quoy qu'ils ne mangent entels festins que chose fort venteuse, comme sont vne espece de petits pains bouillis.

Quelquefois il faut, après qu'ils sont bien saouls & ont le ventre bien plein, qu'ils

rendent gorge auprès d'eux, ce qu'ils font facilement & ne s'en tiennent pas moins honnestes & ciuils, car estant l'ordre ils l'observent comme action de religion ou de superstition, car telle est leur religion de croire à leurs folles pensées, & aux aduis de leurs charlatans qui sçauent se donner du credit, & auxquels ils ont tant de croyance, que s'ils auoient obmis la moindre ceremonie de leur ordonnance, ils croiroient auoir commis vne grande faute & s'en confesseroient miserables. Il me souuient à ce propos auoir leu dans Florimond de Remont, d'vne certaine heresie ou fausse religiō obseruée dans l'Estat de Holade (à mon aduis) qui permettoit à ses Sectateurs de mettre en effet (s'ils pouuoient) tout ce qui leur venoit premier en fantaisie, fut honneste ou non conuenable, car disant le saint Esprit me l'a inspiré ce a suffisoit pour se mettre en besongne, & Dieu sçait comme tout alloit au profit des maistres Milourds, & au contentement des malins esprits qui auoient là leur empire.

D'vne heresie.

Aussi nos Sauvages reuans qu'il nous falut faire mourir, il ne faudroit point d'autre Arrest pour nous tous mettre à mort, car comme ie viens de dire, ils croyent parfaitement leur songe, & ne veulent pas qu'on s'en moque, ny d'aucune de leur singerie pour exhorbitantes qu'elles soient, hélas il y a assez de Chrestiens qui ne sont pas moins superstitieux, & qui adorent leurs pensées & leurs songes de la nuit, autant superstitieusement

queles Sauvages mesmes, dequoy font encore foy beaucoup de bonnes femmes, qui nous en demandent les explications, autant difficiles à donner qu'il y a de difficulté de croire les vaines Propheties.

Vertu en
estime.

De quelque animal que soit fait le festin, la teste entiere est tousiours présentée au principal Capitaine, ou à vn autre des plus vaillans de la troupe, pour tesmoigner l'estime que l'on fait de la vaillance & vertu, comme nous remarquons chez Homere aux festins des Heros, c'est à dire des Princes, ou des hommes extraordinairement vertueux & nobles, dans le sang desquels est meslé ie ne sçay quoy de diuin, en vn mot Heros est vn homme tres-sage & genereux, qui a mis à chef quelque signalée entreprise, qu'on leur enuoyoit quelque piece de bœuf pour honorer leur vertu, ce qui semble estre vn tesmoignage tiré de la nature, puis que ce que nous trouuons auoir esté pratiqué és festins solempnels des Grecs, peuples polis, se rencontre en ces Sauvages, par l'inclination de la nature sans cette politesse.

Pour les autres conuiez qui sont de moindre consideration, si la beste est grosse comme d'un ours, d'un eslan, d'un grand esturgeon, de plusieurs aslihendos, ou bien de quelqu'un de leurs ennemis, chacun a vn morceau de la beste, & le reste est demincé dans le brotiet. C'est aussi la coustume que celuy qui fait le festin ne mange point pendant iceluy, ains petune, chante, ou entre-

tient la compagnie de quelque discours. I'y en ay veu neantmoins quelqu'vns manger, contre leur coustume, mais peu souuent, car mesme quand vn particulier me faisoit festin, moy seul ie mangeois & ne pouuois gagner sur eux de manger vn morceau avec moy, ny pendant que iestois à table, ce qui m'estonnoit au commencement, mais depuis i'ay esté sçauant en toute leur ceremonies fondées sur des imaginations d'esprit plustost que sur des experiences.

Pour dresser la ieunesse à l'exercice des armes, & les rendre recommandables par le courage & la prouëste, qu'ils estiment plus que toutes les richesses de la terre, ils ont accoustumé de faire des festins de guerre, & de resiouissance, pendant lesquels les vieillards avec les ieunes hommes, les vns apres les autres, ayans vne hache en main, vne masse, ou quelque autre instrument de guerre, font des merueilles (à leur oppinion) d'escrimer & faire des armes, vfans de paroles menaçantes & de mespris, comme si en effect ils estoient aux prises avec l'ennemy.

Au commencement que ie me trouuay en de ces festins, ie ne sçauois bonnement comment prendre ces escrimes, car le taillant de la hache, ou le vent de la masse, approchoit par fois si près de mes oreilles que ie ne les trouuois pas bien assurées, dequoy s'apperceuans les Sauvages ils s'en prenoient à rire, & me disoit Estagon prens courage, car ces escrimeurs ont la main tellement assurée

qu'il ne leur arriue iamais de blesser nonobstant le hazard.

Si c'est vn festin de victoire & de triomphe, en faisant des armes, ils chantent d'un ton plus doux & agreable, les louanges de leurs braues Capitaines, qui ont bien tué de leurs ennemis en guerre, puis se rassioient, & vn autre prend la places iusques à la fin du festin que chacun se retire, apres auoir fait les ordinaires remerciemens du pays Onne ottaha, Je suis saoul, ou Satani, Je suis rassasié, en frappant doucement leur ventre de la main ho ho ho Onianné, voyla qui est bien. Mais quand ce qu'ils mangent leur agrée vous leur entendez dire de fois à autre à Houyga-houy mécha, voyla qui est bon, & les Montagnais Tapoué nimitison, en verité ie mange.

Ie n'ay point remarqué que nos Huronnes fassent de festins entr'elles, comme font quelquefois en Hyuer les Canadiennes & Montagnaises en l'absence de leur marys, car comme elles ont peu souuent de la viande, & du poisson, qui ne soit sçeu de leurs domestiques, il y a tousiours quelque hommes dans les cabanes, qui les pourroient accuser & apporter du trouble entre elles & leur marys, lesquels quoy que sans ialousie, ne trouueroient pas bonnes ces petites friponeries s'ils n'y estoient appelez.

Les Canadiennes & Montagnaises ont vn moyen plus facile de se consoler & faire leurs petites assemblées, car comme leur

marys sont à la chasse, qui est ordinairement pendant les grandes neiges, elles se donnent le mot, & ayans chacune choisy de la meilleure viande, elles en font de rostie, & de bouillie qu'elles mangent en quantité, le plus souuent iusques à rendre, puis c'est à rire, à gauffer, & faire des contes à plaisir, qui leur mettent à toutes le cœur en ioye, puis elles se font des confessions generales de toute leur vie passée, ou elles adioustent plustost qu'elles ne diminuent, non par deuotion ou de contrition, mais plustost pour faire voir qu'elles n'ont pas tousiours esté nyaises ny vescu en bestes, comme disent les femmes mal sages, ie croy neantmoins qu'en tout cela il y a souuent plus de plaisanteries que de malices, & qu'elles sont plus plaisantes que des-honnestes. Ainsi lisons nous en nos Chroniques d'un ieune Religieux fort iouial duquel s'estant ennamouraché certaines femmes ou filles, elles le firent entrer dans leur chambre sous pretexte de luy donner l'aumosne, puis l'ayant enfermé sous clef le voulurent contraindre de contenter leur des-honesteté, ce qu'ayant absolument refusé, elles l'estranglerent & firent mourir miserablement, ce qui fut sçeu par nos Religieux qui loüerent Dieu, que ce Frere en un aage si tendre, si gay & iouial de son naturel, auoit pû (assisté de la grace de Dieu) résister à la furie de ces femmes.

Ces matrones ont la prudence & le soin de briser leurs assemblées auant le retour de

leur marys, & se rendent toutes si sages que vous diriez à les voir qu'elles n'ont toutes de consolation qu'en la presence de leurs marys, auxquels elles tiennent de la viande toute prestee, & du bouillon tout chaud, qu'elles leur font aualler quand ils arriuent pour les delasser, qui est vne inuention admirable, car ils tiennent par experience, que quand ils boient leur bouillon, ou faute d'iceluy de l'eau chaude allans ou reuenans de la chasse, ils n'ont iamais les iambes roides.

**Festins des
Canadiens.**

Les hommes font aussi leurs festins, & à diuerfes intentions ainsi que font nos Hurons, ou par recreation, ou pour gratifier vn amy, ou pour obseruer vn songe, à la plupart desquels il faut tout manger, ou creuer à la peine, & pour plusieurs autres intentions & respects que nous ne scauons pas, mais si c'est pour auoir bonne chasse, ils se donnent bien de garde que les chiens n'en goustent tant soit peu; car tout seroit perdu, & leur chasse ne vaudroit rien à leur dire, mais qui croiroit vne telle sottise.

Comme le Pere Ioseph le Caron, & l'un de nos Freres se trouuerent vn Hyuer avec eux, vn barbare nommé Mantouiscache, songea que Choumin auoit tué vn essan de la teite duquel il auoit fait festin avec du bled d'Inde qu'il auoit enuoyé querir à Kebec, 8. ou 9. lieues de luy. Le lendemain matin il dit son songe à Choumin auant qu'il allast à la chasse, à laquelle il frappa ce iour la mesme vn ieune essan deux fois de son espée, sans

qu'il pût l'aborder ny l'atteindre, pour luy donner vn dernier coup, de maniere qu'il fut contrainct (à cause qu'il se faisoit tard) de laisser là sa beste, & s'en retourner à sa cabane, où il conta à son songeur ce qui luy estoit arriué, qui luy respondit qu'asseurement la beste estoit morte, & l'enuoyerent chercher le lendemain matin par vn de leur parens, qui la trouua abbatuë à trois lieus de leur cabane, cent pas d'où elle auoit esté frappée.

Ce fut là vne heureuse rencontre pour luy & pour toute leur famille, car ils se regalerent & se remplirent à plaisir, apres auoit enuoyé querir du bled d'Inde à Kebec, qui fut l'accomplissement du songe de Mantouische. Je ne veux pas gloser là dessus, mais j'admire que le Diable ayt pû si precisement coniecturer tout ce qui deuoit arriuer, car encor bien que Choumin pût en auoir dit quelque chose par esperance, la chose n'estoit point assurée, & pouuoit ne point arriuer, car en fin le Diable ne sçait pas les choses futures que par des coniectures, si Dieu ne luy reuele pour la punition de ceux qui ont recours à luy.

Je m'oubliais de dire qu'aux repas ordinaires de tous nos Sauvages, aussi bien qu'en leurs banquets & festins. on donne à vn chacun sa part, d'où vient que s'il y a de la viande ou du poisson à departir, il ny en a que 3. ou 4. qui ayent ordinairement les meilleurs morceaux, car il ny en a pas souuent pour

tous, & si personne ne s'en plaint. Pour la sagamité elle est departie egallement à tous, autant au dernier comme au premier avec vn tel ordre que tout le monde reste content.

*Des dances, chansons & autres ceremonies
ridicules de nos Hurons.*

CHAPITRE XVI.

NOS Sauvages, & generally tous les peuples des Indes Occidentales sont de grands chanteurs, & ont de tous temps l'usage des dances; mais ils l'ont à quatre fins: pour agreer à leurs Demons, qu'ils pentent leur faire du bien, ou pour faire feste à quelqu'un de leurs amis ou alliez, pour se resiouyr de quelque signalée victoire, ou pour prevenir & guerir les maladies & infirmittez qui leur arriuent.

Lors qu'il se doit faire quelques dances, nuds, ou couuerts de leurs brayers, à la disposition du malade, du Medecin, ou des Capitaines du lieu; le cry s'en fait par toutes les rues de la ville ou village, à ce que tous les ieunes hommes, femmes & filles, s'y trouuent à l'heure & iour ordonné, matachiez & parez, de ce qu'ils ont de plus beau & precieux, pour faire honneur à la feste, & obtenir par ces ceremonies l'entiere guerison

riſon, d'une telle perſonne malade, qu'ils nomment publiquement, à quoy obeiffent punctuellement toutes les ieunes gens mariez ou non mariez, & meſmes pluſieurs vieillards, & femmes decrepites par deuotion. Les villages circonuoifins ont le meſme aduertiffement, & s'y portent avec la meſme affection à la liberté d'un chacun, car on n'y contraint perſonne.

Cependant on diſpoſe l'une des plus *Des dance,*
grandes cabanes du lieu, & là eſtans tous arriuez, ceux qui ny ſont que pour ſpectateurs, comme ſont les vieillards, les vieilles femmes, & les enfans, ſe tiennent aſſis ſur les nattes contre les eſtablies, & les autres au deſſus, le long de la cabane, puis deux Capitaines eſtans debouts, chacun une tortuë en la main (de celles qui ſeruiſſent à chanter, & ſouffler les malades) chantent ainſi au milieu de la dance, une chanſon, à laquelle ils accordent le ſon de leur tortuë; puis eſtant finie ils font tous une grande acclamation diſans, Hé, é, é, é, puis en recommencent une autre, ou repetent la meſme, iuſques au nombre des reprifes qui auront eſté ordonnées, & n'y a que ces deux Capitaines qui chantent, & tout le reſte dit ſeulement, Het, het, het, comme quelqu'un qui aspire avec vehemence, & puis toujours à la fin de chaque chanſon une

haute & longue acclamation, disans Hé, é, é, é. Mais ce qui est louable en eux est, qu'il ne leur arriue iamais de chanter aucune chanson vilaine ou scandaleuse, comme l'on faict icy, aussi lors que quelque François chantoit, & qu'ils luy demandoient l'explication de sa chanson, s'il leur disoit qu'elle estoit d'amour, ou mondaine, ils n'en estoient pas contans, & disoient Dans-tan réhonguiande, cela n'est pas bien, & ne le vouloient point escouter.

Toutes ces dances se font en rond, mais les dauceurs ne se tiennent point par la main comme par deça, ains ont tous les poings fermez, les filles les tiennent l'un sur l'autre, esloignez de leur estomach, & les hommes les tiennent aussi fermez, esleuez en l'air, & de toute autre façon, en la maniere d'un homme qui menace; avec mouuement, & du corps, & des pieds, leuans l'un, & puis l'autre, desquels ils frappent contre terre à la cadence des chansons, & s'esleuans comme en demysauts, & les filles branslans tout le corps, & les pieds de mesme, se retournent au bout de quatre ou cinq petits pas, vers celuy ou celle qu'il fuit, pour luy faire la reuerence d'un hochement de teste. Et ceux ou celles qui se demeinent le mieux, & font plus à propos toutes ces petites chimagrées, sont estimez entr'eux les

meilleurs danceurs, c'est pourquoy ils ne s'y esparignent pas, non plus qu'en vn festin ou quelque bon repas.

Ces dances durent ordinairement vne, deux, ou trois apres disnées, & pour n'y receuoir d'empeschement des habits, quoy que ce soit au plus fort de l'Hyuer, ils n'y portent iamais autres vestemens, ny couuertures que leurs brayers, sinon que pour quelqu'autre suiet il soit ordonné de les mettre bas; n'oublions neantmoins iamais leurs colliers, oreillettes; & bras-selets, & de se peindre par fois; comme au cas pareil les hommes se parent de colliers, plumes, peintures, & autres fatras, dont i'en ay ven estre accommodez en mascarades ou Careme-prenant, ayans vne peau d'ours qui leur couuroit le corps, les oreilles dressées au haut de la teste, & la face couuerte, excepté les yeux, & ceux cy ne seruoient que de portiers, ou bouffons, & ne se mesloient à la dance que par interualle à cause qu'ils estoient destinez à autre chose.

Je vis vn iour vn de ces bouffons entrer processionnellement dans la cabane où se deuoit faire la dance, avec tous ceux qui estoient de la feste, lequel portant sur ses espaules, vn grand chien lié, & garotté par les iambes, & le muscau, le prit par celles de derriere, & le rua tant.

de fois contre terre qu'il en mourut, estant mort il l'enuoya apprestera la cabane voisine, pour le festin qui se deuoit faire à l'issue de la dance.

Que cela ayt esté fait sans dessein ou pour vn sacrifice, ie n'en ay rien sçeu, car personne ne m'en pût donner l'explication.

Si la dance est ordonnée pour vne malade, à la troisieme ou derniere apres disnée, s'il est trouué expedient, ou ordonné par Loki, elle y est portée, & en l'une des reprises, ou tour de chanson, on la porte, en la seconde on la fait vn peu marcher & dancier, la soustenant par sous les bras: & à la troisieme, si la force luy peut permettre, ils l'a font vn peu dancier d'elle mesme, sans ayde de personne, luy criant cependant tousiours à pleine teste; Estagon outahonne, achieraqueanaretence; c'est à dire; prend courage femme, & tu seras demain guerrie, & apres les dances finies, ceux qui sont destinez pour le festin y vont, & les autres s'en retournent en leurs maisons.

Il se fit vn iour vne dance de tous les ieunes hommes, femmes, & filles toutes nues en la presence d'une malade, à laquelle il fallut (traict que ie sçay comment excuser, ou passer sous silence) qu'un de ces ieunes hommes luy pillast dans la bouche, & qu'elle auallast cette eau, com-

me elle fit avec vn grand courage, esperans en receuoir guerison : car elle mesme desira que le tout se fit de la sorte, pour accomplir, & ne rien obmettre du songe qu'elle en auoit eu la nuit precedante : que si pendant leur resuerie, il leur vient encore en la pensée qu'on leur fasse present d'un chien blanc, ou noir, ou d'un grand poisson pour festiner, ou bien de quelque chose à autre usage, à mesme temps le cry s'en faiët par toute la ville, afin que si quelqu'un a vne telle chose qu'on specifie, qu'il en fasse present à la malade, pour le recouurement de sa santé : ils sont si secourables qu'ils ne manquent point de la trouuer, bien que la chose soit de valeur ou d'importance entr'eux ; ayans mieux souffrir & auoir disette des choses, que de manquer au besoin à vn malade necessiteux, ou qui aye enuie de quelque chose qui soit en leur puissance.

Pour exemple, le Pere Ioseph auoit donné vn chat à vn grand Capitaine, comme vn present tres rare, car ils n'ont point de ces animaux. Il arriua qu'une malade songea que si on luy auoit donné ce chat qu'elle seroit bien-tost guerie. Ce Capitaine en fut aduerty, qui aussi tost luy enuoya son chat bien qu'il l'aymast grandement, & sa fille encore plus, laquelle se voyant priuée de cet animal, qu'elle aymoit

passionnement, en tomba malade, & mourut de regret, ne pouuant vaincre & surmonter son affection, bien qu'elle ne voulut manquer à l'ayde & secours qu'elle deuoit à son prochain, ce qui nous est d'un grand exemple.

Pour recouurer nostre dé à coudre, qui nous auoit esté desrobé par vn ieune garçon, qui depuis le donna à vne fille, ie fus au lieu où se faisoient les dances, & ne manquay point de l'y remarquer, & le rauoir d'une fille qui l'auoit pendu à sa ceinture, avec ses autres matachias, & en attendant l'issüe de la danse, ie me fis repeter par vn Sauvage l'une des chansons qui s'y disoient, dont en voicy vne partie.

Faut repe-
ter chacune
ligne deux
fois.

Ongyara éuhaba, ho, ho, ho, ho, ho,
Eguyotenubaton, on, on, on, on, on,
Eyontara éintet, onnet, onet, onet,
Eyontara éintet à, à, à, onnet, onnet,
onnet, ho, ho, ho.

Ayant d'escrit ce petit eschantillon d'une chanson Huronne, j'ay creu qu'il ne seroit pas mal à propos de d'escire encore icy partie d'une autre chanson, qui se disoit vn iour en la cabane du grand Sa-

gamo des Souriquois , à la louange du
Diable, qui leur auoit indiqué de la chaf-
se , ainsi que nous apprend l'escot qui
s'en dist tesmoin auriculaire, & commence
ainsi.

*Haloet , ho, ho, hé, hé, ha, ha, haloet , ho,
ho, hé,*

Ce qu'ils chantent par plusieurs fois : le
chant est sur ces notes.

Re, fa, sol, sol, re, sol, sol, fa, fa, re, re, sol,
sol, fa, fa.

Vne chanson finie, ils font tous vne gran-
de exclamation , disans Hé , puis recom-
mencent vne autre chanson , disans.

*Egrigna hau, egrigna hé, hé, hu, bu, ho,
ho, ho, Egrigna, hau, hau, hau.*

Le chant de cette cy estoit. Fa, fa, fa, sol,
sol, fa, fa, re, re, sol, sol, fa, fa, fa, re, fa, fa,
sol, sol, fa.

Ayans fait l'exclamation accoustu-
mée , ils en commencèrent vne autre qui
chantoit.

*Tameia alleluia , tameia à dou veni, hau,
hauhé, hé.*

Le chant estoit : Sol, sol, sol, fa, fa, re, re,
re, fa, fa, sol, fa, sol, fa, fa, re, re.

Les Brasiliens en leurs Sabats, font aussi
de bon accords, comme ;

Hé, hé, hé, hé, hé, hé, hé, hé, hé, hé.

Avec cette note, Fa, fa, sol, fa, fa, sol, sol,
sol, sol, sol.

Et cela faict s'escrियोent d'une façon, &
hurlement espouventable, l'espace d'un
quart d'heure, & sautoient en l'air avec vio-
lence, iusques à en escumer par la bouche,
puis recommencerent la musique, disans ;


*Heu, heüraüre, heüra, heüraüre, heüra,
heüra, ouek.*

La note est : Fa, mi, re, sol, sol, sol, fa, mi,
re, mi, re mi, vt, re.




SVPERIVS.

H



Aloet ho ho hé hé ha ha



Halouet ho ho hé.




Egrina hau, Egrina hé hé hu hu •




ho ho ho, Egrina hau hau hau.

T E N O R.




Aloet ho ho hé hé ha ha



Halouet ho ho hé.







Egrina hau, Egrina hé hé hu hu ho







ho ho, Egrina hau hau hau.


C O N T R A.



B A S S V S.



SUPERIUS.




Tameia alleluya, Tameia



à dou veni, hau hau hé hé.




Heü haüraüre heüra heüraüre




heüra heüra oueb.

TENOR.



Tameia alleluya, Tameia



à dou veni, hau hau hé hé.




Heü haüraüre heüra heüraüre




heüra heüra o- ueb.


C O N T R A.




Tameia alleluya, Tameia



à dou veni, hau hau hé hé.




Heü haüraüre heüra heüraüre




heüra heüra oueb.


B A S S V S.




Tameia alleluya, Tameia



à dou veni, hau hau hé hé.



Heü haüraüre heüra heüraüre



heüra heüra oueb.



Dans le païs de nos Hurons , il se fai&t aussi des assemblées de toutes les filles d'un bourg auprès d'une malade, tant à sa priere, suyuant la resuerie qu'elle en aura eue , que par l'ordonnance de Loki, pour sa santé & guerison. Les filles ainsi assemblées , on leur demande à toutes, les vnes après les autres, celuy qu'elles veulent des ieunes hommes du bourg , pour dormir avec elles la nuit prochaine: elles en nomment chacune vn , qui sont aussi tost aduertis par les maistres de la ceremonie, lesquels viennent tous au soir en la presence de la malade, dormir d'un bout à l'autre de la cabane, chacun avec celle qui la choisi, & passent ainsi toute la nuit, pendant que deux Capitaines aux deux bouts du logis, chantent & sonnent de leur tortuë du soir au lendemain matin, que la ceremonie cesse. Dieu vueille abolir vne si damnable & mal heureuse ceremonie, avec toutes celles qui sont de mesme aloy , & que les François, qui les fomentent par leurs mauuais exemples, ouurent les yeux de leur esprit, pour voir le compte tres-estroit qu'ils en rendront vn jour deuant Dieu.

*De leur mariage & concubinage , & de la
différence qu'ils y apportent.*

CHAPITRE XVII.

Continen-
ce des Alle-
mands,

NOus lisons, que Cesar, Prince accompli & doué d'une honnêteté & pudeur admirable, louoit grandement les Allemans, d'avoir eu en leur ancienne vie sauvagement telle continence, qu'ils reputoient chose tres-vilaine à un ieune homme, d'avoir la compagnie d'une femme ou fille avant l'age de vingt ans, & Solon Salamain, commanda par ses loix aux Atheniens, que nulle oüst se marier qu'il n'eust aussi atteint l'age de vingt ans, & le bon Lycurgus ordonna aux Lacedemoniens, de ne prendre femme qu'ils n'eussent accomplis les 25. ans, mais le Philosophe Protheus, prohiba aux Egyptiens, de ne contracter mariage, qu'ils n'eussent passé les trente, tellement que si quel-
qu'un s'avancast à prendre femme avant le temps ainsi limité, estoit decreté & commandé par la loy, de chastier publiquement le pere, & d'estimer les enfans non legitimes.

C'est sans difficulté qu'on peut approuver ces loix pour bonnes ou pour mauvaises, louables en une chose & dangereuses en l'autre, mais à les prendre comme on voudra, tousiours les infideles & les Payens mesmes, se sont faicts.

admirer des Chrestiens, comme plus retenus
& continens. Et quoy peur de scandale on est
uiourd'huy contrainct de marier des enfans à
des enfans, qui n'engendrent que d'autres en-
fans foibles & delicats, d'où il arriue tant d'em-
ploy pour les medecins, mais il vaut mieux se
marier que brusler, dit l'Apostre, & faire vne
chose licite qu'illicite, car d'y apporter vn re-
glement, la coustume estant tournée en habi-
tude, elle s'est renduë irremediable, & comme
passée en loy, & d'en poser d'autres, si les Le-
gislateurs ne les obseruoient eux mesmes, elles
ne seruiroient que pour chastier les petits &
doner l'effor aux grands du mode, qui croyët
que toutes choses leur sont permises, pour ee
que les Loix sont semblables aux toiles des
araignés, disoit Selon, entant qu'en icelles, il
n'y a que les pauures & debiles, qui y soient
pris, mais les riches & puissans les rompent &
destruisent.

Loix ne
s'observent
que par les
petits.

La ieunesse entre nos Hurôs, Qui ne sont ta-
ronons & autres peuples sedentaires, a vn peu
trop de liberté au vice, car les ieunes hommes
ont licence de s'addonner au mal si tost qu'ils
peuvent, & les filles de se prostituer si tost
qu'elles en sont capables, neantmoins ie peux
dire avec verité, de n'y auoir iamais veu don-
ner vn seul baiser, n'y veu faire vn geste ou re-
gard impudique, & pour cette raison, i'ose af-
fermer qu'ils sont moins suiet à ce vice que
l'on n'est par deça, dont on peut attribuer la
cause non à la Loy, car auant nous ils n'en
auoient encor receu aucune, mais à leur nudité

principalement de la teste, partie au deffaut des espiceries & du vin, & partie à l'usage ordinaire qu'ils ont du petun, la fumée duquel estourdit les sens & monte au cerueau & pour le peu d'atraits de ces obiects, plus de goustans que rauissans, à quiconque a tant soit peu de retenue, & l'œil aucunement chaste.

Les ieunes hommes, qui ne se veulent point marier, ny obliger à vne femme: tiennent ordinairement des filles à pot & à feu, qui leur seruent en la mesme maniere que s'ils en estoient les marys, il n'y a que le seul nom de difference car ils ne les appellent point *Atenonha*, femme mais *Asqua*, compagne ou concubine, & vivent ensemble autant long-temps qu'il leur plaist, sans perdre ny les vns ny les autres la mesme liberté qu'ils auoient de courir les cabanes, & sans ceste licence de chercher amis, ie croy que beaucoup de filles resteroient vierges & sans marys, pour estre le nombre plus grand que celuy des hommes à mon aduis, il en est presque de mesme en France, où les guerres consomment vne infinité d'hommes, de là vient que l'on y a basti plus de Monasteres de filles depuis trente ans ença, qu'il ne s'y en estoit estably mil ans auparauant, de quoy nostre Seigneur reçoit gloire, & ses espouzes le Paradis.

Quand vn ieune homme veut auoir vne fille en mariage, il faut qu'il la demande à ses pere & mere, sans le consentement desquels la fille n'est point à luy, bien que le plus souuent la fille ne prend point leur consentement ny aduis, sinon les plus sages. Cest amant voulant

ire l'amour à sa maistresse & acquerir ses bonnes graces, il se peinturera le visage & s'accommodera de ses plus beaux matachias, puis présentera à sa maistresse quelque colliers, brasses, ou oreillettes de pourceleine, & si la fille a un seruiteur agreable elle reçoit ces presents, & la fait, cest amoureux viendra coucher avec elle 3. ou 4. nuicts, & iusque là, il n'y a point encores de mariage parfait, ny de promesse donnée, pour ce qu'après ce dormir il arriue assez souvent que l'amitié se refroidit, & que la fille qui a souffert ce passe droit n'affectionne pas pour cela ce seruiteur, & faut après qu'il se retire sans plus parler de mariage, comme il arriua de nostre temps à vn ieune homme de la bourgade de saint Nicolas ou Touenchain, longedié par la seconde fille du grand Capitaine Auoindaon, dequoy le pere mesme se plainignit à nous, bien qu'il ne la voulut contraindre de passer outre au mariage qu'il eut tant désiré.

Les parties estans d'accord & le consentement des pere & mere donné, on procede à la ceremonie du mariage, par vn festin où tous les parens & amis des accordez sont inuitez. Tout le monde estant assemblé & chacun en son rangassis sur son seant. Le pere de la fille ou le maître de la ceremonie à ce député, dit hautement devant toute l'assemblée, comme tels & tels se marient ensemble & qu'à ceste occasion a esté faite cette assemblée & ce festin, à quoy tous respondent ho onnianne, voila qui est bien.

Ceremonie
du mariage.

Le tout estant approuué & la chaudiere nette

chacun se retire , après auoir congratulé les
nouveaux mariez a' vn ho, ho, ho, puis si c'est e
Hyuer (à cause que pour lors les mesnages sont
fournis de ce qui leur est necessaire) chaque
femme est tenuë de porter à la nouvelle mariée
vn faisseau de bois pour sa prouision , d'autant
qu'elle ne le pourroit pas faire seule , & au
qu'il luy conuient vaquer à d'autres choses
pour son nouueau mesnage, qui est tousiours
assez riche, puis qu'il est assorty du contentement
& de la paix , qui en est la principale
piece.

Ceste courtoisie des femmes , ne se pratique
pas enuers toutes les nouuelles mariées , n'y en
toutes les Prouinces , mais j'ay appris qu'en
quelque Prouince de nostre mesme Amerique
la coustume estoit que les parens leur portoient
chacun sa piece de mesnage & de leur emmeu
blement, qui est vne chose fort commode , &
que nous voyons pratiquer en quelque con
trée de la Germanie.

Degrez de
consanguini
té.

Où il faut noter qu'ils gardent trois degrez
de consanguinité, dans lesquels ils n'ont poin
accoustumé de faire mariage: sçauoir est du fil
avec sa mere, du pere avec sa fille, du frere
avec sa sœur & du cousin avec sa cousine.
comme ie recognu appertement vn iour
que ie monstré vne fille à vn Huron & luy
demanday si elle estoit sa femme ou sa concu
bine, lequel me respondit qu'elle n'estoit ny
l'vne ny l'autre , ouy bien sa cousine & qu'ils
n'auoient pas accoustumé de coucher avec
celles qui leur estoient si proches parentes, qu'

est vne obseruation fort loüable, en comparaison de certains Gentils du Peru auant leur conuerſion, lesquels ſe marioient indifferement à qui que ce fuſt, ſœurs, filles, & meſmes à leurs meres. Mais hors cela toutes choſes ſont permises à nos Huronnes & à leurs voiſines.

De douaire il ne s'en parle point, non plus que de trouſſeaux, ny de poſſeſſions & encore moins d'argent, auſſi quand il arriue diuorce, le mary n'eſt tenu de rien, ny la femme de luy rendre compte, chacun prenant ce qui luy appartient, qui n'eſt pas ſouuent grand choſe, vn peu de fourrures, vn peu de raſſades, & quelque eſcuell. Item voyla tout, car les richèſſes principales qu'ils demandent en la perſonne qu'ils recherchent, ſont celles de l'eſprit & non de la terre, car mieux vaut vn homme ou vne fille ſans argent, que de l'argent ſans homme ou fille vertueuſe, c'eſt le ſentiment de tous les bons Chreſtiens, qui s'accordent en cela avec tous les barbares.

Neantmoins ſi à ſucceſſion de temps il prenoit enuie à l'vn de nos barbares, de repudier ſa femme pour quelque ſuiect que ce ſoit, comme il n'y a point eu de contract paſſé par deuât Notaires, auſſi eſt-il facile de rompre leur mariage, & ſuffit au mary de dire aux parens de ſa femme, & à elle meſme, qu'elle ne vaut rien & qu'elle ſe pouruoye ailleurs, ce qu'elle fait, du moins elle ſort & vit en commun comme les autres, iuſques à ce que quelqu'autre la recherche, & non ſeulement les hommes procurent ce diuorce quand les femmes leur en ont donné

Point de
douaire,

Du diuor-
ce.

quelque suiet, mais aussi les femmes quittent quelquefois leurs marys quâd ils ne leur agréent point, ou qu'elles en ayment vn autre, tellement qu'ils y en trouue qui ont eu quantité de marys, lesquels marys se remariant à d'autres femmes, & les femmes à d'autres hommes, le tout sans d'ifficulté & sans ialousie, qu'un autre iouisse de leur couche. Il n'y a que pour les enfans lesquels ils partagent ordinairement par moitié, les filles à la mere, & les garçons au pere, ainsi qu'ils iugent expedient; car ils ne suivent pas tousiours vn mesme ordre entr'eux pour c'est égard.

Les Montagnais & Canadiens obseruent bien vne partie des ceremonies des Hurons en leurs amourettes & mariages, mais encores ont ils quelques choses de particulieres & plus honestes, qui ne sont neantmoins propres qu'à des barbares, & gens qui ne fuyent pas le hazard de tomber au peché.

Quand vn ieune Montagnais desire auoir vne fille en mariage, il hante simplement sa cabane peinturé & enligné de diuerses couleurs, & luy declare l'amour qu'il a pour elle, & elle au reciproque luy tesmoigne de l'affection, si elle a ses entretiens agréables, sinon elle luy donne son congé. Estant le bien venu il luy fait quelque present, lequel elle reçoit pour arde de son affection, cela fuit cet amoureux viendra coucher avec elle, lors qu'il luy plaira, non de nuit, mais en plain iour, enveloppez tous deux d'une couuerture, sans se toucher, car il n'est pas permis de faire rien d'indecent, mais
seulement

seulement s'entretenir & discourir de leur amour en la presence de tout le monde & non point en cachette.

Le ieune homme aggreant à la fille & la fille au garçon, il en parle à ses pere & mere, & a leur deffaut à ses plus proches parens, & ses parens à ceux de la fille, qui considerent auant de rien conclure, le personnage & son humeur, s'il n'est point paresseux, querelleur, mauuais chasseur, ou addonné aux femmes, car en or que ce dernier vice ne soit point en mespris chez eux, si ne sont ils point estat de ceux qui s'y addonnent.

Or de mesme que l'on s'informe des garçons & de leur deffauts, la mesme enqueste se fait pour les filles & de leurs imperfections, l'on voit s'y elle est point vne coureuse, vne caioleuse ou vne desbauchée addonnée aux hommes, car de telles filles ils n'en font estat non plus que des chiennes, (ainsi les appellent ils) L'on demande aussi si elle est point vne paresseuse, querelleuse, menteuse ou acariastre, car pour rien ils n'en voudroient, si elle travaille bien proprement aux petits ouurages qu'elle a à faire, comme escuelles d'escorces, raquettes à courir sur les neiges & vestemens, ayans tous deux les conditions requises, les peres & meres prennent iour pour les marier, & en attendant le temps expité, les parens de la fille avec la fille mesme, travaillent aux robes pour les futurs espoux & à disposer tout son emmeublement, qui n'arriue pas iusques dās l'exces, car ie vous assure que quand elles ont vne couuerture, vne chaudiere & quelques escuelles d'escorces

les voyla prou contantes & riches.

Pour le garçon il est aussi reciproquemēt assisté de ses parens, car son pere luy fournit d'un canot d'elcorce avec les auirons, de quelques rets & filets pour la pesche, d'une hache, d'une espée, d'un arc & fleches, mais ce qui est excellent & qui resmoigne en effect vne douce & amiable societé en ceux qui n'ont iamais eu de pedagogue que la simple nature, est, qu'un chacun des parens & amys des futurs espoux vont à la pesche ou à la chasse selō la saison, pour faire le festin des nopces où au iour assigné, tous les parens s'estans assemblez & l'espousée parée d'une belle robe neuue bien matachiée & le visage huylé & peint de diuerses couleurs, elle en fait autant à son futur mary, qui s'en tient d'autant plus beau qu'il est mieux coloré & barré d'huiles & de peintures.

Toute la ceremonie se paracheue au festin, où chacun tasche de se consoler, après lequel, le gendre demeure de famille avec sa femme au logis de son beau pere ou de sa belle mere, & ne s'en retire que pour quelque different ou mesintelligence. Ils ne prennent aussi ordinairement que chacun vne femme, biē qu'il s'y en est rencontré qui en ont eu iusques à 3. ou 4. mais fort rarement, sinon vn qui en auoit iusques à 7. en diuers endroits, ce qui ne se voit iamais parmy nos Hurons, qui ont avec leur femme toute liberté de courir aux autres (mais sans violence aucune) ce que n'ont pas nos Montagnais, qui mesprisent d'ailleurs ces hommes chargez de plusieurs femmes, comme ennemis de l'honneur.

Mais comme il est impossible qu'il n'y arriue quelquefois des disgraces dās vn meſnage, nos Montagnais pour paiſibles qu'ils ſoient, chaſſent aucuncfois leur femmes au loin, mais par le moyen de leurs amis, ils ſont facilement reconciliez & ſe remettent enſemble, ce qui ne ſe faiſt pas ſi ayſement entre nos Hurons, où vn chacun a bien toſt trouué party quand l'vn des deux abandonne l'autre.

De la naiſſance, & de quelque ceremonies que les Sauuageſſes pratiquent à l'endroit des enfans nouveaux nai. De l'amour que les peres ont pour eux & de l'impoſition des noms & ſurnoms.

CHAPITRE XVIII.

NOnobſtant que les fēmes voyent d'autres hōmes que leurs maris, & les maris d'autres femmes que les leurs, ſi eſt-ce qu'ils aymēt tous grandement leurs enfans, gardās cette loy que la nature a entée és cœurs de tous les animaux d'en auoir le ſoin.

Or ce qui faiſt qu'ils aymēt leurs enfans plus qu'on ne faiſt par deçā, eſt à mon aduis qu'ils ſont le ſupport des peres & meres en leur vieilleſſe, ſoit pour les ayder à viure, ou bien pour les deffendre de leurs ennemis, & la nature conſerue en eux ſon droit tout entier pour ce regard: à cauſe dequoy ce qu'ils ſouhaittēt le plus

est d'auoir nombre d'enfans, pour estre tant plus forts & assurez de support au temps de maladie ou de vieillesse, & neantmoins entre les Hurons les femmes n'y sont pas si fecondes que par deça : peut estre à cause de tant d'amis ou du climat, ou pour autre raison que ie ne cognois point, non plus que celles qui donnent dauantage d'enfans aux Françoises qu'aux Espagnoles & Italiennes.

La femme estant preste d'accoucher toute la ceremonie qu'ils y apportent n'est pas grande, & les preparatifs encores moins curieux, car ils plantent simplement 4. ou 5. baltons en vn coin de la cabane qu'ils entourent de peaux & couuertures, comme vn habitacle dedans lequel ils couchent la malade à platte terre, ou pour le plus sur quelque fourures ou rameaux de sapin, & là elle faict son fruiet assistée de quelque vieille qui luy sert de sage femme, il y en a qui accouchēt d'elles mesmes & en peu de temps, & peu meurent de ce trauail, qui semble leur estre moindre qu'aux femmes delicates de par deça.

L'enfant estant nay, le premier office qu'il faict est, de sonner de la trompette en pleurant, pour dire qu'entrant au monde il entre à la guerre, comme en effect ce monde n'est qu'une guerre continuelle, vn seiour de miseres & une vallée de larmes, où a peine auons nous gousté de la vie qu'il faut goustier de la mort.

Il y en a qui ont remarqué que si l'enfant est male, il profere des aussi-tost, A, & E, si c'est une femelle, comme si chacun en son sexe ac-

cuſoit Adam & Eue, d'où nous tirons toutes nos miſeres & calamitez, mais cela vient d'une autre cauſe que les Medecins ſçavent, & que ie ne peux expliquer.

En quel que contrée dès l'inſtant de la naiſſance de l'enfant, on leur frotte tout le corps d'huyle & de peintures comme au Breſil, & parmy nos Canadiens meſme les meres leur peignent le viſage de noir, auſſi bien qu'en la mort de leurs parens, comme ſi entrant au monde il falloit deſ-jà penſer au trespas, car le noir ſignifie deuil & triſteſſe.

Il y en a qui leur font aualler de la graiſſe fondue ou de l'huyle, ſi toſt qu'ils ſont ſortis du ventre de leur mere, ie ne ſçay à quel deſſein ny pourquoy ſinon que le diable (ſinge des ceuures de Dieu) leur ait voulu donner cette inuention pour contrefaire en quelque choſe le S. Baptême ou la confirmation.

Les Canadiennes leur tordent auſſi les deux genouils en dedans leur faiſant tourner les deux talons en dehors, en ſorte que en marchant ils iettent les orteils en dedans & les talons en dehors, & ce afin qu'ils prennent leur ply, & qu'eſtans grands, ils puiſſent plus facilement & comodement porter leurs raqueſtes & ſe tenir avec plus de fermeté dans les canots quand il faut eſtre debout, & en effect nous trouuons par experience qu'ils ont raiſon, & qu'ils les portent mieux que les François, qui iettent touſiours la pointe du pied en dehors, & par ainſi font que la queue de leurs raquet-

tes allans en dedans, les entrelaissent souuent & se laissent tomber, comme il m'a pensé quelquefois arriuer au commencement que i'y estois moins stilé, où les Sauvages au contraire ont tousiours la queue de leurs raquettes en dehors, & hors de crainte de pouuoit marcher dessus & s'entretailer comme nous faisons, dont nos cheuilles en pourroient souuent dire des nouuelles, chaussez de sandalles de bois, comme nous sommes & peu souuent de cuire.

L'usage de porter des oreillettes est tellement ancien, qu'il est dit de Iob qu'après son affliction, ses parens & amis se conioüissans de sa conualescence, luy firent present chacun d'une brebis & d'un pendant d'oreille de fin or.

Nos Sauvages les ont fort en usage, non d'or ny d'argent qu'ils ne cognoissent point, mais de quoy que ce soit, c'est pourquoy la femme dès qu'elle est accouchée, suivant la coustume du pais, perce les oreilles de son petit en un, deux, trois, quatre ou cinq endroits, avec une aleine ou un os de poisson, non sans quelque compassion & apprehension de leur faire douleur, mais peur qu'attendant plus tard les maux leurs soient plus sensibles & insupportables, puis y met des tuyaux de plumes ou autre chose pour entretenir les trous, estans gueris ils y pendent des patinotres de pourceleines ou autres bagatelles, & pareillement à son col quelque petit qu'il soit.

Après que toutes les petites ceremonies ont esté faictes à l'enfant nouveau né, on faict de fe-

fin aux amis où la tarte & le bon vin n'est point
espargné icy, ny le petun & la sagamité là. Mais
pour l'imposition des noms, ils les donnent par
tradition, c'est à dire, qu'ils ont des noms en
grande quantité, lesquels ils choisissent & im-
posent à leurs enfans, aucuns desquels sont
sans signification & les autres avec significa-
tion, qu'ils disent rarement à quiconque leur
demande, car ils sont autant retenus à dire leur
propre nom, comme libres de dire celuy des
autres.

De l'impo-
sitions des
noms.

Je veux bien aduertir aussi les nouveaux
François qui vont entr'eux que s'ils ne sont soi-
gneux de leur dire leur nom propre dès leur
arriuée, que les Sauvages ne manqueront pas
de leur en imposer de ceux qu'ils croiront leur
mieux conuenir.

A ce ieune garçon qui vint demeurer avec
nous dans le pais des Hurons à cause qu'il estoit
ieune, petit & fretillant, ils l'appellerent *Au-
baisique*, qui veut dire petit poisson. A vn autre
François vn peu turbulât & leger de la main,
ils luy donnerent le nom *Houaonton*, qui signi-
fie facheux & querelleur. A moy ils m'auoient
donné le nom de grand Chef de guerre, ie ne
sçay par quelle raison, (car ie n'auois ny espée,
ny mousquet,) sinon que ie n'aprehendois au-
cun peril ny danger, ou pour la recommanda-
tion des Chefs de l'habitation, lesquels auoient
de l'affection & du respect particulier, pour
moy qui estois le moindre de tous nos frè-
res.

Après que i'eu sçeu par le moyen du Truche-

ment Brulé & du sieur du Vernet la signification de ce nom nullement conuenable à vn pauvre frere Mineur, ie leur dis qu'ils m'appellassent par mon nom propre Gabriel, comme ils faisoient mes deux autres confreres, Ioseph & Nicolas, ce qu'ils firent, sinon par les champs & parmy les autres nations qu'ils vsoient du mot *Garibouano*, grand Capitaine.

On dit que les Roys du Peru, auoient accoustumé de prendre les noms des principaux animaux, des principales plantes ou des plus belles fleurs de leur pais, pour donner à entendre & s'instruire eux mesme, que comme ces choses excelloient par dessus celles de leur espee, il falloit de mesme qu'ils parussent plus excellemment vertueux, que tous les autres hommes du commun. Aussi ce nom que mes Hurons m'auoient imposé, m'obligeoit à vne plus exacte pratique de la vertu, non en paroles seulement, mais à la patience & à souffrir genereusement les choses qui contredisoient à mon esprit & desplaisoient à mes sens, car pour la guerre contre les hommes elle n'estoit pas de mon gibier.

I'ay cogneu vn homme d'entr'eux qui se nommoit *Onniannerani*, qui veut dire ie suis empesché, vn autre *Tarhy*, arbre, ie pensois au commencement avec plusieurs autres qu'il vouloit dire Tharé, le nom du pere d'Abraham mais ie me mesprenois avec eux. Aucuns portent le nom de quelque animal, autres des montagnes, & yalées, du vent, ou de quelque

partie du corps humain, & vn qui s'appelloit Ioseph, mais ie n'ay pû sçauoir qui luy auoit imposé ce nom là, & peut estre que parmy vn si grand nombre de noms qu'ils ont en vsage, ils'y en peut trouuer quelque vns approchans des nostres, ou par rencontre ou à dessein.

L'ontient que nos Montagnais ont cela de particulier qu'ils imposent souuent deux noms à leurs enfans, & quelquefois trois comme celuy qui fut nommé *Mahican, Aric, Ouhé* Loup, Cerf, Canot. Et vn autre *Mahican Aric, Loup, Cerf*. Puis *Choumin, Raisin, Aric* Crapaut, *Peritchiouan* la mer monte. *Amiscoueian*, vieille robe de Castor, & plusieurs autres sortes de noms à la fantasia des parens, car aussitost est donné le nom d'un oyseau, ou d'une beste, à l'enfant comme d'une autre chose materielle ou impropre.

J'ay quelquefois ruminé en moy-mesme d'où pouuoient proceder ou deriuer les surnoms de nous autres Chrestiens, veu qu'ils ne sont point ordinairement en vsage chez les Iuifs, Payens & Infidelles, desquels nous sommes descendus, car en fin nous auons tous pris naissance, d'Eue & d'Adam, des Iuifs, ou des Gentils, & alleurement des Enfans de Noël, & ay creu, que plusieurs ont esté imposez par le vulgaire, ou pour quelque action, ou pour quelque accident, & que d'autres s'en sont imposez d'eux mesmes

Des surnoms.

prenans des noms de guerre, de ville, ou de seigneurie, enseueliffans par ce moyen le leur ancien, mais ie croy, & il y a bien de l'apparence que nos surnoms sont pour la pluspart les noms propres de nos anciens parens auant qu'ils fussent faits Chrestiens, ausquels on imposoit vn nouveau nom au saint Baptisme, & le leur propre qu'ils auoient auparauant leur a seruy de surnom, qui est venu iusques à nous de pere en fils, ainsi que nous pratiquons de present enuers plusieurs de nos Canadiens conuertis, ausquels nous auons laissé leur ancien nom Sauuage pour surnom.

Car que veulent dire la pluspart de nos surnoms, personne n'en scauroit rien dire, non plus que des noms des Payens, & Sauuages dont nous ignorons les louanges, ou bien il faudroit qu'eux-mesmes nous en donnassent l'explication, car ils en ont peu sans signification, & si on considere de près on trouuera que iamais nos anciens qui ont imposé les premiers noms aux hommes, n'en ont donné aucun sans consideration, & qui n'aye signifié quelque chose, comme i'ay dit, laquelle signification n'est point venue iusques à nous.

Or le nom que nos Sauuages ont imposé à leurs enfans en la naissance leur reste tousiours, sinon que pour quelque occasion particuliere & remarquable on leur change, ou qu'on leur en adioust encore vn autre de vitupere ou d'honneur, comme i'ay dit en la

Changent
de nom.

resurrection des valeureux Capitaines morts entre les neutres, ou l'on faict reuiure leur memoire.

Nous auons appris du sieur Champlain qu'il y eut vn Sauvage de sa cognoissance qui par consideration voulut changer son premier nom en celuy de Loup & Cerf, on luy en demanda la raison & pourquoy il auoit pris les noms de deux animaux si contraires, il respondit qu'en son pais il n'y auoit beste si cruelle que le loup, & animal plus doux que le cerf, & qu'ainsi il seroit bon doux & paisible enuers vn chacun n'estant point offensé, mais que s'il estoit outragé, il seroit furieux & vaillant, & ne pardonneroit à personne, non plus que le loup au cerf, quand il le tient arresté.

L'ay desia dit en quelque endroit de ce volume la force des femmes Sauvageſſes, & comme elles accouchent sans grand travail, du moins qui paroisse, mais ie repete derechef qu'elles sont admirables, car elles n'ont pas si tost mis vn enfant au monde, qu'elles sont encores plustost sus pieds, vont au bois, vont à l'eau, & font tout le reste de leur petit menage comme si de rien n'auoit esté, de se geindre point de nouuelle, & de faire la delicate encore moins, on se rit plaisamment en France du caquet des accouchées, où toutes sortes de differens discours s'estalent & se deuident, car l'une y parle de son mary, & l'autre de sa seruante, du four, & du moulin, & du marché, des halles. O mon Dieu quel

Forces des
sauageſſes
accouchées

cliquetits, il n'y a que les plus spirituelles qui parlent vn peu de Dieu mais encore sobrement, car la mode, & les collets, la iuppe, & les souliers ont là leur empire.

Vn certain François fit vn iour diuers interrogats à vne ieune femme nouuellement releuée de ses couches, sur ce qu'elle n'auoit point paruë enceinte ny grosse, guere plus qu'à son ordinaire, (c'est que i'ay admiré entre nos Huronnes) ne s'estoit point plainte, & n'auoit point gardé la chambre, comme font les femmes de France. A cela toutes se prirent à rire, disans que les Françoises estoient bien paresseuses, & auoient bien peu de courage, que pour auoir mis vn enfant au monde, elles voulassent tenir le liect, elles deuroient tascher (dirent elles) d'accoucher en Hyuer afin de faire comme les ours, qui se tiennent quatre ou cinq mois enfermez de peur du froid.

Et comme nostre Frere Geruais estoit vn iour aupres du Sauvage Napagabiscou malade dans sa cabane, sortit d'aupres de luy la femme de ce bon homme pour aller faire ses couches à la cabane voisine, mais avec tant de prudence que personne ne s'apperçeut de son incommodité, non pas mesme son mary, que le lendemain matin que sa belle sœur luy apporta vne petite fille que Dieu luy auoit donnée, dequoy ils furent tous estonnez car personne ne s'estoit apperceu de sa grossesse, ny le Frere Geruais, qui demanda à cette femme, mais vn peu trop simplement si certe

Elle estoit d'elle, laquelle luy respondit en riant que ouy (car il n'y auoit que 4. ou 5. mois qu'elle estoit accouchée) & puis dir, & quoy les femmes de France en ont elle si souvent, non dit le Religieux que d'année en année, & au plus de neuf en dix mois, mais il leur arriue quelquefois d'en auoir deux d'une couche (pour moy i'ay esté vne fois en vn village, où vne femme estoit accouchée de quatre garçons ayans tous vie) A cela elle fit vn grand cry disant : *Cheté* : (car c'est leur façon d'admirer) elles ressembtent donc aux femelles des esclans qui portent deux petits à la fois, iamais ie nay veu aucune femme de nostre Nation auoir deux enfans d'une couche. Je croy qu'elle auoit quelque raison, car la chose arriue fort rarement entr'eux, neantmoins pendant que i'estois aux Hurons vne fille en accoucha de deux, dequoy elle restoit toute honteuse, non d'auoir perdu sa virginité qui ne leur est point honorable, mais d'auoir fait vn iumeau.

Entre les Montagnais ils ont cette coustume que personne ne se sert des vaisselles, calumets, ou petunois de la nouuelle accouchée pendant le temps de 15. iours, tenant tout cela comme immonde, lesquels ils ne veulent pas mesme toucher, & les brulent apres ce temps là, ce qui sent fort de son honnesteté.

*Du choix qu'il faut faire des nourrices,
De la nourriture & emmaillottement
des enfans, comme ils sont endurcis à la
peine, & ne succedent point aux biens
du pere.*

CHAPITRE XIX.

Donner vne bonne & vertueuse nourri-
ce à l'enfant, est le fait d'une mere sage
qui y doit avoir l'œil, car de là depend en par-
tie sa bonne inclination, pour ce qu'il tient
ordinairement plus du naturel de celle qui la
alaicté, que de celui qui la engendré, comme
l'antiquité a tres bien expérimenté en Titus
fils de Vespasian, & en plusieurs autres, le-
quel (ainsi qu'escriit Lampride) fut tout le
temps de sa vie suiet à plusieurs maladies &
infirmitez, à cause qu'il avoit esté baillé à
nourrir à vne nourrice suiete à maladie.

**Titus, suiet
à maladie &
pourquoy.**

Mais le pis est qu'il demeure quelque im-
pression & caractere aux ames de cette vi-
cieuse nourriture, comme le Grec escriit au
second liure des Césars, lors qu'il fait men-
tion de Calligula. quatriesme Empereur de
Rome: les cruautéz & infamies duquel n'e-
stoient imputées à pere ny à mere: mais à la
nourrice qui l'alaicta, laquelle outre qu'elle

**Calligula
cruel & in-
fame.**

estoit cruelle & barbare d'elle mesme, encore frotoit elle quelquefois le bout de sa mamelle de sang, & le faisoit succer à l'enfant qu'elle allaitoit.

Sila nourrice est yurongne, elle prepare l'enfant à conuulsion & debilité, mesme le fera yurongne, & comme on lit en la vie de l'Empereur Tibere, qui fut grand yurongne, par ce que la nourrice qui l'alaitoit non seulement beuuoit excessiuelement, mais elle se-
Tibere
yurongne.
 vra l'enfant avec des soupes trempées à du vin.

Et voyla pourquoy le diuin Platon entre les Grecs, & Lycurgue entre les Lacedemoniens ordonnerent & commanderent en toutes leurs loix, non seulement que toutes les femmes simples, mais les bourgeoises, Damoiselles, & de moyen estat, nourrissent leurs enfans, & celles qui estoient Princesses & delicates, au moins qu'elles nourrissent leurs enfans aïsnez, à cause, comme i'ay dit, que l'enfant succe ordinairement l'humeur & l'inclination de la nourrice avec le lait de sa mamelle.

Ioint que comme dit le mesme Platon en son troisieme liure des Loix, que iamais les enfans ne sont autant aimez des meres, comme quand elles les nourrissent de leurs propres mammelles, & que les peres les tiennent entre leurs bras, ce qui est vray semblable pour ce que la premiere amour en toutes choses est la plus vraye amour.

Plutarque au liure du regime des Princes

dit que Thomiste sixiesme Roy des Lacédemoniens, mourant laissa deux enfans desquels le second herita au Royaume, pour ce que la Reynel'auoit nourry, & non le premier à cause qu'une nourrice l'auoit alaieté nour. y & esleué. Et de ce demeura la coustume en la pluspart des Royaumes d'Asie, que l'enfant qui ne seroit alaieté des mammelles de sa propre mere, n'heritast aux biens de son propre père.

Mais sans aller chercher des coustumes plus au loin : les anciennes femmes d'Allemagne sont loüées par Tacite, d'autant que chacune nourrissoit ses enfans de ses propres mammelles, & n'eussent voulu qu'une autre qu'elles les eust alaité, comme il se pratique encor de présent en la pluspart des pays circonuoisins, qui se liberent par ce moyen là, entre les autres inconueniens susdits de recevoir vn enfant pour vn autre, ce qui est quelquefois arriué.

De cette Loy se peult liberer sans scrupule les femmes ausquelles la nature n'a point donné assez de forces pour pouuoir supporter, & le iour & la nuict les importunité d'un enfant criard, car alors selon Dieu on peut auoir recours à vne nourrice, non à la premiere venuë, mais à vne sage & vertueuse, comme firent iadis deux certaines Dames bourgeoises, qui toutes deux firent choix d'une mesme nourrice, à laquelle elles donnerent à nourrir en diuers temps, l'une deux filles, & l'autre deux garçons, laquelle nourrice

rice fit apres le mariage entre ses quatre nourrissons qui se marierent tous en vn mesme iour, & fus prié du festin, où ie n'allay point pour ce qu'ils estoient Huguenots. Mais on peut inferer que le mariage de ces quatre estoit vn mariage bien fait, car ayans esté nourris d'vne mesme mammelle ils pouuoient auoir succé vne mesme humeur, ou du moins qu'il s'estoit attaché en leur nature ie ne sçay quoy de fort approchant à la sagesse & modestie de leur mere de lait.

Nos Sauvageſſes ſans autre Loy que celle que la nature leur donne, d'aymer, nourrir, & eſleuer leurs enfans, puis que les animaux meſmes les plus feroces ont ſoin de leurs petits, les allaictent de leurs propres mammelles, & n'ayans l'vſage ny la commodité de la boullie, elles leur baillent des meſmes viandes deſquelles elles vſent, apres les auoir bien maſchées, & ainſi peu à peu les eſleuent. Que ſi la mere meurt auant que l'enfant ſoit ſeuré, le pere, ou à ſon deffaut vne autre perſonne, fait bouillir du bled d'Inde dans vn pot de terre, puis en tire l'eau, laquelle il prend peu à peu dans ſa bouche & la ioignant à celle de l'enfant luy fait aualler cette eau, qui luy ſert de lait & de boullie, ie l'ay veu ainſi pratiquer à pluſieurs, & particulierement enuers le petit de noſtre Sauvageſſe baptiſée, duquel le pere auoit vn ſoin ſi particulier qu'il ne le negligeoit en rien, & luy faiſoit aualler luy meſme de cette eau, ou bouillon.

Comme les
ſauageſſes
nourriſſent
leurs enfans

De la mesme inuention se seruent aussi les Sauvages pour nourrir les petits chiens que les meres ne peuuent engraisser, ce que ie trouuois fort sale & vilain, d'ainſi ioindre à leur bouche le museau des petits chiens, qui ne sont pas souuent fort nets.

De l'em-
maillotte-
ment.

En quelque Prouince de nostre Inde occidentale, on n'emmaillotte point les enfans, peur de les rendre coubez ou contrefaits par cet empiessément, ce seroit neantmoins les mettre en vn grandissime peril, n'estoit qu'on les couche dans des lits suspendus en l'air, comme font nos Canadiens, d'où ils ne peuuent tomber, ny sortir.

Mais nos Huronnes qui, n'ont point l'vsage du berceau, ny de ses lits suspendus, emmaillotent leurs petits enfans durant le iour dans des peaux sur vne petite planchette de bois de cedre blanc, d'environ deux pieds de longueur ou peu plus, & vn bon pied de largeur, où il y a à quelq'vns vn petit arrest, ou aiz plié en demy rond attaché au dessous des pieds de l'enfant, qu'ils appuyent contre le plancher de la cabane, ou bien elles les portent promener avec icelles derriere leur dos, avec vn collier ou cordelette qui leur pend sur le front. Elles les portent aussi quelquefois nuds hors du maillet dans leur robbe ceinte, pendus à la mamelle, ou derriere leur dos, presque debouts, la teste en dehors, qui regarde des yeux d'un costé & d'autre par dessus les es-

paules de celle qui le porte.

Lors que l'enfant est emmaillotté sur la petite planchette, ordinairement enliuée de marachias & chapelets de pourceleine, ils luy laissent vne ouuerture deuant la nature, par ou il faict son eau; & si c'est vne fille, ils y adioustent vne feuille de bled d'Inde renuëllée, qui sert à porter l'eau dehors, sans que l'enfant soit gasté de ses caues, ny fâché de ce costé là, laquelle inuention est pratiquée par les Turcs mesmes, mais plus commodement, car i'en ay veu vn modèle. Ils font vn pertuis au berceau au dessous du siege de l'enfant qui est descouvert, & appliquent vn tuyau courbé à la nature, lequel passans entre les iambes de l'enfant, respond à ce trou du berceau, sous lequel ils tiennent vn petit pot qui reçoit les excremens & l'vrine, & par ce moyen rend les enfans tousiours nets & mieux sentans que ceux d'icy, d'où ie conclus que pour ce regard on deuroit les imiter, particulièrement les pauures gens qui ont faute de linges, d'estoffes & d'habits.

Les Sauuageses comme elles n'ont iamais eu l'usage du linge, ny la methode d'en faire, encor qu'elles ayent du chanure assez, ont trouuë l'inuention d'vn duuet fort doux de certains roseaux, sur lesquels elles couchent leurs enfans fort mollement, & les nettoient du mesme duuet, ou avec de la poudre de bois sec & pourry, & la nuit venue, elles les couchent souuent

tout nuds entre le pere, & la mere, ou dans le sein de la mere mesme, enuëloppé de sa robe pour le tenir plus chaudement, & n'en arrive, que tres-rarement d'accident.

Les Canadiens, & presque tous les peuples errants, se seruent encore d'une pareille planchette pour coucher leurs enfans, qu'ils appuyent contre quelque arbre ou l'attachent aux branches, mais encores dans des peaux sans planchette, à la maniere qu'on accommode ceux de deça dans des langes, & en cet estat les posent de leur long doucement dans une peau suspendue en l'air, attachée par les quatre coins aux bois de la cabane, comme sont les lits de roseau des Matelots sous le tillac des Nauires, & s'ils veulent bercer l'enfant, ils n'ont qu'à donner un branle à cette peau suspendue, laquelle se berce d'elle mesme.

Endureissent
leurs en-
fans,

Les Cimbres auoient accoustumé de mettre leurs enfans nouveaux naiz parmy les neiges, pour les endurcir au mal, & nos Gaulois au contraire les delicaient le plus qu'ils peuuent, pour les rendre fluets & mal sains, de sorte que s'ils sentent un peu de vent, de chaud, ou de froid plus qu'à l'ordinaire, tout est perdu, voila un enfant malade, il faut le Medecin, il luy faut ouvrir la veine, cette viande ne luy est pas propre, gardez vous du bruit, & pour petit qu'il soit, on fait de son estomach une

boutique d'Apoticaire, & d'où vient cela, c'est qu'ils sont trop mignardez, & nais de parens fluets, car on ne voit point tant d'infirmitez aux enfans villageois non plus qu'à ceux de nos Barbares qui n'y apportent point tant de façon. Bon Dieu que d'abus & de sottise il y a parmy de certaines maisons des grands, vous diriez proprement à les voir faire, & à les entendre qu'ils ont vn autre père qu'Adam, qu'ils ne sont point de la mesme nature des autres hommes, & qu'ils auront vn Paradis à part, ouy & tel qu'ils l'auront fabriqué par leurs œuvres.

Nos Sauvageſſes imitant les Cimbres eſleuent leurs enfans le moins delicatement qu'il leur eſt poſſible, & les laiſſent non ſeulement trotter & courir nuds à quatre pieds, par les cabanes, ſans ayde ny conduite de perſonne; mais eſtans grandeleurs ils ſe ventrent, courent, & ſe roullent dans les neiges, & parmy les plus grandes ardeurs de l'Eſté, ſans en recevoir aucune incommodité, dequoy ie m'eſtonnois fort, & de ce que mettant quelquefois vn petit morceau de ſucre dans la bouche des petits enfans ils me ſuiuoient à quatre pieds comme petites beſtiales, dans les plus grandes rigueurs de la ſaiſon. Et de là vient qu'ils ſ'endurciſſent tellement au mal, & à la peine, qu'eſtans deuenus grands, vieils & chenus, ils reſtent touſiours forts & robuſtes, ſans reſſentir preſque aucune indiſpoſition, &

mesmes les femmes enceintes sont tellement fortes, qu'elles s'accouchent souvent d'elles mesmes, comme elles m'ont dit, & n'en gardent point la cabane pour la pluspart l'en ay veu arriuer de la forest, chargées d'un gros faisceau de bois, qui accouchent dès aussi tost qu'elles estoient arriuées, puis au mesme instant sus pieds, à leur ordinaire exercice.

Les enfans
ne succedent
pas aux
biens du
pere.

Et pour ce que les enfans d'un tel mariage ne se peuuent asseurer legitimes, ils ont cette coustume entre eux, aussi bien qu'en plusieurs autres endroits des Indes Occidentales, que les enfans ne succedent point aux biens de leur pere; mais ils en font successeurs & heritiers, les enfans de leurs propres sœurs, lesquels ils sont asseurez estre de leur sang & parentage, & par ainsi les hommes sont hors du hazard d'auoir pour heritiers les enfans d'autrui bien qu'ils fussent de leurs propres femmes.

En suite de celail y en a qui pourroient douter que les peres eussent de l'amitié pour leurs enfans, n'estans point asseurez qu'ils fussent de leur fait, ou non, mais ie vous asseure encor vne fois, qu'ils les tiennent si cher, & en font tant d'estat qu'ils ne les voyent pas à demy, leur donnent toute la liberté qu'ils veulent, & ne les reprennent pour faute aucune, car de chastiment il ne s'en parle point, c'est pourquoy il ne faut pas s'estonner si estans grands ils se portent facilement au vice, puis que dans

Les familles Chrestiennes, & Religieuses, où la correction, & le chastiment manque à la jeunesse, on n'y voit que desordre, qu'ambition & presumption d'esprit, avec plus d'excez de beaucoup que dans les familles Sauvages les plus Barbares, & esloignées de la cognoissance de Dieu.

Il faut que ie m'explique & dise, (pour ne condamner les innocens avec les coupables) que s'il y a vn grand nombre d'enfans Sauvages mal sages, & vicieux, & sans le respect deu à leurs parens, il y en a vn autre grand nombre qui font mieux. Car outre qu'ils n'ont pas tant de legerecez pueriles, comme beaucoup d'enfans de par deça, ils sont doüez d'une petite grauité si iolie, & d'une modestie naturelle si honneste, que cela les rends extrêmement agreables & aymables, de sorte que ie prenois vn singulier plaisir de leur enseigner les lettres, & de les instruire en la Loy de Dieu, selon qu'ils en estoient capables; aussi en auions nous tousiours plusieurs dans nostre cabane, où nous leur donnions facile accez, aux heures qui ne nous estoient point incommodés, & non sans quelque difficulté aux mauuais garçons, pour les obliger à imiter les bons.

Honneste-
té des en-
fans Sau-
uages.

Nous en auions pratiqué cinq ou six de tres-iolys, beaux, & d'un fort bon esprit pour les amener en France, avec le consentement de leurs peres & meres, mais quand

il fut question de partir, cet amour si tendre des meres, & le reciproque des enfans enuers elles, tira tant de larmes des yeux des vns & des autres, qu'en fin elles esteignirent cette premiere deuotion, par vn ouy dire qu'on fottiettoit, qu'on pendoit, & qu'on faisoit mourir les hommes entre les François, sans discerner l'innocent du coupable, doctrine qui leur auoit esté donnée par le Huron Sauoignon, laquelle nous empescha du tout d'en pouuoir amener aucun quelque promesse que leur fissions d'un bon traictement, & de les ramener en leur pays dans dix huit ou vingt Lunes, qui font vn an & demy de temps, car il ne se pouuoit à moins.

De l'instruction de la ieunesse, & des exercices ordinaires des enfans. De la dissolution des François. Et d'une certaine Nation où l'on coupe le né des filles mal viuantes.

CHAPITRE XX.

De l'instruction des enfans Romains,

CE grand Empereur Marc Aurelle, que pleust à Dieu qu'il eut esté Chrestien, il ne luy eut rien manqué digne d'un Prince egallement puissant, & vertueux.

Discourant vn iour avec son amy Pullion du
soin que les anciens Romains auoient d'in-
struire leurs enfans dans la vertu & l'habitude
des bonnes mœurs, dit de luy mesme ces parol-
les, dignes à la verité d'estre grauées & buri-
nées sur le cœur de tous ceux qui ont à gou-
uerner la ieunesse & les esprits encores ten-
dres, dans la vertu.

Mon pere Anne Vere, fut en cas autant
digne de loüange, comme ie suis digne de re-
prehension: car moy estant ieune enfant, iamais
ne me laissa dormir en liêt, assoir en chaire,
boire ny manger avec luy à sa table, & si n'osois
hausser ny leuer la teste ny les yeux pour le re-
garder en face, & pour ce souuent me disoit:
Marc mon fils, i'ayme trop plus que tu sois ver-
tueux & honneste Romain, que Philosophe
superbe & dissolu, car celuy là est indigne de
viure & de paroistre entre les hommes qui
n'ensuit la vertu, laquelle les Dieux mesmes re-
compensent dans le Ciel, & les hommes hono-
rent sur la terre.

Puis poursuivant son discours disoit: ancien-
nement les enfans des bons tettoient iusques à
deux ans, iusqu'à quatre viuoient en leur appe-
tit & volonté, lisoient iusques à six, & estu-
dioient en Grammaire iusques à dix ans, puis
deuoient prendre office ou mestier, selon qu'ils
se sentoient appellés ou destinés, ou s'adonner
à l'estude, ou aller aux exercices de la guerre, de
maniere que parmy Rome ils n'alloient oisifs
ny vagabons, veu mesmes qu'ils auoient des
Maistres & Precepteurs vieils & tellement fa-

ges & prudents, que leur seule presence sans dire mot, estoit capable de les maintenir dans leur deuoir & conseruer dans la vertu.

Qualité
d'un bon
Precepteur.

I'ay estudié, dit ce bon Prince, en Grammaire avec vn Maistre qui s'appelloit Euphermō, il auoit la teste toute blanche de vieillesse, il estoit fort moderé en parler, en discipline fort rigoureux, & en la vie tres-honneste, pour ce qu'en Rome y auoit vne Loy, que les Maistres des enfans fussent fort anciens, de maniere que si le disciple auoit l'age de dix ans, le Maistre deuoit passer cinquante. Et ce qui faict qu'à present on voit si peu d'enfans sages & modestes, c'est pource que les Maistres sont eux mesmes ieunes & sans vertu, & ont encore moins d'experience; c'est pourquoy on ne doit trouuer estrange si on ne leur obey pas tousiours en choses iustes & licites, puis qu'en imprudens & peu experimentez, ils commandent souuent choses iniustes, où par vne maniere trop precipitée s'emportent au gré de leurs passions à la moindre mousche qui les picque, pensans par là se faire estimer bon conducteur de la discipline & du bon gouuernement, en mesme parallele de ceux qui pour estre maintenus, tolloient les choses qu'ils deuroient corriger.

Effet du
commandement.

Car les commandemens iustes & bien digerez, encore qu'il n'appartienne pas aux disciples de les examiner, font les cœurs doux, souples & debonnaires, comme au contraire, les commandemens iniustes ou mal faicts, tournent & conuertissent les hommes humbles & doux, en personages durs & austeres, comme

L'experience nous l'a faiet voir maintefois, & dans les Religions les plus austeres meſmes, où la voye de la douceur eſt toujours employée la premiere, puis la verge ſi elle ne ſuffit.

Il eſt vray, que nous voyons ſouuent des peres, eſtre la cauſe de la perte de leurs enfans, & de la corruption de leurs mœurs, par les mauuiſes habitudes qu'ils leur laiſſent prendre en leur bas aage. Car les vns ſont gloire de les nourrir dans les delicateſſes & les delices, & leur ſouffrent de faire tout ce qu'ils veulent, comme s'ils eſtoient enchantez des merueilles imaginaires de leur eſprit & de leur beauté, ſans ſe mettre en peine de ce qui en arriuera quand ils ſeront grands. Les autres tout au contraire les eſleuent avec trop de rigueur, comme aux maiſons des mecaniques, & ceux cy les perdent encore; car comme par vne exceſſiue delicateſſe, les forces du corps & de l'eſprit ſ'affoibliſſent, auſſi par vn chaſtiment trop rude, ils deuiennent ſi hebetez qu'ils perdent ſouuent toute eſperance d'apprendre, & ſont en des apprehenſions continuelles, qui les empêchent de faire rien de viril, de maniere que pour les rendre tels qu'ils doiuent eſtre, il n'eſt rien meilleur que de tenir vn milieu entre la douceur & la ſeuerité, afin qu'aux occasions ils ſoient toujours diſcrets & ſages, & apprennent ſans timidité.

Or que ce milieu dans lequel conſiſte la vertu ſoit pratiquée par nos Sauuages enuers leurs enfans, il y a apparence qu'ils n'y manquent pas en toutes choſes, bien qu'ils leur ſouffrent

Peres cauſe
de la perte
de leurs
enfans.

les desobeïssances, & de manquer au respect qu'ils doiuent à leurs parens. l'en ay veu de bien sages, i'en ay veu de bien fols & temeraires, mais cela venoit del'instinct & inclination de leur propre nature, à laquelle ils adherent, & non de l'instruction & conduite de leurs parens, lesquels les laissent viure dans toute sorte de liberté, la bride sur le col & sans chastiment, comme ils ont esté eux mesmes esleuez sans correction, car les Sauvages n'en sçauroient souffrir à leurs enfans, & de verité ils n'en meritent souuent pas tant que ceux d'icy, pour ce qu'ils ont moins de malices & moins d'instructions.

S'ils ne sçauent que cest d'estre rudoyez & seuerement reprimendez, ils n'experimentent non plus de delicatesses & sont esleuez fort austèrement. De ses petites mignardises & caresses que les peres & meres traictent icy leurs enfans, on ne sçait que c'est aux Canadiens, car ils ayment d'une amitié plus cachée que descouverte, & plus virillement que sensuellement, & par ceste maniere de gouvernement l'on peut iuger comme i'ay desja dit, que nos Canadiens tiennent quelque chose du milieu en la conduite de leurs enfans, & mesme nos Montagnais, lesquels ne font autre reprimende à leurs petits garçons quand ils crient, que de leur dire: & quoy ne veux tu pas te taire, ie te dis que tu ne tueras point d'Ours, d'Esclans, ny de Castors, & si tu te tais tu en tueras. Et aux filles ils leur disent seulement. Cheté ega maché, arreste-toy, ne crie pas, & rien plus.

Leurs exercices ordinaires, particulièrement *Exercices*
des ieunes garçons, n'est pas de bien employer des garçons
le temps, ny d'apprendre mestier, car il n'y en a
point entre nos Canadiens & Hurons, où cha-
cun mesnage faißt de luy mesme ce qui luy est
conuenable & necessaire, soit à coudre, à filler,
faire des pots de terre, & toute autre ouurage
& action de mestier qui leur faißt besoin; mais
nos ieunes Hurons s'exercent principalement
à tirer de l'arc en quoy ils se rendent fort
adroits, à darder la fleche, qu'ils font bondir &
glisser droict superficiellement par dessus le
paué, iotier avec des bastons courbez qu'ils
font couler par dessus la neige, & croasser vne
bale de bois léger, comme l'on faißt par-deça.
Apprendre à ietter la fourchette avec quoy ils
herponnent le poisson entre les enfans des
Quiéuontateronons, & darder l'espée entre
nos Montagnais, par le moyen d'un baston au
bout duquel ils attachent vne alaine, qu'ils
eslancent contre vn but, puis à beaucoup d'au-
tres petits ieux & exercices de recreation, qui
ne les empêchent pas de se retrouver à la caba-
ne aux heures des repas, & lors qu'ils ont faim
d'aller griller du bled.

Que si vne mere prie son fils d'aller querir
del'eau, du bois, ou faire quelque autre sembla-
ble seruice du mesnage, il luy respond que c'est
vn ouurage de fille & n'en faißt rien: que si par
fois nous obteniõs d'eux de sēblables seruices,
c'estoit à condition qu'ils auroient tousiours
entrée en nostre cabane, ou pour quelque
espingles, plumes ou autre petite chose à se pa-

rer, dequoy ils estoient fort contans & nous aussi, pour ces petits & menus seruices que nous en receuions.

Il y en auoit pourtant de malicieux, qui se donnoient le plaisir de couper la corde qui sostenoit nostre porte en l'air, & puis estant tombées nioient absolument que ce fussent eux, ou bié prenoient la fuite, car ils n'aduouient iamais guère leur faute s'ils ne sont attrapez sur le fait ou que l'on ne leur conuainque l'esprit par raisons; C'est vne petite vanité qui n'est pas blasmable en eux, comme elle pourroit estre en des Chrestiens de vouloir estre estimé meilleur qu'on n'est, c'est neantmoins la perfection du iourd'huy, car qui voyons nous qui vueille souffrir le mespris qu'il merite, ou d'estre estimé pour tel qu'il est, personne, car le monde ne veut point de ces pratiques là, on la laisse pour les Cloistres, encores y est elle souuent bien mal traictée & encores plus mal receuë, par ceux qui en deuroient monstre l'exemple aux autres.

Il y en a qui veulent bien estre estimez pour tels qu'ils sont, non par vertu, mais par imprudence, & font voir eux memes à descouuert l'imperfection & malice de leur esprit, de laquelle ils veulent tirer gloire, mais gloire qui leur tournera à confusion devant Dieu.

**Exercices
des petites
filles.**

De mesme que les petits garçons ont leur exercice particulier, & apprennent à tirer de l'arc les vns avec les autres, si tost qu'ils commencent à marcher. On met aussi vn petit baston entre les mains des petites fillettes, en mes-

me temps qu'elles commencent de se fortifier, pour les stiller & apprendre de bonne heure à piler le bled, qui est leur exercice plus rude, & estans grandelettes elles ioüent aussi à diuers petits ieux avec leurs compaignes, & parmy ces petits ébats on les dresse encore doucement à de petits & menus seruices du mefnage, & aussi quelquefois (chose deplorable) au mal qu'elles voyent commettre deuant leurs yeux, qui faict qu'estans grandes elles ne valent rien pour la pluspart & sont pires (peu exceptées) que les garçons mesmes, se vantans souuent du mal, qui les deuroit faire rougir & qu'elles n'ont pas commis pour se faire rechercher & admirer comme valeureuses desbauchées.

Les Montagnaites apprennent aussi ce qui est du mefnage, à faire les robes, les raquettes, les escuelles, vstencilles, vaisselles & autres petites ioliuetez, peindre & faire des franges aux robes & nagent comme canars. Je loué nostre Seigneur, de ce que les Huronnes prenoient d'assez bõne part nos reprimandes, & qu'à la fin elles cõmençoient d'auoir de la retenuë & quelque honte de leur dissolution, n'osans plus que fort rarement vser de leurs impertinentes parolles en nostre presence, & admiroient en approuuant l'honnesteté que leur disions estre aux filles de par-deça, ce qui nous donnoit esperance d'un prochain amendement de vie, si les François qui estoient montez avec nous par vne malice effrenée, ne leur eüssent dit le contraire, diffamans & taxans meschammét l'honneur & la pudicité des femmes & filles de leur

François
dissolus.

païs, pour pouuoir continuer avec plus de liberté leur vie infame & mauuaise, tellement que ceux qui nous deuoiuent seconder & seruir par bons exemples, à l'instruction & conuersion de ce peuple, estoient ceux-là mesmes qui nous empeschoient, & destruisoient le bien que nous allions establisans. Il y en auoit neantmoins quelqu'vns de tres honnestes & discrets, lesquels s'ils faisoient du mal, il ne venoit pas à nostre cognoissance, & n'esclatoit point en publique.

Tous les peuples infidelles & barbares, ne sont point neantmoins tous tellement abrutis dans le mal & si plôgez dans l'horreur du vice, qu'il ne s'y en trouue encore quelqu'vns, qui obseruent les Loix de l'honnesteté & plus rigoureusement que les Chrestiens mesmes, bien que les premiers n'ayent aucune Loy, qui leur deffende le mal, & les derniers ayent les deffences expressees du Createur de ne le commettre pas.

L'vn de nos François nommé Grenole, ayant esté à la traite du costé Nord, en vne nation esloignée enuiron cent lieues des Hurons, tirant à la mine cuiure, nous dit à son retour y auoir veu plusieurs filles, ausquelles on auoit coupé le bout du nez selon la coustume du pais, pour auoir fait bresche à leur honneur, (bien opposite & contraire, à celle de nos Hurons & Canadiens, qui leur permet toute liberté,) & nous assura de plus auoir veu ces Sauvages, faire quelque forme de prieres auant que prendre leur repas: qui estoit vn preiugé, qu'ils recognoissent

Filles qui
ont le nez
coupé.

Sauvages
prient Dieu.

reconnoissoient & adoroient vrayement quelque diuinité, à laquelle ils rendoient aussi action de graces après leur repas. Ceste disposition nous fist conceuoir vn grand desir d'y aller, si Dieu par sa diuine prouidence n'en eut autrement ordonné, me renuoyant pour affaires en Canada, & de là en France pour Paris.

Dé l'excellence de l'escriture. Des principes que nous en donnions aux enfans Hurons, de leur langue & de celle des Canadiens.

CHAPIRE XXI.

ENtre toutes les choses plus admirables du monde, l'escriture est digne de tres-grande admiration. Premièrement pour son premier Autheur qui a esté Dieu mesme, secondement pour son vtilité, Dieu en a esté le premier Autheur, comme les parolles qu'il tint à Moysse nous l'apprennent: monte dit le Seigneur, & vien me treuuer sur la montaigne, là ie te bailleray deux tables de pierre: la Loy & les commandemens que i'ay escriits, afin que tu les enseignes aux fils d'Israël. Ce que Dieu auoit escrit estoit engraué dans les tables que Moysse rompit puis après émeu de colere, lors qu'il trouua les enfans d'Israël idolatrans après le veau d'airain.

Dieu Autheur de l'escriture.

Moyse se-
cond Au-
theur.

Depuis Dieu fit commandement à Moyse de renouueller les tables, & d'escrire ce qui estoit contenu en celles qui estoient rompuës, si bien que nous voyons par là, que c'est Dieu qui est Autheur de l'escriture, & que Moyse a esté le premier entre les hommes, qui a escrit, voyons de l'imprimerie.

De l'impri-
merie.

L'inuention de l'imprimerie en l'Europe, comme tient la commune opinion, a commencé en l'an de grace 1438. & est attribuée à vn Allemand appellé Iean Guttemberg, & le premier moule dont ont imprima se fit en la ville de Mayence en Allemagne, duquel lieu vn autre Allemand nommé Conrad en porta l'inuention en Italie, & que le premier liure qui s'imprima, ce fut vn œuvre de S. Augustin, lequel est intitulé De la Cité de Dieu.

De l'inuen-
tion de
l'artillerie.

Mais les Chinois peuples inuentifs & des mieux polissez de la terre, s'attribuent avec quelque apparence de raison, l'honneur d'en auoir esté les premiers inuenteurs, & que les peuples Germanicques ne l'ont sçeu qu'après eux, ou appris de quelqu'un d'eux. De mesme ils s'attribuent l'honneur d'auoir esté les premiers inuenteurs de l'artillerie, car elle ne comença en l'Europe qu'en l'an 1330. par l'industrie d'un Allemand. Munster en sa Cosmographie liu. 7. dit en l'an 1354. par vn Moine Allemand nommé Bertholde Sohonores.

A la verité on ne scauroit assez louer l'inuention & l'vtilité de l'Ecriture, puis qu'un Dieu en a esté le premier Autheur, & que d'elle depend la principale science des hommes, mais

pour ce qu'elle ne s'apprend qu'avec peine & vn grand temps, peu de Hurons s'y vouloient adonner, & se contentoient de conter les fueillets de nos liures ; & d'en admirer les images avec tant d'attention qu'ils perdoient tout autre soin, & y eussent passé les iours & les nuits entiers qui les eut laissé faire, mais vn si fréquent maniemement de nos liures, qu'ils demandoiēt à voir à tout moment les vns après les autres, principalement la S. Bible pour sa grosseur & ses images, les perdoit & rendoient tout fripez.

Nous auions commencé d'enseigner aux enfans, les lettres & l'eseriture, mais cōme ils sont libertins & ne demandent qu'à iouer & se donner du bon temps, ils oubloient en trois iours ce que nous leurs auions appris en quatre, faute de continuer & nous venir retrouver aux heures que leur auions prescrites, & pour nous dire qu'ils auoient esté empêchez à iouer, ils en estoient quittes, sans autre plus grande ceremonie, aussi n'estoit il pas encore à propos de les rudoier ny reprendre autrement que doucement, & par vne maniere affable les admonester de bien apprendre vne science qui leur deuoit tant profiter à l'aduenir, s'ils s'y addoient avec soin, plaisir & contentement.

Il y auoit des hommes qui nous demandoiēt d'apprendre le François avec eux, mais comme en toute leur langue il ne se trouue aucune lettre labiale, ny les vns ny les autres, n'en pouuoient prononcer vne seule que tres-difficilement. Pour dire P. ils disoient T. pour F. S. &

Enseignés
les lettres
aux enfans.

N'ont point
de lettres
labiales.

pour M N &c. & par ainsi il leur eut esté com-
me impossible de la pouuoir apprendre dans
leur pais (i'entends les personnes aagées)
qu'avec vne grand longueur de temps & des
peines indicibles , & suis assuré qu'un ieune
garçon Huron s'efforça deux & trois cens fois
pour pouuoir prononcer la lettre P. & ne pût
iamais dire que T. car voulant dire Pere Ga-
briel il disoit T. Auuel.

Les Montagnais non plus que les Hurons,
n'ont pas tant de lettres en leur Alphabeth, que
nous en auons au nostre, car ils n'ont point les
lettres F. L. V. ils prononcēt vn R. au lieu d'un
L. ils prononcent vn P. au lieu d'un V. & ont
plusieurs autres obseruations en leur lāgue, qui
ne peunēt estre concenes que par ceux qui ont
l'vsage de ladite langue, mais elle est telle que
les enfans qui ont la langue assez bien pendue
prendroiet bien-tost nostre prononciatiō si on
les instruisoit, & encores assez facilement les
Hurons, car les deux qui furent enuoyez en
Frâce il y a quelques années, dont l'un nommé
Sauoignon est retourné en son pais, & l'autre
nommé Louys est resté à Kebec, s'y sont for-
mez, particulièrement le petit Louys, car pour
l'autre il n'y a iamais esté bien sçauant, aussi
estoit il plus aagé & moins apte pour apprēdre
que le dernier qui estoit plus ieune & gentil.

Il faut que ie vous die de ce Sauuage ce petit
mot en passant, que tous les Hurons l'esti-
moient menteur, lors qu'il leur racontoit les
merueilles qu'il auoit veuës en nostre Europe,
comme en effect il y a des choses qu'ils cro-

voient impossible, comme vn carosse attelé de six & huit cheuaux, vn orloge sonnant, & beaucoup d'autres choses, que nostre tefmoignage leur fist croire faisable.

Ce bon Sauoignon se resouuenoit bien de la bonne chere qu'il auoit fait en France & s'en vantoit par tout, neantmoins il ne luy print iamais enuie d'y vouloir retourner, iusques à vn certain iour qu'ayant receu mescontentement de sa compagne, il print resolution de s'en vouloir retourner & demandoit à nos François s'il y pourroit auoir vne femme pour trois castors, encor croyoit il la mettre à bien haut prix, ce qui nous donna plus de compassion, que d'enuie de rire.

Ces simplicitéz particulieres n'empêchent pas, qu'il ne se trouue des gés d'esprit entr'eux, & qu'on n'en puisse faire quelque chose de bô, car il n'y a que la politesse qui leur manque, & si nous eussions esté encore deux ans dans le païs, ie croy que nous en eussions rendu d'auancez aux lettres, & de bien instruits en la foy, car les hommes comprenoient assez bien, & les enfans tenoient gentiment la plume.

Toufiours ces commencemens seruiron de beaucoup à ceux qui iront après nous travailler en ceste vigne, car la chose plus difficile est faicte & les principales pieces esbauchées, il n'y a plus qu'à les polir qu'elles ne soient parfaites. Je scay bien que les derniers ouuriers sont toufiours assez peu d'estat du travail des premiers & y trouuent souuent à redire. Ce sont maladies naturelles qui naissent avec

l'homme, lesquelles il faut excuser & nō point condamner, puis que Dieu seul est le Iuge de nos actions.

Les langues ne se sçauent pas sans fautes, qu'après vne grande pratique & longue experience, à la Françoisē mesme, personne ne se dit parfait tant elle est changeante & fuiette à la caprice des hommes, qui inuentent tous les iours des mots nouueaux, ou vne nouvelle façon de prononcer, de sorte que l'ancien Gaulois semble auourd'huy vn langage estranger, comme le sera à cent ans d'icy, celui duquel on vſe pour le iourd'huy.

Dés la France i'auois vne grande inclination pour les langues Sauuages, afin qu'en y profitant ie puisse après profiter aux ames, & en auois desja assemblé vne quantité de mots, mais pour ne lēs sçauoir prononcer à la cadence du pais, à la premiere rencontre que ie fis des Montagnais, pensans baragouiner, ie demeuray muet, & eux avec moy.

Le truchement refuse d'enseigner la langue.

Marry que i'en perdu & ma peine & mon soin, avec toutes mes estudes que i'auois faictes sans autre maistre que du petit Patetchouan, ie m'adressay au truchement Marsolet, pour en auoir quelque instruction, mais il me dit franchement dedans nostre barque à Tadoussac, qu'il ne le pouuoit nullement & que ie m'adressasse à vn autre; ie luy en demanday la raison, il me dit qu'il n'en auoit point d'autre que le serment qu'il auoit faict de n'enseigner rien de la langue à qui que ce fut.

Me voyla donc escondit, & ne me rebute

pas pourtant, ie le prie derechef de m'apprendre quelque mots de ce langage, puis qu'il n'y en auoit point d'autre plus capable que luy, & que ie le seruirois en autre occasion, mais il continuë en son refus, ne voulant pas, disoit-il, faulser son serment & faire rien contre ses promesses, neantmoins à la fin il me lascha ces deux mots Montagnais, *Nomakinisitotatiû*, qui veulent dire en François, non ie ne t'entend point, car en Huron il faudroit dire: *Danstan tearonca*. Voyla tout ce que ie pû tirer de luy avec toute mon industrie, & croy que tout son plus grand serment estoit de se rendre necessaire, & de ne laisser empieter personne sur son office, mais s'estoit mal prédre ses mesures que des'adresser à nous, qui n'estions pas pour luy nuire.

Ce peu que i'en ay sçeu dauantage, ie l'ay appris de nos Religieux de Kebec, des Montagnais & d'un petit Dictionnaire, composé & escrit de la propre main de Pierre Anthoine nostre Canadien, que i'ay creu d'autant plus asseuré, que ce Sauuage l'a fait auant qu'auoir perdu les Idées de sa langue, & s'il est fautif en quelque chose, c'est en la mesme maniere que ie le suis en la langue François, en comparaison d'un Orateur disert, car il y a le bon & le mauuais Montagnais, comme le bon & le mauuais François, duquel i'ymite le dernier pour ne pouuoir faire mieux.

Toutes les langues de la nouuelle France se peuuent reduire en deux principales: à sçauoir, Huronne & Canadienne. La Huronne cōprend presque toutes celles qui courent, les natifs se-

dentaires & quelqu'vnes des errantes, comme les Houandates, les Quicunontateronons, Sontouhouerhonons, Attiuoindarons, Assistague-ronons, & autres des contrées de la mer douce, lesquelles toutes ensemble peuuent contenir enuiron 3. ou 4. cens mille ames en 200. lieues de pais, qui feroient vne belle Prouince si elles estoient possédées par vn seul Prince Chrestien, car pour le iourd'huy les montagnes, les fleuues & les riuieres, ne seruēt point de limites ny de bornes aux Prouinces & Regions, ains les langues, & les Seigneuries, & se dit vne Prouince & Region auoir autant d'estendue comme la langue d'icelle est parlée & entendue en icelle.

La Canadiene cōprend presque toutes les nations errantes, qui tiennent depuis l'emboucheure du grand fleue S. Laurens, iusques au pais des Hurons, parmy lesquelles nous cōprenons les Almouchiquois, Montagnais, la petite Nation. Les Sauuages de l'Isle, les Ebicerinys, & generallyment tous les Algoumequins & autres nations errantes, qui se rencontrent dans l'estendue de plus de 350. lieues de pais, qui ne peuuent faire en tout à mon aduis, 50. ou 60. mille ames au plus, & tous errants & vagabons comme i'ay dit.

Il demeure dōc constant que nous n'auōs que deux langues principales dans tout l'estendu e de nostre Canada, & que tout tant qu'il y ena deriuēt del'vne deses deux, & n'y a autre difference, que du Gascon ou du Prouençal au François, car encor biē qu'il y ait vn truchemēt particulier pour les Montagnais, vn autre pour les Sauuages de l'Isle, & vn pour les Ebicerinys,

Si est ce que c'est toujours vne mesme langue, & n'y a autre difference que celle que ie vien de dire, qui est assez neantmoins pour obliger d'auoir par tout des Truchemens diuers, tant pour n'ignorer rien des langues, & d'une infinité de mots qu'ils ont de differens les vns des autres, que pour maintenir les François en l'amitié de ses peuples, & attirer leurs castors en procurant leur salut.

On dit qu'il y a en quelque contrée des Indes, vne Nation dont les hommes ont vn langage particulier, & les femmes vn autre, sans qu'il leur soit loisible d'vser de celuy de leur marys, il n'en est pas de mesme entre nos Nations Canadiennes, mais entre toutes il me semble que les femmes Ebiceriniennes parlent le plus delicatement, & mignardement, elles ont vn petit bec affilé dont vous diriez que les paroles leur partent du bout des levres, & ce qui en est plus admirable est, qu'elles coulent de suite sans hesiter ny reprendre haleine, & si doucement qu'à peine leur voyez vous ouurir les levres en leurs petits entretiens & esbats.

Ie m'estonnois mesme comme elles se pouuoient entendre, & le Truchement Richer comprendre ce qu'elles disoient, car pour moy, il faut que i'aduouë qu'il m'eust esté bien difficile de m'y rendre sçauant.

I'en voulu faire l'experience au pays des Hurons, où elles estoient venues hyuerner avec leur marys, & en receu des leçons du

Truchement que j'estudiay quelque temps ensemble, avec le Montagnais & mon Huron, mais ne my pouuans aduancer pour en auoir trop entrepris à la fois, ie fus contraint de quitter les deux premiers, & vaquer seulement à la dernière, car en pensant parler d'une y entremellois des mots de l'autre, ie courois apres trois lieures & n'en prenois aucun.

Et pour vous monstrier qu'en effet il y a beaucoup de periodes qui ne se rapportent point aux langages des Montagnais, & Ebicerinys non plus qu'au Huron, qui est vne langue particuliere, & que le baragouin de l'un est differant du baragouin de l'autre, ie vous en rapporteray icy quelques mots, par le moyen desquels vous cognoistrez la difference veritable mentionnée cy-dessus.

Par exemple : Les Hurons appellent vn chien gagnenon. Les Ebicerinys arionce, & les Montagnais atimoy, voyla vne grande difference en ces trois mots qui ne signifient tous qu'une mesme chose. De plus : Pour dire en Huron j'ay faim; Atoronchesta, en Montagnais Niuhimitifonne, & en Ebicerinys Ninihoinchaé. Et pour demander à manger nos Hurons vsent de ce seul mot Taetsenten, les Montagnais de celuy cy Minimitfon, & les Ebiceriniens de cet autre Michilmijchim. Tellement qu'on voit en ce peu de mots bien peu de rapport, particulierement du langage Huron aux deux autres qui ont quelque correspondance.

Il se trouue vne autre grande difficulté en ces langues, en la prononciation de quelque syllabes, à laquelle consistent les diuerses significations d'un mesme mot, qui est vne difficulté plus grande que l'on ne pense pas, car manquez seulement en vne, vous manquez en tout, ou si vous vous faites entendre ce sera tout autrement que vous ne desirez, comme en ce mot Ebicerinien: Kidauskinne, lequel avec vne certaine façon de prononcer veut dire, tu n'as point d'esprit, & par vn autre ton signifie: tu as menty.

Autre difficulté en la prononciation.

Ainsi en est il de quantité d'autres mots, c'est pourquoy il faut ayder à la lettre, & apprendre la cadance, si on y veut profiter, car le Truchement Bruslé s'y est quelquefois luy mesme trouué bien empesché, & moy encore plus lors que les Hurons me faisoient recorder & souuent repeter de certains mots difficiles que ie ne scauois comment prononcer, & n'y pouuois auenir avec toutes les peines que i'y prenois, que de fort loing, (i'entends de quelque mots) nonobstant l'assistance & le secours du Truchement, c'est ce qui nous fit iuger que nos principaux maistres en cet art, deuoient estre nos soins & la frequente communication avec les Sauvages.

Auant que ie fusse passé dans les Indes Canadiennes, & aucunement recognu la façon de parler de ses habitans, ie croyois leur langue dans l'exces de pauvreté, côme elle est en

effet de beaucoup de mots, pour autant qu'ils n'ayans point de cognoissance de beaucoup de choses qui sont en nostre Europe; ils n'ont point de noms pour les signifier, mais l'ay recognu du depuis qu'ils ont des choses dont ils ont cognoissance, leurs langues sont en quelque chose plus secondes & nombreuses, pouuans dire vne mesme chose par quantité de differents mots, entre lesquels ils en ont de si riches, qu'un seul peut signifier autant que quatre des nostres, principalement la langue Huronne, c'est à dire qu'ils ont vne infinité de mots composez, lesquels font des sentences entieres, comme les caracteres des Chinois.

Je sçay bien qu'il y peut auoir des fautes en mes Dictionnaires, & que plusieurs choses y manquent pour les rendre parfaicts, mais ie ne doute point aussi qu'un plus habile que moy, ne se trouuat bien empesché de pouuoir faire mieux en si peu de temps que j'y ay employé, tousiours c'est vn travail qui n'est pas petit ny de petit profit, car pourueu qu'on sçache la prononciation des mots plus difficiles, on peut aller avec iceux, par tout leur pays & traiter sans Truchement, qui est vn bien, & vne commodité qui ne se peut estimer, & de laquelle plusieurs se seruent, pour n'y en auoir encor eu aucun autre que les miens. C'est neantmoins vne chose bien pitoyable à l'homme d'estre en cela plus miserable que les oyseaux, & bestes brutes, lesquelles se font entendre à toutes celles de

leur mesme espece en quelque part du monde qu'elles se rencontrent, car elles n'ont toutes qu'une mesme voix, là où l'homme pour peu qu'il s'absente du lieu de sa naissance, demeure muet, & sans communication, dont on doit attribuer la disgrâce à nos pechez.

Ceux qui ont estudié quelque peu en Magie, selon quelques Autheurs, sçavent fort bien qu'aucuns liures de cette mauuaise science, enseignent quelques moyens pour paruenir à la perfection de l'intelligence de ces voix, sons, paroles, ou langues de ces oyseaux, & animaux, comme vn Apollonius Thyaneus grand magicien, lequel entendoit le iargon des oyseaux, & la voix des animaux, par laquelle il recueilloit les conceptions de leurs fantasies, ce que faisoit aussi Melampus fils de Amythaon. Mais pour nos langues sauuages qui en tous siecles changent pour le moins vne fois, le conseilerois volontiers ceux qui en ont la puissance d'abatardir & biffer toutes celles qui sont en vſage chez les Hurons, & Canadiens, & d'introduire en leur place la langue Francoise par tout, car qu'elle apparence que tant de petits peuples ayent des langues si differentes & si difficiles à apprendre, le suiet ne le merite pas, & si les Religieux qui ont à les instruire, y ont trop de difficulté, tant y a qu'il y a (comme ie croy) moins de peuples en tous ces pays là, en y comprenant encore toute l'Acadie, où nous auons fait bastir vne

maison l'an 1630. en la Baye du port du Cap Naigré, que les François ont nommé le port de la Tour à cause de l'habitation des François, ou commande le sieur de la Tour, qu'en la seule ville de Paris, & de là jugez s'il seroit à propos de maintenir tant de langues différentes, & les réduire en arts, comme on pourroit faire, mais sans nécessité.

Il est dit des anciens Roys de Mexique, de mesme que de ceux du Peru, qu'ils n'auoient moins de soin d'estendre leur langue que leur Empire, car au nouveau monde la langue de Mexique estoit estendue par l'espace de mille lieues, & celle de Cusco capitale de l'Empire du Peru n'en auoit pas moins, & combien qu'on vse en ces deux grands Royaumes ou Empires de plusieurs langues particuliers, & fort différentes entr'elles, considéré leur longue estendue, toutefois celle de la ville de Mexique est belle & riche & commune à toute la nouuelle Espagne, & celle de Cusco au Peru, comme entre nous la Latine, & entre les Turcs l'Esclauonne en Europe, & l'Arabique en Asie.

Tellement qu'il fustit (au rapport de quelque Historien) à ceux qui prêchent la parole de Dieu, d'apprendre vne seule langue de celles là pour aller par vn pays long de deux ou trois mille lieues, au lieu qu'il leur auroit fallu 15. ou 20. langues, voire d'auantage, pour pouuoit porter l'Euangile de nostre Seigneur par tout cette estendue de Prouinces & Royaumes.

*De la forme , couleur & statuë des Sauua-
ges , & de leurs parures , ornemens &
matachias.*

CHAPITRE XXII.

Toutes les Nations & peuples Indiens,
& Sauvages que nous auons veus en
nostre voyage, sont presque tous de couleur
brune, oliuatre ou bazanné (excepté les dents
qu'ils ont merueilleusement blanches) non
qu'ils naissent tels, mais cela vient de la nudité,
de l'ardeur du Soleil qui leur donne à plôb
sur le dos, & des diuerses graisses, huyles, &
peintures, desquelles ils se frottent & pei-
gnent souuent tout le corps, comme nous
voyons en France à ceux qui se font appeller
Egyptiens ou Bohemiens, lesquels changent
leur couleur blanche en brune, & oliuastre,
par le moyen des huyles desquelles ils se frot-
tent le corps pour sembler Egyptien, bien
qu'ils soient François, & n'ayent ressen-
ty autre chaleur que celle d'icy, ny habité autre
climat que celui de la France.

Cette couleur pourtant ne diminuë en
rien de leur beauté naturelle, des traicts de
leur visage, ny de la iuste proportion de
leurs corps, qui ne cedent en rien à ceux d'i-

cy, car ils sont tous généralement bien formez & proportionnez sans difformité aucune, marchent droit avec vn maintien grave & modeste, sans estre aucunement courbé, bossu, vouté, boiteux, borgnes, ou aueugles, d'où vous voyez d'aussi beaux enfans, & des personnes d'aussi bonne grace qu'il y en scauroit auoir en France, entre lesquels ie n'y ay iamais veu autre deffaut, qu'un Honqueronon borgne encor par accident, & vn bon vieillard Huron, qui pour estre tombé du haut d'une cabane en bas s'estoit fait boiteux.

Ils sont de mesme grandeur & hauteur que par deçà, tous dispos, gais, & alaignés, ieunes & vieux, ne sont point valetudinaires comme la pluspart de nous autres, ny suiets à la goutte, comme beaucoup de personnes trop à leur aise, il n'y a pas mesme de ces gros ventrus pleins d'humeurs & de graisses, que nous auons icy, car ils ne sont ny trop gras ny trop maigres, aussi n'ont ils pas trop de quoy s'engraisier, & c'est ce qui les maintient en santé, & exempts de beaucoup de maladies, ausquelles nous sommes suiets par trop faire bonne chere; car comme dit Aristote; il n'y a rien qui conserue mieux la santé de l'homme que la sobriété, laquelle ils obseruent mieux que nos gens, sans soucy, & moins que nos auares, tenans le milieu entre les deux.

L'une des raisons principales pour laquelle nos Sauvages n'ont rien de difforme en leurs

leurs corps, vient de ce qu'ils ne sont point violentez ou contraincts, comme les mignons & muguettes de par deça, par des habits trop estroicts qui forcent leur naturelle disposition, & la raison en est tres-bonne, d'autant que par cet empressement d'habits pour sembler linges & bien faites, les femmes qui en vsent de la sorte sont pour la pluspart contrefaictes, bossuës, voutées, & ridées, encore qu'il n'apparoisse point au dehors, lesquelles si elles estoient veües en cette difformité par les Sauuâges, ils auroient de quoy rire & se mocquer de nous, eux qui n'ont accoustumé de voir les choses que dans le naturel non violenté.

Il faut aduoüer pourrant que ces affiquets mondains, ces gorges descouuertes, & ces estroffes rauissantes, quelque difformité qu'elles couurent sont des pieges bien plus peſans, & desquels le Diable tire vn bien plus grand aduantage que de la nudité de nos Sauuagesſes, qui porte ie ne ſçay quoy de desſaiſant à la veüë de ceux qui l'ont tant ſoit peu chaſte, car il n'y a que les mal ſages qui s'y meſſent.

Or laissons à part les difformitez qui viennent par accident, & disons qu'il est vray semblable que les femmes, entre les Chrestiens, engendrent plus de monstres, & d'enfans marquez & contrefaicts, que ne font les femmes Sauuagesſes de nostre Canada, & me ſemble que cela arriue plus ordinairement à celles qui ſont les mignardes, & de

licates, & qui ont le loisir d'entretenir leurs pensées, qu'à celles qui ont moins de loisir, car n'ayans point d'occupations serieuses, il faut de nécessité qu'elles donnent lieu à vne partie de leurs folles imaginations & fantasies, ce que ne font point les villageoises, non plus que les femmes dotées d'un esprit masle & resolu qui occupent le temps. L'en pourrois rapporter icy vne infinité d'exemples, & des choses mesmes que j'ay veues de mes yeux, si le suiet le meritoit, ou que la chose fut tirée en doute, mais comme le cas est assez commun, & que l'on voit en beaucoup de lieux des personnes ayans de ses marqués sur leurs corps, ou au vilage, qui vne folle, qui vne leltre de lieure, vne prune, vne tache de vin, &c. ie n'en diray pas davantage, sinon de vous assurer que j'ay veu deux enfans jumeaux n'auoir qu'un dos, ou plustost auoir les deux dos collez ensemble, & les autres parties du corps parfaites en chacune d'elles.

Au mois d'Octobre dernier ie vis à Paris au bout du pont neuf, vn ieune garçon de Genes, aagé de seize ans, en auoir vn autre qui luy sortoit du milieu du ventre, à vne cuisse près, qui luy restoit dedans le corps, & n'en sembloit guere incommodé, sinon vn peu à la pesanteur du fardeau qui luy pendoit. Au mesme mois d'Octobre dernier le 20. il nasquit à Londres capitale d'Angleterre, vne fille monstrueuse ayant deux testes, & deux vilagés bien formez, quatre

bras, deux cuisses, deux iambes, & deux pieds, avec vne forme de queue, & ayant esté ouuerte apres sa mort en la presence du Roy d'Angleterre, il luy fut trouué deux cœurs. Ces deux ou trois exemples doiuent suffire pour confirmation des choses que j'ay dites, car ce ne seroit iamais fait, qui voudroit s'amuser à discourir des miseres dont la nature est souuent vitiée par nos pechez, ou ceux de nos parens, desquels les enfans portent souuent la peine, ou en leur esprit, ou en leurs membres. Je les puniray iusques à la troisieme, & quatrieme generation, dit Dieu aux saintes lettres.

Les ieunes femmes, & filles sont grandement curieuses d'huyler leurs cheueux, & de se peindre & parer le corps avec diuers petits fatras, pour sembler belles aux assemblées, & aux dances, où elles paroissent tousiours avec tous leurs atours. Si elles ont des matachias & pourceleines elles ne les oublient point, non plus que les rasfades, patinotres, & autres bagatelles que les François leur traictent, & desquelles elles font estat, comme nous de l'or & des pierreries.

Leurs vignols & pourceleines sont diuersement enfilées, les vnes en colliers larges de trois ou quatre doigts, comme vne sangle de cheual qui en auroit ses fisselles toutes enfilées & accommodées, & ces colliers ont enuiron trois pieds & demy de tour ou plus, qu'elles mettent en quantité

à leur col, selon leur moyen & richesse, puis d'autres enfilées comme nos chaines & cha-pelets de diuers longueurs pour pendre de meisme à leur col, & aussi à leurs oreilles. Elles en font encores d'autres de vignols gros commenoix, assez mal arondis (à cause de leur dureté) qu'elles attachent sur les deux hanches, & viennent par deuant ar-rangées de haut en bas par dessus leurs cuif-fes & brayers. Il y en a de celles qui portent encores des brasselets de pourceleine aux bras, & de grandes plaques accommo-dées de meisme par deuant leur estomach, & d'autres par derriere en rond & en quar-ré comme vne carde à carder la laine, at-tachées à leurs tresses de cheveux: quel-qu'vnes d'entr'elles ont aussi des chaines, ceintures, & des brasselets faits de poil de porc epic, taints en rouge eramoisy & fort proprement tissues, les vns larges comme vne sangle, & les autres comme vne grosse gan-ce, & cette teinture est si viue, & tient de tel-le sorte qu'elle fait honte à l'escarlatae.

Pour les ieunes hommes ils ont la meisme curiosité de s'embellir & farder comme les filles. Ils huylent leurs cheveux, & y ap-pliquent des plumes & du duuet fort io-liement, & au lieu de collet de fine toille, ils se font des petites fraizes du meisme du-uet, qu'ils mettent autour de leur col, fort proprement arrangez. Il y en a qui pour brâuerie, portent de grandes peaux de ser-pens sur le front en guyse de frontaux, qui

leur pendent par derriere vne grande aulne de Paris de chacun costé.

Ils se peignent aussi le corps & la face de diuerses couleurs, de vert, de iaune, de noir, rouge, & violet qui sont leurs couleurs les plus communes. Vous leur voyez quelquefois la face toute bigarée, de rouge, & de vert, quelquefois ils n'en peignent qu'un costé, depuis le sommet de la teste iusques au col, il y en a de si industrieux qu'ils se figurent toute la face, & le corps deuant & derriere, de passements tirez au naturel, & des compartimens avec diuerses figures d'animaux assez bien faites pour des personnes qui n'ont pas appris l'art de la peinture.

Mais ce que ie trouuois de plus estrange, & d'une folie plus eminente, estoit de ceux qui pour estre estimez courageux, & redoutables à leurs ennemys, prenoient vn os d'oyseau ou de poisson qu'ils affiloient comme rasoirs, avec lesquels ils se grauoient & figuroient le corps, mais à diuerses reprises, comme l'on faict icy vne paire d'armes avec le burin. En quoy ils monstroient vn courage, & patience admirable au delà du commun des hommes, non qu'ils ne ressentissent bien le mal, car ils ne sont pas insensibles, mais pour les voir immobiles & muets en vn si furieux chatouillement, puis on essuyoit le sang qui leur decouloit de ces incisions, lesquelles ils frottoient in-

continent apres avec quelque couleur noire en poudre, qui s'insinuoit dedans les cicatrices, si que les figures qu'ils ont grauées leur demeurent sur le corps pour tousiours, sans que jamais on les puisse effacer, non plus que les marques qu'ont au bras les Peletrins qui reuiennent de Hierusalem.

Tous n'en veulent pas neantmoins souffrir la peine, aussi n'en sont ils pas tous accommodez, mais les Sauuages qui s'y plaisent d'auantage sont les pe-tunex, lesquels ont pour la plusspart le corps ainsi figuré, ce qui les rends effroyables & hideux, à ceux qui n'ont pas accoustumé de voir de tels masques, car ils me sembloient à moy mesme en les regardans l'image de quelque Demon, avec lesquels ie ne me trouuois pas trop as-seuré au commencement, & guere plus à la fin.

Il y a des femmes, & filles, mais peu qui souffrent ces incisions, dont i'en ay veu quelqu'vnes qui estoient figurées iusques par dessus les yeux, & tout cela pour sembler autant valeureuses que belles, & redoutables. I'ay veu des Sauuages d'une certaine Nation auoir tous le milieu des narrines percées, ausquelles pendoient des patinotres bleuës assez grosses, qui leur battoient la levre d'en-haut, attachées à des petites cordelettes ou filets.

Et comme ils ne portent rien sur leur

corps que pour ornement, ou pour se defendre du froid ; Nos Sauvages croyoient au commencement que nous portassions nos Chapelets à la ceinture pour embellissement, comme ils font leurs pourceleines, mais en comparaison ils en faisoient fort peu d'estat, disans : qu'ils n'estoient que de bois, & que leur pourceleine qu'ils appellent Onocoirota estoit de grande valeur, pour la petite teste de mort qui y estoit attachée, beaucoup la croyoient auoir esté d'un enfant viuant, mais ie les ostay incontinent de cette pensée, & la volonté aux femmes de vouloir emprunter nostre manteau, & nostre capuce, pour aller en festin, & voir les nouvelles mariées, car elles m'en importunoient fort, & se fussent carrées avec cela comme fort parées & gentilles.

Pour nos sandales ou semelles de bois, ie leur permettois bien à tous d'y mettre le pied, & les esprouer, mais à condition de me les rapporter incontinent peur de les perdre. Ils me disoient prou, Auiel Saracogna, Gabriel fais moy des souliers, car ils appelloient nos sandales souliers, mais ie n'estois pas en lieu pour leur en pouuoir faire, & d'y mettre la main eux mesmes, outre qu'ils sont trop paresseux d'apprendre, ils n'auoient pas les outils propres, non plus que moy, qui me seruois d'un seul meschant petit outil pour les miennes, & au lieu de cloux (car il ne s'en trouue pas dans le pays) nous nous

*Comme les Sauvages accommodent leur
 chevelure. De la barbe & de l'opinion
 qu'ils ont qu'elle amoindrit l'esprit.
 Comme saint François n'en a point por-
 té. Des Pygmées , & d'une fille velue &
 ayant barbe.*

CHAPITRE XXIII.

TOUS les esprits des hommes ne vivent pas dans vn mesme sentiment , ny dans vne mesme pensée , car chacun a ses opinions particulieres , d'où viennent nos difficultez , & les diuerses disputes entre les hommes , mais le Sage cede tousiours à la raison , & le fol à son opinion , pour ce que l'opiniâtreté ne vient que d'ignorance.

Saint Augustin a dit parlant de la barbe de l'homme , qu'elle est vne marque de force & de courage , & nos Sauvages tout au contraire , tiennent avec le reste des peuples Americains qu'elle amoindrit l'esprit , & rend la personne difforme & espouventable , comme ie vous feray voir par quelques petits traits familiers que i'ay appris & vus dans le pays.

Par ces opinions, ils ont la barbe & le poil tellement en horreur qu'ils n'en peuvent souffrir vn seul petit brin ailleurs qu'à la teste, se l'attachent & en ostent mesme la cause productive, de maniere qu'on ne peut presque discerner le visage d'un homme d'avec celuy d'une femme, & pensans faire iniure à nos François desquels ils auoient assez mauuaise opinion à cause de leur barbe, ils les appelloient *fascoinronte*, qui est à dire barbu, tu es vn barbu, & par ce moyen les obligeoient pour auoir paix, de se razer & se conformer aucunement à eux en leur poil & cheuelure, comme ils l'estoient des ja aux habits & en la nudité pour la netteté.

Et non seulement ils auoient vne si mauuaise opinion de la barbe & des barbus, mais ils nous vouloient mesme persuader d'arracher la nostre, quoy que fort courte, & nous disoient que nous en serions de beaucoup plus beaux & agreables en nostre conuersation. Il arriva vn iour qu'un Sauvage des plus laids d'entre les petuneux, voyant passer vn de nos François avec sa grande barbe & ses moustaches mal releuées, plein d'estonnement & d'admiration, se tournant à ses compagnons leur dit: voyez ce sale barbu, ce laid homme, est il possible qu'aucune femme le voulut enuifager de bon œil, c'est vn ours, & luy mesme estoit vn vray masque; c'est pourquoy il auoit fort bonne grace de mespriser ce barbu & de l'appeller ours, luy qui estoit laid par despit.

Il arriva vne histoire aussi plaisante au truchement des Ebicerinys nommé Iean Richer,

Horreur
que les sau-
uages ont
de la barbe.

lors qu'ils luy voulurent faire croire qu'il commençoit d'auoir de l'esprit. Il y auoit deux ans & plus, qu'il estoit dans leur pais & viuoit avec eux assez doucement en apprenant leur langue pour d'icelle seruir les François à la traicte. A la verité il y auoit assez bien profité & s'en seruoit fort à propos & mesme d'un peu de la Huronne qu'il scauoit passablement. Or ces Sauvages, après luy auoir faict quelques reproches d'auoir quitté le mauuais pais de la France, pour venir habiter le leur beaucoup plus beau & meilleur, luy dirent : & bien, iusque à present tu as presque vescu en beste sans cognoissance & sans esprit, mais maintenant que tu commence à bien parler nostre langue, si tu n'auois point de barbe, tu aurois presque autant d'esprit qu'une telle nation, luy en nommant vne qu'ils estimoient auoir beaucoup moins d'esprit qu'eux, & les François auoir encor moins d'esprit que cette nation là, tellement qu'il eut fallu à leur compte que ce truchemēt eut encor estudié pour le moins deux ou trois ans leur langue & n'auoir point du tout de barbe, pour y estre estimé homme d'esprit & de iugement; & voylà l'estime qu'il font de nos gés, par vne seconde raison, du peu de vertu & de modestie qu'ils voyent en ceux qu'on enuoye de delà, ausquels ils ne se fient que de bonne sorte, & pour le moindre suiet leur disent l'injure ordinaire Téondion ou Tescaondion, c'est à dire, tu n'as point d'esprit. Atache, mal basty.

A nous autres Religieux, quelques mal aduisez nous en disoient autant au commence-

ent; mais à la fin ils nous eurent en meilleure
time, & nous disoient au contraire: *Cachia*
indion, vous auez grandement d'esprit: *howan-*
ate danstan tébondion, & les Hurons n'en ont
point; vous estes gens qui cognoissez les choses
en haut & surnaturelles & qui pouuez scauoir
les choses les plus cachées & secrettes, ce qu'ils
disoient à cause de nos escritures, & que nous
leur enseignions des choses qu'ils auoient igno-
rées iusques alors, & n'auoient point ceste bon-
ne opinion des autres François, ausquels ils
referoient la sagesse de leurs enfans, pour ce
qu'ils ne leur disoient que des sottizes.

Que si ces peuples Americains, qui font
presque la moitié de toute la terre habitable, ne
portent point de barbe, il n'y a de quoy s'esmer-
veiller, puis que les anciens Romains mesmes,
estimans que cela leur seruoit d'empesche-
ment, n'en ont point porté iusques à l'Em-
pereur Adrien, & selon quelque Autheur,
François Marquis de Mantouë (qui mourut
an 1519. pere de Federic 5. qui fut crée Duc
de Mantouë par Charles quint) fut le premier
de tous les Princes d'Italie, qui nourrit tous-
iours vne longue barbe. Ce qu'ils reputoient
si utilement à honneur, qu'un homme accusé de
quelque crime n'auoit point ce priuilege de
faire razer son poil, comme se peut recueillir
par le tesmoignage d'Aulus Gellius, parlant de
Scipion, fils de Paul, & par les anciennes me-
dailles des Romains & Gaulois, que nous
oyons encores à present en plusieurs lieux.

C'est ce qui a fait que beaucoup se sont

Les Rois
maines ne
portent
point de
barbe.

S. François
ne portoit
point de
barbe.

autrefois estonnés & avec raison de ce que S. François (Italien de nation) estoit peint avec vn peu de barbe, car ny Prestre, ny Moine, ny Religieux, ny mesme aucun Lay, nourrissoit sa barbe de ce temps là. Qui a fait penser ou que c'est vne licence de peindre, ou que S. François fut portraict lors qu'il alloit ou reuenoit d'Orient, comme nous lisons de S. Dominique, cause que les Latins & Occidentaux, faisans le voyage d'outre mer, entretenoient leur barbe longue, comme font encore de present nos Religieux, pour se conformer à la coustume du pais, auquel la barbe raze estoit honteuse, & appelloient les hommes de deça eunuques chastres & effeminés, cōme se lit dans les histoires de la guerre Sainte. Il ne faut donc point penser que S. François portast ordinairement barbe longue, cela estant tres-seuerement défendu & puny par les saints Canons. Ie laisse icy ce qui est de plus commun sur ceste matiere, me contentant d'un iugement de Gregoire 7. qui scioit l'an 1170. Lib. 8. Reg. Epist. 10. Orsoe Gouverneur de Calaris Capitale du Royaume de Sardaigne. Nous ne voulons point que vostre prudence trouue mauuais de ce que nous auons contrainct Iacques vostre Archeuesque de razer sa barbe, car telle est la coustume de la sainte Eglise Romaine pratiquée dès sa naissance, que tout le Clergé de l'Eglise Occidentale raze sa barbe &c. Et ne faut point penser que saint François eut voulu controuenir au commandement de l'Eglise par quelque singularité ou vanité. De nostre me

dire les souveraines Cours de Parlement, Auespiā.
 et prononcé des Arrêts tres-rigoureux cōtre
 toute sorte de personnes, qui ne razoient point
 leurs barbes, d'où reste encores le proverbe.
urba raza, respondebit curia.

Nos François qui ne demandoient qu'à rire
 plaisanter, auoient fait entendre aux Huron-
 s, que les femmes de France auoient de la
 barbe, & leur auoient encore persuadé tout
 ain d'autres choses, que par honnesteté ie
 n'escris point icy, de sorte qu'elles estoient fort
 effrayées d'en voir; mais les Hurons qui me ra-
 cōterent en Canada, ayans veu Mademoiselle
 Champlain ay' esté assuré qu'elle estoit fem-
 me, ils furent des trompez, & reconnurēt qu'en
 fait on leur en auoit donné à garder.

De ces particularitez on peut inferer que
 les Sauvages ne sont point velus, comme quel-
 ques vns pourroient penser. Cela appartient
 aux habitans des Isles Gorgades, d'où le Capi-
 taine Hanno Cartaginois, rapporta deux peaux
 de femmes toutes velues, lesquelles il mit au
 temple de Iuno par grande singularité, & ay-
 ant dire à vne personne digne de foy, d'en
 auoir veu vne toute pareille à Paris, qu'on y
 auoit apportée par grande rareté, & à vne au-
 tre d'auoir veu vne fille viuante toute couuverte
 de poil comme vne beste en vne ville de Fran-
 ce dont j'ay oublié le nom; mais bien da-
 uantage vn de nos Religieux m'a assuré
 auoir veu deux Sauvages en l'armée des Es-
 pagnols pendant la ligue, tellement velus du
 poil iusques à la teste, qu'on ne leur voyoit que

le blanc des yeux. Ce sont des merueilles de nature, qui ont donné l'opinion à plusieurs que tous les Sauvages estoient velus, bien que le soient moins naturellement que les personnes de nostre Europe, entre lesquelles il s'en voit quantité qui ont l'estomach tout couu de poils, ce que ie n'ay point veu en aucun Sauvage.

Au mois d'Octobre de l'an 1633. ie vis à Paris vne fille du pais de Saxe, aagée d'environ quatre ans & demy, laquelle auoit vne barbe blonde, fine presque comme soye, longue & large en arondissant comme celle d'un homme de 35 a 40. ans, & ce qui estoit encor fort admirable, il luy sortoit du dedans des deux oreilles deux grandes moustaches longues presque d'un pied, & au dessus des reins vne autre plus courte, qui sembloit vne queue, qui fit penser à plusieurs qu'il y eut quelque chose du Satyre en cette fille, mais ils se trompoient, car hors-mes sa longue barbe & qu'elle estoit velue par tout le corps d'un poil blond semblable à celui de la barbe, elle estoit fort agreable tant en la disposition du corps, qu'en la gentillesse de son esprit, autant honneste, que iouialle & plaisante.

Si quelqu'un entroit dans la chambre pour la voir, en se promenant sur la table qui luy seruoit de theatre, elle baisoit doucement sa main leur presentoit & les saluoit de fort bonne grace en disant: bon iour mon pere, soyez le bien venu Monsieur, (car on luy auoit appris quelques petits mots François qu'elle prononçoit)

fort gentiment.) Lors que d'abord ie la vy pour la premiere fois, il me sembloit voir en elles vn vieillard du pais des pigmées, qu'on dit n'auoir qu'une coudée de hauteur au rapport de plusieurs historiens, car celle-cy n'en auoit guere dauantage.

Or puis que i'ay icy entamé le discours des Pigmées, il semble que par bien-seance ie sois comme obligé d'en dire ce que i'ay appris de diuers Autheurs approuuez, pour aucunement satisfaire ceux qui sont encor en doute, sçauoir s'il y en a, ou non, car le nombre des Escriptuains, qui ont escrit de ces Nains est si celebre & leurs raisons si probables, qu'elles persuadent vn chacun à les croire. Or entre vn tel nombre il me semble que le tesmoignage d'un S. Augustin nous doit suffire, sans parler de celuy des Autheurs prophanes & plus anciens, comme d'Aristote, voicy ces parolles. Les Grues (dit-il) viennent des campagnes Scythiques iusques aux paluds de l'Egypte superieure, d'où sort le Nil, auquel lieu l'on dit qu'elles font la guerre aux Pygmées.

Mela, parle aussi de ceste sorte de gens en ces termes. Les Pygmées sont vne certaine espeece de genre humain, qui ont guerres contre les Grues pour les bleds femez. Pline encore fait souvent mention d'eux, car il dit, qu'ils ont habité en Scythie & en la ville de Geranie, & près de Thebaide, & au pais de Prasic, & lieux montaigneux, & après il escrit qu'ils habitent ioignant les Palus d'où le Nil prend sa source, & voicy ce qu'il en dit encores. Aux confins d'In-

die, qui sont les plus esloignez, & auprès du fleuve Ganges, & en l'extremité des montagnes, demeurent les Pygmées. Aule Gelle, & parle encore comme faiët aussi Isidore, & chacun des Ecrivains, les faiët de la hauteur d'un coudée. Elian de mesme, disant que la nation des Pygmées a accoustumé d'avoir des Rois, & lors que les Rois leur vindrent à deffaillir, ils eurent vne Reine, qu'ils appellerent Gerane, c'est à dire Grue en leur langue.

Ceux qui ont couru de nostre siecle toute la terre par leurs navigations, ont aussi rendu témoignage des Pygmées, qu'ils ont descouverts, car Anthoine Pigafera les decouvrit entre les Moluques en l'Isle Arucheto, & outre il dit qu'ils habitent encores entre les mesmes Moluques en l'Isle Caphicos, Paul Ioue, confirme son dire assurant qu'ils sont outre les Lapons grand babillards, tousiours en crainte & presque semblables aux Singes. Nous avons encores ce qu'en dit Odetic, qu'il vit des Pygmées aux Indes de la grandeur de trois paumes de la main, lesquels engendrent en l'age de cinq ans, il dit en outre qu'il y en a de la mesme stature en l'Indie Orientale, non loin de Quinsay joignant Chile. Albert le Grand adiouste cecy : ces Pygmées que nous disons habiter près du Nil, combattent perpetuellement contre les Grues, engendrent en l'age de trois ans, & meurent à huit. J'ay leu dans quelque Auteur dont il ne me souvient pas du nom, d'un petit animal qui naist au matin, vieillit à midy, & meurt au soir.

Lib 7. tr. 1.
cap. 6.

Par ce moyen l'on doit adiouster foy à tant d'Autheurs celebres, qui traictent de ces Pygmées; lesquels font leur demeure en la Plage Australe, Orientale, & Aquilonaire: mais plus en l'Occidentale.

Auparauant que i'en eusse leu de si asseurez tesmoignages, ie me doutois fort de la verité de la chose, & qu'il s'y trouuast des nations d'hommes si petits, mais'à present cela m'est assez facile à croire, veu mesme qu'entre les Européens, il s'y engendre quelquefois de petits Nains que les Princes entretiennent & nourrissent par admiration. Voicy ce que dit Nicephore d'un certain tout semblable aux Lib. II. c. Pygmées fort prudent & fort sage qui nasquit 38. en Egypte sous l'Empire de Theodose, d'une si petite stature qu'elle est incroyable, car il estoit si petit, qu'il sembloit vne perdrix: & c'estoit aussi vn plaisant spectacle de le voir conuerser en la compagnie des hommes, & de le voir debattre & gauffer parmy eux. En fin cecy est admirable, qu'il estoit capable de prudence, aussi bien qu'un homme parfait, & pourquoy ne le seroient pas de mesme les Pygmées, où la contrée & le climat, sinon la race, n'engendre que des Nains. Vn homme petit peut auoir la mesme sagesse d'un geant, fut il de ceux desquels la S. Escriture fait souuent mention de leur force. c. 13. me, car au liure des Nombres il est dit que le reste des hommes sembloient sauterelles au respect d'eux. Et au mesme liure il est fait c. 21. mention d'un Geant memorable nommé Og, qui tirant son origine des Geants qui se seruoit

d'un liât de fer, lequel auoit neuf coudées en longueur, & quatre en largeur, ce que redit aussi Theodoret, & neantmoins personne n'oseroit soustenir que ce Geant non plus que le Goliath, eut plus d'esprit que le petit Dauid.

Mais voicy bien vn autre prodige. Il me souuient qu'estant petit garçon, on m'envoyoit fort soigneusement à l'escole où nous auions entre nous autres petits escoliers de fort plaisans & serieux entretiens, car comme chacun apprenoit quelque chose à la maison de son pere ou en quelque bonne compagnie où la curiosité nous portoit, (car souuent la ieunesse, sans qu'on s'en donne de garde obserue ce que les grands discourent) nous faisons nostre profit de tout & rapportions tous nos petits contes en nostre conseil d'estat, composé de quatre ou cinq petits garçons de nostre humeur, car la compagnie de tous ne nous agreoit pas, principalement des iuristes, menteurs ou desbauchez.

Or vous pouuez croire que quoy que nous parlâssions assez serieusement & non point en enfans de sept à huit ans, que nous occupions beaucoup de temps (après nos leçons estudiées) à discourir des fables & des Romans, desquels les seruiteurs nous entretenoient les soirs auant de nous coucher, mais sur tout nous entrions dans l'admiration, sur la pensée des iugemens de Dieu, qui nous venoit par la contemplation d'un

grand iugement dépeint contre la muraille d'une Chappelle, duquel nous faisons reflexion sur les Infidelles & Sauvages, desquels nous auons ouy parler à nos petits Maistres, j'appelle petits Maistres, certains escoliers sages, qui nous faisoient repeter nos leçons, auant d'aller deuant le grand Maistre.

Or ces Sauvages qu'on nous faisoit perdus avec tous les mauuais Chrestiens, nous faisoient bien quelque compassion, mais les contes & le recit de leur forme & figure nous faisoient douter qu'ils fussent hommes comme nous, car on nous les figuroit generalement tous velus, comme beaucoup sont encore dans cette erreur là; non seulement les hommes sans lettres, mais plusieurs qui se croient sages. On nous parloit aussi de cette sorte de gens que nous appellons Pygmées, desquels ie viens de traicter, mais bien particulièrement d'une autre espece du genre humain qui estoient sans testes, ayans les yeux & la bouche dans l'estomach, & d'autres qui n'auoient qu'un œil posé sur le milieu du front, mais ceux qui nous sembloient les plus heureux & accommodez, estoient ceux qu'on nous disoit auoir l'un de leur pieds large comme un grand van à vaner, duquel ils se seruoient pour se couvrir en temps de pluyes, qui par ce moyen en estoient garantis.

Depuis que j'ay esté grand ie me suis tris de tous ces contes & croyances enfantines, & n'y ay adiousté de foy iusque à present, qu'en lisant

r'ay trouué que nous auions quelque raison, & que parmy nos fables il s'y trouuoit quelque verité, ou bien les Autheurs nous trompent aussi bien que nos petits Maistres. Strabon s'est mocqué autrefois de Megasthenes, par ce qu'il auoit escrit, qu'il y auoit des hommes differents de testes, de bouche, d'oreilles, de plante de pieds, & de tout le corps: toutesfois il est conuaincu aysément par le nombre & autorité de ceux qui ont escrit de ces choses: mais afin de commencer par la teste, Mela nous escrit que les Blemiens, n'en ont point, & que toutes les parties de leur visage sont en la poitrine, Solin nous apprend le mesme. On trouue (dit-il) des hommes qui n'ont point de testes, & qui ont les yeux aux espaulles, & auparauant ceux-cy, d'autres en ont escrit le mesme, qu'Aule Gelle recite.

Pline assure le mesme en termes exprés & bien souuent, disant: qu'ils n'ont point de teste ayant la bouche & les yeux en leur poitrine: & en autre part il dit que près des Troglodites, il y en a qui n'en ont point, ayant les yeux sur les espaulles.

Il n'y a personne qui nous force à ceste croyance: neantmoins combien que S. Augustin die que nous ne sommes pas astraits de le croire, toutesfois il semble qu'il infere qu'il n'est pas impossible que cela soit: puisque mesmes au Sermon trente & septiesme qu'il adresse aux freres Hermites, il tesmoigne le auoir luy mesme veus, en ces termes: l'estoit desja Euesque d'Hippone. (dit-il) lors qu'ac-

compagnez de certains seruiteurs de Iesus-Christ, ie m'en allay en Ethiopie, pour y prescher l'Euangile, où nous vismes plusieurs hommes, & plusieurs femmes, qui n'auoient point de testes, mais bien des yeux gros fichez en la poiſtrine; le reste de leurs membres estoit semblable aux nostres.

Reprenons nostre petite fille veluë que ie vis à Paris: car quelqu'un pourroit douter si elle estoit hermafrodite, ou artificiellement barbuë & veluë. Non, ie dis qu'elle n'estoit point hermafrodite & n'auoit aucun artifice en son faict, car pour en oster l'opinion, on ne faisoit aucune difficulté de la faire voir à nud deuant tout le monde, & puis son ieune aage demostroist assez la merueille, & que naturellement elle estoit sortie du ventre de sa mere veluë, comme vn autre Esau.

D'où vient donc ce poil & cette barbe en vn aage si tendre & extraordinaire, ie n'en scaurois donner autre raison sinon, que cela peut venir de l'imagination & fantasie de la mere au réps de la conception, & que i'ay veu de mesme la fille d'une honneste damoiselle de la ville de Paris ressembler au pourtrait d'une Vierge deuant laquelle elle souloit faire tous les iours ses prieres. Mais ce que i'ay trouué de plus admirable est qu'un de nos amis ayant aduerty sa femme, que s'il luy prenoit en fantasie de manger quelque chose qu'elle ne pût auoir, qu'elle ne portast point sa main en son visage, ains en quelque partie cachée, ce qu'elle fist, & en vn mesme endroiſt son enfant fut marqué, com-

me elle nous a assuré elle mesme, ce que ie dis par charité & pour aduertissement aux femmes, de se resouuenir de cet aduis remarquable, car toutes ne le sçauent point, autrement on ne verroit pas tant de difformité au visage que plusieurs portent comme les indices de la foiblesse de leur mere. Les exemples en cette matiere ne sont que trop frequentes, il suffit qu'on se souuienne des moyens dont Iacob vza chez son beau pere Laban, pour auoir des Agnets tachez, & que la femme sans son vouloir peut marquer en son fruct quelque chose de son obiet ou de son imagination au temps de la conception.

Lycurgus souloit dire que les cheueux rendent ceux qui sont beaux encores plus beaux, & ceux qui sont laids encores plus laids & espouuentables à voir; c'est la perruque qui donnoit lustre à la rare beauté d'Absolon, comme les moustaches voltigeantes de nos Sauageses de l'Isle, aux traits de leur visage assez bien faicts, si leur ame plus noble, n'estoit souillée par le peché & la corruption des mœurs vitiées; parmy toutes lesquelles non plus qu'entre les hommes, il ne s'y voit aucune rouffe ny blonde de cheueux, mais les ont tous noirs (excepté quelques vnes qui les ont chastaignez) lesquels elles accommodent & aiancent diuersement selon les nations, car entre toutes il y a de la differance aysée à cognoistre.

Les Canadiens & Montagnais tant hommes que femmes, portent tous longue chevelure qui leur bat sur les espauls & a costé des iouës,

sans estre noiez ny attachez, & n'en couppent qu'un bien peu du deuant, qui restent courts sur le front, comme les garfettes des femmes mondaines, à cause que cela leur empescheroit la veüe en courant.

Les femmes & filles Algoumequines, m'partissent leur longue chevelure en trois, les deux parts leur pendent de costé & d'autre sur les oreilles & à costé des iouës, & l'autre partie est accommodée par derriere en tresse, en la forme d'un marteau pendant couché sur le dos, de la longueur d'environ cinq quarts de pied. Mais les Huronnes & petuneuses ne font de tous leurs cheveux qu'une tresse accommodée de mesme celle des Algoumequines qui leur bat sur le dos, liez & agencez avec des lanieres de peaux d'Esclans ou d'autres animaux qu'ils ont à commoditez.

Pour les hommes ils portent deux grandes moustaches pendantes à costé des iouës, & quelqu'un n'en portent qu'une qu'ils tressent & cordellent quelquefois avec des plumes & autres bagatelles qu'ils y entremeslent, le reste des cheveux est couppé court ou bien en compartimens & en telle autre maniere qu'il leur plaist, estimant à beauté que le dessous de la couronne soit raz & couppé de près, & mesme aux petits garçons le reste des cheveux, excepté les moustaches, à cause des petits vermisseaux.

Depuis nostre arriuée, plusieurs femmes prenoient plaisir de faire des tonsures & couronnes clericales à leurs enfans, pour les rendre semblables à nous, à ce qu'elles disoient, & ainsi.

garçons mesmes s'en glorifioient en nous les montrans; ie pensé les en reprendre, mais ie me retins comme n'y ayans point de mal en ceste imitation; au contraire vn tesmoignage d'amitié & d'estime. Il n'y a pas iusques à des vieillards mesmes qui en ont voulu porter, aucuns desquels estoient tellement curieux de parures, bien qu'ils eussent des-ja par maniere de dire, vn pied dans la fosse, qu'ils se faisoient couper les cheueux par petits compartimens & y accommoder des plumes & du duuet, comme les petits enfans.

Pour les cheueux ou poils leuez des nations que nous auons au Su, ils entretiennent tous leurs cheueux sur le front fort droitz & releuez, plus que n'estoient ceux que nos Dames portoient anciennement, ils sont coupez de mesure, allans tousiours en diminuant & racourcissans de dessus le front iusques derriere de la teste.

De l'humeur, vertu, & inclination naturelle des Sauvages en general, & de quelques exemples propres à ce sujet.

CHAPITRE XXIV.

Toutes les œuvres de Dieu sont admirables, & telles qu'on n'y peut que changer ny desirer, de sorte qu'il nous suffit de dire, Dieu les a faictes, mais entre celles qui nous sont visibles, & que nous pouuons contempler des yeux du corps, ie trouue que le visage de l'homme n'est point assez admiré. Il y a près de six mil ans que le monde est créé & neantmoins entre tant de personnes que la femme a enfanté, & que du depuis le Paradis, & l'Enfer ont partagez, deux ne se sont pas de tout point trouuez semblables.

Or de mesme que le visage de l'homme est diuers, l'esprit, l'humeur, & le naturel en est different, car si l'un est ioyeux, l'autre est triste, si l'un a vn bon entendement, l'autre en a peu ou point du tout; & personne neantmoins ne veut aduoüer son imperfection, car souuent les plus fols veulent estre estimez les plus sages, & les plus opiniatres prudents, mais prudence de beste.

Dans la face de l'homme comme dans vn miroir on iuge souuent des pensées de l'esprit, mais l'action, & non le semblant nous

faict cognoistre pour tels que nous sommes. Il y a diuerſes ioyes comme il y a diuerſes ſources d'où elles procedent, mais la meilleure de toutes eſt celle qui vient de la bonne conſcience, comme la fauſſe & batarde des plaiſirs du ſens & de la bonne opinion de ſoy-meſme.

Difficilement voit on iamais vn eſprit triſte & chagrin acquerir le degré de perfection, mais ſeulement celuy qui a vraye compunction en ſon cœur, car l'eſprit de Dieu ne ſe plaiſt qu'en vn eſprit doux & humble, & non point ſimulé ny arrogant.

Il ny a rien de plus aisé à conduire qu'une perſonne humble & de bon entendement, mais à contrepoil, il n'y a rien de plus difficile à diriger qu'un petit eſprit, ſombre, & qui comme vne beſte brute ne ſuit que l'inct de ſa propre nature, pour laquelle il fait par tout choix de ce qui la peut dauantage accommoder, ſans vouloir entendre raïſon ny faire cas des remonſtrances, inſenſible qu'il eſt aux affronts & à la honte, & cette humeur groſſiere, ruſtique & inciuile, eſt neantmoins aucunes fois priſe pour vertu & bonté par ceux qui ne ſçauent diſcerner le naturel ſtupide & bas, d'avec la vraye vertu & ſincérité de ceux qui ont tout un autre ſoin que de leur ventre.

Les climats ont neantmoins pour l'ordinaire un grand pouuoir ſur nos humeurs, car autant qu'il y en a au monde, autant y voit on de ſortes de mœurs, & de diſparitez

d'esprits, l'air estant diuers en chaque climats. Ainsi voyons nous que les habitans de Suisses sont autres que ceux de l'Italie, & que l'air Septentrionnal estant froid & grossier, fait ordinairement les hommes moins polis & tardifs, où l'air meridionnal chaud & subtil, les subtilise, & les rend d'un esprit releué & gentil quand au general, mais descendant au particulier, il y a des sages, & des moins aduisez par tout.

Tous nos Sauvages, soit que cela vienne en partie du climat, ou autrement, ont l'esprit assez bon & capable de concevoir, & d'apprendre tout ce qu'on leur voudroit enseigner, & ne se conduisent que par la raison, à laquelle ils cedent facilement, & non à la passion, car la violence n'a point de credit chez eux. Je n'entends pas neantmoins les releuer au dessus des esprits cultivez & civilisez, car ie ne fais estat que de leur naturel simplement, comme gens qui ont esté de tout temps Payens, Barbares, & cruels à ceux qui les offensent.

En tant de Nations que nous auons veües, toutes differentes en quelque chose l'une de l'autre, soit pour le gouuernement, l'entretien, ou pour se vestir & accommoder de leurs parures, chacune Nation se croyant la plus sage & mieux aduisée de toutes, car la voye du fol est tousiours droite deuant ses yeux, dit le Sage. Et pour dire ce qu'il me semble de quelqu'un, & lesquels sont les plus heureux, ou miserables : ie tiens les

Rang des
Hurons.

Hurons, & autres peuples sedentaires, comme la noblesse du pays, car ils ont le port & le maintien vrayement noble, n'ont autre exercice que la chasse, & la guerre, travaillent peu & ont tousiours dequoy viure.

Les Algomequins doiuent tenir rang de bourgeois entre tous, entant qu'ils trafiquent fort, & comme de bons marchands entreprennent des voyages de longs cours, ils ont bien encore l'exercice de la chasse, & de la pesche, mais il faut qu'ils s'employent serieusement s'ils veulent disner, car leurs voyages, & leurs chasses ne leur en donnent pas tousiours à suffisance, il faut donc qu'ils travaillent à la terre comme ils ont ia commencé, non par tout, mais en quelques endroits, & à la fin ils seront consolez & reduits à leur ayse.

Rang des
Montagnais.

Pour les Montagnais, Canadiens, & autres peuples errants, nous les mettons au rang des villageois & du petit peuple, car ils sont en effet, les plus pauvres, miserables & necessiteux de tous, sont tres peu en nombre, & comme gredins & vagabonds, courent les champs & les forests à petites troupes, pour trouuer à manger, n'ont point de provisions, ny de lieu arresté, & meurent de faim pour la pluspart du temps, à cause qu'ils ne cultiuent point les terres, & que comme nos gueux, s'ils ont dequoy vn iour ils se donnent au cœur ioye, pour mourir de faim l'autre.

Tous en general sont priuez de la cognoissance du vray Dieu, trauaillent pour le corps seul, & non pour le salut, & c'est en quoy ils sont principalement digne de compassion: car en vain trauaille l'homme, s'il ne peine pour le Paradis. Sont tous d'un humeur assez ioyeuse & contente, toutefois vn peu Saturniens, serieux & graues, ennemis de legereté, comme de l'humeur noire & melancolique, par vne maxime qu'ils ont que la legereté d'esprit est le vray simbole de folie & d'inconstance, & que sous l'humeur triste & melancolique est ordinairement la malice & desloyauté cachée, nous en auons l'exemple en la vie de Saul, l'esprit duquel estoit gouuerné par le Diable au temps qu'il estoit sombre. Et c'estoit la raison pour laquelle vn François n'osoit se promener seul à l'escart, ou dans le village, comme les hommes pensifs font quelquefois, pour ce qu'ils soupconnent dès aussi tost qu'ils machinoient quelque trahison, ou pensoient à quelque malice contre eux.

Ont en horreur l'humeur melancolique.

Ne scachant pas encore au commencement que ie m'allociay avec eux, qu'elle estoit l'humeur qui leur agreoit dauantage, car comme dit l'Apostre, il se faut faire tout à tous pour les gaigner tous, la prudence m'obligea de leur faire voir plusieurs faces, & diuers changemens d'humeurs, & trouuay que celle qui portoit la douceur en la bouche, le contentement au cœur, & vn maintien humblement graue & modeste, estoit celle de la

Humeur agreable aux Hurons

**Jugement
de Cesar.**

quelle ils faisoient principalement estat.

Cesar se trouuant vn iour en la compagnie de ses amis, où il se resioüissoit honnestement & franchement, d'auanture y arriua quelque bon compagnon, delibéré & ioyeux, mais grand, gros & gras par despit : lors quelqu'un dit à Cesar, parlez plus bas, & vous gardez de cet homme qu'il ne iuge mal de vous, & n'en murmure ; Cesar dit alors doucement en riant : il ne faut point craindre ces gens là, mais gens maigres & tristes : & par signe il monstroït Brutus, & Cassius, hommes pleins de malices & cautelles.

Sans flatter le dé, nos Hurons ont quelque chose de louable par dessus nous, & s'ils estoient Chrestiens seroient meilleurs Chrestiens que nous, car ils possèdent des vertus morales qui les font admirer, & suspendre à plusieurs leur condamnation, & non celle des Heretiques qui ont refusé la grace, Moïse & les Prophetes, & les Sauvages non.

**Vertus des
Sauvages.**

Ils sont si attrempez & retenus que lors que vous leur parlez, ils vous ecoutent, & vous donnent tout le temps que vous desirez, sans vous interrompre, ny parler que vous n'ayez finy, Ils parlent fort posément, comme se voulans bien faire entendre, & s'arrestent aussitost en songeans vne grande espace de temps, peur de se mesprendre, ou qu'on n'aye bien conceu leur dire, puis reprennent leur parole. Cette modestie est cause qu'ils appellent nos François femmes, & les Montagnais oyes babilardes, lors que

trop precipitez & bouillans en leurs actions, ils parlent tous à la fois, & s'interrompent l'un l'autre comme femmes, ce qui n'est que trop ordinaire, estant tres-veritable ce que disoit Salomon l'Hebrieu, que le Sage a la langue dans le cœur : mais que celuy qui est fol & furieux à son cœur en sa langue.

Ils craignent le deshonneur & le reproche qu'ils eurent autant qu'ils peuuent, & sont excitez à bien faire par l'honneur & la louange, d'autant qu'entr'eux est tousiours honoré, & s'acquiert du renom, celuy qui a fait quelque bel exploit, ou exercé quelque acte de vertu heroïque.

Vn cœur bien assis, & yne ame bien logée, est tousiours libérale & pleine de charité, donne librement & gayement de ce qui est à son pouuoir, ne laisse point languir le souffreteux, assiste les indigens, & ne veut auoir de biens que pour en faire part aux pauvres : au contraire des auares & mesquins, qui ne veulent que pour eux mêmes, suent de detresse quand il leur faut faire du bien, & sont tousiours dans les plaintes, ô mon Dieu cela se voit mesmes dans les maisons des plus riches esleuez de la fortune, où rarement on trouue de la charité.

Les Sauuages selon leur paureté, sont louables en cette vertu, laquelle ils exercent indifferemment enuers tous ceux qui ne leur sont point ennemis, car ils se visitent les vns les autres, ils se font des présents mutuels, & ne refusent iamais rien au pauvre; ny au ma-

lade qui leur demandent, s'ils ont moyen de leur satisfaire & subuenir, & ce qui en est vn euident tesmoignage est comme i'ay dit ailleurs qu'ils n'ont aucuns pauures mendiants parmy eux, & enuoyent de leurs biens iusques dans la maison des necessiteux malades, veufues & orphelins, sans leur en faire iamais de reproches, n'y aux passans lesquels ils logent librement, aussi long-temps qu'ils veulent, & ne leur en demandent aucune recompense, & si nous leur donnions quelquefois vn petit present pour ce regard, cela venoit de nostre mouuement, & non de leur importunité.

Et pour monstrier leur galantise, ils ne marchandent point volontiers, & se contentent de ce qu'on leur baille honnestement & raisonnablement, blasmans les façons de faire de nos marchands, qui barguignent vne heure pour vn castor, c'est pourquoy ils se rient d'eux quand ils les ont trompez, & ne se fachent point quand ils y sont attrapez.

Auaticce
d'un riche.

Si dans vn grand nombre il se trouue quelque particulier Sauuage auare, & qui refuse d'ayder au necessiteux, ayant moyé de luy bien faire, il en est fort blâmé, mais il ne s'y en voit aucune de si impitoyable & cruel, que le riche bourgeois de Paris, duquel vn homme digne de foy m'a eu parlé sans me le nōmer, car ie n'ay pas desiré scauoir le nom d'vn si vilain barbare, lequel ayant des rentes à milliers, viuoit dans vn si grand espargne & si echarsement

echauffement, que peur de donner vn sol à vn pauvre il serroit luy mesme son bois & n'auoit autre seruice que celuy qu'il se rendoit. Mais le principal traitt de sa villenie, fut que sa sœur luy ayant demandé quelques confitures pour remettre deux pauures malades en appetit, il luy respondit (Arabe qu'il estoit) qu'ils mangeassent du pain bis & que l'appetit leur reuiendroir, voyla vne rudesse & barbarie que ie n'ay point veu aux barbares mesmes & qui peut estre accompagnée à celle du mauuais riche.

La clemence & mansuetude, est vne vertu propre & naturelle des vrayz Princes, sans laquelle ils sont tyrans & non Princes, pour ce que Dieu ne les a establis que pour la conseruation & le soulagement de leurs peuples, & non pour les opprimer & destruire. L'Empereur Traiana esté grandement loué par Helie Spartain, d'autant qu'estant à cheval pour aller à la guerre, mist pied en terre, seulement pour ouyr la plainte que luy faisoit vne pauvre femme. Nos Sauvages l'ont bien enuers tous ceux qui ont recours à eux pourueu qu'ils ne leur soient point ennemis, mais en souverain degré enuers les malades & personnes affligées. Ils vsent aussi d'une maniere de clemence à l'endroit des femmes & petits enfans de leurs ennemis qu'ils prennent en guerre, ausquels ils sauuent ordinairement la vie bien qu'ils demeurent leurs prisonniers pour seruir, mais c'est avec la mesme condition des libres, & par ainsi ils sont comme en leurs propres maisons,

Dela clemence.

Belle action de Traian.

sinon qu'ils ne voyent point leurs parens, auxquels ils ont fort peu d'attache.

De la patience.

Socrates estant vn iour en sa maison, luy furent presentez des choux d'un sien amy Philosopher, qu'il receut de fort bonne grace, honorant le donneur au don, mais sa femme poussée d'enuie & precipitée de sa colere maligne, les luy arracha des mains & les foulla aux pieds, sans que le bon Socrates luy dit autre chose sinon; ma femme, en me priuant de ma part des choux tu t'es priuée de la tienne, & puis se teut, pendant que sa femme fulminant de rage de ne l'auoir pû colerer, luy ietta de la chambre haute vn plein pot d'eau sur la teste comme il pensoit sortir, mais pour cela sa patience ne fust point esbranlée, car esleuant les yeux en haut vers la chambre, il dit seulement: ie sçauois bien qu'après la tempeste viendrait la pluye, & puis passa outre son chemin.

La patience est vne belle vertu & si elle n'est pas tousiours vertu, il n'y a qu'à la bien prendre qu'elle nous acquiert du merite. Le grand contemplatif Taulere parlant de luy mesme disoit: ie ne suis non plus humble que ie suis patient, ny patient que ie suis humble, aussi est il vray que celuy qui est humble est necessairement patient, & ne se colere que pour la iustice, fâchez vous & ne m'offencez point, dit l'Escripture. La patience de nos Sauuages, est tres-admirable & edificatiue en toutes sortes d'occasions, de maladies, de peines ou de travail, pas vn mot pour se plaindre, pas vn mouuement d'impatience, tout est calme chez eux

& ne s'y entend aucun murmure non à la maniere de certains Philosophes anciens, qui souffroient bien l'iniure exterieurement & interieurement en recherchoient l'honneur, mais pour le seul respect de la vertu.

Mettant l'humilité à part, ie dis derechef que leur patience surpasse de beaucoup la nostre, & qu'ils ont vn pouuoir fort absolu sur leurs passions naturelles qu'ils maistrisent & dominant puissamment, comme on peut remarquer en leur conuersation & dans des occasions, qui feroient suer les plus hardis & constants d'entre nous, car toute leur plus grande impatience gist en vn petit sourisauec vn petit ho, ho, ho, mais il ne s'en faut point estonner ny perdre courage en nos infirmités, puis qu'ils n'ont point de demons qui les prouoque en d'autre mal, qu'à se maintenir dans l'infidelité, comme les heretiques, dans leur heresie, suffat au diable qu'on soit à luy.

Les Sauvages qui me semblent les plus honnestes & mieux appris de toute ceste grande estenduë du Canada, sont à mon aduis, ceux de la contrée de Miskou, car pour si peu que ie les aye conuersé ie recognu facilement qu'ils tenoient desja quelque chose du poly, mais entre tous, le Sauvage du bon Pere Sebastien Recollet Aquitanois, qui mourut de faim avec plusieurs barbares, vers vn lieu appellé de saint Iean, pendant vn Hyuer que nous demeurions aux Hurons, enuiron quatre cens lieues de luy, lequel ne sentoit nullement son Sauvage en ses mœurs & façons de faire, ains

Sauages le
Miskou.

son homme sage, graue, doux & bien appris, n'approuuant nullement la legereté & inconstance qu'il voyoit en plusieurs de nos hommes, lesquels il reprenoit doucement en son silence & en la retenue, aussi estoit-il vn des principaux Capitaines & Chefs du pais.

Des vices & imperfections des Sauvages, & comme ils ont recours aux Magiciens pour recouurer les choses perduës.

CHAPITRE XXV.

Bien heureux est celuy qui supporte la foiblesse & la fragilité de son prochain, comme il seroit fort aysé d'estre supporté en la sienne, disoit nostre Seraphique Pere S. François, car en cela gist la vraye charité & le vray amour que nous deuons auoir l'un pour l'autre. Veritablement il y a bien de quoy se mortifier & exercer la patience en la compagnie de nos Sauvages, aussi bien qu'en celle de beaucoup d'impertinens & vicieux Chrestiens, car si d'un costé & en de certaines actions ils monstrent de la vertu, ils ont d'ailleurs des imperfections qui ternissent bien le lustre de leur vertu, car il n'y a personne pour bon qu'il soit qui n'aye en soy, quelque chose à reprendre, ni si meschant & imparfait, qui n'aye quelque chose à louer, disoit vn ancien Sage entre les Grecs.

Ils manquent sans ialousie, à la fidelité conjugale que le mary & la femme se doiuent reciproquement, i'entends parmy les Hurons, car pour les Canadiens & Montagnais on les tient plus honnestes en effects, & moins en paroles au dire de quelqu'vns.

Le peché du mensonge est vn vice detestable Dumen-
 en la bouche du Chrestien, car pour petit qu'il songe,
 soit il nous conduit dans l'infidelité, c'est pour-
 quoy nous pouuons à bon droit estimer du
 menteur comme d'un puits de malediction où
 toutes sortes de vices & de pechez abondent,
 car iamais le mensonge n'est seul en vne ame:
 c'est vn Prince des tenebres, qui a vne longue
 suite, & deuant lequel les seuls meschans fle-
 chissent le genouil. O mon Dieu pere de verité
 faictes nous abhorrer le mensonge & nous
 effendez de la langue mensongere, car les in-
 fidelles mesmes l'ont en abomination.

La loy establie entre les Garamantes faisoit
 mourir l'homme surpris en mensonge, pour
 les maux qu'il cause dans vne communauté, &
 celle que Periandre establit en la Republique
 des Corinthiens portoit, que l'homme ou la
 femme, qui au preiudice d'autrui diroit quel-
 que menerie, porteroit par l'espace d'un mois
 vne pierre en sa bouche, pource qu'il n'est point
 raisonnable que celuy qui a l'habitude de men-
 tir, soit tousiours en liberté de parler.

Que si ces Loix estoient establies & obser-
 uées entre les Chrestiens, nous serions heu-
 reux & deuiendrions tous enfans & imitateurs
 de Dieu, qui faict particuliere profession de la

Exemple
d'un Payen
veritable,

verité plus que de toute autre chose, de laquelle les Romains faisoient anciennement tant d'estat, que l'Empereur Auguste au triomphe qu'il fist de Marc Anthoine & Cleopatra, amena à Rome vn Prestre d'Egypte aagé de soixante ans, lequel, en tous les iours de sa vie n'auoit iamais dit vn seul mensonge. A raison dequoy le Senat ordonna que soudain il fut fait libre & crée grand Prestre, & qu'il luy fust dediée vne statuë & posée entre celles des plus renommez hommes des anciens, & condamnerent, vn de leur citoyen accoustumé à mentir, ce Religieux Senat ayant plus d'egard à la vertu qu'aux considerations de la faueur.

Nos Sauvages ont d'autres imperfections en fuite du mensonge, qui est neantmoins en eux plustost souplesse d'esprit que malice affectée, car s'ils en disent entr'eux (ce qui arrive assez rarement,) c'est lors principalement qu'ils se veulent recreer & en donner à garder aux estrangers avec lesquels ils sont assez libres: ils promettent aussi ordinairement plus qu'ils n'ont souuent dessein d'accomplir, sinon à leurs compatriots, & pour auoir quelque chose de vous ils sçauent bien flatter & vous amadoüer, & pour cela vous ne tenez encore rien, si ce n'est des plus sages d'entr'eux qui feroient conscience de vous tromper. Voyons de la vengeance.

De la vengeance,

Manille demandoit vne fois à Cesar, qu'elle chose estoit celle qu'il auoit faite de laquelle il creut auoir rapporté gloire, &

de laquelle se souuenant il se refouiffoit le plus : il pensoit peut estre qu'il luy parleroit de ses victoires & de ses triomphes. Mais ce Prince genereux , faisant plus d'estat de la vertu que de ses conquestes , luy respondit : par les Dieux immortels ie te iure, ô Manille , que ie n'estime auoir merité gloire de nulle autre chose de ceste vie, n'y nulle autre ne me cause tant d'allegresse , que de pardonner à ceux qui me font iniure & gratifier ceux qui me seruent, que responderez vous à cela, ô vindicatifs & auares.

Rare vertu
de Cesar.

Nous hsons vne presque semblable humanité & generosité , dans l'histoire generale du Peru, en la personne de l'un des derniers Yncas , qui a regné auant la prise de leur Empire par les Espagnols, lequel ayant esté aduertty par ses Capitaines , que les soldats de son armée faisoient aualler à leurs ennemis & aux prisonniers qu'ils prenoient en guerre, d'un certain poison, qui les traistroit dans vne perpetuelle langueur, les estropioit de tous les membres, les rendoit perclus de leur iugement , desfigurez en leur visage , & exposez à des peines insupportables dedans & dehors, à quoy ils prenoient vn singulier plaisir (cruels qu'ils estoient) plustost que de les voir si tost mourir. Il leur enuoya dire qu'ils eussent à faire brusler à petit feu , tous ceux qu'on pourroit conuaincre d'auoir vze d'une cruauté si grande, & à proceder exactement

en cette execution, afin qu'il ne restast à l'aduenir aucune memoire de ces meschans. Ce qui fut de tout point executé & accompli pour vn exemple rare à tous les gens de guerre qu'un courage noble & genereux n'est iamais cruel à son ennemy vaincu, non plus qu'impatient dans les disgraces de la fortune, car l'impatience & la cruauté sont les marques d'un cœur rauagé & mal instruit.

Si nos Hurons auoient ce pouuoir sur leur esprit comme ils ont en d'autre chose, de pardonner à leurs ennemis, ou de les traiter humainement comme ces autres infidelles, avec la pureté qui leur manque, il ne leur faudroit plus autre chose que la croyance & le baptisme qu'ils ne fussent gens de bien, mais ils ne pardonnent pas facilement à quiconque des estrangers a offensé leur patrie, ie dis estrangers, par ce qu'entr'eux ils s'offencent rarement & se pardonnent facilement, ce qui leur est ayisé à cause de l'amour qu'ils ont l'un pour l'autre.

De l'incivilité.

Pour l'honnesteté & la ciuité il n'y a de quoy les louer non plus qu'entre nous beaucoup de negligens, qui se tiennent salement & vivent rustiquement sous pretexte de pauvreté & de uotion. Deuotion trompeuse ou plustost folle d'esprit, car la vraye deuotion est tousiours accompagnée de l'honnesteté & ciuité avec la candeur, qui bannit toute dissimulation.

Ils n'usent d'aucun compliment parmy eux, & sont fort mal nets en l'apprest de leurs viandes, particulièrement lors qu'ils sont par la

campagne. S'ils ont les mains sales, ils les essuyent à leurs cheuetix, ou au poils de leurs chiens, & ne les lauent iamais, si eiles ne sont extremement sales: & ce qui est encore plus impertinent, ils ne font aucune difficulté de pousser dehors les mauuais vents de l'estomach parmy le repas, & en toute compagnie, dequoy ie les reprénois quelquefois, mais fort doucement, aüssi s'en prenoient ils à rire.

Ils sont aüssi naturellement fort paresseux & negligens, & ne s'adonnent à aucun travail du corps, que forcé de la nécessité, particulièrement les Canadiens, & Montagnais plus que toutes les autres Nations, c'est pourquoy ils en ressentent souuent les incommoditez, & la faim qu'ils ont quelque fois extreme.

D'estre fins larrons, nos Hurons & les pe-
tuneux y sont passez maistres, non les vns en-
uers les autres, car cela arriue fort rarement,
mais seulement enuers les estrangers, des-
quels toutes choses leur sont de bonne prise,
pourueu qu'ils n'y soient point attrapez,
comme ils sont quelquefois à la traicte, où
les François se donnent principalement
garde des mains & des pîeds des Hurons.

I'ay admiré le compte qui m'a esté fait au-
trefois d'un coupeur de bourse, lequel ayant
conuenü de prix avec vn marchand couste-
lier à Paris, de luy faire vn petit cousteau à sa
mode moyennant vn quart d'escu, le cou-
steau faict & payé, le coustelier qui desia

Sont pares-
seux.

Sont larrōs

D'un cou-
peur de
bourse.

auoit prié par plusieurs fois l'honneste homme de luy dire de grace à quoy faire vn tel cousteau, le bon compere trop simple se laissa approcher de trop près du drolle pour luy en dire le secret, car en luy disant tout bas à l'oreille, c'est pour couper des bourses, il luy couppa la sienne, & remporta son quart d'escu avec le petit cousteau, sans que le pauvre coustelier s'en apperceut qu'vn petit quart d'heure trop tard.

Nos Hurons font quelquefois des traictés qui ne sont gueres moins subtils, non à couper des bourses, car ils n'ont point l'usage d'argent, sinon pour seruir de parures, mais à prendre toute autre chose, où ils peuvent mettre les mains, ou les pieds, qui leur sont de secondes mains, car avec iceux ils scauent fort bien destourner les choses, & s'en saisir lors que vous y pensez le moins; Nous y auons esté souuent pris en nostre cabane, sans que nostre soin & nostre œil nous pût garantir de ces fascheuses visites: Je m'en plaignois quelquefois aux cabanes, mais qu'elle adresse, ou la subtilité de dérober sans estre reconnu, est estimée sagesse, & bestise de s'y laisser surprendre.

J'ay veu aux Hurons, iusques aux clefs des coffres de nos Martelots, des petits morceaux de fer, des peignes, quelques pieces de verre, & autres petits fatras pendus au col des ieunes enfans, que leurs parens auoient destrobé aux François. On estime avec raison la subtilité, & la patience du petit gar-

çon de Sparte, lequel ayant desrobé & caché vn renardeau sous sa robbe, ayma mieux se laisser ouurir & deschirer les entrailles par ce meschant animal, que de decouvrir son larcin, & en auoir le foiet, qui luy eut esté plus tolerable. L'inuention d'un Haron n'est guere moins admirable, lequel ayant dérobé vne cuillier d'argent aux François, la cacha subtilement dans la partie plus secrette de son corps, aymant mieux en souffrir la douleur, que la honte d'estre estimé lourdaut.

S'il arriue, ce qui se voit fort rarement comme i'ay dit, que quelqu'un d'entr'eux ait derobé son voisin, & que celuy qui a esté volé ait desir de recouurer la chose perdue, il a recours au Medecin Magicien: auquel il manifeste sa perte, & le conduit dans sa cabane, ou en celle qu'il soupçonne estre le laron, cela fait, Loki ordonne des festins pour premier appareil, (car ces malheureux là n'oublient iamais la cuisine) puis pratique ses magies, par le moyen desquelles il decouure le voleur (à ce qu'ils disent) s'il est present dans la mesme cabane, & non s'il est absent, car il n'appartient qu'au grand Oki de sçauoir les choses plus esloignées.

C'est pourquoy le François qui derroba les rassades au bourg de saint Nicolas, autrement de Tœnchain, eut raison de s'enfuir en nostre cabane, qui en estoit à trois lieues loin, lors qu'il sceut l'arriuée du petit Oki dans son logis, pour le suiet de son larcin,

Ont recours au Magicien pour les choses desrobées.

& ne nous dit point la cause de sa fuite que long-temps apres, que nous le trouuames saisy de ses rastades, dequoy nous le tençames fort, tant de l'offence commise, que pour nous auoir mis par cette mauuaise action, en danger de nous faire mourir par les Sauvages, s'il eut esté descouuert: car en ces pays là, la faute d'un particulier est souuent punie en plusieurs.

Canadiens
non larrons.

Les Canadiens, & Montagnais, ne sont point larrons, du moins n'auons nous pas encor eu suiet de nous en plaindre, encor qu'ils entrent assez libremēt dans nos chambres, & parmy nostre Conuent, où ils nous pourroient faire du tort s'ils vouloient. Je ne sçay neantmoins s'ils auroient la mesme retenüe enuers les autres François, y ayans pareille liberté, c'est pourquoy il sera tousiours bon d'estre sur la mesfiance, mere de seureté, pour ne donner suiet de mal faire à personne, cōme j'ay dit, biē que pour ce regard on ne se puisse encor plaindre, & qu'il ne se parle d'aucun larron parmy eux.

Il arriua vn iour que deux ieunes garçons, l'un Huron, & l'autre Montagnais, furent visiter nostre Conuent de nostre Dame des Anges: or comme le Huron se fut apperceu d'un gros pain que nos Religieux auoient serré dans la grande chambre d'embas, il ietta si bien ses mesures, & conduisit si à propos ses detours, qu'il s'en saisit sans que personne l'apperceut, non pas mesme son compagnon, lequel sçachant apres la malice du

Huron, marry que ce desplaisir nous eut esté rendu en sa compagnie, nous demanda permission de courir apres le volleur, comme il fit, & nous rapporta le pain, dequoy ie fus d'autant plus edifié, que ce Montagnais nous aduerty luy-mesme de la faute de son Huron.

Les filles Canadiennes qui d'ailleurs permettent en cachette beaucoup de licences contre la pudeur, semblent à l'exterieur sages & honnestes, tant en leurs paroles, qu'en leurs deportemens, & c'est ce qui m'en auoit tousiours fait bien ingér, neantmoins on m'a voulu faire croire du depuis qu'il n'y auoit que les seules femmes mariées d'honestes, & que les filles voyoiēt en cachette de leurs amis pour trouuer marys, c'est à dire qu'elles sont seulement sages en public, & non en particulier, mais pour moy ie doute encor qu'elles soient libertines, en ayant veu de si modestes, & point du tout d'impertinentes, soit de paroles ou de gestes. Il y en a qui veulent dire en suite de la mauuaise opinion qu'ils ont de ces filles, qu'on n'entend que salleryez dans les cabanes des Montagnais, pour moy i'y ay passé plusieurs iours & ne l'ay point apperceu, ie confesse bien que ie n'entendois pas leur langue, sinon fort peu de mots, mais ie croy que le Truchement m'en eut aduerty, & puis en leur geste i'en eusse descouuert quelque chose. Pour les cabanes des Hurons il y a quelque chose de cela, aussi le peché y est il plus

Licences
des filles
canadiennes

commun, quoy qu'il ne s'y commette qu'en cachette.

Sauvages
abhorrent
la bouche
puante.

Plutarque rapporte que la femme de Tuceydes le Grec estant vn iour interrogée, comme elle pouoit endurer la puanteur de la bouche de son mary, elle respondit qu'elle croyoit que tous les autres hommes l'auoient semblable. Il y a des particuliers qui ont voulu dire que tous les Sauvages auoient la bouche puante, pour moy ie n'en scaurois que dire, & ne l'ay pas mesme apperceu de nos escoliers Hurons, qui nous approchoiét d'assez prés en leur faisant dire leur leçons, bien est il vray que la pluspart des Montagnais me sembloient sentir mal des graisses de loups marins, qui leur seruent d'oignement & de ciuette, car le musc leur semble puant comme l'haleine d'un qui auroit mangé de l'ail, laquelle ils ne peuuent supporter, ie l'ay veu par experience lors que par nécessité, nous estions contrains de manger d'un petit oignon du pays, qui sent l'ail & l'oignon, d'ou l'on peut inferer qu'ils n'ont point la bouche puante. Il y en peut neantmoins auoir quelqu'un de ce calibre, aussi bien que des filles libertines, & des garçons dissolus en paroles, ce qui n'est que trop ordinaire aux Hurons, & peut y en auoir parmi les Montagnais, avec lesquels ces particuliers se peuuent estre rencontrez.

*Des Capitaines, Superieurs, & anciens,
de leurs maximes en general, & comme
ils se gouvernent en leur conseil & as-
semblées.*

CHAPITRE XXVI.

A Vx vieillards se trouue la sagesse, dit le Sage. Pline en vne Epistre qu'il escrit à Fabate, rapporte que Pyrrhe Roy des Epirates demanda à vn Philosophe qu'il menoit avec luy, quelle estoit la meilleure cité du monde. Le Philosophe luy respondit, la meilleure cité du monde c'est Maserde, Sire, vn lieu de deux cens feus en Achaye. Le Roy estonné de cette responce luy en demanda la raison, & en quoy il recognoissoit tant d'excellence, & de prerogatiue en ce petit lieu, pour ce (dit le Philosophe) que tous les murs de la ville sont bastis de pierres noires, & tous ceux qui la gouvernent on les testes blanches. Le Roy admirant sa responce conforme à tout ce qu'en aiamais tenu la sage antiquité, se teut & demeura satisfait, car il est tellement important & necessaire en tout estat, que les vieillards & hommes prudents en ayent la conduite & le gouvernement, que sans cet ordre on n'en peut esperer qu'un notable detrimement, & en fin la ruynetorale.

La sagesse
est aux an-
ciens,

Les siècles passez nous en fournissent vne infinité d'exemples, & l'Escripture Saincte d vne signalée, aduenüe au commencement du regne de Roboam, fils de Salomon, lequel pour auoir suivy le conseil des ieunes, comme ieune qu'il estoit, autant d'esprit que d'années, perdit en vn moment dix lignées qui se reuolterent contre luy.

C'est pourquoy les anciens Romains, se sont rendus sages des fautes d'autrui, & prirent cette coustume des Lacedemoniens, & d'autres Nations, entre lesquels il y auoit vne loy imposée aux ieunes, d'honorer les anciens, & que les honorables vieillards, & non les autres, pouuoient auoir la charge de iudicature, & le gouuernement de la Republique.

**Intention
d'eslire vn
Superieur.**

Nous lisons en l'Histoire que le R. P. Frere Alphonse de Benanides mineur Recollet a fait de la conuersion du nouveau Royaume de Mexique, que le peuple appelé Moqui, voulant establir parmy eux vn bon Capitaine, ils s'assembloit tous au marché, & là ils garottent & lient tout nud à vn pilier, celuy lequel ils pensent estre propre, & puis tous le fouettent avec des charçons, ou des espines picquantes, cela estant fait, ils l'entretiennent par des plaissantes farces, & des ioyeuses faceries: & s'il se monstre Stoiquement insensible à tout, sans pleurer ny faire des laides mines ou grimaces pour l'vn, & sans aucunement rire ou se resiouyr pour l'autre; alors ils le confirment, & asseurent

pour

pour preux & vaillant Capitaine, lequel avec les anciens s'assembloit lors qu'il est expedient, pour conferer & discerner des choses necessaires & conuenables, lesquelles estant vuidées & determinées, le grand Capitaine sort luy mesme pour les declarer & publier au peuple, sans s'en attendre à personne.

Si entre nous en l'election des Iuges, Chefs, & Superieurs, on faisoit de semblables espreuues, iem'asseure qu'il n'y auroit pas tant de brigues à la poursuite des charges, & que la seule vertu emporteroit le prix, ô mon Dieu, nous ne sommes pas dans vn siecle assez bon, car l'insolence & l'ambition de la ieunesse a preualu par dessus la pieté des anciens, desquels ils font litiere, & les tiennent en mespris, c'est à ceux là à qui le grand saint Gregoire adresse ces paroles pour leur faire ressouuenir qu'estans hommes & fautifs comme les autres, ils ne doiuent pas perdre le don d'humilité, & la prudence qui les doit regler, & apprendre la conduite de leurs suiets.

Les Superieurs, dit-il, ne doiuent pas re- s Gregoire
garder à la puissance de leur dignité, ains l'e- en ses mo-
galler de la condition humaine qu'ils ont en- rales.
uers leurs suiets. Ils ne se doiuent point ré-
iour de se voir Superieurs des hommes,
trop bien de leur estre profitable, mais il ad-
uient souuent que celuy qui gouuerne, s'ou-
blie en son cœur à cause de sa preeminence,
& voyant que tout passe par son comman-

dement, & qu'il est promptement obey, & que tous ses suiets loient le bien qu'il fait, & ne contredisent point le mal, (tant s'en faut, ils loient souuent ce qu'ils deuroient blâmer) seduit par les choses qui luy sont inferieures, le cœur s'enfle par dessus soy, & se voyant appuyé par dehors de la faueur & applaudissement populaire, il demeure vuide de vertu, & s'oublie soy-mesme, prestant l'oreille aux flateries, & croit que cela est ainsi comme il l'entend par dehors, & non comme il est au dedans reellement & veritablement : c'est la cause pourquoy il mesprise ses inferieurs, & ne se souuient pas qu'ils luy sont egaux en la nature, & iuge que sa vie vaut mieux que la leur, d'autant qu'il les surpasse en puissance, & par ce qu'il peut le plus, il presume de sçauoir plus qu'eux tous.

Nos Capitaines Sauvages ont bien quelque espee de vanité semblable, mais elle est cachée au dedans, & ne l'osent faire paroistre au dehors pour de confusion. Ils ne font non plus de ces espreuues des Moqui, lors qu'ils admettent ou essient les Capitaines, & Chefs de leur Republique, mais ils ont ce soin qu'ils paroissent vertueux & vaillans, & qu'ils soient plustost vieux que de moyen aage, & n'en admettent iamais aucun ieune d'age dans leur conseil, ny pour la police, ny pour la guerre, qui ne soit vieil de l'esprit, & desquels on ne puisse esperer vn bon conseil, vne bonne conduite, & de bons ef-

fets, car, comme disoit le Roy Cyrus, il n'appartient à nul de commander, s'il n'est meilleur que ceux à qui il commande.

Ils viennent ordinairement par succession ainsi que la Royauté par deçà, ce qui s'entend si le fils d'un Capitaine ensuit la vertu du pere ; car autrement ils font comme aux vieux siècles, lors que premierement ces peuples esleurent des Roys ; mais ces Capitaines n'ont point entr'eux autorité absolue, bien qu'on leur ait quelque respect, & conduisent le peuple plustost par prieres, exhortations & remonstrances, qu'ils scauent dextrement & rhetoriquement ajancer, que par rigueur de commandement, c'est pourquoy ils s'y exercent, & y apprennent leurs enfans, car qui harangue le mieux est le mieux obey.

La multitude des Loix dans un estat, n'est pas tousiours le meilleur, ny lors que delaisians les anciennes, on en fait souuent de nouuelles, c'est à dire que le corps est bien malade, & prest de donner du né en terre. Laetence Firmian dit que la Republique des Sicioniens dura plus que celle des Grecs, & la cause fut pour ce qu'en sept cens & quarante ans, ils n'instituerent onques aucuns Edits nouueaux, & n'outrepasserent aucune de leurs Loix.

Nos Hurons ont bien peu de maximes, & si à mon aduis, ils n'en eurent iamais d'auantage, sont tousiours dans leurs premieres, &

y peuuent perseuerer iusques à la fin des siècles, si le Christianisme opposé à leurs tenebres n'a entrée chez eux, & en tel cas il leur faudra changer de vie, de loix, & de maximes, qui sont pour la plus part autant Sauuages que brutales & impertinentes.

Maximes
des Hurons.

1. Pour premiere maxime, ils tiennent de ne pardonner iamais, ny faire grace à aucun de leurs ennemis, que par de grands presens.
2. De desrober qui pourra, aux François, ou estrangers, pourueu qu'on n'y soit point apprehendé, autrement on vous lairoit froter en homme de peu d'esprit.
3. Conuiennent qu'il est loisible à vn chacun de voir les filles, & les femmes d'autrui indifferemment, sans violence toutefois, & au cas pareil les femmes, & filles, aller aux hommes, & garçons, sans pouuoir encourir blasme, ou notte d'infamie.
4. Qu'on doit assister les malades, & ne souffrir de mandians, n'y aucun en disette sans luy faire part de ses biens.
5. De receuoir courtoisement les passans qui ne leur sont point ennemis, & de se rendre l'hospitalité reciproque.
6. D'auoir vn grand soin des os des deffunts, & de faire des presens pour le soulagement des ames en l'autre vie.
7. De n'entreprendre aucun voyage de long cours, sans en aduertir les Chefs, & Capitaines, pour ne laisser les bourgs desgarnis de gens de guerre.
8. Qu'on puisse rompre vn mariage quand

les mariez ont rompu d'amitié, & que l'un des deux le desire ou procure.

9. Que personne ne s'impatiente ou fâche pour chose qui arriue, s'il ne veut estre estimé femme ou efeminé, sinon qu'il y allast de l'honneur des deffuncts qui ne se peuuent vanger, ou tirer raison des offences.

Voyla tout ce qu'ils ont de plus recommandables en leurs maximes, & qu'ils obseruent avec plus d'affection & de soin; reste à deduire comme ils se gouvernent & comportent en leur conseil, qui est tel, que les anciens, & principaux de la ville, ou du bourg, s'assembtent en vn lieu avec le Capitaine, où ils proposent & decident tout ce qui est des affaires de leur communauté, non par commandement absolu, mais par supplications & remonstrances, & par la pluralité des voix, qu'ils colligent avec des petits fetsus de ioncs. Il me vient de resouvenir d'un beau traict que Varron raconte du Senat Romain, lequel a tousiours tenu en si grande veneration, la Religion que les faux Prestres leur enseignoient, que route fois & quantes qu'il s'assembloit, bien que ce fut pour affaires de grande importance, & qui requissent haste & diligence, la premiere chose qu'on y proposoit deuant que decider desdites affaires, appartenoit à la religion & veneration des Dieux; & voyla comme tous les Princes Chrestiens en deuroient veritablement vsr dans leurs conseils, pour l'honneur & le respect qu'ils doiuent au seruice nostre Dieu,

puis qu'ils se disent ses seruiteurs ; mais helas les maximes desquelles l'on se sert pour le iourd'huy sont bien differentes & contraires à celles du mesme Dieu : qui n'a plus de part dans le conseil des grands ; où il n'est point inuocé.

Il y auoit a la ville de saint Ioseph le grand Capitaine de la Prouince des Ours, qu'ils appelloient Garihoua Andionxra pour le distinguer des ordinaires de guerre qu'ils appellent Garihoua doutagueta. Ice luy grãd Capitaine de Prouince auoit encores d'autres Capitaines sous luy, tant de guerre que de police, par tout les autres bourgs & villages de sa iurisdiction, lesquels en chose de consequence le mandoient & aduertissoient pour le bien du public, ou de la Prouince : & en nostre bourg qui estoit le lieu de sa residence ordinaire, il y auoit encore trois autres Capitaines, qui assistoient à tous les conseils avec les anciens du lieu, outre son Assesseur & Lieutenant, qui en son absence, ou quand il n'y pouuoit vacquer, faisoit les cris & publications par la ville des choses necessaires & ordonnées. Et ce Garihoua Andionxra, n'auoit pas si petite estime de luy-mesme, qu'il ne se voulut dire frere & cousin du Roy de Frãce, & de mesme égalité, comme les deux doigts demonstratifs des mains qu'il nous monstroient ioints ensemble, en nous faisant cette ridicule & inepte comparaison.

Or quand ils veulent tenir conseil, c'est ordinairement dans la cabane du Capitaine

chef & principal du lieu, sinõ que pour quelque autre raison particuliere, il soit trouué autrement expedient. Le cry & la publicatiõ du conseil ayant esté fait, on dispose dans la cabane, ou lieu ordonné, vn grand feu, à l'entour duquel s'assisent sur les nattes, ou à platte terre, tous les Conseillers en suite du grãd Capitaine qui tient le premier rang, assis en tel endroit, que de sa place il peut voir tous ses Conseillers & assistans en face.

Les femmes & filles, ny les ieunes hommes n'y assistent point, si ce n'est en vn conseil general, où les ieunes hommes de 25. à 30. ans peuuent assister, ce qu'ils cognoissent par vn cry particulier qui en est fait. Que si c'est vn conseil secret, ou pour machiner quelque trahison ou surprise de guerre, ils le tiennent seulement la nuit, entre les principaux & plus discrets Conseillers, & n'en decouurent rien que la chose proiectée ne soit mise en effect, (s'ils peuuent) prenant pour pretexte de leurs assemblées de nuit, que c'est pour n'estre diuertis par l'aspect d'aucune chose, & que le iour diuertissoit leur esprit, par des obiects, & par ainsi que l'on ne deuoit s'estonner s'ils cherchoient l'obscurité pour voir clair à leurs affaires, plus difficiles à demesler pendant le iour.

Estans tous assemblez, & la cabane fermée, ils font tous vne longue pose auant parler, pour nese precipiter point, tenans cependant tousiours leur calumet en

bouche, puis le Capitaine commence à haranguer en terme & parole haute & intelligible, vn assez long-temps, sur la matiere qu'ils ont à traicter en ce Conseil: ayant finy son discours, ceux qui ont à dire quelque chose, les vns apres les autres, sans bruit, sans s'interrompre, & en peu de mots, opinent & disent leurs aduis, qui sont par apres colligez avec des pailles, ou petitions, & là dessus est conclud ce qui est iugé expedient par la pluralité des voix, non criminellement, mais ciuilement, car ie n'ay iamais veu condamner aucun à mort, à la peine corporelle, ny à aucun bannissement entre nos Hurons, comme il se fait quelquefois parmy les autres Nations Canadiennes.

Ils font des assemblées generales, sçauoir de regions loingtaines, d'où il vient chacun an vn Ambassadeur de chaque Prouince, au lieu destiné pour l'assemblée, où il se fait de grands festins, & dances, & des presens mutuels qu'ils se font les vns aux autres, & parmy toutes ces caresses, ces resiouissances, & ces accolades, ils contractent amitié de nouveau, & aduisent entr'eux du moyen de leur conseruation, & par quelle maniere ils pourront perdre, ruyner & exterminer tous leurs ennemis communs: tout estant faict, & les conclusions signées, non avec la plume, mais du doigt de leur fidelité, ils prennent congé les vns

des autres, & s'en retournent chacun en leur païs, avec tout leur train & equipage, à la Lacedemonienne, le plus souuent vn à vn.

Peu s'en est fallu que ie ne me sois oublié d'écrire icy vn traitt qui ne doit pas estre teu. La ^{Canadiens} font faire serment. coustume que nous auons de faire leuer la main à ceux de qui on exige vne verité en iustice, que nous appellons faire serment, est pratiquée parmy nos Canadiens & Montagnais, mais en vne autre maniere, car ils presentent à tenir vne certaine chose qu'ils appellent *Tustebeson*, qui est vne chaine de rassades d'environ vne brassée de longueur.

Celuy qui la presente à tenir (representant le Iuge) interroge la partie & luy demande; est-ce toy qui a faict telle chose, ou bien ne scais tu point qui l'a faict, l'autre est obligé en la prenant de dire verité, d'autant que par après venant à estre trouué menteur, on ne faict plus estat de luy non plus que d'un faulsaire, mais si celuy qui est apellé au serment se sent coupable, alors ne voulant dire la verité, il ne prend point aussi le *Tustebeson*, mais faict plusieurs circonlocutions pour s'exempter de la prendre & se liberer de tout soupçon.

On dit de mesme que les Turcs font rarement de faux sermens, tesmoin celuy qui ayant mis son argent dans vn baston creuzé & voulant faire serment par deuant le Iuge, donna ce mesme baston à tenir à son Creancier qui estoit à son costé, auquel il dit, Monsieur ie vous supplie de grace, tenez ce baston que ie fasse mon serment & leue la main, lequel ayant acheué, le

Creancier tout estonné sçachant tres-bien qu'il n'auoit esté payé, ietta de colere le baston de son débiteur si rudement contre terre que la fourbe en fut descouuerte, car le baston se rompit & l'argent en sortit, qui fist cognoistre ce débiteur trompeur & non point menteur.

Vn Huron
veut frap-
per le P.
Ioseph,

Auant finir ce Chapitre, ie vous feray voir par vne disgrâce qui nous pensa arriuer, comme ils sçauent assez bien proceder en conseil & vser de quelque maniere de satisfaction enuers ceux qui auroiét esté offercés par aucun d'eux, si on leur en laisse le iugement. Vn iour d'Hyuer que beaucoup de Sauuages nous estoient venus voir en nostre cabane, selon leur coustume ordinaire, vn d'entr'eux marry de n'y auoir place à son gré, vouloit insolamment debouter vn François de son lieu, si le Pere Ioseph qui prit la parolle, ne l'eut prié de ne faire point de bruit, de quoy irrité le Sauuage sans autre replique prit lors vn gros baston duquel il luy eut deschargé vn grand coup sur la teste, si les François qui se trouuerent là presens, ne l'eussent empesché & repoussé les autres ieunes hommes Hurons, qui sembloient desja vouloir estre de la partie contre nos François, par ie ne sçay qu'elle enuie qu'ils auoient conceuë contre eux.

En ceste esmeute, ie remarquay particuliere-ment, la constance d'vn ieune homme Huron, lequel se tint effrontement tout nud sans sourciller deuant vn François, qui luy tenoit vn coustelas esleué duquel il le vouloit frapper, & le Huron l'empêcher, & en même temps luy

au collet, comme il n'eut pas manqué si
 ie n'y fusse arriué & fait retirer l'un & l'autre
 à l'edification de tous, car il y alloit d'un ieu
 qui n'estoit point à rire.

Des-jà ce mesme Huron s'estoit gourmé à
 coup de poings avec un nommé la Vallée, mais
 un peu desavantageusement pour luy, car en-
 cor qu'il tint ce François par les moustaches,
 l'autre ne perdoit point temps & luy appro-
 choit le poing si près du né qu'il luy en fist for-
 tir le sang, neantmoins iamais aucun de ses
 compagnons ne bougerent pour l'assister, car
 ils ont cela de bon, qu'ils disent qu'un à un la
 partie est egale, & qu'autrement il y auroit de
 l'injustice.

Voyant tant de desordre & que tous les bar-
 bares sortoient des-jà du bourg, pour voir se
 qui se passoit ou pour estre de la partie ie m'at-
 tachay des raquettes sous les pieds pour n'en-
 foncer dans les neiges, & preuenir le grand Ca-
 pitaine Auoindaon & tous les vieillards, qui se
 mirent en peine pour nous & crioient par tout
 contre les Moyenti, comment veut on tuer nos
 Nepueux, veut on faire mourir nos Capitaines
 François, ennon, ennon Moyenti, non, non ieun-
 es gens, il ne leur faut point faire de desplaisir,
 ils sont nos bons amys, & ceux qui monstrent
 plus de ressentimens pour nous furent les prin-
 cipaux chefs, à sçauoir, Auoindaon, Onorotan-
 di, Yocoiſſe, Ongyata & Onnenianetani, qui
 firent publier un conseil general à nostre re-
 queſte, pour le lendemain matin où nous assi-
 stames le P. Nicolas & moy, avec tous les Hu-

rons, depuis l'age de 29. à 30. ans, iusques à l'extreme vieillesse. Celuy qui auoit voulu donner le coup n'y assista point, non plus que le Pere Ioseph, qui estoit resté à nostre cabane avec tous les François, crainte qu'on y allast faire quelque frasque ou rauage s'ils s'en fussent absétés, car il n'y a ny clefs, ny serrures aux portes en tous ces pais là, ny fermeture suffisante qui en puisse deffendre la libre entrée à qui que ce soit.

Pour moy i'allois librement par tout solliciter les affaires des François, & empêcher qu'on n'atentast plus sur la vie d'aucun de nous, & d'appaiser les Sauvages, mais i'admiré ce traitté de bonté en eux, qu'au plus fort du debat, comme i'allois criant à nos François, (vn peu trop eschauffez) de se retirer & ne bleßer personne, il y en eut qui coururent aussi tost au village, publians par tout *Onianné Aniel, Onianné Aniel.* Gabriel est bon, Gabriel est bon, tant ils sont amis des amateurs de la paix.

Le conseil assemblé, le grand Capitaine nous fit soir auprès de luy, puis ayant imposé silence, il s'adressa à nous & nous parla en sorte que toute l'assemblée le pût entendre. Mes Neveux; à vostre requeste i'ay faict assembler ce conseil general, afin de vous estre faict droit sur les plaintes que vous m'auiez faictes, de quelque malicieux qui vous ont voulu offencer, mais d'autant que ces gens icy sont ignorans du faict, proposez vous mesme vos plaintes & declarez hautement en leur presence ce qui est de vos griefs, & en quoy & comment

vous auez esté offencez, & sur coie bastiray ma harangue & vous ferons iustice, car nous ne desirons pas qu'aucun vous fasse de desplaisir, mais au contraire que l'on vous rende tout le seruice que l'on pourra, pendant que nous aurons ce bien de iouir de vostre presence.

Nous ne fusmes pas peu estonnez d'abord de la prudence & sagesse de ce Capitaine, & comme il proceda en tout fort sagement iusqu'à la fin de la conclusion, qui fut fort à nostre contentement & edification.

Nos plaintes au conseil.

Nous proposames donc nos plaintes, & comme nous auions quitté vn tres-bon pais & trauerfé tant de mers & de terres avec infinis dangers & mesaises, pour leur venir annoncer la parole de Dieu, le chemin du Ciel, & retirer leur ames de la domination de Loxi, qui les entraenoit tous après leur mort dans vn abisme de feu sousterrain, puis pour les rendre amis & comme parens des François qui les cherissoiét, & neantmoins qu'il y en auoit entr'eux qui auoient voulu tuer nostre frere Ioseph, particulièrement vn tel que nous nommasmes.

Quoy leur dis-je, pour leur faire admirer la bonté & les richesses de la France, & leur oster l'opinion que les leurs ayent allechez les François, nous mangions de la graisse à plain soul, car c'est là leur plus friant morceau. Les outârdes, les gruës & les perdrix, nous estoient tellement communes, que cela ne nous estoit non plus espargné qu'à vous le bled d'Inde. Les pauvres mesmes ne veulent point manger de la chair de nos chiens. Nos maisons sont basties

non d'escorces & de bois comme les vostres; mais de pierres & materiaux solides. Les châps sont tous semez de bon bled, de bonnes prunes & de racines excellentes, voudriez vous croire à present que nous soyons venus chercher à disner à vos portes, & que la necessité nous ait porté à vn si miserable païs, desnüé de toutes douceurs, comme vous aduoüez vous mesmes, puis que nous estions si fort à nostre ayse & que toutes choses nous venoient à souhait, ayez donc del'amitié pour nous, puis que l'amour que nous auons eu pour vous, nous a faict quitter tant d'ayse & de contentement, & faict ieusner fort austerement en procurant le salut de vos ames.

Remon-
strance
Dauoin-
daon.

Ayant fini, le Capitaine haranga vn long-têps sur nos plaintes, & leur remonstra l'excellence de nostre condition releuée entre celle des autres François, qu'ils estimoiēt moins que nous, (à cause qu'ils ne parloient point à Dieu disoient ils,) puis leur dit que ce ieune homme auoit eu grand tort d'auoir voulu tuer le Pere Ioseph, que nous ne leur rendions aucun desplaisir, & qu'au contraire nous leur procuriōs du bien & de la consolation, pour cette vie & pour l'autre, en nous priuant nous mesmes de nostre propre repos. Et bien dit-il, que voulez vous qu'ils fassent dauantage pour vous, ils vous instruisent, ils enseignent vos enfans, ils parlent à Dieu pour nous, & nous traittent comme leurs parens, & pour recompense nous leur voulons rendre des desplaisirs? quoy la chose seroit elle raisonnable, non, il n'en sera pas ainsi.

Il leur remonstra de plus, que s'il estoit sçeu à Kebec, qu'ils nous eussent voulu mal traicter, que les François en pourroient auoir du ressentiment, & par ainsi qu'il falloit estouffer ce desordre & nous laisser viure en paix & repos parmi eux. Et pour conclusion, ils nous prièrent d'excuser la faute d'un particulier, lequel nous deuions tenir seul avec eux, pour un chié, à la faute duquel les autres ne trempoiét point, & nous dirent pour exemple, que desja depuis peu, un des leurs auoit griefuement blessé un Algoumequin, en iouant avec luy, & qu'ils s'estoient accordez sans guerre, moyennant quelque petit present, & celuy là seul tenu pour un chien & meschant qui auoit fait le coup, & non les autres qui estoient bien marris, d'un tel accident.

Conclusion
du Capitaine.

Ils nous firent aussi present de quelques sacs de bled d'Inde, que nous acceptames, & fumes au reste caresser de toute la compagnie, avec mille prieres d'oublier tout le passé, & demeurer bons amis comme auparauant; & nous conjurerent de plus, fort instamment d'assister tous les iours à leurs festins & banquets, ausquels ils nous feroient de bonnes sagamitez diuersement préparées, & que par cette hantize & familiere conuersation qu'apportent les festins & repas, nous nous maintiendrions plus facilement dans l'intelligence & la bonne amitie, que se doiuent parens & amys si proches, & que de verité ils nous trouuoient assez pauuement accommodez & nourris dans nostre petite cabane, de laquelle ils eussent

Nous font
un present.

bien desiré nous retirer pour nous mettre mieux dans leur bourgade, où nous n'aurions autre soin que de prier Dieu, les instruire en nos sciences, & nous gouverner doucement avec eux, mais comme vn continuel & assidu bruit de la mesnagerie n'estoit point compatible à nostre humeur, non plus qu'à nostre condition, nous les remerciames de leur bonne volonté, filmes porter nostre maiz à nostre cabane & primes congé de la compaignie, fort satisfaits les vns des autres.

De la guerre, & des armes dont vrent nos Hurons, & comme nous les empechames de sortir contre les Nèutres des-jà tout prests de nous courir sus, avec vne exemple d'Vladisslas Roy de Hongrie pour la fidelité, &c.

CHAPIRE XXVII.

L'Homme de bien ne cherche point la guerre, si ce n'est pour vanger l'iniure faicte à Dieu, ou pour deffendre les oppressez, contre les Tyrans, autrement, ô malheur du siecle! à quel propos tenir soldats en campagne & voir ruiner le pupil & le payfan, dont les acclamations vont iusques au Ciel, implorans ses foudres contre les meschans, & ceux qui ne peuvent viure sans trouble.

L'Empereur

L'Empereur Marc Aurelle, deuſant vn iour avec ſon amy Corneille des effets d'vne gendarmerie, pour bien conduite & diſciplinée qu'elle puiſſe eſtre, diſoit: mais avec reſſentiment, qu'il ne ſçauoit quelle plus grande guerre les Princes pourroient auoir, que de tenir en leurs Royaumes gens de guerre, ſi la neceſſité ne les preſſoit de ſe deffendre, pour ce que ſelon que nous monſtre l'experience, ceux-cy ſont deuant Dieu fort coupables, aux Princes importuns, & aux peuples ennuyeux: de maniere qu'ils viuent au dommage de tous, & ſans profit d'aucun.

C'eſt pourquoy Scipion l'Aſtricain auoit raifon de dire, que toutes les choſes deuoient eſtre eſſayées en guerre deuant que de mettre les mains aux armes: & à la verité il n'y a plus grande victoire que celle qu'on gaigne ſans eſfuſion de ſang, & ſans ſoldats en campagne, car l'amy, auſſi bien que l'ennemy, ruine touſiours le bon homme auſſi bien que le païs.

Mais c'eſt bien le mal-heur lors que l'on entreprend guerre iniuſte, car outre ces incommoditez & les maledictions des peuples, l'offenſe de Dieu y eſt ſi grande, que toſt ou tard on en eſt puny en ce monde ou en l'autre; & fauſſer ſa foy donnée à ſes ennemis, eſt le comble du boiſſeau qui attire l'ire, & la iuſte vengeance de Dieu ſur nos teſtes, comme l'exemple d'Vladiſlas Roy de Hongrie nous en ſert de preuue. Car ce Roy ayant en l'année mil quatre cens quarante trois, du temps d'Eugene quatrieſme, gaigné vne ſignalée victoire con-

Exemple
d'Vladiſlas
Roy de
Hongrie.

ire Amurat second Empereur des Turcs, & du depuis faißt tréues avec luy pour dix années.

L'an suivant à la suasion du Legat du Pape nommé Iulian, il faussa sa foy & luy declara la guerre. Amurat contrainct de se deffendre vint avec vne armée de soixante mille hommes. La bataille se donne, où du commencement les Chrestiens eurent de l'avantage, vne partie des Turs tuez sur la place, vne autre partie mise en desroute. Ce que voyant Amurat il tire de son seing vne coppie de l'accord faißt entre luy & Vladissas, & levant les yeux au Ciel, & tenant ce papier en main commença à se plaindre de la perfidie du Roy & des Chrestiens en ces parolles.

Voyla, ô Iesus-Christ! l'accord que les Chrestiens ont passé avec moy, qu'ils ont iuré sur tes saintes Euangiles d'observer inuiolablement, & cependant aujourd'huy meschans & perfides qu'ils sont, ils faussent leur foy & renoncent perfidement à l'honneur qu'ils doiuent à leur Dieu. C'est pourquoy si tu es Dieu comme ils disent, venge tes iniures & les miennes, & leur faisant payer la peine de leur perfidie & de la foy par eux violée, faistoy recognoistre iuste à ceux qui n'ont pas encores la cognoissance de ton nom.

A peine auoit il acheué ceste priere, qu'incontinent voila la chance tournée. Les Turs reçoient nouuelles forces, vne grande boucherie se faißt des Chrestiens, le Roy Vladissas tué, & le Legat du Pape, qui auoit esté Auteur

& conseiller de rompre la treue : tant Dieu a en horreur la perfidie, & veut que l'on garde la foy donnée.

Aussi les Payens mesmes en cela se sont montrez beaucoup plus Religieux que les Chrestiens. Plutarque en la vie de Curtius Camillus & de Pirrhus Roy des Epirotes, en rapporte deux belles exemples, qui deuroient estre imitées par ceux lesquels ambitieux d'honneurs, comme de posseder le bien d'autrui, n'obtiennent aucune victoire que par mauuais moyens ou en faussant leur foy, ou en s'acquiesçant des thraistres, & puis il faudra mourir & abandonner tout.

La premiere histoire est, que Camillus Histoire de
Camillus, ayant esté esleu Tribun militaire avec cinq autres, pour faire la guerre aux Faliques. Incontinent avec l'armée Romaine entra dedans ce pais, où il alla mettre le siege devant la ville des Faleriens, qui estoit bien fortifiée & pourueüe de toutes choses requises & necessaires à la guerre; sçachant tresbien que ce n'estoit pas entreprise legere que de la prendre, ne qui se peust executer en peu de temps, mais voulant comment que ce fust tenir ses citoyens occupez à quelque chose, & les diuertir, afin que, par estre trop de sejour en leurs maisons, ils n'eussent loisir de vacquer à seditions & dissensions civiles; car les Romains vsoient sagement de ce remede là, tournans au dehors, comme bons medecins, les humeurs, qui estoient pour troubler le repos de leur

chose publique.

Mais les Faleriens se confians en l'assiette de leur ville, qui estoit forte de tous costez, faisoient si peu de conte d'estre assiegez, que ceux qui n'estoient pas à la garde des murailles se pourmenoyent en robes sans armes, par la ville, & alloient leurs enfans à l'escole, le Maistre de laquelle les menoit ordinairement hors de la ville se promener, iotier & exercer au long des murailles, car ils auoient vn commun Maistre d'escole pour toute la ville, comment encores ont les Grecs, voulans que leurs enfans dès le commencement, s'accoustument à estre nourris en compagnie, & qu'ils conuersent tousiours ensemble.

Ce Maistre donc espiant l'occasion de faire vn mauuais tour aux Faleriens, menoit tous les iours leur enfans à l'esbat hors de la ville, non gueres loin des murailles du commencement, & puis les remenoit dedans, après qu'ils s'estoient esbatus & exercitez. Depuis qu'il les y eut menez vne fois, il les tira de iour en iour vn peu plus loin, pour les accoustumer à s'asseurer, en leur donnant à entendre qu'il n'y auoit point de danger, iusques à ce qu'un iour à la fin ayant tous les enfans de la ville avec soy, il donna iusques dedans le guet du camp des Romains, ausquels il linra tous ses escoliers, & leur dit qu'ils le menassent deuant leur Capitaine general, ce qui fut fait: & quand il fut deuant Camillus, il se prit à dire qu'il estoit Maistre & precepteur de ces enfans, mais neantmoins qu'il auoit eu plus cher acquerir sa bonne gra-

ce, que de faire ce que le deuoir de ces tiltres là, luy commandoit : au moyen dequoy il luy venoit rendre la ville, en luy liurant ces enfans entre ses mains.

Camillus ayât ouy ces paroles, trouua l'acte bien mal-heureux & meschant, & dit à ceux qui estoient autour de luy, que la guerre estoit bien chose mauuaise, & où il se faisoit beaucoup de violences & d'outrages, toutesfois qu'encore y auoit il entre gens de bien quelque loix & quelque droicts de la guerre, & qu'on ne deuoit point tant chercher ne pourchasser la victoire, que l'on ne fuit les obligations d'en estre tenu si maudits, & si damnables moiens, & qu'il fa-
 10
 20
 30
 40
 50
 60
 70
 80
 90
 100
 110
 120
 130
 140
 150
 160
 170
 180
 190
 200
 210
 220
 230
 240
 250
 260
 270
 280
 290
 300
 310
 320
 330
 340
 350
 360
 370
 380
 390
 400
 410
 420
 430
 440
 450
 460
 470
 480
 490
 500
 510
 520
 530
 540
 550
 560
 570
 580
 590
 600
 610
 620
 630
 640
 650
 660
 670
 680
 690
 700
 710
 720
 730
 740
 750
 760
 770
 780
 790
 800
 810
 820
 830
 840
 850
 860
 870
 880
 890
 900
 910
 920
 930
 940
 950
 960
 970
 980
 990
 1000
 1010
 1020
 1030
 1040
 1050
 1060
 1070
 1080
 1090
 1100
 1110
 1120
 1130
 1140
 1150
 1160
 1170
 1180
 1190
 1200
 1210
 1220
 1230
 1240
 1250
 1260
 1270
 1280
 1290
 1300
 1310
 1320
 1330
 1340
 1350
 1360
 1370
 1380
 1390
 1400
 1410
 1420
 1430
 1440
 1450
 1460
 1470
 1480
 1490
 1500
 1510
 1520
 1530
 1540
 1550
 1560
 1570
 1580
 1590
 1600
 1610
 1620
 1630
 1640
 1650
 1660
 1670
 1680
 1690
 1700
 1710
 1720
 1730
 1740
 1750
 1760
 1770
 1780
 1790
 1800
 1810
 1820
 1830
 1840
 1850
 1860
 1870
 1880
 1890
 1900
 1910
 1920
 1930
 1940
 1950
 1960
 1970
 1980
 1990
 2000
 2010
 2020
 2030
 2040
 2050
 2060
 2070
 2080
 2090
 2100
 2110
 2120
 2130
 2140
 2150
 2160
 2170
 2180
 2190
 2200
 2210
 2220
 2230
 2240
 2250
 2260
 2270
 2280
 2290
 2300
 2310
 2320
 2330
 2340
 2350
 2360
 2370
 2380
 2390
 2400
 2410
 2420
 2430
 2440
 2450
 2460
 2470
 2480
 2490
 2500
 2510
 2520
 2530
 2540
 2550
 2560
 2570
 2580
 2590
 2600
 2610
 2620
 2630
 2640
 2650
 2660
 2670
 2680
 2690
 2700
 2710
 2720
 2730
 2740
 2750
 2760
 2770
 2780
 2790
 2800
 2810
 2820
 2830
 2840
 2850
 2860
 2870
 2880
 2890
 2900
 2910
 2920
 2930
 2940
 2950
 2960
 2970
 2980
 2990
 3000
 3010
 3020
 3030
 3040
 3050
 3060
 3070
 3080
 3090
 3100
 3110
 3120
 3130
 3140
 3150
 3160
 3170
 3180
 3190
 3200
 3210
 3220
 3230
 3240
 3250
 3260
 3270
 3280
 3290
 3300
 3310
 3320
 3330
 3340
 3350
 3360
 3370
 3380
 3390
 3400
 3410
 3420
 3430
 3440
 3450
 3460
 3470
 3480
 3490
 3500
 3510
 3520
 3530
 3540
 3550
 3560
 3570
 3580
 3590
 3600
 3610
 3620
 3630
 3640
 3650
 3660
 3670
 3680
 3690
 3700
 3710
 3720
 3730
 3740
 3750
 3760
 3770
 3780
 3790
 3800
 3810
 3820
 3830
 3840
 3850
 3860
 3870
 3880
 3890
 3900
 3910
 3920
 3930
 3940
 3950
 3960
 3970
 3980
 3990
 4000
 4010
 4020
 4030
 4040
 4050
 4060
 4070
 4080
 4090
 4100
 4110
 4120
 4130
 4140
 4150
 4160
 4170
 4180
 4190
 4200
 4210
 4220
 4230
 4240
 4250
 4260
 4270
 4280
 4290
 4300
 4310
 4320
 4330
 4340
 4350
 4360
 4370
 4380
 4390
 4400
 4410
 4420
 4430
 4440
 4450
 4460
 4470
 4480
 4490
 4500
 4510
 4520
 4530
 4540
 4550
 4560
 4570
 4580
 4590
 4600
 4610
 4620
 4630
 4640
 4650
 4660
 4670
 4680
 4690
 4700
 4710
 4720
 4730
 4740
 4750
 4760
 4770
 4780
 4790
 4800
 4810
 4820
 4830
 4840
 4850
 4860
 4870
 4880
 4890
 4900
 4910
 4920
 4930
 4940
 4950
 4960
 4970
 4980
 4990
 5000
 5010
 5020
 5030
 5040
 5050
 5060
 5070
 5080
 5090
 5100
 5110
 5120
 5130
 5140
 5150
 5160
 5170
 5180
 5190
 5200
 5210
 5220
 5230
 5240
 5250
 5260
 5270
 5280
 5290
 5300
 5310
 5320
 5330
 5340
 5350
 5360
 5370
 5380
 5390
 5400
 5410
 5420
 5430
 5440
 5450
 5460
 5470
 5480
 5490
 5500
 5510
 5520
 5530
 5540
 5550
 5560
 5570
 5580
 5590
 5600
 5610
 5620
 5630
 5640
 5650
 5660
 5670
 5680
 5690
 5700
 5710
 5720
 5730
 5740
 5750
 5760
 5770
 5780
 5790
 5800
 5810
 5820
 5830
 5840
 5850
 5860
 5870
 5880
 5890
 5900
 5910
 5920
 5930
 5940
 5950
 5960
 5970
 5980
 5990
 6000
 6010
 6020
 6030
 6040
 6050
 6060
 6070
 6080
 6090
 6100
 6110
 6120
 6130
 6140
 6150
 6160
 6170
 6180
 6190
 6200
 6210
 6220
 6230
 6240
 6250
 6260
 6270
 6280
 6290
 6300
 6310
 6320
 6330
 6340
 6350
 6360
 6370
 6380
 6390
 6400
 6410
 6420
 6430
 6440
 6450
 6460
 6470
 6480
 6490
 6500
 6510
 6520
 6530
 6540
 6550
 6560
 6570
 6580
 6590
 6600
 6610
 6620
 6630
 6640
 6650
 6660
 6670
 6680
 6690
 6700
 6710
 6720
 6730
 6740
 6750
 6760
 6770
 6780
 6790
 6800
 6810
 6820
 6830
 6840
 6850
 6860
 6870
 6880
 6890
 6900
 6910
 6920
 6930
 6940
 6950
 6960
 6970
 6980
 6990
 7000
 7010
 7020
 7030
 7040
 7050
 7060
 7070
 7080
 7090
 7100
 7110
 7120
 7130
 7140
 7150
 7160
 7170
 7180
 7190
 7200
 7210
 7220
 7230
 7240
 7250
 7260
 7270
 7280
 7290
 7300
 7310
 7320
 7330
 7340
 7350
 7360
 7370
 7380
 7390
 7400
 7410
 7420
 7430
 7440
 7450
 7460
 7470
 7480
 7490
 7500
 7510
 7520
 7530
 7540
 7550
 7560
 7570
 7580
 7590
 7600
 7610
 7620
 7630
 7640
 7650
 7660
 7670
 7680
 7690
 7700
 7710
 7720
 7730
 7740
 7750
 7760
 7770
 7780
 7790
 7800
 7810
 7820
 7830
 7840
 7850
 7860
 7870
 7880
 7890
 7900
 7910
 7920
 7930
 7940
 7950
 7960
 7970
 7980
 7990
 8000
 8010
 8020
 8030
 8040
 8050
 8060
 8070
 8080
 8090
 8100
 8110
 8120
 8130
 8140
 8150
 8160
 8170
 8180
 8190
 8200
 8210
 8220
 8230
 8240
 8250
 8260
 8270
 8280
 8290
 8300
 8310
 8320
 8330
 8340
 8350
 8360
 8370
 8380
 8390
 8400
 8410
 8420
 8430
 8440
 8450
 8460
 8470
 8480
 8490
 8500
 8510
 8520
 8530
 8540
 8550
 8560
 8570
 8580
 8590
 8600
 8610
 8620
 8630
 8640
 8650
 8660
 8670
 8680
 8690
 8700
 8710
 8720
 8730
 8740
 8750
 8760
 8770
 8780
 8790
 8800
 8810
 8820
 8830
 8840
 8850
 8860
 8870
 8880
 8890
 8900
 8910
 8920
 8930
 8940
 8950
 8960
 8970
 8980
 8990
 9000
 9010
 9020
 9030
 9040
 9050
 9060
 9070
 9080
 9090
 9100
 9110
 9120
 9130
 9140
 9150
 9160
 9170
 9180
 9190
 9200
 9210
 9220
 9230
 9240
 9250
 9260
 9270
 9280
 9290
 9300
 9310
 9320
 9330
 9340
 9350
 9360
 9370
 9380
 9390
 9400
 9410
 9420
 9430
 9440
 9450
 9460
 9470
 9480
 9490
 9500
 9510
 9520
 9530
 9540
 9550
 9560
 9570
 9580
 9590
 9600
 9610
 9620
 9630
 9640
 9650
 9660
 9670
 9680
 9690
 9700
 9710
 9720
 9730
 9740
 9750
 9760
 9770
 9780
 9790
 9800
 9810
 9820
 9830
 9840
 9850
 9860
 9870
 9880
 9890
 9900
 9910
 9920
 9930
 9940
 9950
 9960
 9970
 9980
 9990
 10000

Si commanda à ses gens qu'ils deschirassent
 les habillemens de ce mauuais homme, en luy
 liant les deux mains par derriere, & qu'ils don-
 nassent des verges & des escorgées aux enfans,
 afin qu'ils remenassent le traistre qui lesauoit
 ainsi trahis, en le foïettant, iusques dedans la
 ville.

Le traistre
 est puny.

Or si-tost que les Faleriens eurent entendu
 la nouuelle, cōme ce Maistre d'escole les auoit
 trahis, toute la ville en mena tres-grand dueil,
 ainsi qu'on peut estimer en si griefue perte, &
 en coururent hommes & femmes, pesse messe
 sur les murailles & aux portes de la ville, sans
 auoir qu'ils faisoient, tāt ils estoient troublés.
 Estans là, ils apperceurent leurs enfans qui ra-
 menoiēt leur Maistre nud & lié en le foïetāt,

& appellant Camillus, leur Pere, leur Dieu & leur Sauueur : de maniere que non seulement les peres & meres des enfans, mais aussi tous autres citoyens generallyment conceurent en eux mesmes vne grande admiration & singuliere affection enuers la preud'homme, bonté, & iustice de Camillus, tellement que sur l'heure mesme ils assemblerent conseil, auquel il fut resolu qu'on luy enuoyeroit promptement des Ambassadeurs pour se remettre eux & leurs biens du tout à sa discretion.

Vertu de
Fabricius.

Si cette action de Camillus & des Romains est honorable, moins ne le fut celle du Consul Frabricius, auquel comme il estoit en son camp estât venu vn homme qui luy apportoit vne missiue escriite de la main du Medecin de Pyrrhus, par laquelle ce Medecin offroit de faire mourir son Maistre par poison moiennât qu'on luy promist vne recompence condigne, pour auoir terminé vne fascheuse guerre sans danger.

Fabricius detestant la meschâceté & perfidie de ce Medecin, escriuit vne lettre à Pyrrhus en ces termes. Tu as faict mal-heureuse eslection d'amis aussi bien que d'ennemis, ainsi que tu pourras cognoistre en lisant la lettre qui nous a esté escriite par vn de tes gés: pour ce que tu fais la guerre à hommes iustes & gens de bien, & te fie à des desloiaux & meschans : dequoy nous t'auons bien voulu auertir, non pour te faire plaisir, mais de peur que l'accident de ta mort ne nous fasse calomnier, & que l'on estime que nous ayôs cherché de terminer cette guerre par vn tour de trahison, comme si nous n'en pensions venir à bout par vertu.

Pyrrhus ayant leu cette lettre, & aueré le contenu en icelle, chastia le Medecin ainsi qu'il auoit merité, & pour loyer de ceste descouuerture enuoya à Fabricius & aux Romains leurs prisonniers sans payer rançon.

Nos Sauvages bien que brutaux & enclins à la vengeance, ne faussent iamais leur parole donnée publiquement, & moins trahissent ils leurs freres ny leur partie pour chose qui puisse arriuer, au contraire ils tiennét à gloire de luy estre fidelle, il n'y a qu'entre nous autres Chrestiens où ce mal-heur arriue, ô mon Dieu où en sommes nous! faut il que ceux qui ne vous cognoissent point soient plus gens de bien que nous, & qu'ils soient vn iour nos Iuges deuât vous, Seigneur, qui reietterez les enfans du Royaume, pour y colloquer les enfans perdus, horrible eschange de l'honneur d'icy bas en vne espouuenteable confusion de demons, l'eternel mespris & l'humiliation des meschans.

Neantmoins nos pauures Hurons pour bien enclins qu'ils soient (fors qu'à la recôciliation) n'ont encor pû comprendre la doctrine de ceste admirable Prince de paix Marc Aurelle, car n'y ayant point de desordre parmy leur gendarmerie, où chacun vit de ce qu'il porte sur ses espaulles, cômme ie diray plus amplement cy-aprés, ils n'en peuuét receuoir aucune incommodité, & partant continuent leur guerre contre leurs ennemis, non pour en posseder les terres, ny pour les rendre tributaires & sujets à leur estat, mais pous les exterminer & ruiner totalement: de maniere, qu'ils tiennent plus à gloire d'auoir

tué vn de leurs ennemis, que d'auoir gaigné cent lieues de pais. & si toutes ces guerres ne sont fondées pour la pluspart, que sur vn appetit de vengeance, pour quelque petit tort ou desplaisir qui n'est pas souuent grand chose, mais leur grande vnion & l'amour reciproque, qu'ils se portent les vns aux autres, faict qu'ils embrassent volontiers en general, le faict & cause d'un particulier, offensé par vn estrangeur.

Ne chastiet
point.

Mais si l'un d'entr'eux a offensé, tué, ou blessé vn de leur mesme natiõ, il en est quitte pour vn present, & n'y a point de bāissement ny chastiment corporel, pour ce qu'ils ne les ont point en vsage enuers ceux de leur propre natiõ, si les parens du blessé ou decedé, n'en prennent eux mesmes la vengeance, ce qui arriue fort peu souuent, car ils se font rarement iniure, & du tort les vns aux autres. Mais si l'offensé est de nation estrangeure, alors il y a indubitablement guerre declarée entre les deux nations, si celle de l'homme coupable ne se rachapte promptement par de grands presens, qu'elle exige du peuple, si les tresors publiques sont épuisez, pour la partie offensée: & par ainsi il arriue le plus souuent que par la faute d'un seul, deux peuples entiers se font cruellement la guerre, & viuent tousiours dans vne cōtinuelle crainte d'estre surpris l'un de l'autre, particuliere-ment sur les frontieres où les femmes mesmes n'ozent cultiuier les terres, ny faire les bleds, qu'elles n'ayent tousiours aupres d'elles, des hommes armez, pour les conseruer & deffendre de quelque mauuaise auenuë.

Quand ils veulent faire guerre, soit offensive ou deffensive, ce seront deux ou trois *Generaux d'armées.* des anciens ou vaillans Capitaines, qui en entreprendront la conduite pour cette fois, & vont de village en village, faire entendre leur volonté, donnant des presens à ceux desdits villages, pour les induire à leur octroyer l'ayde & le secours qu'ils leur demandent, & par ainsi sont comme *Generaux d'armées.*

Il vint en nostre bourg vn grand vieillard fort dispos & robuste, lequel ie crû estre de la mesme qualité, car il alloit de cabane en cabane parler aux Capitaines, & à la ieunesse, qu'il portoit à vne guerre malheureuse, contre la Nation des Attinoindarons, dequoy nous le tançames fort, & dissuadames le peuple d'y entendre, à sa confusion, & au grand contentement de tous les amateurs de la paix, car en effet il n'y a point d'apparence de rompre avec vne Nation si puissante, sans se mettre au hazard d'en estre totalement ruyné, & puis l'esperance d'y aduan- cer la gloire de Dieu s'en alloit totalement perdue par cette guerre, avec ce peu de bien que nous y auions commencé.

Ces Capitaines ou *Generaux d'armes* ont le pouuoir, non seulement de designer les lieux, de donner quartier, & de renger les bataillons, mais aussi de commander aux assauts, & disposer des prisonniers, & de toute autre chose de plus grande consequence. Il est vray qu'ils ne sont pas tousiours

bien obeïs de leurs soldats, entant qu'eux-mesmes manquent souuent dans la bonne conduite, & celuy qui conduit mal, est souuent mal suiuy. Car la fidelle obeyssance des fuiets despend de la suffisance de bien commander du bon Prince, disoit Theopompus Roy de Sparre.

Pendant que nous estions là, le temps d'aller en guerre contre les Hiroquois estant arriué vn ieune homme de saint Ioseph, desirieux d'honneur & de reputation, voulut luy seul en faire le festin, & deffrayer pour vn iour entier, tous ses compagnons, ce qui luy fut de grand coust & despence, aussi en fut il grandement estimé: car ce festin estoit de six grandes chaudieres pleine de bled d'Inde concassé, avec quantité de grands poissons boucanez, sans les farines, & les huiles pour faire la sauce.

On mit les chaudieres sur le feu dés auant iour, dans l'vne des plus grandes cabanes du bourg, puis le Conseil estant acheué, & les resolutions de guerre prises, tous entrèrent au festin, pendant lequel, ils firent les vns apres les autres, les mesmes exercices militaires, qu'ils ont accoustumé aux festins de guerre. Les chaudieres nettes, & les complimens & remerciemens rendus, partirent pour le rendez-vous de toute l'armée assigné sur la frontiere, d'où ils se rendirent sur les terres ennemies, ausquelles ils prindrent enuiron soixante prisonniers, la pluspart desquels furent tuez sur les lieux, & les au-

tres amenez pour faire mourir aux Hurons par le feu, puis mangez en leur assemblée, sinon quelque membres qui furent distri-
buez à des particuliers pour leurs ma-
lades.

Leurs guerres ne sont proprement que des surprises & deceptions, plustost que des ba-
tailles & combats, ou siege de villes, non par
coüardise & faute de courage, car ils se trou-
uent souuent aux prises avec l'ennemy, mais
pour attraper quelqu'un mort ou vif, sans
exception d'age ou de sexe, pour les con-
duire en triomphe en leur pays.

Tous les ans au renouveau & pendant
tout l'Esté que les feuilles couurent les ar-
bres, cinq ou six cens ieunes hommes Hu-
rons ou plus, s'en vont avec cet ordre, s'es-
pandre dans le pays des Hiroquois, se de-
partent cinq ou six en un endroit, cinq ou six
en un autre, & se couchent le ventre contre
terre par les champs, & les forests, & a costé
des grands chemins & lieux passans, & la
nuict venue ils rodent par tout iusques dans
les villes, bourgs, & villages pour attraper
quelqu'un de leurs ennemis, lesquels ils em-
menent en leur pays, pour les faire passer par
les tourmens ordinaires, sinon apres les au-
oir tuez à coups de fleches ou de masse, ils
en emportent les testes, ou la peau des testes
escorchées avec la chevelure, qu'ils appel-
lent *Onontsira*, lesquelles les femmes pas-
sent pour les cōseruer, & en faire des trophées
& banderoles en temps de guerre, ou les at-

rachent au haut de leurs murailles ou pallissades au bout d'une longue perche.

Il y a d'autres Nations en nostre Amerique qui auoient accoustumé d'escorcher ceux qu'ils prenoient à la guerre, & de remplir de cendres leurs peaux, qu'ils appendoient à leurs places publiques, comme autant de trophées, & de monumens de leurs beaux faits. Il y en auoit neantmoins plusieurs d'entr'eux qui employoient ces peaux à d'autres vsages, & en faisoient des tambours, disans que ces caisses quand on venoit à les battre, auoient vne secrette vertu de mettre en fuite leurs ennemis. Tous les Hurons & Algomequins croyoient la mesme vertu en nostre beau chasuble, mais ils n'en peurent venir à l'espreuue, car il nous faisoit besoin, & puis c'estoient toutes folles opinions pardonnables à ces pauvres gens là, & non à vn Chrestien qui y adhereroit.

Quand ils veulent tenir la campagne, & aller en pays d'ennemis, ils ne meinent iamais autres pouruoyeurs ny viuandiers qu'eux mesmes, chargez chacun d'un plein sac de farine qu'ils appellent Eschionque, accommodez derriere leur dos, avec des lanières ou cordelettes, qu'ils appellent Acharro, de sorte que ce paquet les incommode de fort peu, & puis c'est la charge d'Eslope, qui va tousiours en diminuant à mesure qu'ils s'arrestent pour les repas.

De fouller le bon homme il ne s'en parle point, non plus que d'en tirer la piece, car

ils viuent & logent tousiours en pleine campagne, & au fond des bois, où ils prennent leur refection qui est aysée, car cette farine se mange aussi bien crüe que cuite, seiche que mouillée, d'eau tiede ou froide, à la volonté d'un chacun, sans qu'il soit besoin de feu, ny d'autre sauce que l'appetit.

Soldats logent en la campagne.

Ils mesnagent tellement ce petit sac, qu'il leur dure iusques à leur retour, qui est environ six semaines ou deux mois de temps: car apres ils viennent se rafraichir au pays, finissent la guerre pour ce coup, ou s'y en retournent encores avec d'autres provisions.

Que si les Chrestiens vsoient de telle sobriété & temperance, ils pourroient aysément entretenir de tres-puissantes armées avec peu de fraiz, & faire la guerre avec advantage, aux ennemis de Dieu, & du nom Chrestien, sans fouller les peuples, ny ruyner le pays, & puis Dieu n'y seroit point tant offensé, comme il est à present par la pluspart de nos soldats François, qui viuent avec vne telle licence chez les paysans, & par tout ailleurs où ils mettent le pied, qu'on en abhorre la veüe, & fait fuyr vn chacun l'esclat de leur insolence.

Nottez soldats Chrestiens.

Ces pauvres Sauvages (à nostre confusion) se comportent ainsi modestement en guerre, sans incommoder personne, & s'entretiennent de leur propre & particulier moyen, sans autre gage ou esperance de recompence, que du seul honneur & louange

qu'ils estiment plus querout l'or du monde, ou l'on ne fait icy estat que de l'argent, autrement point de seruice.

Armées des
Sauuages.

Ils n'ont pour toutes armes que la masse, l'arc & les fleches, lesquelles ils empannent de plumes d'aigles, comme les meilleures de toutes, & à faute d'icelles ils y en accomodent d'autres. Ils y appliquent aussi fort proprement des pierres tranchantes collées au bois, avec vne colle de poisson tres-forte, & de ces fleches ils en emplissent leur carquois, qui est fait d'une peau de chien passée, qu'ils portent en escharpe sur leur dos. Ils portent aussi de certaines armures & cuirasse qu'ils appellent *Aquientor*, pour arrester le coup de la fleche : car elles sont faites à l'espreuue de ces pierres aiguës, & non toutefois de nos fers de Kebec, quand la fleche qui en est accommodée sort d'un bras roide & puissant, comme est celuy d'un Sauuage.

Boucliers

Ces cuirasses sont faites avec des baguettes blanches couppees de mesures, & serrées les vnes contre les autres, tissues & entrelasées de cordellettes fort durement & proprement. Ils se seruent aussi d'une rondache ou bouclier fait d'un cuir bouilly fort dure, & d'autres faits de planches de bois de cedre, fort grands, larges & legers, qui leur couurent presque tout le corps. Il me souuient qu'estant à la bourgade de saint Nicolas, autrement de Tœnchain, ie vis arriuer plusieurs ieunes hommes d'une guerre estrange, qui me monstrerent vne assez grande

piece d'un bouclier de leurs ennemis, qui sembloit de l'yvoire, ie ne pû comprendre ny coniecturer de quel animal ce pouuoit estre, mais que ce fut d'yvoire, ou d'une coquille polie de quelque grande tortuë, elle estoit pour resister à quelque fleche que ce fut, & à l'espée, & le poignard.

Ils ont diuerses enseignes ou drapeaux faits (pour le moins ceux que j'ay veus) d'un morceau d'escorce rond, attaché au bout d'une longue baguette, comme vne cornette de caualerie, sur lequel sont depeintes les armoiries de leur ville ou Prouince.

Ce sont les principales armes dont nos Hurons se seruent ordinairement, & principalement de l'arc & la fleche, de laquelle ils se seruent avec tant de dexterité, qu'ils ne manquent guere de donner où ils visent: & tirent si legerement & habilement, que comme ils disent eux-mesmes, ils ont plus tost décoché dix fleches que nos meilleurs arquebuziers ne scauroient auoir deschargé deux coups leur harquebuz, & s'en est trouué de si hardis de defier en pleine campagne, un François avec son harquebuz, disans qu'ils scauroient bien exquier son coup, & ne le point faillir de leur fleche.

Depuis qu'on a eu porté des lames d'espées en Canada, les Montagnais, & autres peuples errants, ont trouué l'inuention de les emmancher en de longs bois comme demyes piques, qu'ils scauent roidement élan- cer à la chasse contre l'eslan, & à la guerre

Vn Sauua-
ges defia vn
François,

contre leurs ennemis.

Signal de
guerre.]

Comme on a de coustume sur mer, pour
signe de guerre, ou de chastiment, mettre
dehors en euidence le pavillon rouge: Aussi
nos Sauvages, non seulement es iours solem-
nels & de resiouissance, mais principalement
quand ils vont à la guerre, ils portent autour
de leur teste, pour la pluspart, de certains
pennaches en couronnes, & d'autres en
moustaches, faits de longs poils d'eslan,
peints d'un rouge cramoisy beau par excel-
lence, & collez, ou autrement attachez à
vne bande de cuir large de trois doigts, &
longue assez pour entourer la teste.

Sauvages
demandent
à traicter
nostre cha-
suble.

Nostre chasuble à dire la sainte Messe,
leur agreoit fort, & l'eussent bien desiré trai-
cter de nous, pour le porter en guerre en
guise d'enseigne, ou pour mettre au haut de
leurs murailles, attachée à vne longne per-
che, afin d'espouuenter leurs ennemis, di-
soient-ils, mais ce n'estoit pas chose à leur
vsage, ny qui deuit estre ainsi prophanée. Les
Algomequins de l'Isle nous auoient fait la
mesme priere au Cap de Masacre, ayant desia
à ce suiet amassé sur le commun, enuiron
quatre-vingts castors: car ils le trouuoient
non seulement tres-beau, pour estre d'un
excellent damas incarnat, enrichy d'un pas-
sement d'or (digne present de la Reyne, qui
nous l'auoit donné auant partir de France)
mais aussi pour la croyance qu'ils auoient
qu'il leur causeroit du bon heur, & de la
prosperité en routes leurs deliberations &
entreprises

entreprises de guerre.

Quant la guerre est declarée en vn pays, & qu'on doute des forces de l'ennemy, à l'Ordre en tout euénement, on se fortifie par tout avec temps de l'ordie que le Conseil y donne. Les habitants destruisent tous les bourgs, ville, & villages frontiers, incapables d'arrestter l'ennemy, ou de pouuoir estre suffisamment fortifiés pour soutenir vn siege, & chacun se range dans les lieux fortifiez de sa iurisdiction, où ils bastissent de nouvelles cabanes pour leur demeure, à ce aydez des habitans du lieu, qui leur font la courtoisie avec affection.

Les Capitaines à ce aydez de leurs officiers & gens du Conseil, trauaillent continuellement à ce qui est de leur conseruation & fortification, à ce que par leur faute ou negligence ils ne soient surpris de l'ennemy, font balayer & nettoyer les fuyes & araignées des cabanes, de peur du feu que l'ennemy y pourroit ietter, par de certains artifices qu'ils ont appris de ie ne sçay quelle autre Nation que l'on m'a autrefois nommée, & qui s'est eschappée de ma memoire.

Diligence
des Capitaines.

Ils font porter sur les guaritres, des pierres, & de l'eau pour s'en seruir dans l'occasion, & crainte de tout perdre si la forteresse venoit à estre prise d'assaut, ou que le feu s'y prit, plusieurs font des trous en terre, dans lesquels ils enferment ce qu'ils ont de meilleur, & le couurent si proprement de la meilleure terre, que le lieu ne peut estre reconnu

que de ceux là mesme qui y ont trauaillé.

Vn bon Capitaine n'a pas seulement soin du dedans, mais aussi du dehors, & manquer dans la preuoyance est tout perdre, pour de quelque camifade, les Chefs enuoyent par tout des espions & coureurs, pour descouurir & obseruer l'ennemy, & posent leurs sentinelles selon la necessité; pendant que d'autres exhortent & encouragent le reste des gens de guerre, à faire des armes, & de se tenir prests pour vaillamment & genereusement combattre, resister & se deffendre si l'ennemy vient à paroistre.

Le mesme ordre s'obserue en toutes les autres villes & forteresses du pays, iusques à ce qu'ils voyent l'ennemy attaché à quelqu'un des villages, & pour lors la nuit venue à petit bruit, vne quantité de soldats de tous les villages voisins, vont au secours, & s'enferment au dedans de celle qui est assiegée, la deffendent font des sorties, dressent des embusches, s'attachent aux escarmouches, & combattent de toute leur puissance, pour le salut de la partie, surmonter l'ennemy, & le deffaire du tout s'ils peuuent.

Pendant que nous estions au village de S. Ioseph, nous vismes faire toutes les diligences susdites, tant en la fortification des places, apprests des armes, assemblées des gens de guerre, prouision de viures, qu'en toute autre chose necessaire pour soustenir vne grande guerre qui leur alloit tomber sur les bras, de la part des Attiuoindarons, si le bon

Dieu n'eust diuertý cet orage, & empesché ce malheur qui alloit menaçât nostre bourg d'un premier choc, lequel à cette occasion fut mis en estat de deffence en ruynant les cabanes escartées, qu'on rebastit dans le fort reduit en forme ronde, & en lieu assez fort d'affiette de tous costez.

Mais pour ce que nous ne voulumes pas quitter nostre ancienne cabane pour nous placer dans la ville, les Sauvages nous aduertissoient de nous donner sur nos gardes, à quoy nous ne manquions pas, car il ne faut point tenter Dieu, & negliger les assurances, c'est pourquoy nous barricadions nostre porte toutes les nuits, avec des grosses busches de bois posées les vnes sur les autres, avec deux paulx derriere piquez en terre, & n'ouurions point à heure induë à qui que ce fut, sinon aux François.

Or pour ce que la guerre n'est en rien bonne, si elle n'est pour le soustien de la foy, & que les Neutres qui pouuoient faire iusques à cinq ou six mille hommes n'estoient que trop fort pour deux mille hommes que nos Hurons peuuent faire au plus, nous fusmes les intercesseurs de la paix, comme i'ay dit ailleurs, & donnames nos raisons, lesquelles nous acquirent quelque chose sur leur esprit, & la promesse qu'ils se tiendroient en paix, & ne penseroient plus à la guerre, si les Neutres ne les y obligeoient, & que ce en quoy ils auoient auparauant forcé l'esperance de leur salut estoit en nostre grand esprit, & au

secours que quelques François mal auisez, leur auoient fait elperer de Kebec! Outre vne tres-bonne inuention qu'ils auoient cœuee en leur esprit, par le moyen de laquelle ils esperoient tirer vn grand secours de la Nation du Feu, ennemi iurez des Neutres.

Moyen
pour obtenir
du secours en
guerre.

L'inuention estoit telle, qu'au plustost ils s'efforceroiēt de prendre quelqu'un de leurs ennemis, auxquels ils couperoiēt la gorge, & que du sang de cet ennemy, ils en barbouilleroient la face, & tout le corps de trois, ou quatre d'entre eux, lesquels ainsi ensanglantez seroient par apres enuoyez en Ambassade à cette Nation de Feu, pour obtenir d'eux quelque secours & assistance à l'encontre de si puissans ennemis, & que pour plus facilement les esmouuoir à leur donner ce secours, ils leur montreroient leur face, & tout leur corps desia teints & ensanglantez du sang mesme de leurs ennemis communs.

L'admiray l'inuention & l'esprit de ce bon Capitaine Aioandaon qui m'en fist le recit, mais pour cela la paix valloit mieux que la guerre, & que demeurassions amis de tous pour les gaigner tous, dequoy furent fort contans la pluspart des hommes, & generallement toutes les femmes, lesquelles nous en parloient en particulier, & nous prioient d'y tenir la main, c'est ce qui nous fit croire qu'elles ont peu de voix en chapitre, & qu'il ne leur est pas permis de parler librement des choses qui concernent le fait des hommes.

Des prisonniers de guerre lesquels ils mangent en festin apres les auoir faict cruellement mourir, & du Truchement Brulé, deliuré miraculeusement de la main des Hiroquois, par la vertu d'un Agnus Dei.

CHAPITRE XXVIII.

LEstourments dont nos Sauuages vsent à l'endroit de ceux qui leur sont ennemis, sont si furieusement cruels, qu'ils tesmoignent en effet combien est absolu le pouuoir que le Diable a acquis sur leur malheureux esprit, car ils sont au delà de toute pensée humaine, & si estrangement horribles, qu'il ne se peut imaginer rien de plus douloureux, ny de plus constamment souffert.

Bienheureux celuy qui endure pour le ciel, & non pour la terre, & malheureux est celuy qui patit sans profit, car l'un est martyr du Diable, & l'autre de Iesus-christ. Nos Hurons ayans pris quelqu'un de leurs ennemis, apres l'auoir lié & garré, luy font vne harangue des cruautés, rigueurs, & mauuais traitemens de luy, & les siens, ont exercé à leur droit, & qu'au semblable il deuoit se

resoudre d'en endurer autant , & plus s'il se pouuoit , & luy commandent de chanter tout le long du chemin , ce qu'il fait (s'il a du courage assez) mais souuent avec vn chant fort triste & lugubre.

Estant arriué au village , il est receu vniuersellement de tous , & particulièrement des femmes , avec de grands cris & acclamations , battans doucement des doigts le bout de leurs levres , de ioye qu'elle ont de voir leurs ennemis prisonniers , ausquels elles font continuellement festin , non seulement pour les engraisser pour la chaudiere , mais pour les rendre plus sensibles aux tourmens.

Ils n'en font pas de mesme aux femmes , & petits enfans , lesquels ils font rarement mourir , & passer par les rigueurs de la Loy , d'autant qu'ils les conseruent ordinairement pour leur seruir , ou pour en faire des presens à ceux qui en auroient perdu dés leurs en guerre , & font estat de ces subrogez , comme s'ils estoient leurs propres enfans , lesquels estans paruenus en aage , vont aussi librement en guerre contre leurs parens , que s'ils estoient naiz ennemis de leur propre patrie , qui est vn tesmoignage euident du peu d'amour que les enfans Sauvages ont pour ceux qui leur ont donné l'estre , puis que si tost ils en oublient les bien-faits passez par les presens , comme i'en ay veu l'experience en plusieurs , ou bien telle

est leur coustume passée en loix en toutes ces Nations.

I'ay leu de certains peuples qui conseruent leurs ieunes prisonniers de tout sexe, pour leur seruir, puis les mangent quand la fantasie leur en prend, apres de longs seruices; qui est vne cruauté bien esloignée de la douceur & humanité de Plutarque, lequel, comme il disoit de luy-mesme, n'eust pas voulu tuer le bœuf qui luy eust long-temps seruy, & encor moins vn esclau fait à l'Image de Dieu, car celuy qui est cruel aux bestes, l'est ordinairement aux hommes.

Quand nos Hurons ne peuuent emmener toutes les femmes, & filles, avec les enfans qu'ils ont pris sur leurs ennemis, ils les tuent sur les lieux, & en emportent les testes, ou les peaux, avec la chevelure. Ils'en est veu (mais peu souuent) qu'ayans amené de ces femmes, & filles dans leur pays, le desir de vengeance leur en a fait passer quelqu'vnes par les mesmes tourmens des hommes, sans que les larmes de ce pauvre sexe, qu'elles ont pour toute deffence, les aye pû esmouuoir à compassion, & exempter pour vn peu d'vn si curieux orage, plus miserables & malheureuses en cela, que certains Hollandois, lesquels ayans esté pris en qualité d'ennemis, par ceux de la Nation des Loups, & appliquez au feu, verferent tant de larmes sur les braisiers ardans, qu'elles esteignirent avec le

feu, la cholere de leurs meurtriers, qui les renuoyerent comme femmes du costé de la Virginie, où ils auoient esté pris.

Les Canadiennes, & Montagnaises reçoient leurs soldats reuenans de la guerre d'une maniere fort differente à celle de nos Huronnes, car à meisme temps qu'elles ont apperceu les canots ou ouy la voix des hommes, toutes les ieunes femmes, & filles s'en courent sur le bord de la riuere, & là elles attendent de pied coy (leurs ceintures ostées, & leur robes détachées, qu'elles tiennent seulement en estat pour cacher leur nudité) que les canots soient enuiron à cent pas d'elles, puis à meisme temps, quitans leurs robes, se jettent toutes dans l'eau, & vont à la nage (car elles scauent nager comme poissons) empoigner les canots ou sont les prisonniers ou les cheuclures de ceux qu'ils ont fait mourir, qu'elles tirent à bord, puis se saisissent de tout le butin qui est dedans, comme leur appartenant par droit d'antiquité, comme aux hommes victorieux la gloire du triomphe qui leur est rendu, non pas admirable & rauissant, tels qu'à ces anciens Romains, riches & puissans, mais à la portée de pauvres Sauvages, à qui peu d'honneur sert de beaucoup pour amimer leur courage.

Or comme ces Amazones sont prestes ne se saisir des canots, & qu'il ny a plus qu'à mettre la main dessus pour les cōduire à terre

les hommes les abandonnent, & se iettent tout nuds dans l'eau avec leurs armes en main, & nagent iusques au bord de la ruiere, où ils sont receus du reste du peuple, avec vne ioye & acclamation vniuerselle de tous, leur disans qu'ils sont bien vaillans & courageux d'auoir eu le dessus de leurs ennemis, & amené plusieurs prisonniers, tous lesquels de ce pas, sont conduicts dans la cabane de leur Capitaine, où sa femme & les amis preparent vn magnifique festin de tout ce qu'ils ont de meilleur, qu'ils leur donnent avec autant de gayeté, que s'ils auoient conquis vn Empire, ou obtenu la paix pour leur pais.

Il faut que ie die ce petit mot, qu'à la verité, nul ne se peut dire heureux que celuy qui vit content, ils ont peu & peu de choses les contentes, ils sont comme les petits enfans, qui croient estre beaucoup quand ils ont vne plume sur leur bonnet, ou comme les hypocondres qui s'imaginent d'estres Roys, Empereurs ou Papes, & ne commandent qu'à des mouches.

Lors que les soldats Montagnais se iettent en l'eau, & cedent leurs canots & tout ce qui est dedans aux ieunes femmes & filles, qui leur vont à la rencontre, il ne sont pas si simples que d'y laisser tout leur meilleur butin, mais auparavant que de se faire voir, ils en cachent la pluspart dans les bois, qu'ils vont requerir quelque temps apres, & ne laissent dans leurs canots que ce qu'ils veulent perdre, & par ainsi les femmes n'ont pas souuent grand chose, &

quelquefois rien du tout, car les armes sont journalieres, s'ils ont quelquefois des victoires ils ont aussi souvent des pertes, comme le cancre, qui est pris pensant prendre.

Ils attachent leurs prisonniers à la barre de leur canot avec vne corde, qui leur prent par les deux bras au dessus du coude allant par derriere le dos, & vne autre entre le genouil & le molet des deux iambes, qu'ils attachent ensemble si estroitement, qu'ils ne peuvent marcher que fort doucement & avec grand peine. Ils vzent quelquefois d'une autre espece de ligature, bien plus cruelle & inhumaine, envers ceux qu'ils croyent avoir tué plusieurs de leurs parens & amis, car ils leur percent le gras des iambes & des bras avec vn cousteau, puis passés vne corde au trauers des playes, les lient de sorte qu'ils ne peuvent grouiller sans sentir de furieuses douleurs.

Nos Hurons qui prirent quantité de leurs ennemis, pendant que i'estois demeurant dans leurs pais, n'yferent pas de cette cruauté, car ils se contenterent simplement de les bien garotter, & engarder de pouuoir prendre la fuitte, & apres il les accommoderent en petits dainnez.

Les femmes & filles, ne vont point au deuât avec la mesme ceremonie des Montagnais, & se contentent de leur faire la bien venuë dans le village, & de les ayder à brusser, si elles se rencontrent à la cabane où se faict le supplice, car il y en a d'un naturel si tendre, qu'elles ne peuvent voir sans horreur, deschirer les membres d'un miserable.

Lors que les hommes reuiennent de la guerre, ils ont accoustumé de chanter d'un ton fort haut, approchant de leur bourg ou village, comme j'ay veu pratiquer à la ville de S. Gabriel, nommée par les Hurons, Quicuindohian, au retour de quelqu'un des leurs, il y en a aussi d'autres qui ne disent mot, ny de près ny de loin, entrent & s'assoyent dans les cabanes sans saluer personne, sinon qu'ils disent tout bas leur desconuenue à leur plus familiers amis, comme firent ceux que ie vis arriuer au village de S. Nicolas, autrement nommé Toenchain, où j'estois pour lors avec Onraon Malouin de nation.

J'en ay veu d'autres ietter de haut cris en approchans, denotans par ces voix lugubres, la perte de quelqu'un de leurs compagnons, aussi ne leur faisoit on pas grand accueil, & demandant la raison de ces façons de faire à quelques Sauuagesse, elles me respondirent *Danstan teongyande*, il n'y a rien de bon, les affaires ne vont pas bien pour nous.

Il est quelquefois arriué qu'aucuns de nos Hurons, estans poursuuius de près, se sont neantmoins eschappez, car pour amuser ceux qui les poursuient & se donner du temps pour euader & gagner le deuant, ils tirent leurs colliers du col, & les iettent au loin arriere d'eux, afin que si l'auarice commande à ses poursuués de les aller ramasser, ils pensent tousiours les deuancer & se mettre en lieu de seureté, ce qui a reüssi à plusieurs. J'ay ruminé & creu, que c'est là la principale raison pour laquelle ils

portent tous leurs plus beaux colliers en guerre, afin de seruir d'amorce à leurs ennemis, car de rançon ou de tribut il ne s'en parle point, non plus que d'eschanger vn prisonnier pour vn autre.

Lors qu'ils ioignent vn ennemy & qu'ils n'ont qu'à mettre la main dessus, comme nous disons entre nous, rends toy, eux disent *Sakien*, c'est à dire, assied toy, ce qu'il faict, s'il n'ayme mieux se faire assommer sur la place, ou se defendre iusques à la mort, ce qu'ils ne font pas souuent en ces extremitez, sous esperance de se sauuer & déchaper avec le temps, par quelque ruse, desquelles il ne manque pas.

Or comme il y a de l'ambition à qui aura des prisonniers, cette mesme ambition ou l'enuie de la gloire de son compagnon, est aussi cause que ces prisonniers y trouuent quelquefois leur liberté & souuent leur compte, comme ie vous feray voir en l'exemple suiuant.

Il arriva vn iour, que deux ou trois Hurons, se voulans chacun attribuer vn prisonnier Huroquois, & ne s'en pouuans accorder, ils en firer iuge leur mesme prisonnier, lequel bien aduisé se seruit de l'occasion & dit. Vn tel m'a pris & suis son prisonnier, ce qu'il disoit contre son propre sentiment & expres, pour donner mescontentement à celuy de qui il estoit vray prisonnier: & de faict indigné qu'un autre eut iniustement l'honneur qui luy estoit deu, parla en secret la nuit suiuant au prisonnier, & luy dit: tu t'es donné & adiugé à vn autre qu'à moy qui t'auois pris, ie pourrois bien presentement

te faire mourir & me vanger de ton mensonge, mais ie ne le feray point pour euitier noyse, & te donneray liberté, plustost qu'il aye l'honneur qui m'est deu, & ainfi le desliant le fist eua-der & fuyr secrettement la nuit.

Les prisonniers estans attriuez dans leur ville ou village, on leur continuë bien les festins & bonne chere, mais ie vous assure qu'ils en voudroient bien estre exempts & estre bien esloigné de ces caresses, car les tourments qu'ils scauent qu'on leur prepare, leur donnent bië d'autres pensées que celle de la bonne chere, & si la sagamité est bien ou mal assaisonnée. Ouy les supplices sont si cruels & inhumains, qu'il faut que le diable (car Dieu n'est point avec eux) les assiste pour les pouuoir supporter courageusement comme il font, car il n'y a pas iusques aux femmes & filles aussi cruelles & inhumaines que les hommes, qui inuentent de nouvelles façons de les tourmenter, & faire languir pour plus endurer.

Premierement ils leur arrachent les ongles avec les dents, leur couppent les trois principaux doigts de la main, qui seruent à tirer de l'arc, puis leur leuent toute la peau de la teste avec la cheuelure, & mettent sur le tet des cendres ardëtes, ou y font degoutter de la gomme fonduë, pendant que d'autres disposent des flambeaux d'escorces, avec quoy ils les bruslent tantost sur vne partie, puis sur l'autre, & à aucuns ils font manger le cœur de leur parens & amis, qu'ils tiennent prisonniers, tant leur barbarie est incapable d'assouissement.

Il les font ordinairement marcher, nuds comme la main, au trauers vn grand nombre de feux, qu'ils font d'vn bout à l'autre de la cabane ordonnée, où tout le monde qui y borde les deux costez, ayans en main chacun vn tizon allumé, luy en donnent par tout les endroits du corps en passant, puis l'ayant lié à vn poteau, luy marquent des iartieres autour des iambes avec des haches chaudes, desquelles ils luy frottent aussi les cuisses du haut en bas, & ainsi peu à peu brulent ce pauvre miserable : & pour luy augmenter ses tres-cuisantes douleurs, luy iettent par fois de l'eau sur le dos, & luy mettēt du feu sur les extremittez des doigts, & de sa partie naturelle, puis leur percent les bras près des poignets & avec des bastons en tirent les nerfs & les arrachent à force, & ne les poutans auoir les couppent, ce qu'ils endurent avec vne constance incroyable, chantans cependant avec vn chant neantmoins fort triste, mille menaces & imprecations contre ces bourreaux & contre toute la nation, disant : il ne me chaut de tous vos tourmens ny de la mort mesme, laquelle ie n'ay iamais apprehendée pour aucun hazard, poussez, faictes ce que vous voudrez, ie ne mourray point en vilain ny en homme couard, car i'ay tousiours esté vaillant à la guerre, & rien ne m'a pas encore espouuanté.

Et bien vous me tuerez, vous me brulerez, mais aussi en ay-je tué plusieurs des vostres, si vous me mangez, i'en ay mangé plusieurs de vostre nation : & puis i'ay des freres, i'ay des oncles, des cousins & des parens, qui sçauront bié

venger ma mort, & vous faire encore plus souffrir de tourmens que vous n'en scauriez inuenter contre moy ; neantmoins avec tout ce grãd courage, encores y en a il qui se trouuent souvent contraincts de ietter de haut cris, que la force des douleurs arrachent du profond de leur estomach, mais tels hommes impatiens, estoient reputez ignominieux & infames entre les peuples du Peru auant leur conuersion & y prenoient de si prės garde, que si pour aucun tourment, langueurs & supplices, le miserable deffunct auoit tesmoigné le moindre sentimēt de douleur, ou en son visage, ou es autres parties de son corps, ou mesme qu'il luy fut eschappé quelque gemissement ou quelque soupir, alors ils brisoient ses os aprės en auoir mangé la chair, & les iettoient à la voirie ou dans la riuiera, avec vn mespris extreme.

Au contraire s'il s'estoit monstré patient, resolu, constant & mesme farouche dans les tourmens; en tel cas comme ils en auoient mangé la chair & les entrailles, ils seichoient les nerfs & les os au Soleil, puis les ayans mis sur le sommet des montagnes, ils les tenoient pour des Dieux, les adoroient & leur faisoient des Sacrifices. Vöyla comme entre les peuples les plus brutaux mesme, la patience dans les tourmens, & la constance parmy les difficultez a tousiours esté en estime, iusques à estre adorée pour vn Dieu, & au contraire de l'impatience & des impatiens, desquels les os estoient iettez à la voirie ou dans la riuiera, comme indignes d'estre meslez parmy ceux des gens de bien.

Reuenons à nos Hurons.

Ce pauvre corps estant près d'expirer & rendre les derniers soubpirs de la vie, ils le portent hors de la cabane sur vn eschaffaut dressé exprès, où la teste luy ayant esté tranchée, le vètrouuert, & les boyaux distribuez aux enfans, qui les portent en trophée au bout de leurs baguettes par toute la bourgade en signe de victoire, ils le font cuire dans vne grande chaudiere, puis le mangent en festin, avec des ioyes & liesles qui n'ont point de prix.

Quand les Hiroquois ou autres ennemis peuent attraper de nos Hurons, ils leur en font de mesme ou pis s'ils peuent, car c'est à qui fera mieux ressentir les effets de la hayne à son ennemy. Or si le bon-heur en veut quelquefois à nos Hurons, qu'ils ayent del'aduantage sur leurs ennemis: la chance se tourne aussi souuent du costé des Hiroquois, qui sçauent donner ordre à leur faict, & comme chacun se tient sur ses gardes & se mesfie de son ennemy, tel vay pour prendre, qui est souuent pris luy mesme au filet.

Les Hiroquois, ne viennent pas pour l'ordinaire guerroyer nos Hurons, que les fueilles ne couurent les arbres, pour à la faueur de ces ombres & fueillages, surprendre nos hommes au despourueu, ce qui leur est assez facile, d'autant qu'il y a beaucoup de bois dans le pais & proche la pluspart des villages, que s'ils nous eussent pris nous autres Religieux, ils nous eussent faict passer par les mesmes tourmens de leurs ennemis, & arraché la barbe de plus, comme ils

ils firent au truchement Brulé, qu'ils pensoient faire mourir, & lequel fut miraculeusement deliuré par la vertu de l'Agnus Dei, qu'il portoit pendu à son col, dont voicy l'histoire.

Il est tres-difficile & comme impossible à tous les François encore peu vîtez dans le país de nos Sauvages, de faire des voyages de long cours & courir les bois & forests, où il n'y a sentier ny chemin, sans guyde ou sans s'égarer, comme il arriue ordinairement, & moy mesme y ay esté pris. Or ie cōseillerois volontiers à vn chacun, pour ne plus tomber en ces inconueniens, de ne sortir iamais en campagne seul, sans guide ou sans vn cadran & boussole, pour ce qu'encor bien que la veué du Soleil à laquelle il se faut apprendre à marcher, soit vne assurée guyde à ceux qui cognoissent son cours, celle de la boussole est encore plus commode à nous autres, qui ne sommes pas naturellement Astrologues comme les Sauvages, & puis le Soleil ne se voit pas tousiours, & la boussole peut seruir en tout temps, & la nuit & le iour, il n'y a qu'à en sçauoir vser. Mais il faut auoir remarqué au préalable auant partir du logis, à quel Rut de vent on desire aller, & à quel autre Rut vous doit demeurer la maison, afin que vostre cadrā que vous regarderez souuēt, vous redresse si vous venez à manquer, comme il ne peut qu'il n'arriue quelquefois.

Ce pauvre Brulé, quoy qu'assez sçauant dans le país des Hurons & lieux circonuoisins, se perdit neantmoins, & s'égara de telle sorte, que faute d'auoir vne de ses boussoles, ou prins

garde au Soleil, il tourna le dos aux Hurons, traversa force pais, & coucha quelques nuits dans les bois, iusques à vn matin qu'ayant trouué vn petit sentier battu, il se rendit par iceluy dans vn village d'Hyroquois, où il fut peine arriué, qu'il fut saisi & constitué prisonnier, & en suite condamné à la mort, par le conseil des Sages.

Le pauvre homme bien estonné ne scauoit quel Sainct se vouër, car d'espérer misericorde il scauoit bien qu'il n'estoit pas en lieu, il eut donc recours à Dieu & à la patience, & se soumit à ses diuines volontez plus par force qu'autrement, car il n'estoit guere deuot, tesmoin ce qu'il nous dit vn iour, que s'estant trouué en vn autre grand peril de la mort, pour toute priere il dit son Benedicité.

Orie ne sçay s'il le dit icy se voyant prisonnier & dans le premier appareil de la mort, car desja ils l'auoient faict coucher de son long contre terre & luy arrachioient la barbe, lors quel vn d'eux auisant vn Agnus Dei, qu'il portoit pendu à son col, luy voulant arracher, il se prit à crier & dit à ses bourreaux, que s'ils luy ostoient, Dieu les en chastieroit, comme il fist: car ils n'eurent pas plustost mis la main dessus pour luy tirer du col, que le Ciel auparavant sercin, se troubla, & enuoya tant d'esclairs, d'orages & de foudres, qu'ils en creurent estre au dernier iour, s'enfuyrent dans leurs cabanes & laissèrent là leur prisonnier, qui se leua & s'enfuit comme les autres, mais d'un autre costé.

Le sçay bien que quelque petit esprit se ren-

dra incredible à cecy , n'importe, suffit que les gens de bien & ceux qui ont demeuré dans les pais infidelles , sçachent que Dieu y opere encore de plus grandes merueilles, & souuent par des personnes plus mauuaises, pour faire davantage esclater sa gloire & cognoistre qu'en effect il est seul tout puissant, & peut ce qu'il veut, & faiët du bien à qui il luy plaist.

A la fin ce fortuné Bruslé, a esté du depuis condamné à la mort, puis mangé par les Hurons, ausquels il auoit si long-temps seruy de truchement, & le tout pour vne hayne qu'ils conceurent contre luy, pour ie ne sçay quelle faute qu'il commit à leur endroit, & voyla comme on ne doit point abuser de la bonté de ces peuples, ny s'asseurer par trop à leur patience, pour ce que trop exercée elle se change en furie, & ceste furie en desir de vengeance, qui ne manque iamais de trouuer son temps. Il y auoit beaucoup d'années qu'il demeueroit avec eux, viuoit quasi comme eux, & seruoit de Truchement aux François, & après tout cela n'a remporté pour toute recompense, qu'une mort douloureuse & vne fin funeste & malheureuse; ie prie Dieu qu'il luy fasse misericorde, s'il luy plaist, & aye pitié de son ame.

Il arrive aucunes fois que les prisonniers s'eschappent, specialement la nuit, au temps qu'on les faiët promener par dessus les feux, car en courans sur ses cuiuans brasiers, de leurs pieds ils escartent les tizons, cendres & charbons par la cabane, qui rendent après vne telle obscurité qu'on ne s'en tre recoignoist point: de

forte qu'on est contrainct (pour ne perdre la veüe) de gagner la porte, & de sortir dehors & luy aussi parmy la presse, & de là il prend l'esfor, & s'en va : & s'il ne peut encores pour lors, il se cache en quelque coin à l'escart, attendant l'occasion & l'opportunité de s'euader & gagner pais. l'en ay veu plusieurs ainsi eschappez, qui pour preuue nous faisoient voir les trois doigts principaux de leur main droicte coupez.

Entre les Mexicains auant leur conuersion il s'y faisoit souuent de tres grandes guerres à ce dessein, principalement d'obtenir des prisonniers, pour les faire mourir & sacrifier à leurs Idoles, comme i'ay rapporté en quelque autre endroit de ce volume, de sorte qu'il s'est conté pour tel iour (cas pitoyable) dans la seule ville de Mexique capitale du Royaume, iusques à cent mille hommes sacrifiez sous le Roy Moteczuma, & pourquoy cela sinon pour contenter & auoir fauorables leurs faux dieux, affamez du sang humain, qui par vne inuention infernale baltie & forgée sur l'enclume de leur obstination eternelle, ne vouloiët qui leur fust sacrifié autre chose que des prisonniers de guerre, afin d'entretenir tousiours les guerres & exterminer ces peuples miserables, car le diable ne demande que la ruïne de ceux qui le seruët. C'est pourquoy lors que les Prestres des Idoles n'auoient pas toutes choses à souhait & que leurs Dieux ne leur estoient pas secourables, ils alloient par tout trouuer les Roys & les Princes, & leur disoient que les Dieux mouroient

de faim , & qu'ils eussent souuenance d'eux; alors les Princes s'enuoyent des Ambassadeurs l'un l'autre, & s'entredonnoient aduis de la necessité en laquelle les Dieux se trouuoient les conuiens pour ceste cause à faire leuée de gens de guerre pour donner la bataille, afin d'auoir de quoy donner à manger aux Idoles. Ainsi ils marchoiēt en abondance aux lieux destinez. & venoient aux mains pour aller à la mort, & de la mort aux enfers.

Les prisonniers que les Mexicains obtenoient, estoient menez en haut deuant la porte du grand Temple, où le souverain Prestre, leur ouuroit la poitrine avec vn cousteau, & leur arrachoit le cœur, qu'il monstroit premierement au Soleil, luy offrant ceste chaleur & ceste fumée, puis il le iettoit au visage de l'Idole. Les autres Prestres donnoient après du pied au corps, qui roulant par les degrez s'en alloit en bas, où ceux qui les auoient pris à la guerre se les partageoient & en faisoient des festins solennels, presque à la maniere de nos sauuages.

*Voyage de nostre Frere Gervais au Cap de
Victoire, & de la maniere que furent ame-
nez & receus deux prisonniers Huroquois
par les Montagnais.*

CHAPITRE XXIX.

I'Ay faict mention au Chapitre precedent
mais fort succinctement, de la maniere que
sont amenez & receus entre les Montagnais
leurs prisonniers de guerre, dont ils sont ex
quelque chose differens des autres nations, qui
ne donnent point tant de part aux femmes en
leurs victoires, estans d'ailleurs assez satis-
faictes au repos de leur menages & à la dou-
ceur, à quoy il semble que nos Huronnes soi-
ent moins & moins interessées en ces actions de
guerre que les errantes.

Nostre Frere Gervais m'a appris, que com-
me il fut enuoyé par le R. P. Ioseph le Caron
Superieur de nostre Conuent de Kebec dans
une barque, avec le R. P. Lallemand Iesuite
pour les trois Riuieres, à dessein d'apprendre
des Hurons (qui s'y denoient trouuer) des nou-
velles de nostre Pere Ioseph de la Roche, qui
estoit dans leur pais, & d'y monter s'il eust esté
nécessaire pour son secours. Estans là, arriuerent
sur le soir trois canots de ieunes Montagnais

volontiers qui malgré leurs parens & Capitaines estoient partis pour la guerre contre les Hiroquois, pour y mourir, ou pour en ramener des prisonniers, comme ils firent.

Il dit qu'ils, venoient chantans tout debout dans leurs canots, comme personnes fort contentes & ioyeuses, & que de loin qu'on les apperceut & qu'on pût discerner leur chant & leur posture, on iugea à leur mine, qu'ils venoient de la guerre & qu'assurément, ils auoient autant de prisonniers, comme ils repetoient de fois à la fin de chacun couplet de leur chanson la syllabe ho, ce qui fut trouué veritable, car ils la repetoient deux fois, aussi auoient ils deux prisonniers.

Ils en font de mesme, quand ils ne rapportent que les testes de leurs ennemis, ou leurs perruques escorchées, lesquelles ils attachent chacune au bout d'un long bois, arrangez sur le deuant de leurs canots, pour faire voir leur proiessse & la victoire obtenüe sur leurs ennemis, à ceux qui leur doiuent vne honorable reception pour ces exploits.

Le bon Frere Geruais, desirieux de voir ces prisonniers de plus près, & sonder s'il pourroit obtenir leur deliurance, se fist conduire à terre avec le R. P. Lallemand, & de là entrerent dans les cabanes, pour voir ces pauvres prisonniers, qu'ils trouuerent chez vn Sauvage, nommé Mecabo ou Martin par les François, qui nous estoit grand amy.

Son gendre appellé Napagabiscou, & par les François Tricatin, fils d'un pere nommé Nep-

tegaré, c'est à dire homme qui n'a qu'une jambe, non qu'il fut boiteux, mais estoit son nom de naissance. Ce Napagabiscou estoit Capitaine des sept autres barbares, qui l'auoient accompagné à la guerre contre les Hiroquois, d'où ils auoient amenez ses deux prisonniers, lesquels ils auoient surpris occypés à la pesche du Castor, en vne Riuiere autour de leur village ou Hourgade.

Ces pauvres esclaves, l'un aagé d'environ 25. ans, & l'autre de 15 à seize, estoient assis à platte terre proche de ce Capitaine Napagabiscou, festinans en compagnie de plusieurs autres Sauvages, d'une pleine chaudiere de pois cuits, & de la chair d'Eslan, avec la mesme gayeté & liberté que les autres, du moins en faisoient ils le semblant, pour n'estre estimez poltrons ou auoir peur des tourmens, desquels ils auoient desja eu le premier appareil, capable de pouuoir tirer des larmes de personnes moins constantes, car pour moindre mal, nous criions bien à l'ayde.

Le bon Frere dit, qu'on leur auoit desja arraché les ongles de tous les doigts des mains, puis bruslé le dessus avec de la cendre chaude, ordinairement meslée de sable bruslant, pour en estancher le sang. L'un d'eux auoit aussi esté tres bien battu par vne femme Montagnaise, qui luy mordit le bras, dont elle mangea vne grande piece, disant: que c'estoit en vengeance de la mort de son fils, qui auoit esté pris & mangé en leur pais.

Ils auoient aussi esté tres-bien battus en les

prenans & par les chemins, dont ils estoient presque tout brisez de coups, particuliere-
ment le plus jeune, qui ne pouuoit quasi mar-
cher d'un coup de massüe qu'il auoit receu
sur les reins, sans que cela l'épechast de sa mi-
ne gaye & ioyeuse, & de chanter avec son
compagnon, mille brocards & imprecations
à l'encontre de Napagabiscou, & de routes
les Nations Montagnaites, & Algomequines,
qui ne se faschoient nullement d'estendre
vn si fascheux ramage, telle estant leur cou-
stume, qui seroit meritoire si elle estoit ob-
seruée pour Dieu, ou à cause de Dieu, mais le
malheur est qu'il n'y a rien que la seule vani-
té qui les porte d'estre estimé inefbranlable
pour les iniures, & pleins de courage dans
les tourmens.

Il y a vne autre raison qui ayde encore à
leur constance & fermeté, c'est qu'en faisant
voir vn si grand mespris des iniures & des
tourmens, ils croient intimider ceux qui leur
font souffrir, & que si facilement ils n'oserot
plus aller à la guerre cōtre vne Nation si bel-
liqueuse & constante, & que ce sera assez
pour eux de se tenir dorefnauāt sur leur gar-
de, peur qu'on ne viēne véger sur leurs testes,
la mort de ces pauures patiens, & que s'ils se
monstroient timides & effeminez, ou pleu-
roient pour les tourmens, on retourneroit
librement en leur pays pour attraper de ses
femmes, ainsi appellent ils les hommes im-
patiens & sans courage.

Le festin estant finy, l'on les mena en vne

autre grande cabane, où quantité de ieunes filles, & garçons se trouuerent pour la danc qu'ils firent à leur mode, dont les deux prisonniers estoient au milieu qui leur seruoient de chantres, pendant que les autres dançoient autour d'eux, si eschauffez qu'ils suoiert de toutes parts.

Leurs postures & leurs grimasses sembloient de Demons. Ils frapportoient du talon en terre de telle force que le bruit en retentissoit par tout, car c'est leur mode de se demener fort, particulièrement les ieunes hommes, qui n'auoient pour tout habit qu'un petit brayer deuant leur nature.

Les filles estoient vn peu plus decemment couuertes, & plus modestes en leurs actions, car en dançans elles auoient les yeux baissiez, & les deux bras le long de leurs cuisses, estendus, comme c'est leur coustume, & non point des Huronnes. Je m'oubliois de parler des violons ou instrumens musicaux, au son desquels, & des chansons des deux chantres, tout le branle alloit, & se remuoit à la cadence, c'estoient vne grande escaille de tortue, & vne façon de tambour de la grandeur d'un tambour de balque, composé d'un cercle large de trois ou quatre doigts, & de deux peaux roidement estendues de part & d'autre, dans quoy estoient des grains de bled d'Inde, ou petits caillous pour faire plus de bruit. le diametre des plus grands tambours est de deux palmes ou enuiron, ils le nomment en Montagnais Chichigouan; ils ne le

Tambour.

battent pas comme on faiçt par deçà: mais ils le tournent & remuent, pour faire bruite les caillous qui sont dedans, & en frappent la terre, tantost du bond, tantost quasi du plat, pendant que tout le monde dance.

Voilà tout ce qui est des instrumens musicaux du pays, sinon qu'il se trouua quelques petits garçons assis au milieu de la dance auprès des prisonniers, qui frapportoient avec des petits bastons sur des escuelles d'escorces de cerueilles, & dance des autres instrumens pour seruir de basses. Mais quand aux chansons elles estoient de diuers airs, & au bout de chacun les chanteurs crioient tousiours, ho, ho, ho. & les danseurs, hé hé, hé & quelquefois ché, ché, ché; Et puis tous ensemble à la fin de chaque chanson la voix, hô, hô. coué, coué. rouloit tousiours.

Nostre bon Frere Geruais ayant veu toutes ces ceremonies, fut à la fin contrainct de sortir de la cabane auant que tout fut acheué, tant pour l'excessive chaleur, que pour la quantité de poudre qui luy offusquoit les yeux.

Le Magicien ou principal Jongleur qu'ils appellent Manitouhou, nom commun à tous leurs Sorciers, fut à la fin fort bien recompensé de plusieurs des danseurs qui luy donnerent, qui vn castor, qui vne peau de loutre, vne robe de chien, de laquelle il fit grand estat, puis vne de castors, & vne autre d'ours dans l'excellence, voilà comme il fut grandement bien sallarié & payé, iusques à la va-

leur de six ou sept robes de castors, qui vaudroient en France plus de quatre-vingt escus, au prix que l'on les y achepre.

Tout cecy n'est pas la fin des mysteres de nos pauvres prisonniers, ils ont encores bien des tours à faire avant que devoit la fin de leur tragedie, les barbares ne sont pas si fort empressez que de vouloir vuidier si tost vne affaire où ils trouvent tant soit peu de recreation, ou suiet de festoyer, le ris, & la cuisine leur est trop recommandable, & la punition de leurs ennemis trop precieuse pour en demeurer là, & s'arrester à si beau ieu il faut que la feste soit faite entiere, & que chacun reste content, qui n'est iamais pendant qu'il y a d'quoy, i'en parle comme sçauant, & non pas à la maniere d'un certain Baron, lequel en voulant donner à garder à tout plein de personnes de qualite avec lesquels nous faisons de compagnie chez son Rapporteur, car comme on fut à la fin du second, il commença à discourir d'un pretendu voyage qu'il auoit fait parmy les Sauvages du Canada, (nottez il n'y auoit ia nais esté) & entre autre chose il s'estendit fort sur la deduction d'un festin que les Barbares luy firent (à son dire) à l'entrée du pays, ie le laissay dans ses gayer humeurs iusques à la fin que ie luy demanday, Monsieur ou les pauvres Sauvages auoient ils emprunté la vaisselle, à cela point de responce, mon pauvre Genilhomme demeura muet, & confessa qu'il ne me croyoit pas si prés.

La dance finie, l'on ramena les prison-
niers à la cabane de Napagabiscou, où estoit
reparé le souper que Macabo son beau pere
uy vouloit faire pour son heureux retour, F.
Gervais qui se trouua là present en fut prié,
& ne s'en pû excuser, pour ce que comme ce
son Macabo l'aymoit comme son petit fils
ainsi l'appelloit il c'eust esté l'offencer que
l'éconduire: car ces bonnes gens là ne con-
derent pas le degoust que l'on a de leurs
viandes, il faut tout prendre en gré, & tesmoi-
ner le mieux que l'on peut, qu'on est fort
obligé, d'auoir part à leur bonne chere,
à leur amitié, en verité plus sincere que cel-
de la pluspart des Chrestiens, auxquels il
y a à present, que tromperie, mensonge, &
simulation, iusques aux maisons qui sem-
ent les plus sainctes, cela n'est que trop
verité & cognu, au grand regret de tous les
bons de bien, & des ames vraiment deu-
otes & candides.

Ce festin estoit composé d'un reste de Viandes du
air d'eslan de son Hyuer passé, moisie & festin.
che comme du bresil, qu'on mit dans la
chaudiere sans la lauer ny nettoyer, avec des
restes de canars si vieux & pourris que les pe-
sy estoient tout formez, & partant fort
mauais. On y adiousta encore des poissons
sains estre habillez, puis des pois, des
lunes, & du bled d'Inde, qu'on fit bouillir
dans vne grande chaudiere, brouillé &
ménué le tout ensemble avec un grand
ron.

le vous laisse à penser quel goust, & qu'il le coultur pouuoit auoir ce beau potage, & s'il fut pas necessaire à ce bon Religieux de se faire monter soy mesme pour gouter d'une telle viande, de laquelle il mangea neant moins vn peu, pour ne pouuoir plus. Apre quoy il pria pour la deliurance des prisonniers qu'il voyoit fort ieunes & affamez, sans qu'ils tesmoignassent aucun ressentiment de leur captiuité, non plus que s'ils eussent esté en pleine liberté. Et pour ce remonstra tous les Sauvages là assemblez, que puis que ces pauvres Hiroquois ne leur auoient fait aucun desplaisir, il n'estoit pas raisonnable de les faire mourir ny traiter comme ennemis, veu mesme leur ieunesse, & qu'ils auoient esté pris en peschant, & non point en combatant.

A cela ils luy respondirent qu'il ny auoit ny paix ny trefue entr'eux, & les Hiroquois mais vne guerre continuelle, qui leur permettoit d'vser de toutes sortes de rigueurs l'endroit de ceux qu'ils pouuoient attraper & qu'au cas pareil les Hiroquois vsoient de mesmes cruantez envers ceux de leur Nation qu'ils pouuoient prendre, & partant qu'il ne seroit pas raisonnable de laisser à ces deux prisonniers sans chastiment, qui portast moins que la mort, sinon qu'ils voussent passer pour gens effeminez, & de peu de courage, qui ne scauoient chastier leurs ennemis. & ainsi furent condamnez ces deux pauvres prisonniers à mourir de

toutes les Nations assemblées pour la traite, sans que les prieres de nostre Frere peussent rien obtenir pour eux qu'une prolongation de quelques iours, que le sieur de Champlain, avec le reste des Capitaines Montagnais deuoient se rendre à la traite.

Le lendemain du festin, nous prîmes le deuant, & fîmes voiles pour le Cap de Victoire, dit le bon Frere Geruais, & ne leur fut possible de passer l'entrée du lac saint Pierre, à cause d'un vent contraire iusques au iour suiuant qu'ils furent iusques au milieu avec un vent assez fauorable, mais qui changea soudain en un contraire, qui les obligea de ranger la terre, & mouiller l'anchre le trauers d'une petite riuere qui vient du costé du Sud, où desia estoient à labry plusieurs canots Sauvages attendans le beau temps pour le mesme voyage.

Le vent s'estant changé en un fauorable, nos gens leuerent l'anchre, partirent sur les deux heures apres minuit, & aduancerent iusques au bout du lac, & le lendemain matin apres un petit different surueni entre les mariniers pour le chemin, à cause qu'il y a plusieurs petites Isles entrecouppées de diuerses petites riuieres qui entrent dans le lac, & rendent le pays beau à merueille, ils arriuerent à la traite, sur le bord du grand lleuve deuant la riuere des Ignierhonons, où quantité de Barbares estoient desia cabanez attendans nos Montagnais des trois riuieres, avec les Hurons qui n'estoient point encores descendus.

Sur le soir du mesme iour, les prisonniers arriuerent lesquels furent gardez, liez & garrottez, l'espace de deux ou trois iours dans la cabane de leur hôte, pendant lequel temps le sieur Champlain arriua de Kebec, dans le canot du Capitaine Mahican Atic, avec son frere, & deux autres Capitaines dans vn autre canot. Tous les François, & plusieurs Sauvages se resiouyrent fort de leur venue sous l'esperance qu'ils pourroient obtenir la deliurance des prisonniers, laquelle le Frere Geruais n'auoir pû obtenir, mais il s'y presenta tant d'obstacles, qu'apres que ledit sieur de Champlain eut bien debatü pour ce bon ſeuure, vn Capitaine Algonquin mesprisant ses conseils, luy dit: Tu veux que l'on deliure ces gens là qui sont nos ennemis, & ie ne le veux pas moy qui suis Capitaine, il y a trop long temps que ie mange maigre, ie veux manger gras, particulièrement de la chair des Hiroquois, de laquelle j'ay grande enuie & partant deportte toy de tes poursuites, & nous laisse faire iustice de nos ennemis, car nous ne nous meslons point de tes affaires.

Puis sur le soir vn Capitaine Montagnais nommé Chimeourinon autrement par les François le meurtrier, couppa les cordes aux deux prisonniers, pensant les faire euader, mais il ne pû; On ne sçait par quel instinct, ny quel suiet le mouuoit a ce faire, sinon qu'il eut mieux aymé leur donner liberré, qu'ayât eu la peine de les amener, vn autre eut la gloire

gloire de les deliurer, car ils sont sur tout ambitieux d'honneur, & enuieux qu'un autre leur empiete. Le sieur de Champlain resta fort mescontent de certe action du Montagnais & avec raison. car il auoit vn tres-bon dessein en la poursuite de certe deliurance pour laquelle il estoit venu exprès de Kebec, pour ce que come il est croyable, il n'y auoit pas plus beau moyen pour traiter de paix avec les Hiroquois qu'en deliurant leurs prisonniers par le moyen des François.

Ce que consideré par plusieurs Capitaines Sauvages, ils tindrent diuers conseils, où assisterent tousiours le sieur de Champlain, & quelqu'un des principaux François, ou apres plusieurs conrestations il fut resolu que l'un des deux prisonniers seroit renuoyé en son pays accompagné de deux Montagnais, & de quelques François, si aucun se presentoit, pour traiter de paix, par le moyen de ce prisonnier, pendant que l'autre demeureroit pour ostage iusque à leur retour à Kebec.

Cet arrest consola merueilleusement tous les Sauvages portez à la paix, & en remercierent le sieur de Champlain, aduouant qu'il estoit vn grand Capitaine, digne de sa charge, & de fort bon iugement, marris que depuis vingt Hyuers qu'il hantoit avec eux, il ne s'estoit point estudié à leur langue pour pouoir iouyr de ses conseils, & se communiquer avec eux par soy mesme, & non par Truchemens, qui souuent ne rap-

Contēt par
les nuits.

portent pas fidèlement les choses qu'on leur dit, ou par ignorance, ou par mespris, quiest vne chose fort dangereuse, & de laquelle on en a souuent veu arriuer de grands accidens. l'ay dit vingt Hyuers pour vingt années, c'est la façon de parler des Montagnais, lesquels voulans dire, quel aage as tu, disent combien d'Hyuers as tu passé, de mesme au lieu que nous dirions deux iours, trois iours, ils disent deux nuits, trois nuits, comprans par les nuits au lieu que nous comptons par les iours.

Sur l'esperance d'une paix prochaine que nos Sauvages se promettoient de cest Ambassade, ils ordonnerent des dances, des festins, & diuers petits ieux, en quoy ils se firent admirer par les François qui y prenoient vn singulier plaisir, nommément la jeunesse. Mais comme on estoit occupé à ces esbats voicy arriuer vne double charlouppe de Gaspey conduite par des François qui donnerent aduis au sieur de Champlain, de l'arriuee du sieur du Pont, & de son petit fils le sieur Desmarets à Kebec, mais que le Nauire du R. P. Noiroz Iesuite ne paroissoit point, & faisoit douter de quelque nassurance, ou mauuaise rencontre, neantmoins qu'il leur estoit arriué des viures deschargez à Gaspey, & qu'il estoit necessaire que le R. Pere Lallemand detcondit à Kebec, pour les enuoyer querir au plustost.

A ces nouuelles on aduisa d'enuoyer

promptement le prisonnier Hiroquois, le Capitaine Ckimeouriniou, vn autre Montagnais, nommé par les François Maistre Simon, & vn Hiroquois de Nation, lequel ayant esté pris fort ieune, & donné à vne femme vesue qui l'adopta pour son fils, est tousiours demeuré depuis en leur pays, & affectionné à ce parry. Ils demandèrent d'estre assistés de quelques François, par vne prudence politique, que s'il venoit faute d'eux, & des François, tous les autres François fussent obligez par honneur de se ioindre à eux, & prendre vengeance de leurs hommes contre les Hiroquois, en quoy ils se pouuoient tromper, car on n'est pas si eschauffez icy que de prendre part dans les interets de ces pauvres gens, sinon par ceremonie, ou pour quelque profit.

Le Frere Geruais m'a dit qu'il eut bien desiré d'y aller, & se fut volontiers offert s'il eut esté en lieu pour en auoir l'obedience, & par permission du R. Pere Ioseph, mais qu'en estant trop esloigné, il luy en resta seulement le desir & la bonne volonté d'y aller hasarder sa vie pour Dieu, & y cognoistre le pays.

Plusieurs François s'offrirent bien d'y aller, mais avec des conditions si desavantageuses qu'on les esconduit tous, excepté vn nommé Pierre Magnan, lequel prodigue de sa vie contre l'aduis de ses amis se mist en chemin avec le prisonnier, & les

trois Montagnais moyennant douze escus qu'on luy deuoit donner à son retour, avec tout le profit de ses castors, qui estoit assez peu pour vn si perilleux voyage, qui en effect leur fut funeste & malheureux, car ils y furent tous quatre miserablement condammnez à mourir, puis mangez par les Hi-
roquois.

Le François estant d'accord pour son voyage, Chimeouriniou se disposa aussi avec les autres pour partir, & assëura le sieur de Champlain, & tous les autres François, & Barbares, que assëurement ils reuiendroient dans vingt nuits, & que s'ils en tar-
doient plus de vingt cinq, seroit signe qu'ils seroient arrestez ou morts, ou tombez malades en chemin, puis partirent le iour de la sainte Magdelene pour le pays des Hi-
roquois, & le Reuerend Pere Lallemand avec le sieur de Champlain pour leur re-
tour à Kebec, pendant que le Frere Ger-
nais restait encore à la traite pour vn temps.

*De la creance , Religion , on superstitions
des Hurons. Du Createur, & de sa
mere grand. Des ames des deffunets,
& des presens , & aumosnes qu'ils
font à leur intention. De certains
esprits auxquels ils ont recours , & des
ames des chiens , & choses inani-
mées.*

CHAPITRE XXX.

ENcor que Ciceron aye dit, parlant de De Dieu.
la nature des Dieux, qu'il n'y a gent si
sauuage, si brutale, ny si barbare, qui ne
soit imbuë de quelque opinion d'iceux, &
n'aye ce sentiment naturel d'une nature
superieure à celle de l'homme, qui le por-
te à quelque forme d'adoration de Reli-
gion, & de culte interieur, ou exterieur
pour en tesmoigner les recognoissances.
Neantmoins nos Hurons, & Cana-
diens, semblent n'en auoir aucune prati-
que ny exercice, que nous ayons pu des-
couvrir, car encor bien qu'ils aduoient
vn premier principe & Createur de toutes
choses, & par consequent vne Diuinité,
avec le reste des Nations, si est ce qu'ils
ne les prient d'aucune chose, & vivent

presque en bestes, sans adoration, sans Religion & sans vaine superstition sous l'ombre d'icelle.

De Temples ny de Prestres, il ne s'en parle point entr'eux nom plus que d'aucunes prieres publiques ny communes, & s'ils en ont quelqu'vnes à faire, ou des Sacrifices, ce n'est pas à cette premiere cause, ou premier principe qu'ils les adressent, mais à de certains esprits puissans qu'ils logent en des lieux particuliers, auxquels ils ont recours, comme ie vous diray cy apres.

Des Diab-
bles.

Pour des Diables & malins esprits, ils en croient des nombres infinis, & les redoutent fort, car ils leurs attribuent la cause principale de toutes leur maladies & infirmittez, qui faict que quand dans vn village il y a nombre de malades, ils ordonnent des bruits & tintamarres pour les en dechasser, croyans que ces bruits sont capables despouuenter les Demons, comme ils feroient vne troupe d'oyseaux, ou des petits enfans.

Ne font di-
stinction de
iours.

Ils n'ont ny Dimanches ny Festes, si non celles qu'ils ordonnent pour quelque ceremonie, car ils estiment tous les iours egaux, & aussi solempnels les vns comme les autres, & ne font non plus distinction de sepmaines, mais seulement de mois par les Lunes, des quatre saisons de l'année, & des années entieres.

Or comme il y a diuerſes Nations, & Prouinces de Barbares, Sauuages, auſſi ya il diuerſité de ceremonies, d'opinions, & de croyance Saincte, car n'eſtans pas eſclairez de la lumiere, de la foy, & de la cognoiſſance entiere du vray Dieu, dans leurs tenebres chacun ſe forge des obſeruations, des ceremonies, & vne Diuinité, ou Createur à ſa poſte, auquel neantmoins ils n'attribuent point vne puissance abſoluë ſur toutes choſes, comme nous faiſons au vray Dieu, car leur en parlant ils le confeſſoient plus grand Seigneur que leur Yoſcaha, qu'ils croyent viure preſque dans la meſme infirmité des autres hommes, bien qu'eternel.

Les Indiens de diuerſes Prouinces plus meridionales de noſtre meſme Ameri-
que, firent iadis eſlection de leurs Dieux, avec quelque conſideration, tenant pour Deitez les choſes dont ils receuoient quelque profit, tels qu'eſtoient ceux qui adoroient la terre, & l'appelloient leur bonne mere, à cauſe qu'elle leur donnoit ſes fruiets; les autres l'air, pour ce diſoient ils, qu'il faiſoit viure les hommes par le moyen de la reſpiration; les autres le feu, à cauſe qu'il leur ſeruoit à ſe chauffer, & à leur appreſter à manger; les autres le mouton, pour le grand nombre de troupeaux qu'ils nourriſſoient en leurs paſturages; les autres le Maiz, ou leur

Diuerſité
des Dieux.

bled d'Inde, pour ce qu'ils en faisoient du pain ; Et les autres toutes les sortes de legumes , & de fruiçts que leur pays produisoit.

Mais à le prendre en general , ils reconnoissoient la mer pour la plus puissante de toutes les Deitez , & l'appelloient leur mere. Voyla comme tous ces Payens & Barbares parmy leur Deitez , en ont tousiours reconnu quelqu'une de plus grande puissance , dont la mesme chose se reconnoist entre nos peuples Hurons , bien qu'ils ne les adorent avec des ceremonies si particulieres des anciens Payens.

Croyance
des Miçon-
tins,

Ceux qui habitent vers Miskou , & le Port Royal , au rapport du sieur Lescot , croient en certain esprits , qu'ils appellent Cudoïagni , & disent qu'il parle souvent à eux , & leur dit le temps qu'il doit faire. Ils disent que quand il se courrouse contre eux , il leur ierre de la pousciere aux yeux. Ils croient aussi quand ils trespasent , qu'ils vont és Estoilles puis vont en de beaux champs verts , pleins de beaux arbres , fleurs & fruiçts tres-somptueux & delicats.

Croyance
des Suri-
quois.

Pour les Souriquois, peuples errants , leur creance est que veritablement il y a vn Dieu qui a tout créé , & disent qu'apres qu'il eut fait toutes choses , qu'il prit quantité de fleches , & les mit en terre , d'où sortirent hommes & femmes ,

qui ont multiplié au monde iusques à présent. En suite de quoy il demanda à vn Sagamo s'il ne croyoit point, qu'il y eut vn aatre qu'un seul Dieu, il respondit qu'ils croyoient vn seul Dieu, vn fils, vne mere, & le Soleil, qui estoient quatre, neantmoins que Dieu estoit par dessus tous: mais que le Fils estoit bon & le Soleil, à cause du bien qu'ils en receuoient: mais la Mere ne valoit rien & les mangeoit, & que le Pere qui est Dieu, n'estoit pas trop bon par les raisons que ie diray cy aprées.

Puis dit: anciennement il y eut cinq hommes, qui s'en allerent vers le Soleil couchant, lesquels rencontrerent Dieu, qui leur demanda: où allez vous? ils respondirent, nous allons chercher nostre vie. Dieu leur dit, vous la trouuerez icy, ils passerét plus outre sans faire estat de ce que Dieu leur auoit dit, lequel prit vne pierre & en toucha deux qui furent transmuez en pierres Et il demâda de rechef aux trois autres: où allez vous? & ils respondirent comme à la premiere fois: & Dieu leur dit de rechef: ne passez plus outre vous la trouuerez icy: & voyans qu'il ne leur venoit rien ils passerent outre, & Dieu prit deux bastons desquels il toucha les deux premiers, qui furent trāsmuez en bastons & le cinquieme s'arresta ne voulant passer plus outre. Et Dieu luy demanda de rechef: où vas tu? ie vay chercher ma vie, demeure, & tu la trouueras: il s'arresta sans passer plus, outre. Et Dieu luy donna de la viande & en mangea. Après auoir fait bonne chere, il retourna avec les autres Sauvages, & leur ra-

conta tout ce que dessus.

Croyance
plaisante.

Ce Sagamo fût encore ce plaisant discours à de François. Qu'yne autre fois il y auoit vn homme qui auoit quantité de tabac, & que Dieu dit à cet homme & luy demanda où estoit son petunoir, l'homme le prit & le donna à Dieu qui petuna beaucoup, & après auoit bien petuné il le rompit en plusieurs pieces: & l'homme luy demanda; pourquoy as tu rompu mon petunoir, & tu vois bien que ie n'en ay point d'autre: & Dieu en prit vn qu'il auoit & le luy donna luy disant: en voyla vn que ie te donne, porte le à ton grand Sagamo, qu'il le garde, & s'il le garde bien, il ne māquera point de chose quelconque ny tous ses compagnons: cet homme prit le petunoir qu'il donna à son grand Sagamo, & durant tout le tēps qu'il l'eut, les Sauuages ne manquerent de rien du monde: mais que du depuis ledit Sagamo auoit perdu ce petunoir, qui est l'occasion de la grande famine qu'ils ont quelquefois parmy eux. Voila pourquoy ils disent que Dieu n'est pas trop bon, ayant fondé toute leur abondance sur vn Calumet de terre fragile, & que les pouuans secourir il les laissoit souffrir au delà de toutes les autres nations.

Croyance
des Hurōs.

La croyance en general de nos Hurons (bien que tres-mal entenduë par eux mesmes & en parlent fort diuersement,) est que le Createur qui a fait tout ce monde, s'appelle Yoscaga, & en Canadien Atahocan ou Attaouïacan, lequel a encore sa mere grand, nommée Eataentfic: leur dire qu'il n'y a point d'apparence, qu'un Dieu

qui a esté de toute eternité, aye vne mere grand & que cela se cōtrarie, ils demeurent sans replique, comme à tout le reste de leur creance. Ils disent qu'ils demeurent fort loin, n'en ayans neantmoins autre certitude ou cognoissance que la traditiue qu'ils tiennent de pere en fils, & le recit qu'ils alleguent leur en auoir esté faict par vn Artiuindaron, qui leur a donné à entendre l'auoir veu & les vestiges de ses pieds imprimées sur vn rocher au bord d'vne riuiera qui auoisine sa demeure, & que sa maison ou cabane est faicte au model des leurs, y ayant abondance de bled & de toute autre chose necessaire à l'entretien de la vie humaine. Que Eataentsic & luy sement du bled, trauaillent, boient, mangent, dorment, & sont lascifs comme les autres; bref ils les figurent tous tels qu'ils sont eux mesmes.

Que tous les animaux de la terre sont à eux & comme leurs domestiques. Que Youskeha, est tres-bon & donne accroissement à tout, & que tout ce qu'il faict est bien faict, & nous donne le beau temps & toute autre chose bonne & prospere. Mais à l'opposite que sa mere grand est meschante, & gaste souuent tout ce que son petit fils a faict de bien.

D'autres disent, que cette Eataentsic est tombée du Ciel, où il y a des habitans comme icy, & que quand elle tomba elle estoit enceinte. Qu'elle a faict la terre & les hommes & qu'avec son petit Fils Youskeha, elle gouuerne le monde. Que Youskeha, a soin des viuans & des choses qui concernent la vie,

& par consequent ils disent qu'il est bon , Eataent sic à soin des ames, & parce qu'ils croyent qu'elle faict mourir les hommes , ils disent qu'elle est meschante & non pas pour donner le mauuaistemps , comme disent d'autres, ou pour bouleuerfer tout ce que son petit Fils fait de bien. Voila comme ils ne s'accordent pas en leur pensée.

Vn iour discourant en la presence des Sauvages de ce Dieu terrestre , pour leur donner vne meilleure croyance & leur faire voir leur absurdité. Entre autre chose ie leur dis , que puis que ce Dieu n'estoit point dans le Paradis, demeueroit sur la terre & ne s'estoit pû libérer des necessitez du corps, qu'il falloit par consequent & necessairement, qu'il fut mortel & qu'en fin après estre bien vieil il mourut & fut enterré. comme nous autres , & de plus que ie desirois fort sçauoir le lieu qu'il auoit esleu pour sa sepulture , afin de luy pouuoir rendre les derniers deuoirs au cas qu'il mourut pendant nostre seiour en leur país. Ils furent vn long-temps à songer auant que de me vouloir respondre , se doutant bien que ie les voulois surprendre , & que difficilement se pourroient ils desuelopper de ce piege sans y engager leur honneur , qu'ils desiroient honnestement & prudemment sauuer. Vn ieune homme de la bande, plus hardy que les autres, après vn long silence entreprit la dispute & dit : que ce Dieu Youscaha auoit esté auant cest Vniuers, lequel il auoit créé & tout ce qui estoit en iceluy , & que bien qu'il vieillisse comme tout ce qui est

de ce monde y est suieſt, qu'il ne perdoit point ſon eſtre & ſa puiſſance, & que quand il eſtoit bien vieil, il auoit le pouuoir de ſe raiueſcendre tout à vn inſtant & ſe transformer en vn ieune homme de vingt-cinq à trente ans, & parainſi qu'il ne mourroit iamais & demeueroit immortel, bien qu'il fut vn peu ſuieſt aux neceſſitez corporelles, comme le reſte des hommes.

En ſuite ie leur demanday, quel ſeruiſſe ils luy rendoient & quelle forme de priere ils luy offroient eſtant leur Createur & bienfaſteur. A cela point de reſponce, ſinon qu'il n'auoit que faire de rien, & qu'il eſtoit trop eſloigné pour luy pouuoir parler ou le prier de quelque choſe.

Pourquoy donc vſez vous de prieres, & offrez vous des preſens à de certains eſprits que vous dites reſider en des riuieres & rochers, & en pluſieurs autres choſes materielles & ſans ſentiment, pour ce, dit-il que non ſeulement les hommes & les autres animaux ont l'ame immortelle, mais auſſi toutes les choſes materielles & ſans ſentiment entre leſquelles il y en a qui ont de certains eſprits particuliers fort puiſſans, qui peuuent beaucoup pour noſtre conſolation ſi nous les en requerrons en la preſence des choſes qu'ils habitent, car bien qu'ils n'apparoiffent point à nos yeux ils ne laiſſent pas d'operer & nous faire ſouuent reſſentir les effets de leur puiſſance, en exauçant nos prieres. Que ſi nous en prions d'absens, comme lors que nous preſchons les poifſons dans nos cabanes, les reis ou l'eſprit des fil-

lets le rapportent aux poissons, qu'ils prient de donner dans nos pieges, ou d'esquiver la main de ceux qui iettent de leurs os au feu, de maniere que si nos Predicateurs sont excellens Createurs, nous sommes assurez d'en auoir à force, ou rien du tout si on a ietté de leurs os au feu, ou commis quelque autre insolence en la presence des filets, folie aussi grande que celle des Montagnais, qui n'ozent respandre à terre le pur sang d'un castor, croyans que s'ils l'auoient fait ils n'en pourroient plus prendre.

Pour reuenir à nostre dispute du vieil Youscaha raicuny; ils ne sceurent à la fin plus que répondre, & se confellerent vaincus ignorans, le vray Dieu & Createur de toutes choses, dont les vns se retirerent de honte, & d'autres qui s'estoient embrouillez se tindrent au tacet, qui nous fit cognoistre qu'en effect, il ne recognoissent & n'adorent aucune vraye Diuinité, ny Dieu celeste ou terrestre, duquel ils puissent rendre quelque raison, & que nous puissions sçauoir, car encore bien qu'ils tiennent tous en general Youskeha, pour le premier principe & Createur de tout l'Vniuers avec Eataent sic, si est-ce qu'ils ne luy offrent aucunes prieres, offrandes ny sacrifices comme à Dieu, & quelqu'un d'entr'eux le tiennent fort impuissant, au regard de nostre Dieu, duquel ils admirent les œuvres.

Ils ont bien quelque respect particulier à ces demons ou esprits qu'ils appellent Oki, mais c'est en la mesme maniere que nous auons le nom d'Ange, distinguant le bon du mauvais,

Du mot
Oki ou
Ondaxi.

est autant est abominable l'un, comme l'autre est venerable. Aussi ont ils le bon & le mauuais Oki, tellement qu'en prononçant ce mot Oki ou Ondaxi, sans adionction, quoy qu'ordinairement il soit pris en mauuaise part, il peut signifier vn grand Ange, vn Prophete ou vne Diuinité, aussi-bien qu'un grand diable, vn Medecin, ou vn esprit furieux & possédé.

Ils nous y appelloient aussi quelquesfois, pour ce que nous leur enseignions des choses qui surpassoient leur capacité & les faisoient entrer en admiration, qui estoit chose aysée veu leur ignorance.

Ils croyent qu'en effect il y a de certains esprits qui dominant en vn lieu, & d'autres en vn autre, les vns aux riuieres, les autres aux rochers, aux arbres, au feu & en plusieurs autres choses materielles, ausquels ils attribuent diuerfes puissances & autorités, les vns sur les voyages, les traictes & commerces, les autres à la pesche, à la guerre, aux festins, és maladies & en plusieurs autres affaires & negoces.

Ils leur offrent par fois du petun, & quelque sortes de prieres & ceremonies ridicules, pour obtenir d'eux ce qu'ils desirerent, mais le plus souuent sans profit; il n'y a que les demons qui ne soient pas les biē-venus chez eux, lesquels ils chassent de leur village à force de bruits, pour ce qu'ils leur causent toutes leurs maladies à ce qu'ils disent. Et en effect mon grand oncle Auoindaon, estant tombé malade me prioit de fort bonne grace de ne permettre pas que le demon le fist mourir.

Ils m'ont montré plusieurs puissans rochers sur le chemin de Kebec, auxquels ils croient presider quelque esprit, & entre les autres ils m'en monstrerent vn à quelque cent cinquante lieues de là, qui auoit comme vne teste & les deux bras esleuez en haut, & au ventre ou milieu de ce grand rocher il y auoit vne profonde cauerne de tres-difficile accès. Ils me vouloient persuader & faire croire à toute force avec eux, que ce rocher auoit esté autrefois homme mortel comme nous, & qu'esleuant les bras & les mains en haut, il s'estoit metamorphosé en cette pierre & deuenu à succession de temps vn si puissant rocher, lequel ils ont en veneration & luy offrent du petun en passant par deuant avec leurs canots, non toutes les fois, mais quand ils doutent que leur voyage doine reüssir; & luy offrant ce petun qu'ils iettent dans l'eau contre la roche mesme, ils luy disent: rien prié courage & fay que nous ayons bon voyage, avec quelques autres paroles que ie n'entends point, & le Truchement Brulé duquel nous auons parlé au Chapitre precedent nous dit (à sa confusion) d'auoir faiet vne fois pareille offrande avec eux (de quoy nous le taugames fort) & que son voyage luy fut plus profitable qu'aucuns autres qu'il ait iamais faiet en tous ces pais là.

C'est ainsi que le diable les amuse, les maintient & les conserue dans ses filets & en des superstitions estranges, leur prestans ayde & faueur (comme à gens abandonnez de Dieu,) selon la croyance qu'ils luy ont eneccy, comme
aux

aux autres ceremonies & forcelleries, que leur Oki obserue & leur fait obseruer pour la guerison de leurs maladies & autres necessitez.

Ils croient l'immortalité de l'ame, avec tous les autres peuples Sauvages, sâs faire distinction du bon ou du mauuais, de gloire ou de chastimét, & que partant de ce corps mortel, elle s'en va droicte du costé du Soleil couchant, se réiouir & dancer en la presence d'Yoscâha & de sa mere grâd Eataentfic, par la route des estoilles, qu'ils appellent Atiskein andahatey, & les Montagnais *Tchipai meskenau*, le chemin des ames, & nous la voye lactée ou l'escharpe estoilée, & les simples gens le chemin de saint Jacques. Ils disent que les ames des chiens & des autres animaux y vont aussi par le costé du Soleil leuant, (à ce que disent les Montagnais,) qui croient aller apres leur mort en vn certain lieu où elles n'ont aucune necessité. Je demanday à nos Harons, quelle estoit la route des ames des chiens, & si elle estoit autre que celle des hommes, ils me dirent qu'ouy & me monstrant certaines estoilles proches voisines de la voye Lactée, ils me dirent que c'estoit là le chemin qu'elles tenoient, lequel ils appellent Gagnenon andahatey le chemin des chiens, c'est à dire que les ames des chiens vont encores seruir les ames de leurs Maistres en l'autre vie, ou du moins qu'elles demeurerent avec les ames des autres animaux, dâs ce beau païs d'Yoscâha où elles se rangent toutes, lequel païs n'est habité, que des ames des animaux raisonnables & irraisonnables, & de celles des haches, cousteaux,

Chemin
des ames.

chaudieres & autres choses qui ont esté offer-
tes aux deffuncts, ou qui sont vsées, consom-
mées ou pourries, sans qui s'y mesle aucun
chose qui n'ayt premierement gousté de la
mort ou de l'ancantissement, c'estoit leur ordi-
naire responce, lors que nous leur disions que
les souris mangeoient l'huyle & la galette, & la
rouille & pourriture le reste des instrumens,
qu'ils enfermoient avec les morts dans le tom-
beau.

Ils croyent de plus, que les ames en l'autre vie
bien qu'immortelles, ont encores les mesmes
necessitez du boire & du manger, de se vestir,
chasser & pescher, qu'elles auoient lors qu'el-
les estoient encores reuestues de ce corps mor-
tel, & que les ames des hommes vont à la chas-
se des ames des animaux, avec les ames de leurs
armes & outils, sans qu'ils puissent donner rai-
son de tant de sottizes, ny si les ames des castors
& esclans qu'ils tuent à la chasse pour leur nour-
riture, ont encore vne autre ame, ou si elles en-
gendrent pour conseruer leur espece, car on ne
peut esperer beaucoup de raison de gens nais &
nourris dans l'ignorance grossiere du Paganis-
me, si premierement elles n'ont esté instrui-
ctes en l'escole de Iesus-Christ, & aux sciences qui
nous sont necessaires, c'est pourquoy il en faut
auoir compassion, & croire que si nous fussions
naiz de mesmes parens barbares, nous serions
de mesmes eux & peut estre encore pis.

Nous leur parlions souuent du Paradis &
comme la demeure des bien-heureux estoit
dans le Ciel avec Dieu, où ils n'ont aucune ne-

efflicé & vivent tousiours contans. Ils trou-
uoient cela fort bien & nous en demandoient
le chemin, mais ils abhottroient celuy de l'en-
fer, remply de diables, de feu & de meschans.

J'ay trouué excellent que dans toutes leurs
superstitions & soins qu'ils ont des trespassez,
ils ne sacrifient aucune personne, comme sou-
loient iadis faire les peuples du Peru en la mort
de leur Roy & de leurs Caciques, qui estoient
leur souuerain Prestre, & aussi pour la gueris-
on des malades & le bon succez de leurs entrepri-
ses, car lors que le Roy Guaynacapa mourut, il
y eut mille personnes de sa maison qui furent
tuez & enseuelis avec luy pour le seruir en l'au-
tre vie: & la raison pourquoy ils enterroient
ainsi leurs familles & leurs richesses avec eux,
estoit pource qu'il leur sembloit quelquefois
voir ceux qui estoient morts aller par leurs pos-
sessions, estans parez de ce qu'ils auoient em-
porté avec eux, & accompagnez de leur famil-
les à raison de quoy se persuadans qu'en l'autre
vie on a besoin de seruice, d'or, d'argent, & de
viures, ils les en pouruoient le mieux qu'ils
pouuoient, comme font nos Hurons les leurs
de ce qu'ils peuuent.

Il me vient de resouuenir que lors que ie par-
lois au commencement à nos Hurons, de la de-
meure de Dieu, du Ciel, du Paradis, ou selo l'A-
postre l'œil n'a point veu, ny l'entendement hu-
main ne scauroit cōprendre les biens que Dieu
a préparé à ceux qui l'aymēt, ils me respondoient
qu'il ne pouuoit faire beau au lieu d'où la neige,
la gresle & la pluye venoient, s'imaginans que

2
tout cela venoit du Paradis, tant ils estoient
mauvais Astrologues, mais comme ie ne scauois
pas moy mesme comme toutes ces influences
se forment en l'air, pour n'auoir iamais estudié
en aucune de ces sciéces, ie me seruis d'un liure
que ie portois tousiours avec moy, pour leur
donner à entendre, aydé du Truchemét, & leur
dis: premierement, que le Paradis la demeure
des bien-heureux, faisoit l'vnziesme Ciel &
qu'au dessous d'iceluy il y en auoit dix autres.

Que le tonnerre estoit vn esclat d'une exalai-
son enfermée entre des nuées froides, sortant
avec effort pour fuyr son cōtraire (ce n'est dō-
point vn oyseau comme ils pensent.) Que l'es-
clair, est vne exalaïson enflammée, prouenant
de la rencontre & conflis des nuées, & le foudre
vne exalaïson pareille à l'esclair, à scauoir; tout
flamboyante, faisant bresche à la nuée, avec vn
tres-soudain & grand effort, & a cecy par des-
sus l'esclair, qu'elle descend iusqu'icy bas.

Mais quant aux nuées, ie leur en dis en be-
gayant, tousiours assisté du Truchement ce que
mon liure portoit, qu'elles estoient vn ramas &
assemblage de plusieurs vapeurs extraictes de
l'eau, & ce en la moienne region de l'air; & que
la pluye estoit vne effusion d'eau tombant en
bas, prouenāt de la dissolution des nuées par la
chaleur du Soleil, ou par le choc qu'elles font
l'une contre l'autre par l'impetuosité des vents.

Ils me demanderent en suite bien quasi au-
sant ignorant qu'eux mesmes, car à peine ay ie sceu
decliner mon nom, en quelque mois que i'ay
esté sous vn Maistre, pource que la liberté m'e-

estoit plus chere que la science & mon propre
 contentement assez innocent, que tout le La-
 tin & l'eloquence d'un Ciceron. O mon Dieu
 que la ieunesse est mauuais iuge de son bien.
 Je leur dis que mon liure m'enseignoit que la
 neige estoit vne impressiion aqueuse, engen-
 drée de nuées gelées par le froid, laquelle ve-
 nant à se dissoudre, tomboit à floccons iusqu'icy
 bas, & que la gresle n'estoit autre chose qu'une
 pluye congelée en l'air à mesure qu'elle descou-
 loit de la nuée. Voyez si mon liure dit vray, &
 ne m'interrogé point là dessus, car comme ie
 vous ay dit, ie n'ay iamais rien sçeu, sinon qu'il
 vaut mieux cognoistre vn Iesus-Christ & igno-
 rer toutes choses, que de sçauoir toutes choses
 & ignorer Iesus Christ.

Pour la quantité de la terre considerée en
 son globe, on la tient de tour, 11259. lieues
 Françoises. Et par ainsi estant comparée au
 Ciel des estoiles fixes, elle n'est qu'un point, &
 comme un grain de Coriandre enuironné d'un
 cerne distant dix mille pas esgalement de luy,
 qui est à dire, que la terre est merueilleusement
 petite, encore qu'elle nous semble grande, &
 que les Roys & les Princes qui ne sont que des
 petites fourmis au regard de Dieu, ont grand
 tort d'entreprendre guerre & mettre en ha-
 zard leur propre salut, pour si petite chose
 qu'ils ne peuuent à peine posséder, que la mort
 ne les engloutisse.

Je passe les bornes d'un homme sans estude,
 mais il faut que ie die encoré cecy, que i'ay taf-
 ché faire sçauoir à mes Hurons, que la Lune est

estimée quarante fois plus petite que le globe de la terre, & en est esloignée de octante mille deux cens treize lieues. Mais releuons nostre ton plus haut & portons nostre pensée iusques à ce beau Soleil, qui nous esclaire & raut nostre consideration, iusques à l'estimer quelque chose de diuin, i'entends les Payens, & nous trouuerons si les liures ne nous trompent, qu'il est 166. fois plus grand, que le globe de la terre, par ainsi le Soleil est près de sept mille fois plus grand que la Lune. Et par opinion on tient aussi que le Soleil estant monté au plus haut point, est dix huit fois plus loin de la terre que la Lune. Et pour le comble de son honneur on l'appelle le Roy des estoilles fixes & errantes, estant le plus grand de tous les corps celestes le plus lumineux & chaleureux sans comparaison, & après cela ie n'ay plus de louange à luy donner, sinon qu'il est la figure & l'ombre de nostre vray Soleil de iustice, Iesus qui faict du bien aux bons & aux mauuais, sans distinction du fidel ou de l'infidel, mais bien heureux ce luy qui a tousiours son cœur & sa pée en luy,

De la creance & vaines opinions des Montagnais de diuerses deitez. De la creation du monde, & du flux & reflux de la mer.

CHAPITRE XX XI.

IE pensois au commencement ne faire qu'un Chapitre de la creance des Hurons & de

celle des Montagnais, mais comme ie l'ay veu grossir sous ma plume au delà de mon dessein i'ay brizé au milieu de la carriere & faiët d'un grand Chapitre deux petits, afin que l'on puisse mieux comprendre ce que ie dis, car la multitude de la matiere offusque l'esprit & empesche l'entendement de la bien concevoir, & partant l'on ne trouuera point mauuais si quel qu'un de mes Chapitres sont abregez, plus faute de Rhetorique que de matiere, ô qu'il y a de personnes riches en parolles & en eloquence, qui diroient des merueilles où ie me trouue muet, c'est mon imperfection & mon defaut d'estude. l'auois autrefois appris plusieurs petits contes fabuleux, touchant la Creation du monde & le deluge vniuersel, que tiennent nos Hurons, lesquels me sont eschappez de la memoire, & de ma plume peur de me méprendre, mais ie diray avec plus d'assurance ce peu que i'en ay sçeu de nos Montagnais, pour en auoir eu la memoire rafraichie en discourant avec nos freres.

Mais au prealable, il faut que ie vous die de nos Canadiens ce que i'ay remarqué en nos Hurons, qu'il n'y a ny accord, ny apparence en ce qu'ils nous content des Deitez ou causes supremes qu'ils recognoissent, Autheurs, Createurs & Repareurs de cet Vniuers, car si l'un dit vne chose d'une façon, l'autre en parle tout autrement, & ay veu en eux ce qui se dit des heretiques de nostre temps, desquels si les uns aduoient Calvin ou Luther pour leur Apostre, les autres les reiettent comme des vilains

& infames, qui n'ont fait banqueroute à l'Eglise que pour leur ventre, ainsi en est il généralement de tous les desuoyez, j'ay sçeu mesme d'un honneste homme, qui a demeuré deux ans à Constantinople, qu'il y a des Turcs qui se gaussent plaisamment, mais en cachette, de leur Mahomet, & d'autres le tiennent pour le premier Prophete de Dieu, & Iesus-Christ pour le second, c'est le mal-heur de ceux qui ne suivent point la vertu & n'ont pas Dieu pour but de leurs actions, de se tromper de la sorte.

Nos Montagnais recognoissent trois Dieux, à sçavoir Atahocan, son Fils & Messou, représentant l'image de la tres sainte Trinité, mais il faut dire de plus qu'ils confessent vne Mere, à laquelle ils ne donnent point de nom, d'autant quelle ne gouverne rien & semble représenter en quelque chose la Mere de nostre Seigneur Iesus-Christ. J'ay leu autrefois l'histoire de la Chine, où j'ay remarqué qu'entre leurs principales Idoles, ils en ont vne qui a troistestes, lesquelles se regardent l'une l'autre comme n'ayant qu'une mesme volonté, puissance, aage & autorité, quoy que distinctes, nō plus que le Pere n'est pas le Fils, ny le Fils le S. Esprit, vn seul Dieu en trois personnes.

Nos Montagnais attribuent la Creation & le gouvernement du Ciel à Atahocan, mais ils sont encore dans les admirations comment il l'a pū faire, veu sa hauteur, la quantité des planettes & les Cieux d'infinies distances, où nous ne pouuons aller qu'avec la pensée.

Quelqu'vns ont voulu dire que le Fils, auquel ils ne donnent point de nom particulier, gouuerne la terre, & la mer, mais d'autres & avec plus d'apparence en attribuent la creation, la conseruation, & le gouuernement à Messou, lequel Messou est quelquefois pris pour bon Ange, car ils disent qu'il est tousiours avec eux, & le Manitou aussi; Ils tiennent ces Deitez tres-riches, & qu'elles ne peuuent iamais auoir de necessité, ayans puissance de leur ayder, bien qu'ils ne leur offrent ny sacrifices ny prieres, comme nous faisons à nostre Dieu.

Ils disent qu'ils font venir le beau temps & la pluye quand il est necessaire, mais si la chose arriue hors de saison, ou quelle apporte du dommage à leur bled, à leur chasse ou à la peïsche, ou qu'il se fasse de grands coups de vents qui les empeschent de nauiger, ils attribuent tout ce mal là au Manitou, qui est le Diable, lequel ils disent estre tousiours meschant.

Pour la creation ils tiennent qu'auant que les Deitez eussent formé ce monde, elles estoïent toutes trois dans vn canot sur les eauës avec vne petite beste, qu'ils appellent Achagache, qui peut estre comme vne blette vn peu plus grosse, & que la iettant à l'eau elle alla au fond, d'où elle rapporta en ses pieds vn peu de terre, de laquelle Messou en prist vne partie & en fit vne boulle toute ronde, laquelle il souffla tant qu'elle grossissoit à veuë d'œil, & l'ayant bien soufflée il la fit si

Creation
du monde.

grosse quelle deuint la terre comme elle est present.

Creatiō de
l'homme.

Du reste du morceau de terre il en fit vn petit homme avec de sa saluue qu'il cracha dans sa main, & puis il le souffla tant qu'il deuint grand, estant grand il luy donna la parole, en luy soufflant dans la bouche. Voilà des sentimens & des pensées qui ne sont pas trop esloignées de la verité de la chose pour des Sauuages qui n'ont iamais esté instruits, car il ne se lit point que iamais les Apostres, leurs Disciples, ny aucun Religieux auant nous, ayent passé en ces pays là pour leur prescher la parole de Dieu, ny autrement.

Creatiō de
la femme.

Pour la creatiō de la femme, ils disent que le Messou remit cette petite beste à l'eau qui en rapporta encore de la terre, de laquelle il fit vne femme de la mesme sorte qu'il auoit fait l'homme, puis demeurās ensemble sur la terre, ils eurent quantité d'enfans, & leurs enfans en eurent d'autres, de sçauoir leurs noms ils n'en sçauent aucuns, leurs peres ny leurs meres en leur ayans pas appris, pour les auoir eux-mesmes ignorez, comme auoient faits leurs predecesseurs.

Du deluge
vniuersel.

Et disent de plus que tous ces enfans là furent presque tous noyez, à cause qu'ils estoient trop meschans. Il en resta seulement cinq, sçauoir; trois hommes, & deux femmes, lesquels s'estans saueez dans leur canot se tindrent tousiours sur les eaux, & voicy comme la chose arriua à leur dire: Ce Messou allant à la chasse ses lours ceruiers dont

il se seruoit au lieu de chiens, estans entrez dans vn grād lac ils y furent arrestez Le Messou les cherchant par tout, vn oyseau luy dit qu'il les voyoit au milieu de ce lac, il y entre pour les retirer, mais ce lac venant à se desgorgger, couurit la terre, & abyssma le monde, & generalement tous les arbres quelle auoit produit d'elle mesme en furent cachez, & leurs branches pourries dans les eaux ny restant que le tronc. Apres que les eaux se furent retirées, ce Messou tira des flesches à ces troncs d'arbres, lesquelles se conuertirent en branches, se vengea de ceux qui auoient arresté ses loups ceruiers, & espousa vne ratte musquée, de laquelle il eut des enfans qui ont aydé à repeupler le mōde, se disent quelqu'vns, mais d'autres tiennent que ce Messou ne se maria point, & qu'il ny resta pour la reparation du monde que ces cinq personnes eschappées du deluge, d'où appert qu'ils ont quelque tradition de cette inondation vniuerselle, qui arriua du temps de Noé.

Ils tiennent que ces cinq s'en allerent bien loing chercher le Messou, qui estoit Dieu, lequel ils ne pouuoient rencontrer, en fin apres auoir bien cherché sur les eaux ils arriuerent en vn lieu d'où les eaux s'estoient retirées, & y auoir terre ferme, sur laquelle ils trouuerent vn homme, auquel ils demanderent s'il estoit ce Messou, il leur respondit que ouy, lors ils luy demanderent du tabac ou petun pour petuner, il leur en donna, &

comme ils eurent petuné ils luy presenterent le calumet qu'il prist & le cassa, alors ils luy dirent qu'il n'estoit pas le vray Messou, car il n'est point meschant, mais plustost le Manitou, c'est pourquoy ils le quitterent là, & s'en allerent plus loing, où ils rencontrerent vn grand hōme qui ne parloit point, mais leur fit signe de la main. Ils furent à luy, & l'ayās abordé il leur presenta de grandes chaudieres pleines de viandes, mais comme il ne parloit point ils estoient bien empeschez; il suruint là vn homme qui leur demanda où ils alloient, ils responderent qu'ils cherchoient Messou, lors il leur dit, vous l'avez trouué, & puis leur donna bien à manger de fort bonnes viandes, & entre autres il leur en donna d'une qui n'estoit pas plus grande que l'ongle, de laquelle ils auoient beau manger elle ne diminuoit point, & auoit le goust de toutes sortes de viandes, comme d'esslan, d'ours de cariboust, lievres, perdrix, &c.

Après qu'ils eurent bien mangé il leur demanda s'ils vouloient voir quelque chose de beau, ils dirent que ouy, aussi tost il fit venir quantité d'animaux de toutes les sortes, qui dancierent deuant eux, & les arbres aussi. Après auoir veu tout cela il les cōgedia, & leur dit qu'ils n'en parlassent à personne, & ce qui les estonna d'auantage, fut que cet autre ne parla iamais, mais auoit tousiours les yeux estincelans & comme pleins de feu.

Cela fait, ils s'en reuindrent par vne petite

rière, (car l'eau n'estoit plus sur la terre) en laquelle ils rencontrèrent vn petit Islet sur lequel ils n'y auoit personne, n'ayans mesme point veu de pistes d'hommes le long du bord de l'eau qu'ils auoient passée. Ils demurerent sur cest Islet, où là estant y vint des Manitous (qui sont des Diables) qui eurent affaires à leurs femmes, dont elles eurent des enfans, lesquels ont repeuplé le monde peu à peu comme il est.

Pour la mer, j'ay dit que c'est le Fils qui la gouuerne, & semblablement la terre, mais ils disent qu'ayant esté bonne à boire au commencement elle deuint sallée & amere par cet accident. Il arriua vn iour que le Nikycou (qui est la loutre) ayant mordu la Ouynefque, qui est vne petite beste fort puante, que nous appellons autrement l'enfant du Diable à cause de ses mauuaises qualitez, ce loutre l'ayant morduë, il eut la gueule infecte & puante de son ordure qu'il luy ietta, escumant ainfi il s'alla lauer dans la mer, & la rendit sallée & de mauuais goust, comme elle est.

Ils disent en outre, que tous les animaux de chaque espece, ont vn frere aîné, qui est comme le principe, & comme l'origine de tous les indiuidus, & que ce frere aîné est merueilleusement grand & puissant, l'aîné des castors, disent-ils, est peut estre aussi gros qu'une cabane, quoy que les cadets (s'entend les castors ordinaires) ne soient pas plus gros qu'un petit mouton : Or ces aînez de tous

les animaux sont les cadets du Messou, (le voila bien apparenté) si quelqu'un void en dormant l'aisné, ou le principe de quelques animaux, il fera bonne chasse, disent-ils, s'il void l'aisné des castors, il prendra des castors, s'il void l'aisné des esclans, il prendra des esclans, iouissans des cadets, par la faueur de leur aisné qu'ils ont veu en songe, mais quand on leur demande ou sont ces aisnéz ils se trouvent bien empeschez, confessans eux-mesmes qu'ils ne sçauent où ils sont, sinon que les aisnéz des oyiceaux sont au Ciel, & les aisnéz des autres animaux sont dás les cauéz, mais l'Alcoran de Mahomet dit bien mieux que les bestes sont dans le Paradis, & que ce grand coq, l'aisné de tous les coqs, prie pour tous ses freres, & que quand il chante, tous les coqs de la terre luy respondent, & chantent comme luy par vne correspondance que les animaux de la terre ont avec ceux du Ciel, qui prient pour eux.

On dit de plus que nos Montagnais reconnoissent deux principes des saisons, l'un s'appelle Nipinouxhe, c'est celuy qui ramene le Printemps, & l'Esté, l'autre s'appelle Pipounouxhe, qui ramene la saison froide. Ils soustiennent bien qu'il sont viuants, mais ils ne sçauent pas comme ils sont faits, s'ils sont hommes, ou animaux, ny de quelle espece, & disent qu'ils les entendent parler, ou bruire, notamment à leur venue, sans pouoir distinguer ce qu'ils disent, pour leur demeure, ils partagent le monde entr'eux,

l'un se tenant d'un costé, l'autre de l'autre, & quand le temps de leur statió, qui est aux deux bouts du monde, est expiré, l'un passe en la place de l'autre, se succedant mutuellement. Quand Nipinouxhe reuient, il ramene avec luy la chaleur, les oyseaux, la verdure, il rend la vie & la beauté au monde, mais Pipounouxhe rauage tout, estant accompagné de vents, de froids, de glaces, de neiges, & des autres appanages de l'Hyuer.

Pour le flux & reflux de la mer, comme ils tiennent que l'eau a vne ame immortelle qui luy donne ses mouuemens, ils ne s'estónent pas tant de ce flux & reflux, comme firent jadis nos Hurons arriuant avec nous à Kébec, lesquels encor bien qu'avec nos Montagnais, ils croyent à l'eau vne ame viuante, ils crurent nostre riuere de bien plus grand esprit que celles de leur pays, qui n'ont pas de flux & reflux pour estre trop esloignées de la mer, & m'en demandoient des raisons, non seulement, mais ils eussent bien desiré me voir raisonner avec cette eau, & luy demander à elle mesme, pourquoy ses diuerses allées & venuës contraires, & à quel dessein, effects qu'ils admirerent plustost que de les pouuoir comprendre, ne les comprenans pas moy mesme, pour estre au delà de ma capacité, & de celle des Sçauans.

On tient pour certain qu'Aristote se precipita dans l'Euripe, desirant que l'Euripe le comprit, puis qu'il ne pouuoit comprendre les principes & les raisons des mouuemens

d'iceluy. Qui est-ce aussi qui depuis ce grand
Philosophe a pû nous donner vne raison cer-
taine du mouuement admirable de cet es-
pouuentable Ocean? mouuement qui ne se
fait pas du pole Arctique, iusques au pole
Antarctique, comme quelqu'vns se sont per-
suadez. Que si cet element ne faisoit que
rouler du Nort au Sud, & retourner du Sud
au Nort, il n'y auroit de quoy tant admirer.
Mais la merueille est que la mer prenant son
cours vers le pole Antarctique, qui est celuy
là qui va du costé du Midy, au mesme temps
elle vient vers l'Arctique qui luy est opposé
c'est à dire qui est du costé du Septentrion.
& par ainsi elle a des mouuemens contraires
(bien qu'en diuerses parties) en mesme tēps.
& à l'instant quelle se retire de nostre pole
Arctique, elle retourne aussi de l'Antarcti-
que, refluant tant d'une part que d'autre, au
milieu de la mer: où les marées, & reflux ve-
nant à s'entrecroiser sous la ligne Equi-
noctiale, incontinent la mer vient à bouffir,
s'enfler & grossir aussi long-temps que le re-
flux se fait. Et derechef la mer estant estran-
gement enflée & esleuée comme de tres hau-
tes Montagnes, elle commence aussi tost à se
dilater & abaisser. Tant plus elle se dilate,
tant plus elle s'abaisse au dessous de la ligne;
& d'autant qu'elle s'abaisse en ce milieu du
monde, plus elle monte & se dilate d'une
part & d'autre vers les deux poles susdits,
roullant dessus les sables, inondans les cam-
pagnes, & esleuans de toutes parts, iusques à
Lebe

Lebe venant. Lors qu'elle se dilate ainsi vers nous, & autres extremités de la mer, on l'appelle flux, & le reflux, quand elle se retire vers l'Equinoctiale.

Ce flux & reflux se fait deux fois pendant vingt quatre heures. Car en cinq heures ou environ, la mer fluë vers le Nort, & vers le Sud, & en quelque six à sept heures, elle fait son reflux. Et comme l'estat de la Lune n'est egal ou pareil, mais irregulier en son croissant, & décroissant, ainsi le mouvement de la mer est du tout inegal, comme chacun sçait, & l'experimentons en nostre petite riuere de saint Charles, tous les quartiers de la Lune, & les mois de l'année, & principalement en la pleine Lune, où nous voyons l'eau s'esleuer le plus vers nostre Couuent, ce qui nous obligeoit en ces temps là, de ne rien laisser de nos meubles & ustencilles, que fort esloignez du bord de la riuere.

Finissons ce Chapitre de la creance & des superstitions de nos Montagnais, par cette conclusion, que qui voudroit faire estat de les observer toutes, il en faudroit faire vn iuste volume à part, tant elles sont en grand nombre, mais comme la lecture n'en seroit agreable ny vtile, ie me contente de ce que j'en ay escrit comme suffisant, & finy par cette priere que ie fais à Dieu, de leur donner lumiere & cognoissance de leur auengement, qui les porte à ignorer le vray Dieu, & attribuer des puissances diuines à des choses insensibles, iusques à croire

que la neige, & la gresle ont vne ame qui a cognoissance & intelligence, & s'offence de la lumiere & clarté des chandelles & falots, avec quoy ces pauvres gens n'oseroient sortir la nuit quand il neige, ou gresle, peur que cette ame en aduertisse les animaux, qui prendroient la fuite. Tiennent aussi que les chiens ne doiuent ronger les os des castors, des oyseaux, n'y des autres animaux pris au lacet. Que d'autres ne doiuent non plus estre iettez dans le feu, & que si on manque à la moindre obseruation de leurs folles opinions, que c'est fait de leur chasse, & de leur vie, & que tout ira s'en dessus dessous, & à contrepoil de leur intention.

*De la sainte Oraison. De l'apparition
des Esprits, & du grand Capitaine
Aupindaon.*

CHAPITRE XXXII.

Religieux
Recollet
illustre en
miracles en
sainte & après
sa mort.

SANS Oraison la vie de l'homme est misérable, & sa fin malheureuse, ditoit le B. Pere Barthelemy Solutius. Il me semble auoir autrefois leu, aussi bien qu'on y dire, que ce grand Empereur Charles le Quint Roy des Espagnes estant couché au lit de la mort, & prest de rendre son ame à

Dieu le Createur, fut prié par quelqu'vns de ses amis plus familiers, de leur dire qu'estoit la chose qui plus l'auoit contenté en ce monde, & qu'il ne leur dit autre chose, l'Oraison: Dieu m'a fait la grace, disoit il, que depuis l'aage de vingt trois ans, iusques à present, iamais ie n'ay passé vn seul iour sans auoir fait quelque peu d'Oraison mentale, laquelle m'a tellement seruy que ce resouuenir de Dieu m'a tousiours consolé en mes ennuys, m'a fortifié en mes disgraces, m'a donné force contre le peché, & pour le comble de mon bon-heur, elle m'a retiré des tracas du monde, & des tumultes de la terre, pour me colloquer dans ce lieu de repos, d'où i'espère moyennant la grace de nostre Seigneur, aller en Paradis.

Deuotion
de l'Empe-
reur Char-
les V.

C'est vne chose admirable, & vn prodige merueilleux, qu'un Prince si grand, & vn Monarque si puissant, environné de tant d'ennemis, & ayant de si grandes, & si puissantes armées à gouverner, par mer & par terre, n'aye pû dans le gouvernement d'un si grand Empire, estre diuertty pour vn seul iour du seruice, & deuoir qu'il deuoit à son Dieu, à la confusion de nous autres petits vermisseaux de terre; qui perdons si aisement cette presence tant necessaire d'un Dieu, pour le moindre petit diuertissement qui nous attriue. C'est mon regret, & mon desplaisir qui me fait crier à vous Seigneur, à ce qu'il

vous plaise nous faire la grace, que l'exemple de ce Prince serue à nostre salut, & non point à nostre condamnation, car si nous sommes soigneux de nourrir nostre corps, pourquoy nostre ame créée à vostre image & semblance, manquera elle de son aliment spirituel, car de mesme que la gorge est le canal, par le moyen duquel l'estomach reçoit sa nourriture corporelle, l'Oraison est le conduit par lequel vostre diuine Majesté communique ses graces, & ses dons spirituels à l'ame, & comme sans cette gorge l'estomach ne receuroit aucune nourriture, ny vie, aussi sans l'Oraison, l'ame meurt à la grace, & ne peut auoir de vie pour le Paradis.

Nos pauvres Sauvages ignorans, encores la maniere d'adorer, & seruir Dieu, auoient souuent recours à nos prieres, & ayans par plusieurs fois expérimenté le secours, & l'assistance que nous leur promettons d'en haut, lors qu'ils viuroient en gens de bien, & dans les termes que leur prescriuions, aduoüoient franchement que nos prieres auoient plus d'efficaces que tout leur chant; leurs ceremonies, & tous les rituelles de leurs Medecins, & se resioüissoient de nous ouyr chanter des Hymnes, & Pleaumes, à la louange de Dieu, pendant lesquels (s'ils se trouuoient presens) ils gardoient estroitement le silence, & se rendoient attentifs, pour le moins au son, & à la voix, qui les

contentoit fort.

S'ils se presentoient à la porte de nostre cabane, nos prieres commencées, ils se donnoient la patience qu'elles fussent acheuées, ou s'en retournoient en paix, sçachant desia que nous ne deuions pas estre interrompus en vne si bonne action, & que d'entrer de force, ou par importunité, estoit chose estimée mesme incivile entr'eux, & vn obstacle aux bons effects de la priere, tellement qu'ils nous donnoient du temps pour prier Dieu, & vaquer en paix à nos Offices diuins. Nous ayant en cela la coustume qu'ils ont de n'admettre aucun dans leurs cabanes, lors qu'ils chaient les malades, ou que les mots d'un festin ont esté prononcés.

Lors que la sainte Messe se disoit dans nostre cabane, ils n'y assistoient non plus, car elle s'y disoit toujours la porte fermée, ou si matin qu'ils n'en voyoient rien, non seulement pour ce qu'ils estoient incapables d'y assister, comme infidelles, mais aussi pour vne apprehension que quelques malicieux nous disroient nostre Calice qu'ils appelloient petite chaudiere, & n'en eussent point fait de scrupule: pour nostre voile de Calice, nous leur monstions assez librement, avec le beau chasuble que la Reyne nous auoit donné, qu'ils admiroient avec raison, & trouuoient riche par dessus tout ce qu'ils auoient

Admiroient
nostre chasuble.

de plus rare , & nous venoient souuent supplier de le faire voir à leurs malades , la seule veuë desquels les consoloit , & leur sembloit adoucir leurs douleurs. La bonne femme du Sauvage du Pere Ioseph , en auoit desrobé l'Ecole , & cachée au fond d'un tonneau , mais apres l'auoir long - temps priée , & conjurée , car elle estoit tousiours sur la negatiue , elle nous la rendit en fin , disant qu'elle l'auoit retirée des mains de quelque voleur de la Nation du Petun , mais c'estoit elle mesme qui en auoit fait le vol , ne pensant pas que nous y deussions prendre garde , & c'est en quoy elle se trompoit.

Deuotion
d'Auoin-
daon Capi-
taine Hurô

Auoindaon grand Capitaine de la ville de saint Ioseph , auoit tant d'affection pour nous , qu'il nous seruoit comme de pere syndique dans le pays , & nous voyoit aussi souuent qu'il croyoit ne nous estre point importun , & nous trouuans par fois de genouils prians Dieu , il s'y mettoit aupres de nous , les mains iointes , avec vne posture qui donnoit de la deuotion , & ne pouuans d'auantage , il taschoit serieusement de contrefaire nos gestes & ceremonies , remuant les levres , puis esleuoit les mains , & les yeux au Ciel , & y perseueroit iusques à la fin de nos offices , & Oraisons , qui estoient assez longues , & luy aagé d'environ soix-

xante & quinze ans. O mon Dieu, que cet exemple deuroit confondre des Chrestiens ! & que nous dira ce bon vieillard Sauvage, non encore baptisé, au iour du Iugement, de nous voir plus negligens d'aymer, & seruir vn Dieu, que nous cognoissons, & duquel nous receuons iournellement tant de graces, que luy, qui n'auoit iamais esté instruit que dans l'escole de la gentilité, & ne le cognoissoit encore qu'au trauers les espais- ses tenebres de son ignorance.

Mon Dieu, resueillez nos tiedeurs, & nous eschauffez du feu de vostre diuin amour, car nous sommes pour la pieté, en quelque chose plus froids que les Sauvages mesmes. Ce bon homme m'importuna fort de luy donner vn petit Agnus Dei, qu'il porta à son col, avec tant de respect & de deuotion, qu'il n'y auoit aucun François qui en fit plus d'estat, non pour la beauté de la soye de laquelle il estoit enue- loppé, mais pour la croyance qu'il y auoit, lequel il conseruoit tellement que peur de le perdre, il le fit encor couvrir d'vn autre morceau d'estoffe.

Il nous pria fort de luy permettre d'as- sister à la sainte Messe, pour y prier Dieu avec nous, mais comme nous luy eusmes dit qu'il ne pouuoit, n'estant pas baptisé, il nous supplioit qu'on le baptisast pour y pouuoir assister, & faire au reste com-

me nous. Et comme il estoit tout plein de bonne volonté, il ne cherchoit que l'occasion de nous faire plaisir, & demandoit de coucher dans nostre cabane, lors qu'en l'absence de mes confreres, i'y restois seul la nuit. Je luy en demandois la raison, & s'il croyoit m'obliger en cela, il me disoit qu'il apprehendoit quelque accident pour moy, particulièrement au temps que les Hiroquois estoient entrez dans leurs terres, & qu'ils me pourroient aysement prendre, ou me tuer dans nostre cabane, sans pouuoir estre secouru de personne; & que de plus les esprits malins qui les inquietoient, me pourroient aussi donner de la frayeur, s'ils venoient à s'apparoire à moy, ou à me faire entendre de leurs voix, comme ils font en diuerses contrées, & sous diuerses figures. Je le remerciois de sa bonne volonté, & l'asseurois que ie n'auois aucune apprehension, ny des Hiroquois, ny des esprits malins, & que ie voulois demeurer seul la nuit dans nostre cabane, en silence, prieres, & Oraisons. Il me repliquoit: Mon nepueu, ie ne parleray point, & prieray *IESVS* auec toy, souffre moy seulement en ta compagnie pour cette nuit, car tu nous es cher, & crains qu'il ne t'arriue du mal, ou en effet, ou d'apprehension. Je le remerciois derechef, le renuoyois au bourg, &

demeurois seul à la garde de nostre Seigneur & de mon bon Ange, car ie ne iugeois pas necessaire d'auoir autre garde avec moy, & puis de mon naturel ie suis assez peu apprehensif, Dieu mercy.

Il y en a qui s'imaginent que les pais Sauuages sont tout plains de demons, & que ces pauvres gens en sont continuellement tourmentez & vexez, cela est bon pour les pais de ceux qui les adorent, comme faisoient anciennement les Mexicains, mais pour nos Hurons, ils les croient meschans & ne les adorent aucunement encores qu'il le semblent faire aux offrandes qu'ils font en des lieux particuliers comme i'ay dit ailleurs, & si Satan leur apparoit comme il faict à quelqu'vns, ce n'est pas tousiours sous vne forme hydeuse & espouventable, mais ordinairement sous forme humaine, ou de leurs parens & amis deffuncts, & quelquefois en songe seulement, principalement aux femmes, ou ils se font ouïr de la voix, & comme ils la diuersifient, tantost triste & plaintiue, & tantost gaye & ioyeuse, avec des risées, sans qu'on y puisse rien comprendre, ny qu'on aperçoïue aucune chose. Les Sauuages m'en demandoient l'interpretation, & me seruant dextrement de l'occasion, ie leur disois que ces voix tristes & lamentables de leurs parens & amis deffuncts, n'estoient autres que de regrets & desplaisirs de leur damnation, pour n'auoir pas esté baptisez & vescu selon la loy que le Fils de Dieu nous a enseignée par les Apostres. Et que pour ce qui estoit de ces ris & voix de

resjouissance, cela ne procedoit que du malin esprit, qui leur vouloit faire croire par là, contre toute verité, que leurs parens estoient bien-heureux, & iouissoient de la felicité eternelle, afin de les diuertir eux mesmes de la voye de Dieu, les obliger à la mesme vie, les maintenir dans les mesmes vices, & les entrainer en la mesme damnation avec leurs parens & amys deffuncts, tellement que les pauvres Sauuages par ceste responce detestans ces cachots tenebreux, frapportoient de la main doucement contre leur bouche & disoient ho, ho, ho, ho, ho. Danstan téonguiandé, voyla qui n'est pas bien, voyla qui ne vaut rien, & ils auoient raison.

Il arriue quelquefois que le diable pere de mensonge dit des veritez, mais cela luy est si rare, qu'il n'en diroit iamais s'il n'y esperoit du profit, ou que Dieu ne luy contraignit, aussi ne le doit on croire, ny l'escouter, que comme on doit faire vn demon en bouchant ses aureilles.

Vn honneste gentil homme de nos amis, nommé le sieur du Vernet, demeurant avec nous au pais des Hurons, nous dit vn iour que comme il estoit dans la cabane d'une Sauuagesse vers le Bresil, qu'un demon vint frapper trois grands coups sur la couuerture de la cabane, & que la Sauuagesse qui cognut que c'estoit son demõ, entra de saussi tost dans la petite tour d'escorce, où elle auoit accoustumé de recevoir ses oracles & entendre les discours de ce malin esprit. Ce bon gentil homme presta l'oreille, & escoustant le colloque, entendit le diable qui se plaingnoit tout haut, d'estre grandement fati-

Vn demon
parle à vne
Indienne.

gué, & que son seul respect l'auoit amené là d'un loingtain pais, d'où il venoit de guerir des malades (ô le mal heureux medecin.) Après auoir encor long-temps discouru avec vne voix assez basse, il dit en fin à ceste Magicienne qu'il y auoit trois Nauires François en mer, qui arriueroyent bientoist, ce qui fust trouué veritable, car à trois ou quatre iours de là ils arriuerent, & après que la Sauuagesse l'eut remercié & fait ses demandes, le demon s'en retourna dans les enfers & ledit sieur du Vernet dans les Nauires nouuellement arriuez.

Ce mesme gentil homme nous dit, qu'il auoit remarqué en ses Sauuages bien que tout nuds, hommes, femmes & enfans, que iamais les femmes ne cognoissoient d'autres hommes que leurs propres maris, lesquels en estoient si ialous, qu'ils n'eussent souffert pour chose du monde qu'un autre eut abusé de leur couche, & d'abondant que tous les peuples, par vne superstition payenne, s'alloient tous les iours lauer à la riuiere dès qu'ils estoient sortis du liét, & ne nous en sçeu donner autre raison, sinon celle de leur antiquité, pour se nettoier du peché.

Ce n'est pas seulement aux peuples infidelles & barbares, que le diable s'apparoist sous diuerses formes & figures, mais aussi à plusieurs Chrestiens & Religieux. Depuis quelques années ençà, j'ay appris d'un bon Pere des nostres de la Prouince de Flandre, que demeurant de communauté dans un Conuent de la mesme Prouince. Il y eut vne ieune Nouice lequel se

Le diable
paroist à vn
Nouice.

promenant seul dans le iardin, & prestant trop inconsiderement la pensée à la tentation, qui luy remettoit en memoire les grands biens qu'il auoit laissé au monde, & que s'il y fust demeuré qu'il eut esté riche & opulent, au lieu d'une extreme pauureté qu'il embrassoit, eut esté bien monté au lieu d'aller pieds nuds, & estimé au lieu d'estre mesprisé, dont le diable prenant occasion luy estoürdit l'esprit & le plongea dans vne telle melancolie, que mespriant en son ame les actions vertueuses de la sainte Religion, il aspira aux plaisirs mondains de telle sorte, que le diable pour le perdre d'auantage, luy fist apparoir vn gros cheual noir bien équipé, tellé & bridé, garny d'une bonne bougette à l'arçon de la telle, qui sembloit plainne d'escus, le Nouice grandement effrayé d'une apparition si inopinée rentrant en luy mesme s'enfuit au Couuent, où n'ayant pû dissimuler sa peur, fut commandé par le Superieur de luy dire le suiet de son estonnement, ce qu'ayant fait encor tout tremblent, fut doucement disposé à rendre l'habit de la sainte Religion, & charitablement aduertty que l'ordre n'admettoit que ceux qui batailloient & resistoiēt vaillamment à l'ennemy, & non ceux qui adheroient à leurs tentations. Il rendit donc l'habit bien qu'avec regret, & fut renuoyé au monde, où il vit, tousiours vn peu troublé & inquieté de ceste apparition.

Il a du depuis fait de grands efforts pour rentrer en l'ordre, mais il n'a pû venir à chef de ses pretentions, pour apprendre aux Nouices

& nouveaux champions en la milice de nostre Seigneur d'estre tousiours sur leur garde, & de resister aux tentations du malin esprit dès l'instant qu'eiles se presentent, peur de tomber en pareil inconuenient, & mal-heur de ce Religieux, car le diable ne dort iamais.

Il y a d'autres apparitions qui arriuent, mais à des personnes plus aduancées à la vertu, par de rudes combats & des prises estranges avec cet esprit malin, que Dieu permet pour les faire meriter & affermir dans la mesme vertu.

Depuis quelques années en ça, nous auons eu en nostre Conuent de Paris, vn de nos Religieux nomme Frere Bonnauenture, natif d'Amiens, tellement poursuiuy & molesté par l'ennemy du genre humain, s'y qu'à peine luy laissoit il prendre vn peu de relasche, de sorte que tous les Religieux & principalement les Nouices, comme nouveaux apprentifs en la voye de Dieu, en estoient tous effrayez & n'ozoient plus se tenir, seuls la nuit dans leurs cellules, s'ils n'auoient le soir esté asseuré par leur Pere maistre, & receu la benediction.

Combien de fois a on veu ce pauvre Frere meurtry de coups & esgratigné comme d'vn animal meschant, on a ouy quelquefois des chaisnes de fer rouller par le Conuent & des tintamarres effroyables, que ce malin esprit proche les bons iours principalement, faisoit en la poursuite de ce bon Religieux, pour l'es-pouuenter, & luy faire quitter ses oraisons & l'exercice de ses mortifications, pendant lesquelles on l'a souuentefois veu rauy en extaze

L'vn de nos
Freres cour-
menté par
le diable.

deux & trois fois le iour, Dieu m'a fait la grace de m'y estre quelquefois trouué present, & en des iubilations admirables où sa voix egallement deuote avec ses parolles, sembloient celles d'un Ange du Ciel, tant elle estoit douce & rauissante.

Ce malin esprit inuenta vn iour vne estrange maniere de le vexer & luy donner peine, car comme il luy en vouloit, il ne cherchoit que l'occasion de luy mal faire & le faire mourir s'il eut pû. Il y auoit vne grande Croix dans la cellule de ce bon Religieux, deuant laquelle il auoit accoustumé de se prosterner & faire ses oraisons, le diable desirant de le faire mourir, prit des cordes & l'attacha pieds & poings liez sur ceste Croix, en sorte qu'il n'eust sçeu se bouger ny remuer, puis luy mist vne corde au col, & la serra de si près qu'il l'en pensa estrangler, & pour empêcher qu'on ne le secourut (malice infernale) il ferma la porte par dedans, en telle maniere, que le Superieur fut contrainct d'y faire entrer vn Religieux par la fenestre avec vne eschelle, où la porte ouverte ce pauvre frere fut trouué comme mort, & destaché fut mis sur sa couche, d'où reuenu à soy, il loua Dieu & luy rendit graces infinies d'auoir combattu pour luy & deliuré son ame, d'un si puissant ennemy.

Dieu tres-bon ne permet iamais que nous soyons tentez au delà de nos forces, il veut que nous soyons esprouuez & non point sur-

montez, car il n'y a que celuy qui le veut qui le puisse estre. Les esprits infernaux desespererez de pouuoir rien gagner sur ceste belle ame, que plustost ils luy augmentoient ses couronnes & ses merites, vn d'iceux en guyse d'un Courtisan s'adressa vn iour à l'un de nos Nouices auquel n'ayant pû mettre en l'esprit de quitter la sainte Religion, le batit de telle sorte que le Reuerend Pere Prouincial entendant les coups de sa chambre, accourut promptement le secourir, mais à son approche ce saint courtisan disparut, dequoy le Novice rendit graces à Dieu & audit Pere, auquel il compta l'histoire.

Je pourrois encore icy rapporter plusieurs autres apparitions & combats des demons à l'encontre des Religieux, mais comme ce n'est pas mon suiet & que cela est assez ordinaire, ie me contente pour le present des deux susdites, lesquelles doiuent suffire, l'une pour nous faire tenir sur nos gardes & resister fortement à l'ennemy dès qu'il nous approche par quelque tentation, & l'autre pour nous apprendre qu'il y a tousiours à combattre pendant que nous sommes en ce monde, & que tant plus nous nous approchons de Dieu, plus puissamment le diable nous assaille, mais avec la grace de nostre Seigneur, nous luy pouuons resister, & dire avec S. Paul, ie puis tout en celuy qui me donne confort.

Du recours que les Sauvages auient à nos prieres. De la creance qu'ils auoient, & où ils croyent que le Soleil se couche.

CHAPIRE XXXIII.

PRiez les vns pour les autres afin que vous soyiez sauez, disoit l'Apostre saint Iacques. Je ne m'estendray pas dauantage pour vous faire voir combien merite celuy qui prie pour son prochain, que de vous rapporter vne memorable sentence de la Bien-heureuse sainte Angelique de Foligny laquelle a autant grauelement que veritablement dit ces mots dignes de sa perfection: peut estre que l'on se mocquera de moy de ce que ie vay vous dire mais neantmoins il est vray, que i'ay receu plus de graces de Dieu, priant pour autrui, que priant pour moy mesmes.

*Histoire
d'une pe-
cheresse.*

Ce qui se confirme par l'histoire suiuiante extraicte des Croniques de nostre saint Ordre, après laquelle il ne faut plus de preuue ny d'autre tesmoignage du bien qui nous reuiend de prier pour autrui, quoy que nous soyons grand pecheurs, car Dieu ne se laisse iamais vaincre de courtoisie, & est tousiours prest à donner pour peu qu'on le prie avec foy. Vn certain Religieux & parfaict Frere Mineur homme

homme de tres-saincte vie, prioit ordinairement tous ceux à qui il parloit d'auoir memoire de luy en leurs prieres. Aduint vn iour, comme il entroit en quelque ville, qu'il rencontra vne femme fort vitieuse, & mal viuante, qui le saluant, luy rendit aussi tost le reciproque, & la pria tres-humblement de prier Dieu, & la Vierge pour luy. Mais ceste femme toute estonnée d'un propos si nouueau en son endroit, luy respondit, *he! mon pere, mes prieres vous seroient inutiles & ne vous seruiroient de rien* par ce que ie suis la plus grande pechereſſe du monde. Qu'elle que vous ſoyez, repart le Religieux, ie vous supplie de m'obliger de ce bien, ô chose admirable: si tost qu'elle fut entrée en l'Eglise, elle fit la reuerence à vne image de la sainte Vierge, & alors elle se ressouuint du Religieux, incontinent se mit à genoux deuant icelle image, disant, *l'Aue Maria* pour luy, elle n'eust si-tost acheué ladite oraison, qu'elle fust rauie en esprit, & vit la Vierge Mere de Dieu, tenant son fils bien aymé entre ses bras, qui le prioit pour elle, luy disant, (Monseigneur, ie vous supplie escoutez, s'il vous plaist l'oraison de ceste pechereſſe,) & quoy ma mere, respondit l'ésant, (commét voulez-vous que i'escoute l'oraison odieuse de ma grande ennemie, encores qu'elle prie pour mon grand amy? *he! mon fils*, repliqua la Vierge, de grace, faites luy misericorde, & vous la rendez amie, pour l'amour de vostre grand amy.

Ceste pauvre femme retournée à soy, grandement estonnée d'une telle apparition, cou-

rut incontinent trouuer le Religieux, & luy raconta ce qu'elle auoit veu en son esprit, aprē luy fit vne entiere & parfaite confessiō de tous ces pechez, & depuis s'estudia du tout à fuir le vice, & seruir deuotement ceste tant secourable Aduocate des pecheurs.

Nous priēt
de faire
cesser les
pluyes:

Enuiron les mois d'Auril & May les pluyes furent tres-grandes & presque continuelle au païs de nos Hurons (au contraire de la Frāce qui fut fort seiche cette annēe là) de sorte que les Sauuages estoient dans de grandes apprehensions que tous les bleds des champs deussent perir, & dans cette affliction qui leur est fort sensible, ne sçauoient plus à qui auoir recours sinon à nous, car des ia toutes leurs inuētions & superstitions auoient esté inutilement employées, c'est ce qui les fist recourir au vray Dieu qui leur departit misericordieusement les effets de sa diuine prouidence. Ils tindrēt donc cōseil entre les principaux Capitaines & vieillards, & aduiserent à vn dernier & salutaire remede, qui n'estoit pas vrayemēt Sauuage, mais digne de personnes plus illuminées. Ils firent apporter vn tonneau de mediocre grandeur, au milieu de la cabane du grād Capitaine où se tenoit le conseil, & ordōnerent que tous ceux du bourg qui auroiēt vn champ de bled ensemencé y apporteroient vne escuellée de bled de leur cabane, & ceux qui auroient deux chāps, en apporteroient deux escuellées, & ainsi des autres puis l'offriroient & dedieroient à l'vn de nous trois, pour l'obliger avec ses deux autres confreres, de prier Dieu pour eux.

Cela fait, ils me manderent par vn nommé Grenole de me trouuer au conseil, où ils desiroient me communiquer quelque affaire d'importance, & aussi pour receuoir vn tonneau de bled qu'ils m'auoient dedié.

Suis mandé
au Conseil.

Auec l'aduis de mes confreres, ie m'y en allay, & m'assis auprés du grand Capitaine, lequel me dit: Mon Neveu, nous t'auons enuoyé querir, pour t'aduiser que si les pluyes ne cessent bien tost, nos bleds se pourriront, & toy & tes confreres avec nous, mourrons tous de faim; mais comme vous estes gens de grand esprit, nous auons eu recours à vous & esperons que vous obtiendrez de vostre Pere qui est au Ciel, quelque remede & assistance à la necessité presente, qui nous menace d'vne totale ruyne.

Vous nous auez tousiours annoncé qu'il estoit tres-bon, & auoit tout pouuoir au ciel & en la terre, si ainsi est qu'il soit tout puissant & puisse ce qu'il veut; il peut donc nous retirer de nos miseres, & nous donner vn temps fauorable & propice, prie le donc, avec tes autres confreres, de faire cesser les pluyes & le mauuais temps, qui nous conduit infailliblement dans la faminede, s'il cōtinuë encore quelque temps, & nous ne te ferons pas ingrats ny mesconnoissans: car voyla desja vn tonneau de bled que nous t'auons dedié, en attendant mieux.

Me de'ient
vn tonneau
de bled.

Son discours finy, & ses raisons deduites, ie luy remonstray que tout ce que nous leur auons dit & enseigné estoit tres-veritable, mais qu'il estoit à la liberte d'vn Pere d'exaucer ou reietter les prieres de son enfant, & que pour cha-

stier, ou faire grace & misericorde, il estoit
 tousiours la mesme bonté, y ayant autant d'a
 mour au refus qu'à l'octroy, & luy dis, pour
 exemple: voyla deux de tes petits enfans, An
 daracouy & Aroussen, car ainssi s'appelloient ils
 quelquefois tu leur accorde ce qu'ils te deman
 dent, & d'autres-fois non, que si tu les refuses
 & les laisse contristez; ce n'est pas pour hayne
 que tu leur portes, ny pour mal que tu leur
 veuilles; ains pour ce que tu iuge mieux
 qu'eux que cela ne leur est pas propre, ou que
 ce chastiment leur est necessaire. Ainsi en vint
 Dieu nostre Pere tres-sage, enuers nous ses pe
 tits enfans & seruiteurs.

Ce Capitaine vn peu grossier en matiere spi
 rituelle, me repliqua, & dit: Mon Nepueu,
 n'y a point de comparaison de vous à ces petits
 enfans, car n'ayans point d'esprit ils font sou
 uent de folles demandes, & moy qui suis per
 sage & de beaucoup d'esprit ie les exauce ou re
 fuse avec raison. Mais pour vous qui estes gran
 dement sages & ne demandez rien inconfid
 remment & qui ne soit tres-bon & equitable, v
 stre Pere qui est au Ciel n'a garde de vous e
 conduire, que s'il ne vous exauce & que ne
 blebs viennent à se perdre, nous croyons que
 vous n'estes pas veritables, & que vostre Iesu
 n'est point si bon ny si puissant que vous no
 anonnee. Je luy repliquay tout ce qui estoit ne
 cessaire là dessus, & luy remis en memoire que
 des-là en plusieurs occasions ils auoient exp
 rimenté le secours d'un Dieu & d'un Createur
 si bon & pitoyable, & qu'il les assisteroit en

re à ceste presente & pressante necessité, & leur
donneroit du bled plus que suffisammēt, pour-
ueu qu'ils nous voulussent croire & quitassent
leurs vices, & que si Dieu les chastioit par fois,
c'estoit pour ce qu'ils estoiet tousiours vicieux
& ne sortoient point de leurs mauuaises habi-
tudes, & que s'ils se corrigeoient, ils luy se-
roient agreables & les traitteroient après sans
qu'ils manquaissent de rien.

Ce bon homme prenāt goust à tout ce que ie
luy disois, me dit: ô mon Nepueu ie veux donc
estre enfant de Dieu comme toy, ie luy respon-
dis tu n'en es point encore capable, ô mon on-
cle, il faut encore vn peu attendre que tu te sois
corrigé, car Dieu ne veut point d'enfant s'il ne
renonce aux superstitions & qu'il ne se cōtente
de sa propre fême, sans aller à celles d'autrui, &
si tu le fais nous te baptiserons, & après ta mort
ton ame s'ira biē heureuse avec luy en Paradis.

Le conseil acheué, le bled d'Inde fut porté en
nostre cabane, & m'y en retournay, où i'aduer-
tis mes cōfreres de tout ce qui s'estoit passé, &
qu'il falloit serieusement & instamment prier
Dieu pour ce pauvre peuple, à ce qu'il daignast
regarder de son œil de misericorde & leur
connaist vn temps propre & necessaire à leurs
vices, pour de là les faire admirer ses merueil-
les. Mais à peine eusmes nous cōmencé nos pe-
tites prieres & esté processionnellement à l'en-
tour de nostre petite cabane (le P. Ioseph reue-
nu) en disant les Litanies & autres prieres pro-
pres, que N.S. tres-bon & misericordieux fist à
mesme temps cesser les pluyes, tellemēt que le

*Demandōs
à Dieu le
beau tēps.*

Ciel, qui auparauant estoit par tout couuert de nuées obscures qui se deschargeoient abôdamment sur la terre, se fist serain, & toutes ces nuées se ramasserent en vn globe au dessus du bourg, qui tout à coup s'alla fondre derriere les bois, sans qu'on en appercent iamais tóber vne seule goutte d'eau. Et ce beau temps dura enuiron trois semaines au grand contentement, estonnement & admiration des Sauvages, qui satisfaits d'une telle faueur celeste nous en refterent fort affectiônez, avec deliberatiô de faire passer en conseil, que de là en auant ils nous appelloient Peres, qui estoit beaucoup gaigné sur leur esprit, & à nous vne grande obligation de rēdre infinies graces à nostre Seigneur, qui nous auoit exaucé, veu qu'il n'v sent iamais de ce mot Pere, qu'enuers les vieillards de leur nation, & non enuers les estrangers, par vne certaine vanité qu'ils ont de tenir tousiours le dessus.

Quelqu'vns en suite nous appelloient Arôdionane, c'est à dire Prophete ou hôme qui predit les choses à venir & peut changer les temps, car entr'eux il y a de certains Sorciers, Medecins ou Magiciens, qui ont accez au diable & qui sont estat de predire les choses futures & de faire tonner ou cesser les orages, & ceux là sont les plus estimez entr'eux, côme entre nous les plus grands Saincts, non qu'ils les estiment Saincts, mais admirables & scachans les choses à venir. C'est tout ce qu'ils pouuoient dire d'excellent de nous, car pour nous appeller Okiou Ondaki, qui veut dire demon ou Ange, cela estoit quelque degré au dessous de ceste premiere qualité.

Bref les Sauvages nous eurent vne telle creance & auoient tant d'opinions de nous depuis ceste faueur celeste, que cela nous estoit à peine, pour ce qu'ils en inferoient & s'imaginoient que Dieu ne nous esconduiroit iamais d'aucune chose que luy demandassions, & que nous pouuions tourner le Ciel & la terre à nostre volôté (par maniere de dire) c'est pourquoy il leur en falloit faire rabatre de beaucoup & les aduiser que Dieu ne faict pas tousiours miracle, & que nous n'estions pas digne d'estre tousiours exaucez, mais souuent corrigez.

Il m'arriua vn iour qu'estant allé visiter vn Sauvage de nos meilleurs amis, grandement honneste homme, & qui sentoit plustost son bon Chrestien que non pas son Sauvage, comme ie discourois avec luy & pensois monstrier nostre cachet, pour luy en faire admirer l'image qui estoit de la saincte Vierge, vne fille subtilement s'en saisit & le ietta de costé dans les cendres, pour n'en estre trouuée saisie & le ramasser après ma sortie. I'estois marry que ce cachet m'eut esté ainsi defrobé, & dis à ceste fille que ie soupçonnois, tu te ris à present de mon cachet perdu, mais sçache que s'il ne m'est rendu, que tu pleureras demain & mourras bien tost, car Dieu n'ayme point les larrouesses & les chaltie, ce que ie disois simplement pour l'intimider & faire rendre son larcin, comme elle fist à la fin l'ayant moy mesme ramassé du lieu qu'elle me monstra l'auoir ietté.

Le lendemain matin à heure de dix estant retourné voir mon Sauvage, ie trouuay cette

Vne Sauvage
esse defro-
be nostre
cachet.

La fille t d.
be malade.

La fille est
guerie,

filles, toute explorée, malade & trauail'ée de
grands vomissemens, est ôné & marry de la voir
en cet estat ie m'informay de la cause de s'ô mal
& de ses pleurs, l'on me dit que c'estoit le cha-
stiment de Iesus que ie luy auois predict & que
deuant mourir elle desiroit s'en retourner à la
nation du petun d'où elle estoit, pour ne mou-
rir hors de son païs, ie la consolay alors & luy
dis qu'elle ne mourroit point pour ce coup ny
ne sentiroit dauantage de mal, puis que ce ca-
chet auoit esté retrouué, mais qu'elle auisast
vne autre fois de ne plus desrober, puis que cela
desplaisoit au bon Iesus, elle me demanda de re-
chef si elle n'en mourroit point, ie luy dis que
non, après quoy elle resta entierement guerrie
& consolée & ne parla plus de retourner en son
païs comme elle faisoit auparauant.

Comme ils estimoient que les plus grâds Ca-
pitaines François estoient douëz d'un plus grâd
esprit, & qu'ayans vn si grâd esprit ils pouuoient
faire les choses plus difficiles & non les pauures
qui n'auoient point d'esprit. Ils inferoient de là
que le Roy (côme le plus grand Capitaine de
François,) faisoit les plus grandes chaudieres
& les autres Capitaines les moindres & plus
petits meubles. Je les tiray de cette folle pensée
lors qu'ils nous en presenterent à racômoder
car leur ayât dit que c'estoit l'ouurage des pau-
ures artizans & non du Roy ny des grands
l'admirant; ils nous dirent: les pauures ont
donc de l'esprit en vostre païs, & d'où viennent
donc que ce sont les Capitaines de Kebece
qui ont toute les marchandises & non les

ames, c'est que les pauvres leur donnent travail, & les riches les nourrissent.

Ils nous prièrent quelquefois de fort bonne grace, de faire pancher en bas les oreilles droictes de leurs chiens, pour les rendre semblables à ceux de Kebec, & de tuer cest importun Tonnere qui les estoürdissoit de son bruit, car ils croyoient qu'il estoit vn oyseau fort delicat qu'on mangeoit en France, couuert de fort belles plumes, & nous demandoient si les pennaches de nos gens estoient de ses plumes, & s'il auoit bien de la graisse, & pourquoy il faisoit tant de bruit, & de la cause de ces esclairs, & de ces roulemens, & ie satisfaisois selon ma petite capacité à leur demande, & les détrompois leur faisant voir qu'ils ne deuoient penser si peu apparemment des choses, ny croire à tous esprits, de quoy ils restoient fort contents & satisfaits, car ils sont bien ayse d'apprendre, & d'ouyr discourir des choses qu'ils ignorent, pourueu qu'on leur parle serieusement, & en verité, & non point en gaufant, ou niaisant, comme faisoient nos François.

Ils furent fort estonnez entre autre chose, aussi bien que plusieurs simples gens d'icy, d'ouir dire que la terre fut ronde, & suspendue sans autre appuy que de la puissance de Dieu, que l'on voyageast à l'entour d'icelle, & qu'il y eut des Nations au dessous de nous, & mesme que le Soleil fit son cours à l'entour; car ils pensoient que la terre fut

posée sur le fond des abysses des eaux, & qu'au milieu d'icelle il y eut vn trou dans lequel le Soleil se couchoit iusques au lendemain matin qu'il sortoit par l'autre extrémité.

Cette opinion est quasi conforme à celle des Peruennois, lesquels quand ils voyoient que le Soleil se couchoit, & qui sembloit se precipiter dans la mer, qui en toute l'estendue du Peru est du costé du Ponent, ils disoient qu'il entroit dedans ou par la violence de sa chaleur il dessechoit la pluspart des eaux, & qu'à l'imitation d'un bon nageur, il faisoit le plongeon par dessous la terre qu'ils croyoient estre sur l'eau, pour sortir le iour d'apres des portes del'Orient ce qu'ils ne disoient que du coucher du Soleil sans parler de celuy de la Lune, ny des autres estoiles. De toutes lesquelles choses on peut inferer, qu'ils n'estoient gueres sçauans en l'Astrologie, & fort ignorans en ces sciences pour n'y auoir pas eu de Maistres.)

Histoire d'une femme Huronne baptisée, & d'un ieune Montagnais auquel le Diable s'apparut sous diuerses formes. Du grand festin qui fut fait à son baptisme, & de la harangue des Sauvages.

CHAPITRE XXXIV.

Gibier des
Freres Mineurs.

LA conuersion des Infidelles est le propre gibier des Freres Mineurs, & de roder

toute la terre, pour les amener à Iesus Christ, car Dieu ne nous a pas enuoyé pour nous seuls, mais pour ayder à sauuer les autres en nous sauans nous mesmes, autrement nous ne satisfaisons pas à tout ce qui est du de- uoir d'un vray Frere Mineur, qui doit estre martyr de volonté, s'il ne le peut estre d'effet.

Je fais mention au Chapitre suiuant des conuerfions admirables que nos tres-saincts Freres ont fait dans les Indes, & presque par toutes les terres Payennes & Barbares, lesquelles surpassent infiniment celles qui se sont faites dans tout le Canada; mais ceux qui considereront ce qui est de la nouuelle France, & le peu de zele de l'ancienne à y porter leur ayde. La grande estenduë & le peuple presque infiny des Indes, outre le bon ordre que les Viceroy & Gouverneurs des pays y tiennent, que ce sont peuples policez pour la pluspart, admireront qu'il y en aye aucun de conuert y dans nostre pauvre Canada, & que nos Religieux y aient pû disposer vn si grand nombre de Barbares à la foy, & en baptiser plusieurs, entre lesquels ie feray choix de quelqu'vns pour vous faire voir qu'en effet, on y feroit du profit si on y estoit assisté.

Nous baptisames vne femme Huronne malade en nostre bourg de saint Ioseph, qui ressentit interieurement, & tesmoigna exterieurement de grands effets du saint Baptisme, il y auoit plusieurs iours qu'elle ne

Baptisme
d'une fem-
me Huron-
ne.

prenoit aucune nourriture, ne pouuoit rien aualler, & n'auoit d'appetit non plus qu'une personne mourante, elle auoit neantmoins tousiours l'esprit & le iugement tres-bon, iouissoit de la faculté de ses sens, & paroissoit en elle ie ne sçay quoy d'aspirant aux biens eternels, car à mesme temps qu'elle fut baptisée l'appetit luy reuint cōme en pleine santé, & ne ressentit plus de douleurs par l'espace de plusieurs iours, apres lesquels la maladie se rengregeant, & son corps s'afoblissant, elle rendit son ame à Dieu le Createur, comme pieusement nous pouuons croire.

Auant d'expirer elle repetoit souuent à son mary, que lors qu'on la baptisoit, elle ressentoit en son ame vne si douce, si suauë & agreable consolation, qu'elle ne pouuoit s'empescher d'auoir les yeux, & la pensée, continuellement esleuez au Ciel, & eut bien voulu qu'on eut pû luy reïterer encore vne autre fois le saint Baptisme, pour pouuoir iouyr derechef de cette consolation interieure, grace & faueur que ce Sacrement luy auoit communiquée.

Son mary nommé *Ongyata*, tres-content & ioyeux au possible, nous en a tousiours esté du depuis fort affectionné, & desiroit encore estre Chrestien, avec beaucoup d'autres, mais il falloit encore vn peu temporiser & attendre qu'ils fussent mieux instruits, & fondez en la cognoissance d'un Iesus Christ Crucifié pour nos pechez, au mespris de

toutes leurs folles ceremonies, & à l'horreur du vice, pour ce que ce n'est pas assez d'estre baptisé, pour aller en Paradis, mais il faut viure Chrestienement & dans les termes, & les Loix que Dieu & son Eglise nous ont prescrites: autrement il n'y a qu'un Enfer pour les mauuais Chrestiens, non plus que pour les Infidelles, & non point un Paradis.

Et puis ie diray avec verité, & veux bien le repeter plusieurs fois, que la doctrine, & la bonne vie des Religieux, ne suffisent pas à des peuples Sauuages pour les maintenir dans le Christianisme, & en la foy, il faut de plus la conuersation & le bon exemple des personnes seculiers; car comme ils disent eux mesmes, s'il y auoit des mesnages de bons Catholiques habitez avec eux, ils apprendroient plus en deux Lunes, leur voyans rendre les deuoirs de bons & vertueux Chrestiens seculiers, qu'en quatre, les oyans dire à des Religieux, à la vie desquels ils trouuent plus à admirer qu'à imiter.

Entre plusieurs Sauuages Canadiens que nos Peres ont baptisez, soit de ceux qu'ils ont fait conduire en France, ou d'autres qu'ils ont baptisez & retenus sur les lieux, un principalement merite que ie vous descricue l'Histoire, qui est assez remarquable.

J'ay rapporté cy deuant au premier liure de ce volume, Chapitre sixiesme, comme le Canadien Choumin, autrement nommé le Cader, auoit promis au Pere Ioseph de luy amener son fils aîné nommé *Nancoganashit*,

Le Sauvage
donne son
fils pour
estre in-
struit.

pour estre instruit & baptisé, si tost qu'il scauroit son retour de France, comme il fit en effet, s'y rendant si soigneux, qu'à peine ledit Pere eut il pris vn peu de repos qu'il le vint trouuer avec son dit fils, lequel apres vn petit compliment luy dit en sa langue : Pere Joseph voyla mon fils que ie t'ay amené pour demeurer avec toy, ou pour l'enuoyer en France ainsi que tu voudras, ie te l'auois promis & m'en acquite, & te le laisse en repos pour en disposer à ta volonté, seulement ie te supplie pour l'amour que tu porte à *Iesus*, d'en auoir le soin, del'instruire, & de le faire son enfant comme tu m'as promis, car ie veux qu'il viue dorefnauant comme toy, & aille en Paradis avec toy.

L'enfant ne pouuoit auoir lors qu'environ neuf, ou dix ans seulement, mais il estoit fort ioly, honneste, & sentant peu son Sauvage non plus que son pere. On luy demanda s'il vouloit demeurer avec nous, & estre baptisé, il dit que ouy, & qu'il estoit fort content. Là dessus on luy fait quitter son habit de Sauvage, qui consistoit en vn petit capot rouge qu'il auoit eu à la traite pour des pelletteries, & fut reuestu d'vn petit habit à la Françoisse, qui le consola fort, car il se contemploit, se regardoit, & s'admiroit luy-mesme avec ce petit habit. Mais combien est puissant l'amour d'vn pere enuers son enfant, & reciproquement celuy d'vn enfant bien nay enuers son pere, il n'y a que celuy qui l'a experimenté qui le puisse exprimer.

Ce pauvre Sauvage auoit esté contant iusques là, mais quand il fut question de dire à Dieu à son enfant, la parole luy manqua, & fondant en larmes, il n'osoit plus regarder ce fils, l'obiet de ses douleurs, non plus qu'une autre sainte Paule son petit sur le riuage de la mer, neantmoins surmontant sa paternelle affection, & aymant plus son fils pour Dieu que pour luy-mesme, Dit derechef au Pere Ioseph, cet enfant est à toy, ie te l'ay donné, & me suis despoüillé du pouuoir que i'auois sur luy, afin qu'il suiue tes volontez, reçois le donc & en fais comme de ton fils, & sur ce partit pour s'en retourner avec les autres Sauvages, chargé de quelque petit present qu'on luy donna pour es-
suyer ses larmes.

Or ce fut icy bien la pitié, car *Neoganachit* voyant partir son pere, il n'y eut plus de paix à la maison, il pleuroit, il s'affligeoit & vouloit à toute force s'en retourner avec luy, sans qu'on pût par aucune douceur luy persuader de demeurer, à la fin on vſa de quelque menace de luy oſter son habit, & de le renuoyer comme il estoit venu, ce qu'aprehendant, il s'appaisa vn petit, & dit au Pere Ioseph; Si tu m'ayme comme tu dir, laisse moy donc aller avec cet habit, car il me plaist infiniment, autrement ie ne voy point que tu me de l'amour pour moy, car l'amitié ne se recognoist que dans le bienfait, & tu me le veux oſter, ce n'est pas que ie desire te quitter pour tousiours, mais seulement pour la

consolation de mon pere qui se meurt de tristesse. Et quoy voudrois tu bien user d'une si grande rigueur à l'encontre de celuy qui ne peut vaincre les sentimens que la nature luy a donné pour celuy qui l'a mis au monde, ie ne le peux concevoir, & ne scaurois comprendre que tu sois bon pour les autres, & que pour moy seul tu sois mauuais, c'est à toy à faire voir ta courtoisie en effet, & à moy de t'en faire les remerciemens selon leur valeur, & te promettre comme ie fais, de te venir voir souuent avec d'autre petits garçons que ie t'ameneray pour apprendre à prier Dieu avec moy, si tu m'en donne le congé mais comme il vid qu'il falloit tout à bon qu'il quitter l'habit, ou demeurer, il se resigna, & dit qu'il ne s'en vouloit point aller, & deslor resta avec nos Peres, sans plus parler de ses parens.

Il faut aduoüer qu'il y eut vn rude combat à cette separation, & puis le Diable y aluinoit bien les risons, car il y alloit de son interest, comme la suite de ce discours vous fera voir. Ce petit se rendit si soigneux d'apprendre la doctrine Chrestienne, & les prieres necessaires, qu'il s'en faisoit admirer, car outre qu'il auoit l'esprit bon, & la memoire heureuse pour bien apprendre, il auoit ie ne say quoy de gentil qui le faisoit aimer, & esperer de luy, quelque chose de bon pour l'aduenir.

Après qu'il eut appris ses petites prieres, il ne manquoit pas de les reciter soir & matin de

tin de genouïls deuant vne Image deuote, ou à l'Oratoire, & ne se couchoit iamais qu'au prealable il ne se fut recommandé à Dieu, & faict le deuoir d'un bon Chrestien (Payen qu'il estoit) Lors qu'ils alloit par les cabanes de ceux de sa Nation, il incitoit les petits garçons d'apprendre les mesmes choses, & de venir demeurer avec luy, & aduertissoit les malades de ne mourir point sans estre baptisé, car luy mesme auoit vn si grand desir de l'estre, apres qu'il eut vn peu compris la Doctrine Chrestienne, qu'il ne cessoit iour n'y nuict de prier nos Freres de le baptiser, & fallut en fin pour sa consolation, & celle de son pere qu'il en prioit aussi luy donner iour pour cette solemnité, à Pasques, ou quand les Nauires arriueroyent de France, pendant lequel temps il apprit toute sa croyance, son Catechisme, & les Commandemens de Dieu & de l'Eglise, avec vne facilité & contentement incroyable.

Ce que ne pouuant supporter l'ennemy du genre humain, luy dressa vne furieuse baterie, & inuenta tout ce qu'il peut pour l'empescher de son salut, qui ne luy reussi pas neantmoins. Il incita quelqu'un de sa Nation de dire à son pere de ne point permettre qu'il fut baptisé, & qu'autrement il mourroit comme les autres qui l'auoient esté. Ce qu'ils disoient pour plusieurs Sauvages que nos Peres auoient baptisez à l'article de la mort.

apres auoir esté instruit en santé, & partant qu'il le deuoit retirer vers luy. Ce pauvre homme affligé de cette nouuelle, partit à mesme temps du lieu où il Hyvernoit, esloigné de plus de trente cinq lieuës de nostre maison, & se rendit à l'habitation, non sans vne grande peine, pour consulter les François sur ce qu'il auoit à faire touchant son fils. Il s'adressa, mais fort mal à propos, à de certains indeuots, qui ne se soucioient non plus du salut des Sauvages que du leur propre, car au lieu de porter ce pere à faire baptiser son fils, ils l'en destournierent le plus qu'ils peurent, l'asseurant qu'il le deuoit retirer de nos mains, & suiure le conseil de ceux de la Nation, à quoy il n'estoit desia que trop porté.

Ce mauuais conseil des François n'estoit pas qu'ils se souciaissent que l'enfant fut baptisé ou non, mais c'estoit pour tirer de ce pauvre pere quelques pieces de pelleteries, ou de venaison, ce qui parut lors que n'en pouuans rien auoir, ils luy chanterent iniures, l'appellant yurongne, & qu'il ne valloit rien d'auoir ainsi liuré son fils, qu'on enuoyeroit en France si tost qu'il seroit baptisé, & que le Pere Ioseph auoit tort de l'auoir accepté. Voyez l'insolence, & la temerité de ces indeuots, ie croy que les Chefs les en auront chastiez, si la faute leur en a esté descouuerte, car ils ne peuuent tout cognoistre, que par

les yeux d'autrui.

Qui n'eut esté esmeu de tant de mauvais conseils, & des iniures des François, autre qu'un esprit bien fort. Ce pere ainsi traucté dans ses pensées, s'en vint chez nous, où il fut bien receu & traité de mesme nous, & ne sçachans son mauvais dessein, on luy permit de parler à son fils en particulier, auquel il demanda s'il vouloit quitter là les Religieux; mais l'enfant luy respondit que non, & qu'il vouloit demeurer avec eux, pour estre baptisé, & que le iour destiné pour son baptême s'approchoit fort. Le pere ne luy en parla pas d'avantage pour lors, se contentant de cette premiere atteinte, iusques à une autre fois qu'il revint le presser de plus près, sans que l'enfant descourut rien à personne, de la peine que son pere luy donnoit, peur qu'en la descourant, il ne fut renvoyé à ses parens, en quoy il se trompoit.

Ces malicieux & faux Chrestiens François, continuerent tousiours de solliciter ce Choumin à retirer son fils de nos mains, & de ne permettre qu'il fut baptisé, quelques autres Sauvages s'y employerent aussi, qui l'animerent si bien, que le Samedi de Pasques il vint chez nous accompagné d'un Sauvage, que l'on tenoit pour grand forcier, & avoir une frequente communication avec le Diable, aussi bien que le pere de ce petit, qui outre cela estoit

estimé le meilleur Medecin , & grand chasseur du pays.

Comme on ne se mesfioit point de luy on le laissa derechef monter seul dans la chambre ou estoit son fils occupé en quelque petit exercice , & l'ayant salué à sa mode , luy dit que c'estoit à ce coup qu'il falloit qu'il renonçast au saint Baptême , & à tout ce qui estoit de nos instructions , autrement qu'il mourroit , & qu'il fit estat de s'en retourner avec luy. L'enfant insistoit toujours du contraire , & ne pouuant goustier vn si mauuais procedé , pressé de trop près : luy dit franchement que s'il le contraignoit d'avantage en sa conscience , qu'il le renonceroit pour son pere , & qu'il auoit bien peu d'esprit (mot ordinaire) de vouloir luy empescher à present vne chose que luy mesme luy auoit conseillée , lors qu'il le donna au Pere Ioseph.

Le pere irrité que par douceur , & autrement il ne pouuoit rien gagner sur l'esprit , & la constance de son fils , voulut vser de menace , & luy deschargea vn si grand coup sur l'estomach qu'il le renuersa par terre , au bruit duquel le Frere Geruais accourut , qui luy demanda pourquoy il auoit frappé son fils , mais le petit prenant la parole , respondit ; Ne vois tu pas bien qu'il n'a point d'esprit , & qu'il ne scait ce qu'il faict. Il voudroit que ie vous quittasse , & que ie ne fusse point baptisé , mais ie le veux estre , & mourrois

plustost à la peine, que de m'en retourner avec luy sans auoir receu ce benefice, c'est pourquoy pour me liberer de ces importunitéz si ie vay en France ie n'en reuiendray pas, ou bien vous me contraindrez de reuenir, car autrement ie ne puis auoir de repos. Les Religieux qui se trouuerent là, voyans sa constance, le consolèrent, & rancerent le pere de vouloir empêcher le baptisme de son fils: lequel s'excusa sur ce que les François mesmes, avec plusieurs de sa Nation, luy conseilloient de le reprendre, & ne permettre qu'il fut baptisé.

C'estoit la coustume que nos Freres alloient toutes les Festes & Dimanches, faire l'Office diuin à l'habitation, & y demouroient depuis le matin iusques apres Vespres qu'ils reuenoient à nostre Couuent. Le iour de Pasques dès le matin le Pere Ioseph s'y en alla à mesme dessein, accompagné de son petit Sauuage, & de Pierre Antoine, Paterchouenon, autre Sauuage qui auoit esté baptisé en France, Choumin s'y trouua aussi ou ayât rencontré son fils, le pria derechef de s'en retourner avec luy, & pour l'amadouier l'ayans tiré vn peu à l'escart loin de la maison, luy presenta quelque chose à manger, qu'il n'accepta que par contrainte, & encor moins luy voulut il obeyr en son mauuais dessein; Tellement que cet impetueux n'ayant encor pû rien gagner sur sa constante resolution, fut à la fin contrainct de l'abandonner en

les bonnes volontez, & le laisser retourner avec nos Freres.

Vespres estant dites, le Pere Ioseph fit chercher ce petit, & ne l'ayant pû trouver s'accompagna de son Pierre Anthoine, & partit pour son retour au Couuent, esperant que si le garçon n'y estoit encore arriué, qu'il les suiuroit bien tost apres, car il estoit asseuré de sa resolution.

Or l'enfant qui auoit vn peu trop tardé avec son pere, fut bien marry que le Pere Ioseph fut party, car il craignoit tousiours la rencontre de ceux qui le dissuadoient de son salut, & fut contrainct de s'en aller seul, en nostre maison. Estant arriué au dessus de la coste du fourneau à chaux, qui est à vn grand quart de lieü de nostre Couuent, chantant comme ils ont accoustumé allans par les bois; s'apparut à luy vn fantosme en guyse d'vn vieillard, ayant la teste chauue, & vne grande barbe route blanche, qui n'auoit point de pieds, mais seulement deux bras, & deux aisles, avec lesquelles il voltigeoit autour de luy, luy disant quitte les Religieux, & le P. Ioseph, ou autrement ie te tueray

Ce petit vn peu esmeu, luy respondit qu'il n'en feroit rien, qu'il les aymoit trop, & vouloit estre baptisé. Ie te tueray donc repliqua le fantosme, & à mesme temps se ietta sur luy, comme il passoit entre deux arbres, l'abatit sur la neige pour lors encore d'vn pied & demy d'épaisseur, & luy

pressa tellement l'estomach que de douleur il fut contrainct de ietter de hauts cris, & d'appeller le Pere Ioseph à son ayde, ce qu'ayant fait lacher prise à ce fantosme, il luy emporta son chapeau à plus de trois cents pas de là.

S'estant releué, il se prit à crier, & courir de toute sa force, sans sçauoir où estoit son chapeau, lequel il retrouua au milieu du chemin, fort loin d'où il luy auoit esté pris, & l'ayant ramassé, non sans quelque apprehension du malin esprit, qui l'auoit l'a porté, il ouyt vne voix qui luy dit derechef, quitte donc ces *Ca Iscone ou acopet*, (ainsi appellent-ils les Recollects) il respondir : le n'en feray rien, & fuyoit toujours vers le Conuent en criant aux Religieux qu'ils l'allassent secourir, lequel ayant esté à la fin entendu, le Pere Ioseph enuoya Pierre Anthoine pour voir que c'estoit, car on ne pouuoit encor discerner la voix que confusement. Estant rencontré, il conta à Pierre Anthoine son infortune, & les frayeurs qu'il auoit eu de ce fantosme, le priant au reste de n'en dire mot à personne, peur que cela ne retardat son baptisme, ou que l'on en conceut quelque mauuaise opinion de luy, ce qu'ils tindrent fort secret iusques au temps qu'il le fallut descourir. L'ay eu diuerfes pensées sur ce fantosme, & m'est venu en l'opinion que ce pouuoit estre Choumin mesme, qui l'auoit enuoyé à son fils pour luy faire quitter le party de Dieu,

car comme i'ay dit ailleurs il estoit estimé vn fort grand Pirottois.

Ce soir mesme les bons Peres Iesuites qui estoient logez à nostre departement d'embas, donnerent à soupper à nos Religieux, qui leur en donnoient aussi reciproquement, où ils menerent Pierre Anthoine, & vn autre Sauvage qui nous auoit promis son fils, puis le petit Naneogauachit avec son pere qui l'estoit venu voir, lesquels loïierent fort l'apprest des viandes, & la maniere de nous gouverner en nos repas. Apres souper le petit Naneogauachit monta à la chambre avec le Frere Geruais, & tout gay & ioyeux se tenoit aupres du feu, pendant que ledit Frere escriuoit quelque mots Sauvages qu'il luy enseignoit, comme tout à coup il vint à tomber pleurant amèrement, avec la gorge & vn visage fort enflé, qui estonnoit fort nos gens, ne sçachant d'ou ce mal luy pouoit proceder; On luy demanda ce qu'il auoit, mais à cela point de responce, seulement on luy oyoit dire entre ses dents, Noma, Noma, qui veut dire en nostre langue, Non, Non. Lors ledit Pierre Anthoine qui auoit desia sçeu l'apparition du fantosme, dit alors qu'il y auoit là du sort necessairement, & quelque traitt de la magie de son pere, ou de cet autre sorcier qu'il auoit amené, & pour confirmation de son dire, conta l'histoire de ce Demon, qui en forme d'vn vieillard luy estoit apparu sur le chemin reuenant de Kebec.

Ce qu'ayant sçeu le bon Frere Geruais & craignant pis, appella le P. Ioseph à son secours & avec luy les R.R. Peres Iesuites, pour voir l'estat du petit & comme on en deuoit vser, car il'estoit comme mort estendu de son long deuant le feu, la premiere chose qu'ils voulurent faire fut de le mettre sur la couche qui estoit là tout proche, mais ils ne le purent oncques leuer de terre, à la fin nostre Frere Charles y prestant la main & tout ce qu'il auoit de force avec le Frere Geruais, le mirent sur sa paillasse. Le Pere Ioseph & les R.R. PP. Iesuites ne sçachant la cause de ce changement si soudain, s'informerent de Pierre son confidant, d'où ce-la pouuoit proceder, lequel leur raconta derechef, la rencontre du fantosme, qui leur donna quelque crainte d'obsession, & que ces si grâds tourments qu'il se donnoit à luy mesme sur la couche, en estoient des autres indices, c'est pourquoy ils se mirent tous en prieres.

En ces entrefaictes, le Pere de ce petit parut avec son compaignon, auquel on conta ce qui s'estoit passé, mais il en fit bien l'estonné, & dit mon fils veut mourir, mais laissez moy faire & ie le gueriray, & se retirant dans le iardin avec cet autre medecin, firent des extorsions du corps & des grimasses estranges, pendant lesquelles son mal augmentant, il se prit à pleurer & suer à grosses gouttes par tout le corps, les yeux fermez & tellement changé de face qu'il n'estoit pas cognoissable, nonobstant il repetoit souuent comme s'il eut parlé à quelqu'un Nema, qui veut dire nom, & quelquefois Nio-

uy baptisé, tout aganiouy, ie veux estre baptizé, & se plaignant fort de l'estomach, disoit: que ce qu'il auoit veu sembloit le vouloir estouffer tant il le pressoit. Ce que voyant le R. P. Lalle-
mant, luy couurit le visage de sa couuerture, où ayant esté peu de temps, on l'entendit qu'il contestoit fort, disant Nema & ralloit comme vn homme agonizant. On le descouurit promptement pour luy donner de l'air, car il auoit des-ja la face toute changée, les levres fort enflées, & les yeux tout tournez. Et reprenant vn peu haleine, il dit, mais avec peine, que c'estoit le petit homme qu'il auoit veu, qui le vouloit estrangler à cause qu'il vouloit estre baptizé & que cela le tenoit encor à la gorge, l'on luy donna du vin qu'il aualla, mais cela ne luy seruit de rien, non plus que d'vn autre dans lequel le P. Lallemant auoit fait tremper son Reliquaire, car l'enfant crioit tousiours Nex boutamounau, i'estouffe. Neke poutamepitaui, i'estrange.

Le P. Ioseph voyant que tout ce qu'on luy auoit pû faire ne l'auoit de rien soulagé, luy fist aualler vne cueillerée d'eau beniste, laquelle ayant auallée, il dit, qu'est-ce qu'on m'a fait boire, ce meschant craint bien cela, il l'a fait fuir, il ne me tient plus à la gorge, il est à present aux pieds duli, iettés en dessus: après qu'o en y eut ietté, il dit, il n'est plus là, il est sous le liét, iettez y en aussi, ce qu'ayant fait, l'enfant dit, voyla il n'est plus ceans, il s'est enfuy tant il craint ce que tu luy iette.

Pendant que cela se passoit dans la chambre,

le pere du petit avec son compaignon estoient dans le iardin, où ils faisoient des grimasses & chimagrées avec de certaines inuocations au demon, d'où ayans sçeu qu'on les apperceuoit, ils cessèrent & furent appelez à la chambre, & reprimandez de leurs magies, & iusqu'à la veille de la Pentecoste, que ce petit deuoit estre baptizé, il fut tourmenté tous les soirs par ce demon, l'espace d'une heure & quelquefois de deux, avec des peines pareilles de la premiere fois.

Il luy est aussi arriué que allant seul par les bois chasser aux escurieux pour son diuertissement particulier, il ouyt vne voix sans rien appercevoir, qui luy repeta par trois ou quatre fois, quitte donc les Religieux ou ie te tueray, (c'estoit la menace ordinaire du demon) ce qui luy donna vne telle apprehension, que laissant là son arc, ses flèches & l'escurieux qu'il auoit tué, s'enfuit à trauers les bois iusques dans nostre Conuent, & deslors ne vouloit plus sortir seul, sinon que nos Religieux l'aduertirent, que quand il oyroit, ou verroit quelque fantosme, qu'il se signat du signe de la sainte Croix, inuquant le saint Nom de Iesus & de Marie, & que par ce moyen l'ennemy neluy pourroit plus nuire, ce qu'ayant obserué & baisé souuēt le Reliquaire qu'il portoit à son col, auquel il y auoit de la vraye Croix, il s'assura du tout & n'eut plus peur de l'ennemy, iusques à vn certain iour que le demon s'apparoissant derechef à luy hors le Conuent, & luy commandant avec vne voix fort afreuse, de quitter les Religieux,

Oye vne
voix en
l'air.

Le diable
comme vn
tourbillon
de vent.

il en demeura tellement effrayé qu'en fuyant il
crioit comme vn perdu au secours, mais cōme
il vint à se resouuenir de ce qui luy auoit esté
enseigné, il fist promptement le signe de la
saincte Croix sur luy, & adiousta, ie ne te crains
point ô Satan, car tu ne me sçauois empescher
d'estre baptizé dans huit iours, ce qu'ayant dit
l'ennemy disparut, & s'en alla comme vn tour-
billon de vent rencontrer trois de nos Reli-
gieux qui estoient dans le iardin du répart, les-
quels il pensa renuerser du haut en bas des mu-
railles, mais s'estans recommandez à Dieu, ce
tourbillon les quitta & s'attacha à vn petit ar-
brisseau, qu'il esbranla & secoüa de telle sorte
qu'il en rompit plusieurs petites branches, &
ne toucha à aucun des autres qui estoient là au-
pres, desquels les fueilles ne branlerent pas seu-
lement. Le petit estant de retour à la maison, il
dit à nos Peres ce qui luy estoit arriué, & que le
demon l'ayant quitté il estoit allé droit à eux,
mais on ne luy voulut point dire ce qu'ils en
auoient expérimenté peur de l'espouuenter.

Nos Freres voyant cet enfant tousiours dans
les souffrances & que l'esprit malin ne desistoit
point de ses poursuites, se resolurent de le bap-
tizer le iour de la Pentecoste prochaine, & en
parlerent par plusieurs fois à son Pere, lequel
reconnoissant sa faute, dit qu'il estoit tres-mar-
ry de ce qui s'estoit passé, & que ç'auoit esté à la
persuasion de quelqu'vns de sa nation & de
plusieurs François, qui ne trouuoient pas bon
que son fils allast en France & fut baptizé, mais
qu'à present, il ne se soucioit pas de leur dis-
cours. & estoit tres content qu'on en fist vn

bon Chrestien & que luy mesme se trouueroit à Kebec au iour de son baptesme , pourueu qu'on luy die en quel iour de la Lune ce seroit, (car nos Montagnais de mesme que nos Hurons, content par Lune ce que nous contons par mois, & par nuits, ce que nous contons par iour) & que s'il pouuoit il y ameneroit plusieurs Algoumequins, ses parens & amis, avec toute sa famille pour en voir les ceremonies & magnificences.

Le Samedy de la Pentecoste estant arriué, le P. Ioseph accompagné du petit & de Pierre Anthoine, allerent aux cabanes des Sauvages, les prier pour la ceremonie du baptesme qui se deuoit faire en publique, après lequel il y auroit festin solemnel , pour tous ceux qui s'y trouueroient indifferemment, hommes, femmes & enfans, qu'estoit le moyé d'y auoir bonne compagnie, car où la chaudiere marche, ils sont assez diligens.

Le lendemain dès le matin, le P. Ioseph & le P. Lallemand allerent donner ordre pour la ceremonie du baptesme, lequel le sieur de Champlain Lieutenant pour Monsieur le Duc de Vâtadour dás le país, ne voulut permettre estre faict en publique, comme il auoit auparauant promis, par des raisons d'estat, disant qu'une autrefois si les Sauvages auoient entie de conspirer contre les François, ils n'auroient point meilleur occasion qu'à presenter vn enfant au baptesme, & pendant que nos gens seroient occupez à en voir les ceremonies, ils les pourroient tous tuer où emmener esclaves, comme s'il estoit tousiours necessaire

de faire ces ceremonies en publique, & par cette deffence il empêcha le contentement & l'edification qu'elles eussent pû donner à plus de deux cens Sauvages qui estoient là arriuez.

Le petit est
interrogé
puis bap-
tizé.

Le R. P. Lallemand celebra la sainte Messe & en suite la Predication à la priere du P. Ioseph, à la fin de laquelle on fist venir le petit habillé de blanc à la porte de l'Eglise, lequel, en la preséence de toute la compagnie, fut interrogé s'il vouloit pas estre baptizé, il respondit que ouy, & generallement à tout, suivant qu'il est porté dans le Rituel Romain; voyant sa perséuerance, l'on le fist entrer dans la Chappelle de la Court, (car il n'y a point d'autre Eglise) & là fut baptizé par le P. Ioseph le Caron, & nommé Louys par le sieur Champlain, qui le tint au nom du Roy, & la dame Hebert premiere habitante du Canada, pour Marceine, vne bonne partie des François en furent les temoins, avec la pluspart des parens du garçon, excepté de son pere, qui n'y pû assister pour quelques affaires particulieres qui luy estoient suruenüs. A la fin le Te Deum fut chanté en action de graces, & deux coups de canons tirés, & quelque mousquetades.

Exhortatiõ
du P. Ioseph.

Tout estant acheué, il fut question de donner ordre pour le festin des Canadiens, mais auparavant, le P. Ioseph assisté du P. Lallemand, du sieur de Champlain & de quelques autres François, leur voulant donner la refection spirituelle de l'ame, car s'estant transportez en vne grande place où tout le peuple estoit là assemblé, il leur fist vne exhortation, en langue

Canadienne, par laquelle il leur fist entendre ce qui estoit du S. Baptisme & de sa necessité, & la principale raison pour laquelle nous nous estions acheminez en leur país, qui estoit pour les instruire en nostre Religion, leur apprédre à seruir Dieu & gagner le Paradis. Plus il leur demanda s'ils en vouloiét pas estre instruits, & nous donner de leurs enfans, pour estre esleuez en nostre Conuent aux choses de la foy, côme des-ja on leur en auoit beaucoup de fois prié, & auoient tousiours differé d'en donner, & qu'il les prioit de luy dire à present leur volonté.

Puis s'adressant aux Capitaines, il leur dit: c'est principalement vous autres qui deuriez prendre soin de vous faire instruire & enseigner, afin que vos enfans & les autres Sauvages fissent de mesme & ensuiussent vostre exemple. Je vous supplie donc d'y auiser & me faire sçauoir vostre deliberation, car en vne affaire ou il va de vostre salut, il n'y faut point de remise. Les RR. PP. Iesuites sont icy venus nous seconder & traualier pour le mesme effect, ce qui vous doit grandement consoler, car avec l'instruction spirituelle, ils auront moyen de vous assister en vos necessitez corporelles, & esleuer de vos enfans dans leurs maisons lors qu'ils seront basties, ce que nous n'auons pû faire nous autres, à cause de nostre pauvreté, & que nous ne viuons que d'aumosnes qui nous sont escharsement données par les François; desquelles si nous vous faisons part ils ne sont pas contans, comme l'auez pû appercevoir, ny mesme des choses qui nous font besoin.

Il leur fist encor plusieurs autres discours, touchant la gloire des bien-heureux & les tourmens des damnez; & sur la fin il leur recita les Commandemens de Dieu qu'ils comprirēt fort bien, mais quand il vint au sixiesme commandement *Non mecaberis*, la plus-part se prirent à rire, disans que cela ne se pouoit observer; mais d'autres plus sages leur respondirent; les Peres l'observent bien, car ils n'ont point de femmes & n'en veulent point auoir, pourquoy non nous autres.

Discours
d'un Capitaine
Sauage.

A la fin du discours vn des Capitaines nommē Chiméouriniou, prist la parolle & dit: il est vray que nous n'auons point d'esprit, de voir que depuis douze Hyuers que tu és icy, & que tu nous as tant de fois parlé du chemin du Ciel & de te donner de nos enfans, pour estre nourris & instruits (ils mettent tousiours la nourriture auant l'instruction,) en ta Religion & en tes ceremonies, nous ne t'en auons encor point voulu donner que fort rarement, en partie à cause de ta pauureté, & auons negligé nostre instruction & le bien que tu nous procurois, ne pensans pas qu'il nous fust necessaire.

Tu monstre bien que tu nous ayme grandement, d'auoir quitté ton pais pour nous venir instruire & endurer tant de mal comme tu as faict pendant deux ou trois Hyuers, que tu as couru les bois avec nous pour apprendre nostre langue.

Sinous allons chez toy, tu nous faict part de tes biens, & nous donne à manger & à nos enfans, & pourquoy reterions nous ingrats & méco-

mécognoissans en ne receuans tes parolles, puis que tu és fort puissant & sçauant, & nous des bestes rampantes, ou comme petits enfans qui manquent de iugement : nous voicy treize Capitaines avec tout cét autre peuple qui nous est suiet & plein d'amitié pour toy, car tous te cognoissent pour bon & pacifique: Nous tiendrons demain conseil pour delibérer sur tes parolles, & puis nous te dirons nostre resolution & le desir que nous auons de te cõtenter & d'amender les fautes passées.

Après vn autre Capitaine nommé Mahican Atic, s'adressant à Pierre Anthoine Patetchounon, dit-il, il est vray que tu n'as point d'esprit de ne nous auoir point raconté ce que tu as appris en France, nous t'y auions enuoyé afin que tu y remarquasse les choses bonnes pour nous les faire sçauoir, & neantmoins voila plus d'un hyuer passé que tu en és de retour, & ne nous as encore rien dit; ie ne sçay si c'est faute d'esprit, ou faute de hardiesse, ou que tu te mocque de ce qui est en France, car quand tu nous en parle, qui est fort peu souuent, tu ne fais que rire, & fais tousiours l'enfant, il faut que tu sois homme, & dise hardiment & sagement les choses que tu as veuës & apprises, afin que nous en tirions du profit.

Lors le Pere Ioseph prenant la parole pour Pierre Anthoine, respondit au Sauvage, il est bien vray que Patetchounon, est vn peu honteux de vous parler de ce qu'il a veu & appris en France, car quãd il vous en parle il se plaint

Ce qu'on
apprend en
France.

que vous vous en mocquez, disans, que les François luy auoient appris à mentir; c'est pour quoy il ne vous ozeroit plus rien dire. Premièrement il y a appris à parler François, à prier Dieu, lire & escrire, & beaucoup d'autres choses necessaires que vous autres ne sçavez pas, & que si vous voulez nous apprendrons à vos enfans & à vous mesmes si vous voulez, vous en donner la peine.

Cela finy, vn chacun se leua pour aller au festin. Les RR. PP. Iesuites, nos Religieux & quelques Capitaines Sauvages, avec Pierre Anthoine & le nouueau baptizé, avec les principaux parens, allerent dîner à l'habitation avec le sieur Champlain, & Estrouachit Capitaine Montagnais, alla chez la Dame Hebert, où se preparoit le grand festin des Canadiens pour leur distribuer la viande, car entr'eux chacun se contente de ce qu'on luy donne, & personne ne prend luy mesme au plat, dont reussit vn grand silence, douceur & paix en tous leurs repas.

Viandes
du festin.

Les viandes qui furent employées à ce solennel festin, furent en tres-grande quantité, car il y auoit premierement 56. outardes ou oyes sauvages, 30. canards, 20. farcelles, & quantité d'autres gibiers, que Pierre Anthoine Patetchou-non, & le petit Neogauachit destiné au baptême, & quelque François que le sieur de Champlain auoit presté, tuerēt au Cap de Tourmente pédant trois iours qu'ils y giboyerent. Le sieur Destouche Parisien y contribua deux Gruës, qu'il auoit tiré près de nostre Cōuent & deux corbillons de poix. Plusieurs autres François y

furent aussi leur presens, & Messieurs de la Trai-
cte principalement, desquels on eut deux barils
de poix, vn baril de galettes, 15. ou 20. liures de
pruneaux, six corbillons de bled d'Inde, & quel-
que autre petite commodité, qui furent mises
avec tout le reste des viandes, bled, pain, poix
& pruneaux dans la grande chaudiere à brasse-
rie de la dame Hebert.

Les Officiers qui eurent soin de disposer ce
banquet solennel, furent Guillaume Coillard,
gendre de la dame Hebert, Pierre Magnan, qui
a esté depuis mangé par les Hiroquois, comme
ie diray cy-aprés. Vn nommé Matthieu celuy
qui auoit hyuerné avec nous aux Hurons, &
Jean Manet truchement des Skécanetonis.
Lesquels après auoir faict bien bouillir le tout
ensemble, peste mesle, dans cette grande chau-
diere, ils se sernirent des grands rateaux du jar-
din en guise de fourchettes, pour en tirer la
viande, & d'un sceau attaché au bout d'une per-
che, pour en puiser le bouillon, qui fut distri-
bué & partagé avec la viande par ledit Capi-
taine Esrouachit, à toute la compagnie com-
mençant, par luy le premier. Et après qu'ils fu-
rent tous bien rassassiez, ils dancierent à leur
mode, puis emporterent le reste des viandes
dans leurs cabanes, disans qu'ils voudroient
qu'il y eut tous les iours baptême pour y faire
tous les iours bonne chere.

Officiers
du festin.

*Histoire d'un Algoumequin baptizé, sur-
nommé par les François Trigatin, &
de sa ferveur.*

CHAPITRE XXXV.

IE vous ay rapporté au Chapitre precedent, la harangue, que le deffunét P. Ioseph fist aux Sauvages sur le suiet du baptesme du petit Neogauachit, vous verrez à la suite de ce discours que plusieurs la receurent, comme des fruiets du Paradis, & d'autres comme chose indifferente. Car comme il est dit dans l'Enangile, vne partie de la semence tomba sur la bonne terre, & l'autre partie sur la pierre dure.

Les barbares ayans ruminé le discours de ce bon Pere, teindrent conseil par entr'eux & resolurent de se faire instruire & de donner de leurs enfans pour estre enseignez en la voye du Ciel, comme il leur auoit esté dit. Ils deputerent deux Capitaines pour luy en donner aduis, sçauoir Chimeouriniou & Escouachit, lesquels le prierent de se transporter avec eux à Kebec, où le sieur de Champlain & le Sauvage Mathicanatic, l'attendoient à ce suiet pour aduiser des moyens.

Le Pere Ioseph ne perdit point de temps & ayant prié le P. Charles Lallemant Supérieur des RR. PP. Iesuites, (pour lors encores logez

avec nous dans nostre Conuent) d'y assister, s'en allerent de compagnie avec les deux Sauvages à Kebec, où le P. Ioseph leur reiterra les mesmes exhortations qu'il leur auoit faictes au temps du festin, & de plus leur remonstra la necessité qu'il auoit de sçauoir parfaictement leur langue auant que de leur pouuoir entierement expliquer les mysteres de nostre foy, & que cela ne se pouuoit faire eux estans tousiours errans & vagabons par les bois & les montagnes, qu'avec des longueurs & pertes de temps infinis; & que tout le remede qu'on pouuoit apporter en cela estoit de suivre nostre premier dessein, qui estoit de choisir vne place, cultiuer les terres & se rendre sedentaires. & que par ce moyen on apprendroit facilement leur langue, on les instruiroit en la foy & se formeroient au gouuernement des François.

Le Pere ayant finy son discours: le Capitaine Harangue Montagnais prit la parole & fist vne harangue, d'un Sauuag.
accompagnée de son eloquence ordinaire, dont 8^e.
en voicy la teneur, que i'ay bien voulu vous coucher icy, non pour la rareté de son stile, mais pour la substance que son discours contient, enfermée dans la simplicité que ie confesse estre sincere, comme celle de nos meilleurs Catholiques. Vous qui estes icy assemblez, escoutez, considerez & prestez l'oreille à ce que ie vay vous dire, afin que vous en puissiez faire fruit. Il est vray que nous n'auons point d'esprit nous autres barbares, nous le cognoissons bien à present au lieu que du passé nous nous croyons sages, mais aussi faut il aduoüer que vous en auez

bien peu (vous Pere Ioseph,) en cette demande que vous nous faictes, de cultiuer les terres & nous habiter aupres de vous avec toutes nos familles comme nous en auons eu autrefois le dessein par tès remonstrances desquelles depuis long-temps, tu n'a plus ozé dire mot, ou pour y estre contrarié par les François, ou pour considerer toy mesme que nous n'auons point de quoy viure, ny toy moyen de nous en donner pendant que nous abatterions les arbres & defricherions les terres. Mais si les François auoient du courage assez, de nous en prester pendant vn an ou deux, qu'il nous faudroit pour disposer ces terres, nous nous y employerions de bonne volonté avec toutes nos familles, qui ne demanderoient pas mieux, & y ayant de quoy les nourrir, nous irions à la chasse, & rendrions aux François leurs viures en des pelleteries & fourures plus qu'ils ne nous auoient presté, autrement nous ne pouuons pas nous arrester en vn lieu sans mourir de faim; voyez donc si vous pouuez nous assister, & selon vos offres, nous tascherons de satisfaire à vos desirs.

Ceux à qui la chose touchoit de plus près ne firent point d'autre responce, sinon, qu'il n'y auoit point de prouision à Kebec, & qu'on doutoit encore que les Nauires arriuaissent si tost, & partant qu'on ne pouuoit leur en prester pour ce coup, puis que les François estoient eux mesmes en necessité; ce qu'entendant les pauvres Sauvages pleins de bonne volonté, ils

offrirent notwithstanding de leurs enfans pour estre instruits avec les François, mais à raison qu'il y auoit peu de viures au magazin, comme ie viens de dire, on différa d'en vouloir prendre iusqu'a l'arriué des Nauires.

Les RR. PP. Iesuites receurent neantmoins vn petit garçon nepueu de Escouachit, mais soit qu'il s'ennuiat seul, ou qu'ils n'eussent pas moyen de l'entretenir, il ne leur demeura guere, car la perte de leur vaisseau & du R. P. Noiro, les auoit mis à l'estroit & priué de beaucoup de commoditez, qui leur eussent pû seruir en cette belle occasion.

Voicy encor vn autre fruit du baptême du petit Néogauachit & de l'exhortation du Pere Ioseph le Carô, enuers vn Algoûmequin nommé Napagabiscou, & par les François Trigatin, lequel à quelque iours de là estant tombé malade, eut si peur de mourir sans estre baptisé, qu'il demanda maintefois & avec tres-grande instance, si que se voyant pressé du mal, il disoit que s'il n'estoit baptisé, qu'il en imputeroit la faute deuant Dieu à quiconque luy refuseroit, promettant d'ailleurs que si Dieu luy rendoit la santé, il se feroit instruire aussi tost après son baptême & viuroit à l'aduenir en bon Chretien.

Tellement qu'un Sauuagé nommé Choumin vint aduertir le F. Germais qui estoit encor pour lors au Cap de Victoire de se transporter promptement aupres du malade qui le demandoit à toute instance, mais à peine ledit F. eut il moyen de luy rendre réponse & s'informer de sa si

foudaine maladie qu'un autre messager arriva en grand haste (lequel depuis a esté baptisé par les PP. Iesuites) pour le faire diligenter, luy disant viens viste frere Geruais pour baptizer Napagabiscou, qui t'en prie, car il s'en va mourir: Alors le bon frere luy dit, ie veux bien l'aller secourir & faire mon possible pour le rendre capable du Ciel, mais comment veux-tu que ie me transporte là, ie ne peux passer la riuere à nage, & n'ay ny canot ny chaloupe pour me conduire. Le Sauuage respondit, c'est à tort que Choumin a laissé retourner son canot, mais met toy librement sur mes espauls, & ie te passeray à la nage, car autrement tu tarderas trop icy.

Considerés vn peu, ô Chrestiens l'affection que ce bon Sauuage auoit pour le salut de son frere prochain, luy qui n'en auoit pas encore pour luy mesme, pour n'estre pas encore assez illuminé. Il court, il sollicite, il prend soin de son ame, & passe la riuere à nage pour demander le secours du frere Geruais, & la repasse derechef pour luy mener vne chaloupe puis qu'il ne s'estoit voulu mettre sur les espauls, où il n'eust pas esté trop asseuré, comme en effect quelle apparence à nous autres Religieux couuerts de gros habits qui boient l'eau comme l'esponge, se mettre sur les espauls d'un barbare pour passer vn si grand fleuve le sujet en estoit bon, mais le hazard fort grand.

Après que ce bon Religieux fut muni d'une Chaloupe, il pria le Truchement Marsolet

de le vouloir accompagner comme il promit de tres-bonne volonté, mais comme ils penserent iouïr de l'aïron, il suruint des flots & des coups de vents si puissans, avec la pluye qui estoit fort violente, qu'on fut contraint de rentrer dans vne barque, & attendre là vn autre temps plus beau, car les Matelots refuserent de passer outre.

Comme ils estoient là attendans la fin des pluies, ils apperceurent deux Sauuages dans le fleuve à nage, qui allerent premierement à la barque d'où estoit party le Frere Geruais qu'ils cherchoient, puis vindrent à celle où il estoit, auquel ils firent leur legation, & le sollicitèrent de partir promptement, pour ce que le pauvre malade l'attendoit avec impatience, & vne apprehension grande de mourir sans estre baptisé.

Estans arriuez avec quatre ou cinq François qui les accompagnerent, ils trouuerent ce pauvre homme dans vne conuulsion, & vne grosse fièvre qui le mettoient dans vn doute qu'il en pût reschaper, car n'y ayant là ny Medecin, ny remede, on ne sçauoit que luy faire sinon de l'observer, & voir quand il expireroit. O bon Iesus, ou sommes nous qui nous delicatons tant pour peu de mal, à la moindre indisposition, les Medecins sont à nos cheuets, & les remedes sont à foison distribuez à nos maux pour nous sauuer la vie du corps pendant que nous perdons souuent celle de l'ame, Seigneur, qui doit estre pour vostre Paradis.

Ce pauvre Sauvage est au destroit, ce pauvre homme est agonizant, les douleurs de la mort l'assailent de tout costez, crie-il au Medecin sauue-moy la vie, non : mais reuenu de sa conuulsion il n'a recours qu'à ceux qui luy peuuent faire part dans l'héritage de Dieu, puis se tournant du costé du frere il luy dit avec vn accent plein de deuotion. Mon Frere, il y a long-temps que ie t'attendois pour estre fait enfant de Dieu, ie te prie baptiser celuy qui preferant les intereſts du Ciel, à ceux de la terre, ne veut que ce que ton Dieu veut, qui est la grace de le louer à iamais.

Le bon Frere luy demanda s'il y auoit long-temps qu'il auoit ce desir, il respondit qu'il y auoit plus de trois Hyuers qu'il en auoit fait la demande au Pere Ioseph & qu'asseurement il auoit compris que sans le baptisme on n'alloit point en Paradis. Et le bon Religieux continuant ses interrogations, luy demanda par les Truchement Oliuier, & Marfolet (car il entendoit fort peu l'Algonmequin) s'il cognoissoit nostre Dieu duquel il parloit, on y dit il aux effets de sa toute puissance & bonté, laquelle nous expérimentôs, & voyons tous les iours deuant nos yeux, & quand bien nous ne le cognoistrions qu'en cet vniuers, le Ciel, la terre, & la mer qu'il a créeë, & tout ce qu'ils contiennent pour nostre seruice, comme nous pour sa gloire ainsi que nous a eu dit le P. Ioseph, cela suffiroit pour le confesser ce qu'il est, tout puissant &

Dieu par dessus toutes choses, qui a enuoyé son fils vnique en ce monde, mourir pour le rachat des humains.

Puis poursuivant son discours il dit. Je ne puis pas souuenir, malade comme ie suis, de toutes les Instructions que le P. Ioseph, m'a eu donnée, mais ie croy entierement tout ce qu'il croit, & que tu crois aussi, & veux viure & mourir dans vostre creance, car ceux qui ne sont pas des vostres, ne peuuent iouyr de la vie eternelle, cōme vous, ils vont dans vn feu sous la terre avec les Manitous, c'est ce que i'ay retenu de plus particulier de vos instructions & enseignemēs, tu me feras resouuenir du reste qui m'est necessaire à vn autre temps, mais auparauant baptise moy mon Frere, car ie seray tousiours en peine, & en doute de mon salut que cela ne soit accōply.

Le Religieux le voyant dans vne si bonne resolution & ferme propos du S. Baptesme, luy dit qu'il en estoit fort edifié, mais qu'il falloit de plus estre marry des offences qu'il auoit commises contre Dieu, avec vne ferme resolution de n'y plus recidiuer, & d'abandonner pour vn iamaïs toutes leur vaines superstitions, & de se faire plus amplement instruire s'il reuenoit en cōualescence; ce qu'il promit & tesmoigna avec des paroles, & des soupirs qui ne pouuoient proceder que d'un cœur vrayemēt touché de Dieu, & confus de sa cōfusion mesme. Quy, dit-il, ie suis grandemēt fāsché de tout le mal que i'ay fait en ma vie, & d'auoir fait le Manitou en tant d'oc-

cations; Tien voyla mon sac qui est là attaché à cette perche, prend-le & tout ce qui est dedans, & le brusle, ou le iette dans la rivière, fais en fin tout ce que tu voudras car dès à present ie te promets que ie ne m'en serviray iamais, baptise moy donc.

Il y auoit là plusieurs François, tant Catholiques que Huguenots, lesquels dirent tous que veritablement il le falloit baptiser, & qu'il y auroit conscience de le laisser mourir sans luy donner contentement, puis qu'il auoit rendu de si grands tesmoignages de son bon desir: Mecabau beaupere du malade le desiroit aussi, ayant desia à cet effet fait assembler plusieurs Sauvages pour le baptisme de son gendre qu'il croyoit luy deuoir estre conferé apres de si grandes prieres, surquoy print suiet nostre Religieux de faire vne harangue à toute l'assemblée des merueilles & misericordes de nostre Dieu enuers ce pauvre alité, puis luy dit à luy mesme.

Mon frere, tu ne peux ignorer la mauuaise volonté que plusieurs Sauvages ont eu contre nous depuis la mort de la petite fille de Kabemiltic, disant qu'elle estoit morte pour auoir esté baptisée, & receu vn peu d'eau sur la teste, & leur cholere est arriuéee iusques aux menaces de nous vouloir tous tuer, & partant ie veux bien t'aduertir, & tous ceux qui sont icy presens, que ce n'est pas le saint Baptisme qui fait mourir ceux qui le reçoient, mais au contraire il donne souuent la santé du corps, avec la vie de l'esprit, Donc

que ceux de ta Nation ne dient point que l'eau du Baptisme t'aura fait mourir si Dieu l'appelle de ce monde apres iceluy, mais que tu a esté pour te deliurer des miseres que tu souffre, & te rendre bienheureux en Paradis, à quoy respondit le malade, qu'il le croyoit ainsi, & que ceux qui croioient le contraire ne seroient pas sages.

Lors son beaupere ayant ouy ses plaintes, & sçeu le mauuais dessein de quelques Sauvages, se leua en sursaut & dit : Je ne sçay comme il se peut trouuer des personnes de si petit esprit, que de croire qu'un peu d'eau soit capable de nous faire mourir; Ne sçait on pas bien qu'il faut que tous les hommes meurent, baptisez & non baptisez, & que nous ne sommes icy que pour vn temps. Ce sont des meschans, qui attribuent de si mauuais effets au baptisme que ces Religieux nous conferent pour nostre salut.

Ha, dit-il en cholere, si ie rencontre iamais de ses malins, ie les feray tous mourir, & ne supporteray iamais qu'aucun tort soit fait à ces Peres, encores que mon gendre vienne à mourir, puis se pourmenant à grand pas l'un bout à l'autre de la cabane, avec vne hache en la main, disoit d'une voix forte. Vous autres de ma Nation, & vous mes amis, parlant aux Algoumequins (car il estoit Monagnais) Je vous dis que ie veux que mon gendre soit baptisé, puis qu'il le veut estre, & qu'il en a le dessein depuis vn si long temps; faut il vouloir du mal à ceux qui nous veu-

lent du bien, rendre des déplaisirs pour d
bienfaits, vous avez trop d'esprit pour
vouloir faire, mais ie vous assure que
couperay la teste à tous ceux qui y contred
ront, & puis ie la porteray aux François, po
preuve que ie suis leur amy.

Si son discours fut fort long il n'en fut p
moins animé, car il ne parloit que de tuer
& sembloit qu'il deust assommer tous ceu
de la cabane, tant il se demenoit avec sa ha
che, non qu'il eut l'esprit troublé & offu
qué de colere, car c'est chose qui leur arriu
rarement, obseruans l'escriture, qui di
fasché vous & ne m'offencé point. Ma
pour faire voir son zele à l'endroit de non
autres qui cherchions leur salut, & qu'assu
rement il ne vouloit pas qu'on contredie
vne chose si sainte.

Sa ferveur estant vn peu appaisée, il s'assi
à terre entre le Frere Geruais, & le malade
puis d'une voix douce & pacifique, com
mença à parler à toute l'assemblée en ces ter
mes. Mes amis; Nous sommes icy assemblez
pour vne chose de grande importace, qui est
le salut de mon gendre, il est malade comme
vous voyez, sans esperance qu'il en releue, &
pour ce faut traualier pour le repos de son
ame, par le moyen du baptesme qu'on es
prest de luy donner, s'y vous estes bien ayse de
cecy, vous serez cause que ie viuray & mour
ray content, & par ainsi vivant & mort ie se
ray bienheureux, que si vous nous voulez
ensuiure, vous redoubleriez nostre ioye, & à

la fin vous viendrez en Paradis avec nous ,
où nous deuons tous aspirer.

Lors plusieurs Sauvages dirent qu'ils estoient bien contens des resolutions de son gendre, & seroient fort ayſes d'en voir les ceremonies, nonobſtant tous les diſcours qu'o auoit tenu que cela faisoit mourir les hommes, à quoy adiouſta vn certain Canadien fort plaisamment, que tels hommes estoient de bié peu d'eſprit, de croire qu'un peu d'eau que l'on iette ſur la teſte d'une perſonne qu'o baptiſe ſoit capable de le faire mourir, veu que depuis que nous ſommes icy (dit-il) en voyla deſia plus de quatre ſceaux quel'on a ietté ſur la teſte & par tout le corps de ceſt autre pauvre malade, & il n'en eſt pas mort, donc vn peu ne fera pas grand mal à ce gendre qu'on le baptiſe le vous laiſſe à penſer ſi cela ne donna pas à rire à tous les François qui ſe trouuerent là preſent, & s'ils ne ſe mocquerent pas plaisamment de ceux qui arguoient que l'eau du baptiſme faisoit mourir, n'vſans eux-mêmes d'autres rafraichifſemens plus ſalutaire pour adoucir les ardeurs de la fièvre, que de ietter quantité d'eau fraiſche ſur le corps de ceux qui en ſont trauaillezz, & puis direz qu'ils ſont bons Medecins, & fournis de bonnes drogues.

En ces entrefaites il ſuruint vne grande conuulſion à noſtre Catecumene, qui le rendit froid comme vne glace, & ſans aucun ſentiment, car ayant eſtendu ſes pieds ſur les charbons ardans, il n'en ſentit rien du tout

qu'après estre reuenu de sa pamoison. Le Religieux le voyant en cet estat creut qu'estoit trespasé, & blasma sa negligence de l'auoir pas assez tost baptisé, mais comme l'on eut bien remué ce corps, il reuint à soy & dit *Iesus Maria*, en ioignant les mains au Ciel, selon qu'il auoit appris en nostre Conuent de le faire de fois à autre, dequoy toute l'assistance loua Dieu, & se resiouit, puis regardant le bon Frere ayant tousiours les mains iointes il luy dit.

Frere Geruais ie m'en vay mourir comme tu vois, ie te prie donc de me baptiser presentement, car si ie meurt sans l'estre, tu respondras de mon ame deuant Dieu, il n'y aura point de ma faute, elle sera toute tienne quel tesmoignage veux tu dauantage de moy que de croire tout ce que tu crois, & te promets que si ie retourne en conualescence, que i'yray demeurer proche de toy pour me faire plus amplement instruire; alors tous les François dirent tous d'une commune voix qu'il le falloir baptiser, sans en remettre l'action au Pere Ioseph, que le Frere attendoit, peur d'un accident de mort inopiné. A quoy obtemperant le Religieux, il pria les deux Truchemens d'expliquer encore vne fois les principaux misteres de nostre foy en langue Algomequine.

Cela estant fait, tous se mirent de genoüils & dirent le *Veni Creator*, & le *Salue Regina*, & le *Salue sante Pater*, à la fin desquels, le Frere luy demanda derechef s'il croyoit

croyoit tout ce que luy, & nos autres Freres luy auoient enseigné, & ayant dit que ouy, il rentra dans vne grande conuulsion, pendant laquelle il fut baptisé, & peu apres estimé pour mort, par l'espace de demie heure, apres laquelle il assura luy-mesme estre baptisé, ayant ouy les paroles, & senty l'eau tomber sur sa teste, & que du depuis il n'auoit rien entendu ny senty, de tout ce qu'on luy auoit fait, & qu'au reste il estoit à present tout prest de mourir s'il plaisoit à Dieu luy en faire la grace, pour aller bien tost avec luy.

On chanta le Te Deum laudamus, en action de graces, on regala le nouveau Chrestien le mieux que l'on peut, & chacun luy fit offre de son seruice, avec assurance d'une amitié eternelle, dequoy il sentit vne grande allegresse en son ame, & les remercia.

Son beaupere qui estoit là present s'adressant alors au Religieux, il luy dit en sa methode simple & ordinaire, mais energique, Mon frere, tous mes parens & amys qui sont icy presens, & moy, sommes bien ayfés que tu aye baptisé mon gendre, & fait enfant de Dieu comme toy, ce qu'estant il n'est plus à nous, il est à toy, c'est pourquoy fais en tout ce que tu voudras, gouuerne le en sa maladie à la façon de vous autres, seigne le, coupe, tranche, il est à toy, & ne veux plus qu'aucun de nos Manitou siou le chantent. Puis s'adressant aux Sauvages, il leur dit : S'il

meurt il ne faut pas que vous en parliez finistrement, & iugiez mal du Baptisme, comme quelqu'vns ont faits. Je porteray son corps en la maison du Pere Ioseph, afin de l'y enterrer aupres du sieur Hebert, à quoy s'accorda sa femme, qui iusques alors auoit gardé le silence, contente en son ame du bonheur de son mary.

Le Frere Gervais promit de l'assister & servir le iour & la nuit au mieux qu'il luy seroit possible, puis prenant son sac avec tous les instrumens dont il se seruoit en son office de Medecin, en ietta la pierre (dont j'ay parlé au Chapitre des malades) dans la riuiere & les petits bastons dans le feu, pour leur oster le moyen de s'en pouuoir plus seruir.

Le sieur de Caen lors chef de la traite, ayant sçeu ce bon œuvre, se transporta aupres du malade auquel il tesmoigna l'ayse & le contentement qu'il auoit de son Baptisme, & luy fit offre de tout ce qui estoit à son pouuoir, luy recommandât d'vser librement avec luy comme avec son frere de tous ses viures pour sa personne en particulier, qu'il ne vouloit pas luy estre esparigné. puis tirant vne croix d'or de son col, il la luy mist au sien, disant: Tien voyla vne croix precieuse, laquelle ie te preste, & veux que tu la porte iulques à entiere guerison, que tu me la rendras, fais en vn grand estat, car il y a dedans du bois de la raye Croix, sur laquelle est mort le Sauueur de nos ames. Tous les Chrestiens l'adorent & venerent comme gages de

leur Redemption, car par le moyen d'icelle le Ciel nous a esté ouuert, & auons esté faits coheritiers de Iesus-Christ, nostre Dieu, nostre Pere, & nostre Tout: se disant, il la baisa reueremment, la fit baiser au malade, & la mit à son col, luy recommandant d'auoir esperance & confiance, en Dieu; puis partit pour son bord, laissant ce pauvre nouveau Chrestien en paix, & plein d'affection enuers cette Croix, qu'il baisoit incessammét, disant Iesus chouerimit, ego ké saguitan, qui signifie: Iesus aye pitié de moy & ie t'aymeray. Voyla ce que vaut vn bon Chef d'as vn pays, & que pleust à Dieu que tous ceux qui ont esté auant, & apres luy, eussent esté de mesme luy, porté pour le salut des Sauuages, ie m'assure que cela eut grandement profité & aduancé leur conuersion.

La charge du malade ayant esté donnée à nostre Frere Geruais, par son beau pere. Il luy fit prendre pour premier appareil vn peu de theriaque de Venise avec vn peu de vin, qui luy fit ietter quantité d'eau, qui le soulagerent grandement, & en suite les autres medicamens necessaires, iusques à entiere guarison, apres laquelle il rendit la Croix d'or au sieur de Caen, avec les remerciemens & complimens, que son honnesteté luy pû suggerer. Il le remercia aussi des viandes de sa table, desquelles il luy auoit fait part tous les iours de sa maladie, puis ayant mis vne Croix de bois à son col, à la place de celle d'or, il s'en retourna à sa cabane

tres-content, & plein de bonne volonté pour ses bienfaiteurs, & deuot enuers Dieu.

Pendant la maladie de ce bon homme, sa femme accoucha d'une fille qu'elle presenta à son mary, à laquelle le Fr. Geruais demanda si elle vouloit qu'on la baptisast, elle respondit simplement que ouy, comme fit semblablement son mary, & que la femme le fut aussi, dont le Frere fut fort satisfait.

Je vous ay tantost dit comme ce nouveau Chrestien auoit promis de se venir faire plus amplement instruire, apres qu'il seroit guerry, à quoy il ne manqua point, car l'Automne venu, il se vint cabaner proche de nous, où il passa tout l'Hyuer & les deux autres suivans, pendans lesquels il estoit la plus part du temps avec nos Religieux, desquels il apprint tout ce qui est necessaire à salut, & ne voulut iamais plus chanter les malades, ny parler au diable, comme il souloit avant son baptesme, car en estant fort prié par ceux de sa Nation, il leur respondit qu'il auoit renoncé à tout cela, & qu'il vouloit faire tout ce qu'il auoit promis aux *Ca Iscouenacopet*, signifiant par ces mots, ceux qui sont habillez comme les femmes, c'est à dire les Recollects qui portent leurs habits longs.

Vn iour vn Sauvage reprochant à nos Peres que nous ne deuions pas empescher Napagabiscou, nostre nouveau Chrestien de chäter les malades, & que cela leur faisoit vn gråd tort à cause de son experience: On luy dit qu'estât à present Chrestien il ne le deuoit plus faire

ny aucune de leurs superstitions, ce qui facha fort ce barbare qui ne laissa pas d'aller trouuer Napagabiscou, & luy dire que nos Religieux luy permettoient d'y aller, ce qu'il ne creut pas, & dit qu'il en auoit menty (c'est vne façon de parler assez commune entre les Sauvages) & que nous ne luy auions pas dit cela, & qu'il n'iroit pas: le suis homme, dit-il, & non point enfant, j'ay promis de ne plus faire le Manitou, & ie ne le feray plus, aussi quand bien ma femme m'en deust prier pour elle mesme.

Entre les instructions de nos freres on luy enioignit d'aller toutes les Festes & Dimanches à la sainte Messe, & pource qu'ils n'ont aucun Dimanche, on lui faisoit remarquer le septiesme iour, ce qu'il fit deslors assez exactement, mais pour les iours de festes on l'en aduertissoit particulièrement. Vn iour qu'il auoit manqué de s'y trouuer le R. P. Malsé le suite le rencontrant, luy dit, tu n'as point au iourd'hui assisté à la sainte Messe, cela n'est pas bien, l'autre lui repartit, je ne scauois pas qu'il y fallust assister au iourd'hui, mais afin que ien'y manque plus, ie vai me cabanner en lieu plus commode, & quand tu iras dire la sainte Messe, tu m'appelleras en passant, & ie te suiurai pour ny manquer plus.

Il y en a qui ont voulu dire que ce pauvre baptizé est retourné demeurer parmy ses parens, sans considerer que n'ayant de quoy viure il a bien fallu qu'il en cherchast où il pouuoit aussi bien que les François dans la

nécessité, puis que nous n'auons pas le moyen de le nourrir, ny les François la deuotion de l'entretenir, mais il ne se trouuera point que depuis son baptisme il aye faict le Manitouliou, ny vsé de ses anciennes superstitions, auxquelles ils sont attachez de pere en fils, qui est beaucoup, & partant ie dis que n'y ayant point de sa faute, Dieu luy pardonnera beaucoup de choses qu'il n'excuseroit point en nous pour auoir toute occasion de bien faire, & moyen de viure en vray Chrestien, ou les Sauuages errants soni priuez de nos aydes.

*D'une petite fille Canadienne baptisée.
De sa mort, & de celle du sieur Hebert
premier habitans du Canada.*

[CHAPITRE XXXVI.

AV commencement de l'Hyuer en l'an mil six cens vingt six. Vn Sauuage nommé Kakemistic, lequel auoit accoustumé de passer vne bonne partie des Hyuers proche de Kebec, tant pour en receuoir quelque alliment, s'il tomboit en nécessité, que pour faire part aux François de quelque morceau de viande de sa chasse, s'ils luy faisoient d'ailleurs cour-

roisne, prist resolution d'aller Hyuerner assez loin des François, mais comme il pleust à Dieu de disposer des choses, il ne fut pas loin qu'il fut contraint de retourner sur ses pas, d'où il estoit venu pour le peu de neige qu'il trouua par tout au mois de Decembre, laquelle à peine pouuoit estre d'un pied de hauteur au plus, qui estoit trop peu pour arrester l'essan, & puis sa femme estoit fort enceinte, & prest d'accoucher.

Kakemistic avec toute sa famille, composée de huit personnes, prirent donc resolution de retourner vers les François, & passans par nostre petit Couuent, ils y sejournerent deux iours, pendant lesquels nos Freres leur donnerent à manger de ce qu'ils auoient, car ces pauvres Sauvages n'auoient pour toute provision qu'un peu d'anguilles boucannées du reste de leur pesche.

Au bout des deux iours ils trousserent bagage pour aller cabanner proche du fort, afin de pouuoir receuoir quelque soulagement des François de l'habitation, mais auparauant partir il pria le Pere Ioseph de luy vouloir donner vne paire de raquette qui luy faisoient besoin, & quelque peu de viures pour ayder à nourrir sa famille, pendant qu'il iroit faire un voyage en son pays vers la riuere du Saguenay au Nort Nordest de Kebec. Ce bon

Pere Joseph tout brulant de charité luy accorda facilement tout ce qu'il desiroit nonobstant la pauvrete du Couuent, & luy donna deux paires de raquettes, vn sac de pois, & vn sac de grosses febues, avec quelques autres petites choses propres à son voyage, car en verité sans exagerer la vertu de ce bon Pere, il estoit tellement porté de leur bien faire (& à tous les Sauvages generalement) qu'il se prinoit souuent & luy & ses Freres, de ce qui leur faisoit besoin pour les accommoder, dequoy il estoit aucunes fois blâmé, par ceux qui ne pouuoient approuver ses liberalitez, & cet excz de charité enuers des personnes qui n'estoient pas encores Chrestiens n'y en termes de l'estre.

Le bon Sauvage se voyant si estroitement obligé, fit plusieurs complimens à sa mode, & des remerciemens qui tesmoignoient assez le ressentiment de tant de bienfaits, & entre autre chose, il dit au Pere Joseph. Le voy bien que tu as vn bon cœur, & que tu m'aime bien & toute ma famille semblablement, c'est pourquoy ie te la recommande, de rechef, & te prie de ne permettre qu'elle aye aucune necessité. Si ma femme accouche pendant que ie seray absent, ne laisse point mourir l'enfant sans estre baptisé, puis que tu dis qu'il le faut estre pour aller au Ciel, elle en sera bien aise, & moy aussi, car luy en ayant par-

lé elle me l'a tesmoigné ; Et après plusieurs autres discours l'on luy promist d'en auoir le soin, & puis partit pour son voyage du Saguenay après auoir cabané sa famille proche le fort des François.

Il ne se passa pas vn long-temps après son depart, que sa femme se trouuant mal, elle en fist aduertir le P. Ioseph & le prier de luy enuoyer quelque peu de viures pour faire ses couches, car ceux de sa nation ne la pouuoient ayder ny secourir de quelque chose que ce soit.

Le pauvre Pere ayant receu cet aduertissement, luy en enuoya autant qu'il pût par Pierre Anthoine & le petit Neogauachit, avec commandement de le venir aduertir dès l'instant qu'ils scauroient la fin de sa couche, pour aller baptizer l'enfant, à quoy obtemperant ils ne manquerent point, car encore bien qu'elle en fist quelque difficulté au commencement, elle y consentit à la fin & les pria d'aller querir le Pere Ioseph, pour baptizer la petite fille qu'elle venoit de mettre au monde, assez foible & fluette, ce que scachant il y accourut promptement pensant la baptizer, mais l'ayât trouué assez forte en differa le baptesme avec consentement de la mere, iusques à l'arriuée du Pere Charles Lallemant qu'il fut querir en nostre Conuent, luy referant ceste honneur, en recognoissance de la peine qu'ils auoient prise de nous venir seconder à rendre les Sauuages enfans de Dieu. Ce que le R. P. Lallemant luy accorda & retournerent de compa-

gnie à la cabane de l'accouchée, où ils trouverent le mary arriué de son voyage qu'il n'auoit pû accomplir comme il pretendoit, pour la rencôtre de deux ours que son chien auoit esuenté dans le creux d'un arbre, lesquels il tua, & en apporta de la viande, puis renuoya querir le reste le lendemain matin par ses domestiques.

Ce pauvre Sauvage se monstra tres content de voir sa femme heureusement accouchée & en bonne santé, marry seulement de voir son enfant malade & en danger de mort. Ils eurent ensemble quelque discours, & auoir s'ils le feroient baptizer ou non, il disoit pour lui qu'il en auoit prié le P. Ioseph, & sa femme plus attachée à ses superstitions, vacillant tousiours, n'aduouoit point qu'elle y eust consenty, & talschoit de l'en diuertir, disans pour ses raisons que cette eau du Baptisme feroit mourir son enfant, comme elle auoit fait plusieurs autres. En ces entrefaites arriuerent les PP. Ioseph le Caron & Lalleman, lesquels cognoissans ce petit différent suruenu entre le mary & la femme touchant le Baptisme de leur petite fille, les eurent bien tost vaincus de raisons, & faicts consentir derechef qu'elle seroit baptizée, ce qui fut fait par le R. P. Lalleman, à la priere du P. Ioseph. L'on ne luy imposa point de nom pour estre proche de sa fin, car elle mourut le soir mesme de sa naissance, non en Payenne, mais en Chrestienne, qui luy dône le iuste titre d'enfant de Dieu, & coheritiere de sa gloire. Le pere & la mere furent fort affligez de

la mort de ceste fille plus qu'ils n'eussent esté de celle d'un garçon, entant comme j'ay dit ailleurs, qu'elles ne sortent point de la maison du pere, & que si elles se marient il faut d'ordinaire que le gendre vienne demeurer avec elle au logis de son beau pere. L'on console ces pauvres gés au mieux que l'on peut, apres quoy le Pere Ioseph leur demanda le corps de la deffuncte qu'ils auoient enuëloppé à leur mode, pour la mettre en terre sainte au Cimetiere proche Kebec, mais le pauvre homme estoit tellement passionné pour sa fille morte, qu'il la vouloit garder, & la porter par tout où il yroit, disant que puis que son ame estoit au Ciel, elle prieroit Latahoquan, qui est le Createur, pour sa famille, & qu'elle n'auroit iamais de faim. Et cōme on luy eut dit qu'à la fin il se laisseroit d'un tel fardeau. Il respondit que du moins il ne la vouloit pas enterrer que ceux de sa Nation ne fussent arriuez à Kebec pour en faire le festin plus solemnel, & leur tesmoigner par effect l'ayse & le contentement qu'il auoit du Baptisme de sa fille, & qu'à present il se pouuoit dire parent & allié de tous les François depuis cette magnificence.

Nonobstant les PP. le gaignerent tellement qu'il cōsentit qu'elle seroit enterrée en terre sainte, & avec les ceremonies de la sainte Eglise, au plustost qu'il le pourroit, sans attendre la venue de ceux de son pays, qui ne deuoit pas estre de long téps. A ceste ceremonie se trouuerent deux de nos Religieux, sçauoir le P. Ioseph, & le F. Charles, le P. Lalle-

mét, & le F. François Iesuite avec plusieurs François de l'habitation, qui tous ensemblemēt se transporterēt à la cabane de la deffuncte, qu'ils prirent & la porterent solennellement en la Chappelle de Kebec chantans le Pſalme ordonné aux enfans, puis le R.P. Lallement ayāt dit la ſaincte Meſſe on fuſt l'enterer au cimetiere avec vn aſſez beau conuoy pour le pays, car le pere de l'enfant marchoit tout le beau premier couuert d'vne peau d'Eſlan toute neuue enrichie de matachias & bigarures, & avec luy marchoit le ſieur Hebert & les autres François en ſuitte, ſelon l'ordre qui leur eſtoit ordonné, non ſi graucement mais moins modestement que ce Sauuage pere, qui tenoit mine de quelque ſigné Prelat.

L'insolence & l'avarice ſont blaſmables, meſmes par ceux qui ne cognoiſſent point Dieu. Quand il fut queſtiō d'enterrer le corps il yeut quelque debat entre les François, à qui appartiendroient les fourures dans quoy il eſtoit enueloppé, & vouloient luy arracher, particulièrement vn certain qui ſe diſoit officier de la Chappelle, ſi la riſée & moquerie des autres ne l'en euſſent empeſché. Ce que voyant le pere de la deffuncte, il ne voulūt permettre qu'aucun autre que luy l'enterrast peur du larcin & des débās des François en quoy il ſe monſtra tres-ſage. Il diſpoſa donc la ſoſſe & la para avec des rameaux de ſapin tout autour en dedans & miſt 3. ou 4. baſtons au fond pour empêcher que le corps deſ-ia enueloppé & garotté, ne touchaſt à la terre.

Estant dans la fosse, il le couurit d'une es-
corce de bouleau, & replia par dessus les ra-
meaux de sapin qui sortoient en dehors, puis
par dessus plusieurs pieces de bois pour le re-
nir en seureté contre les bestes, sans vouloir
permettre qu'aucun y iettast de la terre, ius-
ques au lendemain matin qu'à son insceu on
l'en couurit peur de plus grand inconue-
nient.

Ce bon Sauvage a esté tousiours du de-
puis grand amy des François, & tesmoigna
au renouveau suiuant, à tous ceux de sa Na-
tion, l'aïse & le contentement qu'il auoit du
salut de sa fille, par vn festin solemnel qu'il
leur fist plus splendidement que de coustü-
me en la memoire de la defuncte qu'il n'a-
uoit pû faire pour leur absence le iour de sa
sepulture.

La ioye que nous eusmes du salut de cette
pauvre ame, fut bien-tost suiuite d'une affli-
ction en la mort du sieur Hebert, laquelle
fut autant regrettee des Sauvages que des
François mesmes, car ils perdoient en luy
vn vray pere nourricier, vn bon amy, & vn
homme tres-zelé à leur conuersion, comme
il a tousiours tesmoigné par effect iusques à
la mort, qui luy fut aussi heureuse comme sa
vie auoit pieusement correspondu à celle
d'un vray Chrestien, sans fard ny artifice.

Je ne peux estre blâmé de dire le bien là où
il est, & de declarer la vertu de ce bon hom-
me, pour seruir d'exemple à ceux qui vien-
dront après luy, puis qu'elle a esclaté deuant

Mort du
sieur He-
bert.

tous & a esté en bonne odeur à tous. Si ie n'en dis point autant des viuans, personne ne doit estre appellé Sainct qu'après la mort, ny iuge comme meschant, iusques après le trespas, pour ce qu'on peut tousiours déchoir de sa perfection ou sortir du vice pour la vertu. Vn iour iuge de l'autre, mais le dernier iuge de tous disoit vn Philosophe, & par ainsi il faut attēdre après la mort pour iuger de l'homme.

Dieu voulant retirer à soy ce bon personnage & le recompenser des trauaux qu'il auoit souffert pour Iesus-Christ, luy enuoya vne maladie, de laquelle il mourut 5. ou 6. sepmaines après le baptisme de ceste petite fille de Kakemistic. Mais auparauant que de rendre son ame entre les mains de son Createur, il se mist en l'estat qu'il desiroit mourir, receut tous ses Sacremens de nostre P. Ioseph le Caron, & disposa de ses affaires au grand contentement de tous les siens. Apres quoy il fist approcher de son liēt, sa femme & ses enfans auxquels il fist vne briefue exhortation de la vanité de cette vie, des tresors du Ciel & du merite que l'on acquiert deuant Dieu en trauaillant pour le salut du prochain. Le meurs contant, leur disoit-il, puis qu'il a pleu à nostre Seigneur me faire la grace de voir mourir deuant moy des Sauuages conuertis. I'ay passé les mers pour les venir secourir plustost que pour aucun autre interest particulier, & mourois volontiers pour leur conuersion, si tel estoit le bon plaisir de Dieu. Je vous supplie de les aymer comme ie les ay aymez, & de les assister

Exhortatiō
du sieur
Hebert.

selon vostre pouuoir, Dieu vous en sçaura gré & vous en recompensera en Paradis: ils sont creatures raisonnables comme nous & peuent aymer vn mesme Dieu que nous s'ils en auoient la cognoissance à laquelle ie vous supplie de leur ayder par vos bons exemples: & vos prieres.

Ie vous exhorte aussi à la paix & à l'amour maternel & filial, que vous deuez respectiue-ment les vns aux autres, car en cela vous accomplirez la Loy de Dieu fondée en charité, cette vie est de peu de durée, & celle à venir est pour l'éternité, ie suis prest d'aller deuant mon Dieu, qui est mon iuge, auquel il faut que ie rende compte de toute ma vie passée, priez le pour moy, afin que ie puisse trouuer grace deuant sa face, & que ie sois vn iour du nombre de ses esleus; puis leuant sa main il leur donna à tous sa benediction, & rendit son ame entre les bras de son Createur, le 25. iour de Ianuier 1627. iour de la Conuersion saint Paul, & fut enterré au Cimetiere de nostre Conuent au pied de la grand Croix, comme il auoit demandé estant chez nous, deux ou trois iours auant que tomber malade, comme si Dieu luy eut donné quelque sentiment de sa mort prochaine.

*Histoire De la conuersion & baptesme de
Mecabau Montagnais , avec l'exhorta-
tion qu'il fit à sa femme & à ses enfans
auant sa mort.*

CHAPIRE XXXVII.

Vers la my Mars de l'an 1628. Les Sauua-
ges qui auoient hiberné és enuiron de
l'habitation, commencerent à s'approcher d'i-
celle à cause des neiges qui se fondoient, com-
me les riuieres, les glaces qui se détachotent
par tout des bords, qui rendoient la nauiga-
tion perilleuse, c'est ce qui les fit passer, & ad-
uancer peur de plus grandes incommoditez.
Le Sauvage Mecabau, autrement appelé par
les François Martin, que j'ay autrefois fort
cogneu comme bon amy, & pour ses petites
reuerances qu'il vouloit faire à la Françoisise, se
cabana assez proche de nostre Conuent, d'où il
venoit souuent visiter nos Religieux & les
RR. PP. Iesuites qui estoient fort ayse de sa
compagnie, car par le moyen de son entretien
on apprenoit tousiours quelque chose de la
langue. Or il aduint que le R. P. Masse Iesuite
(encor nouveau dans la langue,) luy voulant
dire quelque chose en Montagnais, luy dit
tout autrement de sa pensée, certains mots qui
signifioient, donne moy ton ame, aussi bien
mourras.

mourras tu bien-tost : ce qui estonna fort le Sauvage, qui luy repartit, comment le sçay-tu, ce que n'entendant pas le Pere Masse il continua sa premiere pointe, qui fascha à la fin au-
cunement le Sauvage & le porta à luy dire leur diction ordinaire, tu n'as point d'esprit, puis feignit s'en aller mescontant, ce qu'aperceuant le R. P. Masse, changea de discours & luy fist present d'une escuellée de poix, qu'il accepta volontiers & l'emporta à sa cabane, d'où il reuint à nostre Conuent, pendant que ses enfans les firent cuire dans vn chaudron sur le feu.

Estant chez nous il s'adressa au P. Ioseph & luy conta le pourparler qu'il auoit eu avec le R. P. Masse, luy disant, mon fils (car ainsi ap-
pelloit il le Pere Ioseph,) ie viens de voir le P. Masse, ie croy qu'il est plus vieux que moy & si n'a point d'esprit, car il m'a demandé par plusieurs fois mon ame, & me pronostique que ie mourray bien-tost. Il me semble neant-
moins que ie mange encore bien, & que j'ay de fort bonnes jambes, & d'où viendrait donc que ie mourusse si-tost, sinon que luy mesme me voulut faire mourir. Le Pere Ioseph luy dit, tu monstre bien toy mesme que tu as bien
peu d'esprit d'auoir si mauuaise opinion de personnes qui te cherissent egaleme-
ment nous, tu dis vray, dit-il, car il m'a donné vne esculée de poix que j'ay donnée à cuire à
ma cabane pour mes enfans & pour moy, & ayant sçeu du Pere Ioseph, que le Pere Masse
ne l'auoit interrogé que pour s'instruire de

la langue, qu'il n'entendoit pas encore, il s'en retourna à la cabane pour manger de ses poix, qu'il trouua amers comme aloës, & n'y pû apporter remede.

Or pour ce que le malheur de l'histoire ou plutôt bonheur, puis qu'elle luy causa son salut, vint de la falleté dont ils vsent à l'aprest de leurs viandes; il faut que ie vous die qu'ils ne nettoient rien de ce qu'ils mettent au pot, s'ils ont vn gros poisson ou vn morceau de viande à couper ils mettent gentiment le pied dessus, & le coupent pour la chaudiere, sans rien lauer fut il fort sale, moisi ou pourry, comme j'ay dit ailleurs. Ils en firent de mesme des poix du Pere Masse, ords au possible, d'alun, de noix de galle & de couperose, qui par mesgard s'estoient meslez parmy d'une composition d'ancre, mais qui rendirent les poix si extremement noirs & mauuais, qu'il fut impossible d'en pouoir manger, ny le pere ny les enfans, ny mesme les chiens, dont vn mourut pour en auoir mangé d'un reste que le pere auoit ietté en terre, & luy mesme en fut extremement malade, pour y auoir gousté, & ses enfans encor plus, dequoy il s'alla plaindre au Pere Ioseph, luy disant: mon fils, il est vray que le Pere Masse n'a point d'esprit de mauoir voulu faire mourir, il m'a demandé mon ame, c'est à dire qu'il desiroit que ie mourusse, dont ie m'estonne d'autant plus que ie ne luy ay iamais faiet de desplaisir. Il m'a donné des poix qui ne valent rien &

nous ont rendus , moy & mes enfans iulques à l'extremité , i'y ay mis de la viande, pour en oster le mauuais goust, & ils n'en ont pas esté meilleurs ; i'ay tout ietté aux chiens dont l'un en est desja mort & ne sçay que deviendront les autres, voy donc mon fils le mal que l'on nous veut , & y apporte du remede.

Le Pere Ioseph bien estoigné du discours de ce barbare, tascha de le consoler au mieux qu'il peut, & partit en mesme temps pour aller trouuer le Pere Masse, auquel il conta l'effect des poix, qui fut bien esbahy ce fut le bon Pere, car il croyoit auoir fait vne œuvre de grande charité en faisant ce present, mais ayant mené le Pere Ioseph au baril où il les auoit pris, il s'y trouua tant de drogues, que l'on ne douta plus de la malignité des poix & fut contrainct d'aduotier, que le mal en venoit de là, mais pour ce qui estoit d'auoir demandé l'ame de ce pauvre homme, c'est à dire sa mort, le bon Pere asseura, comme il est tres-certain, qu'il ne pensoit pas luy tenir ce langage là & que cela luy deuoit estre pardonné, comme n'estant pas encor assez instruit en leur langue. Je peux souuent manquer & dire vne chose pour vne autre en ces commencemens dit-il au Pere Ioseph, & partant ie vous supplie d'appaiser ce barbare & considerer que ce que ie me hazarde de leur parler n'est que pour les instruire en m'apprenant tousiours ce qui ne se peut faire sans faute.

Le Pere Ioseph ayant sçeu comme la chose s'estoit passée, retourna à son Sauvage, lequel il pria de croire que le tout s'estoit fait sans dessein de l'offencer, & qu'au contraire le Pere Masse l'aymoit tendrement comme son frere, & bié marry de ce mal heureux accident, qu'il eut voulu rachepter pour beaucoup, s'il eut esté à son pouuoir, mais que la faute estant faite il la deuoit pardonner quand bien il y auroit eu de la negligence du Pere à nettoyer ces poix. Le barbare luy repartit que c'estoient toutes excuses & qu'il l'auoit voulu assurement faire mourir, & pour chose qu'on luy pût dire du contraire on ne luy pût jamais oster cela de l'esprit, & coëffé de ceste mauuaise opinion il partit pour les Montagnais, vers les quartiers du cap de tourmente, où à peine fut il arrivé qu'il tomba griefuement malade, ce qui le contraignit d'auoir recours aux François, qui se trouuerent là pour en receuoir quelque soulagement ou remede à son mal, mais pour soin qu'on en prit on ne le pût guerir ny remettre en santé. Le sieur Foucher qui estoit là Capitaine, luy fist donner du vin d'Espagne & de l'eau de vie pour le remettre en force, & voir si ces remedes extraordinaires luy seruiroient mieux que d'autres drogues plus ordinaires, mais rien ne le pût soulager, dequoy ces bons François estoient for marris, pour l'auoir tousiours veu fort affectionné à leur endroit.

A la fin ce bon homme , qui conseruoit en son cœur le desir d'estre Chrestien depuis vn long-temps sans l'auoir absolument déclaré le manifesta lors , & dit qu'il vouloit aller retrouuer le Pere Ioseph pour estre baptizé , & pour ce les pria de luy prestre vn canot, ce que fist le sieur Foucher apres l'auoir supplié de demeurer là à cause de la grande foiblesse , & pour les glaces , qui pourroient offencer son canot des ja fort depery & le perdre en suite, mais cette priere fut inutile.

Car il auoit vne telle apprehension de mourir sans auoir receu le baptesme , que la mesme apprehension estoit capable de l'envoyer au tombeau, si on ne luy eut donné contentement. Il s'embarqua donc avec ses deux fils, l'un aagé de 17. a 18. ans & l'autre de 12. a 13. & arriuerent tout d'une Marée proche de Kébec, en vn endroit où la riuiera portoit , & là ils deschargerent leur pere sur la glace , puis ayans caché leur canot dans les bois, l'un deux vint en nostre Conuent aduertir que leur pere se mouroit, & supplioit le Pere Ioseph de l'aller baptizer auparauant, d'autant qu'il le desiroit à toute instance. Ce qu'entendant le Pere Ioseph plein de zele, prist vn peu de vin pour le malade, & s'en alla promptement au deuant de luy qu'il trouua en deuoir de se faire trainer vers nostre Conuent par l'un de ses fils. Sitost qu'il apperceut le P. Ioseph , il luy cria de loin , mon fils ie te viens voir pour estre baptizé , car ie croy que ie m'en vay mourir,

tu m'as tousiours promis que tu me baptizerois si ie tombois malade, & tu vois l'estat auquel ie suis à present comme d'un homme qui n'a presque plus de vie.

Le Pere Ioseph attendry des paroles de ce pauvre vieillard, luy dit: Mon Pere ie suis marry de ta maladie, & me resioüy fort de ton bon desir, sçache que ie ferai pour toy tout ce qu'il me sera possible, & te nourrirai comme l'un de mes freres; mais pour ce qui est du saint Baptême, comme la chose est en soy de grande importance il faut aussi y apporter vne grande disposition, & me promettre qu'au cas que Dieu te rende la santé, que tu ne retourneras plus à ton ancienne vie passée, & te feras plus amplement instruire pour viure à l'aduenir en homme de bien, & bon Chrestien, ce qu'il promit.

Alors ledit Pere faisant office de charité & d'hospitalité, le prist par la main, & l'ayda à conduire en nostre Conuent, ou on lui disposa vn grabat dans l'une des chambres, plus commode, & y fut traicté & pensé par nos Religieux au mieux qu'il leur fut possible, pendant cinq iours que la fièvre continuë luy dura avec des conuulsions fort estranges. Le Chirurgien des François le vint voir, & luy fist aussi tout ce qu'il pû, mais comme ces gens là ne se gouuernent pas à nostre mode, l'on auoit beaucoup de peine autour de luy, & s'il vouloit qu'il y eut tousiours quelque Religieux peur de mourir sans le Baptême qu'on différoit luy donner pretextât

l'apparence d'une prochaine guerison, qui trompa nos freres.

L'ay admiré la ferueur & deuotion de ce bon homme pendant sa maladie, car de nos Religieux m'ont asseuré qu'il proferoit tous les iours, plus de cét fois les saints noms de *Iesus Maria*, & demandoit continuellement d'estre enrollé sous l'estendart des enfans de Dieu, iusques à vn certain iour qu'il dit au P. Ioseph, Mon fils ie pense que tu me veux laisser mourir sans Baptisme, & as oublié la promesse que tu m'auois faicte de me baptizer quand i'y serois disposé, quelle plus grande disposition desire-tu de moy, que de faire tout ce que tu veux, & croire tout ce que tu crois, dans laquelle croyance ie veux viure & mourir. Mon mal se rangrege prend garde à moy, & que par ta faute ie ne sois priué du Paradis, pour ce que tes remises me mettent dans vn hazard de perdition.

Là dessus le Pere luy dit qu'asseurement il le baptizeroit auant mourir, & qu'il n'eust point de crainte, & que ce qui l'auoit obligé à ces remises estoit outre l'esperance de sa guerison, qu'il vint avec le temps à retourner à ses superstitions, & oublier le deuoir de Chrestien, comme il est facile à ceux qui ne seroient pas deuëment instruits viuans parmy vous autres. A quoy le Sauuage repartit, Mon fils, il est vray qu'il est bien difficile de pouoir viure parmy nous en bon Chrestien, veu que les François mesme qui y viennent hyuerner ny viennent point comme

vous, mais sçache que tu ne seras pas en peine de m'y voir plus, car ie me meurs & n'en peu plus, vne chose ay je encore à te prier de me faire enterrer dans ton Cimetiere auprés de Monsieur Hebert, car ie ne veux pas estre mis avec ceux de ma Nation, quoy que ie les ayme bien; mais estant baptizé il me semble que ie dois estre mis avec ceux qui le sont, mes enfans n'en feront point fâchés, d'autant que ie leur diray en leur faisant sçavoir ma derniere volonté, de laquelle ie croy qu'ils feront estat.

Le Pere le voyant perseuerer dans vne si ferme resolution de son salut, luy accorda sa demande, & le baptiza pendant vne convulsion qui luy arriua tost apres, laquelle fut telle qu'il eut opinion qu'elle l'emporteroit: Neantmoins il revint à soy, & ayant demandé le Baptême, il luy fut dit qu'il venoit d'estre baptizé, ce que tous luy tesmoignerent, & mesme l'un de ses enfans qui estoit là present, dequoy il se monstra tres-satisfait par ces paroles, disant, *Iesus Maria*, ie suis bien content, & ne me soucie plus de mourir puis que ie suis Chrestien, & puis disoit par fois Iesus prend moy à present, ce qui donnoit de la denotion aux plus indeuots mesmes qui admiroient ces paroles.

Peu de temps après arriuerent trois Sauvages, Napagabiscou son gendre, vn de leur Medecin, avec vn autre de leurs amis. Si tost qu'ils furent entrez le Medecin demanda au

malade combien de iours il y auoit qu'il estoit dans ces langueurs, l'autre luy respondit quatre, puis le Medecin le prenant par la main la regarda, & dit qu'il cognoissoit par icelle qu'un homme luy auoit donné le coup de la mort, mais que s'il vouloit permettre qu'il le chantast, qu'il le rendroit bien tost guery, ce que le malade ne voulut permettre disant qu'estant à present baptizé cela ne se deuoit plus faire, ce que luy confirma Napagabiscon son gendre aussi Chrestien; & le loua de s'estre fait baptizer, & de ne souffrir plus ces importuns chanteurs qui ne clabaudent que pour leurs interests.

Neantmoins le malade fut porté de curiosité de sçauoir du Medecin comment il cognoissoit qu'un homme le faisoit mourir, confessant qu'on luy auoit donné à manger quelque chose qui ne valoit rien, nortez sans nommer le P. Masse, car nos Religieux luy auoient deffendu, le Medecin dit qu'il le voyoit fort bien en sa main. On luy demande de quelle Nation estoit celui qui auoit donné le mal: il repart des Etechemins (qui est vne Nation du costé du Sud de l'habitation & assez esloigné dans les terres.) On l'interroge comment cela s'estoit pû faire, puis qu'il y auoit plus de deux ans qu'on n'en auoit ven aucun en ces quartiers. Il dit qu'il estoit venu la nuit, & qu'ayant trouué Mecabau endormy qu'il luy auoit mis vne pierre dans le corps, laquelle luy causoit ce mal, & le feroit mourir si on ne luy ostoit

à force de souffler. Cela appresta vn peu rire à nos Religieux, qui luy dirent qu'il estoit vn manifeste trompeur, & ne sçauoit ce qu'il vouloit dire.

Mais comme il vit qu'on donnoit à manger à ce malade, il changea de notte, & dit à nostre Frere Geruais qui en estoit l'infirmier, ne vois-tu pas bien que tu n'as point d'esprit de dōner à manger à cēt hōme qui n'a point d'appetit, & que quand on est malade on ne sçauoit manger, & qu'il faut attendre que l'on soit guery & en appetit, je ne sçay si ce Medecin auoit appris les maximes des Egyptiēs & des Italiens, qui dōnent aux malades le pain & les viādes à l'once, mais il estoit vn peu bien rigide, ce qui me faict derechef explorer la misere de leurs pauvres malades, qui meurent souuent faute d'vn peu de douceurs pour les remettre en appetit.

L'ay dit en quelque endroit que la vengeance & le soupçon en cas de maladie est fort naturelle, & attachée de pere en fils à nos Sauuages. Mecabau qui ne pouuoit oublier ses poix en conta l'histoire (à nostre insceu) au Medecin, & à son compagnon, qui en furent fort scandalisez, & sortirent de nostre Couuent tout en cholere pour l'aller dire à leurs femmes, lesquelles en conceurent vne telle auersion contre les RR. PP. Iesuites, qu'elles depeschèrent en mesme temps vn canot à Tadoussac, & vn autre aux trois riuieres pour en donner aduis à tous ceux de leur Nation, qu'elles coniurerent de se don-

ner de garde puis que desia ils auoient faict mourir le pauure Mecabau. Qui fut bien estonné ce furent nos pauures Religieux, qui eurent aussi tost aduis de ce mauuais trafic. Ils en rancerent fort ce nouueau baptizé, & le reprirent de n'auoir encore quitté cette mauuaise opinion, comme ils l'en auoient desia par plusieurs fois prié. Que faut-il donc que ie fasse, leur dit-il, est il pas vray qu'ils m'ont donné des poix qui ne valoient rien, dont ie suis malade & prest à mourir pour en auoir mangé. On luy dit que la maladie ne venoit pas de là, & que c'estoit pour auoir trop trauaillé, & estre trop vieux. Il est vray, dit il, que ie suis bien vieux, & que ie ne puis pas tousiours viure, mais qu'est-il donc question de faire pour vous contenter, il faut, dit le Pere Ioseph que tu efface de ton esprit toutes les mauuaises pensees que tu as contre les Peres Iesuites, & que tu renuoye querir ces deux de ta Nation, à qui tu les as dites pour leur tesmoigner du contraire, ce qu'il promit, mais avec bien de la peine, car il ne vouloit pas le desdire.

Les hommes estans arrivez, il les pria de ne point croire ce qu'il leur auoit dit des Peres Iesuites, & qu'ils estoient de bonnes personnes, & partant qu'ils renuoyassent à Tadoussac, & aux trois riuieres dire la mesme chose, ce qu'ils promirent moyennant quelque petit present, car entr'eux comme en Turquie les presens ont vn grand pouuoir.

Derniers
volontez
du malades

Le gendre estant de retour, le malade luy dit qu'il se sentoit bien mal, & qu'il leu-
vouloit dire ses dernieres volontez, & par-
tant quel'on fit venir sa femme & ses enfans,
ce qui fut promptement executé, estant arri-
uez, il les fit mettre autour de luy, & se tour-
nant vers son gendre, il luy dit, Napagabissi-
cou tu és mon gendre que j'ay tousiours fort
aimé dès que tu estois perit garçon, & pour
cela ie t'ay donné ma fille que tu as aussi touf-
iours aimé, tu n'as guere disputé avec elle,
car elle t'aymée bien aussi, deffuncte ma fem-
me qui estoit sa mere, m'aymoit bien aussi,
& moy elle. C'est pourquoy ie vous recom-
mande de vous bien aimer, cela n'est pas
bien quand on querelle l'un contre l'autre,
car personne n'en peut estre edifié ny con-
rent. Aime bien aussi tes enfans, tes freres
& tes sœurs qui sont mes enfans, aussi ta bel-
le mere, qui est à present ma femme, quand
ils auront necessité ne les abandonne point,
donne leur tousiours de la chair & du pois-
son quand tu en auras.

Ne sois point querelleur avec les autres,
ny porteur de mauuaises nouuelles, & pour
ce faire ne hante point ton oncle Carommi-
fit, car c'est vn querelleur, ne va point en sa
cabane, ny avec ceux qui sont comme luy.
Mais aime les François & va tousiours avec
eux, particulièrement avec le Pere Ioseph, &
ceux qui sont habillez comme luy, car tu és
baptisé aussi bien que moy. Il faut que tu
les aymes plus que les autres puis qu'il t'ont

baptisez, quand tu auras de la viande, & du poisson, tu leur en donneras, & ne les abandonneras point. Ayme aussi les Peres Iesuites, & oublie ce que ie t'en ay dit. Ayme aussi Monsieur du Pont, Monsieur de Champlain, Madame Hebert, & son gendre, & tous les autres François qui seront bons, & ne va point avec les meschans. Ne te fâche point quand ie seray mort, il nous faut tous mourir & partir de ce pays icy, & ne sçavons quand. A quoy respondit le gendre, ie feray tout ce que tu m'as dit mon pere, & puis se teut, car ils n'ont pas grand response.

Puis le malade s'adressant à ses enfans qui estoient là pleurants, dit à son fils aîné: Mat-chounon (ainsi s'appelloit-il) sois toujours bon garçon, & ayme bien tes freres, & tes sœurs, ne sois point paresseux, car tu es bon chasseur, & bon pescheur, & ne sois point aussi quereleur, demeure avec ton beau frere, & toy & tous tes freres & sœurs, vivez bien en paix, ne va point à la cabane de ton oncle Carommisit, car c'est vn quereleur. Si tu veux demeurer avec le Pere Ioseph ie le veux bien, il te baptisera, & tous tes freres, & croy ce qu'il dira, mais pourtant ne va point en France, car peut estre que tu y mourrois, que tes freres n'y aillent point aussi. Pour demeurer icy avec luy ie le veux bien. Ie luy ay promis ton petit frere Chippe Abenau, s'il le veut auoir donne luy, mais qu'il n'aille point en France, côme ie vien de dire.

Voicy comme il luy enseigne de prendre vne fille honnestre. Quand tu te marieras prens vne fille qui ne soit point paresseuse ny coureuse, ayme la bien, & tes enfans, n'en prens point d'autres de son viuant, ne te fâche point contre elle, ne la chasse point, ayme tousiours tous les François, & les assiste de chair, & de poisson quand tu en auras, & del anguille au temps de la pesche, que tu donneras au Pere Ioseph, & a ses Freres, afin qu'ils n'ayent point de faim. Ne te fâche point quand ie seray mort. Le Pere Ioseph me donnera vn diap pour m'enseuelir, & m'enterrera aupres de Monsieur Hebert, ne t'en fâche point. A tout cela le fils luy respondit de mesme que le gendre, mon pere ie feray tout ce que tu m'as dit, & le mettent en effet, car ils ont en grande veneration les dernieres paroles de leur pere & mere, plus que toutes les autres qu'ils leur ont dites de leur viuant, en quoy ils sont imitez de tous les bons Chrestiens, pour ce que les dernieres paroles sont ordinairement les plus energiques & salutaires.

Le pauvre Mecabau fit la mesme exhortation à tous les autres enfans, les vns apres les autres, par lesquelles il leur recommandoit particulièrement la paix & l'amitié, qui estoit tout ce que saint Iean recommanda à ses Disciples auant sa mort, disant qu'en ce seul commandement de s'aimer l'un l'autre, ils accompliroient toutela Loy. Puis s'adressant au Pere Ioseph, & à tous ses Religieux

luy dit : Pere Ioseph mon fils , ie te remercie de ce que tu mas baptisé , & m'as souvent donné à manger , & à tous mes enfans , yme les aussi comme tu m'as aymé iet'enric. Quand ils auront faim donne leur à manger , & si tu n'y es pas , tu diras à tes freres qu'ils leur en donnent. Je t'ay toujours bien aimé , voyla pourquoy ie te donne mon petit garçon Chappe Abenau , ayme le , & tous mes enfans , baptise les , mais ie te prie qu'ils n'aillent point en France , tu as bien entendu tout ce que ie leur y dit , ie veux qu'ils le fassent , & se tournant vers Frere Geruais , il luy dit , Frere Geruais ayme bien aussi mes enfans , si tu veux aller Hyuerner , pour apprendre la langue , va demeurer avec eux , ils auront soin de toy. Quand le Pere Ioseph sera mort tu diras à tes autres Freres qui viendront , qu'ils aiment bien mes enfans.

Lors le Pere Ioseph luy dit , ie suis bien edifié de tes paroles , par lesquelles tu montre que tu as de l'amitié , & de l'esprit , mais ie suis estonné que tu deffends à tes enfans l'aller en France , où il y fait si beau vivre , ie te promets bien que ie les aymey , & assisteray de tout mon pouuoir , mais pour le petit Chippe Abenau que tu m'as donné , ie serois bien ayse de le conduire en France , avec le petit Louys de Choumin , à quoy il ne voulut jamais consentir , à cause qu'il y en estoit

mort quelqu'un de leur Nation. Puis il fait son Testament, en recommandant à ses enfans d'aymer aussi leur belle mere qui ne s'estoit pû là trouver; & comme estoit de son naturel fort iouial, levant les yeux, ça dit-il, ou est la mort elle ne vient point.

Mais on luy dit apres, Meeabau, vous n'avez eu raison d'exhorter vos enfans, & de mépriser la mort, vous sentant bien avec Dieu; neantmoins il y a encore vne chose que vous avez oublié, de leur enjoindre de payer à Monsieur Corneille ce que luy devez (c'estoit le Commis de la traite) car on doit payer ses creanciers, comme nous vous auons dit, ou donner charge qu'il se fasse payer. Vous n'avez point d'esprit, respondit-il, ne sçavez vous pas bien qu'il a tant gagné avec moy, & que ie luy ay tant donné de testes, & de langues d'eslan, & des anguilles à foison, lors que ie faisois la pesche, c'est au moins qu'il me donne ce que ie luy dois, si ie retourne en conualeescence ie le payeray, mais si ie meurs ie ne tueray plus de castors pour luy satisfaire, & n'entend point laisser debtes à mes enfans, & comme on luy eut dit qu'il n'y auoit que 20. castors à payer, ce n'est pas beaucoup, dit-il, c'est pourquoy il luy sera plus facile de me les quitter, car il est assez riche, & nous pauvres.

Le lendemain matin sa femme le vint voir, fâchée de ce qu'il vouloit estre enterré

terré à nostre Cimetiere, & pria ses enfans de le mener à sa cabane, pour estre enterré avec ceux de sa Nation, car elle ne pouuoit souffrir pour la mesme raison qu'il mourut en nostre maison, ce bon homme refusoit fort & ferme de sortir, car il n'osoit desobliger nos Religieux, qui le prioient de demeurer, mais à la fin il fut tellement persuadé qu'il fut contrainct de se laisser conduire à sa cabane, disant qu'on luy auoit asseuré qu'il n'importoit où l'on mourut pourueu que l'ame fut sauuée, & ainsi partit nostre malade conduit sur vne traine par sa petite fille.

Nos Religieux neantmoins ne l'abandonnerent point, car ils l'alloient souuent voir pour l'exhorter à la perseuerance, mais comme il arriva que le Piotois, & plusieurs de ses amis l'allerent visiter pour le diuertir par quelque chanterie, le malade leur souffrit, & chanta avec eux, non à dessein de guarison, mais pour leur complaire, ce que sçachant les François, firent courre le bruit qu'il estoit retourné à ses superstitions passées, en quoy ils se trompoient, car à ce faux bruit le Pete Iosephy fut qu'il trouua tousiours dans sa premiere deuotion, & n'auoit chanté que pour complaire aux autres, car l'ayant interrogé il protesta qu'il vouloit viure & mourir en bon Chrestien, & dans nostre croyance comme il auoit promis au saint Baptême. On luy oyoit aussi souuent dire ces mots,

Iesus Maria, Chouerimit egoke sadguitan, qui signifie en François, Iesus Maria ayez pitié de moy & ie vous aymeray.

Et comme la maladie s'alloit rengregeant il perdit peu à peu la parole, & mourut en nostre Seigneur pour viure en Paradis, comme pieusement nous pouuons croire. Il fut enseuely dans le drap que nos Religieux luy auoient donné, puis enterré au Cimetiere de ceux de sa Nation, proche le iardin qu'on appelle du Pere Denys, pour le contentement de ses parens, qui autrement n'eussent point vescu en paix.

Des Missions & fructs des Freres Mineurs en toutes les principales parties du monde, & d'un Religieux Dominicain, venant actuellement de la grande ville de Goa, capitale des Indes Orientales.

CHAPITRE XXXVIII.

SI nos Freres qui sont à présent deuant Dieu, & ceux qui restent en tres grand nombre dans toutes les parties de la terre habitable, estoient blasmables en quelque chose, ce seroit pour auoir esté trop retenus, & n'auoir descrites leurs saintes actions, & les grands fructs qu'ils ont faits, & sont actuel-

lement en l'Eglise de nostre Seigneur, qui eussent seruy pour nostre exemple & edification; mais comme leur sentiment a esté bon & ne chérchét que l'honneur & la gloire de Dieu, ils se contentent de bien faire sans se soucier des vaines louanges du monde, de maniere que si nous scauons quelque chose d'eux, ça esté plustost, par autrui que par eux mesmes, car ils ne se sont iamais amusez à faire des Relations annuelles, qui ne sont pour l'ordinaire que redites, & vn desguisement de Rhetoriciens, autant plein de fueilles que de fruiets.

Nos pauvres Religieux ont esté en effet des ames choisies de Dieu pour le salut des peuples, ont peu parlé, moins escrit, & beaucoup operé, car le vray seruiteur de Dieu, en operant, patissant, & souffrant, non plus qu'en iouissant n'a que la seule voix de l'agneau à l'imitatiō du vray agneau I. Christ, ouy & non. Leur vie & leurs actiōs sont vrayemēt admirables, & cōme parfun tres-odoriferant deuant Dieu, mais là recōpence qu'ils en attendent est au dela de tout espoir humain, puis qu'un Dieu si bon ne peut petitement remunerer, donnant dès ce monde le centuple, & après la mort, la vie éternelle. La vertu porte tousiours son prix, & n'y a rien qui gaigne tant les cœurs que la douceur, & le bon exemple, & particulieremēt entre les Infidelles le mespris de l'honneur, & des richesses, qu'ils admirent entre toutes les actions de vertu plus difficiles, pour ce que naturellement

l'homme est porté d'en auoir, & de fuir la diserte, & le mespris le plus qu'il peut, & il est vray semblable que cette pauvreté volôtaire & le mespris de l'honneur & des richesses de la terre, est vn tres-puissant moyen pour terrasser Satan, & luy faire lascher prise des ames qu'il traine dans la perdition, & c'est en cette vertu principalement, que nos Saints Freres se sont faits admirer entre tous les Religieux qui ont passé depuis eux en ces terres Infidelles pour les acquerir à Dieu.

Plusieurs s'estoient imaginez que le monde se conuertissoit plustost par la science des Doctes, que la bonne vie des simples, & s'est en quoy ils se sont trompez, car encor bien que l'un & l'autre soit necessaire, de peu sert le discours docte & eloquent sans l'exemple de vertu. Nostre Seraphique P. S. François souloit dire aux Predicateurs de son ordre qui sembloient auoir quelque vanité de leur science & du fruit de leur Predication: Ne vous enfliez point Predicateurs, de ce que le monde se conuertit à Dieu par vos predications, car mes simples Freres conuertissent aussi par leurs prieres & bon exemple, qui est la Predication que principalement ie desire & souhaite à tous mes Freres.

Les Freres
Laiz Che-
ualiers de S.
François.

Il appelloit simples Freres ceux qui par humilité refusans la Prestreise, desiroient estre Freres Layz, qu'il appelloit par excellence les Cheualiers de sa table ronde, & les meres de la S. Religion, qu'il caressoit & embrassoit amoureusement & paternellement, d'autant plus volontiers qu'il scauoit le dire de David

estre veritable, qu'il vaut beaucoup mieux estre le plus petit en la maison de Dieu, que le plus grand en la maison des pecheurs, car la Prestise est vn estat qui requiert vne si grande perfection, que saint François par humilité ne l'a iamais voulu estre, & les premiers compagnons, qui estoient tous gentils-hommes & lettrez, n'aspirerent au Sacerdote, ains choisirent estre frere Layz par humilité, comme ont eu faits beaucoup d'autres saints personnage, qui s'en iugeoient indignes, tellemēt qu'au siecle d'or de nostre sacré ordre, à peine se trouuoit il des Religieux qui vouloissent estre Prestres, & ce grand Anacorette Pacomius, ayant iusques au nombre de 1400. Religieux en son Monastere, ne voulut iamais permettre qu'aucun fut *in sacris*, pour maintenir l'humilité en la maison, & euitier le mespris de ceux qui se picquent de vanité, car vn Prestre d'un village voisin, leur venoit administrer les Sacremens.

Ils ne sont ainsi nommez freres Layz que pour les distinguer des freres du Chœur, car au reste ils sont vrayement Ecclesiastiques & 3. part. des Croniques. de mesme profession & egalité en nostre Religion que les Religieux du Chœur, ils portent aussi ou peuuent porter, comme les Ordonnances & Offices de nostre Custodie de Lorraine enioignoient, vne petite couronné clericale conformément à la volonté du Pape, qui en fist porter aux premiers compagnons de saint François, & estoient indifferemment eus Superieurs, Commissaires, Prouin-

ciaux, Gardiens & Vicaires, comme il s'est pratiqué en plusieurs lieux, & mesme de nostre temps nous auôs veu Gardien de nostre Conuent de Verdun vn venerable P. Daniel, frere, Lay, à laquelle charge il est mort, chargé de gloire & de merite.

Vn Domi-
nicain ve-
nant de
Goa.

Il y a quelques années, que demeurant de communauté en nostre Conuent de S. Germain en Laye. Vn ieune Religieux Dominicain actuellement venant de la grand ville de Goa, capitale des Indes Orientales, où il auoit demeuré l'espace de dix années consecutives; nous dit, que nos freres y sont tellement reuerés pour leur vertu & egalement tous les Religieux des autres Ordres, qui sont dans les pais Indiens, que sans offencer aucun autre Religieux de nostre Europe, il n'auoit rien veu de pareil en toute la France, en Italie, ny par toutes les Espagnes.

Et veritablement ie dois croire que ce bon Religieux parloit du fond de son ame, & disoit verité, car bien qu'il fut actuellement retournant d'un si long & penible voyage, qui luy auroit pû causer de la distraction, il estoit neantmoins si retenu en ses parolles, si modeste en ses actions, & si mortifié de la veüe, qu'à peine leuoit il les yeux en nous parlât. Il estoit neantmoins François de nation, lequel s'estant transporté en Espagne, fut faict page d'un Seigneur du pais, qui s'embarqua pour Goa, d'où le Viceroy pour sa Maiesté Catholique, l'enuoya depuis Ambassadeur vers le Roy de la grand Chine, qui le logea l'espace de six sep-

maines dans l'un des plus beaux departemens de son Palais Royal, d'où il alla de là passer par la Perse. L'ambassade finie, & l'Ambassadeur estât de retour à Goa, ce bon page faisant fruct de son voyage & de tant de merueilles, grandeurs & richesses qu'il y auoit veues, comme les images & l'ombre des beautez du Ciel, prit resolution de quitter le monde & prendre le party de Dieu en l'Ordre S. Dominique, où il a acquis les vertus & les graces necessaires à un bon Religieux.

Je m'informé de luy des principales raretez du Royaume de la Chine, de cette grande muraille qui separe cet Estat de celuy des Tartares, sur laquelle il auoit marché quelque tēps. De ce grand riche & admirable Palais Royal. Des salles lambrissées de plaques d'or massif, couuertes & enrichies d'escarboucles & de diuerſes pierres precieuses, dans lesquelles l'Ambassadeur son maistre auoit esté receu. Des boules d'or massif esleuées pour embellissement sur des colonnes, & par dessus les coins & saillies des architectures, & de tous les pais par où il auoit passé, & trouuay ses responses conformes à tout ce que j'en ay pû apprendre dans l'histoire, & quelque chose de plus que les autres Auteurs, n'auoient point remaquées.

Ma curiosité me porta encorés de m'enquérir du Royaume de Calicut, qu'il me direstre voisin de celuy de Goa, mais commandé par un Roy idolatre, & que ce qu'il auoit le plus admiré estoit le nombre presque infiny de dia-

mans & autres pierres precieuses, desquelles brilloient toutes les niches & places où estoient posées leurs idoles, ils luy reprochoient comme gens terrestres & grossiers, que le Dieu des Chrestiens de l'Europe, estoit vn Dieu bié pauvre & necessiteux, puis que son peuple & les gens estoient contraincts de passer les mers iusques dans les dernieres extremités de la terre, pour auoir de l'or & des pierreries, desquelles leurs Dieux auoiēt en abondance & de tous biens, comme en effect c'est vn tres-riche pais.

Ce ne sont pas seulement les idoles de Calicut & les peuples idolatres, qui en sont enrichis iusques dans vn furieux excés, mais mesmes les peuples des Royaumes conuertis & particulièrement les dames de Goa quoy que Chrestiennes, en portent iusques sur leurs petits patins enchalssés en des lames d'or, les oreillettes brillantes, leur pendent sur leurs espauls, qu'elles ont simplement couuertes iusques à la ceinture d'une fine chemise de cottō, qui debat avec la blancheur de leur chair, & la Thiarre de pierreries que les grandes Dames ont sur la teste leur semble donner grace avec leur petite iupe volante de fine soye, & dans toutes ces mignardises & parmy tous ses puiffans attrais, encore y voit on reluire de la vertu & plus de pudeur que l'on ne s'imagineroit pas, qui est neantmoins chose rare & bien difficile en vne femme, qui veut estre estimée belle, & faict ce qu'elle peut pour sembler l'estre, il est vray qu'elles ont vn aduantage du climat, qui les porte naturellement dans l'hô-

nesteté, voyent de la deuotion & vne grande modestie aux courtisans, iusques au Viceroy mesme, qui faict souuent les deuotions dans nostre Conuent, où la pieté & les diuerses mortifications, que nos freres exercent tous les Vendredys l'attirent, & puis l'amour qu'elles ont pour l'honneur & la bonne renommée, les tient en bride, mais tousiours y a il du hazard pour elles ou pour autrui.

Ce n'est pas seulement dans les Indes, que la vertu & la pauureté Euangelique des Freres Mineurs a esté admirée & bien receuë d'un chacun, mais par tous les autres endroits du monde où ils ont habité. Iacques de Vitriac Cardinal, dit, que au Leuant les Sarrazins admiroient leur perfection & humilité, & pour ce leur pouruoient librement de viures & logemens: & qu'il auoit veu nostre Seraphique Pere saint François prescher, avec vn tel zele & ferueur au Soldan d'Egypte, que le renuoyant de crainte de tumulte & souleuement de son peuple, il luy auoit dit, prie pour moy, afin qu'il plaise à Dieu me reueler la loy & la foy qui luy est plus agreable, tellement que ce S. Pere esbranla merueilleusement l'esprit & la constance de ce grand Prince, lequel se fut deslors conuertey, sans ceste damnable maxime d'estat, qui luy fist preferer la terre au Ciel, & l'enfer au Paradis, par vne crainte de souleuer son peuple & perdre son Empire, comme si Dieu ne protegeoit point les Princes & les Roys, qu'il le recognoissent & embrassent son party. Veritablement il est bié difficile & non

S. François
au Leuant.

point impossible, que les grands se sauuent, pour ce qu'ils se flattent eux mesmes, & veulent estre flattez, & estre estimez Saincts, lors que bien souuent ils irritent Dieu, & font desesperer vn peuple.

Il cōmença
à regner
l'an 1227.

Epistre du
Pape Ale-
xandre, aux
F. Mineurs
espars par
tout le
monde.

Ce S. Pere eut douze compagnons qui le suiuirent de près, qui sont les douze premiers Martirs de l'Ordre que l'Eglise a canonizé. Le Pape Gregoire 9. qui canoniza S. François, dans la certitude qu'il eut du grand fruct que faisoient nos Freres, leur donna pouuoir de prescher & confesser par tout le monde, où ils se sont depuis esendus, comme il appert par vne Epistre d'Alexandre 4. qui siegeoit l'an 1254. 28. ans apres la mort de S. François que j'ay inserée icy, pour vostre edification, Alexandre &c. A nos fils & bien aymés les Freres Mineurs, voyageant aux terres des Sarrazins, Payés, Grecs, Bulgares, Cumanes, Ethyopiés, Syriens, Hyberiens, Alains, Garites, Gots, Rutheniens, Iacobites, Nubians, Nestoriés, Georgiés, Armeniens, Indières, Mossellaniques, Tartares, Hongrois, de la haute & basse Hongrie, Chrestiiés captifs entre les Turcs, & autres nations infidelles du Leuant, ou quelque autre part qu'ils soient, salut & Apostolique benediction. Ceste lettre est capable d'annoblir pour iamais l'essence de cet Ordre, & rallumer dans les cœurs de ses professeurs vn vehement amour de l'amour de Dieu & du prochain, car 1. on void nos Freres semés aux principales parties du monde, Europe, Asie & Afrique, 2. Ils sont esendus par toutes les Provinces & nations plus esloignées, plus

Sauuages & Barbares de la terre, 3. Ils entreprennent la conuersion de toute sorte d'Infidelles, Schismatiques, Idolatres, Payés, Mahometans, Heretiques, Sarrazins, Turcs, & Iuifs, qui est tout le plus grand seruice qu'on peut rendre à Dieu en ce monde icy.

Enuiron l'an 1272. fut enuoyé en Grece & Tartarie Hierosme d'Ascoli, depuis General, Cardinal, & Pape Nicolas IV. par le Pape, Gregoire X. qui mesnagea si bien & si heureusement la reconciliation de l'Eglise Grecque avec la Latine, qu'il amena au Concile General de Lyon, l'Empereur des Grecs, & quarante Princes, qui se vinrent prosterner aux pieds de sa Saincteté, & luy protesterent toute sorte d'obeyssance. Les Ambassadeurs des Tartares, conduits par le mesme, furent baptisez fort solempnellement à la grande Eglise, avec vn honneur incroyable des Freres Mineurs, occasion pourquoy plusieurs Religieux de cét ordre y furent prescher & enseigner la Foy & la Religion Chrestienne, & derechef Benoist XI. l'an 1341. enuoya deux freres Mineurs pour ses Legats, pour restablir la Foy, & eurent permission de l'Empereur d'y prescher l'Euangile, qui profita estrangement.

L'an 1289. Frere Raimond Geoffroy, Pro-
uençal esleu General, fut prié par le Roy
d'Armenie d'enuoyer des Freres Mineurs
pour les instruire en la Foy. Il y en depet-
cha six qui publierent l'Euangile avec vn ad-
mirable succez, desquels Frere Pierre de

Platur.
Gonzag.

Les Chro-
niques.

Tolentiny recut la couronne du Martyre.

1322. En la ville de Thamné de l'Inde Orientale, furent martyrisés, quatre Religieux passans de Thauris à Cathai, puis à Olmus, de là ils s'embarquerent pour aller à Thamné, distant trois mois de navigation de Thauris, où ils baptizerent grand nombre de ces Infidels. L'un deux nommé frere Jacques fut exposé par deux fois au feu sans brulser, Dieu le conseruant miraculeusement aussi bien que les trois enfans dans la fournaise de Babylone. Et les habitans du pays penant de la terre où ont esté martyrisés ces Saints, & la trempant dans l'eau, & la beuuant sont gueris miraculeusement de leurs maladies.

1332. A la requeste de Zacharie Archeuesque de saint Thadée en la grande Arménie obeyssant au Pape, le General del'Ordre enuoya grand nombre de Religieux d'Aquitaine & Prouence pour la conuersion de ses peuples. Le Pere Arnaut demeurant avec l'Imperatrice Latina de la maison de Sauoye, conuertit son mary, qui obtint du Pape Jean XXII. des Religieux pour la conuersion de ses peuples.

Les Saints
lieux sont
dediez aux
Freres Mi-
neurs.

1336. A la requeste de Robert Roy de Sicile frere de S. Louys Euesque de Tholose, le Turc octroya aux Religieux de saint François, le mont de Syon, le S. Sepulchre de nostre Seigneur & Bethleem, où estoit autrefois le deuot Monastere de Paule & Eustochium, que les Recollects possèdent à pre-

lent avec Nazaret. Le mont Liban, où ils ont edifié plusieurs Conuents depuis deux ans, en ont vn en Galata lez Cōstantinople, avec vne residēce, & vn autre des Conuētuels, & en beaucoup d'autres lieux sur les terres des Turcs, où ils souffrent souuent de grandes persecutions, comme nous font foy les lettres que nous en receuons de nos Freres.

1340. Le Chapitre General enuoya des Religieux en Sclauonie, & au Royaume de Bosnainfectez d'heresie, & y firent tel fruct qu'apres la conuersion de ses peuples, ils y bastirent sept Custodies de Conuents. Ce fut la mesme année que F. Gentil fut martyrisé preschant en Perse, lequel auparauant estant en Babylone, ne pouuant apprendre la langue Arabique, resolu des'en retourner en son pays, il rencontra vn Ange en chemin qui la luy enseigna miraculeusement, ayant depuis heureusement presché en cette langue là.

1341. L'Empereur des Tartares duquel nous auons parlé, fist bastir, quoy que Payen vn Conuent aux freres Mineurs en la ville d'Amalech, & appelloit F. François d'Alexandrie son pere, qui l'auoit diuinement guery d'une fistule, & luy bailla son fils pour estre catechizé & baptizé.

1342. F. Paschal ayant appris la langue Carmanique, de laquelle on vse par tout l'Empire des Tartares, des Perses, Chaldeens, Medes, & Cathai; voyagea & prescha iusque sà la ville de Burgant & Amalech, qui

sont aux derniers confins des Perles & Tartares, où apres plusieurs trauaux il fut martyrisé: deux autres le furent encor preschant à Valnacaistre & Liuonie par le commandement du Duc Idolatre.

Et pour ne parler que des plus insignes missions, Urbain V. 1370. enuoya 60. Religieux de saint François sous la conduite de Frere Guillaume du Prat, qu'il fist Euesque & son Legat au Royaume de Cathai, au mesme an Frere Iean de Naples prescha la Foy au Roy de Gaza, où il fut mis à mort aussi bien que quatre autres en Bulgarie par la faction des Grecs.

Voicy derechef vn solemnel Ambassade d'Eugene quatriesme, qui depute F. Albert de Sartian, insigne Predicateur, & grand homme d'affaires avec 40. Religieux au Preste-jan, duquel il obtient pouuoir d'aller par tout son Empire, & l'an 1439. il retourna à Florence où se tenoit le Concile General, ayant amené avec soy R. P. en Dieu F. André Abbé du Monastere saint Anthoine, Legat & Commissaire du Preste-jan, qui desiroit receuoir instruction, & rendre obeysance à l'Eglise Romaine. Il fut receu avec toute sorte de magnificence & ioye, & enseigné en la Foy & doctrine orthodoxe. Au mesme temps F. Iean de Capistran Vicair General de l'Ordre estant allé en Leuant pour la Reformation des Conuents de l'Ordre, y amena les Ambassadeurs Armeniens, & depuis fut Legat en Lombardie, où il ramena

Du B. Frere
Iean Capistran.

le Duc de Milan qui fauorisoit le Concile de Basle. Martin V. le fit Inquisiteur General du saint Office par toute la Chrestienté où il se trouuoit. Eugene 4. luy confirma cette dignité, & le fit son Legat contre les Iuifs, Payens & Heretiques, & conuertit vn iour à Rome 40. Iuifs avec le Prince de la Synagogue nommé Sagelas, lequel il rendit muet & vaincu en dispute publique, & refusa plusieurs Eueschez pour estre plus libre à prescher, à la requeste de l'Empereur Frideric, de l'Archiduc d'Austriche, d'Eneas Syluius Euesque de Sienne Legat du saint Siege, depuis Pape Pie Second, Nicolas V. l'enuoya en Hongrie & Allemagne, où il auoit acquis vne si grande creance qu'Eneas Syluius en dit ses mots: Frere Iean est vn homme de Dieu, les peuples d'Allemagne le tiennent comme vn Prophete, il a le pouuoir, s'il vouloit au moindre signe de la main, d'esleuer vne grande multitude; il se trouua avec vn Crucifix en main à la bataille que les Chrestiens gaignerent en Hongrie contre Mahomet second, qui auoit tout fraichement enuahy l'Empire de Constantinople, & se promettoit la conqueste de toute la Chrestienté, mais ce seruiteur de Iesus-Christ anima tellement par ses predications les Chrestiens, qu'ils furent victorieux, ce que tesmoignent Nicolas Calcondile Grec, & le liure *Fasciculus temporum*, auteurs qui viuoient au mesme temps.

Epist. 411.

Ce saint personnage estoit receu en tou-

tes les villes avec vn applaudissement & ioye incroyable, le peuple luy alloit au deuant, il estoit receu avec le son des cloches, conduit en la grande Eglise, où l'on entonnoit le Cantique *Te Deum laudamus*, avec la musique & les orgues, chacun admirant sa doctrine, & ses miracles, il baptisa en la Russie & Valachie plus de dix mille ames, chose incroyable par vne seule predication, mais accompagnée de l'esprit de Dieu, à Gabriele en Pologne six vingts ieunes hommes estudiâs dirent à Dieu au monde pour endosser l'habit de Religion, desquels cent se firent Religieux de S. François, il fit brusser six charrees d'instrumens à iotier, & six cens d'attifez & vains ornemens des femmes, lesquels seruent de prise au diable pour deceuoir & perdre les ames.

En quel
temps mou-
rut le B.
Jean de
Capistran.

Le Pape Calixte III. rapporta la victoire des Chrestiens sur les Turcs assiegeant Belgrade l'an 1456. aux prieres de ce grand seruiteur de Dieu, en laquelle il n'y eut iamais que soixante Chrestiens detués, & y demeura bien deux cents quarante mille Turcs, avec 160. pieces de canon qui furent prises. Il mourut la mesme année le 23. Octobre aagé de soixante dix ans quatre mois, desquels il en auoit passé 40 & six mois en la vie Religieuse. Le Souuerain Pontife Calixte III. pleura amerement sa mort, & permit dès lors d'exposer son image en publique, & faire l'office d'un saint Confesseur, & Docteur en l'Euesché de Sulmona, d'où il estoit

il estoit natif: & depuis ayant operé quantité de miracles, Gregoire XV. dernièrement decédé le declara solemnellement bien heureux, avec permission de célébrer la feste & son office en tout l'ordre S. François.

Le Bien heureux frere Jacques de la Mar-
 quel'an 1490. conuertit à la Foy le Royau-
 me de Bosna, dans lequel y auoit plusieurs
 Payens Il prescha douze ans entiers par les
 commandemens d'Eugene IV. Nicolas V.
 & Calixte III. en la Hongrie, Sclauonie, Dal-
 matie, Pologne, Albanie, Prusse, Danne-
 marc, & haute Allemagne, & fit vn tel pro-
 grez & profit qu'il baptiza plus de deux
 cents mille ames, soient Payens conuertis, ou
 Schismatiques reunis à l'Eglise: suiuant la-
 quelle ils n'auoient pas esté deuement bapti-
 sez, manquant quelque chose d'essentiel au
 Baptisme. Il prescha 40. ans durant avec
 vne infinité de miracles, mourut à l'age de 90.
 ans, dont il en auoit vescu 61. en Religion,
 avec vne rigueur & austerité incroyable.
 Sixte IV. à qui il auoit prophetizé qu'il se-
 roit General, Cardinal, & puis Pape, com-
 manda qu'on mit son image en l'Eglise pour
 y estre venerée, son manteau au Couuent de
 Montbrandon où il prit l'habit, chasse les
 Diables encor à present, & la corde & son
 habit sont le mesme au Couuent nostre Da-
 me la neufue à Naples où il est enterré.

Du B. Frere
 Jacques de
 la Marque.

Des deux Indes Orientales & Occidentales, & des conuersions admirables que les Freres Mineurs y ont operé, & comme dès l'an 1621. ils auoient dans la seule Merique plus de cinq cens Conuents en 22. Prouinces.

CHAPITRE XXXIX.

DEux puissantes raisons auoient induits Aristote & quelques autres, à se persuader qu'il n'y auoit autres gens au monde que les habitans d'Europe, d'Asie, & d'Afrique. La premiere estoit la grande largeur de la mer, qui leur fist estimer que les hommes ne scauroient passer tant d'eaux avec aucune force ou industrie, & ce fut ce qui meut S. Augustin à nier les Antipodes.

L'autre raison qui deçut les anciens fut qu'ils creurent que la Zone Torride estoit inhabitable pour son excessiue ardeur, de mesme que les Polaires pour leur froideur insupportable, mais ils se sont trompez comme tout le monde sçait à present, sans qu'il soit necessaire d'en descrire icy les particularitez puisque d'autres en ont desia es-

Le nouveau
monde des-
couuert l'an
1497.

crit, seulement ie diray que ce monde nouveau fust descouuert en l'an 1497. par Americq Vespuce Florentin, qui luy imposa, ou

d'autres à sa faueur, le nom Américque, bien que l'honneur en soit proprement deu à Christofle Colomb Genojs, qui l'a le premier descouuert en l'an 1492. cinq ans auant ledit Americq Vespuce selon quelques Auteurs.

Platus Iesuite donne cette gloire à nos Religieux par dessus tous les autres, d'y auoir passé les premiers, deux desquels fauoriserent grandement Christofle Colomb enuers le Roy Ferdinand pour vne si haute & genereuse entreprise, laquelle estoit estimée pour vne fable par les hommes d'Estat, & trauerferent les mers l'an 1493. sans apprehension des dangers, & hazards qu'ils trouuoient à toute heure pour paruenir en l'Amérique qu'on nomme Inde Occidentale, ou nouveau monde.

L'an 1516 ils edifierent deux Conuents à Cubagna & Cumana, & vn autre à Marcapana, que les Sauuages bruslerent & massacrèrent tous les Religieux. Les premiers qui furent iamais prescher aux Royaumes de Tlaxcalla, Mechioacan, & Mexico furent Freres Mineurs sans redouter la fureur de ses peuples barbares. L'an 1520 le Roy de Mechioacan Sinzinca qui pour regner tout seul auoit fait tuer ses quatre freres, adoucy par la predication Euangelique, receut la Foy & le Baptisme, & se fist nommer François pour l'affection qu'il portoit à nos Religieux: il rendit son Royaume tributaire à l'Espagne, & procura peu après le salut de ses sujets, par

les Sermons du P. Martin de Iesus Recollect.

Florimond
de Raimond
Conseiller
de Bour-
deaux, naif-
sance de
l'Heretic.

L'an 1524. au mesme temps que l'Enfer eut vomy sa rage, & que Martin Luther Apostat se reuolta dans l'Allemagne avec vne partie des Prouinces d'Occident; car quoy qu'il eust l'an 1517. commencé à prescher contre les indulgences, si est-ce qu'il demoura tousiours dans son cloistre avec l'habit Religieux, & ne dit point Adieu tout à fait à l'Eglise Romaine que l'an 1523. vn autre homme de Dieu, & parfait Religieux Frere Mineur Recollect, nommé Frere Martin de Valence, expose & sa vie & son industrie & travail pour la conqueste spirituelle des Indiens Americains; le Pape le crea Commissaire Apostolique, avec toute sorte de pouuoir sur ce requis: Il s'embarqua avec vnze Religieux, cette troupe de gens Apostoliques arriuerent heureusement à Mexico capitale du Royaume.

Quatorze
millions
d'hommes
conuertis
par les FF.
Mineurs
Recollects.

Voilà deux Martins en campagne, l'vn deserteur de la Foy, l'autre professeur d'vne tres estroite pauureté. l'vn combāt pour Sathan, l'autre pour Dieu, l'vn perd les âmes par sa pestifiente doctrine, l'autre sauua par la predication de l'Euangile, & trouuailla si assiduement & avec tant de bon-heur, que luy & ses compagnons conuertirent iusques à 14. millions d'hommes. l'vn desquels comme il est remarqué par quelque Autheur, en baptiza à sa part en plusieurs années enuiron quatorze cens mille, ce qui sembleroit quasi incroyable à ceux qui ne scauroient pas le grand nombre des Prouinces que le Roy des

Espagnes possède au nouueau monde, & le nombre presque infiny de peuple qu'il y a si les Historiens qui ont esté dans le pays, & ceux mesmes qui sont moins portez pour la grandeur d'Espagne ne luy en asseuroient, & tesmoignoient en leur relation.

L'aduis adressé à tous les Princes Chrestiens, publié cette année à Paris, declare hautement & generallement que cette Couronne d'Espagne a conquis depuis enuiron cent ans, cent Royaumes ou Empires aux Indes, & de là jugez combien de peuple il y peut auoir, & combien de Freres Mineurs il y a; car nous en auons par tout.

Voicy ce que dit Dom Frere Barthelemy de las Casas Dominicain, qui a voyagé au nouueau monde enuiron l'an 1540. & 41. où il rapporte que les Espagnols y auoient desia conquis plus de pays que la Chrestienté n'est grande trois fois, puis poursuivant il dit: La premiere terre où les Espagnols entrerent pour habiter, fut la grâde & tres fertile Isle Espagnole, laquelle cõtient six cens lieuës de tour en 5. grâds roiaumes principaux, & quelques autres Prouinces separées, qui n'ont à presët de Princes que le seul Roi des Espagnes.

Il y a d'autres grandes & infinies Isles à l'enuiron & és confins à tous costez, lesquelles nous auons veües les plus peuplées, & les plus pleines de leurs gens naturels, & d'un des plus excellens air que peut estre autre pays au monde, dont la pire est plus fertile que le jardin du Roy en Seuille.

La terre ferme laquelle est loing de l'Isle Espagnola 250. lieues, contient au long de la coste de la mer, plus de dix mille lieues: qui sont desja descouvertes, & s'en descouure tous les iours dauantage, toutes pleines de gens comme vne formiliere de formis. En ce que iusque à l'an quarante & vn s'est descouvert, il semble que Dieu a mis en ces pays là le gouffie ou la plus grande quantité de tout le genre humain.

Ville de
Mexique.

Surius
Chartreux
en son hist.

D'autres Autheurs rapportent que dans la seule ville de Mexique capitale du Royaume de mesme nom, au temps qu'elle fut reduite sous la puissance du Roy des Espagnes, ce qui aduint en l'an 1520. le 13. d'Aoust, par Ferdinand Cortez, on y contoit en soixante & dix mille maisons, iusques à huit cens mille habitans, entre lesquels il y auoit trente Potentats, ou grands Seigneurs, qui auoient chacun cent mille vassaux, & trois mille Lieutenans qui en auoient encores d'autres sous eux; & en l'Isle Espagnola, autrement saint Dominique qui n'est rien en comparaison de ce puissant Empire, qui enceint tant de Prouinces, & de Royaumes, on a conté iusques à quinze cens mille hommes & en a on veu iusque à cent mille prendre la discipline processionnellement en memoire des coups de fouers dont on a menrry le corps du Fils de Dieu, tant estoit grande leur ferueur & deuotion, & le grand fruct de nos Freres parmy ces patures Indiens.

Dieu benissoit tellement les travaux de ses seconds Apostres, que Surius Chartreux remarque, qu'il n'y en eut pas vn qui n'en baptisast plus de cent mille pour sa part, & le Pere Motonilia Recolect Espagnol, qui fut le dernier de ces douze premiers Peres, en baptisa quatre cents mille; & pour sa grande pauureté, les Indiens l'appelloient Motonilia, qui signifie pauvre en leur langue.

Vn Recolect baptisa 400 milles hommes.

Le Souuerain Pontife ayant ouy le grand fruct que ces zelans & feruans Religieux auoient faict en cette nouuelle Espagne, à la requeste de l'Empereur Charles V. il pourueut du premier Euesché de Mexique l'an 1528. Frere Iean de Zumaragna, homme de sainte vie, & infatigable parmy ces penibles voyages qu'il fit sans iamais manier argent. Il fit toutes les visites de son Euesché à pied quelque decrepiré qu'il fut, car il est mort aagé de quatre vingt ans, son corps se conserue encor miraculeusement tout entier. C'est d'une lettre qu'il escriuit à nos Peres au Chapitre tenu à Toulouze que nous apprenons tout plein de particularitez des Indes, de l'ordre qu'il establit en la conuersion des Infidelles, institution des Colleges vis à vis de nos Conuents : où les enfans estoient imbus & endoctrinés en la foy, & aux bonnes lettres.

De F. Iean de Zumaragna premier Euesque de Mexique.

Ces furent aussi les Freres Mineurs Recolects, de la Prouince de saint Ioseph, qui passerent les premiers aux Isles Philip-

4. Part.
Chr. 1. 2.

pires, & l'an 1540. le Roy de Portugal ayant esté instamment requis par le Roy de Zeilan, de luy enuoyer des personnes qui le peussent instruire en la Religion Chrestienne, il en donna la commission à sept de nos Religieux, qui prescherent si vtilement & fructueusement, qu'ils convertirent le Roy, & toute sa famille.

Conuersiõ
du Royau-
mes de Vo-
xu par les
Recolects.

Le sang de nos Religieux qui a arrousé la terre du lappon la leur a rendu plus fertile, qui pourroit raconter les supplices cruels, qu'on fit souffrir à six de ces bons Peres, l'an mille cinq cens nonante sept auant que de les faire barbarement mourir par le feu, & le fer, mais en recompense, ils ont bien gagné des ames à Dieu, car l'an mille six cents quinze, le cinquisme d'Octobre, arriua à Rome Fraxicura Ambassadeur du Roy de Voxu, qui est vne Prouince située à la partie Orientale du Lappon, ce solennel Ambassade estoit de cent Gentilhommes lapponois, qui s'embarquerent le 28. Octobre de l'an mille six cents treize pour faire voyle en ces quartiers, & venir rendre l'obeissance au Souuerain Pontife, la longueur & l'incommodité d'un voyage d'un an entier, ayant passé deux fois la ligne Equinoctiale, les ardantes & intolerables chaleurs qu'ils y souffrirent leur causa des maladies dont la pluspart moururent, excepté vingt cinq qui aborderent en Espagne le 10. Nouembre 1614. Ils estoient conduits par le Pere Louys Sotello Recolect qui harangua

deuant le Pape, apres qu'ils eurent esté magnifiquement receus & traictés à Rome, où rien ne fut oublié ny espargné, tant à leur entrée Royale qu'au reste de la despence qui fut tres-splendide, & tout autre que ne portoit l'escriit qui en fut imprimé, comme m'a eu assuré vn tres-honneste Prestre seculier qui se trouua là present en toutes les ceremonies, & dans nostre Conuent où lesdits Ambassadeurs estoient logez avec le Pere Louys, pour faire voir à ces Seigneurs l'apponois la grandeur & puissance de Rome, & combien l'Eglise Romaine cherit & fait estat de ses enfans qui la recognoissent pour mere, & luy rendent l'obeissance filiale.

Fraxicura reconnut le Pape au nom de son Roy, pour Vicaire de Iesus-Christ en terre, & Pere commun de tous les Chrestiens. Il rendit tesmoignage que le P. Louys auoit donné entrée à la predication de l'Euangile dans le Royaume de Voxu, où il auoit trauaillé l'espace de quatorze ans continuels, & requist instammét sa Sainteté de luy donner des Religieux de S. François pour la continuation d'un si bon œuvre, promit de les ayder, & de bastir des Conuents en ses terres, comme le Roy par tout son Royaume.

Son Roy nommé Idate pour marque de sa vraye cōuersion & zele à la Religion, ruina & brusla huit cens Idoles, avec leurs pagodes, il a permis à tous ses sūiets de se faire Chrestiens, d'où on espere vne ample & riche moisson d'ames; Il deliura 18. cens personnes de la mort qu'un Gouverneur sien cousin estoit resolu

Prouincia
Canarié.

de Mexico,
Iampico de
Iucathá de
Mechoacá
S. Cathari-
ne, Guati-
mala. Nica-
ragua. Phi-
lippinar.
Zacatech.
Mexico.
Discal. Xa-
fisco. Flori-
de. Au Pe-
rou. Pro-
uincia de
Lima, Noui
regni Gra-
natens de
Chile. de
Quiro. de
Caracas. de
las Charcas
de Paragua.
de Tucamé.
De S. Tho-
mas & de
Malaca.

de faire mourir, le Iesuite Platus de son téps dit que nous y auions desia 13. Prouinces, dont la moindre est de 12. Cōuēts, & celle de Mexi-quo en cōtenoit 50. par la derniere liste que nos Peres en ont veu de l'an 1621. Ils y ont re-marqué plus de 500. Conuents en 22. Prouin-ces. Ces grandes entreprises, ces fameuses cō-uerfions ne sont que pour la vraye Eglise, la-quelle de la mer d'infidelité tire au riuage du Christianisme les ames humaines, sous l'heu-reuse cōduite des Religieux Catholiques qui ont fait surgir es ports reculés & incōnus, la nef de l'Eglise, ils ont ancré aux lieux où ia-mais les Apostres n'auoient abordés, leurs premieres traces sont marquées du sang bouillant de leur affectiō, bien souuēt captifs ils ont captiué les hommes, & vainquans ont vaincu leurs vainqueurs, de sorte que nous pouuons dire que sous leur banniere l'Eglise est comme sortie du monde, pour acquerir de nouueaux mondes.

Pour l'Orientale, la descouuerte & cōqueste estoit au Roy de Portugal Dom Emanuel, quien l'an 1500. y enuoya 8. Freres Mineurs sous la conduite de Pierre Aluares de Cabral, qui y furent tous martyrisés excepté F. Héry de Conimbre, qui fut à son retour Confes-seur du Roy, & Euesque de Cepta. Ils arri-uerent à Calicut & de là passerent à Cochin, où ils commencerent à arborer la Croix, qu'ils prescherent à ces Nations Barbares.

L'an 1502. au seconds voyage qui fit Vasco de Gama, il y mena de nos Religieux qui bap-tiserent vne multitude incroyable d'enfans,

& les Chrestiens Orientaux tesmoignoient à Vasco, le contentement qu'ils auoient de voir des Chrestiens en leurs pays, & se re-
noient fort ses obligez.

Frere Garcia de Padilla, fut creé le premier Euesque de l'Isle S. Dominique ; autrement Espagnole. Et l'an 1510. fut basti vn Conuent à Goa fameuse ville & capitale du Leuant, qui seruit apres comme de Seminaire, d'où l'on tiroit les Religieux pour enuoyer par les Royaumes de Cauanori, de Cochin, Coilani, les autres alloient avec l'armée, preschoient, seruoient aux hospitaux, & s'occupoient aux œuures de charité, à enseigner & catechiser les enfans: iusques à ce que l'an 1542. ils resignerent le College au P. François Xavier, afin d'auoir moins d'embaras à prescher l'Euangile, dequoy faiet foy la premiere vie de saint François Xavier, imprimée in 8. & composée par Horace Turselin de la mesme compagnie, quoy que la derniere ait oublié ceste particuliere beneficence, ce qui a faiet dire à Gonzague, tout le trauail & la peine qu'il y a eu en l'Inde Orientale durant 40. ans continuels, soit à guerir les malades, soit à conuertir les infidels, soit à instruire les Catechumenes, soit à administrer les Sacremēs, ou bien enfin à exercer les autres œuures de charité, toute ceste fatigue estoit chargée sur le dos des Religieux de saint François.

Lopes de Gomata seculier. Histories des Indes ch.

34.

De nostre Conuent & College de Goa.

Mafée Icsuite. Gonzag de origin. Seraph. Reli. pag. 3. & 4.

De la pesche du grand poisson & des ceremonies qu'ils y observent. Des Predicateurs des poissons , & de la grandeur de la mer douce.

CHAPIRE XXXX.

*Je partis
pour la
pesche.*

QUand ie viens à considerer la vie , les mœurs & les diuerſes actions de ceux qui ne vous cognoissent point (ô mon Dieu , ie ne ſçay qu'en penser sinon que c'est vn continuel aueuglement & vn abisme de folie. Desireux de voir les ceremonies & façons ridicules que nos Hurons observent à la pesche du grand poisson , ie partis du bourg de S. Ioseph , avec le Capitaine Auoindaon au mois d'Octobre , & nous embarquames sur la mer douce , moy cinquiesme dans vn petit canot , où après auoir long-temps nauigé & aduancé dans la mer par la route de Nord , nous nous arrestames & primes terre dans vne Isle commode pour la pesche , où des ja s'estoient cabanez plusieurs Hurons , qui n'attendoient rien moins que nous.

*On com-
mença par
vn festin.*

Dés le soir de nostre arrivée , l'on fist vn festin de deux grands poissons , qui nous auoient esté donnez par vn des amis d'Auoindaon , en passant deuant son Isle où il peschoit : car la coustume est entr'eux , que les amis se visitans

es vns les autres au temps de la pesche, de se
 tire des presens mutuels de quelques poissôs.
 Nostre cabane estant dressée à l'Algemequin-
 e, chacun y choisit sa place selon l'ordre or-
 donné, aux quatre coins estoient les quatre
 principaux, & les autres en suite, arrangez les
 uns ioignans les autres, assez pressez. On m'a-
 voit donné vn des coins dès le commencement
 comme à vn chef, mais au mois de Novembre
 où il commença à faire vn peu de froid, com-
 me il faiet ordinairement és contrées du Nord,
 je me mis plus au milieu, & ceday mon coin à
 l'autre, pour pouuoir participer à la chaleur
 des deux feux, que nous auions dans la cabane.

Preséance
 aux caba-
 nes.

Tous les soirs on portoit les rets environ
 un quart ou demie lieuë au plus, auant dans la
 mer, & puis le matin venu, dès la pointe du
 jour on les alloit leuer souuent garnis de tres-
 bons gros poissons; comme assihendos, trui-
 es, esturgeons, & autres qu'ils esuentroient,
 comme l'on faiet aux moluës, puis les esten-
 doient sur des ratteliers de perches dressées ex-
 posées, pour les faire seicher au Soleil, où en tēps
 incommode & de pluyes, les faisoient bouca-
 rer à la fumée sur des clayes, ou au dessus des
 perches de la cabane, puis serroient le tout dās
 des tonneaux, de peur des chiens & des souris
 non des chats, car ils n'en ont point, & ceste
 rouison leur sert pour festiner, & pour don-
 ner goust à leur potage, principalement en
 tēps d'Hyuer qu'ils tiennent fort la maison,
 manquent de douceurs.

Quelquefois ils reseruoient des plus grāds

Tireur de
l'huyle du
poisson.

& gras assihendos, lesquels ils faisoient bouillir en de grandes chaudieres pour en tirer l'huyle, laquelle ils amassoient fort curieusement avec vne cueillier par dessus le bouillon, & la serroient en des bouteilles d'escor d'un certain fruit ressemblant à nos calbasse qui leur viennent d'un pais fort esloigné à qu'ils me disoient: cet huyle est aussi douce agreable que beure fraiz, aussi est elle tiré d'un tres-bon poisson, incogneu aux Canadiens & encore plus icy.

Quant la pesche est bonne, & qu'il y a nombre de Sauvages cabanez en vn lieu, on ne voit que festins & bāquets reciproques, qu'ils se font les vns aux autres, & s'y resioüissent de fort bonne grace, sans aucune dissolution, & action qui sente de sa legereté ou sottize. Ceux qui se font dans les bourgs & villages sont passablement bons; mais ceux qui se font à la pesche & à la chasse, sont les meilleurs de tous quand l'heure en donne, car ils n'y espargnent rien. Comme à vne personne de laquelle ils faisoient estar, ils auoient accoustumé de me donner à tous les repas, le ventre de quelque grand assihendos, par ce qu'il est fort plein de graisse & tres-excellent, mais comme ie n'ay iamais esté beaucoup amateur de la graisse qui est le sucre des Sauvages, ie le changeo volontiers contre vn morceau plus maigre, & eux se consoloient du mien. Neantmoins tout bien consideré le plus assure est suiuant le conseil de S. Bonnaventure, māger simplement ce que l'on dōne & ne point faire choix des vires.

des, sous pretexte mesme de prendre du pire.

Ils prennent sur tout garde de ne fetter au-
cune arreste de poisson dans le feu, & y en ayāt ^{Ne ietter} les arrestes
ietté, ils m'en tancerent & les en retirerēt ^{de poisson} fort
promptement, disans que ie ne faisois pas biē, ^{au feu.}
& que ie serois en fin cause qu'ils n'en pour-
roient plus prendre, pour ce (disoient ils,) qu'il y auoit de certains esprits, ou l'esprit des
rets ou des poissons mesmes, desquels on bru-
sloit les os, qui aduertiroien les autres pois-
sons de ne se pas laisser prēdre, puis qu'on les
traictoit de la sorte & sans aucun respect.

Les Canadiens & Montagnais ont aussi
cette coustume de tuer tous les eslans qu'ils
peuuent attraper à la chasse, croyans que ceux
qui s'eschappent vont aduertir les autres de
se cacher au loin peur de leurs ennemis, &
ainsi en laissent ils par fois gaster sur la terre,
quand ils en ont des ja suffisamment pour leur
prouision, qui leur feroient bon besoin en au-
tre temps, pour les grandes disettes qu'ils
souffrent souuent, particulièrement quand les
neiges sont basses, auquel temps ils ne peu-
uent que tres-difficilement attraper la beste,
& encore en danger d'en estre offensé, mais
le plus grand mal que cause ceste superstition
est, qu'ils ruinent la chasse du poil, de l'eslan &
du cerf, comme nos Hurons ont faiēt celle du
castor en leur pais, où il ne s'en trouue plus au-
cun, & par ceste destruction, ils s'enioignent
souuent des ieunes plus rigoureux que ceux
de l'Eglise, & des plus austeres Religieux des
Cloistres.

Vn iour comme ie pensois brusler au feu le poil d'un escurieux mort , qui m'auoit esté donné, ils ne le voulurent point permettre & me l'enuoyerent brusler dehors , à cause des rets, qui estoient pour ldrs dans la cabane, disans: qu'elles le diroient aux poissons, ie leur dis que les rets ne voyoient goutte & n'auoient aucun sentiment, ils me respondirent que si, & qu'elles entendoient & mangeoient: donné leur dōc de la sagamité, leur dis je, quelqu'un me repliquèrent, ce sont les poissons qui leur donnent à manger & non point nous.

Ie tançay vne fois les enfans de la cabane, pour quelques mauuais & impertinens discours qu'ils tenoient , il arriua que le lendemain matin ils prindrent fort peu de poisson, ils l'attribuerent à cette reprimende, qui auoit esté rapportée par les rets aux poissons, & en murmurèrent, disans, que si mes prieres leur obtenoiēt par fois du poisson, que i'auois esté cause à ce coup qu'ils n'auoient rien pris , & pour chose que ie leur pû dire du contraire, ils resterent dans leur croyance premiere , que tancer leurs enfans du mal, estoit empescher leur pesche.

Vn soir que nous discourions des animaux du païs, voulans leur faire entendre que nous auions par toutes les Prouinces de l'Europe, des lapins & leuraux, qu'ils appellent *Quiettonmalisia* , ie leur en fis voir la figure par le moyen de mes doigts en la clarté du feu, qui en faisoit donner l'ombrage contre la cabane, par hazard on prit le lendemain matin du poisson.

poisson beaucoup plus qu'à l'ordinaire, ils
creurent que ces figures en auoient esté la
cause, & me prierent de prendre courage &
d'en faire tous les soirs de mesme & de leur ap-
prendre, ce que ie ne voulu point faire, pour
n'estre cause de ceste superstition & pour n'ad-
herer à leur folie & simplicité, digne de com-
passion.

En chacune des cabanes de la pesche, il y a vn ^{Predica-}
Predicateur de poisson, qui a accoustumé ^{teurs des}
de les prescher, s'ils sont habilles gens ils sont ^{poissons.}
fort recherchés, pour ce qu'ils croyent que les
exhortations d'un habile homme, ont vn
grand pouuoir d'attirer les poissons dans leurs
rets, comme eux l'eloquence d'un grand Ci-
ceron à sa volonté. Celuy que nous auons
s'estimoit vn des plus raiissans, aussi le faisoit
il beau voir demener & des mains & de la
langue quand il preschoit, comme il faisoit
tous les soirs, après auoir imposé le silence &
faict ranger vn chacun en sa place, couché
de son long, le ventre en haut comme
luy.

Son thème estoit: que les Hurons ne
brussent point les os des poissons & qu'on
ne leur faict aucun mauuais traictement,
puis en fustre avec des affectious compa-
teilles exhortoit les poissons, les conjuroit,
les inuitoit & les supplioit de venir, de se
laisser prendre & d'auoir bon courage, &
de ne rien craindre, puis que c'estoit pour
seruir à de leurs amis, qui ne brussent point
leurs os. Il en fist aussi vn particulier à

mon intention par le commendement du Capitaine, lequel me disoit après, hé, mon nepeur, voyla il pas qui est bien? ouy, mon oncle, à ce que tu dis, luy respondis ie, mais toy & tous vous autres Hurons auez bien peu de iugement, de penser que les poissons entendent, & ont l'intelligence de vos sermons & de vos discours, il croyoit que si neantmoins, & ne pouuoit estre persuadé du contraire.

Offrent du
petun en
sacrifice.

Pourquoy
ils prient
les Deitez.

Pour auoir bonne pesche ils brulent aussi du petun, en prononçans de certains mots que ie n'entends pas. Ils en iettent aussi à mesme intention dans l'eau, à des certains esprits qu'ils croient y presider, ou plustost à l'ame de l'eau, car ils croient que toute chose materielle & insensible, a vne ame qui entend & comprend, la prient à leur maniere accoustumée d'auoir bon courage, & de faire qu'ils prennent bien du poisson, & fassent vne pesche qui leur soit profitable & aduantageuse. Voila où aboutissent toutes leurs prieres, ou pour leur ventre, ou pour leur santé, ou pour la ruyne de leurs ennemis, & n'en font point d'autres à quelque esprit que ce soit, sinon pour les voyages & la traite, car de rendre graces à Dieu, ou de luy demander pardon, avec promesse de mieux faire, il ne s'en parle point, non plus que des autres choses qui regardent le salut, si on ne leur en discourt.

Les simplicités que ie vous ay descrites, tesmoignent assez que nos Sauvages n'ont

pas l'esprit cultiné, & qu'ils viuēt dans vne grande ignorance, mais si nous considerons de près, nous trouuerons en France des personnes aussi mal polyes qu'eux & presque en pareille ignorance, & si i'oze dire plus ignorantes. I'ay veu des François aux Hurons, enseigner aux Sauvages des folies & des inepties si grandes, que les Sauvages mesmes s'en gaudioient avec raison, & comment n'eussent ils esté leur marchandises & leurs folles opinions deuant vn peuple sans science, puis qu'à nous mesmes ils nous en propoisoient de si ridicules qu'elles ne seroient pas pardonnables à des enfans, & cependant c'estoient personnes de plus de trente cinq à quarante ans d'age fort incapables d'estre enuoyez parmy vn peuple, que l'on doit reduire & amener à Dieu par science & bonne vie.

Ignorance
des Sauua-
ges & Chre-
tiens.

Nous trouuâmes dans le ventre de plusieurs grands poissons, des ains faicts d'un morceau de bois accommodé avec vn os, qui seruoit de trochet & lié fort proprement avec de leur chanure, mais la corde trop foible pour tirer à bord de si gros poissons, auoit faict perdre & la peine & les ains de ceux qui les auoient iettez en mer, car veritablement il y a dans cette mer douce des esturgeons, assihendos, truittes & brochets, si monstrueusement grands qu'il ne s'en voit point ailleurs de plus gros, non plus que de plusieurs autres especes de poissons qu'on y pefche & qui nous sont icy incognus.

Cette mer douce de laquelle tant de personnes sont desiruses de scauoir, est vn grand-
Grandeur
de la mer
douce.

diffime lac qu'on estime auoir près de trois cens lieues de longueur de l'Orient à l'Occident, & enuiron cinquante de large, fort profond, car pour le sçauoir par experience nous iettames la sonde vers nostre bourgade assez proche du bord en vn cul de sac, & trouuâmes quarante huit brassées d'eau, mais il n'est pas d'une égale profondeur par tout, car il l'est plus en quelque lieu & moins de beaucoup en d'autres.

Il y a nombre infiny d'Isles, ausquelles les Sauuages cabanent quant ils vont à la pesche ou en voyage aux autres nations qui bordent ceste mer douce. La coste du midy est beaucoup plus agreable que celle du nord, où il y a quantité de rochers en partie couuerts de bois, fongeres, bluets & fraizes, on tient que la chasse de la plume y est bonne, & à laquelle vnes celle du poil, & qu'il y a force caribous & autres animaux rares & de prix, mais ils sont difficiles à prendre. Le truchement Bruslé avec quelques Sauuages, nous ont asseuré qu'au de-là de la mer douce, il y a vn autre grandissime lac, qui se descharge dans icelle par vne cheute d'eau quel'on a surnommé le saut de Gaston, ayant près de deux lieues de large, lequel lac avec la mer douce contiennent enuiron trente iournées de canaux selon le rapport des Sauuages, & du truchement quatre cens lieues de longueur.

Lors qu'il faisoit vn grand vent, nos Sauuages ne portoient point leurs rets en l'eau par

ce qu'elle s'esleuoit alors comme la grand mer, & en temps d'un vent mediocre, ils y estoient encore tellement agités, que c'estoit assez pour me faire louer Dieu qu'ils ne perissoient point là dedans, & sortoient avec de si petits canots du milieu de tant de flots que ie contemplois à dessein du haut de quelque rocher, où ie me retirois seul tous les iours, ou dans l'espaisseur de la forest, pour dire mon office & faire mes prieres en paix.

Où ie disois
mon office.

Ceste Isle estoit assez abondante en gibier, outardes, canars & autres oyseaux de riuieres, pour des escurieux il y en auoit telle quantité, de suisses & autres communs, qu'ils endommageoient fort la seicherie du poisson, à laquelle ils estoient continuellement attachez, bien qu'on taschast de les en dechasser par la voix, le bruit des mains & à coup de pierres qu'ils craignoient peu, & estans saouls ils ne faisoient que iouer & courir les vns après les autres soirs & matin. Il y auoit aussi des perdrix grises l'une desquelles m'approcha vn iour de fort près en vn coin dans le bois, où ie disois mon office, & m'ayant regardé en face, s'en retourna à petit pas comme elle estoit venue faisant la rouë comme vn petit coq-d'inde, & tournant continuellement la teste en arriere me regardoit & contemplotoit doucement sans crainte, aussi ne voulu ie point l'effaroucher ny mettre la main dessus, comme ie pouuois faire, & la laissay aller.

Quantité
d'escurieux
& gibier,

Sauvages
n'osent
s'embar-
quer sans
mon aduis.

Vn mois & plus s'estant esoulé, on com-
mença de penser de nostre retour, comme le
grand poisson du sien, car il change de con-
trée suivant les Lunes & les saisons comme
les moluës en la mer : Mais comme il fut
question de partir, le Lac s'enfla si fort qu'il
fist perdre aux Sauvages l'esperance d'ozer
s'embarquer ce iour là, craignant le danger
eminent de quelque naufrage par la tour-
mente qui s'alloit renforçant : Cependant ie
demeurois seul dans nostre cabane, lors qu'à
l'issuë de leur conseils ils me vinrent trouuer
pour auoir mon aduis, & sçauoir ce qu'il
estoit question de faire, car sous pretexte que
ie leur parlois souuent de la toute bonté &
puissance de nostre Seigneur, il leur estoit
aduis que i'auois quelque credit enuers sa
diuine Majesté, & que rien ne m'estoit im-
possible non plus qu'incognu, c'est ce qui
me donnoit bien de la peine, & plus que
n'eust pas faict vne autre opinion de moy,
car autrop il y a tousiours du danger. Il me
fallut à la fin aller voir la mer pour les con-
tenter, autrement ie n'eusse point eu paix
aueceux, puis que tous s'estoient resolus à
ce que i'ordonnerois, comme si i'eusse eu
quelque experience de la marine, ou que
Dieu m'eust donné assurance des choses à
venir : Iel'auois desia veuë dās ses choleres,
depuis vn quarr d'heure, & sçauois qu'il y
alloit d'un grand hazard de s'y embarquer,
neantmoins pour les contenter, il me fallut
derechef sortir dehors, & la considerer

dans ces furies plus d'une fois.

L'ayant bien considérée, & les éminents perils qu'on pouvoit à bon droit apprehender, ie priay Dieu qu'il me donnast lumière pour donner bon conseil, & n'estre cause de refroidir en ces pauvres gens, par mon peu de foy, la confiance qu'ils commençoient d'avoir de sa divine Majesté: Mais ou par presumption, ou par le iuste vouloir de Dieu qui faict parler les muets, ou par vne foy double que nostre Seigneur me donna lors. Je leur dis qu'ils devoient partir, & que dans peu la mer calmeroit à leur contentement, ce qu'ils creurent tellement, que ma voix se porta dès aussi tost par toutes les cabanes de l'Isle qui les fist si bien diligenter pour l'esperance de la bonace prochaine, qu'ils nous devancèrent tous, & fumes les derniers à desmarrer, non par paresse ou crainte, mais par trop d'affaires & d'embaras.

Si tost que la flotte fut en mer, ô merueille du tout-puissant, les vents cessèrent, & les ondes s'acoiserent calmes & immobiles comme vn plancher, iusques au port de S. Ioseph, où ie rendis graces à Dieu, tandis que mes Sauvages disoient, ho, ho, ho, on niané, admirant ses merueilles.

Il estoit nuit fermée avant que nous y pusmes prendre terre, & puis mes gens estoient tellement embarrassés de leurs poisons & fillers, qu'ils furent contraints de cabanner là iusques au lendemain matin qu'ils

Arriva mes
au port de
S. Ioseph.

Fus seul en se rendirent au bourg; mais pour moy qui n'auois rien qui me pût empêcher d'aller que deux petits poissons qu'ils m'auoient donné, ie partis delà & m'en allay seul tra- uers les champs & la forest en nostre caba- ne, qui en estoit à vne bonne demie lieuë esloignée, i'eü bien de la peine de la trouuer à cause de la nuit, & m'esgarois souuent, mais la voix de quelques petits Sauvages qui chantoient là es environs me radressoit, autrement i'estois pour me voir coucher de- hors, & me repentir de m'estre mis en che- min.

Ce qui m'auoit le plus pressé de partir seul à heure induë, estoit le doute de la santé du Pere Nicolas, que les Sauvages m'auoient voulu faire mort, mais ie le trouuay en tres-bonne santé, Dieu mercy, de quoy ie fus fort ioyeux, & eux au reciproque furent fort aydes de mon retour, & de ma bonne disposition, & me firent festin de trois pe- rites entrouilles cuittes sous la cendre chau- de, & d'une bonne sagamité de maiz, que ie mangeay d'un grand appetit, pour n'auoir pris de toute la iournée, qu'un bien peu de bouillon de bled d'Inde, fort clair, le matin auant partir.

*De la santé & maladies des Sauvages.
De leurs Medecins & Apotica-
res, & de quelques racines de gran-
des vertus.*

CHAPITRE XXXXI.

SI au Palais Royal est estimé & favori celuy
que le Roy careffe : en la maison de Dieu
est aussi preferé celuy que Iesus-Christ cha-
stie. Depuis le peché de nostre premier Pere,
tous les hommes ont esté suiectz à maladies &
infirmitez, du corps ou de l'esprit. A la veri-
té les causes de nos maux sont diuerfes, mais
les remedes propres sont bien differens aussi.
Dieu chastie les bons ou les esprooue par di-
uerfes afflictions & maladies, au contraire des
meschans qui sont punis pour leurs propres
demeurres, hélas ! nous sommes souuent trom-
pez en nos iugemens, car tels semblent estre
sauuez quand au iugement des hommes qui
deuant Dieu sont en voye de damnation, &
ceux que l'on croit souuent estre reprochiez,
sont du nombre des enfans de Dieu : car le
monde ne iuge que de l'esorce & Dieu iuge
le dedans. Dieu demeure avec les malades &
affligez, & le diable avec ceux qui sont en pro-
sperité, & à qui toutes choses viennent à sou-

Des visites
de Dieu.

hair, tesmoin l'histoire de saint Ambroise où il est dit, qu'il n'eust pas plustost aduertty son compaignon de sortir de la maison, où toutes choses prosperoient comme vne maison maudite de Dieu, que tout fust abismé & le Maistre & la Maistresse escrazé avec leurs enfans sous les ruynes. O mon Dieu! le B. Frere Gille compaignon de saint François auoit bien raison de dire que le demon de la prosperité estoit plus dangeereux que celui de l'aduersité, car nous en voyons plus se perdre dans l'abondance que dans la disette, car peu se desesperent pour l'vne & tous se glorifient pour l'autre.

Constans fils du grand Constantin, qui fit auant de maux à l'Eglise, que son pere luy auoit fait de bien, heretique Arrié qu'il estoit, se flattoit sur la prosperité de ses victoires, & de là tenoit sa vie par vne iuste punition de Dieu, de s'imaginer, qu'il estoit dans la vraye foy puis qu'il receuoit tant de faueurs du ciel, comme si les faueurs plustost que les disgraces estoient des tesmoignages du vray amour de Dieu. A quoy selon le dire de Senecque le Philosophe, qu'il n'y a rien pis que la felicité des meschans, luy respondit fort bien Lucifer Euesque de Salate contemporain du grand S. Athanase, en vn liure qu'il intitula. Des Roys Apostats, où il luy monstre que la prosperité temporelle n'est pas vne marque asseurée de la vraye foy, & que bien souuent Dieu permet que les plus meschans Princes regnent long-temps.

& les bon peu, ce qu'il confirme par les
 exemples de Baza Roy d'Israël qui regna
 vingt quatre ans, & son fils trente cinq ans, Bar 33.
 & Manassés Roy de Iuda, le plus meschant nom. 10. &
 de tous les Roys, bien que fils d'un bon pere 11.
 Ezechias, qui regla cinquante sept ans, ce
 qui nous doit assez faire voir la vanité de ce
 siecle, où les plus mauuais ont plus grand
 part que les gens de bien, auquel il semble
 souuent que toutes choses leur aillent à con-
 trepoil, ce que Dieu permet pour les cha-
 stier comme enfans, ou pour les rendre plus
 conformes à luy comme amis, & pour cet ef-
 fet leur promet des ennemis pour les punir
 de leur fautes (car il n'y a si bon qui ne man-
 que) ou pour les empescher l'attaché des
 grandeurs d'icy bas, où ils se pourtoient ay-
 sement perdre sans la malice de ses ennemis,
 qui émoussent leur gloire, car d'un aduertis-
 sement ou conseil d'amis on en fait assez peu
 d'estat s'il n'est à nostre goust, bien que Dio-
 genes dise que pour cognoistre soy-mesme
 les fautes, il faut auoir vn vray amy, ou en-
 nemy, car l'un n'y l'autre ne vous celle rien,
 mais quand les pechez sont grands, & que
 nous auons trop offensé, si Dieu ne nous dir
 mort, c'est signe que nous sommes perdus,
 sinon il nous enuoye des maladies, des per-
 tes de biens, des trauerses d'amis, & de plus
 il esleue les meschans contre nous qui nous
 esprouuent comme l'or dans le creuset. Et
 de fait Anastasius rapporte qu'un bon Re-
 ligieux se plaignant à Dieu, de ce qu'il

auoit permis que Phocas apres auoir tué l'Empereur Mauritius, & ses enfans, s'empara de l'Empire; Dieu luy respondit, qu'il l'auoit permis pour punir son peuple, & que s'il en eut trouué vn plus meschant pour luy mettre la couronne sur la teste, il l'eust faict.

Parlons maintenant de la santé du corps, & des maladies ordinaires qui arriuent indifferemment & naturellement aux bons, & aux mauuais, afin de ne nous esloigner trop de nostre premier sujet, & disons que les anciens Egyptiens auoient accoustumé d'vser de vomitifs pour guerir les maladies du corps, & de sobriété pour se conseruer en santé, car ils tenoient pour maxime indubitable, que les maladies corporelles ne prouenoient que d'une trop grande abondance & superfluité d'humeurs, & par consequent qu'il n'y auoit aucun remede meilleur pour la santé, que le vomissement & la diette, mais la diette principalement.

Troque Laerce, & Lactance, dient la cause pourquoy les Grecs demeurerét si long temps sans auoir Medecins, ce fut pour ce qu'ils cueilloient au mois de May des herbes odoriferantes qu'ils gardoient en leurs maisons, se faisoient seigner vne fois l'an, & non pas tous les iours comme l'on faict à Paris, se baignoient vne fois le mois, & ne mangeoient qu'une fois le iour, & estoient si exacts obseruateurs de cette temperance & sobriété, que Platon ayant esté interrogé s'il

auoit veu aucune chose nouuelle en Sicile; Ie vy, respondit-il, vn môstre en nature, c'est vn homme qui se saouloit deux fois par iour. Cela, disoit il, pour Denys le Tiran, lequel fut le premier qui introduit la coustume de manger deux fois par iour, sçauoit est d'isner à midy, & souper au soir, car toutes les autres Nations auoient accoustumé seulement de souper le soir, & les seuls Hebreux disnoient à midy.

De uoloir à present exiger cela de nous en general, il y auroit bien des oppositions, mesmes dans les Cloistres, car la nature n'a plus les forces du passé, & va tousiours debilitant à mesure que la fin du monde approche, c'est vne science que i'appris du R. P. Gontery Iesuite, en vne conference qu'il eut en la presence de la Reyne Marguerite, avec vn Maistre des Requestes, qui disoit au contraire (mais assez mal à mon aduis) que si le corps, & les forces corporelles eussent tousiours diminué depuis la creation de l'homme, que nous serions à present comme de petits fourmis. Cela estoit vn peu brusquement parlé deuant cette sage Princeesse, mais qui auoit tant de respect aux gens Doctes & de merites, qu'elle en souffroit mesmes les petites saillies d'esprit, lors qu'eschauffez dans les disputes elles leurs eschaipoient auant d'y auoir pensé.

Il est vray que nous ne pouuons pas esgaler, ny imiter de bien près les austeritez & penitences des anciens, à qui toutes ri-

guez sembloient autant douces & faisables, comme à nous ameres & insupportables, soit pour nostre foiblesse & imbecilité, ou pour nostre deffaut d'amour de Dieu, qui est nostre plus grand mal, mais encores si en trouue il d'assez forts qui pourroient faire dauantage qu'ils ne font s'ils vouloient, pour le salut, ou pour la santé corporelle, de laquelle nous sommes fort amateurs, & souuent mauuais conserveurs, car nous ne voulons pas nous mortifier en rien, & voulons viure en paix & ayle, & suiure nos appetits, sans distinguer des choses propres ou impropres, & de là vient que nous tombons si souvent malades & restons indisposéz, ou abrégeons nostre vie; mais quoy la sobriété a perdu son procès, il n'y a plus d'Aduocats pour elle, les frippons l'ont bannie des bonnes compagnies, & n'est plus receuë qu'où elle est le plus en hayné.

L'Empereur Aurelian vescu iusques en l'an septante & sixiesme de son aage, durant lequel temps il ne fut iamais seigné ne medeciné, hormis que tous les ans il entroit au bain, tous les mois il se prouoquoit à vomir, & si ieusnoit vn iour toutes les sepmaines, & tous les iours prenoit vne heure pour se promener, qui estoient tous regimes & remedes faciles & ayez à pratiquer par ceux qui en ont le desir, car il n'y a si pauvre ny si riche qui ne le puisse faire, & obseruer de point en point, mais qui commencera.

Nos Sauuages ont bien la dance & la so-

briété, avec les vomitifs. qui leur sont vtils à la conseruation de leur santé (car i'en ay veu quelqu'vns passer les iours entiers sans manger) mais ils ont encores d'autres preseruatifs desquels ils vsent souuent: c'est à sçauoir les estuues & sueries, par le moyen desquelles ils s'allegent & preuiennent les maladies, & puis ils sont tellement bien composez qu'ils sont rarement malades, & encores plus rarement goutteux, graueleux, hypochondres ou pulmoniques, mais ce qui ayde encor grandement à leur bonne disposition est, qu'ils sont engendrez de parens bien sains & dispos, d'un humeur & d'un sang bien temperé, & qu'ils viuent en vne parfaite vnion & concorde entr'eux sont tousiours contents, n'ont aucun procès, s'interressent fort peu pour les grades & biens de la terre, qu'ils possèdent avec vne grande indifference, c'est à dire, que les perdans ils ne perdent pas leur tranquillité, ainsi en vsent les gens de bien, & non les autres, qui n'ont point d'amour de Dieu, & se piquent pour la moindre perte qui leur arriue.

Il n'y a neantmoins corps si bien composé ny regime si bien obserué qui le puisse maintenir pour tousiours dans vne egale santé, qu'il ne faille à la fin s'affoiblir ou succomber par diuers accidens ausquels l'homme est suiet. Pour donc preuehir & remedier à tous ces deffauts & incommoditez du corps humain, outre les susdits remedes nos Sauuages ont des Medécins, Apoticaire, & Mai-

frés des ceremonies qu'ils appellent Oki, ou Ondaki, & d'autres Arondiouane, ausquels ils ont vne grande croyance, pour autant qu'ils font pour la plupart grands Magiciens, grands deuins, & inuocateurs de Demons. Ils leur seruent de Medecins, & Chirurgiens, & portent tousiours avec eux vn petit sac de cuir dans quoy ils tiennent quelques petits remedes pour les malades, cōme poudres de simples ou de racines, avec la tortue que l'Apoicaire luy porte en queue.

Instrumens
d'un Piro-
tois.

Ceux qui font particuliere profession de consulter le diable, & predire les choses à venir ou cachées, (car tous n'en ont point le grade) ont quelques autres petits instrumens qui leur seruent à ce mestier, dont ie vous diray ceux qui se trouuerent dans le sac de Trigatin, estimé bon Pirotois, & tres-excellent Medecin. Il y auoit premierement vne pierre vn peu plus grosse que le poing taillée en oualle, de couleur vn peu rouge, ayant vn traict noir tout autour prenant d'un bout à l'autre, dont ils tiennent que quand quelqu'un doit mourir de la maladie dont il est atteint, elle s'ouure vn peu par le petit traict noir, & que si il n'en doit pas mourir elle ne s'ouure point, s'entend qu'il faut que le Pirotois approche la pierre du malade.

Il y auoit aussi dans ce sac, cinq petits bastons de cedre, longs de six ou sept poudres chacun, & vn peu brulé autour, desquels ils se seruent pour predire les choses à venir, & pour

& pour aduertir des passées. Qu'il ne s'y
mesle tout plein de bourdes parmy leurs
propheties, personne n'en peut douter, c'est
pourquoy est malheureux celuy qui hebeté
s'y fie. Je ne fais point icy mention du petit
labourin de basque avec quoy ils resueillent
l'esprit des malades, & coniurent le diable,
pour ce que j'en ay parlé ailleurs, mais ie
vous diray que nous auons vne grande obli-
gation à nostre bon Dieu, de nous auoir
donné de meilleurs Medecins, & pour le
corps & pour l'ame, qui doit vn iour iouyr
de son Dieu.

Si il y a quelque malade en vn village on
en uoye aussi tost querir, on l'informe de la
maladie, on luy declare le temps qu'elle a
commencé, si elle est naturelle, ou par sort:
car il y a des meschans parmy eux aussi bien
qu'entre les Epicerinys, qui en donnent à
eux contre qui ils en veulent. Apres quoy
il fait des inuocations à son Demon, il lous-
se la partie dolente, il y fait des incisions
avec vne pierre tréchant, en succe le mau-
uais sang, & fait en fin tout le reste de ses in-
tentions selon les maladies, car pour les
sorts, il faut que les dances, chansons Ne-
gromantie, soufflemens, bruits & hurle-
mens marchent, aussi bien que les festins &
recreations qu'il ordonne tousiours pour
premier appareil, afin de participer luy-
mesme à la feste, puis s'en retourne avec ses
presens.

Si il est question d'auoir nouuelle des cho-

ses absentes ou aduenir, apres auoir interrogé son Démon, il rend ses oracles, mais plus souvent faux ou douteux, & quelque fois veritables: car le diable parmy les men songes leur dit quelque chose, pour se mer- tre en credit, & se faire croire habile espar.

Vn honneste Gentilhomme de nos amis nommé le sieur du Vernet, qui a demeuré vne année avec nous, au pays des Hurons nous a assuré, que comme il estoit dans la cabane d'vne Sauvagesse vers le Bresil, qu'un Démon vint frapper trois grands coups sur la couuerture de la cabane, & que la Sauvagesse qui cogneut que c'estoit son Démon entra dès aussitost dans la petite tour d'es- corce, où elle auoit accoustumé de recevoir ses oracles, & entendre les discours de ce malin esprit. Ce bon Gentilhomme prest l'oreille, & escourant le colloque, entendit le diable qui se plaignoit à elle, disant qu'il estoit fort las & fatigué, pour venir de si loin quérir des malades, & que l'amitié particulière qu'il auoit pour elle, l'auoit obligé de la venir voir ainsi lassé, puis pour l'aduoc- tir qu'il y auoit trois Nauires François or- mer qui arriueront bien tost, ce qui fut trouué veritable: car à trois ou quatre iours de là les Nauires arriuerent, & apres que la Sauvagesse l'eut remercié, & fait ses deman- des, le Démon disparut.

Maladie &
mort d'un
François.

L'un de nos François étant tombé malade en la Nation du Petun, ses compagnons qui s'en alloient à la Nation Neutre, le laisserent

à en la garde d'un Sauvage, auquel ils dirent. Si cestuy nostre camarade meurt, tu n'as qu'à le despoiller de sa robbe, faire vne fosse & l'enterrer dedans, car aussi bien ne feroit elle que se pourrir dans la terre. Ce bon Sauvage demeura tellement scandalisé du peu d'estat que ces François faisoient de leur compatriot, qu'il s'en plaignit par tout, disant qu'ils estoient des chiens, d'abandonner ainsi leur compagnon malade, & de conseiller qu'on l'enterrast tout nud s'il venoit à mourir. Je ne feray iamais cette iuiure à vn corps mort bien qu'estranger, disoit-il, & me despoillerois plustost de ma robbe pour le couvrir, que de luy oster la sienne pour m'en servir.

L'hoste de ce pauvre garçon, sachant sa maladie partit aussi-tost de saint Gabriel, que nous appellons autrement la Rochelle, ou Quieuindohian, d'où il estoit pour l'aller querir, & assisté de ce Sauvage qui l'auoit en garde, l'apporterent dans vne hotte sur leur dos iusques dans sa cabane, où en fin il mourut, apres auoir esté confessé par le Pere Ioseph, & fut enterré en vn lieu particulier hors du Cimetiere des Sauvages, le plus honnorablement, & avec le plus de ceremonies Ecclesiastiques qu'il nous fut possible; dequoy les Sauvages resterent fort edifiez, & assisterent eux mesmes au conuoy avec tous nos François, qui s'y trouuerent avec leurs armes, car ils sont extremement

ayse de voir honorer les trespassez. Ils ne voulurent pas neantmoins que ce corps fut enterré dans leur Cimetiere, pour autant, disoient-ils, que nous n'auions rien donné pour ses os, & qu'il faudroit qu'il eut part en l'autre vie, aux biens de leurs parens & amis deffuncts, s'il estoit enterré avec eux.

Nonobstant, les femmes & filles, firent les pleurs & lamentations accoustumez avec l'ordre du Medecin, qui luy-mesme s'estoit présenté pour faire son sabbat, & ses superstitions ordinaires enuers ce pauvre garçon, mais nos Religieux ne luy voulurent pas permettre qu'il en approchast, car il n'auoit aucun remede naturel propre à la maladie, c'est pourquoy il fut renuoyé, & payé d'un grand mercy, & puis à Dieu.

Oscar, plante.

Je me suis informé d'eux des principales plantes, & racines, desquelles ils se seruent pour leurs maladies, & blessures, mais entre toutes ils font principalement estat de celle appelée Oscar, les effets de laquelle sont merueilleux & diuins en la guérison des playes, vlceres, & blessures, aussi les Hurons en font vne estime si grande que peu s'en faut qu'ils ne l'adorent, tant ils releuent & venerent ses vertus, & les bons effets qu'ils en reçoient. Ils m'en donnerent un morceau de la tige environ de la longueur du petit doigt, & gros un peu moins, ie la considéray curieusement, & me sembla en tout

approchant au fenouil, quoy que ce soit vne autre plante, & qui leur est rare, car on n'en trouue qu'en certains lieux

Ils ont tout plein d'autres plantes, & racines de grande vertu, & mesme des arbres qui portent vne escorce grandement excellente pour vomitifs, & autres cures, mais ie ne me suis point informé des noms, ny de leurs principales proprietéz, sinon de quelqu'vnes qui me sont encores eschappées de la memoire, pour le peu d'experience que i'ay aux choses de medecine.

Leeroy que le Createur a donné aux Hurons le tabac ou petun, qu'ils appellent *Hottianhoian*, comme vne manne necessaire pour ayder à passer leur miserable vie, car outre qu'elle leur est d'un goust excellentissime, elle leur amortit la faim, & leur fait passer vn long temps sans auoir necessité de manger: & de plus elle les fortifie comme à nous le vin, car quand ils se sentent foibles ils prennent vn bout de petun, & les voyla gaillards. Elle a beaucoup d'autres vertus, quinous sont icy incognuës, & non point à plusieurs Espagnols, qui la nomment pour cet effet l'herbe sainte, mais l'usage en est beaucoup meilleur & salubre aux Sauvages qu'à nous autres, à qui Dieu a donné en autre chose tout ce qui nous fait besoin, & conseillerois volontiers à tous les Gaulois de n'en vser point, que par grande necessité, pour ce que le goust en est tellement charmant qu'en ayant pris l'usage, on ne s'en

Du petun.

peut deffaire qu'avec grande difficulté, dont j'en ay veu aucuns maudire l'heure de s'estre iamais accoustumés.

J'ay dit en quelque endroit de ce volume, que le Mayz ou bled d'Inde a beaucoup de suc & de substance, pour la nourriture du corps humain, mais plusieurs ont philosophé sur les autres vertus, ont iugé & trouué par experience, qu'il est fort propre à guerir les maux de reins, les douleurs de la vessie, la grauelle, & retentions d'urine, dequoy ils se sont aduisez, pour auoir pris garde qu'il n'y a presque point d'Indiens qui soient trauaillez de ces maladies, à cause de leur boisson ordinaire, qui est faicte de Mayz.

Nos Sauvages ont aussi des racines tres-venimeuses qu'ils appellent Ondachiera, desquelles il se faut donner de garde, & ne se point hasarder d'y manger d'aucune sorte de racine, que l'on ne les cognoisse, & qu'on ne sçache leurs effects, & leurs vertus, de peur des accidens inopinez qui nous sont quelquefois arriuez.

Nous eusmes vn iour vne grande apprehension d'un François, qui pout en auoir mangé d'une qu'il auoit luy mesme arrachée dans les forests, deuint tout en vn instant passe comme la mort, & tellement malade que nous fismes contrains d'auoir recours aux Sauvages pour auoir quelque remede, à vn mal si inopinément arriué, lesquels luy firent aualler vn vomitif composé d'eau &

le simples, avec de l'escorce d'un certain bois qui luy fit rendre tout le venin qu'il auoit dans l'estomach, & par ce moyen fut guery, & appris pour vne autre fois, de ne manger d'aucune herbe ny racine, que celles que les Sauuages luy diroient, ou desquelles il cognoistroit luy-mesme les effects.

Continuation du traitté de la santé, & maladies des Sauuages, & de celles qui sont dangereuses & imaginaires. Des estumes & sueries, & du dernier remede qu'ils appellent Lonouayroya.

CHAPITRE XLII.

IL nous arriva encore vne autre seconde apprehension, mais qui se tourna bien-tost en risée, ce fut que certains petits Sauuages ayans des racines qu'ils appellent Ooxrat, ressemblans à vn petit naucau ou chastaigne pelée, qu'ils venoient d'arracher pour leurs cabanes, vn ieune garçon François nostre disciple, leur en ayant demandé & mangé vne ou deux sans s'informer de ses effects, les trouua bonnes au commencement, & d'un goust assez agreable, mais qui se conuertist soudain en de tres cuisantes & picquantes douleurs, qu'il sentoit par tout dans la bouche & la langue, qu'il auoit com-

Propriété
de la racine
Ooxrat.

me en feu, & outre cela les phlegmes luy distiloient continuellement de la bouche qu'il tenoit ouverte, la teste panchée en bas pour leur donner cours, ce qui me faisoit compassion

S'il estoit bien empesché en ses maux, l'apprehension de le mort luy estoit la plus sensible, comme à nous mêmes l'ignorance de sa maladie, iusque à ce que les Sauvages nous eurent aduertty en se gaussant plaisamment, que le garçon en tenoit, mais qu'il n'en mourroit pas pourtant. Cela nous consolait fort, car ie vous assure que nous nous trouuions bien empeschez, & ne sçauions quel remede apporter à ce mal inopiné.

Ie vous manifesteray comme les Sauvages en vsent pour leur santé, avec fruit & sans douleur, mais au prealable, il faut que ie vous die, que nostre petit disciple n'y fut pas le dernier pris, car quelques François s'estans trouuez presents à sa disgrâce, y tromperent plusieurs de leurs compagnons qui en murmuroient assez pendant que les autres s'esgorgoient de rire. Cela fut en partie la cause que ie n'en apportay point en Canada pour la France, peur qu'on ne die que i'auois apporté de quoy rire, preferant ce petit interest d'honneur, au grand estat qu'on en eut fait d'ailleurs, pour son excellente propriété de purger le cerueau, & d'claircir la face, mieux qu'aucune autre drogue que nous ayons icy.

Lors que nos Hurons, vieillards & autres, se sentent le cerueau par trop chargé d'humeurs & de phlegmes qui leur incommo-
dent la santé, ils enuoyent de leurs enfans (ie dis de leurs enfans, pour ce qu'ils n'ont ny vallets, ny chambrières, non plus que de manœuvres ou gens à la journée en tout ces pays là) chercher de ses petits naueaux, lesquels ils font cuire sous les cendres chaudes, & en mangent vn, deux, ou trois au matin, ou à telle heure de la journée qu'il leur plaist, & n'en ressentent aucune douleur ny incommodité que de tenir leur teste panchée, pendant que les flegmes leur distillent de la bouche.

Lescot dit que les Montagnais & Canadiens ont vn arbre appellé *Annedda*, d'vne admirable vertu, contre toutes sortes de maladies corporelles, interieures, & exterieures, duquel ils pilent l'escorce & les feüilles qu'ils font bouillir en de l'eauë, laquelle ils boient de deux iours l'vn, & mettent le marc sur les parties enflées & malades, & s'en trouuent bien-tost gueris, principalement d'vn mal de terre qui à fort couru.

J'ay veu de nos Hurons lesquels pour se rendre plus souples à la course, se decou-
pent le gras des iambes, en chausses de Suisses, avec des pierres tranchantes, & les parties enflées pour les purger des mauuaises humeurs, qu'ils s'apoudroient de ie ne

N'ot point
de vallets.

Arbre ap-
pellé An-
nedda.

S'incizent
la chair.

ſçay quelle poudre, après que Loki auoit craché deſſus. Je ne veux pas dire qu'il ſoient grands Chirurgiens, car ie me tromperois, mais encores ne ſont ils point tant impertinens qu'on pourroit bien dire, il leur reüſſit quelquefois de guerir des playes aſſez dange-reuſes avec les ſeuils ſimples ſans compoſition, & n'ont pour toute ligature, linge ou compreſſe, que des écorces de bouleaux & d'un certain arbre appellé Atti, qui leur eſt vtil en beaucoup de choſes.

Allant voir les malades parmy les Hurons, il me falloir ſouuent faire du Medecin & n'y cognoiſſois rien, mais il le falloir faire pour les contenter, car m'ayans veu taſter le poulx à l'un d'iceux & dit qu'il ne mourroit point de cette maladie, (c'eſt que ie n'y trouuois point de ſiebure,) il me fallut après toucher le poulx de tous les autres & en dire mô aduis. C'eſtoit vn meſtier qui meſtoit bien nouueau & n'en parlois que comme vn aneugle des couleurs, car à dire vray, ſi la ſiebure n'eſt fort violente, ie ne la cognois point à moy meſme, comme il parut bien il y a quelques années que ie me trouuois tres mal d'une ſiebure fort violente, pour la premiere fois de ma vie, ie diſ au Medecin que ie ſentois du mal par tout, mais ſans ſiebure.

Selon que j'ay pû apprendre & cognoiſtre dans la communication ordinaire & familiere que j'ay eüe avec nos Hurons, les Sauvages ne ſçauent l'art de tater le poulx, ny de iuger d'une vrine, & ne cognoiſſent non plus la ſiebure,

sinon par le froid ou dans les grandes ardeurs qu'ils rafraichissent (entre nos Canadiens) avec quantité d'eau fresche, qu'ils iettent sur le corps du malade, & non pas nos Hurons.

Ils ne sçauent aussi que c'est de purger le corps, ny de guerir les maladies, si elles ne sont exterieures, car pour le dedans ils n'ont autre remede que les vomitifs & les superstitions, c'est pourquoy les pauures malades ont beau languir, & titer la langue sur la terre nuë fors vne natte de ioncs, qui leur sert de liët, auant qu'ils puissent receuoir guerison de leur chanterie & superstitions. Ils nous demandoient de Lenouquate, c'est à dire quelque chose propre à guerir, mais n'ayant autre drogue, ie leur donnois vn peu de canelle, ou vn peu de gingembre avec tant soit peu de sucre, (car ie n'en auois gueres,) qu'ils delayoient & faisoient tremper (apres estre bien puluerisé,) dans de l'eau claire, laquelle ils aualloient comme vne medecine salutaire, & s'en trouuoient bien, du moins ils en restoient fort contens, & le cœur fortifié.

Neantmoins la compassion que i'ay de ces pauures malades, me fait vous dire derechef, que c'est vne grande pitié de les voir languir, couchés de leur lög à platte terre sur vne meschante natte de ioncs, sans couchette, sans liët, sans linceuls, sans matelats & sans cheuet, priués de toute douceur & rafraichissement, fors de quelques petits poissons boucanez fort puäts, & de la sagamité ordinaire, pour quelque ma-

ladie qu'ils ayent. O mon Dieu! ils ne geignent moins point tant que nos malades, ils disent pas, mon chenet est trop haut ou trop bas, mon liect n'est pas bien faict, on me rompt la teste, les sauces ne sont point à mon appetit ie ne puis prendre goust à tout ce que vous faictes, car ils demeurent couchez sur la natte patiens comme des Saints.

Quand ils se trouuent las du chemin ou apefantis par accident, (ce qui arriue fort rarement) ou qu'ils veulent fortifier leur santé, ou preuenir quelque maladie, qui les menace, ils ont accoustumé de se faire suer dans des estuues qu'ils dressent au milieu de leurs cabanes ou emmy les champs, ainsi que la fantasie leur en prend, car voyageans mesmes ils en vzent pour se soulager & delasser du chemin, mais il faut qu'ils soient plusieurs, autrement la suerie ne seroit pas bonne, & ne pourroient pas s'exciter suffisamment.

Des estuues
des Sauvages.

Or quand quelqu'un veut faire suerie, il appelle plusieurs de ses amis, lesquels sont aussitost prests; car en faict de courtoisie ils sont assez vigilans, soit pour la faire, soit pour la recevoir: estans assemblez, les uns picquent en terre des grosses gaulles environ vn pied l'une de l'autre, qu'ils replient à la hauteur de la ceinture en façon d'une table ronde, pendant que les autres font chauffer dans vn grand feu six ou sept cailloux, qu'ils mettent après en vn monceau au milieu de ce four qu'ils entourent de corces, & couurent de leurs robes de peaux après que les hommes y sont entrez tout nuds

lis contre terre, serrez en rond les vns contre
s autres, & les genouils fort esleuez deuant
ur estomach, peur de se brusler les pieds. Et
our s'eschauffer encore dauantage & s'exci-
r à suer, ils chantent là dedans incessammēt
appant du tallon contre terre & doucement
u dos les costez de ces estuues, puis vn seul
ante & les autres repetent comme en leurs
ances, ce refrain, het, het, het, & estans fort
ssez, ils se font donner vn peu d'air, & par
is ils boient encores de grands coups d'eau
oide, qui seroient capables de donner de
rosses maladies à des personnes moins robu-
es, puis se font recourir, & ayans sué suffi-
mmēt, ils sortent de là & se vont ietter dās
riuiere, sinon, ils se lauent d'eau froide, ou
essuyent de leurs robes, puis festinent & se
emplissent, pour dernier medicament.

Sils font en doute que la suerie leur doieue
eussir, ils offrent du petun & le bruslent en sa-
rifice à eet esprit qui la gouuerne, comme
il estoit vn Dieu ou vne puissance souverai-
e. Je m'estonnois fort de voir de nos Fran-
ois dans ces estuues pesse mesle avec les Sau-
ages, car à mō aduis ils y sont cōme estouffez
ans aucun air, & si pressez les vns contre les
utres, qu'ils se peuuent à peiner tourner.

Il arriue aucunes fois que le Medecin or-
onne à quelqu'vn de leurs malades de sortir
u bourg, & d'aller cabaner dans les bois ou à
quelque lieu à l'escart, pour luy aller là obser-
er ses diaboliques inuentions, ne voulans
estre veu de personne en de si estranges & ri-

dicules ceremonies , mais cela ne s'observe ordinairement qu'à ceux qui sont entachez de maladie fâcheuse ou dangereuse, lesquels on contrainct de se separer des autres pour de les infecter & d'aller cabaner au loin iusques à attendre guérison, qui est vne coustume louable & qui deuroit estre pratiquée par tout , pour les inconueniens qui arriuent tous les iours par la frequentations de personnes mal nettes : plus frequentes icy qu'ailleurs, où les François semblent auoir desja mis quelque mauvais racine, car qu'elle y fust auparauant i'en enay rien sçeu, ny appris de personne.

Je me promenois vn iour seul , dans les bois de la petite nation des Quiennontateronons pour chercher quelque petits fruits à manger , comme i'apperceuy vn peu de fumée à trauers les bois, qui me donna la curiosité de vouloir sçauoir que c'estoit, i'aduançay donc & tiray celle part , où ie trouuay vne cabane faicte en façon d'une tour ronde , ayant au faicte vn trou ou souspiral par où sortoit la fumée : non content, i'oupris doucement la petite porte pour voir qui estoit là dedans , & trouuay vn homme seul, estendu de son long sur la platte terre , enuêloppé dans vne méchante couuerture de peau, auprès d'un petit feu.

Je m'informay de luy de la cause de son esloignement du village , & pourquoy il se demilloit; il allongea son bras sur luy, & me dit moitié en Huron & moitié en Algonmequin, que c'estoit pour vn mal qu'il auoit aux par-

ties naturelles, qui le tourmentoit fort, & duquel il n'esperoit que la mort, & que pour de semblable maladies ils auoient accoustumé entre eux, de se separer & esloigner du commun, ceux qui en estoient entachez, peur de gaster les autres par la frequentation, & neantmoins qu'on luy apportoit ses petites necessitez & partie de ce qui luy faisoit besoin, les parens & amis ne pouuans pas dauantage pour lors, à cause de leur pauureté & que plusieurs d'iceux estoient morts de faim l'Hyuer passé. T'auois beaucoup de compassion pour luy; mais cela ne luy seruoit que d'un peu de diuertissement & de consolation en ce petit espace de temps que ie fus auprès de luy: car de luy donner quelque nourriture ou rafraischissement, il estoit hors de mon pouuoir, puis que i'estois moy mesme à demy mort de faim & tellement necessiteux, que ie cherchois par tout dans les bois quelques petits fructs pour amortir ma faim & fortifier mon estomach tout abbatu.

J'ay veu au pais de nos Hurons de certains malades, qui sembloient plustost possédez du malin esprit ou fols tout à fait, qu'affligés de maladie naturelle, auxquels il prendra bien enuie de faire dancier toutes les femmes & filles ensemble, au eel'ordonnance de Loki; mais ce n'est pas tout, car luy & le medecin, accompagnés de quelqu'autre, feront des singeries & des coniuurations, & se tourneront tant qu'ils demeureront le plus souvent hors d'eux mesmes: puis il paroît tout furieux, les yeux étincelans & effroyables, quelquefois debout &

quelquefois assis, ainsi que la fantaisie luy en prend: aussi-tost vne quinte luy reprendra, & fera tout du pis, renuersera, brisera & iettera tout ce qu'il trouuera en chemin avec des insolences nompareilles, puis se couche où il s'endort quelque espace de tēps, & se resueillant en sursaut r'entre dans ses premieres furies, lesquelles se passent par le sommeil qui luy prend. Après il faict suerie avec quelqu'un de ses amis qu'il y appelle. D'où il arrive que quelqu'un de ces malades se trouuent gueris & les autres au contraire ioignent la maladie du corps avec celle de l'esprit.

Il y a aussi des femmes qui entrent en ces hipocondres & saillies d'esprit, mais elles ne sont si insolentes que les hommes, qui sont d'ordinaire plus tempetatifs: elles marchent à quatre comme bestes, & font mille grimasses & gestes de personnes insensées & aliénées de leur esprit: ce que voyant le Magicien, il comme à chanter, puis avec quelque mine la soufflera, luy ordonnant de certaines eautés à boire, & qu'aussi-tost elle fassē vn festin, soit de chair ou de poisson qu'il faut trouuer, encore qu'il soit rare, neantmoins il est aussi-tost prest.

Le banquet finy, chacun s'en retourne en sa maison, iusque à vne autrefois qu'il la reuendra voir, la soufflera, & chantera derechef, avec plusieurs autres à ce appelez, & luy donnera encore 3. ou 4. festins tout de suite, & s'il luy vient en fantaisie commandera des mascarades, & qu'ainsi aecommodez ils aillent chanter

chanter près du liect de la malade, puis courir les rues pendant que le festin se prepare, auquel ils reuiennent, mais souuent bien las & affamez.

L'ay esté quelquefois curieux d'entrer au lieu où l'on chantoit les malades, pour en voir toutes les ceremonies; mais les Sauuages n'en estoient pas trop contens, & m'y souffroient avec peine, pour ce qu'ils ne veulent point estre veus en semblables actions. Ils rendent aussi le lieu où cela se faict, le plus obscur & tenebreux qu'ils peuent, & bouchent toutes les ouuertures qui peuent donner quelque lumiere, & ne laissent entrer là dedans que ceux qui y sont necessaires & appelez.

Pendant qu'on chante, il y a des pierres qui rougissent au feu, lesquelles le medecin empoigne & manie entre ses mains, puis masche des charbons ardans, faict le demon deschainé, & de ses mains si eschauffées, frotte & souffle avec vn sifflement qu'il faict bruire entre ses dents, les parties dolentes du patiét, ou crache sur le mal de son charbon masché. Cette dernière ceremonye des pierres & du charbon ne s'observe pas à tous indifferement, mais à des particuliers selon l'ordre du Medecin, qui n'oublie iamais la tortue au pais de nos Hurons, ny entre nos Montagnais le petit tambour de basque, que le Pirtois portent allans voir leurs malades, avec le reste de leur boutique & petits agisios.

Lors que tous les remedes humains n'ont de rien seruy, ny les inuentions ordinaires de

Leur der-
nier remede
en maladie.

nos Sauvages, ils tiennent conseil, auquel ils ordonnent la ceremonie, qu'ils appellent, Lo-nouoyroya, qui est l'inuention principale & le moyen plus excellent, (à ce qu'ils disent,) pour chasser les diables & malins esprits de leurs bourgs & villages, qui leur causent & procurent toutes les maladies & infirmitéz qu'ils endurent & souffrent au corps & en l'esprit.

Le iour de la feste estant assigné, ils en commencent la ceremonie dès l'après souper du soir précédent, mais avec des furies, des fracas & des tintamarres si grands qu'ils semblent vn sabat de demons, car les hommes brisent, renuersent & iettent tout ce qu'ils rencontrent en leur chemin, de sorte que les femmes sont en ce temps là fort occupées à serrer & mettre de costé tout ce qu'elles ne veulent point perdre. Ils iettent le feu & les tizons allumez par les ruës, crient, chantent, hurlent & courent toute la nuit par le village & autour des murailles ou pallissades comme fols & insensez.

Après que le sabat a esté bien demené ils s'arrestent vn peu à la premiere pensée qui leur vient en l'esprit de quelque chose qui leur fait besoin, sans en parler à personne, puis le matin venu ils vont de cabane en cabane, & de feu en feu, & s'arrestent à chacun vn petit espace de temps, chantans doucement les louanges de ceux qui leur donnent quelque chose; disans, vn tel m'a donné cecy, vn tel m'a donné cela, & autres semblables complimens, qui obligent les autres mesnages de leur donner quelque chose, qui vn couteau, qui vn petunoir, vn

chien, vne peau, vn canot, ou autre chose qu'ils acceptent de bonne volonté sans autre ceremonie, & continuent de recevoir par tout, iusques à ce que par rencontre on leur donne la chose qu'ils auoient songée, & pour lors la receuant ils font vn grand cry & s'encourent hors de la cabane ioyeux & contans d'auoir rencontré leur songe, pendant que ceux qui y restent, crient, l'acclamation ordinaire, hé, é, é, é, é, & ce present est pour luy & l'augure qu'il ne doit pas si-tost mourir: mais pour les autres choses qui ne sont point de son songe, il les doit rendre après la feste, à ceux qui luy ont baillées.

Il s'y coule neantmoins quelquefois de la tromperie, car tel retiendra vne piece qu'il dira auoir songée, qui n'y aura pas pensé, comme il arriua à vn François nommé Matthieu, lequel ayant donné à vn ieune Sauvage vne chaine de rassades, pensant qu'elle luy deust estre rendue, l'autre luy dit qu'elle estoit son songe & fut pour luy, bien qu'on aye après sçeu sa fourbe & tromperie.

Ceste feste dure ordinairement trois iours entiers, & ceux qui pendant ce temps là n'ont pû trouuer ce qu'ils auoient songé, s'en affligent & tourmentent, & s'estiment misérables, comme des gens qui doiuent bien-tost mourir. I'y ay veu des femmes aussi-bien que des hommes, porter à quatre vne grande peau d'Eslan, chargée de mille beatilles & de presens. Il y a mesmes des pauvres malades qui s'y font porter, sous l'esperance d'y trou-

uer leur songe & leur guerison, & neantmoins il ne remportent qu'une lassitude & un rompement de teste, qui les conduit souvent de la feste au tombeau.

Remedes
aux mala-
dies des
Môagnais.

Je n'ay rien remarqué de particulier aux Canadiens qui ne puisse convenir aux remedes de nos Hurons, car si les Medecins des vns sont bien impertinens & superstitieux, les Pirotois des autres sont aussi peu sages & experimentez en leur art. Ce petit Sauvage qui mourut sur mer à son retour de France, dans le mesme vaisseau des PP. Gallerant & Piat qui le baptizerent, fist bien contre la maxime de leurs medecins en mangeant tousiours pour sauuer sa vie, car ils font faire à leurs malades des diettes non pareilles, & ne trouuent pas bon qu'on les importune de manger beaucoup, disans qu'estans malades ils ne peuuent auoir d'appetit, & par consequent qu'ils ne doiuent pas manger ou fort peu, pour n'incommoder leur estomach.

Ils soufflent leur malades comme nos Hurons, leur faisant souvent à croire que c'est par ceste partie là qu'ils tireront leur mal, & pour mieux faire leur ieu ils leur disent que c'est un homme d'une nation estrangere, qui leur a donné ce mal là, où il s'est formé une petite pierre qui leur cause la douleur, & comme bon charlatans en ayans pris une petite dans la bouche, après auoir bien soufflé la partie dolente où autre part, ils la sortent de la bouche & leur disans que c'est celle qui leur faisoit douleur, ce que les malades croient &

s'en tiennent soulagez, mais c'est dans l'imagination.

Ils vzent aussi quelquefois de vrais remedes, comme de decoctions d'herbes & d'escorces qui leur seruent grandement, & en reussit de bonnes cures qui mettent en credit leur charlataneries, autrement on auroit bien-tost descouvert leur piperies aussi bien faictes que celles de quelques malicieux Chirurgiens, dont j'ay experimenté vne fois en vne playe qu'on m'entretint l'espace de six semaines sans amendement, qui se guerit après en trois iours sans aucun onguent, peut estre neantmoins que celuy qui me traictoit n'en scauoit pas dauantage, & que ie le dois excuser, mais tousiours est-ce vne grande faute d'employer des ignorans.

Il y eut vn iour vn Sauvage appellé Neogabinat, lequel avec quelque autres Sauvages de ses amis, ayans beu avec excés d'une eau de vie qu'ils auoient traictée des François pour de la chair d'eslan, estans tous bien enyurez & de repos près d'un grand feu dans leurs cabanes, quelqu'un d'eux demanderent à Neogabinat s'il vouloit lutter, & esprouuer ses forces, lequel ayant respondu que non & persisté à ce refus, ils luy dirent qu'ils le coucheroient donc au trauers du feu, & n'y manquerent pas, car les vns le prirent par les pieds & les autres par la teste & le coucherent tout au trauers des charbons tout nud qu'il estoit, & y demeura

courageusement autant long-temps qu'il fallut pour donner loisir aux femmes de l'en retirer, autrement il s'y fust laissé brusler & consommer comme vn homme mort, car il ne fretilloit point, non tant à cause du vin que de son courage qu'il vouloit faire paroistre en se tourment, elles ne le purent neantmoins si promptement oster de dessus les charbons ardens, qu'ils auoient esbrasillé exprés, comme vn liêt d'honneur, qu'il n'en demeurat tout rosty depuis la teste iusques à la plâte des pieds, de maniere qu'il luy fallut oster les charbons qui luy tenoient par tout à la chair, dont il fut fort malade & en danger de mort, ce qui luy donna l'enuie d'enuoyer en nostre Couuent prier qu'on le vint baptiser, mais il fut si admirablement bien secouru, qu'au bout des dix iours il commença de se leuer, & nous aller visiter iusques chez nous, où il monstra à nos Religieux ce dequoy il s'estoit seruy pour se guerir, qu'estoit de la seconde escorce d'un arbre, appelé pruche espece de sapin, laquelle ces gens luy faisoient bouillir & de la decoction ils l'en lauioient continuellement, ce qui le rendit sain & gaillard en moins de trois semaines.

Pourquoy les Sauvages errants tuent aucunesfois de leurs parens trop vieux ou malades. D'un François qu'ils voulurent assommer, & de la cruauté de deux femmes Canadiennes qui mangerent leur marys.

CHAPITRE XXXXIII.

LEs vieillards décrepis, & personnes malades dans l'extremité entre les peuples errans, sont en cela plus miserables que ceux des nations sedentaires, que ne pouuans plus suivre les autres, ny eux moyen de les nourrir & assister, (si les malades le trouuent bon,) leurs parens les tuent aussi librement comme on pourroit faire icy vn mouton, encores pensent ils en cela leur rendre de grands seruices, puis qu'estans dans l'impuissance de les pouuoir suivre & eux de les assister, il faudroit qu'ils mourussent miserablement par les champs, qui est neantmoins vne grande cruauté & qui surpasse celle des bestes bruttes, desquelles on ne lit point qu'elles fassent le mesme enuers leurs petits.

Le Truchement des Honqueronons me dit vn iour que comme ils furent vn long-temps pendant l'Hyuer sans auoir dequoy

Vn François
à qui on
presente la
mort.

manger autre chose que du petun, & quelque escorce d'un certain arbre que les Montagnais nomment Michian, lesquels ils fendent au Prin-temps pour en tirer un suc doux comme du miel, mais en fort petite quantité, autrement cet arbre ne se pourroit assez estimer, ie n'ay point gusté de ceste liqueur comme j'ay fait de celle du fouteau, mais ie la croy tres-bonne au goust de l'escorce de laquelle j'ay mangé parmy nos Hurons, bien que fort peu souvent & plustost par curiosité que par nécessité, d'autant qu'ayant autre chose à disner ils laissent ceste viande là pour les plus necessiteux Canadiens, qui manquent souvent de toute autre chose. Ce pauvre garçon me dit donc qu'il pensa estre au mourir de ce ieusne trop estroit, & que les Sauvages plus robustes le voyant en cest estat, touchez de compassion, le prièrent qu'il agreea qu'on l'acheuast de faire mourir, pour le deliurer des peines & langueurs dont il estoit abbatu, puis qu'aussi bien faudroit il qu'il mourut miserablement par les champs, ne les pouuans plus suivre ny eux l'assister n'ayans pas de quoy, mais il fut d'aduis que l'on ne touchast point à sa vie, & qu'il valoit mieux languir & esperer en nostre Seigneur, que de mourir comme une beste qui ne se confie point en Dieu, aussi auoit-il raison : car à quelques iours de là, ils prindrent trois Ours, qui les remirent tous sur pieds, & en leurs premieres forces, après auoir esté 14. ou quinze iours en ieusnes continuels, sans prendre autre nourriture que la fumée

du petun, & quelque escorce d'arbre, qui estoit quelque chose de plus que ne souloit prendre vn certain Gentilhomme Venitien, lequel ayant receu quelque desplaisir, se mit au lit en resolution de ne manger point; & de faire quelque remonstrance qu'on luy pût faire il demeura (au grand estonnement d'vn chacun) 63. iours sans prendre autre chose que de l'eau du puits de saint Marc: au bout desquels ils deceda en crachant & yrinant du sang.

Auis de
Venise dat-
ré le 30.
Januier
1635.

Il me semble auoir apptis que l'Ecriture Sainte ne fait mention que d'vn seul enfant mangé en Ierusalem par les propres parens, au temps de la famine, qui fut tres grande durant le siege des Romains; mais voicy vne histoire bien plus estrange arriuee en Canada environ l'an 1626. ou 27. de deux femmes Canadiennes qui mangerent leur marys, le pere & le fils, dont on eut beaucoup de regret à l'habitation, tant pour leur malheureuse fin, que pour la bonne affection qu'ils auoient toujours eue pour les François, qui les aymoient aussi reciproquement. L'vn estoit vn bon vieillard de 80. ans ou environ, appelle Oustachecoucou, autrement nomme par les François, le grand oncle du Pere Ioseph, ainsi appelle pour auoir passé vn Hyuer avec luy dans les bois. L'autre estoit son fils aîné aagé de quelque trente ans ou environ, estimé l'vn des meilleurs chasseurs de sa Nation, desquels ie vay vous declarer succinctement comme le malheur de

Deux Can-
nadiennes
mangerent
leurs marys

leur mort arriua.

Après la pêche de l'anguille qu'on a accoustumé de faire tous les ans enuiron le mois d'Octobre, le bon vieillard Oustahecoucou, preuoyant à la necessité future, en pensoit serrer quelque quantité de pacquets boucannés dans nostre Conuent pour leur seruir au temps de la necessité, & des basses neiges (pendant lesquelles on ne peut attrapper l'essan, ny le cerf) mais sa femme vn peu trop acariate, n'y voulut iamais consentir, car elles ont vn tel pouuoir sur leurs marys, qu'il semble que les hommes ne peuvent deliberer sans elles, & fallut luy obeyr cōme à la maistresse, ils les furēt donc cacher dans les bois au delà du fleuue du costé du Sud, & après s'en allerent dans les terres, vers le Nord, enuiron 25. lieuës de nostre Conuent, chargez du reste de leurs viures, qui ne consistoient en tout, pour dix ou douze personnes qu'ils estoient, qu'en trois petits sacs de bled d'Inde, & six ou huit pacquets de 50 anguilles chacun, en ayant laissé enuiron autant dans leur cache ou magasin, dequoy ils se repentirent bien après, mais tard, car les neiges estant trop basses, ils ne purent prendre de bestes, & tout ce qu'ils auoient porté de viures estant consommé, il fallut prendre nouueau conseil pour viure, & se tirer de misere.

Ils resolurent de retourner à leur magasin pour auoir de la prouision, mais le fleuue estoit pour lors tellement embarrassé des gla-

ces que la marée faisoit debatre & s'entre-choquer, qu'ils ne putent iamaïs trouuer passage, & fallut se resoudre à la patience, & à vn ieusne exacte de huiët ou dix iours, sans pain, sans viande, & sans poisson, ce qui les amaigrit tellement qu'il ne leur restoit plus que la peau collée sur les os, car d'aller demander des viures aux François ils n'oseroient peur de se rendre importuns, ou crainte d'estre esconduits, car les Montagnais sont si souuent en necessité, qu'il seroit bien difficile de leur pouuoir tousiours satisfaire, c'est ce qui les obligera à la fin de cultiuer les terres, comme faisoit ce bon homme qui auoit recueilly d'un petit desert cinq ou six sacs de bled d'Inde, la mesme année que nos Religieux luy eurent appris à traualler, ce qu'il faisoit avec tant de contentement qu'il se blasmoit luy-mesme, & ceux de sa Nation de leur paresse, & du peu de soin qu'ils ont de pouruoir à leur viure pour la necessité.

La mere, & la bru appelée Ouscouche, (presque d'un mesme aage) avec trois ou quatre petits enfans, leur crioient tous les iours à la faim, les appellans paresseux, & les vouloient contraindre d'aller querir des victuailles aux François, ou chercher de la beste (c'est leur façon de parler de la chasse) autrement qu'elles mourroient de faim avec leurs enfans. Les pauvres marys ne sçauoient comment les contenter, car leurs ventres n'auoient point d'aureilles pour leurs rai-

sons, ny de patience pour endurer; O mon Dieu que c'est vne furieuse batterie que la faim, il n'y a place qu'elle n'emporte, ils leur repetoient souuent patientons encore vn peu, il neigera peut estre bien-tost, & nous tuerons des bestes qui nous rassasieront tous sans estre importuns aux François, mais cela ne leur donnoit point à manger.

Tuent le
vieillard.

Elle resolurent à la fin de manger le bon vieillard, si bien tost il n'apportoit des viures, car il n'y auoit plus d'excuses qui les pût contenter. Elles choisirent donc leur temps, & prirent si bien leur mesure qu'elles executerent leur malheureux dessein, vn matin peu après que le gendre fut sorti de la cabane pour la chasse, car ayant pris chacune vne hache en main, elles en donnerent tant de coups sur la teste du pauvre bon homme couché de son long, les pieds deuant le feu qu'il en mourut sur le champ, puis le mirent en pieces, & en firent cuire à l'instant quelque morceaux dans la chaudiere pour s'en rassasier, & cachèrent le reste dans la neige pour le manger à loisir. O mon Dieu, il est vray qu'en descriuans cecy i'ay horreur d'y penser seulement, & neantmoins leur rage, & leur faim ne peut estre assouuie de l'excez d'vne telle cruauté & barbarie, furieuse au delà de celles des bestes les plus féroces & carnassieres de l'Afrique. Elles resolurent encore de tuer le ieune homme à son retour, cainte qu'il ne vengeast sur leur vie, la mort de son pere, qui ne se pouoit

celer & se liberer de soupçon.

Il faut noter que ce ieune homme estant fort de la cabane pour la chasse, entendit bien frapper, & les cris de son pere, mais il ne se fut iamais imaginé vne telle meschanceté de sa mere, & de sa femme, c'est pourquoy il ne retourna point pour s'en esclaircir, & poursuivit son chemin iusques à la rencontre d'un chasseur Montagnais, auquel il raconta leur extreme famine, & luy demanda s'il auoit point veu de pistes de bestes, & comme l'autre luy eut dit que non & qu'il en cherchoit pour estre luy mesme en pareille necessité. Je te prie, luy dit-il, de passer par nostre cabane, car ie crains qu'il soit arriué quelque accident à mon pere, l'ayant ouy crier apres que i'en ay esté party, & en suis en peine; l'autre luy promit d'y aller puis se separerent.

Quelque temps apres nostre pauvre ieune homme rencontra vn eslan qu'il tua, & l'ayant esuentré, il prist le cœur & les intestins qu'il porta à sa cabane, apres auoir caché la beste dans les neiges: car ils ont accoustumé de les porter, & quelquefois la langue ou la teste, pour les manger promptement, ou pour asseurer que l'animal est à bas.

Ayant chargé son paquet sur son dos il s'en reuint à la maison, & en approchant il fit vn cry selon leur coustume, pour aduertir de sa venue, puis ayant laissé son espée & ses raquettes à la porte, & leué la couuerture

Les deux
femmes
tuent le fils
& mary.

de peau qui sert d'huys, pour entrer en se courbant bien fort, car leurs portes sont fort basses, les deux fèmes estoient au dedans des deux costez, chacun vne hache en main, desquelles elles luy deschargerēt plusieurs grāds coups sur la teste, & l'estēdirēt mort sur la place auant que d'auoir apperceu le cœur & les intestins de la beste qu'il auoit tuée, ce qui leur deuoit estre vne grande tristesse, car telle beste estoit seule capable de les tirer tous de la necessité, au lieu que leur impatience leur tourna à malheur, elles ne laisserent pourtant de manger ce corps meurtry, elles & leur enfans, leur disans que c'estoit de la chair d'vn ours que leur pere auoit tué.

Deux iours apres, le Sauvage qui auoit en charge du fils trespasé de se transporter à sa cabane, pour sçauoir des cris de son pere, y arriua chargé d'vn morceau d'eslan qu'il leur apportoit, mais vn peu trop tard, car il auoit esté retardé par la prise de la beste qu'il rencontra fortuitement en son chemin, laquelle ayant tuée, il en porta quelque morceau en sa cabane, & renuoya querir le reste par les femmes auant partir, pour son message.

Or comme il fut entré en la cabane des meurtris, il s'informa des enfans qu'il trouua là assis, où estoient leur père & leur mère: pour nos papa, dirent les enfans, nous les croyons à la chasse, & nos meres chercher l'eslan qu'ils ont tué, lequel neantmoins elles ne trouuerent pas, à cause des grandes

neiges qui estoient tombées depuis, & cou-
uert par tout les traces & marques des ra-
quettes. Il leur demanda de plus, dequoy
ils auoient vescu depuis deux iours qu'il a-
uoit rencontré leur pere au bois. Ils dirent Les corps
de la chair d'un ours que leur grand papa tuez trou-
leur auoit enuoyé, & qu'il ne leur en restoit uez.
plus guere: où est donc ce reste, car ie ne
voy rien de pendu à vos perches, leur re-
partit cet homme. Lors les enfans ne sçachâs
encor le malheur arriué à leur pere (car il est
croyable qu'ils estoient absens lors qu'ils fu-
rent tuez) luy dirent que leur mere avec leur
grand maman l'auoient caché dehors, & luy
monstrerent à peu pres l'endroit que le Sau-
uage chercha, & l'ayant trouué & fouillé
dans la cache, il en tira, au lieu de la patte
d'un ours, la iambe d'un homme, bien eston-
né, il mit derechef la main dans le trou, d'où
il en tira encore deux autres iambes, esmer-
ueillé au possible, il demanda aux enfans que
cela vouloit dire; & si on auoit là tué des
hommes, ils respondirent qu'ils n'en sça-
uoient rien, & que leurs meres luy rendroiet
raison de tout, s'il vouloit attendre leur re-
tour, comme il fit.

Estant arriuées, il leur demanda ou e-
stoient leur marys; elles ne sçachans pas en-
cores qu'il leur trouué la cache, luy dirent
qu'elles n'en sçauiét rien, & qu'ils pourroiet
estre quelque part à la chasse: Vous men-
rez, leur repliqua le Montagnais, car vous les
auez tué, & mangé la chair avec vos enfans,

puis leur montrant vne des iambes, leur dit
est-ce là la iambe d'un Hiroquois que vous
avez tué, sont ils venus iusques icy, non ce
sont vos marys que vous avez meurtres mise-
rablement, vous estes des meschantes & ne
valez rien. Elles bien estonnées de se voir des-
couvertes, ne sceurent que repliquer, car
leur montrant le reste des corps desquels el-
les auoient premierement mangé les testes,
elles ne prirent autre excuse pour se iustifier
d'un cas si enorme, sinon que mourans de
faim elles auoient esté contraintes de les tuer
pour viure, elles & leurs enfans, puis qu'ils
n'auoient pas eu soin de leur chercher à man-
ger, voyla comme on est mal assésuré avec
des gens affamez, & qui n'esperent point
en Dieu.

Le Montagnais n'y pouuant apporter au-
tre remede, ny empescher que la chose ne
fut faite, laissa là ses deux miserables avec
leurs enfans, & retourna à sa cabane porter
ses tristes nouvelles, & par tout où il passoit
il en aduertissoit les Sauvages de restant cet
acte inhumain, il nous en donna aussi aduis
quinze ou seize iours après, mais nos Reli-
gieux l'auoient desia sceu par le petit Nanco-
gauachit, appelé à son Baptisme Louys.
Vne telle nouuelle attrista fort nos Freres,
pour l'affection qu'ils auoient à ce bon Ou-
stachecoucou, mais d'aillicurs le procedé
du petit Louys en fut fort agreable & plai-
sant, car venant tout exploré de Kebec, d'où
il auoit appris cettse ascheuse histoire de la
mort

Plaisant
procedé du
petit Louys

mort de son parent ; demanda à nos Religieux où estoit le Pere Ioseph , helas , dit il , qu'il sera fâché de la triste nouuelle que ie viens d'apprendre. à Kebec , tost, tost, mon frere, dit-il à l'un de nos Religieux, ouurez moy promptement la porte de vostre chambre, que ie voye si Oustorcheoucou est dans l'Enfer , car il est mort sans estre baptisé. C'estoit vngtand lugement en raille douce, dans l'Enfer duquel il le pensoit trouuer dépeint avec les autres damnez , car nos Religieux auoient accoustumé de leur monstrier cette Image, pour leur mieux faire comprendre les fins dernieres de l'homme, la gloire des bienheureux , & la punition des méchans. En verité les Images deuotes profitent grandement en ces pays là , ils les regardent avec admiration , les considerent avec attention , & comprennent facilement ce qu'on leur enseigne par le moyen d'icelles. Il y en a mesmes de si simples qui ont cru que ces Images estoient viuantes , les apprehendoient , & nous prioient de leur parler , c'estoient les livres où ils apprennoient leurs principales leçons , mieux qu'en aucun de ceux desquels ils ne faisoient que conter les feuillets.

Comme les deux femmes qui auoient mangé leurs maris furent condamnées par les Sauvages, l'une d'estre assommée & l'autre d'estre bannie, laquelle en fin fut ensevelie sous les glaces, apres auoir bien rodé & contrefait la furieuse.

CHAPITRE XLIV.

VN malheur n'arriue iamais seul, ny vn peché sans l'autre, voyez en l'experience aux mauuais, ils ne sont pas sortis d'un crime qu'ils en commettent vn autre. *Abissus abissum inuocat.* On dit de nostre ieune Sauvagesse Oulcouche qu'auant de tuer son pere, & son mary, elle en auoit donné aduis à vn sien frere, auquel elle promit deux de ses enfans pour luy seruir de nourriture, en attendant qu'il eut pris de la beste, c'est à dire de la venaison, & qu'il en mangea l'un, & l'autre resta à la mere. Je ne veux pas asseurer que la chose soit vraye, tant y a que les Sauvages nous l'ont asseuré : & ont par plusieurs fois monstté cet inhumain à nos Religieux, leur disans, tenez, voyla le frere d'Oulcouche, qui a tué, & mangé son propre nepueu.

vn Sauvage
mange, son
nepueu.

C'est la coustume des Sauvages Montagnais, de se rendre vers Kebec au renouveau pour traiter avec les François, & ordonner des choses necessaires à leur Nation, car encore qu'ils vivent presque sans loy, ils ont encore quelque forme de Justice, & de gouvernement politique entr'eux. En cette assemblée leur premiere expedition fut de donner sentence contre les deux femmes meurtrieres, non à l'estourdy & par precipitation, mais apres avoir meurement consideré l'importance du fait, & bien debatü les raisons de part & d'autre, dont la faueur emporta neantmoins pour la plusieune (c'est à dire que la corruption se glisse par tout) car deux Capitaines avec plusieurs anciens, ayans conclu à la mort de toutes les deux, le troisieme Capitaine nommé Esrouachit, ny voulut iamais consentir pour la dernière, à cause qu'elle avoit autrefois espousé son frere, & fut seulement banni.

Forme de
Justice en-
tre les sau-
vages.

L'exécution neantmoins en estoit vn peu difficile, car comme ils n'ont point de Ministres ordonnez pour de pareilles actions, il falloit trouver vn homme assez hardy pour l'entreprendre, & personne ne se presentoit, aussi font ils grande difficulté de mettre la main sur aucun de leur Nation, non pas mesme pour l'offencer tant soit peu, & encor moins sur les femmes, & petits enfans qu'ils supportent avec patience & charité.

Ala fin le Capitaine nommé Mahicon
 tio, ayant rehaussé sa voix & demandé de
 vant toute l'assemblée, si quelqu'un voudro
 se charger de la punition de ses deux fem
 mes; (car ils ne contraignent personne contre
 son sentiment) Alors le Sauvage Renoc
 mar, surnommé par les François le Camart,
 homme adroit, & de bon iugement, s'of
 frit publiquement d'en faire l'exécution &
 d'y aller au plustost, car qu'elle apparence
 disoit-il, que personnes si meschantes de
 meurassent impunis apres tant de cruauté; il
 ne m'importe que la vieille soit ma paren
 te ou non, ie ne la recognois plus pour telle.
 suffit que ie sçay qu'elle a tué & mangé son
 fils, & son mary, & ayant esté accepté du
 Conseil, il prit congé pour la commission,
 & passa par nostre Couuent pour nous en
 donner aduis. Le bon Pere Ioseph tascha bien, mais en
 vain, de le dissuader de faire mourir la vieil
 le, sans au prealable auoir sondé si on la
 pourroit rendre Chrestienne, mais il ne fut
 possible de l'y combler, & dit qu'elle ne mé
 ritoit pas cette grace là, & qu'au reste nous
 auions bien peu d'esprit (c'est leur façon de
 reprimender) de procurer la vie à celle qui
 auoit donné la mort à de nos meilleurs amis,
 & que les autres François l'auoient enou
 ragé de s'en promptement deffaire, afin qu'il
 ne fut plus parlé d'elle, & là dessus sortit
 de nostre Couuent, fut coucher à sa ca
 bane, & dès le lendemain matin se rendit à

celle des criminelles, lesquelles il trouua
fort affligées, & en l'attente de la mort qui
leur auoit esté annoncée sous main par vn
de leur amis, pour leur donner temps de
s'éuader.

Mais au contraire ces pauuës femmes
touchées d'vn deplaisir extreme de leur fau-
te passée, commencerent à s'escrier disans,
ohelàs; à quel propos nous enfuyr, puis que
nous auõs méritées la mort, en celle de
nos maris; non, nous attendrons icy com-
me coupables, la punition de nos de-
merites, & comme criminelles, la iuste
sentence de nos Capitaines, c'est pourquoy
allez en paix, & nous laissez icy pleurer nos
infortunes, puis que vous ne pouuez fai-
re que nos pechez ne soient commis, &
nous rendre de coupables innocentes, mou-
rons donc puis qu'il faut mourir ma che-
re fille, disoit la vieille à sa bru, car nous
ne pouuons suruiure nos maris qu'en abo-
mination, & deshonneur de tout le mon-
de, j'ay desiré le crime pour rassasier ma
haine, & tu as suiuy mes mauuaises volon-
tez, i'en suis la plus coupable, & tu n'es
pas innocente; ô mort pourquoy souffre-
tu vn si long-temps de si miserables crea-
tures sur la terre, oste nous cette vie, ô
mort, qui nous fait rougir deuant le re-
ste des creatures, car pour moy ie suis
assée de viure, & mourray de tristesse,
la vie par la violence, ne m'est bien-tost
ostée.

Regrets des
criminelles

L'execu-
teur arriue.

Comme la vieille acheuoit ses tristes discours, auxquels respondoient d'un meurtre ton, ceux de la ieune aussi affligée qu'elle; arriua Kenoemar, chargé de leur condamnation bien resolu de la mettre en effect comme il fit apres les y auoir disposées & prudemment preparées. Il entra donc dans la cabane sans frapper à la porte, car il n'ont pas accoustumé d'y frapper en entrant non plus qu'au pays des Hurons, & se sentent là sans saluer, ny dire mot, sinon quelquefois le ho, ho, ho, qui est tout leur plus grand compliment.

Estant assis, il demanda à manger, disant qu'il auoit vne grand'faim, lors la vieille se mit en deuoir de luy en disposer promptement avec la chair d'eslan qu'elle mit cuire dans vne chaudiere sur le feu. Comment, dit-il, tu me veux donc faire festin (car ils appellent festin tous les repas où il y a vn peu de bonne chere.) Est-ce point encore de la chair de ton mary, ou de ton fils, sont-ce là des restes de cruauté. Aquoy ces pauures femmes ne respondirent autre chose, sinon nous n'auons rien, & auons bien merité la mort ce qu'elles dirent avec tant de regrets, de larmes & de souspirs, comme personnes qui se voyoient prochaines de la mort, & de celuy qui la leur deuoit donner, qui fust iustement esmeu & contrainct de dissimuler vn peu avec elles, & les prier de ne pleurer plus, & d'oublier tout le passé.

& prenant du petun dans son petit sac, leur en presenta à petuner, mais elles le refuserent disant. L'amertume de nos ames & les ressentimens de nos fautes passées, nous a osté l'enuie, & la force de pouuoir petuner, plustost fais nous promptement mourir puis que tu es venu à ce dessein, car nous ne faisons que languir, & allonger nostre martyre. Ce que voyant, & qu'il ne pouuoit les appaiser, ny ne vouloient auoir part au festin qui se preparoit; il leua alors le masque, & leur dit qu'en effet elles ne valloient rien, & meritoient la mort, & s'adressant à Ouscouche la premiere, il luy dit. Les Capitaines t'ont condamnée de sortir de la Nation, & de t'en aller ailleurs où tu pourras avec ton enfant, tous auoient oppiné à ta mort comme meschante, mais ton beau frere a prié pour ta vie, parquoy remercie l'en à la premiere rencontre, & ne fais plus estat de nous voir, ny nous, ny les Algomequins, avec lesquels nous auons alliance.

Après se tournant vers l'autre, il luy dit, & toy vieille qui deuois auoir plus de vertu que ta bru, tu mourras de la mesme mort de ton mary, & de ton fils, puis leuant sa hache il luy en deschargea vn si grand coup sur la teste, qu'il l'estendit morte sur la place, & luy ayant coupé le col, il emporta la teste aux Capitaines, apres auoir festiné de la viande, que la vieille auoit mise sur le feu.

Ouscouche qui deuoit estre adoucie par la grace qu'on luy auoit faite, en deuint au contraire, plus insolente & furieuse, car rodant les bois, elle laissa premierement son enfant à la premiere cabane qu'elle rencontra, puis leur dit, sçachez que ie ne mourray iamais que ie n'aye encore mangé des hommes, & des enfans, & par tout où i'en trouueray ie les assommeray, & en feray curée. Ce qui donna vne telle espouuente à tous les Sauvages, qu'on la redoutoit par tout, comme vne furieuse lyonne qui a perdu ses petits. Si quelqu'un la rencontroit par les bois il s'en d'estournoit, car vn seul ne l'eut osé aborder. Ils disoient qu'elle auoit le diable au corps, & qu'elle estoit plus forte que cent hommes, pourquoy tous tiroient de long peur de la rencontrer.

Enuiron le mois de Iuillet de la mesme année, il prit ennuy à nostre F. Geruais d'aller par canot au lac de la riuere de S. Charles avec Neogaemat, afin de voir si la difficulté du chemin en estoit si grande que les Sauvages nous depeignoient, car iamais aucun François n'y auoit esté que sur les neiges, ou sur les glaces pendant l'Hyuer. Ayant donc passé vnze ou douze saults, dont aucuns sont assez difficiles, non pas neantmoins à l'egal de ceux des Hurons, qui sont espouuentables, & dangereux, au delà de la pensée de ceux qui n'y ont pas esté. Ils se cabanerent sur le bord de la riuere, en vn lieu que les Sauvages

pellent le Capatagan, d'où il faut quitter la
 ruiere & aller par dans les terres environ
 rois lieues de chemin chargé de son équì-
 page.

Or pendant le iour chemin faisant, ils auoiet
 rencontré la trace de quelque personne nou-
 uellement passée par là, ce qui donna vne
 telle espouente au pauvre Néogaemat qu'il
 n'en pû dormir toute la nuict & fut tousiours
 au guet pendant que les autres dormoient,
 craignant à toute heure de voir Ouscouche à
 ses elpaules, & ne voulut permettre qu'on fist
 du feu pour le souper, car comme il croyoit
 qu'elle eut passé par là, il alleguoit qu'elle sen-
 tiroit la fumée du feu, qui luy feroit descou-
 urir leur giste & les assommeroit tous en dor-
 mant. Il fallut donc patienter de son humeur,
 se contenter d'un petit morceau de pain sec, &
 se coucher au pied d'un arbre, iusques au len-
 demain matin qu'ils continuerent leur che-
 min vers le lac.

On a appris du depuis que ces traces imprì-
 mées sur le sable, estoient du bon frere Jean
 Gaufestre Iesuite, lequel s'estant égaré dans
 les bois, auoit repris le bord de la ruiere pour
 retrouver le chemin de sa maison perdue, car
 les plus experimentez y sont souuent pris,
 s'ils ne sont conduits par les Sauvages, qui
 comme les oyseaux retrouuent tousiours
 leurs nids, quoy que fort esloignés, ou pour
 petits qu'ils soient.

Nostre pauvre Ouscouche comme vne
 beste égarée, ro doit par tout sans trouuer qui

la voulut recevoir; elle ne cherchoit qu'à mal faire, & tous la fuyoient comme dangereuse & indigne de la conuersation humaine. Si elle alloit aux Algoumequins ils la rebutoient & la chassoient de leur compagnie. Si à Tadoussac de mesme, tellement qu'elle estoit comme dans vn desespoir de pouuoir iamais trouuer qui la voulut recevoir à grace, iusques à ce qu'il y eut deux ieunes hommes Sauuages, dont l'un s'appelloit Sy Syfiou, Montagnais de nation le quel auoit auparauât demeuré avec les RR PP. Iesuites, & depuis quitté comme vn las de bien faire, & l'autre estoit vn Algoumequin nommé Chiouyttonné, lesquels abandonnant leur nation, se mirent en la compagnie de ceste mauuaise femme, & faisoient ensemble les manitous & endiables, menaçans de ne vouloir viure que de chair humaine & d'assommer tout autant de personnes qu'ils pourroient attraper.

Les Affo-
ciez d'Ous-
couche
font fais
mourir.

Cela mist vne telle alarme par tout le camp que petits & grands en apprehendoient les approches. Le Capitaine Esrouachit appelé par les François la Fouriere avec quelque autres Capitaines tindrent conseil par entr'eux pour aduiser aux moyens de se deffaire de ces deux compagnons auant qu'il en arriuaist plus grand accident, & conclurent qu'il les falloit faire assommer tous deux sans autre forme de procez. Ce qui fut incontinent executé, car s'estans venus ranger vers Tadoussac où estoient ces Capitaines, ils furent surpris & mis à mort en leur prononçant leur Sentence

plustost que d'auoir sçeu qu'on s'estoit assemblé pour eux, car là il n'y a point d'appel, ils sont des Iuges souverains, qui ne sçauent que c'est de chicanerie, vn procéz est aussi-tost iugé qu'il est intenté. On n'y faict point d'escriptures, on n'y paye point d'espices; les Aduocats, Procureurs & Sergens en sont bannis, c'est vn conseil de vieillards & de gens prudens qui ne se precipitent point en affaires, ruminent ce qu'ils veulent dire & suivent facilement la raison qu'ils voyent apparente, autrement il y a peu de faueur pour qui que ce soit.

La determinée Ouscouche, fut bien estonnée quand elle vit ses deux hommes par terre, la peur d'un pareil chastiment luy fist alors croistre des aisles aux pieds, mais qui la precipiterent dans vne mort plus rigoureuse & sensible, car s'estant iettée seule dans son canot pensant traueser la riuere, qui a 6. ou 7. lieues de large en cet endroit, elle fust enseuelie sous les glaces que la marée faisoit debattre & s'entrechoquer, desquelles elle ne put se deffendre, & là perit miserablement, celle qui estoit auparauant la terreur & l'espouuante de tous ceux de sa nation.

*Ouscouche
est noyée.*

Voyla vne fin funeste & mal-heureuse, qui nous doit apprendre que tost ou tard la iustice vengeresse de Dieu attrape les meschans, & les punit d'autant plus rigoureusement qu'il tarde à leur eslançer ces foudres.

Des deffuncts , & du festin qui se faict à leur intention. Comme ils les pleurent & enseuelissent & de leurs sepultures. Du deuil, & de la resurrection des hommes valeureux, avec deux notables exemples pleines d'insiraction.

CHAPIRE XLV.

De la mort
du pauvre
& du riche.

PAR Arrest du tres-haut, il a esté ordonné, que tout homme riche & pauvre mourra vn iour , & rendra compte deuant Dieu de toute sa vie passée, mais hélas le pauvre & le riche seront bien differés en la mort, beaucoup plus qu'en la vie : pour ce que si le pauvre meurt ce sera pour reposer, & si le riche meurt ce sera pour peiner: de maniere que Dieu tres-juste priuera l'un de ce qu'il possedoit, & mettra l'autre en possession de ce qu'il desiroit, & par ainsi chacun aura son tour, le riche deviendra pauvre & le pauvre deviendra riche, ô Iesus, des biens de vostre Paradis.

Bien-heureux est celuy qui n'est point attaché aux vanitez & richesses de cette vie, & qui se maintient tel en la vie qu'il desire estre trouué en la mort: car il vaut beaucoup mieux mourir comme vn pauvre Lazare estant en la grace de Dieu, abandonné de tous , que de

mourir puissant comme le riche gourmand,
& estre assisté de tous.

On meurt bien differemment & de diuer-
ses maladies naturelles & violentes; mais dans
l'ordinaire, le seul manger & boire tué les be-
tes & les hommes brutaux qui en prennent
au delà de leur suffisance; mais les hommes sa-
ges & gens d'esprit ne meurent jamais, fors
que d'ennuis, disoit Ciceron escriuant à Atti-
cus son amy.

Toutes les nations les plus barbares aussi
bien que Chrestiennes, ont tousiours eu vn
bin tres particulier d'enseuelir les morts &
de venerer les trespassez. Le bon Tobie en re-
tient les promesses de Dieu comme il se lit es
saintes lettres, & tous les liures sont plains
d'exemples des personnes deuotes qui se sont
données à ceste Chrestienne & pieuse occu-
pation, qui est reuerée mesme de nos Hurons
& Canadiens, qui y apportent l'ordre que ie
vous vay d'escrire.

À mesme temps que quelqu'un de nos Hu-
rons est decédé l'on l'enveloppe dans sa plus
belle robe, de telle sorte que le menton touche
les genouils, ils le lient avec de leurs cou-
royes de cuir, qu'ils font de peau d'essan ou de
escorce qu'ils appellent ati. Si c'est vn Mon-
agnais ou Canadien, ils luy donnent des
chausses & des chausses, & l'ayant enveloppé dās
sa robe toute neuue, puis lié en vne piece
d'escorce, ils le portent en leur cimetiere. Pour
les Hurons après que le corps a esté enveloppé
dans sa plus belle robe, il est après posé sur

Façons
d'enseuelir
les morts
aux Hurons.

la natte où il est mort , couuert d'une autre robe qui luy sert de poille, & deslors n'est plus sans assistance d'hommes ou de femmes ou des deux ensemble, qui se tiennent là en grand silence assis sur les nattes & la teste panchée sur leurs genouils , sinon les femmes qui tiennent assises à leur ordinaire avec un visage pensif, qui denote le deuil.

Cependant tous les parens & amys du defunct, tant des champs que de la ville sont aduertis de cette mort , & prient de se trouver au conuoy par les plus proches , & diriez qu'ils ayent appris ces ceremonies des Chrestiens lesquels ils veulent meisme surpasser en leur soin.

Festiu fait
pour les
deffuncts.

Le Capitaine de la police de son costé, faict ce qui est de sa charge: car incontinent qu'il est aduertý de ce trespas, luy, ou son allessieur, en faict le cry par tout le bourg, & prie vn chacun, disant: Etsagon, Etsagon, prenez courage, prenez courage, & faictes tous festin au mieur qu'il vous sera possible , pour vn tel ou vne telle qui est decedée. Alors tous les parens & allies du deffunct chacun, en leur particulier font vn festin dans leurs cabanes, le plus excellent qu'ils peuuent & de ce qu'ils ont a commodité, puis le departent & l'enuoyent à tous leurs parens & amys à l'intention du deffunct sans en rien reseruer pour eux, & ce festin est appellé Agochin atiskein, le festin des ames.

Les Montagnais font quelquefois des festins des morts, auprès des fosses de leurs parens trespassez & leur donnent la meilleur

art du banquet qu'ils iettent au feu , mais ie
e me suis pas enquis des autres nations s'ils
n font de mesme, ou comme ils en vsent, d'au-
ant que cela est de peu d'importance, & qu'il
est facile par ce que ie viens de dire , de leur
persuader les prieres, aumosnes & bonnes œu-
res pour les deffunets, puis que des-jails en
ont en quelque maniere dans leur obscurité,
royans soulager les ames.

Les Elsedons, Scythes d'Asie, celebrent
es funerailles de leur pere & mere avec chât-
e ioye. Les Thraciens enseuelissoient leurs
morts en se resioüissans, d'autant (disoient-ils)
qu'ils estoient partis du mal & arriuez à la bea-
tude: mais nos Hurons enseuelissent les leurs
a pleurs & tristesses, neantmoins tellement
moderées & reglées au niueau de la raison,
qu'il semble que les femmes qui doiuent pleu-
r (ausquelles seules la charge en est donnée,)
ont vn pouuoir absolu sur leurs larmes &
sur leurs sentimens, de maniere qu'elles ne leur
donnent cours que dans l'obeïssance, & les ar-
restent par la mesme obeïssance, où plusieurs
mesmes Chrestiennes pleurent de mesuremēt,
au lieu qu'à l'imitation des Elsedons & Thra-
ciens elles deuroient se resigner à la volonté de
ieu en la mort de leurs parens, & pleurer
justost en leur naissance pour les voir changés
de crimes & du peché de la conception.

Auant que le corps du deffunet sorte de la
bane, les femmes & filles là presentes y font
des pleurs & lamentations ordinaires, lesquel-
les ne cōmencent ny ne finissent iamais, (cōm-

Pleurs des
femmes
pour les
deffuncts.

me ie viens de dire,) que par le commandement du Capitaine ou Maistre des ceremonies. Le commandement donné, toutes vnanimement commencent à pleurer, & se lamenter à boiescient, & femmes & filles, petites & grandes (& non iamais les hommes, qui demonstrent seulement vne mine & contenance morne & triste, la teste & les yeux abaissiez) & pour s'esmouuoir avec plus de facilité, elles repètent tous leurs parens & amis deffuncts, disans. E mon pere est mort, & ma mere est morte, & mon cousin est mort, & ainsi des autres, & toutes fondent en larmes, sinon les petites filles qui en font plus de semblant qu'elles n'en ont d'enuie, pour n'estre encores capables de sentiments.

Ayans suffisamment pleuré, le Capitaine leur fait le hola, & toutes cessent de pleurer comme si elles n'y auoient point pensé. Il y en a qui entremeslent en leurs complaints funebres, les hautes louanges du deffunct & exalterent ses vertus & prouesses, pour en faire regretter la perte, & donner vn facile accés à leurs larmes qui autrement seroient fort entanées, car de grace sans les inuentions, quelle apparence y auroit il de pouuoir pleurer vn personnage, à qui vous n'aurez aucune obligation & ne vous seroit ny parente ny amie, ni de cognoissance.

Or pour monstrier combien il leur est facile de pleurer, par ces ressouuenirs & repetition de leurs parens & amis decedez, les Hurons & Huronnes souffrent assez patiemment tout

tes autres sortes d'iniures : mais quand on vient à toucher cette corde, & qu'on leur reproche que quelqu'un de leurs parens est mort, ils sortent alors fort aysement des gonds & de la patience, car ils ne peuuent supporter ce ressouvenir, & feroient en fin vn mauvais party à qui leur reprocheroit : & c'est en cela, & non en autre chose, que ie leur ay veu quelquefois perdre patience & se cholerer ouuertement.

Au iour & à l'heure assignée pour le cōuo y
chacun se range dedans & dehors la cabane
pour y assister: on met le corps sur vn brancart
ou forme de ciuiere couuerte d'une peau, puis
tous les parens & amis avec vn grand concours de peuple le suiuent processionnellement deuant & derriere iusques au cimetiere
ordinairement esloigné d'une portée d'arque-
buzes du bourg, où estans tous arriuez, chacun
se contient en silence, les vns debouts & les
autres assis, selon qu'il leur plaist, pendant
qu'on esleue le corps en haut, & qu'on l'accō-
mode dedans sa chasle, faicte & disposée ex-
près pour luy : car chacun corps est mis dans
vne chasle à part, bastie de grosses escorces, &
posé sur quatre gros piliers de bois, vn peu
peinturez, haut esleué de neuf ou dix pieds, ou
environ, ce que ie peux coniecturer en ce
qu'esleuant ma main, ie ne pouuois toucher
aux chasses qu'à plus d'un pied ou deux prés.

Les Corinthiens & presque tous les peuples d'Asie, auoyent de coustume d'enfouyr
dans la terre avec les corps des deffuncts, tous
morts.

Du cime-
tiere & des
chasses,

Ceremo-
nies des
Corinthiens
enuers les
morts.

Petite Idole.

les plus beaux vaisseaux d'œuvre de poterie qu'ils eussent ; & pensoient à leur fol iugement, & vaine superstition, que les Dieux qui en auoient la garde, comme Dieux domestiques, venoient boire & manger avec eux, après leur trespass, & leur apportoit de la viande des Dieux celestes, & de leur breuillage aussi. J'ay veu vne petite idole de terre cuite de la longueur de cinq ou six poulces, plombée de vert, qu'on auoit apportée d'Egypte & prise dans le corps d'un deffunct, selon l'ancienne coustume des Egyptiens de mettre dans les corps morts de ceux de leur nation, vne semblable idole, comme vn Dieu tutelairé posé pour leur garde & conseruation.

Nos Sauuages sont bien fols à la verité, mais ils ne le sont pas dauantage que ces Sages Egyptiens en ce cas, car bien qu'ils enferment avec les corps de leurs parens deffuncts, de l'huyle, de la galette, des haches, cousteaux, & autres meubles, si est-ce qu'ils ne croient pas que les Dieux domestiques, terrestres, ny celestes viennent manger avec eux dans la fosse, ny qu'une petite idole de terre cuite, petrie par la main d'un potier soit vn Dieu tutelairé, qui les puisse deffendre, & par ainsi il ne faut point trouuer estrange s'ils ont de folles croyances, puis que des peuples policez estimez Sages & non Sauuages, ont eu de si ridicules superstitions.

Le corps estant posé & enfermé dans la chassee avec tout son petit equipage, on iette de dessus la biere deux bastons ronds, cha-

eun de la longueur d'un pied, & gros comme
 4. doigts, l'un d'un costé pour les ieunes hom-
 mes, & l'autre pour les filles, apres lesquels ils
 se mettent comme Lyons à qui les aura, & les
 pourra esleuer en l'air de la main, pour gaigner
 vn certain prix, qui leur couste presque la vie
 tant ils s'empresment pour l'auoir. Il y a des ce-
 remonies & des ieux où l'on peut prédre quel-
 que esbat, mais à celuy-cy il n'y en a point du
 tout, & donne plustost horreur que contente-
 ment & recreation, particulièrement la vio-
 lence & l'empresment que ce font les filles,
 qui pourtāt n'en font que rire, nō plus que les
 garçons de leurs sueurs & peste d'haleines, qui
 feroiēt estouffer personnes plus delicates; mais
 ceste ceremonie ne s'observe pas enuers tous.

Or pendant que toutes ces ceremonies
 s'observent, il y a d'un autre costé vn officier
 monté sur vn tronc d'arbre, qui reçoit les pre-
 sens que plusieurs font à la veue, ou plus pro-
 che parent du deffunct, pour essuyer ses lar-
 mes, qui est vne bonne inuention, car par ce
 moyen le dueil en est bien tost passé. A chaque
 chose qu'il recoit, il l'esleue en l'air à la veue de
 tous, & dit: voyla vne telle chose qu'un tel ou
 vne telle a doné, pour essuyer les larmes d'une
 telle, puis il se baïsse & luy met entre les mains:
 tout estant acheué, chacun s'en retourne d'où
 il est venu, avec la mesme modestie & silence.

J'ay veu en quelque lieu des corps
 mis en terre, (mais fort peu,) sur les-
 quels il y auoit vne chaise d'escorce
 dressée, & à l'entour vne pallissade toute

en rond, faicte de pieux picquez en terre, de peur des chiens & bestes carnassieres, ou bien par honneur & reuerence des deffuncts.

Les Canadiens, Montagnais, & les autres peuples errants, ont quelques autres ceremonies particulieres enués les morts qui ne sont pas communes avec celles de nos Hurons, car premierement les Montagnais ne sortent iamais les corps des trespassez par la porte ordinaire de la cabane où il est mort, ils leuent en vn autre endroit vne escorce par où ils le font sortir, disans pour leur raison, que l'on ne doit pas sortir vn deffunct par la mesme porte où les viuans entrent & sortent, & que ce seroit leur laisser vn facheux resouuenir, & pour quelque autre raison que ie n'ay pas apprise.

Ils ont encore vne autre ceremonie particuliere de frapper sur la cabane ou quelque vn vient de mourir, en disant : oué, oué, oué, pour en faire sortir l'esprit, disent ils, & ne se seruent iamais d'aucune chose de laquelle vn trespasse se soit seruy en son viuant, & pour le reste des funerailles après que le corps a esté enseveli & garotté à leur accoustumée, ils l'eleuent couuert d'une escorce sur des fourches ou habitacle fort haut, avec tous ses meubles & richesses, en attendant que tous ses parens & amis se soient assemblez pour l'enterrement : car de laisser le corps en bas dans les cabanes il y pourroit par fois estre trop longtemps, ce qui les incommoderoit fort, & causeroit vne autre plus mauuaise odeur que leur poisson puant. O bon Iesus, qui ne leur seroit

pas plus en horreur & desdain qu'est à nous la putrefaction de ces vaines creatures du monde quand elles viennent à mourir, à aucunes desquelles i'ay assisté & n'y ay pas esté satisfait.

Estans vagabonds & sans aucune demeure permanente, ils ne peuuent auoir de cimetiere commun & arresté comme les nations sedentaires, mais aux lieux plus commodes où ils se trouuent, ils font vne fosse capable, laquelle estant faite ils mettent au fons 2. ou 3. bastons, puis le corps dessus qu'ils entourent de branches de sapin sans y mettre de terre, le couurét d'vne escorce, & par dessus ceste escorce d'vne quantité de busches qu'ils couppent de longueur plus grandes que la fosse, d'autres redoublent la fosse par tout de rameaux d'arbres, puis de peaux de bestes, & en suite y mettent tout le meuble du deffunct, si c'est d'un homme, son arc, ses flèches, son espée, sa masse & quelque escuelle, petite chaudiere & vn fuzil. Si c'est vne femme, la corde pour aller au bois, la hache, quelque escuelle & ses petites vstancilles à travailler, tant à peindre leurs robes que leurs esguilles à coudre; puis tout cela est couuert d'escorces & de busches, & quelquefois font tomber dessus plusieurs gros arbres en croix les vns sur les autres cōme vn bucher, crainte des bestes, & vn autre debout pour signal, qu'ils peignent vn peu de rouge par en haut.

Il y en a qui n'y en mettent point pour en oster la cognoissance aux estrangers & Francois desquels ils craignent plus l'auarice, que

la gueule dévorante des bestes feroces & carnassieres, tant ils sont religieux conseruateurs des biens & des os de leurs parens deffuncts, de maniere qu'on n'escauroit en rien tant les offencer, qu'à fouiller dans leurs sepultures, comme ont quelquefois fait les François pour en tirer les castors, lesquels s'ils y eussent esté surpris par les Sauuages, ils en eussent suby la peine que meritoit leur auarice & impieté, & comme m'ont dit quelquefois nos Hurons, il faudroit faire estat de subir vne mort plus cruelle que pour auoir vollé les viuans, on s'y pourroit assez asseurer dans ce tesmoignage auéré, qui si le feu s'estoit pris en leur village, & en leur cimetiere, ils accourroient premierement esteindre celuy du cimetiere, & puis celuy du village.

Festiu des
morts.

La fosse estant couuerte (entre nos Canadiens) l'on faict vn grand feu à l'vn des bouts, où tous les assistans & gens de conuoy s'approchent pour festiner & faire bonne chere, des meilleures viandes, soit chair ou poisson, quel on a peu reconurer. Ce festin est à tout manger, en deut-on creuer à la peine, si l'on ne se rachepte. Les plus proches parens du deffunct ont soin (bien qu'en deuil) de faire cuire les viandes qui sont dans les chaudieres, pendant que le Capitaine ou plus ancien de la compagnie faict les harangues & oraisons funebres à la louange du trespassé, lesquelles finies l'on commence à vider les marmites, si nō la femme ou le mary de la deffuncte & autres parens proches, qui demeurent en silence sans

manger, iusques à vne autre heure hors de compagnie. Ils se peignent le visage de noir, qu'ils entretiennent vn an durant pour habit de deuil, puis s'en retournent chacun à sa cabane.

Ils font de la difference & distinction aux sepulchres des Capitaines, lesquels ils font en façon d'vne Chappelle ardente : ils plantent des pieux à l'entour, redoublez d'escorces, sur lesquelles ils peignent quelque personnage dessus, il y en a à quelqu'vns dont on ne met point d'escorces, mais forces busches que l'on entasse les vnes sur les autres; on dit aussi que à la mort de ces Capitaines ou personnes d'autorité, les parens & amis du defunct, avec le reste du peuple, vont trois ou quatre fois l'an, chanter & dancier sur leur fosse, & que s'il y reste quelque chose du festin, il est iecté dedans le feu, au lieu qu'aux autres il faut tout manger; & en cela ils se conforment aucunement à l'ancienne coustume de plusieurs Chrestiens, qui souloient banqueter sur les sepultures, interpretant l'escriture qui dit: met ton pain & ton vin sur la sepulture du trespassé.

A ce propos des sepultures de Capitaines, il me souuient auoir veu vn petit Islet au milieu d'vn grand lac au pais des Algonmequins, couuert d'vn fort haut bucher avec vne grosse piece de bois dressée debout par dessus, ie le contemplay & l'admiray vn fort long-téps, avec opinion que ce deuoit estre la sepulture d'vn des plus grâds de leur nation, puis

Sepulture
dans vn
Islet.

que le bucher en estoit si haut, qu'il estoit le trauail de beaucoup d'hommes. Mes Sauuages ne m'en sçeuient donner autre raison, aussi y auoit il bien de l'apparence. Ce lac estoit si grand qu'il comprenoit plus de 50. Isles dans son enceinte, mais celuy du bucher estoit le plus petit de tous, car il ne contenoit simplement que le bucher.

Deuil &
oraison fu-
nebre.

En quelque nation, non seulement les Sauuages ont accoustumé de se peindre le visage de noir à la mort de leurs parens & amis, qui est vn signe de deuil : mais aussi le visage du deffunct, & en oliuēt son corps de matachias, plumes & autres bagatelles, & s'il est mort en guerre le Capitaine fait vne harangue comme vne oraison funebre deuant le corps, où assistent tous les parens & amis, lesquels il incite & exhorte de prendre promptement vengeance d'vne telle meschanceté, & que sans delay on aille faire la guerre à leurs ennemis, afin qu'en si grand mal ne demeure point impuny, & qu'une autre fois on n'aye plus la hardiesse de leur venir courir sus.

Resurre-
ction des
morts.

Les Attinbindarons font des resurrections des morts, principalement des grands Capitaines & personnes signalées en valeur & merite, à ce que la memoire des hommes illustres reuiue en quelque façon en autrui, par exemples de vertus semblables que doit donner celuy que l'assemblée subroge.

Or l'election se fait par les gens du conseil de la personne qu'ils croyent plus approcher en corpulence, aage, & valeur, de celuy qu'ils veulent resusciter. Après quoy il se leuent

tout debouts, excepté celuy qui doit estre le
ressuscité, auquel ils imposent le nom du def-
funct, & baissans doucement la main iusque
bien bas, seignent le releuer de terre, vou-
lans dire par là qu'ils tirent du tombeau ce
grand personnage deffunct, & le remettent
en vie en la personne de cet autre qui se leue
debout, lequel (apres les grandes acclama-
tions du peuple) reçoit les presents qu'on
luy fait, & les complimens desquels il est ho-
noré, puis festinent en sa consideration avec
allegresse pour l'auoir retiré du tombeau;
voyla comme les personnes bien meritées
sont honorées chez les Gentils.

Il me reste à vous dire auant clore ce Cha-
pitre, que si ie n'ay point fait mention des
Testamens, & dernieres volontez de nos
Hurons, c'est pour n'estre pas en vsage chez-
eux, ny necessaires, & que leur seule parole
suffit sans autre escriture, car ils sont telle-
ment bien vnis, & si peu picquez d'auarice,
que pour ce regard ils n'ont iamais de diffi-
culté, mais ils ont ce malheur en eux de ne
pardonner point à leurs ennemis en mourant
comme font les bons Chrestiens, & en re-
commandent la vengeance à leurs enfans,
comme Dauid la punition à Semej, & com-
me les dernieres paroles d'un pere sont celles
que les enfans doiuent inuiolablement ob-
seruer & garder en leur esprit, de là vient
qu'ils ne pardonnent point aysement à qui-
côque a fait du desplaisir à leurs parens, plus
portez en cela de mauuaise volonté que le

Des Testa-
mens.

Vertu ad-
mirable de
Phocion.

bon Phocion General des Atheniens, lequel estant fait iniustement mourir par ses concitoyens, quelqu'un des assistans luy ayant demandé s'il vouloit mander aucune chose à son fils Phocius: Ouy certes, dit-il, c'est qu'il ne cherche jamais à venger le tort que me font les Atheniens, ce qu'il dit non par un esprit de vanité, mais par deuoir d'un homme de bien, & vrayement vertueux. Il estoit d'ailleurs si attrempé, & d'un naturel si honneste qu'il se monstroient doux, gracieux, courtois, & humain à tout le monde, iusques à hanter priuement avec ceux qui luy estoient aduersaires, & les seruir en leurs affaires s'ils venoient à tomber en quelque danger, & en quelque aduersité, ce que ie ne puis assez admirer, car nous voyons bien peu de Chrestiens auoir de semblables qualitez, sinon quelqu'un, lesquels mourans laissent à leurs enfans un catalogue de bonnes instructions pour principal heritage, & souveraine richesse, laquelle la rouille ne peut endommager, ny les larrons l'emporter, mais qui est un prix si haut qu'elle nous peut esleuer iusques à Dieu, le cognoistre, l'aymer, adorer, & iouyr de vous mesme, ô bon Iesus, qui est l'unique, & vray bien de tous les esleuz.

Mais pour ce que l'exemple des grands Princes est d'autant plus energique & capable de nous esmouuoir, que leur condition a surpassé la nostre. Je vous rapporteray icy les dernieres paroles du tres pieux Empe-

reur Marc Aurelle à son fils Commode, son
 unique heritier à l'Empire, afin que si l'exem-
 ple des petits n'a eu assez de force sur vostre
 esprit, celle d'un grand Prince vous soit re-
 commandable, & vous porte dans l'exercice
 de la vertu, autant courageusement qu'un
 autre grand Payen vous en donne l'exemple
 sans vous alleguer la vie de nos Saints, & la
 parole de Dieu mesme qui nous enjoint la
 charité, la concorde & la paix, avec nostre
 prochain. O Dieu que c'est une grande
 vertu du Ciel que de pardonner & faire bien
 à son ennemy, il ny a ieusne, austerité, ny
 aumosne qui luy soit comparable.

Ce bon Prince se tournant à son fils, apres Dernieres
 une longue exhortation à la vertu, luy dit. paroles de
 Pour cette dernière heure, mon fils, ie t'ay Marc Au-
 gardé le meilleur, le plus noble, & plus riche relle à son
 ioyau que i'aye possédé en ma vie: & protège fils.
 te aux Dieux immortels, que si ainsi comme
 ils me commandent mourir, ils me don-
 noient congé & licence de lire en la sepultu-
 re, ie le commanderois enterrer avec moy.
 Tu sçauras, mon fils, qu'en l'an dixiesme de
 mon Empire, s'esleua une forte guerre con-
 tre les Parthes indomptez, où par malheur
 aduint qu'il fut necessaire y aller en propre
 personne pour leur donner la bataille: la-
 quelle gagnée, & toutes leurs terres, m'en
 reuins par l'ancienne Thebes d'Egypte, pour
 voir si ie trouuerois aucune antiquité de cel-
 les du temps passé. En la maison d'un Pre-
 stre Egyptien, trouuay une petite table que

L'on pendoit à la porte de la maison du Roy le iour que l'on le couronnoit Roy: & m'dit ce pauvre Prestre, ce qui estoit en cette table auoir esté escrit par vn Roy d'Egypte appellé Ptolomée Arfacide.

Le prie aux Dieux immortels, mon fils, que telles soyent tes œuvres, comme les paroles de ce tableau le requierent. Comme Empereur ie te laisse héritier de plusieurs Royaumes, & comme pere ie te donne cette table de conseils que ie te prie tousiours garder, & tenir en ta memoire & entendement pour les mettre en pratique. Sois doncque cette cy ma dernière parole. C'est avec l'Empire que tu seras craint par tout le monde, mais avec les conseils de cette table tu seras aimé de tous, & viuras en homme de bien & Prince equitable.

Ce propos acheué, & la table baillée, l'Empereur tourna les yeux & perdit le sentiment, & par l'espace d'un quart d'heure fut en tel travail, & de là a bien peu rendit l'esprit.

En icelle table, estoient certaines lettres Grecques, quasi par maniere de vers heroïques, qui veulent dire en nostre vulgaire.

Enseigne-
mens admi-
rables.

Jamais ie n'esteuay le riche tyran, ny hay le pauvre iuste.

Jamais n'ay nié la iustice au pauvre, pour estre pauvre, ny pardonné au riche pour estre riche.

Jamais ie n'ay fait aucun don pour vne

ne seule affection, ny donné chastiment pour
ne seule passion.

Iamais ie n'ay laissé le mal sans punition &
chastiment, ny le bien fait sans remunera-
on & loyer.

Iamais n'ay commis le iugement de la Ju-
stice euidente à vn autre, ny déterminé l'ob-
scure par moy seul.

Iamais ie n'ay denié Iustice à celuy qui la
demandoit, ny misericorde à celuy qui
la meritoit.

Iamais n'ay fait chastiment par ennuy
quelconque, ny promis loyers estant ioyeux
& content.

Iamais n'ay esté nonchalant en la bonne
prosperité & santé, ny desesperé en l'aduer-
sité.

Iamais n'ay fait mal ny chose deshonneste
par malice, ny commis aucune vilenie par
avarice.

Iamais n'ay fauorisé les mutins, ny presté
oreille aux flatteurs.

I'ay tousiours traiaillé à estre aymé des
bons, & iamais ne me suis soucié d'estre hay
des mauuais.

Pour auoir fauorisé les pauures qui pou-
uoient peu, i'ay esté fauorisé des Dieux con-
tre ceux qui pouuoient beaucoup.

De la grand' feste des morts, & comment tous les os des deffuncts sont mis ensemblement dans vne grande fosse avec leurs plus beaux emmeublemens, & des richesses que les parens & amis donnent pour leur servir en l'autre vie.

CHAPITRE XLVI.

Festes pour les trespassés.

Ln'y a point de doute que l'on pourroit facilement persuader aux Sauvages, les prieres & bonnes œuures pour les deffuncts puis que d'eux-mesmes ils se sont desia formez vne maniere de les assister, car de dix ou dix ans, plus ou moins, nos Hurons & autres peuples sedentaires, font la grande feste ou ceremonie des morts, en l'vne de leur bourgade, ou village, comme il aura esté conclu & arresté par vn conseil general de tous ceux du pays (car les corps des deffuncts ne sont enseuelis en particulier que pour vn temps) & là font encore annoncer aux autres Nations circonuoielines, afin que ceux qui y ont esleu la sepulture des os de leurs parens les y portent, & les autres qui y veulent venir par deuotion, y honorent la feste de leur presence; car tous y sont les biens venus & festinez pendant quelques

iours que dure la ceremonie, où l'on ne voit que chaudières sur le feu, festins, & dances continuelles, qui fait qu'il s'y trouue vne infinité de peuple qui y aborde de toutes parts.

Les femmes qui ont à y apporter les os de leurs parens, les prennent aux Cimerieres: que si les chairs n'en sont du tout conformées, elles les en tirent & les rendent fort nets, puis les enuelopent dans de beaux castors neufs, ornez de rassades, & colliers de pourceleines, que les parens & amis contribuent, disans: Tien, voyla ce que ie donne pour les os de mon pere, de ma mere, de mon oncle, de ma femme, &c. & les ayans mis dans vn sac neuf, elles les portent sur leur dos, parez encore par le dessus de quantité de pourceleines, & autres petites iolietez desquelles ils ne sont point chiches en semblables occasions.

Les fêmes nettoient les os de leurs parés.

Elles portent aussi toutes les pelleteries, haches, couteaux, chaudières & autres choses offertes, avec quantité de viures au lieu destiné, qui sont apres mis à part & separez, les viures en vn lieu, pour estre employez en festins, & les sacs, & emmeublemens pendus par les cabanes de leurs hostes, en attendant le iour auquel tout doit estre enseuely dans la terre avec les os.

La fosse se fait hors de la ville fort grâde & profonde, capable de cōtenir tous les os, meubles, & pelleteries dediées pour les deffunts. On y diresse vn eschaffaut haut esleué sur le

Fosse ou se mettent les os.

bord, auquel on porte tous les sacs d'os, puis on tend la fosse par tout, & au fond, & au costez, de peaux, & robbes neuues de castors, puis on y fait vn liêt de haches, en apres de chaudières, rassades, colliers, & brasselers de pourceleine, & autres choses qui ont esté données par les parens & amis. Cela fait, du haut de l'eschaffaut les Capitaines vident tous les sacs dans la fosse parmy la marchandise, lesquels ils couurent encore d'autres peaux neuues, & d'escorces, apres ils reiettent la terre par dessus, & des grosses pieces de bois peur des bestes, puis ils piquent en terre des pilliers de bois tout autour de le fosse, & font vne couuerture par dessus, qui dure autant qu'elle peut, festinent derechef, & prennent congé l'vn de l'autre, pour leur retour, bien ioyeux & contens que les ames de leurs parens & amis deffunts, ayent bien de quoy butiner, & se faire riche ce iour là en l'autre vie.

Notez
Chrestiens.

Chrestiens, r'entrons vn peu en nous-mesmes, & voyons si nos ferueurs sont aussi grandes enuers les ames de nos parens deuenus dans les prisons de Dieu, que celles des pauvres Sauuages enuers les ames de leurs semblables deffuncts, & nous trouuerons que leurs ferueurs surpassent de beaucoup les nostres, & qu'ils ont plus d'amitié l'vn pour l'autre, & en la vie, & apres la mort, que nous, qui nous disons plus sages, & le sommes moins en effet, parlant de la fidelité, & de l'amour reciproque simplement : car
s'il est

Il est question de donner l'aumosne, ou faire quelque autre œuvre pieuse pour les viuans, ou deffuncts, c'est souuent avec tant de peine & de repugnance, qu'il semble à plusieurs qu'on leur arrache les entrailles du ventre, tant ils ont de difficulté à bien faire, prenans pour excuse, leurs enfans, si Dieu leur oste, leurs pauures parens, & par ainsi ils ont tousiours raison à leur dire, de continuer dans leur auarice, & plustost mourir que lascher prise & d'auoir la bourse ouuerte à l'indigent.

Au contraire de nos Hurons & autres peuples Sauvages, lesquels font leurs presents, donnent leurs aumosnes pour les viuans, & pour les morts, avec tant de gayeté, & si librement que vous diriez à les voir, qu'ils n'ont rien plus en recommandation, que de faire du bien, & assister de leurs moyens ceux qui sont en necessité, & particulièrement les ames de leurs parens & amis deffuncts, auxquels ils baillent le plus beau & meilleur de leur auoir, & s'en incommodent quelquefois, & y a telle personne qui donne presque tout ce qu'il a pour les os de celuy ou celle qu'il a aymée & chérie en cette vie, & ayme encore apres la mort: tesmoin Ongyara, qui pour auoir donné & enterré avec le corps de sa deffuncte femme (sans nostre sçeu) presque tout son vaillant, en demeura tres-pauure & incommodé, & s'en resioissoit sous l'esperance que sa fem-

Les Sauua-
ges font li-
brement
l'aumosne.

me en seroit mieux accommodée en l'autre vie.

Or par le moyen de ces assemblées & ceremonies, ils contractent vne nouuelle alliance, amitié & vnion plus estroite, disant Que tout ainsi que les os de leurs parens & amis deffuncts sont assemblez & vnis en vne mesme lieu, de mesme aussi qu'ils deuoient durant leur vie, viure tous ensemble en vne mesme vnité & concorde, comme bons parens & amis, sans s'en pouuoir à ia mais separer ou distraire, pour aucun deseruice ou disgrâce, comme en effet ils font.

Fin du second Liure.



HISTOIRE

DV CANADA,

ET

VOYAGES DES PERES

RECOLLECTS EN LA

nouvelle France.

LIVRE TROISIEME.

Des animamx & bestes brutes, & de la compassion qu'en ont certains Indiens, ausquelles ils ont basti vn Hospital pour les malades & bleßées.

CHAPITRE I.



N dit que la considera-
tion fait les Sages, & les
Saints, & nous esleue
iusques à pouuoir con-
noistre Dieu, & nous-
mesmes, mais nostre ne-
gligence & peu de soin nous entretient sou-

uent dans l'ignorance. C'est vne chose merueilleuse que Salomon aye cognu iusques la vertu de l'ysope, & nostre premier Pere iusques au moindre des animaux, ausquels il a imposé les noms, & que nous qui deurions estre tout confit en cognoissance, ignorons encores les choses plus communes de la diuine prouidence à nostre endroict. Quine voit les continuels miracles de Dieu, en la nourriture & aliment des hommes de tout cet vniuers, ie ne scay si ie me trompe, mais ie croy que n'estoit le miracle qu'il ne se trouueroit pas à chacun, deux gerbes de bled apres la moisson, & cependant tout le monde vit.

Laissons à discourir des hautes sciences aux Doctes, & dans nostre simplicité ordinaire, voyons vn peu ce qui se passe à Paris, & dans les grandes villes peuplées, & vous verrez (chose admirable) qu'il n'y a iournées qu'il ne s'y consume plus de bœufs, & de moutons, d'oyseaux, & de poissons, avec toutes autres sortes d'animaux de poils, & de plumes, qu'il ny pourroit auoir d'animaux nuisibles en toute vne Prouince, & pourtant il y en a tousiours de reste pour le lendemain. C'est la prouidence diuine qui a esté en cela fort sage, ayant fait que tous les animaux paoureux & de bon manger, soyent grandement feconds, afin que par estre souuent mangez, ils ne defaillissent ainsi que bestes nuisibles & malfaisantes, lesquelles sont d'elles mesmes peu lignageres. Partant

Animaux
de bon
manger
grandement
feconds.

le lieure est fort fecond, & seul de toutes les bestes de venaison, surcharge sa portée, à cause que l'homme, bestes, & oyseaux le poursuivent à mort. Pareillement la haze des connils se trouue si pleine de lapins, que les vns sont encor sans poil, les autres sont vn peu plus formez, & les autres sortent du ventre. Entrons dans les colombiers & nous chargeons de pigeonneaux, dans vn mois d'icy nous y en trouuerons encores autant, de mesme des moliuës, & haranes (chose prodigieuse) desquels on fait de si furieuses pesches tous les ans, & si on n'en scauroit espuiser la mer, ny les riuieres de toutes autres especes de poissons, non plus que l'air, & la terre, & des oyseaux, & bestes de bon manger, dequoy nous deuons grandement louer le Createur, & faire icy vne bonne meditation, puis que nous voyons mesme les bestes & animaux nuisibles estre en moindre nombre, & moins lignageres que ceux qui seruent à la vie, & nourriture de l'homme, comme est de la lyonne qui est la plus forte & la plus hardie de toutes les autres bestes, laquelle selon les Egyptiens, ne porte qu'vne fois en sa vie, & vn seul faon seulement, mais bien dauantage on nous assure que le lyon n'a point de sentiment, & mourroit de faim si la diuine prouidence ne l'auoit pourueu d'vn petit compagnon ressemblant au chat que les Italiens appellent Gati. Ce petit animal esuerre la proye, estant descouuerte

De la lyonne.

il court, & glapit pour aduertissement au lyon, lequel le suit iusques à la veüe de la beste qu'il va estrangler, & en fait part à son bien-faïcteur, car entre tous les animaux le lyon est recognoissant.

Certes il y en a qui se plaisent bien en la iouissance de routes ces choses, mais ils en recognoissent mal celuy qui leur a donné, d'où il aduient qu'ils en vsent comme bestes sans esleuer leur pensée à Dieu, qui a creé tout ce qui est de ce monde pour le seruice, & la gloire de l'homme, comme l'homme pour la gloire & son seruice. Mais comme nous nous sommes rendus rebelles à Dieu par le peché, le mesme peché a rendu les bestes rebelles à l'homme, qu'elles offencent comme nous offensoûs Dieu.

Plusieurs grands Saincts ont neantmoins commandé aux plus feroces & cruelles, & ont esté obeys, comme vn sainct François qui defendit à vn loup enragé de plus faire de mal, & se rendit doux comme vn agneau, mais ce sont graces qui n'appartiennent qu'à ceux qui ont la mesme innocence de nostre premier Pere auant son peché, & ne deuons en traiter les animaux plus cruellement, puis que leur cruauté n'a pris naissance que de nos pechez.

Je ne sçay dans qu'elle cognoissance plusieurs Nations Payennes n'ont pas voulu nuire aux animaux, & se sont abstenus mesmes d'en manger, peur de nuire à ceux

qui ne les offensoient pas; mais ce sont simplicité Payennes, lesquelles on n'est point obligé d'ensuiure, sinon en la compassion enuersicelles pour s'apprendre à l'estre enuers les hommes. Les Atheniens mesmes ne faisoient point mourir les mulets qui auoient long - temps seruy à leur Republique, & donnoient liberté à leur vieillesse de paistre & se nourrir où elle pourroit, sans qu'il fut permis à aucun de leur nuire ou offencer.

Il y a vne sorte de gens qui habitent vne Prouince du grand Mogor qu'on appelle *Nation des Bayennes.* Bayennes, lesquels ne mangent d'aucune chose qui aye eu vie, & bien qu'ils adorent en chaque famille, les vns des arbres, les autres des oyseaux, & autres bestes; ils ont tous en singuliere veneration la vache, laquelle ils mettent chacun en la meilleure chambre de leur logis comme vne Deesse, de laquelle ils boient le lait, & le pissar, avec de son beure fondu, & n'en mangent point la chair. Et quand on leur demande pourquoy, puis qu'ils en boient bien le lait qui en prouient, ils respondent que nous beuons bien le lait de nostre mere, & n'en mangeons point la chair.

Mais l'excellence & la rareté de leur humeur est, qu'ils ne peuuent voir faire de mal à vne beste, quel qu'elle soit, ny à vn rat mesme, lequel s'il s'approche d'eux lors qu'ils mangent, ils le caressent & luy donnent à manger, & hayssent fort les Chrestiens, d'autant qu'ils font du mal aux bestes

Hospital
pour les
oyeux,

sur lesquelles ils deschargent souuent leurs passions, & la furie de leur humeur cholerique. Ils ont vn hospital (chose admirable) pour penser & guerir les bestes malades, où il y a des Medécins, & Chirurgiens entretenus, qui en ont le soin iusques à entiere guerison, puis les rendent à ceux à qui elles appartiennent.

Voicy vn autre traitt de leur douceur envers icelles, qui me fait resouuenir de celle de nostre Pere sainct François, lequel donna son manteau à vn paysan pour sauuer la vie à deux agnelets qu'il portoit vendre ne pouuans souffrir qu'on les egorgeast à cause du vray Agneau Iesus Il y a vne si grande quantité d'oyseaux dans cette Prouince Bayennes qu'ils vous eueuent presque les yeux (comme i'ay dit del'isle aux oyseaux) aussi ne s'enuolent-ils point pour lesdits Bayennes. Quelqu'vns d'eux ayans veu vn François nommé le sieur Charles Fournier (qui est celuy mesme duquel i'ay apprise ce) tirer aux oyseaux, il en fut fort mal satisfait & en rachepta de luy deux de fort blesez qu'il fit mettre dans vn trou de muraille avec del'eau, & du ris, & commanda à l'vn de ses esclauues d'y passer la nuict pour y prendre garde iusques au lendemain matin qu'il les fist porter à l'hospital Il vouloit aussi donner audit sieur Fournier so. Mamodis (c'est vne piece d'argent qui vaut dix sols) de son arquebuzé afin qu'il n'en tuât plus, & asséurent que c'est vn malheur de faire du mal aux bestes, ne nous en faisant point.

Je ne suis pas Payen & ne voudrois pas en-
suiure les actions des Payens, mais ie suis d'auec
eux de ne faire de mal à aucune creature, sinon
aux venimeuses & à celles qui nous attaquent,
contre lesquelles il se faut deffendre, autre-
ment il faut estre humain enuers elles, pour
s'accoustumer à l'estre enuers les hommes, car
qui ne se peut commander en vne passion,
s'emporte facilement en vne autre.

Ie me suis quelquefois rencontré avec vn
fort honneste homme Egyptien de nation &
natif du grand Caire, & comme il est homme
quia grandement voyagé par toutes les terres
du grand Seigneur, il m'a raconté diuerfes
fois comme ceux de son pais prennent les Co-
codrilles qui habitent le Nil, lesquels autre-
fois il tenoient pour des dieux ou pour mon-
strer la puissance des dieux à cause de leurs
forces, qui gist principalement à la queue, la-
quelle ils adoroient, enfermée dans vne cage
de fer, & donnoient à manger à cet animal,
comme à vne beste diuine & representant ou
estant la Deité mesme. Il y auoit mesme des
particuliers qui en nourrissoient de ieunes
dans leurs maisons, & leur donnoient toute li-
berté, ce qui n'en prit pas bien à vn certain
Egyptien, lequel en ayant esleu vne en son
logis, luy deuora son fils & puis s'enfuit vn
iour que le pere estoit absent, tant il fait dan-
gereux domestiquer vn animal naturellement
cruel & ennemy de l'homme.

Comme est
pris le Co-
codrille.

Le chasseur armé d'un habit de maille de
fer, qui luy couvre tout le corps, fait vne fosse

profonde & estroite comme vn petit puits dans lequel il se met iusques au col, enuiron de mousses & fueillages pour n'estre apperceu, puis il enferme sa teste dans l'escorce d'un gros fruiet resembant au melon, que les Egyptiens sement en quantité par les champs & dans ceste escorce il y fait deux trous comme vn masque pour voir & n'estre veu, ayant au prealable attaché à vn long chable, qui tient par vn bout à vn tour ou moulinet à bras, vne chaine de fer, au bout de laquelle est attaché à de gros harpons & crochets, quelque chien mort ou autre charogne qui sert d'amorce à l'animal.

Le cocodrille sortant de l'eau pour chercher sa nourriture, ne se donne pas garde du piege ny de l'homme caché, & rodant ça & là en rugissant, trouue en fin l'amorce qu'il auale auidelement, puis se retire dans le Nil, pendant que le chasseur luy file sa corde, iusques au point qui le tient arrestité au molinet, qui fait par ceste violéce prendre ferme aux erampons & crochets aualez dans le corps de ceste beste. Cela estât fait le chasseur sort de sa fosse, oste son melon, & crie par tout à l'ayde aux laboureurs des champs, qui vont à son secours & tournent tous ensemblement le moulinet, qui fait approcher la beste comme vn cabestrâ les anches de la mer, estant là trainé la gueule beante & esleuée, le chasseur luy saute sur le dos, & luy fait passer vn fer par la gueule, comme vn mors à cheual, qui luy reuient prendre par derriere la teste, où il est attaché avec des

vis, & ferré de si près que l'animal ne peut offenser de sa dēt, il n'y a plus que sa rude queue à craindre, de laquelle ils se donnent de garde, comme d'un dangereux coup, qui ne guerit point, car ceste rude peau est dure au possible. Et en cest equipage le conduisent au grand Caire attaché à la queue d'un chameau, pour estre veu, ou pour estre vendu.

Pour le cheval marin, (desquels j'ay veu vne furieuse teste) il gaste tous leurs bleds, & se prend de mesme que nous prenons icy les loups dans les louuieres, il apprehende tellement le feu, qu'à la seule veue d'iceluy, il s'enfuit comme fait aussi le Lyon, ainsi que j'ay veu quelque part, de ceux que les estrangers nous amènent.

Cheval marin.

J'ay appris d'un Religieux nommé frere Ange Deluan pour lors nostre compagnon, qu'estant en terre sainte en l'an 1626. quel qu'un de nos freres, desirans passer de l'Egypte par les deserts pour la Palestine, se seruirent de l'occasion d'une Carauanne, qui alloit aux Saints lieux. Mais comme ils furent un soir campez & assis auprès d'un bon fen, ils entendirent iapper le Gati, qui leur fust un assésur signal du voisinage de quelque Lyon, qui parut incontinent apres, & les regarda fixement un assez long-temps, assis sur son derriere sans oser neantmoins les approcher, car les hommes s'estoient munis de leurs armes & chargés leurs arquebuzes, ce que voyant le petit compagnon tourne bride & le Lyon après sans qu'aucun tirast sur eux, pour nous apprendre

Du Gati
compagnon
du Lyon.

que nous ne deuons pas mespriser les petits, & que si quelqu'un ne nous peut nuire, il nous peut assister au besoin & empescher qu'on ne nous nuise par leur aduertissement.

*Des oyseaux plus communs du
Canada.*

CHAPIRE II.

Quantité
d'oyseaux
en Canada.

AV commencement que les François al-
lerent en Canada, ils y trouuerent tant
d'oyseaux de toutes especes, & si faciles à pré-
dre, que celuy ne le croitoit qui ne l'auroit
veu, ils les assommoient à coups de bastons sur
les arbres, comme i'ay veu faire à des Sauvages
dans les Isles de la mer douce au delà des Hu-
rons, où nous estions cabanez pour la pesche,
& les perdrix estoient si peu battues, qu'elles
se laissoient mettre le lasset au col, attaché au
bout d'une baguette. Quand on alloit giboyer,
le chasseur estoit assuré de rapporter autant
d'oyseaux qu'il en pourroit porter, car ils n'es-
toient pas encores faits à nos arquebuzes,
comme ils sont à present que ces foudres les
ont esclairs & un peu aduises. Il y en reste
tousiours neantmoins une si grande quantité
en quelques Isles, qu'elle semble égaler le sa-
ble de terre, & qui seruiroient d'une douce

manne aux Sauvages, s'ils auoient nos inu-
entions & nos armes, mais ils ont peu d'indu-
trie pour les attraper, & par ainsi en iouissent
de peu & en nourrissent encore moins, car
comme i'ay dit, ils n'ont d'animaux d'omesti-
ques, que des chiens, & au plus quelques ours
ou quelque aigles.

Entre tous les oyseaux que i'ay veu dans le Del'oyseau
païs, il me semble que le plus beau, le plus ra- mousche.
uisant & le plus petit qui soit peut estre au
monde, est le Vicilin, ou ouyseau mousche,
que les Indiens appellent en leur langue res-
suscité. Cet oyleau, en corps, n'est pas plus
gros qu'un grillon, il a le bec long & tres-de-
lié, de la grosseur de la pointe d'une aiguille, &
ses cuisses & ses pieds aussi menus que la ligne
d'une esriture. L'on a autrefois pesé son nid
avec les oyseaux & trouué qu'il ne peze da-
uantage de 24. grains, il se nourrit de la rosée
du Ciel, & del'odeur des fleurs qu'il succe sans
se poser sur icelles, mais seulement en volti-
geant par dessus. Sa plume est aussi deliée que
du net, & est tres plaisante & belle à voir pour
la diuersité de ses couleurs.

Cet oyseau (à ce qu'on dit) se meurt ou pour
mieux dire s'endort au mois d'Octobre, de-
meurant attaché à quelque petite branchette
d'arbre par les pieds, & se resueille au mois
d'Auril, que les fleurs sont en abondance, &
quelquefois plus tard, & pour cette cause est
appellé en langue Mexicaine, ressuscité. Il en
vient quantité en nostre iardin de Kebec, lors
que les fleurs & les poix y sont fleuris, & pre-

nois plaisir de les y voir : mais il sont si petits que n'estoit qu'on en peut approcher de fort près, à peine les prendroit on pour oyseaux ains pour papillons : on les discerne & reconnoist à leur long bec, à leurs ailles, plumes & à tout le reste de leur petit corps bien formé.

Ils sont fort difficiles à prendre, à cause de leur petitesse, & qu'ils ne se donnent aucun repos, sinon qu'ils se soustiennent quelquefois vn peu en l'air becquetant vne fleur. Quand on les veut auoir, il se faut approcher des fleurs & se tenir cøy, avec vne longue poignée de verges en main, de laquelle il les faut frapper si on peut, & c'est l'inuention & la maniere la plus aisée pour les prendre. Nos Religieux en auoient vn en vie, enfermé dans vn coffre & attaché à vn filet, mais il ne faisoit que bruite, & se tourmenter là dedans, bien qu'il eut des fleurs & confitures à manger, & au bout de quelques iours il mourut, car il n'y a moyen aucun d'en pouuoir nourrir ny conseruer longtemps en vie, autrement nous en eussions apporté pour nos amis.

Chardon-
neret.

Il venoit aussi quantité de chardonnerets, manger les semences & graines de nostre iardin, leur chant me sembloit plus doux & agreable que ceux d'icy, & mesme leur plumage, plus beau & beaucoup mieux doré, mais ils sont difficiles à prendre, car leur ayant tendu quelque piege, ie n'en pû attraper aucun, comme i'esperois pour France.

Oyseau
blanc.

Il y a vne autre espeece d'oyseau vn peu plus

gros qu'un Moyneau, qui a le plumage entierement blanc comme albatre, il se nourrit aussi en cage comme le chardonneret, mais son plumage n'en est pas si agreable, bien qu'il ne soit pas à mespriser.

Les Gays que nous auons veus aux Hurons, Gays, lesquels ils appellent Tintian, sont plus petits presque de la moitié, que ceux que nous auons par deçà, & d'un plumage plus diuersifié, ce qui les rend fort gentils & agreables, mais qui ne s'accommoderoient pas bien à nostre climat.

Ils ont aussi des oyseaux qu'ils appellent Stinondoa. Stinondoa. enuiron de la grosseur d'une tourterelle, qui ont leur plumes entierement rouges ou incarnates, on les pourroit prédre pour petits perroquets, s'ils en auoient le bec, car tous les perroquets ne sont point verts, ny jaunes, ny blancs, i'en ay veu de plumage rouge, & quelques autres tirans sur le bleu ou violet, également gentils & de mesme nature des communs. On donna à nos Religieux de Kebec un Stinondoa, qui n'estoit guere plus gros qu'un moyneau, mais un peu plus long, lequel pour estre trop gras ils ne purent nourrir, non plus que moy un autre oyseau que les Hurons m'auoient donné, il auoit la teste & le col rouge, les ailles noires, & tout le reste du corps blanc comme neige.

Ils m'en auoient aussi donné quatre d'une Oyseau aux autre espee, gros cōme tourterelles, lesquels Soleils. auoient par tout sous le ventre, sous la gorge, & sous les ailles, des Soleils bien faicts de di-

uerfes couleurs, & le reste du corps estoit d'iaune meilé de gris: desquels les Sauuages font vn tel estat, que quelqu'vns d'eux en cōtrent les peaux cōme d'autres especes rares. I'en bien desiré d'en pouuoir apporter en vie pdeça, pour la beauté & rareté que i'y trouuo mais il n'y auoit aucun moyen, pour le trepenible & long chemin, qu'il y a des Hurons en Canada, & de Canada en France.

De l'Aigle.

L'Aigle que nos Hurons appellent Sondakqua, est vn animal genereux, & comme le roentre tous les autres oyseaux; mais royauté tyrannique, car avec ce qu'elle leur commande elle leur faict vne guerre immortelle, & le deuore: comme les plumes d'vne Aigle morte le tesmoignent, en ce que si l'on mesle avec elles des plumes d'autres oyseaux, elles les deuorent & conformment, ainsi que dit Plin. C'est vne chose qu'aucun ne scauroit exprimer que les plumes vsent de la mesme tyrannie dont l'oyseau vsait: sinon que Dieu nous voulut faire voir, qu'il fait dangereux viure sous vn Prince sanguinaire, & qui a des Ministres qui surchargent ses peuples.

Il y a quantité d'Aigles au païs des Algonmequins, comme plus montagneux & froids que celuy de nos Hurons, lesquelles font leurs nids sur le bord des eaux ou de quelque precipice, tout au coupeau des plus hauts arbres & rochers; de maniere qu'elles sont fort difficiles à desnicher: nous en denichasmes neantmoins plusieurs nids à nostre retour, ausquels nous ne trouuasmes en aucun plus d'vn ou deux

deux Aiglons , que nous mangeames après que ie fus las de les porter , & les trouuâmes tres-bonnes , car elles estoient encores ieunes & tendres. Elles ont vne propriété que se cognoissant estre estroites , & qu'elles font leurs œufs avec difficulté, elles cherchent vne pierre nommée *arites* , autrement pierre aquilin, qu'elles apportent en leur nid pour se rendre plus larges , & pour pondre plus aysément, laquelle est pour le iour d'huy en vsage, chez plusieurs dames d'Italie & de France, pour soulager leur enfantement.

Il est vne fois arriué qu'un de nos Religieux , estant allé seul dans les bois enuiron vne lieuë de nostre Couuent de Kebec, vne tres-grande Aigle ou peut estre un Griffon, vint pour s'abatre sur luy de telle furie, que ce pauvre Religieux s'estant promptement ietté dans un gros buisson le ventre contre terre, cet oyseau ne pouuant auoir sa proye, debattit long-temps des aisles par dessus ce buisson , & puis fut contrainct de s'en aller , dequoy le Religieux rendit graces à Dieu.

Il ne faut point que ie passe aussi sous silence, (puis que ie suis dans le sujet) vne belle propriété entre toutes , que les Naturalistes attribuent à l'Aigle , pour ce peut estre que quelqu'un en pourra faire son profit, comme sont les vieux pecheurs & ceux qui frequentent peu le Sacrement de la penitence , necessaire pour renoueller sa vie. Ils nous apprennent donc, qu'estant chargée de vieillesse , & ne

Belle propriété de l'Aigle.

pouuant supporter la grosseur de son bec crochu (comme celuy du perroquet) qui l'empesche de manger : & la pesanteur de ses vieilles plumes, qui ne luy peuuent plus permettre de voler haut, ressentant aussi beaucoup d'incommoditez, à cause de la debilité de sa veüe, qui fait qu'elle ne peut plus fixement regarder le Soleil, comme elle souloit: elle se iette dedans vne claire fontaine, qu'elle cherche pour ce suiet; elle rompt son bec crochu à quelque dure pierre: elle despoille ses vieilles plumes; & par tels moyens, elle renouuelle si bien sa ieunesse & ses forces, que changeant de bec, de plumes & de veüe, elle commence à manger, voler aussi haut, & contempler aussi fixement les rayons du Soleil, qu'elle faisoit en sa pristiné ieunesse. O pauvres pecheurs enuieillis dans le peché, faites icy vostre application, & imitez l'Aigle en vous reuestant du nouuel Adam.

Oyseau de
proye.

Mes Sauuages me vouloient aussi desnicher des oyseaux de proye, qu'ils appellent Ahoïtantaque, d'un nid qui estoit sur vn grand arbre assez proche de la riuere, desquels ils faisoient grand estat, mais ie les en remerciay, & ne voulut point qu'ils en prissent la peine; neantmoins ie m'en suis repenty du depuis, car il pouuoit estre que ce fussent Vautours, desquels la peau est excellente pour vn estomach refroidy.

Pouille
d'inde.

En quelque contrée, & particulièrement du costé des petuneux, il y a des pouilles d'inde, qu'ils nomment Ondetontaque, lesquelles

sont champestres & non domestiques, car les Sauvages comme j'ay dit, ne nourrissent que des chiens, & presque point d'autres bestes. Le gendre du grand Capitaine de nostre bourg, en poursuivit vne fort long-temps es enuirons de nostre cabane, mais il ne la peut tirer, pour ce qu'encor bien qu'elle fut lourde & massiue, si est-ce qu'elle gagna d'arbre en arbre & par ce moyen euita la fiesche.

Ie ne m'estonne point, si tant d'Auteurs escriuent que les Gruës font la guerre aux pigmées, qui sont petits hommes de la hauteur d'une coudée, residans vers la source du Nil, puis qu'il y en a de si grande & forte, que sans baston vn homme parfait ne la scauroit surmonter. Au mois d'Auril quand on seme les bleds & en Septembre quand ils sont meurs, les champs de nos Hurons en sont presque tous couuerts, ils leur tendent des collots, mais ils y en prennent peu souuent, & n'en tuent guere dauantage avec la fiesche, car ces animaux sont de bon guet, & s'ils ne sont frappés mortellement ou qu'ils n'ayent les ailles rompues, ils emportent facilement la fiesche dans la playe, qui se guerit avec le temps; ainsi que nos Religieux du Canada l'ont veu par experience d'une Gruë prise à Kebec, qui auoit esté frappée d'une fiesche Huronne, 300. lieues au delà, & trouuerent sur la crope la playe guerrie, & le bout de la fiesche avec la pierre enfermée dedans. Nos François en tuent aussi avec leurs arquebuses, plus que les Sauvages avec leurs fiesches, mais ie vous assure qu'il y en a

Gruës:

qui se sont souuent trouuez bien empeschez de combattre celles qui se sentant frappées tiroient droit à leurs hommes pour les défigurer, sinon elles courent de la vitesse de l'homme.

Oyes & outardes.

Il y a aussi vntres grand nombre d'outardes & d'oyes blanches & grises nommées Ahonque, par tout le païs du Canada, qui font le mesme detrimement des Gruës dans les bleds de nos Hurons, ausquelles on fait de mesme la guerre, mais elles ont bien peu de deffence.

Corbeaux.

Le me suis estonné que nos Hurons ne mangent point du corbeau, qu'ils nomment orquan, desquels ie n'eusse fait aucune difficulté de manger si i'en eusse pû attraper, car il n'y a rien de fâcheux en ces païs là, qui en doine donner horreur. Au contraire ils ne bougent presque des bleds, qu'ils grattent comme poules, dequoy ils nous en faisoient souuent de grandes plaintes, & nous demandoient le moyer de les en chasser, mais il eut esté bien difficile sans vne continuelle guette.

Cygne.

Tout de mesme que le corbeau qui au commencement est blanc, & puis prend la couleur noire. Les poussins du cygne sont noirs, & après deuiennent blancs. Nos Hurons les appellent Horhey, mais il s'en trouue peu dans leur païs, c'est principalement vers les Ebicerrins, où il s'en voit plus grande quantité dans les terres & en Canada en quelque lacs.

Perdrix.

Il y a presque par tout des perdrix blanches & grises nommées Acoissan, qui ont leur retraite dans les sapinieres, & vne infinie multitude de tourterelles, qu'ils appellent Oric

Tourterelles.

tey, lesquelles se nourrisset en partie de glâds, qu'elles auallent facilement entiers. Au commencement elles estoient si sottes, qu'elles se laissoient abbatre à coups de pierres ou de gaules de dessus les arbres, mais à present elles sont vn peu plus aduisées.

Il seroit bien difficile & non necessaire, de descrire de toutes les especes d'oyseaux, qui sont dans l'estenduë de ces larges Prouinces, ce peu que i'en ay descrit pent suffire, pour faire voir que le Ciel a là ses habitas, pour louer Dieu aussi bien que nous en auons icy, & que par tout retentissent les louanges du Createur. Qui a encor peuplé le pais de nos Sauvages de plusieurs oyseaux de proye, de ducs, faucons, tiercelets, espreuiers & autres: mais sur tout de gibiers, comme canards de plusieurs especes, margaux, roquettes, outardes, mauues, cormorans, & autres.

Des animaux terrestres, qui se trouuent communement en Canada, & de ceux qu'on y a faict passer d'icy.

CHAPITRE III.

CE n'est pas de merueille qu'il se trouue de certains animaux en quelques côtrées qui ne se voyent point en d'autres, car il y en a qui ne se plaisent qu'au froid & les autres à la chaleur: c'est pourquoy en quelque Royau-

mes d'Afrique, il n'y a nulles bestes à 4 pieds, lesquelles n'y peuvent viure pour l'extreme chaleur qu'il y fait: pour ce mesme, siueit on n'y voit ny sanglier, ny cerf, ny cheure, ny ours, au rapport de quelques Autheurs, sinon que les Espagnols y en ayent fait passer.

Et ceux qui ont traité du nouueau monde & de l'Amerique entiere, assurent qu'auant que les mesmes Espagnols l'eussent conquis, il n'y auoit ny chiens, ny moutons, ny brebis, ny cheures, ny pourceaux, ny chats, ny asnes, ny boeufs, ny chevaux, chameaux, mulets, ny elephans, de tous lesquels il n'y en auoit non plus dans tout le Canada, excepté des chiens, lesquels sont encores vn peu differens des nostres de deça.

Mais à present & depuis longues années, il se trouue dans ce nouueau monde ou Merique, vne presque infinie multitude de toutes les especes d'animaux necessaires au seruice, & nourriture de l'homme, que les Espagnols y ont fait conduire des parties d'Europe, d'Asie & d'Afrique.

Il n'y a que nostre pauvre Canada qui en est tres mal pourueu. On y a seulement fait passer quelques vaches, cheures, pourceaux & volailles communes & rien plus. Nos Religieux y ont eu fait passer vn asne & vne alnesse, tant pour peupler, que pour le seruice qu'on en pouuoit esperer en vn pais où il n'y a d'animaux de charge, mais les hyemans de Kebec, les ont tellement fatiguez qu'en fin ils y ont fait mourir l'asne, & n'y reste plus que

l'asneſſe, que nous laiſſons tout l'Eſté coucher emmy les champs, & en liberté de ſe nourrir où'elle veut, ſinon pendant l'Hyuer, qu'elle ſe retire en vne petite eſtable, que nos Religieux luy ont faiſt accommoder à la baſſe court de noſtre petit Couuent.

Il arriua vn petit traict gentil en la deſcente de ces deux animaux, car comme les Sauuages furent aduertis qu'il y auoit aux barques deux beſtes eſtrangeres, tous accoururent au port pour en auoir la veüe, & ſe tindrent là coy tandis qu'on les débarquoit, qui ne fut pas ſans peine, mais le plaſiſr fut à leur beau ramage, car quand ils commencerent, d'entonner leur note, qu'ils rehausſoient à l'enuie à meſure qu'ils ſentoient le doux air de la terre, tous les Sauuages en prirent telle eſpouuante, qu'ils s'enfuyrent tous à vanderoute emmy les bois, ſans qu'aucun regardat derriere ſoy, pour ſe deſſendre de ſes demons, ô que voyla de furieuſes beſtes, diſoient ils, que les François nous ont amenez, ou pour nous deuorer, ou pour nous reſiouir de leur air muſicaux.

Je ne ſçay ſi on les eut vø plu vendre aux Sauuages, combien de caſtors ils en euſſent bien offerts, pour eſtre les premiers qui ayent entré dans le païs, mais j'ay appris (dans l'hiſtoire) que les premiers que les Eſpagnols firent paſſer au Peru, il s'en vendit yn dans la ville de Huamanca, en l'an 1557. quatre cens huitante ducats, & trois cens ſeptante ſix maravedis à Garcillaſſo de la Vega, pour en

faite saillir les iumens & en auoir des mulets. Il en fist depuis acheter vn autre huit cens quarante ducats, & il n'eust pas valu en Espagne plus de six ducats, tant les choses rares sont estimées, comme vne cheure, qui a esté vendue iusques à cent & dix ducats, mais maintenant elles y ont si bien multiplié depuis ce temps là, que si l'on en faict cas auourd'huy, ce n'est seulement que pour en auoir la peau & si on auoit le soin de passer de mesme de toutes nos especes d'animaux dans le Canada, on en verroit avec le temps la mesme multitude, mais il y faudroit aussi des familles pour les gouverner.

Or bien que le païs de nos Hurons soit desnüé de beaucoup d'especes d'animaux que nous auons icy. Dieu le Createur leur en a pourueu de plusieurs autres sortes, qui leur sont vtilles, & desquels le païs ne manque non plus que l'air & les riuieres, d'oyseaux & de poissons.

Renards de 3. sortes. Ils ont trois diuerses especes de renards tous differens en poil & en couleur, & non en finesse & cautelle, car ils ont la mesme nature des nostres de deçà, mais beaucoup plus estimez pour leurs fourures, tres-excellentes & riches.

Renard noir,

L'espece la plus rare & la plus riche des trois, sont ceux qu'ils appellent Hahyuha, lesquels ont tous le poil noir comme gey, & pour cette cause grandement estimez, iusques à valoir plusieurs centaines d'escus la piece

entre les Allemands & peuples Septentrion-
naux pour des fourures, ou bords à leurs
bonnets.

La seconde espece la plus estimée, sont Renard
ceux qu'ils appellent Tsinantontonque, les- barré.
quels ont vne barre ou liziere de poil noir,
qui leur prend le long du dos, & passe par
dessous le ventre, large de quatre doigts
ou environ, le reste est aucunement roux &
grisâtre.

La troisieme espece sont les communs, Renard
appelez Andasatey, ceux cy sont presque commun.
de mesme grosseur, & du poil des nostres,
sinon que la peau semble mieux fournie, &
le poil vn peu plus grisâtre. De toutes les-
quelles especes, il nous en fut donné quel-
que peaux par des Sauvages estrangers, nous
venans visiter en nostre maison Huronne,
lesquelles sont demeurées à nos François
apres nous en estre seruy pendant les grands
froids.

Ils ont aussi trois sortes d'escurieux diffe-
rends, & tous trois plus beaux & plus petits
que ceux de nostre Europe. Les plus estimez
& rares sont les escurieux volans, nommez
Sahouïesquanta, qui ont la couleur cendrée,
la teste vn peu grosse, le poil doux & court,
& les yeux petits. Ils sont appelez volans,
non qu'ils ayent des aisles, mais à raison
qu'ils ont vne certaine peau aux deux costez
prenans de la patte de derriere à celle de de-
uant, qu'ils replient fort proprement contre
leur ventre quand ils marchent, puis l'esten-

Escurieux
de trois
sortes.

Escurieux
volans.

dent quand ils volent, comme ils font aysement d'arbre en arbre, & de terre iusques au dessus.

Les premiers que ie vis furent trois ieunes qui nous furent apportez par l'une des filles du grand Capiraine Auiondaon, que ie receus sans sçavoir que c'estoit, iusques à l'arrivée du Pere Ioseph à qui ie les donnay à nourrir, comme il fit vn assez long-temps, mais qui à la fin se laisserent mourir, ou par trop de froid, ou pour ne les sçavoir accommoder, de quoy nous eûmes quelque regret, car c'estoit vn present digne d'une personne de condition, ioint qu'ils sont assez rares dans le pays.

*Escurieux
Suisses.*

La seconde espece qu'ils appellent Ohioin, & nous Suisses, à cause de leur bigarrure, sont ceux qui sont rayez & barrez universellement par tout le corps, d'une raye blanche, puis d'une rousse, grize & noiraste, qui les rendent tres-beaux & agreables, mais qui mordent comme perdus, s'ils ne sont apprivoisez, ou que l'on ne s'en donne de garde.

*Escurieux
communs.*

La troisieme espece, sont ceux qui sont presque du poil, & de la couleur des nostres, qu'ils appellent Aroussen, & ny a presque autre difference, sinon qu'ils sont plus petits.

Au temps de la pesche que i'estois cabané dans une isle de la mer douce, i'y vis vn grand nombre de ces animaux profiter de nostre pesche, desquels i'eû plusieurs de ceux que

mes Sauvages, tuent à coups de fleches,
& en prison Suisse dans le creu d'un arbre
tombé, au lieu où quel ny b... ..

Ils ont en plusieurs endroits des Lieures,
& des lapins, qu'ils appellent Queutonmalisia, Lieures.
des sapinières & petits bois sont les lieux de
leur retraite; à la sortie, desquels les Sauva-
ges tendent des lacets, mais ils en prennent
bien peu souvent, quoy qu'il y en ait en quan-
tité sur le chemin des Quicunontateronons,
car les cordelières n'estant ny bonnes ny as-
sez fines, ils les coupent aisément quand
ils s'y trouuent attrappez, ou bien en autre
façon, les Sauvages les tuent avec leurs arcs
ou matras.

Les loups cerniers nommez Toutfifoute,
de la peau desquels les grands font tant d'e-
star pour leurs fourures plus riches, en
quelque Nation sont assez frequents. Mais
les loups communs qu'ils appellent Anarifi-
qua, sont assez rares par tout, aussi en esti-
ment ils grandement la peau, de laquelle ils
font de riches robes de Capitaines, comme
de celle d'une espèce de leopard ou chat sau-
uage qu'ils appellent Titon. Il y a un pays
certaine grande estendue de terre, que nous
surnommons la Nation de Chat, pour rai-
son de ces chats, petits loups ou leopards qui
se retrouuent dans leur pays, desquels ils
font leur robes qu'ils parfument, & embel-
lissent de quantité de queues d'animaux cou-
sues tout à l'entour des bords, & par le milieu
du corps, es endroits où elles paroissent le

Loups cer-
niers, &
communs.

Chat sauva-
ge.

plus. Ces chats ne sont gueres plus grand que renards , mais ils ont le poil du tout semblable à celuy d'un loup commun, car i'y fus moy-mesme trompé au choix.

Otay.

Ils ont vers les Neutres vne autre espee d'animaux nommez Otay, ressemblant à vn escurieux grand comme vn petit lapin d'un poil tres-noir, & si doux, poly & beau qu'il semble de la panne. Ils font grand cas de ces peaux desquelles ils font des robes & couuertures, où il y en entre bien vne soixairaine qu'ils embellissent par tout à lentour, des testes, & des queuës de ces animaux qui leur donnent bonne grace, & rendent riches en leur estime.

Enfans du
diable ou
beste puâte.

Les enfans du diable que les Hurons appellent Scangareffe, & le commun des Montagnais Babougi Manitou, ou Ouinesque; est vne beste fort puante de la grandeur d'un chat ou d'un ieune renard, mais elle a la teste vn peu moins aiguë, & la peau couuerte d'un gros poil rude & enfumé, & sa grosse queuë retroussée de mesme, elle se cache en Hyuer sous la neige, & ne sort point qu'au comencement de la Lune du mois de Mars laquelle les Montagnais nomment Quinisconpismi, qui signifie la Lune de la Ouinesque. Cet animal outre qu'il est de fort mauuaise odeur est tres-malicieux, & d'un laid regard, ils iettent aussi (à ce qu'on dit) parmy leurs extremens des petits serpens, longs & deliez, lesquels ne viuent neantmoins gueres longtemps. I'en pésois apporter vne peau passée,

mais vn François passager me l'ayant demandé ie la luy donnay.

Les eslans ou orignats, en Huron Sonda-Eslans. reinta, sont frequents & en grand nombre au pays des Montagnais, & fort rares à celuy des Hurons sinon à la contrée du Nort, d'autant que ces animaux se plaisent dans les pays froids & montagneux, plus qu'aux pays chauds & temperé. C'est l'animal le plus haut qui soit apres le chameau : car il est plus haut que le cheual, il a le poil ordinairement gris-son, quelquefois fauve, & assez long, mais vn peu rude, sa teste est fort longue & porte son bois double & branchu comme le cerf, mais large & plat en quelque façon comme celuy d'vn dain, & long de trois pieds ou enuiron. Le pied en est fourchu comme celuy du cerf, mais beaucoup plus plantureux, la chair en est courte & fort delicate, & la langue tres-excellente, il paist aux prairies, & vit aussi des tendres pointes des arbres. C'est la plus abondante manne des Canadiens, & Montagnais, pendant l'Hyuer, comme le poisson pendant l'Esté. L'on en nourrissoit vn ieune au fort de Kébec destiné pour la France, que ie fus voir, mais il ne pût estre guery de la morsure des chiens qui l'auoient arresté, & mourut quelque temps apres. On tient que la femelle porte tousiours deux petits & tousiours male & femelle, neantmoins la chose n'est pas tellement infailible qu'on n'aye quelquefois veu le contraire.

Caribous.

Il y a en plusieurs contrées des caribous, ou aines sauvages, que quelqu'uns appellent auquoy à mon aduis les montagnais en prennent assez souvent, desquels il nous donnerent vn pied, qui estoit creux & si léger de la corne, & fait de telle sorte, qu'on peut aisément croire ce qu'on dit de cet animal, qu'il marche sur les neiges sans enfoncer, mais ie n'en veux point asseurer par ce que ie n'en ay point veu l'expérience, & me contente de dire que ie donnay ce pied à vn François, qui me le demanda avec importunité, autrement iel aurois apporté icy.

Ours blancs & noirs.

Les ours nommez Agnôuoin, sont plus communs dans le Canada que les loups, & y en a de deux sortes, sçauoir, noir, & blanc, mais les blancs sont beaucoup plus grands & plus dangeureux que les noirs, car ils combattent les hommes, & les deuorent, ils habitent particulièrement (à ce qu'on dit) vers l'Isle Danticosti à l'embouchure du fleuve St. Laurent, qui n'est fréquenté que de bien peu de Sauvages, mais les contrées plus ordinaires où se nourrissent ces animaux farouches sont les hautes montagnes, & les pays tres-froids.

On tient qu'au Temple de saint Olaus en Normandie qui despend de l'Archeuesché de Trudun, & aux pieds du siege Pontifical, on y void la peau d'vn ours, qui surpasse en blancheur la neige, ou le lis, elle est large de quatorze pieds. Marc Pole assente auoir veu en Tartarie des ours blancs de vingt

aulnes de longueur, ce que i'ay peine à croire, encore qu'Olaus en fasse mention, pour ce qu'il semble que le conte soit hors de raison, & dit pour faire admirer les simples. Albert le Grand, & plusieurs autres avec luy, racontent que les ours blancs nagent au profond de la mer, & qu'ils y peschent & mangent les poissons, ce qui nous est facile à croire en ce que nous voyons les communs mesme, entrer librement dans les éauës, se plonger & nager comme les poissons, telmoyn celuy que ie conduir au pays des Hurons, lequel vouloit se ietter dans toutes les eaux qu'il rencontroit en chemin, ou pour se sauuer, ou pour s'esgayer, & auois de la peine assez de l'en retirer avec la corde qui tenoit à son col, lequel pour reuanche (malicieuse beste) se vouloit ietter à mes iambes, mais à mesme temps ieluy releuois la teste en haut, & ayant bien grondé il s'appaisoit & continuoit son chemin à costé de moy.

Les ours sont tres-bons à manger, c'est pourquoy nos Sauuages en font vn grand estat, & tiennent sa chair fort chere, ie ne sçay à quoy l'accomparer, car elle ne sent ny le bœuf, ny le mouton, & encore moins le cerf, mais plustost le cheureau, les vieux ont vn autre goust, & sont gras comme lard. Il m'arriua de dire à Monsieur le Marechal de Bassompierre, que i'auois mangé de la chair d'ours, & l'auois trouuée bonne. Il m'assura que au dernier voyage qu'il fit en Suisse pour le Roy il en auoit aussi mangé en vn

festin que luy firent les Suisses, & ne l'auoir point trouuée mauuaise. Nos Sauvages les engraisissent (car la graisse est leur sucre) avec vne maniere facile, ils font vne petite tour au milieu de leurs cabanes, avec des pieux picquez en terre, & là ils enferment la beste, à laquelle ils donnent à manger par les entredeux des bois, des restes de sagamité, sans crainte des pattes, & de leurs dents, & estant bien grasse, ils en font vn bon festin à tout manger.

Ourse long
temps sans
manger.

Le Pere Ioseph le Caron m'a raconté dans le pays, qu'hyuernant avec les Montagnais, ils trouuerent dans le creux d'vn chesne, vne ourse avec ses petits couchez sur quatre ou cinq petites branches de cedre, enuironnez de tout costez de tres-hautes neiges, sans auoir rien à manger, & sans aucune apparence qu'ils fussent sortis de là pour aller chercher de la prouision depuis trois mois & plus, que la terre estoit par tout couuerte de ces hautes neiges : cela m'a fait croire avec luy, ou que la prouision de ces animaux estoit faillie depuis peu, ou que Dieu, qui a soin & nourrist les petits corbeaux delaissez, subistante par vne maniere à nous incognüe, ces pauvres animaux au temps de la necessité : ils les tuent sans difficulté, car ils n'eussent sceu s'eschapper ou se deffendre, & en firent bonne chere, avec les ceremonies accoustumées entr'eux, qui sont telles (à ce que j'ay ouy dire) que toutes les filles nubiles, & les ieunes femmes mariées, qui n'ont point encore eu d'enfans

eu d'enfans, tant celles de la cabane où l'ours doit estre mangé, que des autres voisines, s'en vont dehors, & ne r'entrent point tant qu'il y reste aucū morceau de cet animal, dōt elles ne goustent point, & ne sçay pourquoy.

Des cerfs.

Les cerfs qu'ils appellent Sconoton, sont plus communs dans le pays des Neutres, qu'en toutes les autres contrées Huronnes, mais ils sont vn peu plus petits que les nôtres de deçà, & tres-legers du pied, neantmoins ces Attiuoindarons avec leurs petites raquettes attachées sous leurs pieds, courent sur les neiges avec la mesme vitesse des cerfs, & en prennent en quantité par d'autres inuentions qui ne sont pas en vſage en nostre Europe. Ils en font boucaner d'entiers pour leur Hyuer, & n'ostent point les fumées des entrailles qu'ils font cuire ensemble avec les intestins dans la sagamité. Cela faisoit vn peu estonner nos François au commencement, mais il falloit auoir patience & s'accoustumer à manger de tout, car il n'y auoit pas la de viande à choisir, ny de rué aux ours pour auoir du rosty.

Ily a quantité de porcs-epics, lesquels les Porcs-epics Canadiens sçauent attraper pour leur nourriture, & des pointes pour leurs matachias, j'ay dit aillieurs comme ils leur sçauent donner couleur, & s'en seruir, parquoy ie ne le Martres. repeteray point icy. Ils ont aussi des martres assez belles, desquelles ils font de bonnes fourures pour se couvrir en Hyuer, & apres les traittent aux François.

Dains Buff-
les.

Des chiens.

On tient qu'il y a des dains en quelque contrée, mais pour des Buffles, le P. Joseph m'a assuré en auoir veu des peaux entieres entre les mains d'un Sauvage de pays fort esloigné ie n'en ay point veu, mais ie croy ce bon Pere

Parlons à present des chiens & de leur naturel, car entre tous les animaux qui seruent à l'homme, il tient le premier rang pour la fidelité, nous en auons des exemples tres remarquables, & qui nous font admirer; Test-moin celuy qui portoit à la bouche de son Maistre estendu mort sur vn eschafaut, le pain que les passans luy donnoient par compassion, & qui apres se noya voulant sauuer son Maistre ietté dans le Tibre, 3. iours apres son executiō. Voicy vne autre exemple presque pareille, & plus recente que nous apprénd l'ordinaire arriué de la ville de Minden en Allemagne, datté du 13. Mars 1635. vn cavalier que son cheual auoit ietté dans la riuere, pendans ces grandes inondations d'eaux, estoit desia à fonds, & se noyoit, lors qu'un chien qu'il nourrissoit de longue main & luy tenoit tousiours compagnie, faisant le plongeon, le prit à belles dents par les cheueux, & luy tint la teste hors de l'eau, tant que les bacheliers de là aupres le tirèrent de ce peril, & luy firent confesser qu'il deuoit à son chien la vie, que son cheual luy auoit ostée.

Ie rapporteroy icy tout plein d'autres exemples de cette fidelité canine, n'estoit la briueté que ie me suis proposée, & qui m'oblige de passer beaucoup de choses sous silence,

mais encor ne veux ie point obmettre de dire comme ie passois vn iour par vne bourgade chez vn Gentilhomme de nos amis, son chien s'esgayant seul dans la campagne prit vn lieure à la course, lequel vn certain paysan sceut si bien caiolet qu'il luy enleua sa prise, & l'emporta en sa maison, dequoy le chien indigné au possible le suiuit & l'ataqua diuerses fois, mais n'en ayant pû tirer raison, il en fut faire ses plaintes à son Maistre, avec des souspirs & abbayemens qui tesmoignoient assez ses ressentimens, & que quelque malheur luy estoit arriué; en fin le sieur Moriser, ainsi s'appelloit ce Gentilhomme, voulut s'esclaircir des plaintes de son chien, & pourquoy il le tiroit & monstroit de sortir à la porte, il suiuit donc cette beste qui le conduit droit au logis de ce paysan, lequel se croyant descouuert s'accusa de luy mesme, disant qu'il luy alloit porter vn lieure qu'il auoit osté à son chien, peur qu'un autre le prist. le scauois bien, dit alors le Gentilhomme, que mon chien auoit raison de m'amener icy, vne autre fois n'vsez plus de pareille courtoisie.

Fidelité & recognoissance telle quelle fait honte à celle de l'homme, qui n'a d'amitié que pour ses interests particuliers, ou le chie n'a pour tout espoir qu'un morceau de pain, souuent meslé des effects de vostre cholere, sans queles coups le fassent bouger de vos pieds, couché contre terre, les pattes esleuées comme vous demandant pardon, innocent qu'il est à vous son criminel. Que pleust

à Dieu que nous fussions ainsi humble deuant Dieu, au temps de sa visite, & que les miseres auxquelles l'homme est suiet fussent vn affermissiement de nostre fidelité enuers ce Dieu, de qui nous dependons.

Vice du
chien.

Tout ce que l'on peut trouuer de blasnable au chië, & qui ternit sa fidelité, est vn mauuais naturel qu'il a enuers son semblable affligé, car si vn chien est accablé, ou mal traité d'un autre, incontinent tous les autres chiens se iettent encor dessus, sans s'informer s'il a tort ou non, c'est assez qu'ils le voyent abayé pour l'accabler s'ils peuuent, ainsi en font les cruels politiques en ce mode enuers les gens de bien ordinairement affligez. On dit du porceau tout au contraire du chien, que si l'un d'eux crie à l'aide, tous les autres vont au secours, cela estant, le porceau a donc le naturel meilleur que l'homme meschant, & Dieu vueille que dans des congregations bien sainctes, aussi bien que dans le monde, on n'y voye point ce malheureux naturel du chien, d'affliger l'affligé, & mespriser celuy qui n'est point fauorisé, ce que font ordinairement les gausseurs, & ceux qui n'ont iamais sçeu que c'est d'honesteté au monde.

Chiens du
Canada.

Les chiens du Canada sont vn peu differens des nostres, sinon au naturel, & au sentiment, qui ne leur est point mauuais. Ils hurlent plustost qu'ils n'abayent, & ont tous les oreilles droictes comme renards, mais au reste tout semblables aux matins de mediocre grandeur de nos villageois, ils arrestent l'esla

& descouurent le giste de la beste, & sont de fort petite despence à leur maistre, mais au reste plus propre à la cuisine qu'à tout autre seruice.

La chair en est assez bonne & sent aucunement le pore, peut-estre à cause des falletes des ruës dequoy ils se nourrissent principalement, i'en mangeois assez peu souuent, car vne telle viande est fort estimée dans le pays, c'est pourquoy ie n'en auois pas si souuēt que i'eusse bien desiré. Ils sont fort importuns dās les cabanes, marchent sur vous, & s'ils rencontrent le por au descouuert ils ont incontinent leur museau aigu dans la fagamité, qui n'en est pas estimée moins nette

Il y a vne espeece de grosses souris aux Hurons que ie n'ay point veu ailleurs. Ils les appellent Tachro, vne fois plus grosses que les communes qu'ils appellent Tlongyatan, & moins puissantes que les rats desquels ie n'ay point veu aux Hurons, & ne sçay s'il y en a aucun non plus qu'au Peru auant la venue des Espagnols; où on dit qu'il y en a à present dans les villes basses, & par la campagne, de si prodigieux, qu'il n'est point de chat si hardy soit-il, qui les oze combattre, & non pas mesme les regarder, cela estāt on peut croire quel'origine en est venue de ceux qui s'engendrent dans les Nauires, qui pourroient auoir esté portés à terre dans les hardes des Espagnols lors qu'ils y descendirent pour la cōqueste du pays, & que le climat, où toutes autres choses viennent dans leur plus grande

Souris de
deux sortes.

Des rats.

perfection, ait fait grossier ces animaux au delà de l'ordinaire.

Mais ce qui est plus probable, ie croy que ces rats sont entrez dans les Indes, & le Peru, comme ils entrent aux ports de France, où vous voyez que peu de temps apres que les nauires ont esté deschargez, & qu'il ny a plus de quoy manger, ils sçauēt trouuer les cables sur lesquels ils se coulent à terre file à file, & puis se logent aux premieres hostelleries sans fourriers, s'ils ne sont empeschez par les petits garçons, qui à coups de bastons leur font furieusement la guerre, mais de iour, car la nuit ils font mieux leur débarquement.

Il est vray que si nos Hurons sont exempts, de rats, ils ont des souris communes en grand nombre qui leur font vn merueilleux degast de bled, & de poisson sec, quād elles y peuuent atteindre. Les Sauages mangent les tachtos sans horreur, aussi faisoient mes cōfreres ceux que nous prenions la nuit sous des pieges dās nostre cabane, sans que nous les peussions autremēt discerner des souris cōmunes qu'à la grosseur, & a la rareté, car nous en prenions peu souuent, & quantité des autres que l'on jettoit aux champs comme nuisibles.

Puces.

S'ils ont des souris sans nombre ils ont des puces à l'infiny, qu'ils appellent Touhauc, & particulierement pendant l'Esté, desquelles ils seroient fort tourmentez s'ils estoient chargez d'habits, mais ils sont vestus à la legere vn petit brayer de cuir, & la robe quand ils veulent.

Pour les petits vermisſeaux qu'ils nommēt Vermif-
Tſuoy, les femmes les mangent avec dele- ſeaux,
ſtation & plaſir, & y font vne chaffe auſſi
exacte qu'on pourroit faire à vn excellent gi-
bier, mais ils en ont tres-peu en comparaiſon
des puceſ. Quelqu'vns ont voulu dire que
les Sauuages ne mangent ces petits vermif-
ſeaux que par vengeance, diſant ſie morderay
qui m'a mordu, mais ils ſe ſont trompez, car
il n'y a ordinairement que les femmes qui en
mangent, & ce par delice, & non point les
hommes, du moins ie ne leur en ay point veu
manger, ny faire eſtat comme font les fem-
mes, & les filles indifferemment.

L'inuention quelles ont pour les auoir de
leurs fourures eſt gentille, elles picquent
2. baſtons en terre, l'vn d'vn coſté, & l'autre
de l'autre deuant le feu, puis elles y attachent
la peau le poil en dehors, or ces vermisſeaux
ſentans la chaleur ſortent du fond du poil,
& ſe tiennent à l'extremité, où ils ſont pris
par les Sauuageſſes, & croquez entre leurs
dents; vne merueilleuſe couſtume ſ'obſer-
uoit iadis en quelque Prouinces des Indes
Occidentales, où loiſiueté n'auoit point de
lieu. Les pauures impotens qui n'auoient
ny moyens pour viure, ny ſanté pour gai-
gner, deuoient payer au Roy vn nombre de
cornets de ces vermisſeaux qu'il leur auoit
enjoinct, afin de les obliger à occuper le
temps, & à ſe tenir nettement.

Des Poissons, & bestes aquatiques.

CHAPITRE IV.

Dieu, qui a peuplé la terre de diuerſes eſpeces d'animaux, tant pour le ſervice de l'homme, que pour la decoration & embelliffement de cet vniuers, a auſſi peuplé la mer & les riuieres d'autât, ou plus, de diuerſité de poiſſons, qui tous ſubſiſtent dans leurs propres eſpeces, & en nôtre preſque infinny, bien que tous les iours l'homme en tire vne partie de ſa nourriture, & les poiſſons gloutons qui font la guerre aux autres dâs le profond des abyſmes, en engloutiſſent & mâgent à l'infinny: ce ſont les merueilles de Dieu.

Il eſt vray que les poiſſons n'ont rien de commun avec les hommes, & qu'il y en a bien peu qui ſ'accouſtument & adouciſſent avec eux, & entendent quand on les appelle, & prennent à manger de leur main, comme la Murene du Romain Craſus tant celebrée de tous; & toutesfois ils ont eſté creéz auant les autres animaux, & auant l'homme meſme, & n'ont iamais eſté ſuiets à la malediction non plus que les eauës, qui les enuironnent, car Dieu maudiſſant adam n'a maudit les eaux, pour ce qu'il n'a beu de l'eau contre le commandement de Dieu, mais bien mangé du fruit de la terre, qui luy eſtoit deſſendu.

S. Auguſtin.

On ſçait par experience, que les poiſſons marins ſe delectent aux eaux douces, auffi bien qu'en la mer, puis que par fois on en peſche dans nos riuieres. Mais ce qui eſt admirable en tout poiſſon, ſoit marin, ou d'eau douce, eſt; qu'ils cognoiſſent le temps & les lieux qui leur ſont commodés: & ainſi nos peſcheurs de moulës iugerent à trois iours près, le temps qu'elles deuoient arriuer, & ne furent point trompez, & en ſuitte les maquereaux qui vont en corps d'armée, ferrez les vns contre les autres comme vn bataillon bien rangé, le petit bout du muſeau à fleur d'eau, pour deſcouvrir les embuches des peſcheurs.

Cela eſt admirable, mais bien plus encore de ce qu'ils vivent & ſe reſiouiſſent dans la mer ſalée, & neantmoins ſ'y nourriſſent d'eau douce, qui y eſt entre-mellée, que par vne maniere admirable, ils ſçauent diſcerner & ſuccer avec la bouche parmy la ſalée, comme dit Albert le Grand: voire eſtans morts, ſi l'on les cuit avec l'eau ſalée, ils demeurent neantmoins doux. Mais quand aux poiſſons, qui ſont engendrez dans l'eau douce & qui ſ'en nourriſſent, ils prennent facilement le gouſt du ſel, lors qu'ils ſont cuits dans l'eau ſalée. Ce ſont ſecrets de la nature.

Or de meſme que nos peſcheurs ont la cognoiſſance de la nature de nos poiſſons, & comme ils ſçauent choiſir les ſaiſons & le téps pour ſe porter dans les contrées qui leur ſont commodés, auffi nos Sauuages aydez de la raiſon & de l'experience, ſçauent auffi fort bien

bié choisir le temps de la pesche, quel poisson vient en Automne, ou en Esté, ou quel en l'vne ou en l'autre saison.

Pour ce qui est des poissons qui se retrouvent dans les riuieres & lacs au pais de nos Hurons, & particulièrement à la mer douce. **Assihendo,** Les principaux sont l'Assihendo, duquel nous auons parlé ailleurs, & des truictes qu'ils appellent ahouyoche, lesquelles sont de desmesurée grandeur pour la pluspart, & n'y enay veu aucune qui ne soit plus grosse que les plus grandes que nous ayons par deçà: leur chair est communement rouge, sinon à quelqu'vnes qu'elle se voit iaune ou orangée, mais excellemment bonne.

Brochets, Esturgeons. Les brochets, appelez soruiffan, qu'ils y peschent aussi, avec les esturgeons, nommez hixrahon, estonnent les personnes, tant il s'y en voit de merueilleusement grands, & friands au delà de toutes nos especes de poissons: ie le sçay par experience, car i'enay fait les espreuues dans la necessité, qui me faisoit trouuer la sauce à l'eau, douce & bonne comme beure fraiz, & puis on dira qu'on ne sçauroit manger le poisson, sans le sel, l'espace ou le vinaigre, on se trompe, car ie le mangeois sortant de l'eau seule & le trouuois bon.

Einchatao. Quelques sepmaines après la pesche des grands poissons, ils vont à celle de l'einchataon, qui est vn poisson vn peu approchant aux barbeaux de par deçà, long d'environ vn pied & demy, ou peu moins: ce poisson leur sert pour donner goust à leur sagamité pendant

L'Hyuer, c'est pourquoy ils en fôr autât d'estat comme du grand poisson, & afin qu'il fasse mieux sentir leur potage; ils ne l'esuentrent point, & le conseruent pendu par monceaux aux perches de leurs cabanes; mais ie vous assure qu'au temps de caresme, ou quand il commence à faire chaud, qu'il put & sent si extrêmement mauvais, que cela nous faisoit bondir le cœur, & à eux ce leur estoit musc & ciuette.

En autre saison ils y peschent à la ceine vne certaine espee de poisson, qui semblent estre de nos harangs, mais des plus petits, lesquels ils mangent frais & boucanez. Et comme ils sont tres-sçauâts, aussi bien que nos pescheurs de moulûs, à cognoistre vn ou deux iours prés, le temps que viennent les poissons de chacune espee, ils ne manquent point d'aller au petit poisson, qu'ils appellent auhaitique, & en peschent vne infinité avec leur ceine, & cette pesche du petit poisson se faict en commun, qu'ils partagent entr'eux, par grandes escuelées, duquel nous auions nostre part comme bourgeois de leur bourgade saint Ioseph ou Quienonascaran.

Petits harangs,

Petits poissons,

Ils peschent aussi de plusieurs autres especes de poissons, mais comme ils nous sont incognus, & qu'il ne s'en trouue point de pareils en nos riuieres, ie n'en fais point aussi de mention.

L'anguille en sa saison, est vne manne qui n'a point de prix chez nos Montagnais. I'ay admiré l'extreme abondance de ce poisson, en

quelqu'vnes des riuieres de nostre Canada, où ils'en pesche tous les ans vers l'Automne vne infinité de centaines, qui viennent fort à propos, car n'estoit ce secours on se trouueroit souuent bien empesché en quelques mois de l'année principalement, les Sauvages & nos Religieux en vsent cōme viande enuoyée du Ciel, pour leur soulagement & consolation. Ils la peschent en deux façons, avec vne nasse, ou avec vn harpon, ce qui se faict la nuit à la clarté du feu. Ils font des nasses avec assez d'industrie, longues & grosses, capables de contenir cinq & six cens anguilles : la mer estant basse, ils les placent sur le sable en quelque lieu propre & reculé, les assurent en sorte que les marées ne les peuuent emporter : aux deux costez ils amassent des pierres, qu'ils étendent comme vne chaisne ou petite muraille de part & d'autre, afin que ce poisson qui va tousiours au fond rencontrant cet obstacle, se glisse doucement vers l'emboucheure de la nasse où le conduisent ces pierres : la mer venant à se grossir, couure la nasse, puis se rabaisant, on la va visiter : par fois on y trouue cent ou deux cens anguilles d'une marée, quelque fois plus, & d'autre fois point du tout, selon les vents & les temps. Quand la mer est agitée, on en prend beaucoup, quand elle est calme, peu ou point, mais alors ils ont recours à leur harpon, comme ie vis faire en la mer douce, proche vn village des cheueux releuez, tirant aux Hurons. Voicy comme les Sauvages font seicherie de ces poissons. Ils les laissent vn peu éguster,

puis leur coupent la teste & la queue, il les ouurent par le dos, puis les ayans vuidés ils les tailladent, afin que la fumée entre par tout: les perches de leurs cabanes en sont toutes chargées, estans bien boucanez, ils les accouplent & en font de gros paquets enuiron d'une centaine à la fois. Voila leurs viures principaux iusques à la neige, qui leur donne de l'orignac & autres animaux.

Comme i'estois en nostre Couuent de Kebec prest de partir pour les Hurons, nos freres eschaperent vn loup marin s'esgayant au Soleil sur le bord de l'eau, car leur canot n'ayant pû assez tost ranger la terre à cause de la violence du flux, il s'eschappa, autrement il estoit à eux pour quelque coups de baston, qui est la maniere de les tuer, car ne pouuans courir ils sont aysement pris s'ils sont tant soit peu esloignez de leur element naturel. Voila comment les Montagnais en prennent souuent & en font de bons festins, mais ils ne se prennent qu'en de certaines saisons.

Au lieu nommé par les Hurons Onthran- Poisson
déen, & par nous le Cap de victoire, ou diuer- armé.
ses Nations de Sauuages s'estoient assemblés; ie vis en la cabane d'un Montagnais vn certain poisson, que quelqu'un appellent Chaoufarou, gros comme vn grand brochet, il n'estoit qu'un des mediocres, car il s'en voit de beaucoup plus grands & qui ont iusque à 8. 9. & 10. pieds à ce qu'on dit; il auoit vn bec d'enuiron vn pied & demy de long, fait à peu près comme celuy d'une becasse, sinon qu'il a l'ex-

tremité mouffe & non si pointu , gros à proportion du corps.

Il a double rang de dens fort aigues & dange-
gereuses, d'abord ne voyant que ce long bec
qui passoit au trauers vne fente de la cabane
en dehors , ie croyois que ce fust de quelque
oyseau rare , ce qui me donna la curiosité de
le voir de plus près , mais ie trouuay que c'e-
stoit d'un poisson qui auoit toute la forme du
corps tirant au brochet: mais armé de tres-for-
tes & dures escailles, de couleur gris argenté
& difficile à percer.

*Industrie
du poisson.*

Ce poisson a vne industrie merueilleuse (à
ce qu'on dit,) quand il veut prendre quelque
oyseaux, il se tient dedàs des ioncs ou roseaux
qui sont sur les riués du lac, & met le bec hors
de l'eau sans se bouger : de façon que lors que
les oyseaux viennent se reposer sur le bec, pen-
sant que ce soit vn tronc de bois, il est si subtil
que serrant le bec qu'il tient entr'ouuert, il le
tire par les pieds sous l'eau & les deuore. Il ne
fait pas seulement la guerre aux oyseaux, mais
à tous les autres poissons qui ne luy peuuent
resister. Les Sauvages font grand estat de la
teste, & se saignent avec les dents de ce poisson
à l'endroit de la douleur, qui se passe soudai-
nement à ce qu'ils disent.

Des castors

Les castors nommez par les Montagnais
Amiscou, & par nos Hurons Tsoutayé, sont
la cause principale que plusieurs marchand
François trauersét ce grand Occéa, pour s'en-
richir de leur despouilles, & se reuestir de leur
superfluitez, desquels ils apportent si grand

quantité toutes les années, que ie ne sçay comment on n'en voit la fin.

Ces animaux à ce que l'on tient, sont fort seconds, les femelles portent iusques à cinq & six petits chaque année : mais les Sauvages trouuans vne cabane, tuent tout, grands & petits, & males & femelles : il y a danger qu'en fin il n'exterminent tout à fait l'espece en ces païs, comme il en est arriué aux Hurons.

Cest animal est à peu pres gros comme vn mouton tondu ou peu moins, & qui se peut appruiouer, car nos Religieux de Kebec en auoient vn qui les suiuoit comme vn petit chien, & moy mesme en ay veu vn autre pareil qu'on nourrissoit de tendrons de vigne. Il a le poil fort doux & le duet plus que le velour, de couleur chastaignée, & y en a peu de bien noirs. Il a les pieds fort cours & fort propres pour nager, particulièrement ceux de derriere, car ils ont vne peau continuë entre les ongles, à la façon des oyseaux de riuieres, ou des loups marins; la queue n'a point de poil, ny d'escailles qui se puissent leuer, elle est toute platte & faicte presque comme vne sole sinon qu'elle est plus en ouale & n'a point de bouquet au bout, elles sont de diuerses longueurs & grosseurs selō l'animal, ie n'en ay point manié ny mangé, qui passent vn pied, mais d'un manger fort bon & plus excellent que la chair du corps, qui est tenu pour amphotie, c'est à dire qu'on en peut manger en tout temps, quoy que i'en aye veu faire quelque difficulté en quelque lieu de nostre Europe, car vn gen-

un homme de ma cognoissance, en ayant tué un en carisme proche de Nancy, nous n'en mangeames que la queue & les pattes de derrière, qu'on tenoit pour poisson & le reste viande. Quant à la teste elle est courte & presque ronde, ayant en gueule sur le devant quatre grandes dents tranchantes comme rasoirs, savoir deux en haut & deux en bas, desquelles un certain pensa avoir le bras coupé, en voulant prendre un qu'il avoit blessé à mort d'un coup d'arquebuse au bord de la riviere.

De ces dents il coupe aisement des petits arbres & des perches en plusieurs pieces, dont il bastit sa maison, & mesme à succession de temps, il en coupe par fois de bien gros, quand il s'y en trouue qui l'empeschent de dresser son petit bastiment, lequel est fait de sorte (chose admirable) qu'il n'y entre nul vent, d'autant que tout est couvert & fermé avec du bois & de la terre, si bien liez & unis par ensemble qu'il n'y a mousquet qui la transperce à ce qu'on dit: il y a un trou qui conduit dessous l'eau, & par là se va pourmener le castor où il veut; puis une autre sortie par où il va à terre, & trompe le chasseur. Et en cela, comme en toute autre chose, se voit appertement reluire la divine providence, qui donne iusqu'aux moindres animaux de la terre, l'instinct naturel, & le moyen de leur conseruation.

Or ces animaux voulans bastir leurs petites cauerues, ils s'assemblent par troupes dans les forests sombres & espaisles: s'estans assemblez ils vont couper des rameaux d'arbres à belles dents,

dents, qui leur seruent à cet effect de coignées, & les traignent iusques au lieu où ils bastissent, & continuent de le faire, iusqu'à ce qu'ils en ayent assez pour acheuer leur ouurage.

Quelques vns tiennent que ces petits animaux ont vne inuention admirable à charier le bois, & disent qu'ils choisissent celuy de leur troupe, qui est le plus faineant ou accablé de vieillesse, & le faisant coucher sur son dos, vous disposent fort bien des rameaux entre les iambes, puis le traignent comme vn chariot iusqu'au lieu destiné, & continuent le mesme exercice tant qu'il y en ait à suffisance. J'ay veu plusieurs de ces cabanes sur le bord de la grand riuiera au pais des Algonquins; mais elles me sembloient admirables, & telles que la main de l'homme n'y pourroit rien adiouster: le dessus sembloit vn couuercle à l'esciue, & le dedans estoit departy en 2. ou 3. estages, l'estage d'embas est sur le bord de l'eau, celuy d'enhaut est au dessus du fleuue, quand le froid a glacé les riuieres & les lacs, le castor se tient retiré en l'estage d'enhaut, où il a faict sa provision de bois pour manger pendant l'Hyuer, il ne laisse pas neantmoins de descendre de cest estage en celuy d'embas, il se glisse sous les glaces, mais sa retraicte plus ordinaire est en l'estage d'enhaut, d'autant qu'il craint l'inondation & la pluye.

La chasse du castor se faict ordinairement en Hyuer, pour ce principalement qu'il se tient dans sa cabane, & que son poil tient en cette saison là, & vaut fort peu en esté. Les Sauua-

Chasse du
castor.

ges voulans prendre le castor, ils occupēt premierement tous les passages par où il se peut eschaper, puis percent la glace du lac gelé, à l'endroit de la cabane, puis l'un d'eux met le bras dans le trou attendant sa venue, tandis qu'un autre va par dessus certe glace frappant avec vn baston sur icelle pour l'estonner & faire retourner à son giste: lors il faut estre habile pour le prédre au coler, car si on le happe par quelque endroit où il puisse mordre, il fera vne mauuaise blessure comme i'ay dit. Ils le prennent aussi à la rets & sous la glace par cest autre inuention; on fend la glace en long, proche de la cabane du castor, on met par la fente vn rets & du bois qui sert d'amorce, ce pauvre animal venant chercher à manger s'enlace dans ces filets faicts de bonne & forte ficelle double, & encor ne faut il pas tarder à les tirer, car ils seroient bien-tost en pieces, estant sorty de l'eau par l'ouuerture faite en la glace, ils l'asomment avec vn gros baston.

Au Prin-téps, le castor se prend à l'attrappe amorcée du bois dont il mange, les Sauuages sont tres-bien entendus en ces attrappes, & nous en monstrent de plusieurs sortes au pais des Hurons, pour diuerses sortes d'animaux, dont i'admirois les inuentiōs que nous n'auons pas icy, de l'une desquelles le P. Ioseph se seruit pour attraper deux renars qui glapissoient toutes les matinées & au soir es enuirōs de nostre cabane, d'où ils ne pouuoient auoir rien à manger. Quelquefois les chiens rencontraient la castor hors la cabane d'où il sort

souuent pour paistre ou pour s'apriuisionner, le poursuient & le prennent aisement, car il ne peut courir viste & n'a de deffence que de sa dent.

Il y en a quelqu' vns, qui disent que si l'on prend du castor trempé en eau, & qu'on le respande sur la mer, c'est vn remede asseuré pour faire fuir la troupe des baleines, & les faire enfoncer dans la mer, combien qu'elles rugissent horriblement, & que cela s'observe en Laponie & Noruegie, mais comme ie n'en ay point veu l'experiéce ie ne le veux asseuter, ny maintenir vne chose que ie tiens fort douteuse.

Ils ont aussi des rats musqués qu'ils appellent *Rats mus-*
ondathra, qui ne sont de nostre Europe, ny de ceux d'Egypte, desquels on dit come des mus-
quez.
queux qu'ils se seruent des deux pieds de deuant come de mains, & marchent debouts des deux pieds de derriere come les singes. Le rat d'inde est aussi differant de tous ceux là, duquel ie diray vn petit mot.

On l'appelle rat musqué, pour ce qu'en effet vne partie de son corps prise au Prin-téps sent le musc, en autre temps elle n'a point d'odeur. Les Sauuages en mangent la chair qu'ils font rostir deuant le feu, & conseruent les peaux & roignons musquez : ils ont le poil noir, court & doux, presque comme celuy d'une taupe, & les yeux fort petits; ils mangent comme les escurieux avec leurs deux parties de deuant; ils paissent l'herbe sur terre, & le blanc des ioncs du fond des lacs & riuieres. Il y a plaisir à les voir manger & faire leurs petits tours pendat

qu'ils sont ieunes: car quand ils sont à leur entiere & parfaicte grandeur qui approche celle d'un ieune leuraut, ils ont vne longue queue de guenon, qui ne les rends point agreables. l'en auois vn tres-ioly, grand comme vn escurieux suisse, que j'apportoys de la petite Natiõ à Kebec, ie le nourrissois du blanc des ioncs, & d'une certaine herbe, ressemblant au chien-dent, que ie cueillois sur les chemins, & faisois de ce petit animal tout ce que ie voulois, sans qu'il me mordit, aussi n'y sont ils pas suiets, il estoit si mignard qu'il vouloit toutes les nuits coucher dans l'une des manches de nostre habit, & cela fut la cause de sa mort: car ayant vn iour cabané dās vne sapiniere, & porté la nuit loin de moy ce petit animal pour la crainte que j'auois de l'estouffer, (car nous estions couchez à platte terre sur vn costeau fort penchant, où à peine nous pouuions nous tenir couchez sans rouller, (le mauuais temps nous ayans contraincts de cabaner en lieu si incommode) ceste bestiole, après auoir mangé ce que ie luy auois donné, me vint retrouver à mon premier sommeil, & ne pouuant trouuer l'ouverture de nos manches, il se mit dans le replis de nostre habit, où ie le trouuay mort le lendemain matin, & seruit pour le petit desjeuner de mon aigle, qui en eut bien deuoré d'autres, car comme disoient mes Sauvages, il estoit vn demon qui ne pouuoit estre rassasié.

Tortuës,

En plusieurs riuieres & estangs, il y a grande quantité de tortuës, qu'ils appellent Angyahouiche, ils en mangent la chair cuite dans de

l'eau, ou sous les cendres chaudes, les pattes contre-mont, ce qui me faisoit horreur & reprenois mes barbares, de cette rudesse, car i'eusse mieux aymé les tuer auparauant que de les mettre sous les braziers & les voir debatre. O mon Dieu ce n'est pas vertu en moy, mais ie ne peux faire de mal à vne beste innocente. Elles sortent ordinairement de l'eau quand il fait Soleil, & se tiennent arrangées sur quelque logue piece de bois tombée, mais à mesme temps qu'on pense s'en approcher, elles s'eslancent toutes dedans l'eau comme grenouilles, & trouuay par experience que ie n'estois pas assez habile, pour les prendre & n'en scauois l'inuention.

Il y a dans le pais de grandes couleures & Couleures de diuerfes sortes qu'ils appellent Tiouintsi- que, desquelles ils prennent les peaux des plus longues, & en font des fronteaux de parade, qui leur pendent par derriere vne bõne aulne de longueur, & plus de chacun costé, c'estoit bien n'apprehender point la salleté de ces animaux veneneux que de les escorcher, & s'en seruir à vn tel vsage, mais ie me suis plusieurs fois estonné de voir les petits garçons se ietter l'vn l'autre en se iouans de petits serpens tout en vie & n'en estre point offencé, & plus encore du deffunt sieur Hebert habitant de Kebec, lequel trouuant des couleures en son chemin les iettoit dans son desert pour en nettoyer les crapaux & autres venins qui gattoiét ses plantes.

Outre les grenouilles que nous auons par les. Grenouilles.

de ça, qu'ils appellent kiôtoutfiche, ils en ont encore d'une autre espeece, qu'ils appellent ouraon, quelqu'un les appellent crapaux, bien qu'ils n'ayent aucun venin & soient de la couleur des grenouilles; mais ie ne les tiens point en cette qualité, quoy que ie n'aye veu en tout les pais Hurôs aucune espeece de nos crapaux, ny ouy dire qu'il y en ait, sinon en Canada où i'en ay veu plusieurs avec aduersiõ pour l'horreur naturelle que i'ay contre ces animaux, telle, que quand il n'y auroit point d'autre punitiõ du peché que d'habiter en lieux remplis de crapaux, ie ne sçay comment on se pourroit iamaïs porter à vn seul peché mortel volontairement, & cependant l'enfer est bien autre chose, car ce mal n'en est que le moindre. Ie viens de dire que ie n'ay point veu de ces vilaines bestes en la Prouince des Hurons, il ne s'en suit pas neantmoins qu'il n'y en puisse auoir, car vne personne pour exacte qu'elle soit, ne peut entierement sçauoir ny obseruer tout ce qui est d'un pais, ny voir ny ouïr tout ce qui s'y passe, & c'est la raison pourquoy les historiens & voyageurs ne se trouuent pas tousiours d'accord en plusieurs choses.

Ces ouraons, ou grosses grenouilles, sont verdes, & deux ou trois fois grosses cõme les communes; mais elles ont vne voix si puissante qu'il sebleroit (à qui n'en auroit encore point veu) que ce fust d'animaux 20. fois plus gros: pour moy ie confesse ingenuẽment que ie ne sçauois que penser au commencement, entendant de ces grosses voix le soir sur le bord des

eaux à plus d'un quart de lieuë de moy, & m'imaginois que c'estoit de quelque dragon, ou bien de quelqu'autre animal gros cōme vn bœuf. J'ay ouy dire à nos Religieux dans le païs, qu'ils ne feroient aucune difficulté d'en mâger, en guise de grenouilles: mais pour moy ie doute si ie l'aurois voulu faire, n'estant pas encore bien assuré de leur netteté.

L'on m'a souuēt fait recit du poisson remora, Du remora.
à qui l'on attribue la vertu naturelle de pou-
voir arrester les plus grands vaisseaux voguans
en pleine mer, mais ie n'en ay veu aucun en
toute nostre trauesse, ny en la mer, ny dans les
fleues & riuieres de tout nostre Canada, qui
me fait croire ou que c'est vne fable faicte à
plaisir ou qu'ils sont rares, & ne se retrouuent
qu'en certaines mers: i'en ay veu seulement vn
de mort à Paris que ie cōtemplay à loisir, ad-
mirant qu'en vn si petit animal Dieu ait logé
tant de vertu, car il n'est pas plus grand qu'un
haranc, a le corps fait comme vn rouget avec
de certaines petites scies ou rateliers faits de
petites pointes cōme aiguilles, qui leur pren-
nent par mesure & en droicte ligne, depuis la
teste iusques à la queuë, que ce soit en ses peti-
tes scies que gist la force, ie n'en sçay rien, car
Dieu seul le cognoist, mais nous pouuons ad-
mirer le Createur en ceste merueille & dire
en nous humiliant que la foiblesse de l'homme
est bien grande & qu'il ne se doit point pren-
dre à Dieu, puis qu'un si petit animal a assez de
force pour arrester vn million d'hommes, &
faire perir les plus grands Roys.

O pauvres petits vermisſeaux que nous ſommes. Je diſ que vous autres les grâds de la terre & qui faites trembler tout l'vniuers, auez vn grand ſuiet de vous abaiffer deuant Dieu, car eſtât hommes, vous eſtes moins que pouſſiere deuant luy, qui vous peut tous aneantir en vn ſeul clein d'œil de ſa diuine volonté. Ne meſpriſez donc perſonne de peur qu'vn moindre que vous ne vous ſurmôte: ne ſoyez pas comme ce grand Empereur des Turcs, lequel mépriſant le petit Scanderbeque, fut ſurmôté par ſept fois d'iceluy (iuſte punition de Dieu) ainſi voyons nous ce petit remora arreſter le cours des plus grâds Nauires qui ſembloient ſe moquer des plus grandes tourmentes de la mer, autant en dit on d'vn autre petit poiſſon qu'on nomme achan, ſi bien qu'outre la remore il y a vn autre poiſſon capable de rendre les vaiſſeaux immobiles.

Rat d'Inde. On dit auſſi du rat d'Inde qu'il fait mourir les plus grâds cocodrilles, ce qui eſt merueilleux, car il n'eſt pas plus grand qu'vn lapin & cependant il emporte le deſſus de ce grand, furieux & tres-cruel animal. L'en ay veu vn duquel vn caſtor beaucoup plus grâd n'oſoit approcher pour auoir eſté vne fois touché de ſa dent. Il eſt d'vn poil gris argenté fort beau, & a vn muſeau pointu comme vn renard & la queue longue & eſtendue comme vne guenon, mais non pas ſi difforme.

*Des fruiçts, plantes, arbres, & richesses
du pays.*

CHAPITRE V.

IL est presque impossible que ceux qui font profession de descrire les choses qui se retrouuent dans l'estenduë d'un grand pays ne se trompent quelquefois, comme ont fait ceux qui ont dit que dans l'Amerique il n'y auoit anciennement aucuns cedres ny vignes, car nous en auons veu en abondance, & mesmes des Isles qui en estoient routes couuertes dans le pays de nos Hurôs, & és contrées Algomequines, qui n'y ont iamais esté apportées d'ailleurs, bien est il vray qu'il n'y auoit auant la venuë des Espagnols, aucuns orangers, limoniers, grenadiers, figuiers, poiriers, de coings, ny oliuiers, & entre les grains, il ny auoit non plus de froment, seigles, n'y de routes les sortes de bleds, excepté de celuy que nous appelons d'Inde, ny du ris, des melons, ny beaucoup d'autres especes de fruiçts, de plantes, & de racines que nous auons en nos iardins, & par la campagne, & és forests de nostre Europe, aussi en ont ils plusieurs autres sortes, & espices que nous n'auons pas icy & qui nous son ausfirares, qu'à eux les nostres.

Parlant en general & naïfvement des choses comme elles sont ; il faut aduouër qu'il n'y a aucun fruit en tout le pays de nos Canadiens, Montagnais, Algoumequins, & Hurons, qui merite le nom d'excellent, & desquels l'on doïue faire estat, il y en a bien quelque petits, comme ie diray presentement, mais c'est peu de chose en comparaison d'une bonne poire, ou d'une bonne pomme, que nostre Europe nous fournit à foison ; Dieu l'a ainsi voulu, sa diuine Maïesté l'a ainsi ordonné, qui sçait qu'en y plantant la foy, il est necessaire qu'on leur fasse goûter des douceurs dont iouissent en leur pays, ceux qui font profession de la mesme foy, pour leur rendre nostre ioug plus aymable, & leur seruitude plus tolerable. O Dieu ! j'ay tousiours peur que nos malices, avec nos delices y passent aussi-tost que la foy.

Blüets, frai-
ses, & autres
petits fruits
en quantité.

Au pays des Algoumequins, & dans celuy de nos Hurons, il y a en beaucoup d'endroits, contrées, Isles, le long des riuieres, & parmy les bois, si grande quantité de blüets, que les Hurons appellent ohentagüé, & autres petits fruits qu'ils appellent d'un nom general hahique, que les Sauvages en font seicheries pour leur Hyuer, comme nous faisons icy des prunes seichées au Soleil pour nos malades, & cela sert de confitures, de sel, & d'espices, pour donner goût à leur sagamité, & pour mettre dans les petits pains qu'ils font cuire sous les cendres. Nous en mangeâmes en quantité sur les chemins,

comme aussi des fraises qu'ils nomment ti-
chionte, avec de certaines graines rougea-
stres, & grosses comme gros pois, que ie
trouuoïstres. bonnes, mais ie n'en ay point
veu en Canada, ny en France de pareilles,
non plus que de plusieurs autres petits fruits
& graines incogneues par deça, desquelles
nous mangions comme mets delicieux quād
nous en pouuions trouuer, ce qui se fait en
la saison.

Il y en a de rouges qui semblent presque
du corail, & qui viennent quasi contre terre
par petits bouquets, avec deux ou trois fueil-
les ressemblans aux lauriers qui luy donnent
bonne grace, & semblent de tres beaux bou-
quets, & seruiroient pour tels s'il y en auoit
icy. Il y a de ces autres grains plus gros en-
core vne fois, comme i'ay tantost dit, de
couleur noiraste, & qui viennent en des ri-
ges, hautes d'une coudée. Il y a aussi des ar-
bres qui semblent de l'espine blanche, qui
portent de petites pomes dures, & grosses
comme auelines, mais non pas gueres bon-
nes. Il y a aussi d'autres graines rouges, nom-
mées *Toca*, ressemblans à nos cornioles;
mais elles n'ont ny noyaux, ny pepins, quel-
qu'un peut estre en pourra douter, mais il
doit estre satisfait en ce que ie l'asseure y a-
uoir pris garde, & qu'il n'y en a point du
tout, bien que ce fruiet soit assez gros, les
Hurons les mangent crues, & en mettent
aussi dans leurs petits pains.

Ils ont aussi des noyers en plusieurs en-

Fruiet nom-
mé *Toca*.

Noyers.

droits, qui portent des noix vn peu differentes aux nostres, i'en ay veu qui sont comme en triangle, & l'escorce verte exterieure sent vn gouft comme terebentine, & ne s'arrache que difficilement de sa coque dure, mais le mal est qu'elles ont peu de chair, & le noyau petit comme vne amande faute de culture.

Prunes.

Ils ont aussi en quelque contrée des charniers, & des cerisiers, dont les cerises ne sont gueres plus grosses, que grozeilles de tremis, à faute d'estre antées & labourées, il y en a en beaucoup de lieux, & par les bois, & par les champs, desquelles neantmoins on fait assez peu d'estat. Pour les prunes, nommées Tonestes, qui se retrouuent au pays de nos Hurons, elles ressemblent à nos damas violets, ou rouges, sinon qu'elles ne sont pas si bonnes de beaucoup, car la couleur trompe, & sont aspres & rudes au gouft, si elles n'ont senti de la gelée: c'est pourquoy les Sauuages, apres les auoir soigneusement amassées, les enfouyent en terre quelques semaines pour les adoucir, puis les en retirent, les essuyent, & les mangent. Mais ie croy que si ces prunes estoient antées, qu'elles perdroient leur acrimonie & rudesse qui les rend des-agreables au gouft, auparavant la gelée, car elles sont tres-belles, fort rondes, & d'un rouge violet comme nos plus gros damas violet.

Poirs.

Il se trouue des poirs, ainsi appellées poirs, certains petits fruiets, vn peu plus gros que des poix, de couleur noirastre &

mol, tres bon à manger à la cueillier comme
 bluës, qui viennent sur des petits arbres, qui
 ont les fucilles semblables aux poiriers sau-
 uages de deçà, mais leur fruiet en est du tout
 différent. Pour des framboïses, & meures Framboïses
meures, gro-
selles.
 champestres, grozelles, & autres semblables
 fruiets que nous cognoissons, il s'en trouue
 assez en des endroits, comme semblablement
 des vignes & raisins, desquels on pourroit
 faire de fort bon vin au pays des Hurons,
 s'ils auoient l'inuention de les cultiuer & fa-
 çonner, mais faute de plus grande science,
 ils se contentent d'en manger le raisin, & les
 fruiets sans en faire du vin.

Vignes:

Les racines que nous appellons Cana-
 diennes, ou pommes de Canada, qu'eux ap-
 pellent Orasqueinta, sont assez peu commu-
 nes dans le pays, ils les mangent aussi tost
 crûes que cuites, côme semblablement d'une
 autre sorte de racine, ressemblant aux pa-
 nays, qu'ils appellent Sondhratates, lesquel-
 les sont à la verité meilleures de beaucoup:
 mais on nous en donnoit peu souuent, &
 lors seulement que les Sauuages auoient re-
 ceu de nous quelque present, ou que nous
 les visitions dans leurs cabanes.

Canadien-
nes, ou po-
mes de Ca-
nada.

Dans le Nauire Anglois que nous pris-
 mes sur mer, il y auoit quantité de patates, Patates.
 fort grosses, & tres-excellentes, les vnes
 jaunes, violettes, blanches, & d'autres de di-
 uerses couleurs, desquelles nous nous serui-
 mes tres à propos, car en toutes sauces qu'on
 les mettoit elles estoient tres-bonnes & rai-

uissantes. P'en cherchay aux Hurons & n'en pû trouver, ny n'en pû dire le nom aux Sauvages, ce qui me fit repentir de n'en auoir porté avec moy, car bien que cette racine ne porte point de graine, estant couppee par morceaux, & plantee en terre, elle grossit en peu de temps, & multiplie comme les pommes de Canada à ce qu'on dit.

Oignons

Nos Hurons ont de petits oignons blancs nommez Anonque, qui portent seulement deux fueilles semblables à celles du muguet; ils sentent autant l'ail que l'oignon sans qu'il puisse dire proprement auquel ils ressemblent le plus quant au goüst; nous nous en seruions d'as nostre sagamité pour luy donner quelque saueur, & d'une espece de marioleine sauvage qu'ils appellent Ongnehon, de laquelle les Sauvages ne vouloient point manger lorsqu'il y auoit de ces herbes, & encor moins sentir l'haleine, si tant soit peu nous auions mangé de ces oignons, ou ails crus, comme nous faisons aucunes fois (contraincts de la necessité) avec vn peu de pourpier, & de sel, sans pain, sans huyle, & sans vinaigre.

Marioleine.

Les Sauvages en mangent neantmoins de cuits sous la cendre, lors qu'ils sont en leur vraye matutité & grosseur, & non iamais dans leur menestre, non plus que d'aucune autre sorte d'herbes, desquelles ils font tres-peu d'estat, bien que le pourpier, ou pourceleine leur soit commun, & que naturellement il vienne dans leurs champs labouréz, parmy le bled, & les citrouilles.

Dans les forests, il se voit quantité de cedres, nommez Asquata, l'odeur duquel est contraire aux serpens, c'est pourquoy les Sauvages se seruent souuēt de leurs rameaux allans en voyages pour se coucher dessus, il y a aussi de tres-beaux chesnes gros à merueilles, des fouteaux, herables, & merisiers ou guyniers, & vn grand nombre d'autres bois de mesme espeece des nostres, & d'autres qui nous sont incognus : entre lesquels ils ont vn certain arbre nommé atti, duquel ils reçoient des commoditez nompareilles.

Premierement ils en tirent de grandes lanières d'escorces, qu'ils appellent Ouhata, lesquelles ils font bouillir, & les rendent en fin comme chanure, de laquelle ils font leurs cordes, & leurs sacs, & sans estre bouillie ny accommodée, elle leur sert encore à coudre leur robes, plats & escuelles d'escorce de bouleaux & toute autre chose lors que les nerfs d'eslan leur manquent. Ils en lient aussi les bois & perches de leurs cabanes, & en enuelopent leurs playes & blessures, & cette ligature est tellement bonne & forte qu'on n'en sçauoit desirer vne meilleure & de moindre coust.

Le muguet qu'ils ont en leur pays, a bien la fucille du tout semblable au nostre, mais la fleur en est du tout differente, car outre qu'elle est de couleur tirant sur le violet, elle est faite en façon d'estoile, grande & large, comme petit Narcis: mais la plus belle plante que j'aye veüe aux Hurons, est (à mon aduis)

Cedres.

L'arbre atti.

Cōmodité
qu'ils tirent
de l'arbre
atti.

Muguet.

Chausse de
corue.

celle qu'ils appellent Angyahouiche Ori-
chya, c'est à dire, chausse de tortue: car sa
feuille ressemble en tout, (excepté à la cou-
leur) au gros de la cuisse d'un homard, ou
escrue de mer, & est ferme & creule au de-
dans comme un gobelet, duquel on se pour-
roit servir à un besoin pour en boire la rosée
qu'on y trouue tous les matins en Esté

Lys incar-
nats,

J'ay veu en quelque endroit sur le chemin
des Hurons, de beaux lys incarnats, qui ne
portent sur leur tyge qu'une ou deux fleurs,
& comme ie n'ay point veu en tout le pays
Huron aucuns marragons, ou lys orangez,
comme ceux de Canada, ny de cardinales;
aussi n'ay ie point veu en tout le Canada au-
cuns lys incarnats, ny chausse de tortues,
ny plusieurs autres espèces de plantes que
j'ay veues aux Hurons, ou s'il y en a ie ne l'ay
point veu.

Roses,

Pour les roses, qu'ils appellent Eindauha-
tayon: nos hurons en ont de simples, mais ils
n'en font aucun estat, non plus que d'aucunes
autres fleurs qu'ils ayent dans le pays: car
tout leur deduir est d'auoir des parures & af-
fiquets qui soient de durée, & non des chap-
peaux, & bouquets de fleurs, qui flettrissent
si tost qu'elles ont paru belles, ainsi est-il de
toutes les beautez de ce siecle, qui ne doiuent
rauir nos yeux, & nostre entendement, que
pour y contempler la beauté d'un Dieu, &
& les richesses de sa gloire.

Tourne sol

Ils font estat du tourne-sol, qu'ils sement en
quantité en plusieurs endroits, à cause de
l'huyle

huile qu'ils tirent de la graine, laquelle leur sert non seulement à greffer leur cheueux, mais aussi à manger, & en plusieurs autres usages, & voicy l'inuention comme ils la tirent. La graine estât bien meure, & arrachée nettement de sa tige, les filles la reduisent en farine dans le grand mortier, puis la font bouillir avec de l'eau dans vne grande chaudiere, & à succession de temps elle rend son huile qui nage par dessus le bouillon, que les Sauvages amassent avec des cueillieres propres & serrét dans leurs calbasses, & non seulement cette huyle est bonne à manger come j'ay dit, mais aussi la graine pillée, que les Sauvages mangent comme chose qu'ils estiment excellente, & que j'ay gousté avec admiration. Mais comment est-ce que ce peuple Sauvage a pû trouuer l'inuention de tirer d'une huyle que nous ignorons, sinon à l'ayde de la diuine prouidence, qui donne à vn chacun le moyen de sa conseruation, ce qu'autrement n'estant point policé ny instruit, ce peuple resteroit miserable, où les brutes mesmes trouuent leur consolation & entretien.

Il y a tout plein d'autres petites fleurettes, plantes, arbres & racines, mais comme la chose en est de si petite importance qu'elle ne merite pas, l'escriture, nous n'en faisons point icy de mention, pour donner lieu au traitté des autres richesses qui se retrouuent en cette grande estenduë de pays, non encores entierement cognus, car la misere de l'homme est telle, & particulierement de ceux qui

Comme ils
en tirent
l'huyle.

n'ont la gloire de Dieu, & le salut du prochain pour but & reigle de leurs actions, que s'il n'y a dans vn pays quelque chose de valable, qu'ils y amorcent, ils n'en font iamais d'estat, s'il à gagner le Ciel, & vn monde d'amour pour le Paradis, comme l'experience nous souuent fait voir & experimenter à nostre regret.

Point de
vertu en
Cour.

Au retour de mon voyage, lors que ie m'esforçois de faire entendre aux courtisans la necessité que nos pauvres Sauvages auoient d'un secours puissant, qui fauorisast leur conuersion, & qu'il y auoit cent mille ames à gagner à Iesus Christ. Plusieurs mal deuots me demandoient s'il y auoit cent mille escus à gagner aupres, & que le reste leur estoit de peu de consideration. O cœurs de bronze vous n'estes point du party de Dieu, non plus que plusieurs autres de vostre condition, qui vivent dans des maximes bien contraires à celles de Dieu, & pour dire vray il y a bien peu de salut dans la Cour, où par flaterie, on y fait des Saints qui auront l'Enfer pour leur gloire.

Helas si le bon S. Denys, & les autres Saints Martyrs, qui nous ont les premiers apporté la parole de Dieu, eussent eu ces basses pensées de la terre, nous serions encores à estre Chrestiens, ils auoient la charité & nous n'en auons point, ils sont morts en procurant nostre salut, & nous ne voulons rien contribuer en procurant celuy des Sauvages desquels on fait estat comme de bestes brutes, à la condemnation de si mauuais Iuges.

Voicy ô mal deuors bien des richesses que le vay vous mettre deuant les yeux, ausquel-les vous aspirez, souspirez, & aspirez continuellement avec tant d'inquietudes, mais elles ne sont point pour vous, ny pour tous ceux qui cōme vous n'ont autre pensée que le luxe, & la vanité de gens doüilletz qui n'ōt point de courage.

Le Peru est la plus fameuse partie de routes Richesses du Peru. les Provinces du Nouveau Monde, d'un air temperé, & bien peuplé, voire le plus riche en or, & en argent qui soit peut-estre au monde.

Lors que les Espagnols prindrent possession de ce pays, & tindrent le Roy Atabaliba prisonnier, ce Prince offrit pour sa rançon, de remplir tout d'or le lieu auquel il estoit detenu prisonnier, qui estoit long de 12. pieds, & Rançon du Roy Atabaliba. l'arge de 17. & de telle hauteur que luy mesme pourroit atteindre du bout de ses doigts, se tenant sur le bout de ses orteils, ou s'ils ay-moiēt mieux de l'argent il en donneroit deux fois cette place pleine iusque au plancher.

Et bien messieurs vous voudriez bien que le Canada fut en mesme paralelle, vous donneriez volontiers cinq sols pour auoir vne charrée d'escus, ouy mais cela ne se peut faire car les richesses de la nouuelle France, ne montent pas à si haut pris, neantmoins encores ne doiuent elles pas estre mesprisées pour si peu qu'il y en aye.

Premierement il y a quantité de pellereries, de diuerses especes d'animaux, terrestres & amphibies, cōme vous auez pû remarquer

dans le Chapitre qui traite des animaux terrestres & aquatiques. Il y a des mines de cuiure desquelles on pourroit tirer du profit, s'il y auoit du monde, & des ouuriers qui y vou-
lissent trauailler fidellement, ce qui se pour-
roit faire, si on y auoit estably des Collonies:
car enuiron 80. ou 100. lieues des Hurons, il
y a vne mine de cuiure rouge, de laquelle le
Truchement Brulé me monstra vn lingot
au retour d'un voyage qu'il fit à la Nation
voisine, avec vn nommé Grenolle.

On tient qu'il y a encore vers le Saguenay,
& mesme qu'on y trouue de l'or, des rubis &
autres pierreries. De plus quelqu'vns asseu-
rent qu'au pays des Souriquois, il y a non
seulement des mines de cuiure, mais aussi de
l'acier, parmy les rochers, lequel estant fon-
du, on en pourroit faire de tres-bons tren-
chans, puis de certaines pierres bleuës trans-
parentes, lesquelles ne valent moins que les
turquoises, & c'est ce qui nous a donné le
plaisir de voir quelquefois des nouueaux ve-
nus, aussi simples que neufs, auoir tousiours
les yeux attachez sur le galay, & par tout les
chemins où ils passoient, pour voir s'ils pour-
roient rencontrer parmy les pierres, & les
cailloux, quelque pierrerie rare & de prix.

Diamans.

Aux rochers de cuyure, & en quelque au-
tres se trouuent aussi aucunesfois des petits
rochers couuerts de diamans y attachez: &
peux dire en auoir amassé & recueilly moy-
mesme vers nostre Couuent de nostre Dame
des Anges dont quelqu'vns sembloient sortir

de la main du Lapidaire, tant ils estoient beaux, luisans & bien baillez, mais entre tous ceux que j'ay iamais veu de ces pays là, ie croy que celuy que Monsieur le Prince de Portugal m'a fait voir est le plus beau, le plus net, le plus grand, & le mieux taillé de tous. Je ne veux neantmoins asseurer qu'ils soient fins, mais seulement qu'ils sont tres-beaux, & escriuent sur le verre.

Il me semble qu'on pourroit encor trouver des mines de fer en quelque endroit, & plusieurs autres mineraux, si on y vouloit chercher, & faire la despence necessaire. Pour du bois il y en a abondance, & des forests de tres-grandes estenduës, des pierres, de la chaux, & de toutes autres sortes de materiaux propres à construire maisons, & edifices. Je pourrois aussi faire mention de beaucoup d'autres petites commoditez qui se retrouuent dans le pays, mais la chose ne le merite pas, non plus que de parler du profit qui pouenoit des cendres qui se transporroient en France, puis qu'elles ont esté delaisées comme de peu de rapport, en comparaison des fraiz qu'il y conuenoit faire, bien qu'elles fussent meilleures, & plus fortes de beaucoup que celles qui se font en nos foyers, dont on a veu l'experience vne infinité de fois.

Mines, &
materiaux.

*De nostre partement du pays des Hurons
pour le Canada, & de ce qui nous ar-
riua en chemin iusques au lac des Bissi-
rinien.*

CHAPITRE VI.

Pourquoy
je descendis
en Canada.

VNan entier s'estant escoulé, le pain
chanter, & beaucoup d'autres petites
choses nous manquans il fut question d'au-
ser pour en rauoir d'autres. Or en ce temp
là les Hurons se dispoient pour descendre
à la traite qui nous eut esté vne commodi-
propre, s'ils eussent esté capables de cette
commission, mais comme ils sont par trop
curieux de voir les petits emmeublemens
& autres commoditez qui nous viennent
de France, nous apprehendames qu'en fouil-
lans nos paequets pour voir ce que nos freres
de Kebec nous enuoyeroient, ils ne con-
sommassent nostre pain à chanter, & se ser-
uissent du linge de l'Autel.

Je me resolu donc à cette commission
bien que tres-penibles pour estre vn voya-
ge de six cens lieues de chemin, & tra-
tay avec vn Capitaine de guerre, nommé
Angoiraste, & deux autres Sauvages de
sa bande, l'un nommé Andatayon, &
l'autre Conchionet, qui me promirent plac-

dans lent canot. Or comme leur ordre porte de n'entreprendre iamais aucun voyage de long cours, sans en auoir premierement donné aduis au Conseil, & sceu leur volonté, ie fus appellé à cette celebre assemblée, deux iours auant que ie deu partir, non dans vne cabane, ou maison bien ornée, ains sur l'herbe vette en dehors du village.

Les harangues faites, & toutes choses concludës au contentement d'vn chacun, ie fus supplié par ces Messieurs de leur estre favorable enuers les Capitaines de la traite, & de faire en sorte qu'ils peussent auoir d'eux, les marchandises necessaires à prix raisonnable, & que de leur costé ils leur rendroient de tres bonnes pelletteries en eschange. Ils me dirent aussi qu'ils desiroient fort se conseruer l'amitié des François, par mon moyen, ce qu'ils esperoient d'autant plus facilement qu'ils me croyoient de consideratiõ entr'eux, & puis l'hoineste accueil & bon traitement qu'ils m'auoient tousiours fait, meritoit bien cette recognoissance, & ce seruiçe de moy pour leur Nation.

Ie leur promis-là dessus tout ce que ie deuois & pouuois, & ne manquay point de leur satisfaire, & assister en tout ce que ie pû, & le deuois ainsi, car de vray nous auions trouué en eux, la mesme courtoisie & humanité, que nous eussions pû esperer des meilleurs Chrestiens, & peut-estre le faisoient ils neantmoins sous esperan-

ce de quelque petit present, ou pour nous obliger de ne les point abandonner, ce qui estoit plus probable, car la bonne opinion qu'ils auoient conceuë de nous, leur faisoit croire, que nostre presence, nos prieres, & nos conseils, leurs estoient vtils & necessaires en toutes choses.

*Je fis mes
adieux.*

*Amitié des
Sauuages.*

*Me font des
demandes,*

Faisans mes adieux par le bourg, plusieurs apprehendans que ie les delaissasse pour tousiours, tachoient de me dissuader de mon voyage, mais voyant ma resolution & la necessité qui m'en pressoit, me prioient au moins de reuenir bien-tost, & ne les abandonner point, & aucuns me monstrans de leurs enfans malades me disoient d'une voix assez triste, & piteuse, Gabriel, serons nous encore en vie, & ces petits enfans, quand tu reuiendras icy, tu sçay comme nous t'auons tousiours aymé & chery, & nous es précieux au delà de toutes les choses du monde, ne nous abandonne donc point, & prend courage en nous instruisant, & enseignant le chemin du Ciel, à ce que nous y puissions aller avec toy, & que le diable qui est meschant ne nous entraine apres la mort dans sa maison de feu, & ie les consolais au mieux que ie pouuois dans la croyance d'un bref retour, & que Dieu auoit en fin pitié d'eux.

Comme les sentimens sont diuers, ils produisent diuers effects, parmy vn si grand nombre de Sauuages qui s'affligeoient de mon depart, plusieurs entremessans

des demandes parmy leurs pleurs, me disoient Grabriel, si en fin tu es resolu de partir pour Kebec, & que ió dessein soit de reuenir (côme nous t'en supplions) rapporte nous quelque chose de ton país, des rassades, des prunes, des aleines, des cousteaux, ou ce que tu voudras, car comme tu sçais, nous sommes fort ~~re~~ pauvres en meubles & autres choses que vous avez en abondance, & si de plus tu pouuois, disoient quelqu'vns, nous faire present de tes sendales de bois, nous t'en aurions de l'obligation & te donnerions quelque chose en eschange, car elles nous semblent fort commodes & puis nos Moyentisacheroient d'en faire de mesme pour nous exempter de l'incommodité du pied nud & des espines qui nous blessent en marchans, & ie taschois de les contenter tous, de parole ou autrement, & les laisser avec cette esperance que ie les reuerrois en bres, & leur apporterois quelque chose, comme en effect c'estoit bien mon dessein, si Dieu n'en eut autrement disposé.

Ayant pris congé du bon Pere Nicolas avec promesse de le reuoir au plustost, (si Dieu & l'obeissance me le permettoient) Ie partis de nostre cabane vn soir assez tard avec mes Sauvages & allames coucher sur le bord du lac, d'où nous partimes le lendemain matin moy sixiesme, dans vn canot tellemét vieil & rompu, qu'à peine eusmes nous aduancé deux ou trois heures de chemin, qu'il fist eau par tout, nous contraignit de prendre terre, & nous cabaner en vn cul de sac (avec d'autres Sauvages

*Ie part des
Hurons.*

qui alloient au Saguenay) d'où nous renuoyames querir vn canot en nostre bourgade de S. Ioseph, par deux de nos hommes ausquels ie donnay vn petit mot de lettre pour le P. Nicolas que ie leur expliquay, & en attendant leur retour, (après auoir seruy Dieu) i'employay le reste du temps à visiter tous ces pauvres voyageurs, desquels i'apris la paix, la patience & la sobriété qu'il faut auoir en voyageant, lesquels ils pratiquoient merueilleusement bien.

Petits canots.

Leurs canots estoient fort petits & aysez à tourner, aux plus grands il y pouuoit trois hommes, & aux plus petits deux avec leurs viures & marchandises. Je leur demanday la raison pourquoy ils se seruoient de si petits canots; mais ils me firent entendre qu'ils auoient tant de fascheux chemins à faire, & des destroits parmy les rochers si difficiles à passer, avec des sauts de sept à huit lieues où il falloit tout porter, qu'avec de plus grâds canots ils ne pourroient passer. Je loué Dieu en toutes choses, & admire sa diuine providence, que si bien il nous donne les choses necessaires à la vie du corps, plus abondamment qu'aux Sauvages, il douë aussi ces pauvres gens, d'une patience au dessus de nous, qui supplée au defaut des petites commoditez qui leur manquent plus qu'à nous.

Admirent l'escriure.

Nostre canot estant arriué, ie ne vous scaurois expliquer l'admiration que nos Sauvages firent du petit mot de lettre, que i'auois enuoyé au P. Nicolas, disant que ce petit papier auoit parlé à mon frere, & luy auoit dit

tout le discours que ie leur auois tenu par
 deça, & que nous estions plus que tous les
 hommes du monde, & en contoient l'histoire
 à tous, qui pleins d'estonnement admiroient
 ce secret, qui en effet est admirable. Cela
 me seruit bien à Kebec lors que ie leur mis en
 main les petites necessitez que i'enuoiaý audit
 Pere avec vn mot de lettre, car leur ayant dit
 que s'ils y faisoient faute ce petit papier les
 accuseroit, ils le creurent tellement que sans
 regarder au pacquet, ils le rendirent fidele-
 ment au Pere.

Nous lisons presque vne semblable histoi-
 re au Sommaire des choses des Indes de Pierre
 Martyr, & d'autres en plusieurs endroits es
 histoires de ceux qui ont voyagé & conuersé
 parmy les peuples Sauvages, mais comme la
 chose est de soy assez commune & triuiale,
 ie me deporte d'en dire dauantage pour ce
 coup.

Toutes nos petites affaires estant faictes &
 disposées pour partir, nous fismes voile avec
 telle diligence, qu'environ le midy nous ratai-
 gnimes le Truchement Brullé, accompagné
 de cinq ou 6. canots du village de Toenchain,
 qui vogoient pour Kebec, avec lesquels nous
 fumes loger au plus prochain village des Al-
 gonmequins, où des que nous fumes cabanez,
 ie fus par tout visiter ces bonnes gens qui
 estoient assez bien apriuisonnez de poisson,
 particulièrement de grands esturgeons gros
 comme de petits enfans dequoy ie demeuray
 estonné.

Rataigni-
 mes le Tru-
 chement.

Entrans dans le village ie trouuay presque par tout deuant les cabanes, vne quantité de sang de plusieurs grâds esturgeons, qui y auoient esté esuentrez, i'eusse bien desiré en traicter quelque morceau, mais ie n'auois pas de quoy, à la fin la fortune m'en voulut & trouuay vn bon homme chantant auprès d'vn grand feu où cuisoit vn esturgeon decouppé par morceaux dans la chaudiere qui estoit sur le feu, m'approchant de luy il interrompit sa chanson, s'informa qui i'estois & qui m'auoit là conduit, après luy auoir rendu responce & satisfait à sa demande, (car il parloit Huron) il me pria du festin de quoy ie fus fort aysé, & luy promis de m'y trouuer plus pour auoir suiet de leur parler de Dieu & apprendre quelque chose de leurs ceremonies, que pour le desir de la bonne chere, quoy qu'elle me vint bien à propos pour les grands ieunes que la necessité m'auoit enioints depuis long temps d'vn tel rencontre.

Suis prié
d'vn festin.

A peine fus ie de retour dans nostre cabane, que le sermoneur du festin s'y trouua, lequel donna à chacun de ceux qu'il inuitoit vne petite buchette, de la longueur & grosseur du petit doigt, pour marque qu'ils estoient du nombre des inuités, & non les autres qui n'en pouuoient monstrier autant, qui est vn ordre qui ne se pratique point entre les autres Nations non plus que de porter par les inuités des farines au festin, comme firent nos Hurons pour le bouillon.

Il se trouua près de 50. hommes à ce festin,

lesquels furent tous raffasiez plus que suffisamment de ce grand poisson, duquel chacun eut vn bon morceau & vne escuelle de la sagamité huylée. Pendant qu'on vuidoit la chaudiere, les Algoumequins les vns après les autres firent l'exercice des armes, pour faire voir à nos Hurons leur adresse & vaillantise, aussi bien aux armes qu'au plat, & que s'ils auoient des ennemis ils auoient aussi de la force & du courage pour les surmonter. A la fin ie leur parlay vn peu de Dieu & de leur salut, à quoy ils sembloient prendre vn singulier plaisir, & puis nous nous retirames tous chacun à son quartier & pensames de nostre voyage.

Le lendemain matin, après auoir prié & deſcuené, nous nous embarquames, & fumes Ie couchay
sur vn ro-
cher caué. loger sur vn grand rocher ioignant la riuiere, où ie m'accommoday dans vn lieu caué dans le roc, qui estoit là en forme de cercueil, le liēt & le cheuet en estoient bien durs à la verité, mais ô mon Dieu, vostre sacré corps, & vostre chef couronné d'espines, estoient encores biē plus durement accommodés sur l'arbre de la sainte Croix, où mes pechez vous auoient attachez, pour l'amour de vous Monseigneur, ie me souciois assez peu de ma peine & m'y accoustumois, il n'y auoit, que les piqueures des mousquites & moucherons en nombre presque infiny dans ces deserts qui me faisoient souuent crier à vous, & vous demander patience & la deliurance de ces importuns animaux, qui ne me donnoient aucun relasche ny le iour ny la nuict.

Tuent vne
fouyne ou
martre.

Enuiron l'heure du midy apparut l'arc en Ciel à l'entour du Soleil, avec de si viues & diuerses couleurs, qu'elles attirerent long-téps mes yeux en admiration, puis vn de nos Sauuages nommé Andatayon, passant près d'un petit islet, tua d'un coup de flèche vn animal ressemblant à vne fouyne ou martre, elle auoit ses petites mammelles pleines de lait, qui me fait croire que ses petits n'estoient pas loin de là: & cet amour que la nature luy auoit donnée pour sa vie & pour ses petits, luy donna aussi le courage de trauerser les eauls, & d'emporter la flèche qu'elle auoit au trauers du corps, qui luy sortoit également des deux costés, de sorte que sans la diligence de nos Sauuages qui luy couperent chemin, elle estoit perduë pour nous, ils l'escorcherent, en ietterent la chair, qu'ils n'estimoient pas bonne, & se contentèrent de la fourrure, de laquelle ils firent vn petit sac à petun, & de là continuant nostre chemin, nous allasmes à l'entrée de la riuere qui vient du lac des Ebicerinys se descharger dans la mer douce.

Fusmes
égarez.

Le iour ensuiuant après auoir passé vn petit saut, nous trouuames deux cabanes d'Algonmequins dressées sur le bord de la riuere, desquels nous traitames vne grande escorce à cabaner & vn morceau de poisson frais pour du bled d'Inde, duquel nous auions assez & trop peu de l'autre. De là nous nous égarames aussi bien que le iour precedent, par des sentiers destournez & dans des pais fort aspres & montagneux couuerts de bois, desquels nous eumes

bien de la peine nous retirer & remettre dans le droit chemin.

Nous portames après à six sauts assez proches les vns des autres , puis à vn septiesme assez grand , au bout duquel, nous trouuames quatre cabanes d'Algoumequins desquelles nous primes langue , & sçeumes après nous estre vn peu rafraischis avec eux, qu'ils estoient partis pour vn voyage de long cours, & neantmoins ils n'auoient aucune prouision de viures, que ce qu'ils pouuoient chasser & pescher chemin faisant , qu'estoit proprement marcher à l'Apostolique s'ils eussent esté Chrestiens.

Nous partimes de là sur le soir & allames cabaner sur vne montagne proche le lac des sorciers , où nous fumes visitez de plusieurs Sauuages passans , car ils ont par tout ceste coustume de visiter les cabanes qu'ils rencontrent & les autres de les recevoir courtoisement & amiablement du moins de visage, s'ils ne peuuent dauantage , car pour le viure ils n'en ont iamais gueres trop.

Dés le lendemain matin que nous eumes fait chaudiere, nous nous embarquames dans nostre Nauire d'escorce, guere plus asséuré que la gondole de ioncs du petit Moyse, & trauesames assez fauorablement le lac Ebicerinyen de 10. ou 12. lieues de trai& , lequel pour sa beauté & bonté merite bien que ie vous en fasse vne description particuliere, après que nous nous serons cabanez sur la riué du canal de nostre lac Epicérinien assez proche de leur village, & de plusieurs cabanes de passagers.

Du lac & pays des Bissiriniens. Des armoiries des Sauvages. Du P. Nicolas submergé, & de la Nation de l'Isle.

CHAPITRE VII.

Lac des
Bissiriniens

LE lac des Skecaneronons, est vn lac beau à merueille, profond & fort poissonneux duquel les Sauvages qui habitent ses riuës, tirent vne bonne partie de l'année leur principale nourriture & aliment, car les esturgeons, brochets, & autres diuerses especes de poissõs qu'il ya en grand nombre sont tres-excellens & delicats au possible pour estre l'eau fort claire & nette. Il est de forme sur-ouale c'est à dire vn peu plus long que large, ayant de circuit plus de 25. lieues selon que ie pui iuger à la trauersë. Les petites Isles qu'il enceint, seruent fort à propos de retraicte aux Sauvages du pays, pour le temps de la pesche, où ils ont la commodité du bois pour faire chaudiere & de la prairie pour faire seicherie.

Quand il fait tant soit peu de vent, les Sauvages les trauersent avec grandes apprehensions, pource qu'il s'enfle alors comme vne petite mer, mais ce qui est le plus admirable & de quoy ie m'estonnois le plus en ce lac, est (si ie ne me trompe) qu'il se descharge par les deux extremités opposites; car du costé des

Hurons

Hurons il desgorge cette grande riuere qui le va rendre dans la mer douce : & du costé de Kebec, il se descharge par vn canal de sept ou huit toises de larges, mais tellement embarassé du bois que les vents y ont fait tomber à succession de temps, qu'on n'y peut passer qu'avec peine, & en destournant continuellement les bois de la main, ou des auirons.

On dit que la chasse est abondante dans le pais, mais il me semble que sans ce lac, les Sauvages Ebicetinyens auroient de la peine à viure, car le poil & la plume ne se prennent pas aisement, si les neiges ne sont hautes, pour le poil & la saison propre pour la plume.

Le pais n'est pas beaucoup agreable à cause des rochers & terres sablonneuses qui se voyent en beaucoup d'endroits, & neantmoins les habitans en font estat comme de l'Arabie heureuse, & pour ce disoient de fort bonne grace à Iean Richer leur truchement, que c'estoit la seule beauté de leur pais qui l'auoit attiré, dont ils inferoient de là, que la France estoit peu de chose en cōparaison, puis qu'il l'auoit quittée & vouloit viure avec eux.

Tout nostre petit fait estant dressé, ie fus visiter le village des Sorciers à la portée du pistolet, desquels ie traictay vn morceau d'esturgeon pour vn petit cousteau fermant, car ils ne firent point estat de rassade rouge, qui est celle que toutes les autres Nations estimoient principalement.

Le matin venu nous nauigames par le canal enuiron vn petit quart de lieue, puis nous

prime terre, & marchames par des chemins
tres-facheux & difficiles plus de quatre bon
nes lieues, excepté deux de nos hommes qui
pour se soulager d'une partie du chemin con
duirent leur canot par vn ruisseau auquel ne
antmoins ils se trouverent souvent embarassé
& fort en peine, tant pour son peu d'eau, qu
pour le bois tombé dedans qui les empeschoi
de passer, ce qui les contraignit à la fin, de quit
ter ce ruisseau, prendre le canot, & les mar
chandises sur leurs espaules, & d'aller par les
terres comme nous.

Pont mal
assuré.

Je m'éga
rois.

Charité des
Hurons.

Je portois les auirois du canot pour ma par
ti du bagage, avec quelqu'autre petit paquet
avec quoy ie pensay tomber dans vn profond
canal, marchant sur des boises mal assurées
mais nostre Seigneur qui me voyoit des ja
assez en peine, m'en garentit, & tombay fau
orablement sur le sable sans me blesser, & pui
ie me releuay vn peu mouillé & en peine qu'e
stoient deuenus mes gens, car ils estoient si le
gers du pied que ie les perdois de veüe à tou
inomé, à cause des bois, vallées & montagne
& qu'il n'y auoit point de sentiers battus, mai
à leur appel ie me remettois, & allois à eux, les
quels au lieu de me crier m'encourageoient &
excusoient ma lassitude qu'ils eussent bien de
sire soulager, & ne me contraignoient en rien
d'une chose estois ie bien assuré qu'ils ne m'a
bandonneroient pas & ne me laisseroient à la
mercy des ours, plustost ils m'eussent porté
sur leurs espaules que de me laisser malade, ou
misérablement mourir sur les champs, comme

font les Sauvages errants leurs parens malades, trop vieux, ou du tout impotans.

Ce long & penible chemin fait, nous trouuames vn lac, long d'vne lieuë ou enuiron, au bout duquel ayant porté à vn petit saut, nous rencontrames la grand riuere des Algoumequins qui descend à Kebec, sur laquelle nous nous embarquames.

Depuis le país des Hurons sortans de la mer douce iusques à l'entrée du lac des Ebicerinys, nous auions tousiours eu le courant de l'eau contraire, mais depuis le canal du mesme lac qui se descharge par deça, iusques à Kebec, nous l'eumes tousiours & les ruisseaux & riuieres fauorables, tellement qu'on peut inferer de là, que la terre des Ebicerinys est plus haute que celle des Hurons & de Kebec.

Nous ne suivimes pas tousiours en descendant, le mesme chemin que nous prismes en montant, comme ie remarquay tres bien en ce que nous fûsmes vn long-temps destournez par les terres & les lacs, sans tenir de riuieres, ie ne sçay par qu'elle consideration, car le chemin en estoit plus long & penible, sinon que nous euitames le saut des cousteaux que les Sauvages nomment ainsi, à cause que les pierres dures, y coupent les pieds nuds comme cousteaux, ny par beaucoup d'autres endrois que nous auions passé en montant.

En fin après auoir bien trainé, heurté & porté nostre pauvre canot, il fallut luy donner cõgé car il n'en pouuoit plus, faisoit force eau, & nous menaçoit de couler à fond si on ny reme-

Pays des
Ebiceriniés
éleué.

Sauuages
changent
de chemins.

Nostre ca-
not est de-
peru.

dit promptement. Il fut donc question d'en faire vn autre pour le reste du voyage, car de demeurer en chemin il n'y auoit point d'apparence, & d'auancer il n'y auoit plus moyen, mes Sauvages furēt donc chercher des escorces de bouleaux dans les plus prochaines forêts pour y trauailler en toute diligence, pendant que ie restay seul en nostre cabane ioignant deux autres d'Algoumequins avec lesquels ie m'entretins.

Ours priués.

Ces Algoumequins auoient deux ieunes ours priuez, gros comme moutons, qui continuellement luitoient, couroient & se ioüoient par ensemble, puis c'estoit à qui auroit pluſtoſt monté vn arbre qu'ils embrassoient comme vn homme & descendoiet de mesme: mais l'heure du repas venuë, ces meschans animaux ne nous dōnerent aucun repos, car de leur dets & de leurs pattes, ils nous vouloient arracher nos escuellles pour en manger la sagamité.

Mangeames vne tortuë,

Mes Sauvages rapporterēt avec leurs escorces, vne tortuë pleine d'œufs, qu'ils firēt cuire viue les pattes contre-mont sous les cendres chaudes, & m'en firent manger les œufs gros & iaunes cōme le moyeu d'vn œuf de poulle, sa chair sembloit veau, mais i'eusse esté fort ayse de m'en priuer, pluſtoſt que de voir enſeuclir dans les brasiers ardās, cette pauvre beste en vie, qu'ils accommoderent de la sorte, peut estre, en sacrifice, car comme i'ay dit ailleurs ils en ont quelque espee.

Forest de pins.

Ce lieu estoit fort plaisant & agreable, accommodé d'vn tres-beau bois de gros pins fort

hauts droits & presque d'une egale grosseur & hauteur, sans melleange d'aucun autre bois que de pins, net & vuide de brossailles & halliers, de sorte qu'il sembloit estre l'œuvre & le travail d'un excellent jardinier.

Auant partir de là, nos Sauvages y affichèrent les armoiries du bourg de S. Ioseph autrement Quicunonascaran; car chacun bourg ou village des Hurons a ses armoiries particulieres, qu'ils affichent sur les chemins faisans voyages, lors qu'ils veulent qu'on sçache qu'ils ont passé celle part, ou pour autre raison qu'ils ne m'ont point fait sçavoir.

Affichent
leurs armoi-
ries en che-
min.

Les armoiries de S. Ioseph, furent depeintes sur un morceau d'escorce de bouleau, de la grandeur d'une feuille de papier, où il y auoit un canot grossierement crayonné avec autant de traits noirs tirez dedans, comme ils estoient d'hommes, & pour marque que j'estois en leur compagnie, ils auoient grossierement depeint un homme au dessus des traits du milieu, & me dirent qu'ils faisoient ce personnage ainsi haut esleué par dessus les autres, pour donner à entendre aux passans, qu'ils auoient un Capitaine François avec eux (car ainsi m'appelloient ils) & au bas de l'escorce pendoit un morceau de bois sec, d'environ demy pied de longueur, & gros comme trois doigts, attaché d'un brin d'escorce, puis ils pendirent cette armoirie au bout d'une perche fichée en terre, un peu penchante sur le chemin.

Toute cette ceremonie estant acheuée, nous partimes avec nostre nouveau canot, & por-

Nostre ca-
not percé.

tames encore ce iour là mesme tout nostre equipage à 6. ou 7. sauts, mais cōme nous pensâmes après descendre vn courant d'eau, nous fûmes portez si rudement contre vn rocher, qu'il fist vn trou dans nostre canot, qui le pensa couler à fond, si la diligence de nos hômes ne nous eut mis promptement à terre, où nous recoufîmes vne piece à la blessure.

Ie ne fay point icy mention de tous les hazards & dangers que nous courûmes en chemin, ny de tous les sauts où il nous fallut porter tous nos paquets par de tres-longs & fastcheux chemins, ny comme beaucoup de fois nous courûmes risque de nostre vie, & d'estre submergez dans des cheutes d'eau espouuantes, cōme a esté du depuis le bon P. Nicolas, & vn ieune garçon François nostre disciple, qui le suyuoit de près dans vn autre canot, pour ce que ces dangers & perils sont si frequents & ordinaires, qu'en les descriuans tous, ils sembleroient des redites par trop rebatues, c'est pourquoy ie me contente d'en rapporter icy quelqu'vns, & lors seulement que le suiet m'y oblige.

Le soir après vn long trauail, nous cabanâmes à l'entrée d'un saut, d'où ie fus long-temps en doute que vouloit dire vn grãd bruit accompagné d'une grande & obscure fumée qui s'éleuoit iusques à perte de veüe. Ie disois, où qu'il y auoit là vn village ou que le feu estoit dans la forest à vne lieuë de nous, mais ie me trompois en toutes les deux sortes, car ce grãd bruit & ces fumées prouenoient d'une cheute

d'eau de 25. ou 30. pieds de haut entre des rochers que nous trouuames le lendemain matin. Après ce saut, enuiron la portée d'une arquebuzade, nous rencontrames sur le bord de la mesme riuere, ce puissant rocher, duquel i'ay fait mention au chap. 30. de ce 2. liure que mes Sauuages croyoient auoir esté homme mortel cōme nous & puis metamorphosé en ceste pierre par la permission & le vouloir du Createur, à vn quart de lieuë de là, nous trouuames encore vne terre fort haute, entremeslée de rochers, plate & vnie au dessus & qui seruoit comme d'une haute muraille à ceste riuere Algoumequine.

Ce fut icy où mes gens pour ne me pouoir persuader que ceste montagne eut vn esprit viuât dans ses entrailles, qui la regit & gouverne m'en monstrent vn visage assez austere contre leur ordinaire : après nous portasmes encore tout nostre equipage à 3. ou 4. sauts, au dernier desquels nous nous arrestames vn peu à couuert sous des arbres pendant vn grand orage, qui nous auoit desja percé de toutes parts iusques aux os, puis après auoir encore passé vn grād saut où le canot fut en partie porté & en partie traîné, fusmes cabaner sur vne pointe de terre haute esleuée entre la riuere qui vient du Saguenay, & va à Kebec, & celle-cy qui se rendoit & perdoit dedans tout de trauers.

Les Hurons descendent iusqu'icy pour aller au Saguenay, & vont contre-mōt l'eau, & neantmoins la riuere du Saguenay, qui entre dās

la grâd riuiera de S. Laurens à Tadoussac, à son fil & courât tout contraire, tellement qu'il faut nécessairement que ce soient deux riuieres distinctes, & non vne seule, puis que toutes deux se rendent & se perdent dans le mesme fleuve S. Laurens, il est vray qu'il y a de la distâce d'un lieu à l'autre près de 200. lieues, c'est pourquoy ie n'assure nullemēt de riē, puis mesmes que nous changeames si souuent de chemin, allans & reuenâs des Hurôs à Kebec, que cela m'a fait perdre l'entiere certitude & la vraye cognoissance du droit chemin & de la situatiō des lieux, autremēt ie l'aurois mieux obseruée.

Nous laissâmes le chemin de main gauche qui conduit en la Prouince du Saguenay, & prîmes celuy qui est à droite pour Kebec, mais il me resouuiēt encore de l'estonnement admirable que cauōit en nos yeux ce meslange de riuieres, car nous fîmes plus de 6/ ou 7. lieues de chemin, que ie ne pouuois encore sortir de l'opinion (ce qui ne pouuoit estre) que nous allions contre mont-l'eau, & ce qui me mit en cet erreur, fut la grande difficulté que nous eumes à doubler la pointe, & que le long de la riuiera iusqu'au saut, l'eau se souleuoit, s'enflait, tournoyōit & bouillōnoit par tout cōme vne chaudiere sur vn grand feu, puis des raports & traînées d'eau qui nous venoient à la rencōtre vn fort long espace de temps, & avec tant de vitesse, que si nous n'eussions esté habiles de nous en destourner avec la mesme prōptitude, nous estiōs pour nous y perdre & submerger. Je demanday à mes Sauvages que c'estoit, &

d'où cela pouuoit procéder, ils me respondirent que c'estoit vn œuvre du diable ou le diable mesme.

Approchans du saut, en vntres-mauuais & dangereux endroit, nous receumes des grands coups de vagues dans nostre canot, & encor en danger de pis, si les Sauuages n'eussent esté stilez & habiles à la conduite d'iceluy, pour leur particulier ils se soucioiēt assez peu d'estre mouillez, car ils n'auoient point d'habits sur le dos qui les empeschat de dormir à sec, mais pour moy cela m'estoit vn peu plus incommode, & craignois fort pour nos liures particulièrement, mais cette crainte ne m'empeschoit pas d'estre bien mouillé, & de me leuer le matin sans estre seiché.

Mareste & bourbiers fort dangereux.

Nous nous trouuâmes vn iour bien empesché dans des grands bourbiers, & profondes fanges, approchant d'un lac, où il nous fallut passer avec des peines nonpareilles, & si subtilement & legerement du pied, que nous pensions à toute heure enfoncer iusques par dessus la teste au profond du lac, qui portoit en partie cette grande estendue de terre noire & fangeuse : car en effet tout trembloit sous nous.

Malice des Sauuages de l'Isle.

De là nous allâmes prendre nostre giste en vne ancre de terre, où desia estoient cabanez depuis quatre iours vn bon vieillard Huron, avec deux ieunes garçons, qui estoient là attendans compagnie, pour passer à la traite par le pays de Honqueronons; car

ils n'y osoient passer seuls, pour ce que ce peuple est malicieux iusques là, que de ne laisser passer par leurs terres au temps de la traite, vn ou deux canots seulement, mais veulent qu'ils s'attendent l'vn l'autre, & passent tous à la fois, pour auoir leurs bleds & farines à meilleur prix, qui leur contraignent de traiter pour des pelletteries.

Me disent
Maistre Ca-
pitaine des
canots,

Le lendemain matin arriuerent encor deux autres canots Hurons, qui cabanerent aupres de nous; mais pour cela personne n'osoit encore se hasarder de passer peur d'vn affront. A la fin mes hommes qui n'estoient pas en resolution de faire là vn si long sejour, me supplierent d'accepter la charge de Capitaine de leurs canots, & d'auouer pour miennes toutes leurs marchandises, bleds & farines, ce que ie fis par charité, & pour leur conseruation, car sans cette inuention ils n'eussent pas ozé passer, & passants ils eussent peut-estre esté aussi maltraitez de ce peuple superbe, que deux autres canots Hurons qui n'estoient point de nostre bande, & voulurent tenter la fortune, contre nostre aduis, mais à leur despens, car leurs marchandises leur furent ostées, & en partie vollées, & le reste payé à vil prix.

*Des Honqueronons ou Sauvages de l'Isle,
& de leur humear, & d'un lac couuert
de papillons.*

CHAPITRE VIII.

NOus partismes donc de cette ancre de terre, mais ayans à peine aduancé vne demie heure de chemin, nous apperceumes deux cabanes que nous creumes estre de l'Isle, dressées en vn cul de sac, en lieu eminent, d'où on pouuoit descourrir de loing tous ceux qui entroient dans leurs terres. Mes Sauvages les voyans eurent opinion que c'estoient sentinelles posées, pour leur en empêcher le passage, & qu'il estoit necessaire de les aller recognoistre, & sçauoir d'eux si c'estoit à nous à qui ils en vouloient, & là dessus me prierent de me cacher dans le canot, afin que n'estant apperceu d'eux, ie peusse estre tesmoin auriculaire de leur discourtoisie & dispute, pour leur en faire apres vne reprimande, & m'eils n'auroient garde car disoient-ils, s'ils vous apperceuoient auant de nous parler, ils n'auroient garde de nous gourmander, & par ainsi vous seriez en doute de leur malice, & de nostre iuste apprehension.

Nous approchames de ces deux cabanes

en la posture qu'ils desirerent, & leur par-
lames vn assez long-temps, mais ces pauvre
gens ne songeoient à rien moins qu'à nous
& ne s'estoient là cabanez que pour la pes-
che, & la chasse, à quoy ils s'occupoient
pour viure, & par ainsi nous reprismes
promptement nostre routte, & allames pas-
ser par vn lac assez grand, & de là par la ri-
uiere qui conduit au village, laissant à main
gauche le droit chemin de Kebec, d'où on
comptoit de là, enuiron cent quatre-vingts
lieuës.

Je louë mon Dieu de toutes choses, & le
prie que ma peine & mon travail luy soient
agreables, mais il est vray que nous pensa-
mes perir ce iour là en deux tres-mauuais en-
droits proche la cheute du lac dans la riui-
ere, où l'eau par ses soudains sousleuemens,
& ses ondes inopinées, nous penserent en-
gloutir & couler à fond.

Ces perils passez, nous fumes descendre
dans vn petit bois taillis, tout couuert de
fraizes, desquelles nous fismes nostre meil-
leur repas, & reprimes nouvelles forces
pour passer iusques à nos Quieunontatero-
nons, où nous arriuames ce iour là mesme,
apres auoir faict vingt lieuës & plus de
chemin.

Sauuages de
l'Isle.

Ce village estoit placé sur le bord de la ri-
uiere dans vne belle pleine, d'où nous fumes
apperceus à plus d'vne lieuë du port, où
presque tous les Sauuages se rendirent avec
de grandes huées, & des bruits qui nous

estourdissoient, car on n'entendoit par tout qu'une voix, ou par complimens, ou pour se moquer de nous, qui nous rengions à leur mercy, ie croy neantmoins le premier par une raison qu'ils esperoient profiter de nos viures, car à mesme temps que nous eumes mis pied à terre, ils sauterent dans nostre canot, & se saisirent de nos bleds, & farines, pour les eschanger à leur deuotion, contre des pelleteries qu'ils ont à foison, mais comme la charité bien ordonnée commence à soy-mesme, sçachans que nos viures nous faisoient besoin, i'y mis le hola, (car mes gens n'osoient dire mot,) & par ce moyen tout nous fut conserué, & porté au lieu que choisimes pour cabaner, vn petit iet de pierre esloigné du village, pour cuiten leurs trop frequentes visites.

Il ne faut point douter neantmoins, que ces Honqueronons ne vissent bien (comme ils nous en firent quelque reproches) que les bleds & farines n'estoient point à moy, & que ce que ie m'en disois le maistre, estoit de l'inuention de mes gens qui m'en auoient prié, pour les cōseruer, & s'exempter de leur violence & importunité, mais il leur fallut auoir patience, & mortifier leur sentiment, car ils n'osoient m'attaquer, ou me faire du desplaisir, peur du retour à la traite de Kebec, où ils ont accoustumé d'aller tous les ans faire leur emploie, & rapporter des marchandises.

Ce peuple est (à mon aduis) le plus reue-

Sauvage de
l'Isle peu
cortois, &
braues.

che, le plus superbe, & le moins courtois de
tous ceux que j'ay iamais conuersé en toutes
les terres du Canada, du moins me la-il sem-
blé, pour le peu que ie les aye pratiqué, mais
aussi est il le mieux couuerte, le mieux marta-
chié, & le plus iolinement paré de tous, côme
si à la brauerie estoit inseparablemēt atachée
la superbe, & la vanité, côme nous voyons
en quelque parens de nos Religieux, les-
quels semblent auoir honte de s'aduouër
pour tels, pour les voir pauurement habil-
lez, mal traitez, mesprizez des gens de neant,
crottez, mal chaussez, & mandier par les
ruës avec la besace, comme pauvres de Iesus-
Christ. O siecle peruertty, ô vanité deplora-
ble, vous mesprizez ceux qui ont choisi la
basseſſe pour l'amour de Iesus-Christ, mais
ce sera à vostre confusion, car ils seront vn
iour vos Iuges & candamneront vostre mes-
pris, car pourquoy en faites vous moins
d'estat que s'ils estoient ſeculiers.

Les ieunes femmes, & filles sembloient des
Nymphes, tant elles estoient bien aiustées,
& des Comediennes, tant elles estoient le-
geres du piéd, vous les voyez la teste leuée
par le village, couuertes de marta-chias, sau-
ter, courir, & se reſiouir plaisamment, com-
me si elles euſſent esté aſſeurées d'une eter-
nelle felicité, ainſi au vray dire ellen'ont pas
peur d'un Enfer, ny de perdre un Paradis,
qu'elles ayent quelque chose à manger, les
voyla contentes, si elles n'ont rien elles ont
la patience.

Nous passames tout le reste du iour dans nostre cabane, & encore le suiuant, pour la venue du Truchement Bruslé, puis nous trouuames bagage dès le lendemain matin, car nous mourrions là de faim sans pouuoir obtenir vn seul morceau de poisson qu'à prix desraisonnable, peut estre par vn ressentiment de ne leur auoir laissé nos bleds & farines à l'abandon, comme ils s'estoient promis. Ils ne laissoient pourtant de nous venir voir en nostre cabane, mais plustost pour nous obseruer que pour s'instruire de leur salut, & nous faire offre de leur seruice.

Au partir de ce village, nous allames cabaner en vn lieu tres-propre pour la pesche, d'où nous eumes du poisson de diuerses especes plus que suffisamment pour tout ce iour là; nous en fismes de rostis, & du bouillis, sans autre sauce que du bon appetit, mais mes gens qui n'escailloient point celuy qu'ils demandoient dans le broüet, non plus que celuy qui se mangeoit en autre façon (telle estant leur coustume) estoit la cause qu'à chaque cueillerée de sagamité qu'on prenoit, il en falloit cracher vne partie dehors, & pour vne autre inciuilité, s'ils auoient vn morceau de viande à deminsier, ils se seruoient de leur pieds crottez pour la tenir, & d'vn meschant cousteau pour la couper.

Les grands orages qu'il fit ce iour là, & qui durerent iusques au lendemain matin, nous

Mangeas-
mes vn chié firent loger fort incommodement dans vn
marais, ou d'auanture nous trouuames vn
chien égaré, que mes Sauvages prirent, &
tuerent à coups de haches, puis le firent
bouillir pour nostre soupper. Comme au
chefils me presenteren la teste, mais ie vous
asseure que sa grand'gueule beantie la rédoit
si hideuse, & de mauuaise grace, que ie n'eus
pas assez de courage pour en manger, & me
contentay d'vn morceau de la cuisse, que ie
trouuay tres-bonne.

Ces bons Sauvages me desnichioient par
fois des aigles, mais comme ce sont oyseaux
tres-lourds, quand i'estois las de les porter,
nous en faisons chaudieres, & nous seruoient
de pitance, excepté d'une qu'ils ne voulurent
point manger, ie ne sçay par qu'elle superstition,
car comme i'estois occupé hors
de la cabane avec quelque Sauvages, ils luy
rordirent le col pour auoir ses cousteaux, &
la ietterent au loing, me donnant à entendre
qu'elle estoit morte d'elle mesme, & qu'ils n'y
auoient pas cooperé, ce que ie ne pû croire,
& pour preuue ie leur monstray le col rompu,
& neantmoins ils n'en voulurent iamais
manger, ny prendre la peine de la faire
cuire, peut-estre pour auoir esté estouffée.

Le iour ensuiuant, apres auoir tout porté
à cinq ou six sauts, & passé par des lieux
tres-perilleux, nous primes giste en vn petit
hameau d'Algoumequins, sur le bord de la
riuere, qui a en cet endroit plus d'une bonne
lieue de large, ie fus visiter tout ce peu de
cabanes

cabanes qu'il y auoit là, faites en rond, & desquelles l'entrée estoit fort estroite, bouchée d'une petite peau d'ellan, mais si pauvres au dedans, qu'elles me sembloient voir les hermitages des anciens Peres hermites de la Thebayde, selon qu'on les despeint.

Le lieu estoit aussi pauvre & sterile comme les maisons, car ce n'estoit qu'un rocher couuert d'un peu de sable par endroits, & de quelque petits arbrisseaux qui seruoient de retraite aux oyseaux, ie fus par tout chercher des fraizes, & des bluets, mais tout estoit desia dissipé, car comme ces petits fructs seruent de manne aux Algomequins, ils les amassent soigneusement pour en faire seiche-rie. Le Truchement Brulé qui nous suiuoit de prés, nous y vint trouuer & s'y logea, mais aussi incommodement que nous.

Le matin venu nous batimes aux champs sans tambour, car il n'y auoit point de plaisir en lieu si miserable, & vismes enuiron midy deux Arcs-en Ciel, fort visibles & apparens, qui tenoient deuant nous les deux bords du fleue, comme deux arcades, sous lesquelles il sembloit à tout moment que deus- sions passer. Il y a eu de certains peuples qui l'ont eu en telle veneration: Que s'ils le voyoient paroistre en l'air, ils fermoient la bouche aussi-tost, & y portoient la main deuant, pour ce qu'ils s'imaginoient que s'ils l'ouuroient tant soit peu, leurs dents en seroient pourries & gastées. Je n'ay point veu pratiquer cette sortile entre nos Hurons,

Arce en Ciel,

mais ils en croient bien d'autres, qui ne valent guère mieux.

Le soir arriué, mes Sauvages mangerent vn aigle, de laquelle ie ne mangeay pas seulement du botillon, & encor moins de la chair, car il estoit iour de Vendredy, ces pauvres gens m'en demanderent la raison, car ils sçauoient bien ma necessité, & le peu que nous auions pris le matin auant partir, & ayant sceu que ie le faisois pour l'amour du bon Iesus, ils en resterent fort edifiez & contens, car comme ils sont exactes obseruateurs de leurs ceremonies, ils trouuoient aussi tres-bon que nous fissions selon nostre croyance, & eussent trouué mauuais qu'eussions fait du contraire pour aucun respect.

Grand nombre de papillons.

Si tost qu'il commença à faire iour nous nous mismes sur l'eau, couuertes par tout d'un nombre presque infiny de papillons, en l'estenduë de plus de trois heures de chemin, & la riuere qui sembloit vn lac en cette espace, large de plus de demye lieuë estoit de mesme par tout couuerte de ces petits animaux, de sorte que i'eusse auparavant douté, s'il y en auroit bien eu autant en tout le reste du Canada, comme il s'y en estoit noyé dans cette seule riuere. De dire quel vent les auoit là amenez, & comme il s'y en est pû trouuer vn si grand nombre en vn seul endroit, c'est ce que ie sçay moins que des mosquitoes, & couïns, qui sont engendrez de la pourriture des bois.

Passé cette mer de papillons, nous trou-
uames vne cheute d'eau dans laquelle vn
François nommélà Montagne, pensa tom-
ber avec tous ses Sauvages, d'où ils ne se fus-
sent iamais retirez que morts & brisez des
rochers. Leur imprudence les auoit mis dans
ce danger, pour n'auoir pas assez tost pris
terre, & s'ils ne se fussent promptement iet-
tez dans l'eau, le courant les iettoit infailli-
blement dans le precipice, & de là à la mort;
qu'estoit la fin de leur voyage.

vn François
pensa tom-
ber dans vn
saut.

*du saut de la chaudiere, de la petite Na-
tion, & de la difficulté que nous en-
mes avec les Algonmequins, & Mon-
tagnais, du tresor publicque des Hurons,
& la suite de nostre voyage iusques à
Kebec.*

CHAPITRE IX.

Nous auons cy deuant fait mention de
plustieurs cheutes d'eau, & de quantité
de sauts tres-dangereux, mais en comparai-
son de tous ceux-là, celuy de la chaudiere,
que nous trouuames demie heure de che-
min apres celuy de la montagne est le plus
admirable, & le plus perilleux de tous: Car
outre le grand bruit que cause sa cheute de

Saut de la
chaudiere.

plus de sept ou huit brasses de haut entre des rochers, qui se fait entendre de plus de deux lieux loin, il est large d'un grand quart de lieue, trauersé de quantité de petites Isles, qui ne sont que rochers aspres & difficiles, couuerts en partie de méchant petits bois, le tout entrecoupé de concauites & precipices, que ces bouillons & cheutes ont fait à succession temps, & particulièrement à un certain endroit, où l'eau tombe de telle impetuosité sur un rocher au milieu de la riuere, qu'il s'y est caué un large & profond bassin: si bien que l'eau coulant là dedans circulairement, y fait de tres violans & puissans bouillons, qui enuoyent en l'air de telles fumées du poudrin de l'eau qu'elles obscurcissent par tout l'air où elles passent.

Second
bassin.

Il y a encore un autre semblable bassin ou chaudiere plus à l'autre bord de la riuere, presque aussi large, impetueux & furieux que le premier, & de mesme rend ses eaux en des grands precipices, & cheutes de plusieurs toises de haut. Les Montagnais, & Canadiens, à raison de ces deux grandes concauites qui bouillonnent, & rendent ces grandes fumées, ont donné à ce saut le nom Asticou, & les Hurons, Anod, qui veut dire chaudiere en l'une, & en l'autre langue.

Or comme ie m'amusois à contempler toutes ces cheutes & precipices pendant que mes Sauvages dechargeoient le canot,

& portoient les paquets au delà du saut, ie me prins garde que ces rochers où ie marchois sembloient tous couuerts de petits limas de pierre, & n'en peux donner autre raison, sinon que c'est, ou de la nature de la pierre mesme, ou que le poudrin de l'eau qui donne iusques là dessus, peut auoir causé tous ces effects, ou comme il y a quelque apparence, qu'une quantité de limas estans venus là mourir, (comme cette infinie multitude de papillons que ie vis noyez dans la riuere) se soient conuertis en pierre, par le continuel arrousement de la fraicheur, ou froideur de ce poudrin, & ce qui m'en donne quelque croyance est, d'auoir veu & manié autrefois des poires, & vn morceau de pain conuertis en pierre, ce qui ne se peut neantmoins qu'avec une grande longueur de temps, & en des lieux particulieres & fraiz, comme sont les quarrieres, où les poires, & le pain auoient esté metamorphosez, au rapport du Mathematicien du Roy, qui me les fit voir enuiron l'an 1604.

Ce fut aussi en ces contrées où ie trouuay des plantes de lys incarnats, ils n'auoient que deux fleurs au coupeau de chacune tige, mais elles estoient rauissantes, de plus curieux que moy en eussent apporté en France, mais ie me contentay de louer Dieu en les admirans, & de les laisser pour l'amour du mesme Dieu.

Mes Sauvages arriuaus à ce saut, me firent

Ceremonie
des Hurons
au saut de la
chaudiere.

point les ceremonies ordinaires, ou pour
voir trop de haste, ou à raison que ie les auo
repris de semblables superstitions, lesquelles
sont telles, selon que nous l'auons appris d
sieur Champlain. Après que les Hurons, &
Sauuages ont porté tous leurs paquets, &
les canots au bas du saut, ils s'assemblent e
vn lieu, où vn d'eux avec vn plat de bo
va fait la queste, & chacun d'eux met dar
ce plat vn morceau de petun. La queste faite
le plat est mis au milieu de la troupe, & tou
dancent à l'entour en chantans à leur mode
puis vn des Capitaines fait vne harangue, &
monstrant que des long-temps ils ont accou
stumé de faire vne telle offrande, & que par
moyen ils sont garantis de leurs ennemis, qu
les attendent souuent au passage, & qu'autre
ment il leur arriueroit du desplaisir.

Cela fait le harangueur prend le plat, &
va ietter le petun au milieu de la chaudiere
du dessus les rochers, puis tous d'une voix
font vn grand cry & acclamation, en finis
sant la ceremonie.

Cheute
d'eau admi
rable.

A vne petite lieuë de là, nous passame
à main droite deuant vn autre saut, o
cheute d'eau admirable, d'une riuere qu
vient du costé du Sud, laquelle tombe d'vn
telle impetuosité de 10. ou 25. brasses de hau
dans la grand riuere où nous estions, qu'e
le fait deux arcades, qui ont de largeu
prés de deux ou trois cens pas. Les ieune
hommes Sauuages se donnent quelque
fois le plaisir de passer avec leurs canot

par dessous la plus large, & ne se mouillent que du poudrin de l'eau, mais ie vous asseure qu'ils font en cela vn acte de grand folie & temerité, pour le danger qu'il y a assez eminent : & puis à quel propos s'exposer sans profit, dans vn suiet qui leur peut causer vn iuste repentir, & attirer sur eux la risée & moquerie de tous les autres.

Autrefois les Hiroquois venoient iusques là surprendre nos Hurons, allans à la traite, mais à present ils ont comme desfilé d'y plus aller, iusques en l'an 1632. qu'ils firent des courses iusques à Kebec, pensans surprendre de nos François, & Montagnais au despourueu, & l'année suivante le second iour de Iuin, furent aux trois riuieres, où ils tuerent deux François à coups de haches, & en blessèrent cinq autres à coups de fleches dont l'vn mourut bieu tost apres. Ils eurent bien la hardiesse d'aborder encore la chalouppe avec leurs canots, & sans qu'un François les coucha en iouë avec son harquebuzé, où il ny auoit ny balle, ny poudre, il est croyable que pas vn n'en fut eschappé, & qu'ils se fussent rendus maistres de la chalouppe, & de tout l'equipage des François.

Hiroquois
tuent trois
François.

Le sieur Goua qui commandoit à la barque à demye lieuë delà, ayant ouy les cris du combat, despescha aussi-tost vne chalouppe au secours, & luy mesme suiuit apres avec sa barque, mais trop tard, car quand ils arriuerent là, les Hiroquois auoient desia fait leur coup,

Le sieur
Goua au se-
cours des
François.

& faisoient leur retraite dedans les bois, où aucun François n'eust ozé les suivre pour aucun commandement de leur Chef, s'excusant sur le danger trop eminent, & par ainsi ces Hiroquois nous ayans braué & battus iusques dans nos terres, s'en retournerent glorieux avec les testes des meurtris.

On peut admirer en cecy la hardiesse de ces Sauvages, d'auoir ozé, sans crainte des espèces ny des mousquets, traueser tant de pays, & de forests, & attaquer de nos François es contrées de l'habitation, sans que iamais on en aye pû tirer de reuanche, & puisily en a qui veulent dire qu'ayans leur harquebuzee chargée, ils tiendroient teste à dix Sauvages, ce seroit bien assez à deux bien deliberez, car ils sont prompts de l'œil, & du pied pour s'esquiuier, & grandement adroits du bras pour vous tirer, & puis gard les surprises.

Mes Hurons à tout euenement se tindrent tousiours sur leur garde, peur de surprise, & s'allèrent cabaner hors du danger, & comme nous souffrimes les grandes ardeurs du Soleil pendant le iour, il nous fallut de mesme endurer les orages, les grands bruits du tonnerre, & les pluyes continuelles pendant la nuit, iusques au lendemain matin qu'elle nous perça iusques aux os.

Qui fut alors bien empesché de sa contenance ce fut moy, car ie ne scauois mesme comment me gouverner dans nostre habitement, qui m'estoit fort lourd, & froid sur

les espaules où il fut deux iours à seicher, dont ie m'estonne que ie n'en tombé malade, mais Dieu tres-bon me fortifioit tousiours au plus fort de mes peines & labeurs.

Vn surcroy d'affliction nous arriua dans nos incommoditez de deux Algoumequins, lesquels nous estans venus voir après la pluye passée, nous firent croire du moins à mes gens, que la flotte François estoit perie en mer, & que c'estoit perdre temps de vouloir passer outre, mes Hurons furent viuement touchez de cette mauuaise nouuelle & moy d'abord avec eux, mais ayant vn peu ruminé à par moy & considéré ce qui en pouuoit estre, ie me doutay incontinent de la malice des Algoumequins, qui auoient controuué ce menfonge pour nous faire rebrousser chemin & en suite persuader à tous nos Hurons de n'aller point à la traicte, pour en auoir eux mesmes tout le profit, ce que ie fis sçauoir à mes gens qui reprirent courage, & continuerent leur voyage, avec esperance de bon succès.

Faux rapport d'un Algoumequin.

De là nous allames cabaner à la petite Nation, que nos Hurons appellent Quieunontanon. petite Nation. teronons, où nous eumes à peine pris terre, & dressé nostre cabane, que les deputez du village nous vindrent visiter, & supplierent nos gens d'effuyer les larmes de 25. ou 30. pauures femmes veufues, qui auoient perdu leur marys l'Hyuer passé; les vns par la faim, & les autres de diuerfes maladies.

Voyant mes hommes vn peu trop retenus à faire plaisir à ces estrangers, ie les priay de ne

Font des
presens aux
vefues,

les point esconduire & que tout ne consistoit qu'à quelque petit present qu'il falloit faire ces pauvres vefues, comme il se pratiquoit mesme entr'eux pour semblables occasions. Ils en firent en effect leur petit deuoir & leur donnerent vne quantité de bled d'Inde & de farine, qui les resiouyt fort, & en fus moy mesme bien ayse, tant elles me faisoient compassion & puis c'est vne Nation si honneste, douce & accommodante d'humeur, que ie m'en trouuay fort edifié & satisfait.

Ce fut icy où ie trouuay dans les bois, à vn petit quart de lieuë du village, ce pauvre Sauvage malade, enfermé dans vne cabane ronde, couché de son long aupres d'vn petit feu, duquel i'ay faict mention cy deuant au chapitre des malades.

Present
d'vn rat
musqué,

Me promenant par le village de cabane en cabane pour mon diuertissement, vn ieune garçon me fit present d'vn petit rat musqué, pour lequel ie luy donnay en eschange vn autre petit present, duquel il fist autant d'estat, que moy de ce petit animal.

Nouveau
doute,

Le Truchement Bruslé, qui s'estoit la venu cabaner avec nous, traicta vn chien, duquel nous fismes festin le lendemain matin en compagnie de quelque François, puis nous partimes encores dans de nouueaux doutes de la perte des Nauirés de France, que les Algoumequins nous asseuroient indubitable, côme en effect il y auoit pour lors quelque apparéce en ce qu'ils tardoient à venir beaucoup plus qu'à l'ordinaire, ie tenois neantmoins tous-

jours bonne mine à mes gens & les assureois du contraire pour qu'ils s'en retournassent, comme ils en faisoient souuent le semblant.

Passans au saut S. Louys, long d'une bonne lieue & tres-furieux en plusieurs endroits, *Saut saint Louys.* mes Sauvages ne voulurent pas tousiours tenir la terre, comme on a accoustumé, mais aux

endroits moins dangereux, ils remettoient leur canot dans l'eau, où nostre Seigneur me preserua d'un precipice & cheute d'eau, où ie m'en allois tomber infailliblement: car comme mes Sauvages en des eaux basses conduisoient le canot à la main, estant moy seul dedans, pour ce que ie ne les pouuois suiure dans les eaux à cause de mon habit, ny par terre où les riuies estoient trop hautes & embarassées de bois & de rochers, la violence du courant leur ayant fait échapper des mains, ie me iettay fort à propos (aydé de Dieu) sur vn petit rocher en passant, puis en mesme temps le canot tomba par vne cheute d'eau dans vn precipice, parmy les bouillons & les rochers d'où ils le retirerent fort blessé avec la longue corde que (preuoyant le danger) ils y auoient attachée, & après ils le racommoderent avec des pieces d'escorces qu'ils chercherent dans le bois & me vindrent requerir sur mon rocher. *Je pensay petit.*

Depuis nous souffrimes encores plusieurs petites disgraces & des coups d'eau dans nostre canot, avec des grandes, hautes & perilleuses éléuations, qui faisoient dancier, hausser & baisser nostre vaisseau d'une merueilleuse façon, pendant que ie m'y tenois couché & ra-

courcy, pour ne point empêcher mes Saunages de bien gouverner, & voir de quel bord ils deuoient prendre.

De là nous allames cabaner assez incommo-
dement dans vne sapiniere au pied dudit saut,
d'où nous partimes le lendemain matin, en-
core tout mouille & cōtinuames nostre che-
min entre deux Isles, par le lac dans lequel se
descharge ledit saut, & de ce lac par la riuie-
re des prairies, autrement des Algoumequins,
d'où il y a iusqu'au lac des Bisserrinys, plus de
80. sauts. 80. sauts à passer tant grands que petits, dont
les vns sont tres-dangereux principalement à
descendre, car à monter cela ne se peut, sinon
à bien peu, par le moyen d'vne corde, attachée
au canot.

Arriuames
au Cap de
victoire.

Difficulté
avec les Ca-
nadiens.

Nous auions esté fort mal couchez la nuit
passée, mais nous ne fumes pas mieux la sui-
uante, car il nous la fallut passer à deux lieus
du Cap de victoire, sous vn arbre bien peu à
couuerts des pluyes, qui durerent iusques au
lendemain matin, que nous nous rendimes
audit Cap, où des-jà estoit arriué depuis deux
iours le truchement Bruslé, avec deux ou trois
canots Hurons, duquel i'appris la deffence
que les Montagnais & Algoumequins leur
auoient faites de passer outre, voulans à toute
force qu'ils attendissent là avec eux, les bar-
ques de la traicte, & qu'ayans pensé leur resi-
ster ils s'estoient mis en hazard d'estre tous
assommez, particulièrement luy Truchement
Bruslé, qui en auoit esté pour son sac à petun,
& craignoit encore vn autre plus mauuais

party, s'y on n'y apportoit quelque remede.

Je trouuay ce procedé fort mauuais & en fis quelque reproches à ces mutins qui me dirent pour excuses que si personne ne descendoit, les barques seroient contrainctes de les venir trouuer là, sans auoir la peine de trainer leurs femmes & leur enfans iusques à Kebec, où il n'y auoit dequoy disner pour eux. Je leur dis que i'y auois necessairement affaire, & que ie desirois d'y descendre, & que pour eux qu'ils en fissent comme ils voudroient, cette resolution ne les contenta pas beaucoup, neantmoins ils ne voulurent pas me violenter comme ils auoient fait le Truchement, mais ils trouuerent vne autre inuention plus fauorable pour intimider nos Hurons & tirer d'eux quelque petit present.

Ils firent donc semer vn faux bruit qu'ils venoient de receuoir vingt colliers de pourcelaines des Ignierhonons (ennemis mortels des Hurons) à la charge de les enuoyer aduertir à l'instant de l'arriuée desdits Hurons, pour les venir tous mettre à mort, & qu'en bref ils seroient icy.

Fourbe
plaisante
des Cana-
diens.

Nos gens vainement esponuentez de cette mauuaile nouuelle, tindrent conseil là dessus, vn peu à l'écart dans le bois où ie fus appelé avec le Truchement qui estoit d'aussi legere croyance qu'eux, & pour conclusion ils se cotizerent tous, qui de rets, qui de petun, bled, farine & autres choses, qu'ils donnerent aux Capitaines des Montagnais & Algomé-
quins, pour estre protegez contre leurs enne-

mis. Il n'y eut que mes Sauvages qui ne donnerent rien, car m'ayant demandé d'y contribuer, ie leur dis que ie ne fournissois rien pour authoriser vn mensonge, & qu'asseurement les Canadiens auoient inuenté cette fourbe pour auoir part à leur commoditez & les empescher de descendre, comme il estoit vray.

Thresor
des Hurons.

Mais puis que nous sommes à parler des presens des Sauvages, auant que passer outre, nous en dirons les particularitez, & d'où ils tirent principalement ceux qu'ils font en commun, afin qu'un chacun sçache qu'ils ne font pas tout a fait denuez de police.

En toutes les villes, bourgs & villages de nos Hurons, ils font vn certain amas de colliers de pourceleine, rascades, haches, couteaux, & generallyment de tout ce qu'ils gagnent & obtiennent pour le publique, soit à la guerre, traité de paix, rachapt de prisonniers, peages des Nations qui passent sur leurs terres, & par toute autre voye & maniere d'où ils ont accoustumé tirer quelque profit.

Or est-il que toutes ces choses sont mises & déposées entre les mains & en la garde del'un des Capitaines du lieu, à ce destiné, comme Thresorier de la Republique: & lors qu'il est question de faire quelque present pour le bien & salut commun de tous, ou pour s'exempter de guerre, pour la paix, ou pour autre seruice qui concerne le publique, ils assemblent le conseil, auquel, après auoir deduit la necessité yrgente qui les oblige de puiser dans le thre-

or, & arresté le nombre & les qualités des marchandises qui en doiuent estre tirées, on aduise le Thresorier de fouiller dans les coffres de l'espargne, & d'en apporter tout ce qui a esté ordonné, & s'il se trouue espuisé de finances, pour lors chacun se cottise librement de ce qu'il peut, & sans violence aucune donner de ses moyens selon sa commodité & bonne volonté; iusques à la concurrence des choses nécessaires & ordonnées, qui ne manquent point d'estre trouuées.

Pour suiure le dessein que i'auois de partir du Cap de victoire pour Kebec, nonobstant la contradiction de nos Algoumequins & Montagnais, ie fis ietter nostre canot en l'eau dès le lendemain de grand matin que tout le monde dormoit encore, & n'esueillay que le Truchement pour me suiure, comme il fist au mesme instant, & fismes telle diligence, fauorisez du courant de l'eau, que nous fismes 24. lieues ce iour là, nonobstant quelques heures de pluyes, & cabanames au lieu qu'on dit estre le milieu du chemin de Kebec au Cap de victoire, où nous trouuames vne barque à laquelle on nous donna la collation; puis des poix & des prunes, pour faire chaudiere entre nos Sauvages, lesquels d'ayse, me dirent alors que i'estois vn vray Capitaine, & qu'ils ne estoient point trompez en la croyance qu'ils n'auoient tousiours eüe, ven la reuerence & le respect que me portoient tous les François, & les presens qu'ils m'auoient faits, qui estoient des poix & ces pruneaux, desquels ils firent

Partons du
Cap de vi-
ctoire.

Me disent
Capitains.

bonne expedition à l'heure du souper, ou plutôt tost dîner; car nous n'auions encor peu mangé de tout le iour, tant nous auions peu que les Canadiens nous suiussent à mauuais dessein, pour auoir passé contre leur volonté.

Le diray que le respect que les François nous ont quelquesfois tesmoigné en la présence des Sauvages, nous a de beaucoup seruy & donné de l'autorité enuers ces barbares qui sçauent faire estat de ceux que les François honorent lequel honneur redonne au merite des mesmes François.

Le lendemain dès le grand matin, nous partismes de là, & en peu d'heures trouuâmes vne autre barque, qui n'auoit encore leu l'anchre faute d'un vent fauorable, & après y auoir salué celuy qui y commandoit, avec le reste de l'equipage, & fait vn peu de collation, nous passâmes outre en diligence, pour pouuoir arriuer à Kebec ce iour là mesme, comme nous fismes avec la grace du bon Dieu.

Sur l'heure du midy mes Sauvages cachèrent sous du sable vn peu de bled d'Inde à l'ordinaire, & firent festin de farine cuite, arrosée de suif d'eslan: mais j'en mangeay tres-peu pour lors, (sous l'esperance de mieux au soir:) car comme ie ressentôis desja l'air de Kebec, ces viandes incipides & de mauuais goust, ne me sembloient si bonnes qu'auparauant, particulièrement ce suif fondu, qui sembloit proprement

ment à celuy de nos chandelles fondues, lequel seroit là mangé en guyse d'huyle ou de beure frais, & eussions esté trop heureux d'en auoir quelquefois pour nostre pauvre potage, au pais des Hurons où aucune douceur ne nous enuisegeoit sinon le contentement de l'esprit.

A vne bonne lieuë ou deux de Kebec, nous passames assez proche d'un village de Montagnais, dressé sur le bord de la riuere, dans vne sapiniere, le Capitaine duquel avec plusieurs autres de sa bande, nous vindrent à la rencontre dans un canot, & vouloient à toute force contraindre mes Sauuages de leur donner vne partie de leur bled & farine, comme estant deu (disoient ils) à leur Capitaine pour le passage & entrée dans leurs terres; mais les François qui là auoient esté enuoyez expres dans vne chalouppe pour empescher ces insolences, leur firent lascher prise, & nous donnerent liberté, tellement que mes gens n'en furent de rien incommodez que du reste de nostre sagamité du disner, laquelle ces Montagnais mangerent à pleine main toute froide, sans autre ceremonie, & la trouuerent tresbonne, comme n'en ayans pas souuent de telles.

De nostre arriuée à Kebec, & du mécontentement des Sauvages que ie les deuois quitter, leur fismes festin & donnames vn chat pour leur pays. Et puis ie m'embarquay pour la France.

CHAPITRE X.

Nostre ar-
riuée à Ke-
bec.

DEliurez de ces importuns picoueurs, nous doublames le pas pour arriuer d'heure à Kebec, où nous primes terre auec nos sept ou huit canots, après auoir esté saluez du fort de deux vollées de canon, & des sieurs de Caen & de Champlain d'une honneste reception à nostre débarquement, tous deuancez par le bon P. Ioseph, qui nous attendoit au port impatiens de ne nous voir assez-tost.

Nous fumes de compagnie dans l'habitation, où nous receumes la collation pendant laquelle ie les entretins de mon voyage & de nostre gouuernement au pais des Hurons. Après quoy ie fus voir cabaner mes hommes, puis nous partimes le P. Ioseph & moy pour nostre petit Conuent, où ie trouuay tous nos confreres en bonne santé Dieu mercy, desquels après l'action de graces rendue à nostre Seigneur, ie receu la charité & bon accueil que ma foiblesse & lassitude pouuoit esperer.

d'eux, car l'estois autant debile qu'amaigry & bruslé des ardeurs du Soleil, tousiours gay & contant en mon ame par la diuine prouidence qui me conserua dans cette humeur, pour ce que ie peinois & trauaillois pour luy & à cause de luy, du moins me sembloit il en auoir le desir & la volonté.

Aprés auoir eu quelque iours de repos & de recollection interieure ie fis mes petits ap-
 prets pour mon retour aux Hurons, car mes Sauvages auoient acheué leur traicte, mais comme tout fut prest & que ie pensay partir il me fut deliuré lettres & obediẽce de nostre P.R. Prouincial par lesquelles il me donnoit ordre de m'embarquer au plus prochain voyage pour France demeurer de communautẽ en nostre Conuent de Paris, où il desiroit se seruir de moy, dont voicy le contenu de la lettre.

Suis rap-
 pellé en
 France.

M On tres-cher Frere, salut en I. C.

I'ay receu les vostres avec ioye & contentement de vostre heureuse arriuee dans ces terres Canadiennes, d'où vous auez passé à celles des Hurons pour y employer vostre zele & la bonne volonté qu'auuez pour le salut des mescrejans; ie prie le mesme Dieu qui vous a presté son Ange pour vous y conduire, qu'il vous en ramene au plus tost en pleine santé. I'ay affaire de vostre presence par deçà, c'est pourquoy ie vous enuoye vne obediẽce en vertu de laquelle ie vous commande de reuenir au plus prochain voyage qu'il vous serapossible, non que ie doute de vostre obeis-

Lettre du
 R. P. Prou-
 uincial

sance, mais afin que personne ne pense de vous empêcher. Je vous attendray donc en nostre Conuent de Paris, où ie feray prier nostre Seigneur, pour vous qui s'ais après m'estre recommandé à vos saintes prieres.

Montres-cher Frere,

A Paris ce 9. Mars 1625.

Vostre affectionnez seruiteur
en I. C.

Frere Polycarpe du
Fay Provincial.

Il me fallut donc changer de batterie & laisser Dieu pour Dieu par l'obeissance, puis que la diuine Maiesté en auoit ainsi ordonné, car ie ne pû recevoir aucune raison pour bonne de celles qu'on m'alleguoit de ne m'en retourner point, & d'enuoyer mes excuses par escrit, veu la necessité & la croyance qu'on auoit de moy dans le pais; pour ce qu'une simple obeissance estoit plus conforme à mon humeur, que tout le bien que i'eusse pû esperer par mon travail au salut & conuersion de ce peuple sansicelle.

Perdis l'oc- En delaisant la nouvelle France, ie perdis
casion d'un aussi l'occasion d'un voyage de trois Lunes de
voyage. chemin au delà des Hurons, tirant au Su, que
i'auois promis avec mes Saunages, si tost que
nous eussions esté de retour dans le pais, pen-
dant que le Pere Nicolas eut esté decourir
quelque autre Nation du costé du Nord. Mais

Dieu admirable en toutes choses, sans la permission duquel vne seule fueille d'arbre ne peut tomber, a voulu que la chose soit autrement arriuée.

Prenant congé de mes pauvres Sauvages affligez de mon depart, ie taschay de les consoler au mieux que ie pû, & leur donnay esperance de les reuoir l'année suivante, & que le voyage que ie denois faire en France, n'estoit d'aucun mescontentement que i'eü d'eux, ny pour enuie que i'eusse de les abandonner, mais pour quelqu'autre affaire particuliere qui redonderoit à leur contentement & profit.

Prens con-
gé de mes
Hurons.

Ils furent fort aysés lors que ie leur promis de supplier les Capitaines François de bastir vne maison au dessous du saut saint Louys, pour leur abreger le chemin de la traicte & les mettre à couuert de ce costé là de leurs ennemis, qui sont tousiours aux aguets pour les surprendre au passage, & en effect ce leur est vne grandissime peine de faire tous les ans tant de chemin & courir tant de risques pour si peu de marchandises qu'ils remportent de Kebec, laquelle leur peut estre ostée avec la vie, par les Hiroquois, c'est pourquoy ie dis de rechef qu'il seroit necessaire de bastir vne habitation au saut saint Louys pour la commodité des vns & des autres, des Sauvages & des François.

Ils me prierent de me resouenir de mes promesses, & que puis que ie ne pouuois estre diuertie de ce voyage, qu'au moins ie me redisse à Kebec dans 10. ou 12. Lunes, & qu'ils ne man-

queroient pas de s'y rendre, pour me reconduire en leur païs, comme ils firent à la verité l'année d'après, ainsi qu'il me fut mandé par nos Religieux de Kebec, mais l'obedience de nos Superieurs qui m'employoit à autre chose à Paris, ne me permit pas d'y retourner, comme j'eusse bien desiré & tenu à faueur singuliere, principalement pour baptizer mon grand oncle Auoindaon & beaucoup d'autres Sauvages Hurons, qui m'en auoient tant de fois supplié, lesquels ie remettois de iour à autre pour les mieux fonder, ne pensant pas que nostre Seigneur me deut si tost tirer de là, & ramener en France.

Donnâmes
vn chat au
Capitaine.

Auant mon depart nous les conduifimes dans nostre Couuent, leur fîmes festin, d'une plaine chaudiere de poix assaisonnez d'un peu de lard, & les caressâmes à nostre possible, de quoy ils se sentoient grandement honorez, mais bien dauantage lors qu'après le repas nous leur donnâmes à chacun un petit present, & au Capitaine du canot un grand chat pour porter en son païs, present qui luy agreea tellement pour estre un animal incognu en tout le Canada, qu'il ne scauoit assez nous en remercier à son gré, voylà comme les choses rares sont estimées par tout, encores qu'en soy, elles soient de peu de valeur.

Croit vn
chat raison-
nable.

Ce bon Capitaine estimoit en ce chat un esprit raisonnable, voyoit que l'appellant, il venoit & se iouoit à qui le caressoit, il coniectura de là qu'il entendoit parfaitement bien le François & comprenoit tout ce qu'on luy di-

soit, après avoir bien admiré cet animal, il nous pria de luy dire qu'il se laissast emporter en sa Prouince & qu'il l'aymeroit comme son fils. O Gabriel qu'il aura bien de quoy faire bonne chere chez moy, dit le bon homme, tu dis qu'il ayme fort les souris & nous en auons en quantité, qu'il vienne donc librement à nous, ce disant, il pensa embrasser ce chat que nous tenions aupres de nous, mais ce meschant animal qui ne se cognoit point en ses caresses, luy jecta aussi tost ses ongles & luy fist lascher prise, plus viste qu'il ne l'auoit approché.

Ho, ho, ho, dit le bon homme, est ce comme il en vse, ongaron, otiscohat, il est rude, il est meschât, parle à luy. A la fin l'ayât mis à toute peine dans vne petite caisse d'escorce, il l'emporta entre ses bras dans son canot & luy donnoit à manger par vn petit trou du pain qu'on luy auoit donné à nostre Conuent, mais ce fust bié la pitié lors que luy pësant donner vn peu de sagamité, il s'eschapa & prit l'effort sur vn arbre d'où ils ne le purent iamais rauoir, & de le rappeler il n'y auoit personne à la maison, il n'entendoit point le Huron, ny les Hurons la maniere de le rappeler en Frâçois, & par ainsi ils furent contraincts de luy tourner le dos & le laisser sur l'arbre bien marry d'auoir fait vne telle perte & le chat bien en peine qui le nourriroit.

Le chat s'eschappe.

La naifueté de ce bon homme estoit encore considerable en ce qu'il croyoit le mesme entendemēt & la mesme raison estre au reste des animaux de l'habitation, comme au flux & re-

flus de la mer, qu'il croyoit par cet effect estre animée, entendre & auoit vne ame capable du vouloir ou non vouloir, comme vne personne raisonnable, & là dessus ie baise par cest à Dieu que ie fais à nostre pauvre Canada, lequel ie ne quitte qu'avec vn extreme regret & des- plaisir de n'y auoir achené le bien encommen- cé, & veule le Christianisme que i'auois esperé.

A Dieu au
Canada.

O mon Dieu, ie vous recommande & remets entre les mains ce pauvre peuple que nous auiez commis. Vous ne m'avez pas iugé capa- ble de vous y seruir plus lōg temps Seigneur, puis que si tost m'en avez retiré, & avez com- mandé à l'Ange tutelaire du pais, de ne point debatre de mon retour avec celuy de la Frâce, où il faut que i'accôplisse vos diuines volōtés.

Ce n'est point à moy de penetrer dans vos se- crets diuins, mais d'admirer & adorer vostre diuine prouidence & vos iugemēs souverains. Au moins ô mon Dieu, ayez pour agreable ma bonne volonté & l'affection que m'auiez donnée de vous seruir en la cōuersion des Hu- rons & d'y endurer la mort mēme pour l'a- mour de vous si telle eut esté vostre diuine vo- lōté, puis que tout ce que ie puis est d'aduōier mon impuissance & mes demerites. Et me prosternant aux pieds de vostre diuine Maie- sté, vous supplier me donner vostre benedi- ction auant que ie m'embarque, avec celle de vostre Pere celeste & du S. Esprit, qui vit & regne au siecle des siecles Amen.

Pris congé
de mes
ouïssances.

Nous primes congé de nos pauvres Freres & leur dimes à Dieu, non sans vn extreme regret de nous separer, car la multitude qui se voyoit

preste à cueillir auoit plustost besoin de nou-
ueaux ouuriers, que d'en diminuer d'vtils
comme le P Irenée, car pour moy ie ne ser-
uois que de nombre.

Nous entrames dans nostre Chapelle pour
offrir nos larmes & nos vœux à nostre Sei-
gneur, puis d'un mesme pas ayans pris congé
des François, & de mes pauures Sauvages aus-
quels nous confiasmes ce peu de commoditez
que nous enuoyons au bon P Nicolas nous
nous embarquames ledit Pere & moy pour
Tadoussac, d'où nous partimes dans le
grand Nauire pour Galpay, où nous sejour-
nâmes quelque iours, pendant lesquels nous
aprimés de quelque pescheurs de moulès,
que les Anglois nous attendoient à la man-
che avec deux grands vaisseaux de guerre
pour nous prendre au desloir.

C'estoit là vne nouuelle mauuaise à gens
malarmez, & encore moins hardis contre
des Nauires armez, nous qui n'estions que
marchands. On tint conseil de guerre pour
aduiser à ce qu'on auoit à faire, & fut iugé
expedient d'attendre l'escorte des trois au-
tres Nauires de la flotte qui se chargeoient
de moulès, avec lesquels nous fîmes voile,
& donnâmes en vain la chasse à vn Pirate
Rochelois, qui nous estoit venu recognoi-
stre passant au trauers de nostre armée.

Vn Pirate
Rochelois.

A la verité la faute que fit nostre auant gar-
de, le corps d'armée, & l'arriere-garde à la
poursuite de ce Pirate, me fist bien croire
que nous n'estions pas gens pour attaquer,
& que c'estoit assez de nous deffendre. Et

puis c'estoit vn plaisir d'entendre aupara-
uant nos guerriers de vouloir aller attaquer
vinze Nauires basques vers Mi'cou, & de là
s'aller sifir des Nauires Espagnols le long
des Isles Astôres. Dieu sçait qu'elle proieſte
nous euſſions faite. n'ayans pû prendre vn
forban de 60. tonneaux, qui nous estoit ve-
nu brauer iusques chez nous.

Le Capitai-
ne Canané
pris des
Turcs,

Approchans de la Manche, l'on ietta la
sonde, & ayant trouué fond à 90. brasses,
le Pilote Cananée eut ordre d'aller à Bor-
deaux avec vne patache de 50. tonneaux, la-
quelle fut prise des Turcs le long de la coste
de Bretagne, & les hommes fais esclauens
comme i'ay dit au Chapitre 4. du premier

Donnâmes
dans la ter-
re d'Angle-
terre,

liure.
Deux ou trois iours après il s'esleua vne
brune si obscure & fauorable pour nous,
qu'ayans à cause d'icelle, perdu nostre rou-
te, & donné iusques dans la terre d'Angle-
terre vers le cap appelé Tourbery, nous es-
quiuâmes par ce moyen la rencontre de ces
Pirates Anglois, naturelle ment ennemis
des François.

Nous voylà donc asseurez de ce costé là,
nous en rendent grâces à Dieu, & prient pour
le bon succès du voyage, car iusques à ce que
l'on soit à terre il ne se faut vanter de rien. Je
louie en cela ce qu'on m'a dit des Espagnols,
qu'ils ne mettent iamais aucun Nauire en
mer pour des voyages de long cours, qu'il
n'y ait tousiours quelque bons Peres, ou Re-
ligieux dedans, car quand ils ny seruiroient
d'autre chose que d'empescher les mauuais

discours, ce seroit tousiours beaucoup. Je diray ce mot à la louange des Mariniers qui nous ont conduits qu'à la reserve de quelque parpaillots, tout le reste nous a fort edifié iusques aux Chefs, desquels si les discours n'ont pas tousiours esté serieux & necessaires, ils ont esté indifferents, & non impertinents, comme vous pourrez remarquer au Chapitre suiuant, apres que ie vous auray asseuré que le sceau du R. P. Commissaire de cette mission du Canada (que i'ay oublié de mettre en son lieu) porte vn saint Louys Roy de France, & vn saint François, le champ tout parsemé de lys, autour il y a escrit, *Sigillum R. P. Commissary Fratrum Minorum Recollectorum Canadensium.*

Sceau des
Peres Re
collects du
Canada.

De diuers entretiens de nos Mariniers pendant nostre trauesse.

CHAPITRE XI.

CE me seroit chose impossible de pouoir rapporter icy en detail tous les discours, & les diuerses demandes de nos Mariniers, car comme l'oisiuete regne puissamment sur les Nauires, aussi y agissent ils ardamment pour charmer leurs ennuy: l'a-uois tout suiet de me contenter du sieur du Pont nostre Vice-admiral, & des officiers de son bord, quoy qu'en partie de contraire Religion, pour-ce que ne faisant aucun mal

à personne, aucun ne nous vouloit de des-
plaisir, & s'abstenôient mesme à nostre con-
sideration, de beaucoup de vains discours
ordinaires à gens de marine.

À l'issuë des repas si autre chose ne les oc-
cupoit, les questions rouloient sur le tapis,
ou plustost sur le tillac, car les tapis n'ont
point là de lieu, & falloit excuser le tout,
car la paix n'en a iamais esté interrompue,
ny nos discours alterez, & pour ce qu'en
matiere d'entretien il se faut rendre capable
de tout, ou fausser compagnie, & de de-
meurer muet il ne seroit pas tousiours possi-
ble, pour ce que l'homme est d'une telle na-
ture, que s'il n'a sa consolation en Dieu, il la
cherche aux creatures.

Le sieur du Pont comme Chef, fut le pre-
mier qui nous interrogea, car comme il
estoit d'un naturel complaisant & iouial, il
auoit tousiours le petit mot en bouche pour
rire. D'où vient le proverbe qui dit: l'Af-
rique n'apporte elle rien de nouveau?

Il ne luy respondit autre chose sinon auoir
leu que cela procedoit de ce que pour le
grand deffaut d'eau qu'il y a, à cause des cha-
leurs excessiues, les animaux y meurent de
soif, de maniere que toutes sortes de bestes
courans pour boire se meslent ensemble, &
de là nouueaux animaux s'engendrent.

Qui a esté le premier inuenteur des cou-
riers, dit vn autre. Resp. Pirrhe Roy des
Epirotes, car comme il eut trois armées en
diuerfes parties du monde, & qu'il demeurast

assiduement en la cité de Tarente, sçauoit les nouvelles de Rome en vn iour, celles de France en deux, celles d'Allemagne en trois, & celles d'Asie en cinq.

D'où est venue la coustume de donner les estrenes, à sçauoir le don qu'on presente au commencement de l'année. Resp. Elle est venue des anciens Romains: car les Cheualiers fouloient par chacun an au premier iour de Ianuier offrir au Capitole les estrenes à Cesar Auguste, qu'oy qu'il fut absent, laquelle façon de faire est depuis venue iusques à nous.

Mais dit le Cuisinier? qui a esté l'inuenteur des masques, & momeries, lesquels mesmes sont en vsage chez les Hurons ainsi que m'auez appris. Resp. Je ne vous en puis dire autre chose, sinon auoir leu que les Corybantes prestres de la Deesse Cybele en auoient esté les inuenteurs, & s'embarbouilloient le visage avec du noir, d'où est venu ce mot masechurec, qu'on dit en Italien mascarati.

Vn parpaillot d'un humeur assez discouroise, & qui voulut donner son mot, nous demanda d'où venoit la coustume que nous autres Catholiques faisons le signe de la Croix en baillant, & donnions le salut de paix à ceux qui esternuoient.

Resp. L'an de nostre salut 619. en Italie courut vne sorte de maladie qu'en esternuant on mouroit soudain quelquefois. Ce qui donna dès lors entrée à la coustume que quand on voyoit quelqu'un commencer à

esternuer, on luy disoit, Dieu vous ayde. Le bailler estoit semblablement occasion de mort soudaine, pour remedier à quoy e baillant on commença en l'Eglise Romaine à faire le signe de la Croix sur la bouche, & delors, comme on dit, tel inconuenient cessa.

Monsieur Golia, Qui est celuy qu'on doit estimer sage. Resp. Celuy qui mesprise les biens & honneurs de ce monde, pour seruir à Iesus-Christ.

Vn bon Charpentier bien deuot: comment peut-on paruenir à cette vnion de l'ame avec Dieu. Responce. En pratiquant ces quatre mots: Moy, Toy, Esclaue, Roy. En l'Oraison s'imaginer estre seul au monde avec Dieu. Se faire esclaue & valet de tout le monde pour l'amour de Dieu. Estre Roy & dompteur de ses passions & propres affectations pour l'amour du mesme Dieu.

Combien de cœurs faut-il auoir pour acquiescer la perfection. Resp. trois. Vn cœur de fils enuers Dieu, vn cœur de mere enuers son prochain, & vn cœur de iuge enuers soy-mesme.

Qu'elle est la pensée la plus profitable à salut. Resp. Croire que tous les autres sont dignes du Paradis, & nous seuls dignes de l'Enfer, c'est à dire iuger bien d'un chacun & ne iuger mal que de soy mesme.

Vn certain. Quel est l'estat le plus noble, le plus parfait, & le plus asseuré à salut qu'il soit au monde.

Responce. Le Religieux & solitaire.

Monſieur Ioubert : par quel raiſon.

Reſp. par la meſme que Ieſus-Chriſt a dit, ſi tu veux eſtre parfait, va & vend tous tes biens, & les donne aux pauvres, & me ſuit. Sainct Laurent Juſtinian diſoit que Dieu auoit caché la grace de la Religion aux hommes, par ce que ſi tous la cognoiſſoient, tous voudroient eſtre Religieux. I aymerois mieux vne grace en la Religion, que douze au monde, diſoit le B. Frere Gille, car ma grace peut eſtre facilement conſeruée, & augmentée en la Religion par le bon exemple de mes Freres, & mes douze au monde facilement perduës par les diuers obiets & mauuais exemples qui ſ'y donnent. Nous donnons l'arbre & le fruit à Dieu, & les mondains que le ſeul fruit

Vn ieune homme vn peulibertin nous demanda par quel reigle quelqu vns tenoient qu'il y va plus de femmes en Paradis que d'hommes, veu la fragilité de leur ſexe, & vn ſi grand nombre qui ſ'adonnent au mal; Mon ſentiment fut que que la femme eſtoit plu portee à la pieté que l'homme, & moins fragile, puis qu'elle ſ'adonnoit moins au mal, & que ſ'il y en a vn grand nombre de mauuiſes, il y a vn bien plus grand nombre d'hommes vicieux

Le ſieur de la Vigne Pourquoy dit l'eſcriture, que mieux vaut l'iniquité de l'hōme, que la femme bien faiſante. Reſp. Pour ce qu'il y a plus de danger de tomber en peché en

communiquant trop familiarémēt avec vne belle femme, qu'en frequentant vn homme vicieux.

Le Pilotte. Pourquoy les Turcs gens Infideiles croyent ils les femmes bannies du Paradis. Resp. Pour ce qu'elles ne sont point circoncises. Disans que personne n'entre dans le Paradis qui ne soit circoncis. Or les femmes ne sont point circoncises entr'eux, & par cōséquent il n'y a point de Paradis pour elles. il n'en est pas de mesme des femmes des Pertes, lesquels ont trouué l'inuention de les circoncire, & leur faire esperer vn Paradis Mahometique.

Vn petit parpaillot changeant de discours dit, que c'estoit grand pitié de voir les Ecclesiastiques seculiers estre si peu portez à la pieté, & à faire du bien aux pauvres, & que parmy les personnes mariées, on y voyoit plus de charité.

Responce. Vous auez raison Monsieur, mais encores s'en trouue il vn grand nombre fort gens de bien, & qui abhorrent l'auarice, & s'adonnent à la vertu, avec vne humilité qui me fait honte à moy mesme, ie ne dis pas seulement des simples Prestres, mais des Cardinaux, Euesques, Curez, Docteurs, & Chanoines, que ie n'ozéicy nommer, dont ie prie Dieu me faire la grace d'égaler vn iour leur vertu.

Pay ven, dit vn Catholique, beaucoup de Temples des Huguenots, tant en France, qu'aux pays estrangers, mais ils sont tous

bastis

bastis de neuf. Resp. Vne Religion nouvelle ne peut auoir de Temples vieux, & ce fut la raison pour laquelle le villageois ne voulut point escouter le Ministre Huguenot, disant qu'il n'y auoit pas encor de lierre aux murailles de son Eglise, & que les nostres estoient toutes chenues de vieillesse.

Ah dit vn parpaillot, nous sommes venus de nouveau pour vous reformer? vous auez raison dit vn Mattelot, car vous mariez les Prestres, vous auez retranché les Caresmes, abbatez les Autels, & faites les Demons contre les pauvres Catholiques, quels miracles auez vous iamais faits.

Or dit vn autre laissons là les disputes de Religion, qui bien fera bien treuuer, car nous sommes asseurez que le Paradis n'est que pour les gens de bien? Mais qu'ont fait ces deux ieunes Gentilhommes qui sont là à la chaisne. R. Ils s'estoient voulu battre, dit le Contre-Maistre, & pour les mettre d'accord on les a tous deux mis à la queue, dit il en son Normand.

D'où vient dit vn certain, que nous autres François changeons si souuent de mode en nos habits; & que les Nations estrangeres sont si constantes en leur façon de s'habiller qu'on n'y voit iamais de changement. Resp. C'est qu'ils ont l'esprit plus solide que nous, ou qu'ils ont moins de curiosité. Nous le voyons mesme aux personnes sages d'entre nous lesquels se tiennent tousiours à la modestie, & n'outrepassent iamais la biensean-

ce deuë à leur condition.

Le Chirurgien qui iusques à lors auoit gardé le silence, dit qu'il s'estonnoit fort que nous razions nos barbes, estant l'ornement de l'homme.

Resp. Nostre vie doit estre conforme à celle de nostre Pere, & si vn si grand Sainct s'est conformé aux anciens, & obserué l'ordonnance de l'Eglise qui enjoint à tous les Ecclesiastiques de razer leur barbe, il ne faut point d'autre raison pour nous faire mespriser cette superfluité.

Ouy dit vn gros Matelot, & s'est il conformé aux anciens avec son bonnet pointu, comme nous voyons porter à quelques Religieux de vostre ordre. Resp. La consequence n'en est pas bonne, car il y en a qui ayent trouué bon de le porter de la sorte, n'est pas à dire que S. François l'ait porté pointu, s'est vneliberté qu'ils se sont donnée, aussi n'estoit il point rond, ains de forme quarrée à peu pres comme celuy que nous portons.

Garçon, dit Monsieur du Pont au Matelot, il n'importe pas qu'un capuce soit rond quarré, ou pointu, mais que le Religieux observe bien la regle. & pour moy j'ay quelque fois leu les Croniques de S. François, & ay tousiours aimé les Religieux de son Ordre mais à dire vray, l'obseruance qu'on dit autrement les Cordeliers, a donné vn grand nombre de Saincts à l'Eglise, & y a encore parmy eux de grands seruiteurs de Dieu, que le mode ne cognoist point, lesquels s'y per-

tribuent en bien faisant, & non point en regardant à la vie de quelques libertins, desquels le College de Iesus Christ n'a pas esté exempt, ny l'Ordre pendant le viuant mesme de S. François.

Mais à quel propos tant de sortes de Religieux repliqua le Matcelior.

Resp. Le lustre d'un Roy, & la grandeur d'un Prince gist en la bonne conduite, & se fait voir en la multitude, & diuersité de ses seruiteurs, comme la beauté de l'Eglise en ses ceremonies, & au grand nombre, & vnion de ses Religieux & Ecclesiastiques.

Vostre raison est tres bonne, dit lors vn passager, mais vous estes beaucoup qui vous dites de saint François, & si on ne sçait à qui attribuer la Regle. Il y a des Tertiaires qui se veulent dire de l'Ordre, & passent mesme souuent pour Recollects, & Capucins, ainsi que i'ay veu en quelques lieux, & cependant ie cognois plusieurs de leurs Couuens qui possèdent de bonnes rentes, ont des colombiers, & glapiers, & reçoient argent & pecune, & vous dites que cela ne vous est pas permis, ils sont donc transgresseurs de vostre Regle, & manquent à cette vnion.

Responſe. Ils ne sont point transgresseurs de nostre Regle, car ils ne l'ont iamais professée ny obseruée, ains vne troisieme, qui auoit esté faicte pour les personnes se-
liers seulement, laquelle n'a rien de commun avec la nostre, qui est celle meime

que saint François a obseruée durant sa vie.

Ils auroient donc grand tort s'ils se disoient Capucins, ou Recollets, car cela seroit vous scandalizer, & faire passer pour Religieux qui faites profession d'une Reigle & ne l'observez point.

Responſe. Cela est bien veritable Monsieur, mais pour couper broche à tous ces discours, & vous faire vne fois ſçauant pour toutes. Je vay vous distinguer les Ordres de saint François, & puis nous parlerons d'autres choses, ou bien nous prierons Dieu, car desia la chandelle est à l'habileté.

Je seray fort ayſé d'apprendre ces distinctions, dit Monsieur du Pont, & est mesme necessaire que chacun les ſçache, pour beaucoup de raisons, pourſuiuez donc votre discours.

Trois Ordres establis par saint François.

Il faut que vous ſçachiez, Messieurs, que saint François nostre Chef & Patriarche a establi trois Ordres, le premier qu'il nomme des Freres Mineurs, est aujourdhuy diuisé en trois corps, d'Obſervantins dits Cordeliers, Recollets, & Capucins, qui sont tous trois les vrais Freres Mineurs & Obſervateurs d'une meſme Reigle & Profession.

Le ſecond des pauvres Dames, ou filles de ſainte Claire. Le troiſieſme qui eſtoit quasi à la mode des Confratries d'aujourd'huy eſt des penitens de l'un, & l'autre ſex d'hommes, & de femmes viuans en leur propres maiſons.

Les seuls Freres Mineurs sont obligez par leur Regle de viure des seules aumosnes offertes, ou mandiees, & ne doiuent receuoir argent, rentes n'y reuenus, sans licence expresse du saint Siege, auquel ont eu recours les Freres Mineurs conueniens, qui par ce moyen viuent en conscience possedans du reuenue

Les filles de sainte Claire doiuent estre pauures & mandiantes, sinon celles qui sont priuilegiees, non qu'elles mesmes puissent sortir de leur Monastere pour mandier leur vie, car ce n'est pas le propre des filles, mais on leur ordonne des Tertiaires ou Freres au chapeau, qui ont soin d'elles en cest office.

Pour les Penitens du troisieme Ordre de vn & l'autre sexe, mariez, & non mariez, viuant en leurs propres maisons, ils n'ont autre loix que celle des Chrestiens, & d'observer vne Reigle fort facile, que saint Francois leur a laissee pour contenter leur deuotion, & non pour en faire aucun corps de Religion, comme il est tres probable en ce que plus de deux cens cinquante ans apres la mort de ce saint Pere, il n'y en a point eu d'estably, & n'estoit pas necessaire de faire outre l'intention du Saint, & apporter trouble en son Ordre, par cette multiplication de Religion, desia trop grande aujourd'huy en l'Eglise.

L'Ordre des Peres Tertiaires que l'on appelle à Paris Picpues, ou Capucins de tertiares.

Picpuces, est le mesme que S. François establit pour les seculiers de l'un, & l'autre sexe, que le R. P. Vin. ent premier fondateur de cette Congregation a. accommodé à son vsage, & à celuy de les Freres, avec le pied nud, & vn habit non bleu, ou perse, avec vne couroye de cuir pour ceinture, comme i'ay veu en quelques Tertiaires, mais tel qu'il ne differe presque en rien du nostre, qu'à leur long manteau, à leur grande barbe, & à deux grâdes moizettes ou pieces de drap attachées à leur capuce qui leur descendent iusque à la ceinture, & à la couleur du drap, lequel ils portent de laine obscure, comme les Minimes, & non ourdy de blanc, & tissu de noir, comme les Freres Mineurs, ce qui n'empêche pas qu'ils ne passent souuent pour Recollets ou Capucins, quoy qu'ils ne le soyēt point, & nous soient tres-differāts en Regle & maniere de vie, comme au s argent, rentes & reuenus, & nous chose qui soit que pauureté, à laquelle nostre S. Patriarche nous a reduit par sa Regle, ce que ie dis, non pour les blâmer, car ie ne touche pas à leur vertu, mais pour ce qu'il est necellaire que soyiez esclarcy, & destromper ceux qui s'estoient laissés persuader qu'ils estoient Freres Mineurs, Recollets, ou Capucins, & ne le sont point ains Tertiaires ou Tiercelins, c'est à dire du troisieme Ordre estably par S. François, pour les seculiers, mariez ou non mariez, viuans dans leurs propres maisons.

Or dit le Maistre du Nauire, fort hon-

neste homme, à sa preienduë Religion prés,
car luy mesme s'offrit de me monstrier la
Sphere: vous vous dites d'un mesme Ordre
& profession, les Cordeliers, les Capucins,
& vous, qui sont les premiers, & plus an-
ciens de vous trois, car pour les Tertiai-
res ou Picpuces, leur fondateur est encor
vivant

Estant ainsi pressé & honnestement obligé,
ie fus contraint de rappeler ma memoire,
songer à ce que j'auois autrefois leu, & puis
ie leur parlay de la sorte

Messieurs. Les Peres Recollects ont eu
leur commencement dès l'an 1486. deux
cens septante sept ans apres l'institution
de la Regle qui commença en l'an mille deux
cens neuf, & septante & un an apres la re-
formation des Peres de l'Observance, dits
Cordeliers, qui ne prennent leur origine
de plus haut que du Concile de Constance,
tenu l'an mille quatre cens quinze, duquel
ils receurent leur confirmation par les Pe-
res assemblez (le Siege Apostolique va-
quant) bien qu'il ayr eu son commence-
ment l'an mille trois cens octante, par le ve-
nerable Frere Paul de Trinci Lay, qui en
est le fondateur, Dieu ayant voulu esta-
blir certe sainte Reforme sur le baze, &
fondement de l'humilité, de laquelle ce
seruiteur de Dieu estoit particulièrement
douié, bien qu'il eut esté tres-noble au
monde.

Fondateur
des Peres
Cordeliers.

Les Peres Capucins qui sont venus du

Hhh iij

depuis ont commencé leur Reformation l'an mille cinq cens vingt cinq, laquelle ne prend neantmoins son origine que l'an mille cinq cens vingt huit, le treizieme de Juillet, que le Pape approuua cette Religion trente neuf ans apres les Peres Recollects.

Fondateur
des Peres
Recollects.

Le fondateur ou celuy qui a donné commencement à la Reformation des Peres Recollects, a esté le venerable Frere Iean de la Puebla Ferrara, personnage tres-insigne en sainteté & merite. Il prit naissance dans l'Espagne des Ducs de Bejar, il estoit propre nepueu du Roy Catholique Dom Ferdinand V. & possedoit la Comté de Benalcazar, & ensemble de grands biens.

Estant touché d'une inspiration diuine, il quitta les grandeurs de la terre, & rompit tout à fait avec le monde, pour se consacrer entierement au seruice de nostre Dieu, sous les enseignes du Seraphique saint François, & depuis il obtint du Pape Innocent VIII. par l'entremise d'Elizabeth Reyne d'Espagne, licence de bastir quelques Monasteres de Recollection, pour y garder estroittement la Regle de saint François, avec ceux qui seroient portez de la mesme volonté que luy. Ce qui arriva l'an de grace mille quatre cens octante neuf. Il fut le premier qui porta le tiltre de Custode, & exerça cette charge depuis l'an mille quatre cens nonante, iusques à l'an 1495. qu'il deceda.

Le fondateur ou celuy qui a donné commencement à la Reformation des PP. Capucins a esté le Venerable Frere Mathieu Basci, personnage tres-insigne en saincteté & merite. natif du Chasteau de Basci, situé aux confins de Monfeltre en Italie, lequel prit l'habit de Religion en vn Monastere appellé saint Sixte des Peres de l'obseruance, puis les quitta & donna commencement à la Reformation des Peres Capucins l'an 1525.

Et ayant attiré quelque compagnons comme le Venerable Frere Louys & quelque autres, ils obtindrent du Pape Clement VII. par l'entremise de la Duchesse d'Vrbain la confirmation de leur Ordre par vne Bulle dattée du 1. Iuillet l'an 1528 les soumettant neantmoins tousiours aux Freres Mineurs Conuentuels en la confirmation de leur Prelat, comme nous le sommes au General de tout l'Ordre S. François.

Or les Annales de leur Ordre nous assurent que ce P. Louys qui auoit souffert infinis traualx, pour establir & amplifier cette sainte Reformation par vn secret iugement de Dieu il quitta tout, & s'alla faire Hermite. Et le Pere Mathieu ne mourût point dans l'Ordre, ains s'en retourna quelque années deuant son trespas à Venize, entre les Peres de l'obseruance où il mourut dans la maison du Curé de S. Moyse le 5. Aoult, apres auoir receu ses derniers Sacremens des Peres de l'Obseruance & fut enterré dans le Conuent des Obseruantins de Venize, appellé la Vigne.

Cronique

S. Fran 3.

part. p. 636.

l. 2. chap. 15.

Annal.

Capuc.

appar. n. 59.

P. Binet.

les vie P.

Math.

Voila en general le commencement de ses saints Ordres, desquels Dieu a pris vn soin tres-particulier, & ne faut point s'estonner si le Pere Louys après auoir bien peiné pour l'establissement des PP. Capucins, s'est fait Hermite, il faut croire que ça esté par inspiration diuine, & pour auoir vn peu de repos apres le travail, cela s'estveu en plusieurs autres bons Religieux, ausquels la solitude fauorise la perfection & la vertu de ceux qui ont vieilly en la Religion comme il est dit en la vie des Peres.

Le bon Frere Mathieu qui a esté le premier commençant, a esté aussi le premier qui retourna mourir au sein de la mere, d'où il auoit tiré les enfans qui ont suuy la premiere pointe, on ne peut en cela qu'admirer les iugemens de Dieu. Le Beat Frere Nicolas Facteur tres-sain & personnage, qui mourut il y a quelque années en Espagne auoit esté premierement Cordelier, puis Recollect, se fit après Capucin, & retourna mourir Recollect, & luy ayant esté demandé la raison de tous ces changemens, il respondit. Ie ne puis faire autre chose que la volonté de Dieu, les Cordeliers & obseruantins sont Saints, les Recollects sont Saints, les Capucins sont Saints, & pour moy ie le croy avec luy, & vous donne aduis que l'apperçois la terre que l'on appelle de la Heue & que bien tost nous arriuerons à Dieppe moyennant la grace de nostre Seigneur, comme nous fismes fort heureusement le meisme iour, & de là de nostre pied à nostre

Conuent de Paris, où nous rendimes nos
actions de graces au tout puissant & receu-
mes la charité de nos Freres. autant consolez
de nostre retour, que marris de ne nous pou-
voir assez tesmoigner les effects de leur bien-
veillance, laquelle ie prie Dieu recompenser
dans le Ciel, Amen.

Fin du troisieme Liure.

De l'Im-
pression



HISTOIRE DV CANADA,

ET

VOYAGES DES PERES
RECOLLECTS EN LA
nouuelle France.

LIVRE QVATRIESME.

*Advis de l'Autheur donné à Monseigneur
le Duc de Montmorency Viceroy, touchant
la preeminence que les Huguenots pre-
tendoient leur estre deuë, & du choix que
les PP. Recollects firent des PP. Iesuites
pour estre secodés à la mission du Canada.*

CHAPITRE I.

Desordres
en Canada.



E silence est vne vertu telle que
hors son temps n'est plus vertu.
Les desordres que j'auois veus en
la nouuelle France, m'obligerent
puissamment d'en aduertir Monseigneur le

Duc de Montmorency Viceroy 'du païs pour y apporter les remedes necessaires, car les Huguenots tenoient par tout le dessus dans leurs vaisseaux faisans leurs prieres , & nous contraincts de tenir la prouë en chantans les loüanges de nostre Dieu , qu'estoit proprement mettre le trompeur Baal au dessus du vray Dieu.

Et la cause de ce desordre procedoit de ce que les principaux de la flotte avec la pluspart des officiers estoient de la religion pretendue & reformée , lesquels auoient esté ozés iusques là, que de chanter de nouueau leurs marottes , pendant qu'un de nos Freres disoit la sainte Messe à la Traicte , pour l'interrompre on le contrarier ce sembloit, tellement que ce n'estoit pas le moyen de planter la foy, où les chefs & principaux estoient contraires à la mesme foy , mais plustost vne confusion de croyance aux Sauvages , qui s'apperceuoient desja de nos differentes manieres de seruir Dieu, disans que les vns faisoient le signe de la Croix, & les autres non.

Je dressay donc des memoires lesquels ie presentay à ce Seigneur Duc , qui en desira la lecture & estre luy mesme le gardien de mes papiers pour les presenter à son conseil, auquel il me pria d'assister, mais qui eut tant de remise, qu'à la fin ie ne m'y pû trouuer pour quelque affaire particuliere qui me suruint , & à mon deffaut le Pere Irenée y accompagna nostre R. P. Provincial qui y receut contentement.

Vic-royau-
tè a Mon
seigneur de
Vantadour.

Néanmoins à peine l'ordre nécessaire est-il
citably par ce Seigneur Duc en son conseil,
qu'il est mandé pour le service du Roy dans
ses gouvernemens, c'est ce qui l'obligea, outre
ses autres grandes & serieuses charges, de se
désfaire de la Viceroiauté du Canada, entre
les mains de Monseigneur le Duc de Vanta-
dour son nepveu, lequel suivant l'intention
dudit Seigneur son oncle, nous fist l'honneur
de nous communiquer ses pieux desseins & la
volonté qu'il auoit d'establir de grandes colo-
nies dans le païs, si le mal-heur par l'impuis-
sance ne luy eut empêché d'esclorre ses diuins
projets.

Nous voyla donc dans de grandes esperan-
ces, & selon la grandeur des choses qu'on
nous despeignoit, nous ingeôs avec le même
Seigneur, que pour entretenir tant de peupla-
des, continuer la conuersion des Sauvages, &
establir des Seminaires par tout pour l'instru-
ction de la jeunesse, il nous estoit nécessaire
d'auoir le secours de quelques Religieux ren-
tez, qui peussent par leurs propres commodi-
tez & moyens, fournir aux frais & à la nourri-
ture desdits enfans & nouveaux conuerts,
puis que la compagnie des marchands s'excu-
soit sur son impuissance; & nous sur nostre Re-
gle qui nous deffend les reuenus.

Fismes
choix des
PP. Iesui-
tes.

Entre tous les Religieux nous proposâmes
les RR. PP. Iesuites, lesquels comme person-
nes puissantes pouuoient beaucoup à ces peu-
ples indigens, où il faut nécessairement auoir
de quoy donner si on y veut aduancer, car plus

on leur donne plus on les attire, & n'ayez pas dequoy les nourrir, c'est à dire qu'ils vous admireront & peu vous pourront nuire. Ce n'est pas comme dans les Indes où les habitans n'auoient à faire que du secours spirituel simplement, là où ceux cy ont affaire de tous les deux, spirituel & temporel, & par ainsi se peut dire assurement que la pauureté de S. François a fait vn tres-grand fruct aux Indes, & que nous auons eu raison d'appeller le secours des RR. PP. Iesuites au Canada.

Je sçay bien que nos Peres establirent des Colleges & Seminaires par toutes les deux Indes auant la venue des RR. PP. Iesuites, ausquels ils les cederent volontairemēt à leur arriuée, comme ayans d'ailleurs assez d'autres occupations à prescher, conuertir & confesser par tout où ils estoient appelez. Mais le Roy d'Espagne y pouruoyoit tellemēt par la main de ses officiers, avec d'autres personnes deuotes, qu'ils n'y auoient autre plus grand soin que de catechiser les enfans, les instruire aux bonnes lettres, & les conuertir à Iesus-Christ, sans se mesler des rentes que des personnes honnestes & vertueuses auoient en maniere, mais icy, comme i'ay dit, il en va tout autrement, car personne n'a pris soin de nous seconder que de parole seulement, à la reserue de quelqu'vns de nos amis.

Les Recol-
lects cedent
leurs Col-
leges aux
Iesuites.

Ce choix que nous fîmes desdits Pere Iesuites pour le Canada, fut fort contrarié par beaucoup de nos amis, qui taschoient de nous en dissuader, nous assurant qu'à la fin du

compte ils nous mettroient hors de nostre maison & du pais, mais il n'y auoit point d'apparence de croire ceste mesconnoissance de ces bons Peres; ils sont trop sages & vertueux pour le vouloir faire, & quand bien vn ou deux particuliers d'entr'eux en auroient eu la volonté, vne hyrondelle ne fait pas vn Printemps, ny vn ou deux Religieux la communauté, & par ainsi c'eut esté crime de se mesfier d'eux, non pas mesme en la pensée, car il paroist que par tout ailleurs nous auons vescu en paix avec eux.

Pour reuenir au suiet de cette proposition, le P. Irenée estant en l'hostel dudit Seigneur Duc, y arriua fort à propos le R. P. Noiroi Iesuiste, auquel ledit P. Irenée ayant fait ouuerture de l'affaire, pria ledit Seigneur de l'agrecer comme il fust, après que ledit P. Noiroi eut accepté l'offre d'une affection nonpareille, (car il estoit fort zelé) protestant au nom de la compagnie, qu'ils nous en auroient vne eternelle obligation. Quelqu'vns d'eux en suite nous vindrent prier de leur faire part de quelque memoires de la langue Huronne que j'auois dressez pour leur seruir, lesquels ie ne pû leur donner pour lors, n'estans pas encores en estat.

Les choses estant en telle disposition, il fut question de faire passer au conseil dudit Seigneur & de la compagnie des Marchands tout ce qui estoit de cet accommodement, & de uions nous y trouuer ensemble avec eux, mais n'ayans pas esté aduerty du iour, le P. Irenée y assista seul.

assisterent sans nous, & à mesme temps partirent pour Dieppe, où des-jà estoit arriué pour le mesme voyage le Pere Ioseph de la Roche Daillon Recollet, avec vn ieune Sauvage Canadien, qui depuis cinq ans auoit esté enuoyé en France par nos Religieux de Kebee, lequel après auoir esté bien instruit & endoctriné aux choses de la foy, fut baptizé & nommé par deffunct Monsieur le Prince de Guimenée son parrain, Pierre Anthoine, qu'il entretenoit aux estudes iusques après sa mort, que l'enfant fut congru en la langue Latine, & si bon François; qu'estant de retour à Kebee nos Religieux furent contraints le renuoyer pour quelque temps entre ses parens, afin de reprendre les idées de sa langue maternelle qu'il auoit presque oubliée, dequoy il fit quelque difficulté au commencement, car comme le P. Ioseph le Caron Superieur de Kebee, luy eut proposé cette obedience, il le pria les larmes aux yeux de l'en vouloir dispenser, disant: comment mon Pere vostre Reuerence voudroit elle bien me renuoyer entre ses bestes qui ne cognoissent point Dieu, mais le Pere luy reparut que c'estoit pour leur faire cognoistre, & pour reprendre sa langue maternelle qu'il l'y enuoyoit, afin d'ayder à sauuer ses parens & tous ceux de sa Nation, apres quoy il obeit & se disposa pour partir, duëment instruit de la maniere comme il se deuoit gouverner parmy ses gens, sans courir risque de son salut.

Pierre Anthoine Canadien converty.

Dés le lendemain matin estant en ville, ie

rencontray fort à propos vne personne de
qualité interessée dans le party, avec lequel
m'abouchant il m'aduertit de tout le resault
du conseil, & comme les RR. PP. Iesuites
auoient obtenu la nourriture de deux de nos
Religieux, de six que la compagnie nous en-
tretienoit de tout temps, & par ainsi reduit no-
stre nombre de six à quatre, qui ne fut pas pri-
à bonne augure.

Cet aduertissement donné, ie fustrouue
Monseigneur le Duc de Vantadour, auquel ie
fis mes plaintes, & le priay d'y remedier, com-
me il fist promptement, commandant au sieur
Girard son Secrétaire d'en escrire de sa part
Messieurs les Directeurs & Chefs de l'embar-
quement à Dieppe, afin qu'ils aduertissent les
RR. PP. Iesuites, que l'intention de la com-
pagnie n'estoit pas qu'ils prissent part à la
nourriture de six Recollets, que depuis plu-
sieurs années ença, les compagnies anciennes
& nouuelles, auoient entretenus dans le Ca-
nada, autrement qu'il leur reuoquoit son con-
sentement, à quoy les Peres obeïrent promp-
tement, & se submirent aux volontaz dudit
Seigneur Duc.

Cette petite action n'a neantmoins en rien
alteré l'amour & le respect que nous auons à
ces grands hommes, ie dis grâds pour ce qu'ils
le sont en effect de prudence & de science,
prudens & respectueux dans vn point, qui les
maintiendra tousiours dans la vertu, & le bon
odeur de ceux qui sçauent qu'aux Religions,
où la ciuilité & le respect reciproque man-

que, la vertu manque aussi, il ne s'ensuit pas pourtant, qu'il ne se puisse glisser de petits man-
quemens dans les compagnies les mieux re-
glées & les maisons les mieux policées. Les
plus grands Saints ont eu quelquefois des
debats, mais qui ont trouué leur mort aussi-
tost que leur naissance.

Toutes choses estant en bon ordre & l'equi-
page dans les vaisseaux, on se mist sous voile
après les prieres accoustumées, mais si favora-
blement qu'ils trauerferent ce grand Ocean
sans aucun peril, & si heureusement qu'en vn
temps tres-court en comparaison de l'ordi-
naire, ils arriuerent avec contentement dans
ce desiré port de Kebec, où ils furent receus
des hyuernans, (c'est ainsi qu'on appelle les
habitans de Kebec) avec la ioye & la courtoi-
sie qu'ils pouuoient esperer de ceux, qui espe-
roient encore plus d'eux à cause de leur ne-
cessité.

Or comme c'est l'ordinaire que les choses
sainctes sont toujours contrariées en leur
commencement, & que de tant plus le diable
en preuoit de pertes, plus il se roidit contre
icelles par toutes sortes de voyes pour les em-
pecher s'il pouuoit. Les R.R.PP. Iesuites n'e-
stoient pas encores sorty des barques, qu'ils
furent aduertis qu'il n'y auoit point d'ordre de
les loger à Kebec ny au fort, & tellement es-
conduis qu'on parloit des-ja de les repasser en
France, ce fut vn mauuais salut pour eux, &
vne facheuse attaque, capable d'estonner des
personnes moins constantes. Mais nōs Freres

Logeons
les PP. Ie-
suites.

prenans part dans les interets de ces bons Peres sçachans cette disgrace, leur offrirent charitablement, & les mirent en possession con-
diallement, de la iuste moitié de nostre maison
(à leur choix) du iardin & tout nostre enclos,
qui est de fort longue estenduë fermé de bon-
nes pallissades & pieces de bois, qu'ils ont oc-
cupez par l'espace de deux ans & demy.

De plus ils leur presterent vne charpente
toute disposée & presté à mettre en œuvre,
pour vn nouveau corps de logis, d'enuirō 40.
pieds de longueur, & 28. de large, & en l'an
1627. ils leur en presterent encore vne autre
que nos Religieux auoient derechef fait dres-
ser pour aggrandir nostre Couuent, lesquelles
ils ont employées à leur bastiment commencé
au delà de la petite riuere sept ou 800. pas de
nous, en vn lieu que l'on appelle commune-
ment le fort de lacques Cartier.

Et pour vous monstrier comme en effet nos
Religieux seuls sont cause après Dieu que les-
dits R.R. PP. Iesuites sont establis dans le Ca-
nada (ce que nous auons fait pour estre assistés
en la conuersion des Sauuages) voicy ce que le
R.P. Lalemât superieur de leurs Peres en Ca-
nada, en escriuit au sieur de Châplain, par vne
lettre dattée du 28. Iuillet 1625. & vne autre
du mesme iour & an à nostre R.P. Prouincial.

Lettre du P.
Lalemant
au sieur de
Champlain

MONSIEVR,
Nous voicy graces à Dieu dans le resort
de vostre Lientenance où nous sommes heuren-
sement arriuez, après auoir en vne des belles tra-

uerfes qu'on aye encor experimenté, Monsieur le General après nous auoir déclaré qu'il luy estoit impossible de nous loger ou dans l'habitation où dans le fort, & qu'il faudroit ou, repasser en France, ou nous retirer chez les Peres Recollets, nous a contrainct d'accepter ce dernier offre. Les Peres nous ont recens avec tant de charité qu'il nous ont obligez pour un iamaïs. Nostre Seigneur sera leur recompence. Vn de nos Peres estoit allé à la traite en intention de passer aux Hurons ou aux Hiroquois, avec le Pere Recollet qui est venu de Frâce, selon qu'ils aduiferoient avec le Pere Nicolas, qui se denoit trenuer à la traite & conférer avec eux, mais il est arriné que le pauvre Pere Nicolas au dernier saut s'est noyé, ce qui a esté cause qu'ils sont retournez, n'ayans ny cognoissance, ny langue, ny information: nous attendons donc vostre venue, pour resondre ce qui sera à propos de faire. Vous scaurez tout ce que vous pourrez desirer de ce pays du P. Ioseph, c'est pourquoy ie me contente de vous asséurer que ie suis, Monsieur, Vostre tres-affectionné seruiteur, Charles Lalemant. De Kebec ce 28. Iuillet 1625.

Mon Reuerend Pere,

Pax Christi.

CE seroit estre par trop mescognoissant de ne point escrire à vostre Reuerence, pour la remercier, tant des lettres qui furent dernièrement escrites en nostre faueur aux Peres qui sont icy en

Lettre du P.
Lalemant
au P. Provincial des
Recollets.

la nouvelle France, comme de la charité que nous
 auons receues desdits Peres, qui nous ont obligé
 pour vn iamaïs, ie supplie nostre bon Dieu qu'il
 soit la grande récompence & des vns & des au-
 tres, pour mon particulier i'escris à nos Super-
 rieurs, que i'en ay vntel ressentiment que l'occa-
 sion ne se presentera point que ie ne le fasse paroi-
 stre, & les supplie quoy que d'ailleurs bien affe-
 ctionnez de tesmoigner à tout vostre saint Ordre
 le mesme ressentiment. Le P. Ioseph dira à vostre
 Reuerence le suiet de son voyage pour le bon suc-
 cez duquel, nous ne cesserons d'offrir & prieres &
 sacrifices à Dieu, il faut ceste fois aduancer à bon
 escient les affaires de nostre Maistre, & ne rien
 omettre de ce qu'on pourra s'aduiser estre neces-
 saire, i'en ay escrit à tous ceux que i'ay creu y pou-
 uoir contribuer que ie m'assure s'y emploieront si
 les affaires de France le permettent, ie ne doute
 point que vostre Reuerence ne s'y porte avec affe-
 ction, & ainsi, virtus vnita, fera beaucoup d'effet,
 en attendant le succez ie me recommande aux
 saints Sacrifices de vostre Reuerence, de laquelle
 ie suis.

De Kebec ce 28. Iuillet

1625.

Tres-humble seruiteur,
 Charles Lalemant.

A mon Reuerend Pere le P. Prouincial
 des R.R. Peres Recollects.

Le bon Pere Ioseph le Caron & tous les Religieux resiouys de la venuë de si bons hostes, creut qu'en faisant vn voyage en France, il amelioreroit fort le Canada, & adionsteroit vn autre bië aux RR. PP. Iesuites, qu'estoit quelque benefice qu'il esperoit du Roy pour la nourriture des enfans & nouueaux conuertis, & ce qui luy en donnoit dauantage d'esperance, estoit l'honneur qu'il auoit eu estant au monde d'enseigner à sa Maieité, les premiers rudimens de la foy, il n'y pû rien faire neantmoins, car encor bien que le Roy eut bonne volonté comme ie vis en effet, il fallut passer par tant de mains, que lors que nous pensames estre le plus aduancé, ce fut lors que tout estoit desesperé & qu'il fallut penser du retour après auoir receu vn petit bien-fait de sa Maieité, qu'elle fist deliurer elle mesme ne s'en fiant pas à ses officiers, qui ne nous seruoient que de remises.

Le Roy
nous fait
vne au-
moine.

Le Pere s'embarqua donc pour France à la fin du mois d'Aoust 1625. qui estoit la mesme année que les RR. PP. Iesuites estoient arriuez à Kebec, & y fist les negociations que ie viens de dire, marry de n'y auoir pû faire d'auantage, & s'embarqua pour son retour l'année suiuate dans la Catherine vaisseau de 250. tonneaux, avec le F. Geruais Mohier son compagnon, & arriuerent heureusemēt à Tadoussac le 28. Iuin 1626. où ayans mis pied à terre, le bon Frere (encor nouueau) se trouua comme dans vn abisme d'estonnement & de merueille à l'aspect de ces pauvres Sauvages desquels il

eut quelque apprehension au commencement, car cōme il m'a dit luy mesme, il luy sembloit voir en eux quelque demons, ou des caresme prenans, tant il les trouuoit estrangemēt accōmodez. Il en prend de mesme presque à tous ceux qui les voyent pour la premiere fois, & puis on s'y accoustume, comme de voir d'autres personnes de deçà mieux couuertes.

Grand
festin à
Tadoussac.

Il se preparoit pour lors vn grand festin dans vne cabane à plus de 200. Sauvages, hommes, femmes & enfans, auquel il fut inuité par le maistre, qui pēsoit en cela le gratifier de beaucoup, mais il se trōpoit bien fort, car il n'auoit pas l'appetit aiguisé iusques là, que de pouuoir mager d'vne telle viande, qui n'estoit point à son goust. De le refuser il n'y auoit point d'apparence pour ce qu'ils ne sçauent que c'est d'estre escondus, & l'accepter, c'estoit se mettre à l'impossible, que fit donc ce bon Religieux il s'assit à platte terre cōme les autres, tint bonne mine & ne mangea point du tout. Ce que voyans quelqu'vns de la troupe, luy presenterēt vn gros morceau de graisse d'ours à manger, qu'il estimēt delicieuse, comme nous faisons icy la perdrix, mais c'estoit le faire tōber de fiebure en chaud mal, cōme l'on dit, & demeura les bras croisez, ô mon Dieu, pendant que les autres se donnoient au cœur ioye de 4. grande chaudieres, de poix, prunes, figues, raisins, biscuits, poisson & chair d'ours, le tout bouilly, cuit & meslé ensemble avec vn auro.

Il me vient de resouuenir de ma premiere entrée dans leurs cabanes, mais il est vray que ie trouuay leur menestre fort dégoustante,

car la regardant seulement de l'œil, elle me faisoit soufleuer le cœur, & cependant avec la grace du bon Dieu, ie m'y suis bien accoustumé du depuis, & à des mortifications bien plus grandes que lon ne fait pas icy.

Le festin finy, il prist congé de ses hostes avec vn ho, ho, ho, pour remerciement de leur bonne chere, & s'en retourna au Navire plus affamé qu'il n'en estoit party, & peu apres se mirent sous voile pour Kebec, où ils arriuerent le quatriesme de Iuillet, en tres-bonne santé Dieu mercy, & ayans rendu les graces ordinaires à nostre Seigneur, ils receurent la charité & bon accueil qu'on a accoustumé de faire aux voyageurs & pelerins François, des commoditez du pays.

Comme le Pere Ioseph de la Roche Recollet, & le Pere Brebenf Iesuite, monterent aux Hurons, & d'un petit Huron qui nous fut amené, lequel fut conduit en France, puis baptisé.

CHAPITRE II.

IL est tres-necessaire d'auoir des Religieux en Canada, & par toutes les Nations errantes, pour les pouuoir instruire en la loy de Dieu, mais le principal fruct se doit es-

perer des peuples stables & sedentaires. Le Pere Ioseph de la Roche, se resouuenant de ce que ie luy en auois dit, se resolut d'y aller, & avec luy le R. P. Brebeuf Iesuite, lesquels à ce dessein partirent de nostre Conuent de nostre Dame des Anges, enuiron le mois de Iuillet de l'an 1525. pour les trois riuieres, & de là au Cap de Victoire, où se tenoit la traite avec les Sauuages de diuerses contrées là assemblez.

Estant arriuez aux barques, ils en communiquerent avec les Chefs, lesquels en loüans leur zele, leur firent offre de tout ce qui leur faisoit besoin pour leur voyage, & leur donnerent des rassades, cousteaux, chaudières, & autres vstencilles de mesnage qu'ils accepterent pour leur seruir dans le pays, & pour en accommoder leurs Sauuages, & ceux qui les nourriroient, ou leur rendroient quelque seruice.

Pendant qu'on dispoit leur petit fait, ils s'informerent du Pere Nicolas par le moyen du Truchement Huron, mais ayans appris qu'ils l'auoient noyé au dernier saut, avec nostre petit disciple Auhaitique, ils en furent fort affligez, & contraincts de s'en retourner à Kebec sans rien faire, n'ayans pas eu assez de courage pour passer ce couplà aux Hurons, comme ils firent l'année d'après, auquel temps le Pere Ioseph conuint avec quelques Hurons de nostre cognoissance qui le receurent courtoisement en leur société, mais pour le pauvre Pere Brebeuf,

P. Nicolas
noyé.

il y eut vn peu plus de difficulté, car outre qu'il leur estoit nouueau, & aussi mal armé que nous, ils prenoient pour excuses qu'il estoit vn peu lourd pour leur canot, qui estoit vn honnestre refus fondé sur la raison, car si vne personne pesante panche tant soit peu plus d'vn costé que d'autre, ou qu'en entrant dedans il ne met le pied doucement & droitement au milieu du canot, c'est à dire qu'il tournera, & que tout renuersera dans la riuiera, & puis voyez si vous sçauz nager avec vos gros habits, ce sera avec peine, car cela peut arriuer à de certains endroits, d'où les Sauvages mesme ne se sçauoient retirer qu'en se noyans.

Mais comme le Pere Brebeuf accompagné pour lors du Pere de Noue, eut fait quelque present honnestre aux Hurons, il trouua en fin place dans vn canot, qui le consola fort, & puis partit apres les autres, sous la garde de nostre Seigneur, & de son bon Ange, où nous les lairons aller pour parler d'vn petit Huron qui nous fut amené, & puis au Chapitre suiuant, ie vous donneray vne briefue relation d'vn voyage que le Pere Ioseph fist passant des Hurons aux Neutres.

La mort du pauvre Pere Nicolas fut vne perte tres-notable pour le pays, aussi fut-il egallement regretté des Sauvages, & des François qui trouuoient en luy vne grande science, accompagnée d'humilité, & d'vne honnestre & douce conuersation, qui me fait

P. Nicola
fort bon
Religieux.

dire qu'il eut rendu de grands seruices à nostre Seigneur en cette mission s'il luy eut donné vne plus longue vie, car les Huguenots mesmes aduouoient ses merites & ses graces, mais le principal est qu'il estoit fort bon Religieux.

Vn Huron
nous amena
son fils
en Canada.

Entre les Hurons qui luy estoient les plus affectionnez, il y eut vn bon homme qui nous amena son fils pour estre instruit en nostre Couuent, auquel le Pere Ioseph le Caron fit toute la meilleure reception qui luy fut possible, comme à vne petite ame qui venoit pour estre enrollée sous l'estendart de Dieu, par le moyen du S. Baptisme, ainsi qu'il fut du depuis.

Or il arriua neantmoins vn petit zele pour ce petit garçon, entre les Reuerends Peres Iesuites, le sieur Emery de Caën, & nous, car chacun desiroit s'en preualoir, & nous l'oster pour l'amener en France. Tous offroient des presents à l'enuie, & cependant le Pere de l'enfant desiroit à toute force qu'il nous restat, disant: comme il estoit vray semblable qu'il nous l'auoit promis, & le vouloit consigner entre les mains de nostre Pere Paul qui estoit lors prest de s'embarquer pour France. Le Pere Noiroit avec les autres Peres Iesuites, prierent le Pere Ioseph de faire enuers le Pere du garçon qu'il trouuat bon qu'ils eussent eux mesmes son fils, moyennant quelque gratification, & qu'infailiblement le menant en France, ils le rameneroient l'année prochaine, accompa-

déjà son contentement.

Le sieur Emery de Caën en promettoit encore davantage pour l'auoir, de maniere que nos Religieux, ny le pere de l'enfant par tant de poursuites, & solitez de tant de prieres, ne sçauoient comment conseruer le garçon, ny comment s'en deffaire. Bon Dieu est il bien possible que l'on cherchat en cela plus l'honneur propre, que vostre interest Seigneur, car le vray zele ne se soucie pas par qui le bien se fait, pourueu qu'il se fasse, ainsi que fit voir nostre Pere Ioseph, lequel se desinteressant, renonça au petit qui nous appartenoit, & pria en faueur des Reuerends Peres Iesuites, qui le receurent en France de la main du sieur de Caën, par le moyen du Seigneur Duc de Vantadour qui s'employa pour eux.

Mais voicy en quoy parut la souplesse d'esprit du Huron, pour auoir les presens des Peres Iesuites, du sieur de Caën: & nous laisser son fils, car le Pere Ioseph l'ayant prié pour lesdits Peres, il ne vouloit pas le desobliger, ny le sieur de Caën, à cause de la traite; Que fait-il donc, il leur promet à tous deux son fils, & reçoit de mesme leurs presens, qui consistoient en couuertures de lits, chaudières, haches, rassades, & cousteaux, puis la veille du iour qu'il deut partir pour son retour aux Hurons, il dit aux Peres Iesuites qui demeuroient encores à nostre Couuent: j'ay laissé mon fils entre les mains des Peres Recollects qui vous le garderont, &

audir sieur de Caën la mesme chose, adioustant pour l'instruire en attendant que tu l'emmeine en ton pays, puis partit pour sa Prouince apres auoir pris congé du Pere Ioseph, & recommandé son fils, auquel seul il le voulut confier pour demeurer avec nous, où pour estre conduit en France par de nos Freres.

Le Nauire estant fretté & le sieur de Caën disposé pour son retour en France, demanda le Sauvage, & les Peres Iesuites aussi, il y eut derechef vn peu de difficulté à qui l'auroit, car le pere du garçon l'auoit accordé à tous, pour auoir de tous, & neantmoins l'auoit laissé chez nous, suivant sa premiere intention, car moy demeurant en son pays avec le Pere Nicolas, on nous en auoit promis six de ceux qui estoient de nos petits escholiers, & mesmes il y auoit des filles qui demandoient de venir en France avec nous, mais c'est vne marchandise trop dangereuse à conduire.

En fin ce petit est embarqué, conduit & mené par le sieur de Caën, qui le lascia pour quelque temps chez son pere à Rouën, puis le fit conduire à Paris, où estant les Reuerends Peres Iesuites l'eurent en leur possession, à la faueur de Monsieur le Duc de Vantadour qui le demanda pour eux, lesquels l'ayans fait instruire avec assez de peine, pour n'y auoir personne qui sceut la langue, qu'vn seculier qui le voyoit par fois, ils le firent baptiser avec grande solemnité dans

l'Eglise Cathedrale de Rouën, & fut nommé Louys de sainte Foy, par Monsieur le Duc de Longueuille son parain, & Madame de Villars sa maraine, en la presence d'une infinité de peuple qui y estoit accouru, d'autant plus curieusement que quelques Matelots auoient donné à entendre qu'il estoit le fils du Roy de Canada.

Coppie ou abbrege d'une lettre du V. Pere Joseph de la Roche Daillon Mineur Recollet, escrete du pays des Hurons à un sien amy, touchant son voyage fait en la contree des Neutres, où il est fait mention du pays, & des disgraces qu'il y encourut.

CHAPITRE III.

CE seroit vouloir cacher la lumiere sous le boisseau, que de vouloir nier au public les choses qui le preuenent edifier, ou luy apporter un saint & innocent diuertissement d'esprit; car l'homme infirme est de telle nature en ce monde, qu'il est necessaire que son ame iouisse, sinon tousiours du moins par interualle, de quelque chose qui la contente, & par ainsi c'est le seruir & faire beaucoup pour luy, que de luy donner

matiere d'un diuertissement pour l'empêcher du mal, s'il n'a de l'amour assez pour attirer en luy les diuines consolations d'un Dieu, apres lesquelles il ny a plus de contentement, qui vaille, ny dequoy on doive faire estat que pour paruenir à ce mesme amour.

Je vousay dit comme nostre Pere Ioseph de la Roche Daillon s'estoit embarqué au cap de Victoire, pour le pays des Hurons en intention de trauailler à leur conuersion & de penetrer iusques aux dernieres Nations pour y porter son zele, & voir si elles estoient capables de recognoistre leur Dieu & se faire Chrestiens, mais pour ce que ie n'ay pas esté bien informé du succès de ce voyage, & que ie me pourrois tromper en ma relation, ie me contenteray de vous tracer icy en abrégé vne lettre que ce bon Pere escriuit à vn sien amy d'Angers; où il luy mande de principalement, l'excellence des contrées Neutres, ce qui luy pensa arriuer, & la maniere de leur gouuernement en ces termes.

Lettre ou
relation du
P. Ioseph de
la Roche.

MONSIEVR, humble salut
En la misericorde de Iesus. Encore
est-il permis quoy qu'esloigné, de visiter
ses amis par missiues, qui rendent les per-
sonnes absentes presentes. Nos Sauua-
ges s'en sont estonnez voyans que souuent
nous escriuions à nos Peres esloignez de
nous, & que par nos lettres ils apprenoient
nos

nos conceptions, & ce que les mesmes Sauvages auoient geré au lieu de nostre residence. Apres auoir fait quelque séjour en nostre Conuent de Canada, & communiqué avec nos Peres, & les Reuerends Peres Iesuites, le fus porté d'une affection religieuse de visiter les peuples Sedentaires, que nous appellons Hurons, & avec moy les Reuerends Peres Brebœuf, & de Noue Iesuites, y estans arrinez avec les peines que chacun peut penser, à raison des mauuais chemins. Je receu lettre (quelque temps apres) de nostre Reuerend Pere Ioseph le Caron, par laquelle il m'encourageoit de passer outre à vne Nation que nous appellons Neutre, de laquelle le Truchement Brulé disoit des merueilles, encouragé par vn si bon Pere, & le grand recit qu'on me faisoit de ces peuples, ie m'y escheminé, & partis des Hurons à ce dessein, le 18. Octobre 1626. avec vn nommé Grenolle, & la Vallée, François de Nation.

Passans par la Nation du Petun, ie fis cognoissance & amitié avec vn Capitaine qui y est en grand credit, lequel me promit de nous conduire à cette Nation Neutre, & fournir de Sauuages pour porter nos pacquets, & le peu de viures que nous auions de prouision, car de penser viure en ces contrées de mendicité s'est se tromper, ces peuples n'entendans à donner qu'en les obligeans, & faut faire souuent de longues traictes, & passer mesme plusieurs

nuicts sans trouuer autre abry que celui des Estoiles. Il executa ce qu'il nous auoit promis à nostre contentement, & ne coucha mes que cinq nuicts dans les bois, & le sixiesme iour nous arriuasmes au premier village, où nous fumes fort bien receus graces à nostre Seigneur, & à quatre autres villages en suite, qui à l'enuie les vns des autres nous apportoit à manger, les vns du cerf, les autres des citrouilles, de la peintahouy, & de ce qu'ils auoient de meilleur, & estoient estonnez de me voir vestu de la sorte, & que ie ne souhaitois rien du leur sinon que ie les conuois par signes à leuer les yeux au Ciel, & faire le signe de la sainte Croix, & ce qui les rauissoit en admiration estoit de me voir retirer certaines heures du iour pour prier Dieu, & vaquer à mon interieur, car ils n'auoient iamais veu de Religieux, sinon vers les Petuncux & les Hurons leurs voisins.

En fin nous arriuasmes au sixiesme village, où l'on m'auoit conseillé de demeurer; y fis tenir vn conseil, ou vous remarquerez en passant, qu'ils appellent conseils toutes leurs assemblées, lesquelles ils tiennent assis contre terre, toutes les fois qu'il plaist aux Capitaines, non dans vne salle, mais en vne cabane, ou en pleine campagne, avec vn silence fort estroit, pendant que le Chef harangue, & sont inuiolables obseruateurs de ce qu'ils.

ont vne fois conclu & arresté.

Là ie leur fis dire par le Truchement que i'estois venu de la part des François, pour faire alliance & amitié avec eux, & pour les inuiter de venir à la traicte, que ie les suppliois aussi de me permettre de demeurer en leur pays, pour les pouuoir instruire en la loy de nostre Dieu, qui est le seul moyen d'aller en Paradis. Ils accepterent toutes mes offres, & me tesmoignerent qu'elles leur estoient fort agreables, dequoy consolé; ie leur fis vn present du peu que i'auois, comme de petits cousteaux, & autres bagatelles qu'ils estimerent de grand prix, car en ces pays là on ne traicte point avec les Sauvages, sans leur faire des presens de quoy que ce soit, & en contreschange, ils m'enfanterent (comme ils disent) c'est qu'ils me declarerent citoyen, & enfant du pays, & me donnerent en garde (marque de grande affection) à Souharissen qui fut mon pere, & mon hoste, car selon l'aage ils ont accoustumé de nous appeller cousin, frere, fils, oncle, ou nepueu &c. Celuy là est le Capitaine du plus grand credit & autorité qui aye oncques esté en toutes ses Nations, car il n'est pas seulement Capitaine de son village, mais de tous ceux de sa Nation en nombre de vingt huit, tant bourgs, villes, que villages, faicts comme ceux du pays

des Hurons , puis plusieurs petits hameaux de sept à huit cabanes , bastis en diuers endroits commodes pour la pesche pour la chasse , ou pour la culture de la terre.

Cela est sans exemple aux autres Nations d'auoir vn Capitaine si absolu , il s'est acquis cest honneur & pouuoir par son courage , & pour auoir esté plusieurs fois à la guerre contre les dix sept Nations qu'il leur sont ennemies , & en auoit apporté des testes de routes , ou amené des prisonniers.

Ceux qui sont vaillants de la sorte sont fort estimez parmy eux. Et quoy qu'ils n'ayent que la massüe , & l'arc , si est-ce qu'ils sont tres-belliqueux , & adextres à ses armes. Apres tout ce bon accueil nos François s'en estans retournez , ie resté le plus content du monde , esperant d'y aduancer quelque chose pour la gloire de Dieu , ou au moins d'en descouurer les moyens , ce qui ne seroit peu , & de tascher d'apprendre l'embouchure de la riuere des Hiroquois , pour les mener à la traicte.

I'ay fait aussi mon possible pour apprendre leurs mœurs , & façons de viures , & durant mon seiour ie les visitois dans leurs cabanes , pour les sçauoir , & pour instruire , & les trouuois assez traictables , & souuent aux petits enfans qui sont fort esueil-

lez, tous nuds, & escheuelez, ie leur faisois faire le signe de la sainte Croix, & ay remarqué qu'en tous ces pays, ie n'en ay point treuvé de bossus, borgnes, ou contrefaits.

Ie les ay tousiours veu constans en leur volonté d'aller au moins quatre canots à la traicte, si ie les voulois conduire, toute la difficulté estoit que nous n'en sçauions point le chemin, iamaïs Yroquet Sauvage cogneu en ces contrées, qui estoit venu là avec vingt de ses gens, à la chasse au castor, & qui en print bien cinq cens, ne nous voulut donner aucune marque pour cognoistre l'emboucheure de la riuiere, luy & plusieurs Hurons nous asseuroient bien qu'il ny auoit que pour dix iours de chemin iusques au lieu de la traicte, mais nous craignons de prendre vne riuiere pour vne autre, & nous perdre, ou mourir de faim dans les terres.

Trois mois durant i'eus toutes les occasions du monde de me contenter de mes gens. Mais les Hurons ayans descouuert que ie parlois de les mener à la traicte firent courir par tous les villages, où ils passoient de fort mauuais bruits de moy, que i'estois vn grand Magicien, que i'auois empesté l'air en leur pays, & empoisonné plusieurs, que s'ils ne m'assommoient bien tost, ie mettrois le feu dans leurs villages, ferois mourir tous les enfans, en fin i'estois

à leur dire vn grand Atatanire, c'est leur mot, pour signifier celuy qui faict les fortileges qu'ils ont le plus en horreur, & en passant sçachez qu'il y a icy force sorciers, & qui se meslent de guarir les maladies par marmoteries, & autres fantaisies, en fin ces Hurons leur ont tousiours dit tant de mal des François qu'ils se sont pû adiufer pour les diuertir de traicter avec eux, que les François estoient inacoistables, rudes, tristes & melancholiques, gens qui ne viuient que de serpens, & venins, que nous mangions le tonnere, qu'ils s'imaginent estre vne chimere nompareille, faisant des comptes estranges là dessus, que nous auons tous vne queue comme les animaux, & les femmes n'ont qu'une mammelle, située au milieu du sein, qu'elles portent cinq ou six enfans à la fois, & y adioustent mille autres sortises pour nous faire hayr d'eux.

Et en effet ces bonnes gens qui sont fort faciles à persuader, me prendrent en grand soupçon, sitost qu'il y auoit vn malade, ils me venoient demander s'il estoit pas vray que ie l'eusse empoisonné, qu'on me tueroit asseurement, si ie ne le guarissois, i'auois bien de la peine à m'excuser & deffendre, en fin dix hommes du dernier village, appelle Quaroronon, à vne iournée des Hiroquois, leurs parens & amis, venans traicter à nostre village me vindrent visiter,

& me conuierent de leur rendre le reciproque en leur village, ie leur promis de n'y pas manquer lors que les neiges seroient fonduës, & de leur donner à tous quelques bagatelles, dequoy ils se monstrent contents, là dessus ils sortirent de la cabane où ie logeois, couuant tousiours leur mauuais dessein sur moy, & voyant qu'il se faisoit tard me reuindrent trouuer, & brusquement me firent vne querelle d'Allemand, l'un me renuerse d'un coup de poing, & l'autre prist vne hache, & m'en pensant fendre la teste, Dieu qui luy destourna la main, portale coup sur vne barre qui estoit là aupres de moy, ie receus encores plusieurs autres mauuais traictemens, mais c'est ce que nous venons chercher en ces pays. S'appaisans vn peu, ils deschargerent leur cholere sur le peu de hardes qui nous restoient, ils prindrent nostre escritoire, couuerture, breuiare, & nostre sac, où il y auoit quelques iambettes, esguilles, alaines, & autres petites choses de pareille estoffe, & m'ayant ainsi deualisé, ils s'en allerent toute la nuit fort ioyeux de leur empoite, & arriuez en leur village faisans reuenir sur leurs despoüilles, touchez peut-estre d'un repentir venu du tres-haut, ils me renuoyèrent nostre breuiare, cadran, escritoire, couuerture, & le sac, mais tout vuide.

Lors de leur arriuee en mon village, appellee Ounontifaston, il ny auoit que des

femmes, les hommes estaus allez à la chasse du cerf, à leur retour ils me tesmoignerent estre marrys du desastre qui m'estoit arriué, & puis n'en fut plus parlé.

Le bruit courut incontinent aux Hurons que j'auois esté tué, dont les bons Peres Brebeuf, & de Noue qui y estoient restez m'en-uoyerent promptement Grenolle pour en sçauoir la verité, avec ordre que si j'estois encore en vie de me ramener, à quoy me con-uoit aussi la lettre qu'ils m'auoient écrite avec la plume de leur bonne volonté, & ne voulu leur contredire, puis que tel estoit leur aduis, & celuy de tous les François, qui apprehendoient plus de disgraces en ma mort que de profit, & m'en reuins ainsi au pays de nos Hurons, où ie suis à present tout admirant les diuins effects du Ciel.

Le pays de cette Nation neutre est incomparablement plus grand, plus beau & meilleur qu'aucun autre de tous ces pays, il y a vn nombre incroyable de cerfs, lesquels ils ne prennent vn à vn comme on fait par deça, mais faisans trois hayes en vne place spacieuse, ils les courent tout de front, tant qu'ils les reduisent en ce lieu, où ils les prennent, & ont cette maxime pour toutes sortes d'animaux, soit qu'ils en ayent besoin ou non, qu'ils tuent tout ce qu'ils en rencontrent, de crainte, à ce qu'ils disent, que s'ils ne les prenoient, que les bestes iroient raconter aux autres comme elles auroient esté couruës,

& qu'en suite ils n'en trouueroient plus en leur necessité. Il s'y trouue aussi grande abondance d'orignas, ou esclans, castors, chats Sauvages & des escurieus noirs plus grands que ceux de France, grande quantité d'outardes, coqs d'Inde, gruës & autres animaux, qui y sont tout l'Hyuer qui n'est pas long, ny rigoureux comme au Canada, & n'y auoit encores tombé aucunes neiges le vingt-deuxiesme Novembre, lesquelles ne furent tout au plus que de deux pieds de haut, & commencerent à se fondre dès le 26. Ianuier, le huietieme Mars, il n'y en auoit plus du tout aux lieux descouuers, mais bien en restoit il vn peu dans les bois. Le seiour y est assez recreatif & commode, les riuieres fournissent quantité de poissons & tres-bons, la terre donne de bons bleds, plus que pour leur necessité. Il y a des citrouilles, faisoles & autres legumes à foison, & de tres-bonne huile, qu'ils appellent à Tournon, tellement que ie ne doute point qu'on deuroit plustost s'y habiter qu'ailleurs & sans doute avec vn plus long seiour y auroit esperance d'y aduancer la gloire de Dieu, ce qu'on doit plus rechercher qu'autre chose, & leur conuersion est plus à esperer pour la foy que non pas des Hurons, & me suis estonné comme la compagnie des marchands, depuis le temps qu'ils viennent en ces contrées n'ont fait hyuerner audit pais quelque François; ie dis assurement qu'il seroit fort facile de les mener à la traite, qui seroit vn grand bien pour aller & venir par vn che-

min si court & si facile comme ie vousay ia dit, car d'aller de la traicte aux Hurons parmy tous les sauts si difficiles & tousiours en danger de se noyer, il n'y a guere d'apparence, & puis des Hurons s'acheminer en ce pais six iournées, trauersant les terres par des chemins effroyables & espouventables comme i'ay veu, ce sont des trauaux insupportables, & seul le sçait qui s'y est rencontré.

Donc ie dis que Messieurs les associez deuroient (à mon aduis) enuoyer hyuerner des François, dans le pais des Neutres moins esloignez que celuy des Hurons, car ils se peuuent rendre par le lac des Hiroquois au lieu où l'on traicte tout au plus en dix iournées, ce lac est le leur aussi, les vns sont sur vn bord & les autres sur l'autre, mais i'y vois vn empeschement qui est, qu'ils n'entendent gueres à mener les canots, principalement dans les sauts bien qu'il n'y en aye que deux, mais ils sont longs & dangereux, leur vray mestier est la chasse & la guerre, hors de là sont de grands paresseux, que vous voyez comme les gueux de France, quand ils sont saouls couchez le ventre au Soleil, leur vie comme celle des Hurons fort impudique, & leurs coustumes & mœurs tout de mesme, le langage est differant neantmoins, mais ils s'entendent comme font les Algonmequins & Montagnais, d'habis ne leur en cherchez pas, car mesme ils n'ont pas de brayars, ce qui est fort estrange & qui ne se treuve guere dans les Nations les plus Sauuagines. Et pour vous dire au vray, il seroit expedient

qu'il ne passat icy toutes sortes de personnes, car la mauuaise vie de quelques François leur est vn pernicieux exemple, & en tout ces pais les peuples quoy que Sauvages, nous en font des reproches, disans que nous leur enseignons des choses contraires à celles que nos François pratiquent, pensez Monsieur de quel poix peuuent estre après nos parolles, il est à esperer pourtant de mieux, car ce qui me consola à mon retour fut de voir que nos compatriots auoient fait leur paix avec nostre Seigneur, s'estoient confessez & communiez à Pasques & auoient chassé leurs femmes, & depuis ont esté plus retenus.

Il faut que ie vous die qu'on a traicté nos Peres si rudement que mesmes deux hommes desquels les Peres Iesuites s'estoient priuez pour les accommoder, ont esté retirez par force, & ne leur ont voulu donner viures quelconques, pour nourrir & entretenir quelques petits Sauvages qui souhaittoient de demeurer avec nous, bien qu'ils leur promissent de leur faire satisfaire par quelqu'vns de nos bienfacteurs, il est cruel d'estre traicté de la sorte par ceux mesme de sa Nation, mais puis que nous sommes Freres Mineurs, nostre condition est de souffrir & prier Dieu qu'il nous donne la patience.

On dit qu'il nous vient deux Peres nouveaux de France, nommez le Pere Daniel Bourfier & le Pere François de Binuille, qu'on nous auoit ia promis dès l'an passé, si cela est, ie vous prie pour surcroist de toutes vos peines

que prenez pour moy, de me faire seulement tenir vn habit qu'on m'enuoye, c'est tout ce que ie demande, car il ne se fait point icy de drap, & le nostre estant tout usé, ie ne m'en peux passer, les pauvres Religieux de saint François ayans le viure & le vestir c'est tout leur partage en terre, le Ciel nous l'esperons sous la faueur du bon Dieu, pour lequel seruir, tres volontiers, pour le salut de ces peuples aucugles nous engageons nostre vie, afin qu'il luy plaise si il l'agree de nostre soing faire germer le Christianisme en ces contrées, Dieu permet le martyre à ceux qui le meritent, ie suis marry de n'estre pas en cet estat, & n'ignore pas neantmoins, que pour estre reconnu vray enfant de Dieu, il faut s'exposer pour ses freres. Viennent donc hardiment les peines & les traux, toutes les difficultez & la mort mesme me seront agreable la grace de Dieu estant avec moy, laquelle ie mandie par le moyen des prieres de tous nos bons amys de par delà, desquels ie suis & à vous Monsieur, tres humble seruiteur en nostre Seigneur. Fait à Toanchain village des Hurons ce 18. Iuillet 1627.

Voilà tout ce qui est arriué de plus remarquable au voyage de ce bon Pere, duquel on peut remarquer ce que j'auois autrefois appris, l'enuie & malice de Hurons de ne vouloir pas permettre qu'allassions hyuerner parmy les Neutres, peur de les conduire à la traicte par vn chemin racourcy, ce qui leur seroit d'un grand preiudice à la verité, entant

qu'ils ne pourroient plus traicter avec eux & entirer les castors que les autres porteroient aux François. Le copiste de la lettre du Pere s'est mespris à mon aduis au mot Huron otoronton, qui veut faire signifier de l'huyle, car c'est proprement à dire, beaucoup, ou ô qu'il y en a beaucoup. Il y en a qui auoient voulu soustenir qu'il y auoit plus de distance de Kebec aux Neutres, que non pas aux Hurons, mais ils se trôpoient par la confession mesme du P. Ioseph qui adouë qu'en dix iournées on pourroit descendre à la traicte si on auoit trouué l'emboucheure de la riuere des Hiroquois, ou nos Hurons ne peuuent venir en moins de trois sepmaines. Je coniecture aussi facilement cest approche des Neutres de Kebec, en ce que les Hiroquois sont plus proches des François que les Hurons & les Neutres ne sont qu'à vne iournée des Hiroquois, qui sont tous tirant au Su.

Ces Neutres iouissent (selon l'aduis d'aucuns) de quatre-vingts lieuës du pais, où il se fait grande quantité de tres-bon petun, qu'ils traictent à leurs voisins. Ils assistent les cheueux releuez contre la Nation de Feu, desquels ils sont ennemis mortels: mais entre les Hiroquois & nos Hurons, auant cette esmeute de laquelle j'ay fait mention au 26. chapitre du second liure, ils auoient paix & demouroient Neutres entre les deux Nations, chacune desquelles y estoit la bien venueë, & où ils n'osoient s'entredire ny faire aucun desplaisir, & mesme y mangeoient souuent ensemble,

comme s'ils eussent esté amis; mais hors de l
s'ils se rencontroient, il n'y auoit plus d'amiti
ny de caresse, ains guerres & poursuittes qu'
continuent à outrance, sans qu'on aye encor
pû trouuer moyen de les reconcilier & met
tre en paix, leur inimitié estant de trop longu
main enracinée & fomentée par les ieune
hommes de l'une & l'autre Nation, qui ne de
mandent qu'à se faire valoir dans l'exercice
des armes & de la guerre pour la patrie, & non
pour les duels, qui sont detestez par tout ail
leurs, fors de mauuais Chrestiens & de ceux
qui ne font point estat de leur salut, qu'ils pro
digalisent à la moindre pointille d'honneur
qui leur arriue.

Le m'estois autrefois voulu entremettre
d'une paix entre les Hurons & les Hiroquois,
pour pouuoir planter le S. Euangile par tout
& faciliter les chemins de la traicte à plusieurs
Nations qui n'y ont point d'accez, mais quel
ques Messieurs de la societé me dirent qu'il
n'estoit pas expedient & pour cause, d'autant
que si les Hurons auoient paix avec les Hiro
quois, les mesmes Hiroquois meneroient les
Hurons à la traicte des Flamands, & les diuer
sifieroient de Kebec qui est plus esloigné.

De deux François tuez par vn Montagnais
qui fut emprisonné apres ses ostages ren-
dus. Du lac appellé saint Ioseph où les
Sauuages allerent hyuerner & comme
ils leuent le camp.

CHAPITRE IV.

EN la mesme année 1627. sur la fin du mois
d'Aoust, arriua à Kebec le sieur de la Rade
Vice Admiral de la flotte enuoyé par le sieur
Guillaume de Caen, pour la traiete des pelle-
teries. Le P. Ioseph le Caron Superieur de no-
stre maison, luy alla rendre ses deuoirs & offrir
les prieres de ses Religieux desquelles il fist
assez peu d'estat pour auoir deslors pris reso-
lution en son ame de faire banqueroute à
l'Eglise pour espouser vne fille à ce qu'on
croit.

La discourtoisie de ce personnage augmen-
tée par ce dessein, se fist encor voir au refus
qu'il fist de passer en France vn petit Sauuage
nommé Louys, baptizé par nos Peres le iour
de la Pentecoste dernier. Le Pere Ioseph
n'ayant pû flechir ce cœur endurcy y employa
le pere de l'enfant, qui luy fist offre d'vne
quantité de pelleteries, vallant quatre fois plus
que ne montoit la taxe ordonnée pour le pas-
sage d'vn homme en France, mais il demeura

La Rade
refuse de
passer vn
Sauuage en
France.

inflexible, on luy parle de s'en plaindre à Messieurs du conseil, & pour cela il ne s'esbranle point, par ainsi il fallut desister & auoir patience en retenant ce petit garçon par deuers nous. On nous a assuré du depuis que ledit sieur de la Rade estoit rentré au giron de l'Englise, de quoy ie louë Dieu & m'en resiouis.

En ce temps là les Sauvages commencerent de s'assembler pour la pèche de l'anguille desquels vn nommé Mahican Atic Ouche, eut quelque different avec le boulenger de l'habitation & vn autre qui auoit esté à gage de Maistre Robert le Chirurgien.

Vn Sauvage est mécontenté par deux François.

Leur dispute ne vint que pour vn morceau de pain que ces François refuserent à ce Sauvage qui leur demandoit avec quelque violence & les autres en luy refusant luy donnerent du poing & presenterent le bout d'vne arquebuzé sans dessein toutesfois de l'en offencer, mais seulement pour repousser la force par la force & la violence de celuy qui estoit violenté par la faim. Ce que le Barbare prit neantmoins tellement à cœur qu'il se resolut dès lors de les tuer tous deux au premier iour qu'il en trouueroit l'opportunité.

En ce temps là le sieur Champlain eut volonté de faire vn voyage au Cap de tourmente, pour lequel il fist choix d'vn nommé Henry domestique de la Dame Hebert & de quelques autres pour conduire sa chaloupe. Ce pauvre Henry auoit eu vn songe admirable la nuit precedente, il luy estoit aduis que reuenant du Cap de tourmente, les Sauvages le

Vouloient

vouloient tuer à coups de haches & despées, ce qui le fist crier si haut à son compagnon couché auprès de luy, Louys, Louys, secourez moy, les Sauvages me tuent, que s'estant esueillé au bruit il trouua que c'estoit songe & non point verité, & se r'assura à force de luy dire qu'il ne falloit point adiouster de foy aux songes & resueries qui nous viennent la nuit en dormant.

Sa maistresse qui ne le pouuoit dispenser de ce voyage nonobstant ses excuses & ses prieres, luy conseilla de prendre son chien & qu'il luy seroit de bonne guette, mais le malheur fut que le sieur de Champlain estant pressé de partir, le pauvre Henry n'eut pas le loisir d'embarquer son chien, qui luy eut sauué la vie & tiré du peril.

Le lendemain à certaine heure du iour Mahican Atic Ouche fut au logis de la dame Herbert luy demander vn morceau de pain, car il estoit grand amy de la maison, mais luy ayant esté respondu que celuy qui en auoit la charge estoit allé au Cap de tourmente & qu'il y en auoit pour lors fort peu à la maison, il creut entendant parler de celuy qui auoit la charge du pain que c'estoit le boulanger qui l'auoit offensé, & partant sans autrement s'informer de ce qui en pouuoit estre partie sur le soir bien tard pour l'aller trouuer au cul de sac où il deuoit coucher en la cabane du Chirurgien avec vn pauvre manouurier appelé du Moulin, lesquels ayans trouué la cabane fermée, furent contraincts de coucher

sous vn arbre enuoloppez dans leurs couuetures à cause du froid.

Le Sauvage
tue les deux
François.

Estans tous deux bien endormis arriua le Sauvage Mahican Atic Ouche , avec ses armes la hache & l'épée à onde de laquelle il leur donna tant de coups au trauiers du corps, qu'ils resterent morts sur la place sans auoir pû se faire cognoistre , ce qui leur eut sauué la vie, car ce n'estoit point à eux à qui on en vouloit, mais au boulenger de Kebec & au seruiteur de maistre Robert & neantmoins le coup estoit donné dequoy le meurtrier mesme fut fort marry , mais trop tard, car Henry estoit l'vn de ses meilleurs amys.

Ce mal-heur acheué, le mal heureux barbare tout attristé vouloit couvrir son faict, il prit les deux corps & les traisha le long de la prairie sur le bord del'eau, afin que la marée venant elle les emportast puis se rembarqua dans son canot & se retira en sa cabane où il ne fut pas le bien venu pour n'auoir point apporté d'anguilles.

Le lendemain matin les deux François à qui le barbare en vouloit furent où les deux corps morts auoient esté meurtris, & trouuans la trace du sang ingerent de ce qui estoit arriué sans sçauoir encore comment, ils suivirent la piste & trouuerent les deux cadauares sur le bord del'eau d'où ils les leurerent & les mirent en lieu de seureté hors du hazard de la marée & des flots , puis se rembarquerent dans leur canot pour l'habitation, où ils donnerent aduis au sieur du Pont Graué de ce fu-

neste accident, qui à ceste occasion despecha
 vne chaloupe au cul de sac pour en rappor-
 ter les deux corps ainsi miserablement tuez,
 puis en meisme temps enuoya aux RR. PP.
 Iesuites & à nostre Conuent aduertir quel'on
 se donnast de garde des Sauuages & fist prier
 le P. Ioseph particulierement qu'il luy fist la
 faueur de le venir trouuer pour aduiser à ce
 qu'on auroit à faire.

La chaloupe arriuée avec les deux corps
 morts estonna fort tous les François, no-
 amment la dame Hebert, laquelle se resouenant
 du songe du pauvre deffunt Henry qui auoit
 esté son domestique s'en affligea fort & disoit
 en se plaignant d'elle mesme; hélas i'ay esté en
 cela bien miserable de n'auoir point creu à cest
 infortuné garçon, qui nous auoit par le mini-
 stere de son Ange, comme aduertý de son de-
 astre à venir, mais hélas qui pourroit adiou-
 ster de foy aux songes & resueries, qui nous ar-
 riuent si souuent en dormant, sinon que l'on
 manquat de sagesse.

Les corps furent mis dans l'habitation &
 posez en lieu decent, tandis que tous les Cap-
 taines Montagnais, qui estoient là és enuirs
 de Kebec furent mandez par le sieur de
 Champlain de le venir trouuer prompte-
 ment, ce qu'ils firent avec la mesme diligence
 que le truchement Grec leur auoit enchargé,
 & du mesme pas le Sauuage Choumin avec
 son beau frere vindrent en nostre Conuent
 faisans les ignorans & les estonnez, mais bien
 dauantage quand ils virent quel'entrée de la

maison leur fust refusée par nostre F. Geruais qui en estoit le portier. Toutesfois non si rigoureusement qu'il ne mist Choumin au choix d'y entrer & non point à l'autre, s'il ne quittoit premierement, ce qu'il auoit de caché dessous sa robbe.

Il y eut là vn petit de contrastes, car les bonnes gens ne vouloient point aduoier qu'ils eussent rien de caché, & le bon Frere persuerait dans son soupçon que ce barbare auoit quelque chose sous la robbe qu'il tenoit serrée deuant son estomach, à la fin il en tira vne bayonnette, que quelque Rochelois luy auoient traitée, laquelle il donna audit Frere qui sur ceste indice leur fist quelque reprimende de leur mauuaise volonté à l'endroit des François & de la mort des deux nouuellement tuez, ce qu'il disoit à dessein pour apprendre d'eux qui en auoit esté les meurtriers & non pour aucune mauuaise oppinion, qu'il eut de ce Choumin qui nous estoit tres bon amy.

Choumin neantmoins vn peu picqué au ieu ne se pût taire qu'il ne luy die: Frere Geruais ie croy que tu n'a point d'esprit, pense tu que ie sois si meschant de te vouloir du mal ny à aucun des François: ie viens de l'habitation où i'ay veu les deux corps morts meurtris par les Hiroquois, & non par aucun de nostre Nation, car qu'elle apparence après tant de bien faicts receus que nous soyons si miserables que de tuer de tes gens, tu sçay bien toy-mesme que ie suis vostre amy & à

roustes freres, & que si i'ay deu vous rendre service ie l'ay tousiours fait à mon possible & veux continuer iusques à la mort des vous aimer comme mes freres & mes enfans. Tu diras que tu as trouué mon beau frere saisy d'un grand cousteau, mais sçache que ce n'est pas pour faire du desplaisir aux François, mais pour se deffendre des Hiroquois, dont on dit qu'il y a grand nombre dans les bois pour nous surprendre, comme ils ont fait ces deux François dequoy rendent tesmoignage nos Capitaines mandez à l'habitation par le sieur de Champlain.

Le Frere Geruais luy repliqua qu'il ne doutoit nullement de son amitié, mais qu'il ne pouuoit croire que ce fussent autres que Montagnais qui eussent fait le coup, & que s'il estoit braue homme il leur descouriroit les meurtriers pour s'en donner de garde vne autre fois, ce qu'il ne voulut faire niant tousiours, qu'il les cogneut, mais il assura le Frere qu'il feroit son possible pour les descourir & amener vif ou mort à Kebec pourueu qu'on luy rendit son grand cousteau, qui seruiroit pour leur trencher la teste s'ils faisoient les re-tifs, le frere leur ayant rendu, ils partirent pour l'habitation parler au Pere Ioseph, auquel ils conterent ce qui leur estoit arriué depuis leur entre-ueüe.

Les Capitaines Sauvages estans tous à Kebec, le sieur de Champlain les harangua & leur fist voir les corps & les playes de ces meurtrres, où se recognut que l'espée dont

on s'estoit seruy estoit vne espée ondée, qui fist paroistre à plusieurs particulièrement à Choumin, qu'elle estoit d'un de leur Nation, ce que nioit absolument Mahican Atic Ouche, qui taschoit de se iustifier & couvrir son forfait par ceste simple negatiue, mais il estoit desja tellement dans la mauuaise estime de tous les autres Capitaines de sa Nation, qui ne l'osoient neantmoins absolument condamner sans vne plus grande cognoissance de cause, qu'ils deleguerent des personnes pour en faire les informations & pour suivre contre luy.

Esrouachit soustint aussi que le faict auoit esté perpetré, avec l'espée d'un de leur Nation, & qu'il en falloit faire recherche, puis rehaussant sa voix vers tous les siens qui estoient là presens leur dit: ô hommes qui estes icy assemblez! est il pas vray que nous sommes bien meschans de tuer de la sorte ceux qui nous font du bien & nous assistent de leurs moiens, car sans eux que deviendrions nous au temps de l'extreme famine qui nous assaille si souuent, nous mourrions tous ou du moins nous souffririons beaucoup, parquoy ie vous promet, dit-il, au sieur Champlain de faire moy mesme vne exacte recherche de ces meschans pour vous les amener en vie ou en rapporter les testes, que ie vous consigneray, partant fiez vous en moy, dequoy le sieur de Champlain le loua & pria de ne desister point de ses poursuites que les criminels ne fussent des-

couuers, parce qu'il auoit esté dit & conclud par les Chefs François, que iusques à ce qu'ils fussent amenez, il ne seroit permis à aucun Sauvage d'approcher les François de vingt pas loing, soit allans par les bois ou approchans des maisons, sans que premier ils appellassent pour euiter aux surprises à peine d'estre arquebusez par les François qui n'i-roient plus sans armes, ce qui troubla fort la pesche de l'anguille car tout cecy arriva au mois d'Octobre l'an 1627. qu'elle commençoit à estre bonne.

L'on fit l'enterrement de ses deux corps le plus honorablement que faire se peut & le seruice acheué, le Pere Ioseph s'en retourna au Couuent avec Choumin, auquel on fist connoistre la malice des Montagnais, qu'il aduoüa franchement & promit que dans deux iours il scauroit les meurtriers, mais qu'il les prioit de ne point dire à personne qu'il les auroit decelez, ce qu'on luy promit, afin que la vengeance ne combat point sur luy, car entre ces Nations là il ne fait pas bon estre ennemy de personne si on ne se veut mettre dans le hazard d'estre tué.

Estant party de nostre Couuent il s'en alla droit trouuer celuy à qui il auoit veu vne espée à onde, mais vn peu trop tard, car le marchand ayant sceu qu'on le cherchoit il la ietta dans la riuiera, ou du moins il la cacha si bien qu'elle ne se trouua point, ce que voyant Choumin illuy presenta à tenir le tustebeson, duquel i'ay parlé au chap. des conseils liure

second, mais se tournant de costé il le refusa & pleurant disoit, j'ay tousiours bien ay mé Henry, ce qui estoit vray, mais ce n'estoit pas à dire qu'il ne l'eut tué.

Choumin voyant ce refus, il le presenta à plusieurs autres qui ne firent aucune difficulté de le tenir pour ce qu'ils se sentoient innocés, & puis s'en retourna chez nous, où il dit à nos Religieux qu'asseurement Mahican Atic Ou- che auoit fait le coup, & qu'il le falloit pendre, il en fut dire autant au sieur de Champlain, qui fist venir ledit Mahican pour voir s'il ad- uoueroit, mais arriué qu'il fut dans la châtre il ne fist que pleurer, disant qu'il estoit vn mes- chant, & qu'il meritoit la mort, & nya pourtāt fort & ferme qu'il eut commis le meurtre.

Et d'autant que l'on auoit trouué la piste de trois personnes de diuerses grandeurs l'on luy demanda si ces deux enfans auoient assisté au meurtre commis, il dit que non, & que n'ayant pas fait le coup il ne les y auoit pas conduits. L'on enuoya querir trois de ses enfans lesquels l'on interrogea, mais sans en pouuoir rien tirer, quelqu'vns estoient d'aduis qu'on les deuoit constituer prisonniers, & d'autres trouuerent meilleur d'en retenir l'vn & laisser aller les deux autres, qui s'en retournerent saisis d'vne telle espouente que le plus grand des deux aagé d'environ 18. a 20. ans arriuant de l'autre costé du fleuve tomba mort sur la place, ce qui estonna fort les Sauvages qui disoient que se sentant coupable, il estoit mort de frayeur d'estre fait mourir par iustice.

Les Chefs de Kebec voyans que l'on ne pouuoit lors tirer preuue suffisante pour faire mourir le meurtrier, l'on demeura d'accord avec les Capitaines Sauvages & l'accusé, qu'il donneroit son fils, & Estrouachit l'un desdits Capitaines & parent dudit accusé, vn autre des siens, & que tous deux demeureroient pour ostages iusques à ce que l'on eut decouvert le meurtrier, & que au renouveau ledit Estrouachit seroit tenu de presenter ledit Mahican Atic Ouche, ou le meurtrier conuaincu du crime.

Pendant l'Hyuer l'on fit toutes les diligences possibles pour cognoistre le malheureux, mais les Sauvages interessez en la cause opinerent tous que ce ne pouuoit estre autre que celuy duquel on se doutoit, & qu'il ne falloit s'en informer dauantage, pour ce qu'autrement on en offenceroit plusieurs pour vn.

Le Printemps venu l'on esperoit à Kebec que Estrouachit rameneroit son homme, mais craignant d'y recevoir quelque affront il le renuoya par vn Capitaine de Tadoussac, nommé le leune la Fouriere, qui le conduisit iusques à Kebec, où plusieurs Sauvages entre autre Choumin, donnerent aduis qu'il le falloit retenir comme coupable, & deliurer les deux garçons comme innocens, ce qui fut fait.

L'on esperoit bien faire son procès si tost que les Nauires François seroient arriuez, mais la prise qu'en firent les Anglois en em-

Le meur-
trier est de-
liuré.

pescherent l'exécution, & fut en fin deliuré vn peu auant qu'ils se rendissent maistres du pays, car il ne voulut iamais rien confesser du meurtre commis, bien qu'il s'accusast comme criminel, disans tousiours qu'il estoit vn meschant homme, & auoit merité la mort, mais tout cela n'estoit rien dire, car la Confession veut qu'on die en quoy on a esté meschant, & specifier les fautes.

La pèche de l'anguille fut assez bonne, bien qu'elle ne fut la bõne année, car de deux en deux ans il y en a tousiours vne meilleure que l'autre, ie ne sçay par quelle raison, sinon que le Createur l'a ainsi voulu. Les Sauuages nela firent pas si librement qu'à l'accoustumée, à cause du meurtre commis, dont ils apprehendoient la punition sans qu'on eut dessein de leur mesfaire, c'est pourquoy beaucoup souffrirent de grandes necessitez au mois de Decembre, que les neiges furent basses, & fondoient à mesure qu'elles tombaient, tellement que les Barbares ne pouuoient aller à la chasse, & si n'auoient que fort peu de poisson.

Au commencement du mois de Ianuier Choumin avec vn autre Sauuage vindrent à l'habitation, traiter quelques viures pour leur aider à couler le temps iusques aux grandes neiges, & dirent qu'il y auoit vingt cinq, ou trente personnes, tant hommes femmes qu'enfans de leur compagnie au delà de la riuere en si grande necessité, qu'il y auoit dix à douze iours qu'ils n'auoient mangé, sinon

les champignons qu'ils trouuoient à des vieux hestres, dont ils se soustenoient.

Choumin ayant eu parole des sieurs de Champlain, & du Pont qu'ils les accommoderoiēt de quelques viures à credit, il leur fit signe de passer la riniere, & se rendre vers Kebec s'ils pouuoient trouuer passage entre les glaces, comme ils firent, non sans courir de grandes risques de leur vie, mais comme de pauvres loups, la faim les faisoit sortir des bois, dont nous en eufmes huit qu'il nous fallut nourrir l'espace de huit iours, & puis se retirerēt en leurs cabanes proches de l'habitation, où ils demurerent iusques à la fin du mois de Ianuier, qu'ils s'en allerent chasser (la saison estant lors bonne) vers le lac de saint Ioseph, où ils firent bien leur profit aux despens des caribouts, essans & autres bestes qui y sont à foison.

Ce lac de saint Ioseph de grande estendue, a esté ainsi nommé par les François, à cause que le Pere Ioseph superieur de nostre maison y auoit passé partie d'un Hyuer avec les Barbares, comme en vn tres-bon endroit, tant pour la pesche que pour la chasse, comme i'ay dit, y ayant tout autour quantité de bestes fauves, & des castors en abondance, & d'où il n'y a de l'habitation que pour vne iournée de chemin en Hyuer, & encore moins en esté, mais qui est de tres-difficile accès, à cause de quatorze sauts que l'on rencontre en chemin, où il faut tout porter, & le canot, & l'équipage plus de deux lieues.

Lac de S.
Ioseph.

loin parmy les bois.

Comme il
decabanent

Le iour pris que tous les Sauvages deuoient partir pour leur retour parmy les bois, l'un d'entr'eux à ce député, le cria à pleine teste par tout le quartier, disant : O hommes qui estes icy campez, on a iugé à propos que demain matin on decabanera pour vn tel voyage, que tout le monde se tienne donc prest, car ie m'en vray marquer le chemin, ce qu'il fit en donnant quelque coups de haches à certains arbres qui leur seruirent de guide, dont s'admire l'inuention, mais bien d'auantage quand sans ces marques il passent de droite ligne, iusques à plusieurs lieux, trouuer vn nid d'oyseau, ie dis vn petit nid d'oyseau, vn morceau d'eslan caché dessous la neige, ou vne hute qui ne paroist qu'à trois pas de vous.

C'est icy ou les plus entendus Astrologues & Mathematiciens Europeens perdroient leur theorie, & leur beau discours, deuant vn peuple qui ne sçait les choses que par la pratique, & non des liures, j'ay veu des personnes que pour auoir leu de ces liures, se croyoient fort habiles gens, lesquels venant à l'experience se trouuoient fort ignorans deuant des Mariniers mesmes, qui sçauoient à peinelire. La theorie de nos Doctes est bien necessaire, mais la pratique de nos Barbares vaut encor mieux, à laquelle ie me ferois plustost qu'à l'autre.

Tout le camp estant leué, & les cabanes ruinées, ce qui se fait en fort peu de temps, le

bagage fut disposé arrangé, & accommodé sur les traifnes, qui sont leur chariots de bagages, dont les vnes sont longues de plus de dix pieds, & les autres moins larges seulement d'un pied ou peu plus, à cause de beaucoup d'arbres, & de lieux fort estroits, où il leur conuient souuent passer. Les femmes, & les filles qui en sont les cheuaux, & les mulets, se mirent sous le ioug, passans vne corde sur leur front qui tenoit au chariot, & avec cet ordre se mirent en chemin dès lendemain matin, pour passer les premieres (auant le gros de l'armée) deuant nostre maison, où elles esperoient receuoir vne ample charité qu'on leur fit le mieux que l'on peut, car elles estoient toutes si maigres & deffaictes, aussi bien que les hommes qui vindrent apres, qu'elles faisoient horreur & pitié.

Neantmoins avec toutes ces peines, ces souffrances, & ces traux, elles estoient toutes si gayer & contentes qu'elles ne faisoient que rire & chanter en chemin, ce qui faisoit estonner nos Freres qui leur portoient vne sainte enuie, de pouuoir estre patiens comme elles, parmy de si cruelles necessitez qu'elles deuoroient avec vn courage viril, en ce faisant violence, car elles ne sont point insensibles.

C'est vne leçon loüable que les Sauvages nous donnoient demeurans avec eux, de ne nous attrister point pour chose qui nous arriuât. Si tu t'attriste, disoient-ils vn iour au Pere le leune, tu seras encore plus malade, si

ta maladie augmente tu mouras, considère que voicy vn beau pays, ayme le, si tu l'aymes tu t'y plairas, si tu t'y plais tu t'y resiouyras, si tu t'y resiouys, tu guariras, & par ainsi tu viuras content, & ne mourras point miserable.

Histoire plaisante d'un Sauvage qui menagea la menestre d'une chienne, qui l'eut par apres tousiours hayne, & de trois filles Sauvages qui furent données au sieur de Champlain, pour estre instruite en la foy, & de bonnes mœurs.

CHAPITRE V.

Exemple de
l'extreme
faim des
sauuages.

Entre les exemples que i'ay rapportée de la necessité, & indigence extreme en laquelle tombent quelque fois nos Montaignais, ie n'en ay point remarqué vne plus admirable, & digne de compassion que celle que ie m'en vay vous dire, & qui vous estonnera d'autant plus que le debat estoit entre le pere, & le fils egaleement pressez de la faim. Il vint chez nous vn Barbare de la mesme Nation, surnommé Brehaut par les François, pour la raison qu'il crioit si haut quand il parloit qu'on l'entendoit de toutes parts, non qu'il fut sourd, mais mal habitué, il estoit tellement affamé, qu'apres auoir mangé vn plain

plat de pois cuits, avec vn gros morceau de pain bis, tel que nous l'auions, cest à dire bien pauvre pour la saison. Apperceuant vne chaudiere sur le feu, voulut sçauoir ce qui estoit dedans (car la faim rend les personnes importunes) on luy dit que c'estoient des peaux d'anguilles, avec du son d'orge, & des metcharre fauilles de choux, que l'on faisoit bouillir pour le disner de nos chiens. Ah dit-il que vos chiens sont bien traictez & moy ie meurs de faim, donnez moy de leur menestre, car ie ne suis pas encore rassasié.

Or comme on sçait qu'ils ne sont pas trop delicats, & qu'il n'en pouuoit arriuer aucun inconuenient. Nos Religieux ne firent aucune difficulté de descendre la chaudiere, & de luy en donner vn plein plat, qu'il aualla fort auidement en tortillant, car le bouilló estoit si chaud qu'il se brusloit sans lascher prise. Son petit fils aagé de neuf à dix ans, voulut auoir part au festin, & aualloit les peaux d'anguilles routes entieres, aussi bien que le pere, mais comme ils humoient alternatiuement l'vn apres l'autre dans vn mesme plat, il arriua que le pere aualla le bout d'vne peau, & le fils l'autre bout, & tiroient avec les dents à qui l'emporterait, sans prendre garde qu'ils se brusloient, & firent si bien que chacun eut son bout, ce qui fit grande compassion.

Mais pour ce que le pere reprochoit à son fils, qu'il estoit vn gourmand, & que le fils de mesme luy rendoit son change, disant qu'il

mangeoit tout, l'on trouua expedient pour les mettre d'accord, donner à part le manger au petit, aussi glouton que son pere a famé.

Or comme nos Religieux pensants qu'ils estoient plus que suffisant à rassasier, voulurent serrer le reste, Brehaut leur dit que s'ils l'agreoient ils viendroient bien à bout de tout, & qu'on ne leur deuoit faire vn festin à demy, de maniere qu'ils rendirent la chaudiere nette comme vn escu, apres en auoir mangé vn bon seau de menestre. Mais ce fut icy bien la pitié, car comme ils estoient fort empeschez à vuidier la chaudiere, la chienne pour qui le festin auoit esté fait estoit sous vne couche, qui regardoit avec regret ce debris, laquelle à la fin portée de cholere du mauuais seruice qu'on luy rendoit, sortit de son trou, & se ietta à ce Barbare qu'elle fincrist crier à l'ayde, ce qu'elle n'auoit iamais fait, & deslors elle ne peut plus souffrir de Sauuages en nostre Conuent, ny mesme ouyr parler leur langage sans abbayer, & faire du bruit.

Auant que les Montagnais partissent pour les bois & la chasse, ils voulurent recognoistre le sieur Champlain de quelques presents, & aduiserent entr'eux quelle chose luy seroit la plus agreable, car ils tenoient fort chers les plaisirs, & l'assistance de viures qu'ils en auoient receus. Ils enuoyerent Mecabau, autrement Martin par les François, au P. Ioseph pour en auoir son aduis auquel

il dit:

il dit, mon fils, il me souuient qu'autrefois Monsieur de Champlain a eu desir d'auoir de nos filles pour mener en France, & les faire instruire en la loy de Dieu, & aux bonnes mœurs, s'il vouloit à present nous luy en donnerions quelqu'vnes, n'en serois tu pas bien cōtant, à quoy luy respondit le Piloseph que ouy, & qu'il luy en falloit parler, ce que les Sauvages firent de si bonne grace, que le sieur de Champlain voulāt estre vtile à quelque ame, en accepta trois, lesquelles il nomma, l'vne, la Foy, la seconde, L'esperance, & la troisieme la Charité, desquelles il prit vn tel soin qu'il les fit instruire avec beaucoup de peine, non seulement aux choses de la foy, mais aussi en des petits exercices de filles, & en tapisserie qu'il leur trassoit luy-mesme, & leur monstroir les fautes, & pour ce qu'il auoit fort peu de laine, quand elles l'auoient employé, il leur faisoit deffaire l'ouurage & en recommencer vn autre d'vne autre sorte, à quoy elles obeissoient ponctuellement pour estre d'vn naturel assez patientes, & non legeres.

Sauvages
donnent 3.
filles pour
estre in-
struites.

Plusieurs croyoient que les Sauvages n'auoient donné ces filles au sieur de Champlain que pour s'en descharger, à cause du manquement de viures, mais ils se trōpoient, car Choumin mesme à qui elles estoient parentes desiroit fort de les voir passer en France, non pour s'en descharger, mais pour obliger les François, & en particulier le sieur de Champlain, qui en effect s'en tenoit

obligé, pour ce que tout son dessein en ce bon œuvre estoit de gagner ces trois ames : Dieu, & les rendre capables de quelque chose de bon, en quoy ie peux dire qu'il a grandement merité, & qu'il se trouuera peu d'hommes capables de viure parmy les Sauvages comme luy, car outre qu'il souffre bien la disette, & n'est point delicat en son viure il n'a iamais esté soupçonné d'aucune deshonesteté pendant tant d'années qu'il a demeuré parmy ces peuples Barbares, c'est pourquoy ces bonnes filles l'honoroient comme leur pere, & luy les gouvernoient comme ses filles.

Le Samedi d'apres la Purification, le Pere Ioseph partit avec le Frere Charles pour le Cap de tourmente administrer les Sacramens de Confession, & Communion à sept ou huit François qui y estoient là demeurans, mais le froid fut si grand, & le vent si impetueux qu'ils furent contraincts de couvrir en chemin, sur vn grand lit de neige enveloppez dans la couuerture d'vn extrem froid qui les pésoit faire mourir. Ce sont là des delices, & les caresses desquelles on est souvent visité en voyageant l'Hyuer, lors qu'on pour le secours de quelque ame, ou le soin de chercher sa nourriture, il faut battre la campagne, & coucher emmy les bois. Je sçay bien que le froid est assez grand en France, mais incomparablement plus long en Canada, & moindre au pays des Hurons où il fit vn peu d'excez au temps que j'y demourois, mais contre son ordinaire.

Arrivée de la flotte Angloise à Tadoussac, & la prise qu'ils firent du Cap de tourmente, avec le presage qui en suivit par la cheute de deux tournelles du fort, & d'un petit Sauvage qui fut creu fils du Roy de Canada.

CHAPITRE VI.

Je ne voudrois pas m'amuser aux augures & pronostiques des anciens Payens, ny à celles de nos modernes, qui sont ordinairement fausses, & auxquelles on ne doit adjoindre de foy. Mais Dieu le Createur qui comme vn bon pere de famille ne veut pas la perte de ses enfans ains qu'ils viennent, nous menace souvent par des signes extérieurs ou prodiges, qui nous apparoiſſent comme avant d'avant-coureurs de son prochain châtiment.

Presage du châtiment de Dieu.

La cheute inopinée de deux tourelles du fort de Kebec, advenue peu de iours avant l'arrivée des Anglois, estonna fort tous les François, lors qu'un Dimanche matin 9. jour de Juillet 1628. ils virent ce funestre eschet, qu'ils prirent à mauvaise augure. Car quelle apparence, disoient les plus devots, eussent elles pû tomber d'elles mesme en un

calme si grand, si Dieu par cette cheute leur eut voulu signifier quelque chose de malheureux. Il n'y auoit que trois ans qu'ils estoient basties, ce n'estoit donc pas la vieillesse, qui auoit causé leur ruyn, mais l'indeuotion des habitans, que Dieu vouloit chastier par le rauage des Anglois.

Il y en auoit neantmoins qui n'auoient pas ce sentiment là, & prenoient les choses au pis, car ils disoient que les imputations des ouuriers, qui trop pressés leurs ouurages n'auoient à peine le temps de respirer, auoit rueru ce bastiment là, ce qui pouuoit bien estre, disoient d'autres, car il n'y auoit année qu'il tombat quelque chose du fort, ou l'impatience des ouuriers se voyoit en ce qu'il falloit tousiours remettre la main, & faire les choses comme par despit, à cause de cet empressement des Chefs, du moins s'en plaignoient.

Arrivée des
Anglois à
Tadoussac.

Pendant cet accident inopiné & interprété ainsi à la fantaisie d'un chacun quatre Nauires Anglois, avec vn cinquantième de la compagnie, qu'ils auoient pris l'Isle perçee, entrerent au port de Tadoussac, où ayans trouué vne barque Française la firent promptement armer, & ayans rompu quelques Sauvages par présents, comme il est ayté, ils les y firent embarquer avec environ vingt de leurs hommes, qui estoient en partie François, pour le saisir du Cap

ourmente, où estoit nourry tout le bestial
 les hyuernants, & de là aller surprendre Ke-
 bec s'ils pouuoient, auant que les François
 fussent esuenté leur venue.

Mais à mesme temps que la barque eut
 eue l'anchre pour ce malheureux dessein,
 partirent du mesme lieu, nostre Napagabis-
 cou avec vn autre Sauuage de nos amis, pour
 en aller aduertir les François, sans sçauoir
 neantmoins que ce fussent François, ou An-
 glois, ny quel estoit leur dessein, & firent
 telle diligence que les ayans deuancé, ils
 arriuerent au Cap de tourmente, où ils
 donnerent aduis au sieur Foucher qui y
 commandoit, de tout ce qu'ils auoient veu,
 lequel à mesme temps despecha deux de
 ses hommes pour en porter les nouuelles
 à Kebec, mais sans asseurer quels vaisseaux
 pouuoient estre, car les Sauuages luy
 auoient dit que le Capitaine Michel y estoit
 avec plusieurs autres François, mais que
 leur Cappots & chapeaux, estoient neant-
 moins d'Anglois, c'est ce qu'ils fit douter,
 & donner l'espouuente qu'ils auroient bien-
 tost sur les bras, l'ennemy des François, com-
 me il arriua.

Le Pere Ioseph se trouua lors fort à pro-
 pos à Kebec, prest d'aller administrer les Sa-
 crements aux François du Cap de tour-
 mente, où nous auions estably vne Chapel-
 le, laquelle les Anglois ont depuis bruslée,
 avec la maison des Marchands, & esgaré
 tous nos ornemens seruans à dire la sainte

Messe. Le canot estant disposé à l'ayde d'un de nos Freres qui l'accompagnoit, partirent promptement avec ses deux Messagers arriuez de nouveau, avec dessein de donner iusques à Tadoussac, pour en rapporter de certaine nouuelle, & ne tremp plus dans les doutes de ces Nauires. Mais ayans à peine aduancé 4. ou 5. lieues dans fleuve, ils apperceurent deux canots de Sauvages venir droit à eux, avec vne diligence incroyable, qui leur crioient du plus loin à terre, à terre, sauuez-vous, sauuez-vous, car les Anglois sont arriuez à Tadoussac, ont enuoyé ce matin fourager, & brusler le Cap de tourmente.

Ce fut vne alarme bien chaudement donnée, & augmenta à la veue du sieur Fouché couché tout de son long à demy mort dans le canot, du mauuais traitement des Anglois, duquel ils sceurent au vray le succés de leur malheureuse perte.

Il ne faut pas demander s'il fallut tourner visage à Kebec plus viste qu'on n'estoit versé, mais ayans le vent, & la marée contraire, les Peres furent contraincts de ceder à necessité, cacher leur canot dans les bois, s'en aller par terre iusques à l'habitation, pendant temps fort fascheux, où le sieur de Charplain fut amplement informé du bruslement & de l'astre arriué au Cap de la tourmente en la maniere suivante.

Les barque ayant abordé le Cap, & les Anglois pris terre vne matinee que le

sial estoit desia dans la prairie, ils s'accoste
 rent de quatre ou cinq François qui en a-
 uoient la garde; & feignans estre dés leur,
 les sceurent si bien caïoler, que leur ayans
 fait croire qu'ils estoient là enuoyez de la
 part du sieur de Rocmont, pour les aduer-
 tit de la venue, & de là porter des viures à
 l'habitation, que les pauvres François de
 trop facile croyance, grandement reïouys
 de si bonnes nouuelles, leur donnerent
 libre entrée dans leur maison, & la colla-
 tion de tout ce qu'ils auoient de meilleur;
 Mais ô bon Dieu quels hostes, ils ne fu-
 rent pas plustost entrez dans ce logis mal
 gardé, qu'ils pillèrent & raderent comme
 ennemis iurez, tout ce qu'il y auoit là de-
 dans, puis ayans faict rentrer le bestial au
 nombre de quarante ou cinquante pieces,
 ils tuerent quelques vaches pour leur bar-
 que, mirent le feu par tout, & consom-
 merent iusques aux fondemens de la mai-
 son, vne seule vache exceptée, qui se sauua
 dans les bois, & six autres que les Sauua-
 ges auoient attrappé pour leur part du de-
 bris. Ce fut là vne grande desolation, &
 vne furie de gens qui ne craignoient point
 Dieu, ny d'offenser leur propre patrie, car
 comme i'ay dit, vne partie de ces voleurs
 estoient François naturels, dont aucuns
 estoient de cognoissance, qui fut la cause
 que le sieur Foucher Capitaine dudit Cap
 de tourmente, fut plus facilement trompé,
 & y pensa encor perdre la vie, car en se sau-

Les Anglois
 bruslent le
 Cap de
 tourmente.

uant dans vn canot de Sauuage, ils luy frizerent les moustaches à coups de mousquets, & emmenerent prisonniers vn nommé Piuer, sa femme, sa petite niepce, & vn autre ieune homme avec eux.

Après auoir faict ce malheureux escher ils s'en retournerent à Tadoussac avec tout leur butin, & de là avec leurs cinq vaisseaux, & vne barque, au deuant de la flotte Françoisse qu'ils attaquerent, & battirent si viuement, qu'ils s'en rendirent les maistres, comme ie diray plus amplement cy apres.

Vn garçon
cru fils du
Roy de Ca-
nada.

La victoire obtenüe, & tous les Nauirres rendus par composition. Entre les choses plus precieuses de leur pillage, ils firent particulièrement estat du petit Huron nommé Louys de sainte Foy, qu'ils croyoiēt estre le fils du Roy de Canada, & en cette qualité le traiterent & habillerent tousiours fort magnifiquement & splendidement, pensans en receuoir de grandes gratifications & recognoissances de la part du Roy son pere, mais ils furent bien estonnez qu'ayans subiugué le pays, & demandé à voir ce beau Roy pretendu, qui par vn bon-heur estoit descendu à la traite cette année là, il ne leur fut montré qu'un pauvre homme à demy nud, & tout mourant de faim, qui leur demanda à manger, & à voir son fils.

A la verité cela les fascha fort, de s'estre ainsi mespris, & que ce faux bruit de Royauté leur eut causé tant de despen-
ce, mais pourquoy simples qu'ils estoient,

croyoient ils des diademes , où il n'y auoit
 qu'vne extreme pauureté , la faute en estoit
 leur , car ils ne deuoient croire si de leger au
 rapport de quelques matelots qui se gaussent
 là aussi-bien qu'icy , d'autant plus plaisamment
 que l'oisiuete y est plus en regne Le Capitaine
 Thomas vice Amiral , luy vouloit oster tous
 ses habis & le rendre à son pere , habillé en
 Sauvage , mais quelqu'vns de ses amis luy con-
 seillerent de le laisser honnestement couuers ,
 afin d'encourager les autres enfans Hurons de
 bien esperer des Anglois , & de venir libre-
 ment à eux & laisser là les François.

Il luy laissa donc vn habit de crezé d'An-
 gleterre enrichi d'vn gallon d'argent dentelé ,
 & en cest estat le rendit à son pere , luy pro-
 mettant d'ailleurs , que si l'année prochaine il
 leur amenoit force Hurons , à la traicte ils luy
 rendroient les autres habis , qui estoient les
 vns d'escarlate & du drap du seau , chamarez
 de passemens d'argent , & d'autres de drap
 d'Angleterre minime en broderie d'argent , &
 les manteaux de mesmes.

Or le sieur de Champlain ayant esté ainsi
 amplement informé du desastre arriué au Cap
 de tourmente , craignant qu'il luy en arriva de
 mesme à Kebec , mist ordre par tout pour la
 deffence de la place. Ce qu'ayant fait on vit
 arriuer vne chaloupe de prisonniers Fran-
 çois entre lesquels estoient Piuer , la femme &
 sa niepce , avec quelques Basques , chargez
 d'vn mot de lettre au sieur de Champlain de
 la part de Kerque Admiral de la flotte Angloi-

se, qui le sommoit de luy rendre la place & luy enuoyer ses articles pour la composition qu'il luy offroit assez honorables, veu la necessité où ils estoient de viures & de munitions. Copie de laquelle lettre i'ay icy inserée avec la responce du sieur de Champlain qu'il luy enuoya par les mesmes messagers Basques dès le lendemain matin.

Lettre du
General
Anglois à
Monsieur
de Cham-
plain.

MESSIEURS, ie vous aduise comme i'ay obtenu commission du Roy de la grande Bretagne, mon tres honnoré Seigneur & Maistre, de prendre possession de ces pais, sçauoir Canada & l'Acadie, & pour cet effect nous sommes partis dix-huict Nauires, dont chacun a pris sa route selon l'ordre de sa Maiesté, pour moy ie me suis desja saisi de la maison de Miscou, & de toutes les pinaces & chaloupes de ceste coste, comme aussi de celles d'icy de Tadoussac où ie suis à present à l'ancre, vous serez aussi aduertis comme entre les Nauires que i'ay pris, il y en a vn appartenant à la nouuelle compagnie, qui vous venoit treuuer avec viures & rafraichissemens, & quelques marchandises pour la traicte, dans lequel commandoit vn nommé Norot: le sieur de la Tour estoit aussi dedans, qui vous venoit treuuer, lequel i'ay abordé de mon Nauire: ie m'estois preparé pour vous aller treuuer, mais i'ay treuue meilleur seulement d'enuoyer vne patache & deux chaloupes pour destruire & se saisir du bestial qui est au Cap de Tourmente, car ie sçay que quand vous se-

rez incommode de viures, i'obtiendray plus facilement ce que ie desire, qui est d'auoir l'habitation: & pour empescher que nul Nauire ne vienne ie resous de demeurer icy, iusqu'à ce que la saison soit passée, afin que nul Nauire ne vienne pour vous auictuailer: c'est pourquoy voyez ce que desirez faire, si me desirez redre l'habitation ou non, car Dieu aydant tost ou tard il faut que ie l'aye, ie desirerois pour vous que ce fust plustost de courtoisie que de force, à celle fin d'esuiter le sang qui pourra estre respandu des deux costez, & la rendant de courtoisie vous vous pouuez asseuer de toute sorte de contentement, tant pour vos personnes, que pour vos biens, lesquels sur la foy que ie pretends en Paradis, ie conserueray comme les miens propres, sans qu'il vous en soit diminué la moindre partie du monde. Ces Basques que ie vous enuoye sont des hommes des Nauires que i'ay pris, lesquels vous pourront dire comme les affaires de la France & l'Angleterre vont, & mesme comme toutes les affaires se passent en France touchant la compagnie nouuelle de ces pais; mandez moy ce que desirés faire, & si desirés traicter avec moy pour cette affaire, enuoyés moy vn homme pour cet effet, lequel ie vous assure de cherir comme moy-mesme avec toute sorte de contentement, & d'octroyer toutes demandes raisonnables que desirerés, vous resoudant à me rendre l'habitation. Attendant vostre responce & vous resoudant de faire ce que dessus, ie demeureray,

Messieurs, & plus bas vostre affectionné serui-
 teur, David Quer, du bord de la Vicaille, ce 18.
 Iuillet 1628. Stille vieux, ce 8. de Iuillet stille
 nouveau. Et dessus la missiue estoit escrit, à
 Monsieur Monsieur de Champlain, commen-
 dant à Kebec.

La lecture faicte par les sieurs de Cham-
 plain, & du Pont son Lieutenant, en la presen-
 ce de tous les principaux de l'habitation, il fut
 conclud après vn long conseil, de luy enuoyer
 la responce suiuant toute pleine d'honneste-
 té, & de bon sentiment.

Lettre de
 Monsieur
 de Cham-
 plain au
 General
 Anglois,

MONSIEVR, nous ne doutons point
 des commissions qu'avez obtenues du
 Roy de la grande Bretagne, les grands Princes
 font tousiours eslection des braues & gene-
 reux courages, au nombre desquels il a esleu
 vostre personne, pour s'aquiter de la charge
 en laquelle il vous a commise pour executer
 ses commandemens, nous faisant cette faueur
 que de nous les particulariser, entre autre celle
 de la prise de Norot, & du sieur de la Tour qui
 apportoit nos commoditez, la verité est que
 plus il y a de viures en vne place de guerre,
 mieux elle se maintient contre les orages du
 temps, mais aussi ne laisse de se maintenir avec
 la mediocrité quand l'ordre y est maintenu.
 C'est pourquoy ayant encore des grains, bleds
 d'Inde, poix, febues, sans ce que le pais four-
 nist, dont les soldats de ce lieu se passent aussi
 bien que s'ils auoient les meilleurs farines du
 monde, & scachant tres-bien que rendre vn

fort & habitation en l'estat que nous sommes maintenant, nous ne serions pas dignes de paroistre hommes deuant nostre Roy, que nous ne fussions reprehensibles, & meriter vn chastiment rigoureux deuant Dieu & les hommes, la mort combattans nous sera honorable, c'est pourquoy que ie sçay que vous estimerez plus nostre courage en attendant de pied ferme vostre personne avec vos forces, que laschement nous abandonnions vne chose qui nous est si chere, sans premier voir l'essay de vos canons, approches, retranchemens, & batterie, contre vne place que ie m'aileure que la voyant & recognoissant vous ne la iugerez de si facile accez comme l'on vous auroit peu donner à entendre, ny des personnes lasches de courage à la maintenir, qui ont esprouué en plusieurs lieux les hazards de la fortune, que si elle vous est fauorable vous aurez plus de plaisir en nous vainquant, de nous départir les offres de vostre courtoisie, que si nous vous rendions possesseurs d'une chose qui nous est si recommandée par toute sorte de deuoir quel'on sçauoit s'imaginer. Pour ce qui est de l'execution du Cap de Tourmente, bruslement de bestial, c'est vne petite chaumiere avec quatre à cinq personnes qui estoient pour la garde d'iceluy, qui ont esté pris sans verd par le moyen des Sauuages, ce sont bestes mortes, qui ne diminuent en rien de ce qui est de nostre vie, que si vous fussiez venu vn iour plus tard il n'y auoit rien à faire pour vous, que nous attendons d'heure à au-

tre pour vous recevoir, & empescher si nous pouuons, les pretentions qu'avez eu sur ces lieux, hors desquels ie demeureray Monsieur, & plus bas, vostre affectionné seruiteur Champlain, & dessus, à Monsieur, Monsieur le General Quer, des vaisseaux Anglois.

La responce ayant esté donnée aux Basques, ils s'en retournerent dès le lendemain matin comme i'ay dit, & navigerent pour Tadoussac où estans arrivez ils la presenterent au General Quer, lequel après s'estre informé en particulier de leur negociation, il fit assembler tous ceux de ses vaisseaux, & notamment les Chefs auxquels il leur la lettre que nous leur laisserons cōsulter à loisir, pour rapporter icy quelque petite particularité necessaire au suiet, car comme dit le sieur de Champlain, ils furent trompez par la diuine permission en ce qu'ils crurent l'habitation mieux garnie qu'elle n'estoit, où pour tout viure chaque homme estoit reduit à sept onces de poix par iour.

*Resolution de deux de nos Peres de vi-
ure parmy les Barbares, les peines
qu'ils y endurerent & la pieté d'un
Montagnais conuerty.*

CHAPITRE VII.

DAns les disgraces plustost que parmy les prosperitez on recognoist le vray amy du cœur, d'auec celuy qui ne l'est que par interest. Les Sauuages Montagnais desirieux de nouveautez, ayans sceu la venuë des Anglois à Tadoussac & la prise du Cap de Tourmente sur les François nous venoient tous les iours donner de fausses alarmes à Kebec, dont les vns tesmoignoient assez ouuertement vn desir de changement & d'en uoir chasser les François sous esperance de mieux que leur promettoient les Anglois.

D'autres tout au contraire en eussent esté *Charité* marris, comme de voir blesser la prunelle de d'un Mon- leurs yeux, particulièrement nostre Napaga- tagnais. biscou, qui plein de ferueur comme l'Eunuque de Candax Royne d'Ethiopie ne cherchoit que l'occasion de rendre seruice à ses bien-fa-cteurs, & de faire voir que ce n'estoit pas en vain qu'on l'auoit fait Chrestien, mais par in-*Charité* spiration du Ciel, s'adressa au Pere Ioseph & luy dit: Pere Ioseph, à ce que j'ay pû appren-

dre les Anglois brusleront l'habitation, (ce qu'il disoit pour leur auoir veu brusler le Cap de Tourmente) & vous feront tous prisonniers, ce qui me seroit le plus sensible desplaisir qui me sçauroit iamais arriuer. Parquoy ie te supplie que tu aye soin de toy & de tes freres, & que tu me donne Frere Geruais, afin que ie l'emmeine avec toy au pais des Algonmequins, ce sera vn bien pour vous & pour moy, car outre que vous ne tomberez pas entre les mains des Anglois vous vous perfectionnerez en nostre langue, me confirmerez en la foy & enseignerez les autres qui ne sont pas encores instruits comme moy, & si tu veux me donner encor vn autre de tes freres fais le venir promptement, car i'en nourriray bien iusques à trois. Si ie souffre de la faim ils en souffriront & si i'ay de quoy manger ils en auront, & par ainsi ils n'auront pas pis que moy, si mieux ils ne peuuent auoir.

Le P. Ioseph demanda au F. Geruais s'il vouloit biens'exposer à ce danger & se resoudre de viure & mourir parmy les pauvres gens, veule peril eminent d'estre pris par les Anglois qu'on attendoit de iour en iour à Kebec, mais le bon Religieux qui sçauoit l'importance de l'affaire, & que ce sont choses que l'on doit meurement considerer auant de les entreprendre, demanda temps de respondre & aduiser à ce qu'il auroit à faire, puis se resolut à la fin de se rendre miserable parmy les miserables pour l'amour d'un Dieu, qui s'estoit fait pauvre pour l'amour de nous, avec cette espe-

rance de profiter aux Sauvages & à luy meſme en cet employ, & que toſt ou tard, le païs ſeroit rendu aux François, comme il eſt arriué.

Cette reſolution reſioüit extrêmement le Pere Ioseph & en loüa Dieu, & de ce pas s'en alla trouuer les ſieurs de Champlain & du Pont auxquels il fiſt ouuerture de leur bon deſſein, & comme ils auoient reſolu de s'en aller parmy ces pauures Barbares, travailler à leur conuerſion, & pour y maintenir l'autorité des François, attendant l'eſloignement des Anglois qu'on eſperoit en bref à cauſe du ſecours qui approchoit, mais qui ne reuſſit pas.

Meſſieurs les Chefsayans ouy & conſiderés les raiſons de ce bon Pere, & que ſans apprehenſion ny de la mort, ny de la faim, il vouloit s'expoſer dans des hazards autant perilleux que dangereux, loüerent ſon zele, approuuerent la reſolution & le prièrent de partir au pluſtoſt, crainte qu'eſtant ſurpris par les ennemis, ils ne vinſſent à perdre vne ſi belle occaſion, & l'offre de ce Sauvage nouuellement conuertý.

Ils ſe diſpoſerent pour ce voyage & ayans laiſſé Frere Charles & les autres Religieux avec les RR.PP. Ieſuites & imploré le ſecours de leurs ſainctes prieres, ils partirent le 19 iour de Iuillet 1628. par vn tres-mauuais temps, de maniere qu'encor bien qu'ils euſſent le vent de Nordeſt, & leur chemin au Suroueſt, ils ne purent faire ce iour là que huit ou neuf

Nos deux
Freres par-
tent avec
les Sauua-
ges.

lieuës à raison d'une disgiace qui leur pensa
 arriuer, car allans à plainue voile par le milieu
 de la riuere ayans vent & marée, les flots don-
 noient si rudement contre leur canot & de-
 dans le vaisseau mesme, qu'ils penserent sub-
 merger, & furent contraincts de tirer du costé
 de la terre & ietter de leurs hardes dans la ri-
 uiere, pour soulager ce petit batteau d'es-
 coree.

Vn canot
 blessé & vn
 autre sub-
 mergé.

Mais comme les furies de la riuiere alloient
 croissans, pensans renger la terre ils furent iet-
 tés du vent & des flots sur vn rocher, où il-
 eurent plus de peur que de peine, iusques à vn
 autre rencontre qui blessa en deux ou trois
 endroits l'un de leurs canots, en rompit vn
 autre & precipita tous les Sauvages dedans
 l'eau, qui se sauuerent à la nage. Il y auoit en-
 core enuiron vingt lieuës de là iusques aux
 trois riuieres, que ces pauvres submergez fu-
 rent contraincts de faire à pied avec des peine
 infinies, à cause de certaines petites riuieres
 qu'il faut trauffer en chemin.

Auant d'arriuer ils raccommoderent les
 deux canots blessez au milieu d'une prairie
 vers le lieu appellé de sainte Croix où des-j
 estoient arriuez deux canots du païs, qui tou-
 quatre relterent le reste du iour & de la nuit
 couchez à l'enseigne de la Lune en mesme
 hostellerie. L'appetit leur deuoit estre for-
 t aiguë, car ils n'auoient mangé de tout le iou-
 rs vn peu de sagamité à cinq heures du ma-
 tin, & puis adioultez y les fatigues nompareil-
 les de la riuere irritée par les vents, & vou-

trouueriez qu'ils eussent bien merit  quelque
autre de plus excellent qu'un peu de sagamit 
de six ou sept morceaux de galettes qu'on leur
donna avec quelque poix rostis pour tuer leur
plus grand appetit. Il est vray que j'ay aucune-
fois experiment  une faim si furieuse sur le
chemin des Hurons, que ie me fusse volon-
tiers iett   en brouter les herbes & les raci-
nes, si ie n'en eusse apprehend  le poison de
quelqu'un, c'est ce qui me faisoit courir les
bois & les lieux escartez pour y chercher des
petits fructs que la nature y produit, mais qui
sont aussi tost enleuez par les enfans des Bar-
bares.

Environ la mi-nuict la mar e fut grande &
tellement dilat e, qu'elle s'estendit par tout o 
ils estoient couchez & les obligea de se remet-
tre sur les eaues, o  ils furent encores tellem t
tourmentez & agitez des vents & des pluyes
continuelles, qui leur donnoient de tous co-
tez qu'ils ne scauoient comment se pouuoir
conduire avec les seuls flambeaux d'escorces
qu'il auoient pour toute clart  & leur fai-
soient souuent eclipse.

Le premier canot qui faisoit l'auantgarde,
sonna si rudement contre un rocher qu'il y
ensa couler   fond sans que la diligence des
sauuages le p t emp cher d'estre bless , ce que
voyans & qu'ils ne pouuoient en fa on du
bonde se gouverner, ils descendirent 4. filles
terre pour chercher lieu de se cabaner, (car
c'est un de leur soin avec les f mes,) mais elles
se rencontrer t par tout que des eaues & des

fanges , où elles enfoncerent en quelque endroit iusques à la ceinture dont l'une s'y pernoyer, car l'obscurité de la nuit estoit si grande qu'ainsi embarrassées elles ne purent retourner à leurs canots & fallut promptement battre le fuzil & allumer des flambeaux pour aller retirer , après quoy on chercha place pour y passer le reste de la nuit , mais ô malheur ! Dieu qu'elle nuit où le repos estoit vn martyre.

Enuiron les six heures du matin arriuerent à eux quatre canots, qui alloient à Kebec pour tirer des vitres, ils aduouierēt auoir soufferts les mesmes disgraces de nos hommes , vn canot perdu & des peines au delà de leur pensée, qu'ils auoient reduits iusques à l'extremité, mais comme j'ay peu quelquefois pratiquer entre nos Hurons, après estre sortis de quelque mauvais heureux passage, où à la fin de quelque iournée laborieuse, ils firent festin & chanterent par ensembles, puis se separerent & allerent chacun leur chemin, conduis d'un vent que Dieu leur donna fort fauorable, lequel les reduit en peu d'heures iusques aux trois riuieres où estoit posé vn camp de Motagnais & d'Agoumequins, qui les receurent avec vne ioy & applaudissement d'un peuple affectionné enuers nos pauures Religieux, ils estoient attendans la maturité de leurs bleds & de leurs trouilles desja assez aduancez pour la saison.

Ces bons Peres avec leurs hostes se cabanerent là avec eux, où à peine eurent ils passé huiet iours de temps, qu'il leur arriua nou-

elle de l'esloignement des Anglois, avec lettres des Chefs de Kebec, par lesquelles ils les supplioient de retourner à leur Conuent, puis que les plus grands dangers sembloient estre assez, neantmoins qui furent bien deplorables quelques temps après, & la ruïne de tout le pais.

La nouuelle n'en fut que tres-bonne, mais e qui en augmenta la ioye fut l'arriuee de 20. anots Hurons, dans l'un desquels estoit le V. P. Ioseph de la Roche, haslé, maigre & deffait comme vn homme à qui la necessité auoit enuoyé forces ieunes, & le Soleil du haslé, car c'est le teint & le maigre que l'on prend d'ordinaire, en si austere voyage où l'on ne iouyt d'aucun contentement que celui de la bonne conscience.

Retour du
P. Ioseph
de la Roche
du pays des
Hurons.

Tous ces bons Peres s'entrecarefferent à l'enuie & se regalerent plustost de discours spirituels que de bonne chere, après auoir rendus leurs actions de graces à Dieu, car sans toutes choses c'est à ceste premiere cause qu'il faut rendre ses vœux.

Après le repas ils aduiferent par entr'eux s'ils deuroient retourner tous trois à Kebec, ou non, d'autant que les Sauuages ayans appris que l'on les mandoit de Kebec, en auoient esmoigné du mescontentement, particulièrement le nouveau Chrestien & les anciens & vieillards, qui après leur conseil s'offrirent de les nourrir tous trois, & de prendre soin d'eux comme de leurs propres enfans.

Le P. Ioseph superieur, les remercia de leur

bonne volonté, & les assëura de la tesmoigner par tout enuers les François, qui ne s'en redroient iamais ingrats, ny luy particulièrement, mais qu'au reste il auoit à les supplier de vouloir agreer leur retour à Kebec, puis que les Capitaines le desiroient & qu'il ne pouuoit les refuser. A tout le moins laissë nous le Frere Geruais, repliquerent les Barbares, afin que nous demeurions pas sans instruction, ce que le Pere Ioseph leur accorda, de quoy ils furent fort contents & l'en remercièrent.

Mais comme ils estoient encores empeschez à separer leurs hardes & disposer de leurs paquets pour s'en aller les deux PP. Ioseph à l'habitation & le F. Geruais aux Algoumequins ils receurent derechef vn nouveau mandement de s'en retourner tous à Kebec, le plus promptement que faire se pourroit, ce fut icy où le pauvre baptizé monstra ses sentimens, car les voyans tous trois resolu de s'en aller à Kebec, puis que les Chefs le desiroient, il protesta en pleurant qu'il ne descendroit d'un an aux François, deuit il mourir de faim l'Hyuer non pas mesme à la pesche de l'anguille, qui se fait tous les ans à la riuere S. Charles, depuis la my-Aoust, iusques à la my- Octobre, beaucoup en disoient de mesme & ne se pouuoient consoler pour n'auoir de consolateur, car enfin ils se sentoient trop heureux d'auoir de nos Religieux avec eux.

Je ne scay si ie dois blasmer ces Peres ou non, en ceste action, car ils pouuoient auoir des sujets preignans, mais il est vray que i'eusse bien

esperé de mes excuses à Kebec, & n'eusse pû es-
conduire ces pauvres gens en vne priere si sa-
lutaire & raisonnable, puis que toute leur in-
tention n'estoit que pour leur propre salut &
édification; hélas! qu'eussent ils pû esperer da-
vantage d'eux, estans pauvres & desnuez de
tous les biens de la terre, & suiets à viure des
aumônes d'autrui, sinon leurs instructions &
l'effect de leurs prieres, c'est ce qui le faisoit
affliger & tenir bon dans la resolution que
nostre Sauvage prist les pensans gagner, de ne
descendre à Kebec que l'Hyuer ne fut passé,
comme il fist & alla hyuerner avec les Algon-
mequins.

Neantmoins au mois de Mars ensuiuant il
reuint en nostre Couuent, non les mains vui-
des & priué de bons sentimens, mais chargé
de deux testes d'eslans qu'il donna à nos Reli-
gieux disans: tenez voyla pour vous monstrier
que ie ne vous ay point mis en oubly, & que
m'ayans quitté pour obeir aux Capitaines
François, ie n'ay point perdu la bonne affectio
que i'ay tousiours eue pour vous. Tous les
iours ie regrettois vostre absence & m'esti-
mois miserable de me voir si esloigné de vous,
car n'ayans pas de memoire assez, pour rete-
nir les choses que m'auiez enseignées, ie crai-
gnois de mourir en peché & n'aller point en
Paradis, pour ne les auoir retenues & entiere-
ment obseruées.

De la subtilité d'un Sauvage pour tromper les Anglois , & de la nécessité qu'on souffrit à Kebec , auquel temps on nous donna deux petits Montagnais à instruire.

CHAPITRE VIII.

Pierre Anthoine Canadien.

I'Ay dit au quatriesme liure de ce volume, chapitre premier, que Pierre Anthoine Patetchounon Canadien , fut renuoyé par nos Religieux de Kebec entre ses parens, pour reprendre les idées de sa langue qu'il auoit comme oubliées en France. Mais s'estant par cas fortuit rencontré à Tadoussac à l'arriuée des Anglois qu'il pensoit estre François, il fut à leur bord les saluer, mais ayant esté reconnu par quelqu'un qui s'estoient donnez aux Anglois, spécialement le Capitaine Michel, ils en donnerent aduis à leur Admiral, qui le retint pour leur servir de Truchement & faire descendre les Nations à la traicte, qu'ils vouloient là establir par le moyen de quelques presens.

L'Admiral commanda donc qu'on ne le laissât point aller, & qu'on luy fit caresse pour ne le point effaroucher, puis l'ayant fait venir à son bord & en particulier dans sa chambre luy parla François, mais le Sauvage feignit ne

l'entendre point, il luy parla latin, il en fit de mesme ; Mais le Capitaine Michel arriuant là dessus, le contraignit de respondre en l'vne, ou l'autre des deux langues, luy disant qu'il le cognoissoit tres-bien, & sçauoit sa capacité, pour l'auoir veu en France, & sceu qu'il y auoit estudié, & esté fait Chretien.

Le garçon se voyant descouuert, & qu'on luy refusoit la sortie du Nauire, & à ses Freres, s'aduisa d'vn autre expedient fort favorable qui le mit en liberté, & luy donna de quoy viure. Or ça, dit-il au Capitaine Michel, que desirez vous de moy, i'ay toutes les enuies du monde de vous seruir, & de laisser là les François, car Monsieur l'Admiral est vn tres-brave homme qui m'a obligé iusques à ce point, de faire tout ce que vous voudrez pour l'amour de luy, mais i'ay pensé aussi qu'estant homme d'honneur, comme vous estes, vous me ferez aussi la faueur de ne me point manifester aux François, particulièrement aux Peres Recollects, à qui i'ay l'obligation du saint Baptisme, & de ce que ie sçay, car ils ne seroient pas contents de ma reuolte, & ne feroient plus estat de moy. Voyez vn peu l'esprit du garçon, comment il sçait bien accommoder son fait.

*Patet choa-
non trompe
les Anglois.*

Ce n'est pas tout il demande qu'on luy laisse conduire l'affaire, & monter aux trois riuieres dans vne chaloupe luy cinquiemes, sçauoir ses deux freres, & deux autres Sauuages de ses amis, ce qui luy fut accordé

avec vn baril de gallettes, vn baril de biscuit, vn autre de poix, vn baril d'eau de vie, & vn de vin, avec vne couuerture & quelques autres petites hardes qu'on luy donna, à condition qu'il leur seroit fidelle, ce qu'il promit, & tout ce qu'on voulut, & n'en fit rien, car au lieu d'aller aux trois riuieres, ils tirerent droit à l'Isle rouge qui est deuant Tadoussac, & puis passerent de l'autre costé de la riuere, où ils firent bonne chere, & se moquerent de nos Anglois.

Les Anglois estoient cependant tousiours aux escoutes, attendant de iour à autre le retour de leurs messagers, & de quantité de Sauuages qu'ils auoient promis de leur amener chargez de pelleteries, & ne voyoient rien venir, mais ils furent bien estoonnez qu'apres auoir long temps attendu on leur vint donner aduis qu'ils s'estoient moquez d'eux, & fait bonne chere à leur despens au delà de l'Isle rouge, ce qui mit les Anglois tellement en cholere qu'ils iurerent par leur Dieu de ne pardonner iamais à Pierre Anrhoine, & de le pendre s'ils le pouuoient attraper, mais ils ne tenoient rien, car les Sauuages sont plus d'fficiles à prendre que des lieures quand ils tiennent les bois.

Et comme ils estoient encores tout eschauffez dans leurs choleres, arriua la barque qu'ils auoient despeschée au Cap de tourmente laquelle leur ayant réduit compte du rauge qu'ils y auoient faict, & donné à leur Admiral, la responce du sieur de Cham-

plain, prindrent resolution de retourner vers Gaspé, pour combattre la flotte Françoisse qu'ils esperoient trouuer en chemin, comme ils firent.

Le 18. iour de Iuillet, le sieur de Rocmont Admiral des François, ayant eu le vent de l'approche des Anglois, prit les brunes pour euiter le combat, auquel neantmoins il fut engagé par la diligence des ennemis, qui le vainquirent, & rendirent prisonnier, comme ie diray plus amplement au Chapitre suiuant.

Mais auparauant de faire rencontre des ennemis, il despecha vne chaloupe avec dix ou douze de ses hommes, pour donner aduis à Kebec de son approche, avec commandement au commis Desdames de luy faire sçauoir au plustost l'estat de la maison, ce qu'il ne pût effectuer si tost, car arriuant à Tadoussac, d'où les Anglois estoient partis, il apprit des Sauuages la restez, la prise du Cap de tourmente, dequoy il fut extrêmement affligé, & d'ailleurs il fut acertené du combat qui se deuoit donner, entre les deux flottes, qui l'obligea d'en attendre l'issüe, & despescher promptemēt vn canot avec trois de ses hommes au sieur de Champlain, pour l'informer de tout ce qui se passoit, & sçauoir si au vray les Anglois l'auoient mal traité comme le bruit en couroit.

Le canot arriué le sieur de Champlain amplement informé des choses qui le metoient en peine, le renuoya dès le lendemain matin

auec ses despesches, qui ne furent pas loing, car peu de iours apres arriua la chalouppe à Kebec auec Desdames, & dix de ses compagnons qui crioient à la faim, pour auoir (disoient-ils) seiournez vnze iours à Tadoussac & mangé tous leurs virtuailles, attendans l'issüe du combat qu'ils n'auoient pü apprendre, ce qui leur estoit de fort mauuais augure. Ils furent neantmoins receus selon la puissance & necessité du lieu, qui manquoit desia de pain, de vin, de sel, de beure, & de toute esperanee d'en pouuoir auoir d'vn an entier, la flotte ne paroissant point.

Cette misere les fit resoudre de viure doresnauant en paix, les vns auec les autres de ce peu qu'ils auoient, sans se porter d'impatience, où elle estoit plus necessaire que iamais, vne chose leur fut fort fauorable, vne quantité de Hurons descendirent ce mesme temps à la traite, lesquels emmenerent bon nombre de leurs hommes moins vtiles, qui fut autant de soulagement pour le pays, car sans compter les vnze venus de nouueau, ils estoient près de quatre-vingts bouches à l'habitation.

Le sieur de Champlain voyant son monde diminué à la faueur de Hurons, pensa au salut du reste, ausquels il ordonna pour chacun cinq petites escuellées de poix ou febues par sepmaine, sans pain ou viande, car il ne s'en parloit plus, & de ces poix ou febues ils en faisoient vne espee de menestre ou

bouillië , composée en partie de certaines herbes & racines qu'ils alloient chercher par les bois.

Nos Religieux en deuoient auoir leur part comme les autres , mais à raison de la grand souffrance & necessité qu'ils voyoient en plusieurs , ils la cedirent facilement , & se contenterent d'un peu de bled d'Inde qu'ils auoient amassé de leur desert , duquel ils nourrirent encor vndouurier , & trois petits enfans , sçauoir vn François , & deux Sauvages , sans les charitez & aumosnes qu'ils faisoient aux plus necessiteux , aymans mieux souffrir diserte des choses , que de manquer à aucun de ce qui estoit en leur puissance , mais avec vn tel excez , que s'ils n'eussent esté eux-mesmes secourus par la Dame Hebert , de deux barils de poix , ils se rendoient tout à fait miserables , & pour mourir de faim , car outre que les racines & les choux de leur lardin auoient esté également distribuez par les chambres , le grain leur auoit manqué , & n'auoient plus que fort peu de febues , de racines , & de glans , dequoy ils se nourrissoient principalement , sinon qu'au mois d'Octobre suuant les Sauvages leur firent presents de quelques pacquets d'anguilles qui les remirent sus pieds , & voicy comment.

Ie vous ay dit au Chapitre 4. de celiure comme les François auoient emprisonné le Sauvage Mahican Atic Ouche , accusé d'auoir tué deux François , dequoy les Barbares estoient fort en peine , mais encor plus

de ce qu'on ne le mettoit point en liberté, & pour ce conclurent entr'eux en vn conseil qu'ils tindrent exprés, qu'ils n'assisteroient en rien les François, ny d'anguilles, ny d'autres viandes, & blasmerent fort Choumin de leur auoir porté de ses viures, particulièrement à Kebec, car pour nos Religieux ils ny repugnoient point, & n'auoient aucune difficulté qu'on leur fit la charité pendant vne si grande famine, mais Choumin qui n'auoit pas seulement de l'amitié pour nous, mais pour tous les François continua de leur faire du bien, & les assister en ce qu'il pouuoit, ce qui faisoit que le sieur de Champlain le caressoit, & en faisoit estat par dessus tous les autres Sauvages, qui ialoux & enuieux d'un tel honneur, en voulurent meriter autant par autres bienfaits, & deslors firent des presens de viures aux François, qui leur vinrent fort à propos, comme la manne aux enfans d'Israël dans le desert.

Sur la fin du mois d'Octobre, les Sauvages ayans mis ordre à leurs affaires pour leur hiuernement dans les bois, & parmy la campagne, ramenerent à Mahican Atic Ouche encor prisonnier, son petit garçon aagé de 4. à 5. ans, pour en auoir le soin, d'autant que personne ne s'en vouloit charger, & mesme ses parens l'auoient voulu laisser sur le bord de l'eau, afin qu'ennuyez de cet exil, où il mourut de faim ou de regret, ou se precipitât dedans le fleuve, c'est à dire qu'ils vouloient qu'il mourut pour en estre, sans

pitie deschargez.

Le pauvre Mahican Atic Ouche eut bien desiré iouyr de la presence de son fils, mais y ayant si peu de viures à l'habitation, c'estoit assez d'y nourrir le pere, sans y adionster le fils, qui fut abandonné de ses parens, & du pere qui n'estoit point en liberté, ny en puissance de luy pouuoir ayder. Ce qu'estant le Pere Ioseph luy fit offre de le nourrir & instruire, moyennant qu'il souffrit apres qu'on le menast en France, à quoy le pere obtemperant luy accorda facilement son fils qu'il mena à nostre Conuent, aussi ioyeux & content que s'il eut acquis vn Empire à Iesus.

Enuiron la saint Martin de la mesme année 1628 la femme de feu Mecabau, autrement Martin, qui auoit esté baptisé chez nous, amena son petit fils nommé Chappé Abenau, qui nous auoit tant de fois esté recommandé par feu son mary, le peu de viures qu'il y auoit en nostre Conuent mit lors fort en peine nos Religieux, car de le refuser sceut esté crime enuers cette femme, & perdre l'occasion de sauuer cette petite ame, & de le receuoir c'estoit augmenter leur misere desia assez grande, mais le plus assuré estoit de retrancher chacun vne partie de sa petite portion pour ce petit, ce qui fut fait à l'edification de tous, & avec la mesme gayeté qu'on s'estoit desia retranché pour d'autres particuliers de l'habitation.

La mere voyant son fils placé & hors de

danger de mourir de faim, s'en retourna aussi tost avec ceux de sa Nation, le Pere Joseph comme Superieur preuoyant pour l'aduenir, fit mesurer tout le grain qui estoit au Conuent, afin de voir combien l'on en pourroit vser tous les iours, & trouua que pour iusques à la my May à huit personnes qu'ils estoient, il n'y auoit pour chacune personne, que trois fois plain vne escuelle à potage de farine, moitié de poix, & moitié d'orge, qui estoit peu, n'eust esté les racines de nostre iardin, lesquelles leur seruirent de pain, car d'aller à la queste, les autres n'auoient pastrop pour eux. Il est vray que les Sauvages les assisterent d'anguilles, mais qui deuiendrent d'un si mauuais goust, faute d'auoir esté suffisamment salées, que les François s'estonnoient comme nos Religieux n'en estoient empoisonnez.

Voyage des Peres Daniel Boursier, & François Girard Recollets, pour la Nouvelle France. Comme ils furent pris par les Anglois, puis renuoyez avec un Gentilhomme, sa femme, & sa famille, & des grandes risques qu'ils coururent en chemin.

CHAPITRE IX.

LA diuine & adorable prouidence a des ressorts incognus aux hommes, par le moyen

moyen desquels il afflige les siens quād il luy plaist, & en la maniere qui luy est plus agreable, sans que nous puissions en cela faire autre chose qu'admirer ses diuins Iugemens, & luy dire en toute humilité, O mon Dieu vous soiez à iamais beny, qui nous affligez icy bas, pour nous rendre bien-heureux la haut en Paradis.

Au temps que les Rochelois faisoient la guerre en France, & qu'on voyoit le Canada en vn peril plus eminent de changer de maistre, Messieurs les nouueaux associez firent équipper 4. vaisseaux à Dieppe pour l'aller renuitailler, & fournir des munitions necessaires, sous la conduite du sieur de Rocmont, comme i'ay dit au Chap. precedent. Dans 2. de ses Nauires s'embarquerent avec 2. PP. Iesuites, deux de nos Religieux, sçauoir le P. Daniel Boursier, & le Pere François Girard, pour le secours de nos Freres qui estoient dans le pays, apres s'estre au prealable humblement recommandé à Dieu.

Ils se mirent sous voile au mois d'Auril de l'an 1628. & sous la faueur de leurs quatre vaisseaux, 13. ou 14. petits Nauires, qui sous cette escorte passerent la manche, & se renderent en terre Neuue, pour la pesche de la morue. Mais à peine la flotte se vit elle partie du port, & singlans en mer, qu'elle se vit aussitost accueillie d'vne tourmente fort grande, pendant laquelle deux grands vaisseaux Rochelois, d'environ 200. tonneaux chacun, les vinrent costoyer & essayer d'en surpren-

dre quelqu'un, mais en vain, car les quatre vaisseaux se joignans ensemble avec tous les autres pour leur deffence commune, tournerent teste à ses Pirates & leur donnerent la chasse à coups de canons.

La tourmête qui cōtinuoit les alloit encore menaçâs d'un autre plus mauuais party que des Rochelois, s'ils n'eussent promptement relâchez à la rade de honque, où ils seiournerent près de 8. iours, pendant lesquels les RR. PP. Iesuites, & les nostres eurent tout loisir de dire leur Chapelets, & catechiser les Mattelots & passagers, qui s'estoient en assez bon nôbre embarquez pour habiter le Canada, si par malheur les Anglois ne les eussent descoisfis, & renuoyez en France, comme ie diray cy apres.

La tourmente passée on se remit sous voile, mais aussi tost vn Nauires Holandois parut & les vint recognoistre, lequel ayât esté couru, pris & amené par les nostres, fut fouillé, sous la croyance qu'il estoit Pirate, comme en effet, la mine, la desmarche, & les gens reuesches & mal conditionnez, en donnoient de fortes coniectures, neantmoins apres l'auoir gardé vingt quatre heures & plus, on le laissa aller, comme nous fismes nostre Anglois, faisant le mesme voyage. Il y en auoit pourtant de nostre equipage qui trouuoient à redire à cette douceur, alleguans pour principale raison des exéples signalées de la barbarie des Anglois, & Holandois à l'endroit des François, lors qu'ils les trouuoient à les-

part & sans tesmoins, voire qu'ils vsoiēt mes- Hollandois
perfides
me souuent de perfidie, comme les Holan-
dois ne tesmoignerent que trop à l'encontre
du fils du sieur du Pont Graué, estant au Mo-
luques, chargé d'espiceries pour la France,
car l'ayant inuité à leur bord, pour le festiner,
sous les apparences d'une amitié cordiale, à
peine furēt-ils en train de boire & rinsser les
verres à la santé de leurs amis, qu'ils enuoye-
rent mettre le feu dans le Nauires de ce ieune
Gentilhomme, pour le priuer luy & la Frâce,
de ce qu'il emmenoit, ô enuie insupportable,

Mais qui ne se fut affligé d'une telle perfidie Régrets de
s'estre lié
aux Holan-
dois.
& desloyauté, il eut fallu estre de bronze &
insensible cōme vne pierre, ce ieune homme
esleuoit les yeux au Ciel, imploroit son se-
cours, & reprochoit à ces mechans leurs a-
ctions infames, pendant que son pauvre Na-
uires se consommoit & reduisoit en cendres.
Helas, disoit-il, en contemplant du haut de la
dunette son honneur, & ses biens cōsommez
dans les flāmes, falloit il que ie crusse à la pa-
role des ennemis de Dieu, s'en est ma couppe,
& ma faute, ie ne m'en puis prédre qu'à moy
me me, ne deuois-ie pas sçauoir que celuy
qui est infidel à Dieu, l'est ordinaiemēt aux
hommes, mes pechez m'ont causé ces disgrā-
ces, ô Seigneur qu'au moins elles seruent à
mon salut, les ennemis m'ont affligé de tous
costez, & suis confis dans les amertumes de
mon cœur; O mort ne me sois plus cruelle, &
ne me fais point languir, ie t'appelle à mon
secours, rāy mon ame, & qu'elle soit pour le

Ciel, car ie ne puis plus viure sur la terre, & pres' auoir veu commettre vne telle perfidie en mon endroit, par ceux qui ne subsistent que par l'assistance de mon Roy, les forces me manquent, les tristesses m'accablent, & les ennuys me conforment, comme le foin deuant la flaine.

Oraison à
Dieu, du
Gentilhō-
me.

O mon Dieu, disoit ce pauvre Gentilhomme, ie recommande mon ame entre vos mains, ie vous demande pardon de tous mes pechez passez, avec vn regret infiny d'auoir irrité vostre diuine Iustice, vous estes mort pour moy mon Sauueur, & de quoy seruiroit ce Sang tres-precieux qui est decoulé de vos playes, sinon pour nettoyer nos coupes, & les taches du peché qui ont enlaidy mô ame. Vous estes mon Dieu, & ie suis vostre creature, vous estes le tout Puissant, & ie suis vn neant, & de quoy vous seruiroit que ie fusse perdu, ceux qui sont aux enfers ne vous louent point, & les bienheureux chantent vos louanges, & les misericordes qui sont eternellemēt en vous. l'espereray dōc en vous ô mon Iesus nonobstant mes fautes, car vous ne perdez que les obstinez. La Vierge & les SS. que i'inoque à mon secours, vous priēt pour moy, & offrent au Pere Eternel toutes vos souffrances, les leurs, & celles que i'ay souffertes au reste de ma vie. en satisfactiō de mes pechez.

En acheuant ses prieres, il entra en l'agonie de la mort, & rendit son ame entre les mains du Createur, comme pieusement nous pouuons croire. Ce fut vn grand dommage de ce

jeune homme, car il donnoit de grandes esperances de sa personne, tant de sa valeur que de son bel esprit, mais l'enuie de l'heretique Holandois, qui ne veut auoir de compagnon à la nauigation s'il n'est plus fort que luy, luy osta les biens, & la vie.

Reprenons nos brisées, & disons que la flotte ayant rins mer enuiron cinq ou six semaines, arriua fauorablement sur le grand Banc, où tous les Matelots ayans la ligne en main pescherent quantité de moluës pour leur rafraichissement, car les salines que l'on a pour tout mers en mer, lassent extrêmement. Apres quoy ils aborderent les Isles d'Anticosti, ausquelles ayans mouillé l'ancre, les Peres avec tout le reste de l'equipage descendirent à terre, louerent Dieu, puis ayans planté vne Croix au nom de Iesus, qui les auoit là conduits, se rembarquerent & tirerent droit aux Isles percées, où ils trouuerent vn Nauire de ceux qui estoient party de Dieppe avec eux, lequel s'estant senty bon voylier pour esquiuier l'ennemy, auoit pris seul le deuant à l'issuë de la manche pour arriuer des premiers à la pesche, comme il fit.

La flotte ayant seiourné deux iours en ces Isles, fit voile pour le petit Gaspée, où l'on fut aduertty par dix ou douze Sauvages, de l'arriuee de quatre ou cinq grands vaisseaux Anglois dans Tadoussac, lesquels s'estoient desia saisis de quelques Nauires François contre la coste, dequoy nos gens bien estoinez ne scauoient par maniere de dire, &

quel Saint se vouïer, car ils se voyoient en de tres grands dangers d'estre tuez en combattant, ou d'estre fais prisonniers en se rendans, & traitez à la rigueur des ennemis, à cause principalement des Religieux qui estoient dans leurs vaisseaux, c'est ce qui les fit estre tellement pressés & importuns à leur endroit, qu'ils contraignirent nos deux Peres, avec deux autres qui s'estoient embarquez avec eux de se couvrir d'habits seculiers, ce qu'ils firent, mais avec tant de regret & de desplaisir, que iamais il n'y eussent consenty si la charité & la compassion qu'ils auoient de ses pauvres François qu'ils voyoient comme desesperéz, ne les y eut contrainsts, & comme obligerz.

Après quoy on tint cōseil de guerre auquel il fut cōclud que leur premiere pensée seroit suivie, qui estoit de se bien battre si les autres abordoient, puis qu'il n'y auoit point là lieu de retraite, ny moyen de s'esquiver de l'ennemy, qui estoit aux aguets. Neantmoins auant que de hasarder, comme i'ay dit cy deuant au Chap. 8. ils aduiserent d'enuoyer vne chaloupe de 10. ou 12. hommes à Kebec par des lieux destournez, sous la conduite d'un nommé Desdames, pour aduertir le sieur de Châplain de leur arrivée, & qu'ils leur porteroient de quoy renuitailler l'habitation de toutes choses necessaires, & de la peine où ils se trouuoient, afin qu'il se tint luy-mesme sur ses gardes. Ils ordonnerent aussi audit Com-
mis les Isles de S. Bernard pour le rendez,

vous, & où ils l'attendoient si plustost ils n'estoient pris.

La voile au vent, & la chaloupe partie, la pauvre flotte marchoit entre la crainte & l'esperance pour les Isles S. Bernard, lors qu'ils apperceurent l'armée Angloise venir droit à eux pour les combattre, mais nos gens qui ne sentoient pas la partie egale en prirent bien tost l'espouuente, & s'enfuyrent à vau-deroute, & les autres apres, qui les poursuivirent iusques au lendemain trois heures apres midy qu'ils les aborderent & saluerent d'une volée de canon, qui leur fut respondu de mesme, & de là commença vne tres-furieuse batterie de part & d'autre, les vns pour empierter, & les autres pour se defendre, mais à la fin les Anglois obtindrent la victoire sur les François qui se deffendirent fort vaillamment, car ils tirent iusques au plomb de leurs lignes, & en 14. ou 15. heures de temps que dura le combat, il fut tiré de part & d'autre plus de douze cens volées de canon, à ce que m'ont dit ceux qui y estoient presens, & si neantmoins de tant de coups de foudres & de tonnerres, il n'y eut iamais que deux François de tuez, & quelques autres de blesez, mais le debris de deux volées de canons qui donnerent à fleur d'eau de leur Admiral, avec le manquement de poudre & de munition, qui fut en fin la cause de leur malheur, & qu'il fallu parlerméter, & demander composition, qui leur fut accordée assez honorable pour gens reduits à l'extremité,

Cōbat des
François, &
Anglois.

François se
rendēt aux
Anglois.

Il y en a qui veulent dire qu'ils deuoient venir à bord, & rendre cōbat, l'espée ou la pique à la main, mais hélas les pauvres gens, eussent bien empiré leur marché, car au lieu que la vie leur fust accordée, & l'honneur aux femmes conserué, ils pouuoient dans vn combat inegal, perdre, & l'un & l'autre cōtre des personnes qui leur estoient de beaucoup superieurs, & en force, & en nombre.

La composition,

fut qu'il ne seroit fait aucun desplaisir aux Peres Iesuites, ny aux PP. Recollects. Que l'honneur des femmes, & des filles leur seroit conserué. Qu'ils donneroiēt passages, viures, & vaisseaux à tous ceux de l'equipage qui deueroiēt retourner en France. Mais que tout le reste du pillage avec les hardes des pauvres François, appartiendroient aux Anglois, lesquels partagerent entr'eux, apres qu'ils eurent deschargé la pluspart des hommes à terre, auxquels ils donnerent; selon le concordat, deux vaisseaux, & les viures necessaires pour retourner en France, à telle heure qu'ils voudroient.

Anglois
prirent 4.
Nauires
Basques.

Pour nos Peres, & les PP. Iesuites, les Capitaines, Admiral, & vice-Admiral, & quelques autres des principaux François, furent dispersés en plusieurs vaisseaux Anglois, pour estre cōduits en Angleterre, voir adiuger la flotte Françoisse estre de bōne prise, & eux-mesmes arrestez iusques à entier payement de la rançon qu'on estoit conuenue. Le monde estant ainsi dispersé, la flotte partit des Isles de Miscou, & se rendit à celles de saint Pierre, où ils trouuerent quatre Nauires Basques

de saint Iean de Lus, chargez de moulues & abandonnez des Mattelots qui s'estoient cachez dans les bois, peur de tomber entre les mains des Anglois, ausquels il fut facile se saisir des vaisseaux, & de tout ce qui estoit dedans & de la pluspart du poisson sec qui estoit encore sur le galay, n'y ayant personne pour le deffendre.

Tant de marchandises & de pirateries leur emplit tellement leurs Navires, qu'il furent contraincts se descharger de ce qui leur seruoit le moins, & entre autres choses, ils se deschargerent de nos Peres, & d'un honnest mais fort sage gentil-homme nomme le sieur le Faucheur Parisien, de sa femme & de ses cinq enfans, d'un Medecin & de quinze ou seize Mattelots Biernois, de tous lesquels ils n'eussent pu esperer vne once de bonne monnoye; ayans perdu dans la flotte, tout ce peu de bien qu'ils auoient embarquez sous l'esperance de s'habituier en Canada pour y viure eux & leur familles, le reste de leur vie, mais qui par mal-heur ne leur reussit pas bien.

Après que ces pauvres gens furent descendus à terre, on leur fist offie de viures & de vaisseaux pour retourner en France, qui furent en mesme temps acceptez comme vne gratification, car qu'elle consolation pouuoient ils auoir d'as des vaisseaux où il ne se faisoit aucun exercice que de la Religion pretendue reformée, où on n'oyoit chanter que des marottes, & faire vie que de rustres & d'epicuriens, à la verité on ne leur fist aucun desplaisir en leur

Renuoyent
nos Reli-
gieux en
France.

personnes ny d'affront à leur honneur & reputation, mais c'estoit assez d'affliction que de se voir esclaves & prisonniers, entre les mains de personnes si esloignées du bon sentiment & de la voye qui conduit au Ciel. Le Nauire qui leur fut donné fut vn de ceux nouuellement pris sur les basques, duquel ils se seruirent autant long-temps qu'il plut à Dieu, ie dis qu'il plut à Dieu, car pensans dans ceste apparente commodité se seruir d'vne opportune commodité, ils se mirent dans des hazards & perils iusqu'à l'extremité.

Mon Dieu vous estes admirable, & adorables sont vos iugemens, mais il est vray que sans vostre assistance particuliere, l'homme de bien succomberoit souuent sous le pesant faix de vos visites. Les Anglois n'estoient pas à peine partis de ces Isles, que les Basques à qui lesdits Anglois auoient pris, fouragez & emmené leurs vaisseaux, vindrent dans quatre ou cinq chaloupes, se saisir à l'improuiste du Nauire de nos pauvres François, pendant qu'ils estoient à terre empeschés à racommoder leurs hardes & donner ordre pour leur voyage: qui fut bien affligé, ce furent ces pauvres exilés, car ils se virent tombé de deux sieges à terre comme l'on dit, & en danger de mourir misérablement dans ce desert, car ils ne scauoient plus à qui auoir recours.

Affliction
& infortune

On dit qu'on peut reprendre son bien où on le trouue. Ces Basques auoient donc raison de reprendre le leur en ce Nauire qui leur auoit esté osté par les Anglois, mais nos gens auoient

aussi vn iuste sujet de deplorer leur infortune,
& d'auoir recours aux larmes & aux prieres,
puis que tout secours humain leur auoit man-
qué, & sembloit que le Ciel & la terre eussent
coniuré leur ruyne. Ils se veulent neantmoins
roidir contre ces Basques & en disputer le Na-
uire comme pris de bonne guerre, disoient-
ils, par les Anglois, car la necessité a tousiours
des inuentions pour se liberer d'elle mesme.

Dix ou douze Matelots des plus resolu-
s entrèrent dans vne chaloupe & allerent re-
cognoistre ces Basques, qui auoient repris leur
Nauires, pendant que le reste de l'equipage les
suiuoit dans vne autre, mais au lieu d'estre les
bien venus, les Basques iustement irrité les
pensant tous assommer à coups de pierres,
(car les Anglois ne leur auoient laissé aucunes
autres armes à feu.) Il y en eut cinq ou six de
blessez, qui firent prédre la fuyte à tout le reste
sur les montagnes voisines, tellement qu'avec
le Nauires les Basques eurent entores tous les
paquets & les hardes de nos gens, qu'ils
auoient laissé sur la terre.

Que pouuoient dire alors nos pauvres Re-
ligieux, sinon de crier au Seigneur qu'il eut
pitié d'eux & de tout ce peuple, pour moy ie
n'ay rien ouy de plus admirable en toutes ces
disgraces que la constance de ceste honneste
dame & de ses trois filles, coura-
geuses comme des Amazones, & qui scauoient
deuorer les difficultés dès leur naissance, par
de bonnes & fermes resolutions, de recevoir
& endurer le tout pour l'honneur & l'amour

Courage &
vertu des
Damois-
elles.

d'un Dieu. Ce sont graces qui ne sont pas communes à toutes les femmes, qui sont d'ordinaire timides & craintives aux moindres difficultez, & partant louables en celles qu'au milieu des plus grands hazards, se monstroient également courageuse avec le pere & les fils.

Les Basques
veulent
tuer les
Mattelots.

Les Basques ne se contenterent pas d'auoir pris le hâves de ces pauvres gens, & le Navire destiné par les Anglois pour les reconduire en France, mais quinze ou seize de leurs hommes armez de demy piques, les coururent encor sur la montagne pour les tuer, disans qu'ils leur auoient amenez les Anglois, & l'eussent fait, sans l'intercession de nos Peres & les larmes de ces bonnes Damoiselles, qui leur resmoignerent du contraire, tellement qu'à toute peine ils leur sauuerent la vie, & leur obtindrent vne chaloupe avec vn peu de biscuit & de citre, avec quoy ils eurent vn commandement absolu de partir dans vne heure sur peine de la vie, qui estoit vne rudesse bien grande enuers des pauvres Mattelots affligez, comme estoient aussi en effet, les pauvres Basques de gradez, reduits de riches marchands à de pauvres deuailisez.

Ils se mirent donc en mer avec leur chaloupe rodant la coste, bien en peine qu'ils deuiendroient & où ils pourroient auoir du secours, mais Dieu qui n'abandonne iamais les siens au besoin, leur fist la grace d'eiter les perils de la mer, & d'arriuer heureusement en deux fois vingt-quatre heures, aux Isles de

plaisance, où ils trouuerent fort à propos, des Nauires prêts à faire voile pour leur retour en France, qui les receurent & donnerent charitablement place parmy eux.

Cependant nos pauvres Religieux, le gentil-homme, sa femme & ses enfans estoient restés à la mercy des Basques, qui ne les vouloient pas repasser en France ny leur donner place dans leur Nauire rescous, si Dieu tres-bon ne leur eut amoly le cœur endurcy par le marteau des afflictions, qui fut la cause de les faire recevoir, autrement il eut fallu mourir de faim dans ces deserts ou estre mangé des bestes.

Ils furent près de cinq semaines empêchés à racommoder leur vaisseau gâté par les Anglois, puis ils cinglerent en mer avec nos gens enuiron la my-Septembre, & deux autres Nauires qui les estoient venus trouuer au bruit de leur disgrâce, assez ordinaires aux Mariniers.

Le vent du commencement leur fut assez favorable, mais qui se changea soudain en vne si furieuse tourmente pendant quatre ou cinq iours, que les Mattelots desesperans de leur salut, auoient tousiours la coignée au pied du grand mas pour le couper s'il eut trop panché, comme le dernier remede.

Tout ce que nos Religieux pouuoient faire dans ceste extremité, estoit de prier Dieu, & d'induire tous les autres d'en faire de mesme & de se mettre en bon estat, car souuent nos disgrâces ont leur source dans nos pechez,

Tourment
ce en mer.

comme aux gens de bien dans leurs merites, mais la tourmente continuant de plus bel à mesure qu'ils prioient Dieu, comme si le diable eut voulu debattre contre eux. Ils leur firent faire vn vœu à nostre Seraphique Pere saint François, lequel estant fait la tempeste désaussi-tost cessa, il n'y eut que les deux autres Nauires separez par les vents, qui ne se retrouvèrent point au calme, & s'ils perirent ou non personne n'en a rien sçeu.

De l'arrivée des Peres Daniel & François en Espagne avec leur compagnie, de la charité qu'ils y receurent iusques en France. Leur Nauire pillé & bruslé par les Turcs, & la mort d'une Dame deuote à l'Ordre de saint François.

CHAPITRE X.

**Rencontre
d'un vais-
seau Turc.**

Ceste grande tourmente ietta nos gens fort loin hors de leur route deuers l'Espagne, où ils apperceurent vn vaisseau Turc de quatre cens tonneaux, lequel leur despecha vne chaloupe avec quantité de soldats pour les venir aborder, ce que voyant les pauvres Chrestiens tousiours dans de nouveaux labyrinthes, rompirent leur pont de deffence, tirent dehors leur chaloupe & se ietterent tous à corps perdu dedans, puis à force de ra-

mes se sauueren promptement à terre, qu'ils auoient descouuerte depuis peu. Abandonnans leur Nauire avec toutes leurs petites commoditez, à la mercy de ces mal-heureux Turcs, lesquels enragez de les auoir eschappez après auoir tout pillé & emporté ce qui estoit de meilleur, mirent le feu dans le vaisseau à la veüe de nos pauures Canadiens, qui dans leur sensibiles douleurs ne pouuoient faire autre chose, sinon, baisser la teste & plier les espauls sous la main de Dieu, car à peine estoient ils hors d'un mal-heur qu'ils en rencontroient vn autre.

Ceste pauure trouppes, nuë, affligée & délaissée de tous, fors de Dieu qui les conser-
uoit, arriuerent le mesme iour à Bayonne en Galice, Arriuent à Bayonne en Galice, où après auoir rendu graces à nostre Seigneur, les Peres Daniel & François menerent tout ce piteux equipage à Madame la Gouvernante de la ville, laquelle les receut fort courtoisement & les traita fort honnorablement par l'espace de 8. iours qu'ils furent logez dans sa maison, pendât lesquels ils eurent tout loisir de se rafraeschir d'un si long voyage qui les auoit retenus près de 8. mois en mer.

En partie les maux passez, firent resoudre les Peres de prédre la terre & de se separer de leur compagnie, pour s'en reuenir seuls par S. Jacques & le reste de l'Espagne en France, mais Les Peres vouloient quitter leur compagnie comme ils eurent à ce dessein remercié & pris congé de Madame la Gouvernante, cet bonnest gentil-homme duquel ie vous ay parlé, sa femme & ses cinq enfans, les sup-

plierent au nom de Dieu de ne les point abandonner en vne si pressante necessité, puis que le malheur par l'infortune, les auoit reduit iusques à ce point, de ne leur estre rien resté de tout ce peu qu'ils auoient embarqué pour le Canada, tellement que ces bons Peres esmeus de compassion se chargerent de leur conduite & prirent soin de leur nourriture tandis qu'ils furent avec eux, autrement ceste pauvre noblesse estoit pour rester miserable dans vn pais où ils n'estoient point cognus. Il n'en estoit pas de mesme du reste de l'equipage qui prit party ailleurs, car ils estoient gens pour se pouruoir & non pas ces ieunes damoiselles inuitées en ce mestier de la mädicité, car elles eussent soufferts avec la honte de leur misere le reproche de gens vagabons, car qui se fust iamais imaginé que les disgraces les eussent reduictes iusques à ce point d'estre mandiantes, plustost que de paroistre en quelque estat accommodé.

Arriverent
à S. Iacques
en Galice.

Toute la famille avec ces bons Peres se mirent donc en chemin & prirent la route pour saint Iacques, où estans arrivés furent visiter l'Eglise du Saint, se recommanderent à ses intercessions, & y ouyrent vne tres-rauissante musique, qui les consola tous interieurement pour estre la meilleure qu'ils eussent iamais ouys à ce qu'ils m'ont asseuré. En après ils furent visiter Monseigneur l'Archeuesque du lieu & Messieurs les Cardinaux, qui leur firent distribuer tout ce qui leur fist de besoin pendant 8. ou 9. iours qu'ils y seiournerent, car ces

pauvres

pauures ieunes damoiselles aussi bien que les petits garçons, estoient tellement fatiguées du chemin, qu'à peine se pouuoient elles soustenir & encor moins marcher qu'avec vne peine indicible, ce qui se peut aysement coniecturer de leur ieune aage, du long du chemin, & de la foiblesse de leur sexe.

Après s'estre tous bien reposez & repris haleine. Ils prirent congé des Prelats & Seigneurs leurs bien-fauteurs avec les humbles remerciemens deus à personnes si charitables & pieuses, & se mirent en chemin pour Colonne, pout de là prendre la mer & estre au plustost en France, car comme ie viens de dire ces pauures Peletins n'en pouuoient plus & estoient si las de la terre, particulièrement les ieunes filles, comme elles m'ont dit maintefois, qu'il falloit quasi à toute heure leur donner du temps pour se reposer, qui estoit vn grand retardement, à gens qui n'aspiroient rien tant que de se voir de retour dans leur maison, nonobstant le bon traictement qu'on leur faisoit par tout ce pais estranger.

Ils furent parfaitement bien receus à Colonne de Monsieur & Madame la Gouvernante, qui estimerent à vne singuliere faueur du Ciel la venue de gens si necessiteux, où ils peussent exercer la charité, qui ne leur manqua point tout le temps qu'ils furent là, mais avec vne telle magnificence qu'ils furent seruyez plats couuerts & en suite la comedie.

Le lendemain matin de leur arriuée, ils furent visiter l'Eglise des Peres Recollets du

Sont bien
receus à
Colonne,

Histoires
d'une sainte
image de la
Vierge.

lieu, où ils firent leur deuotion deuant l'image de la sainte Vierge, qui y est reuerée de toute l'Espagne pour les grands & insignes miracles qui s'y font iournellement enuers tous ceux qui avec foy & deuotion ont recours à cette bien-heureuse Vierge Mere de Dieu. Et eurent le bon-heur de voir plusieurs personnes de ceux qui auparauant estoient estroptiez, boiteux, bossus & affligez de diuerses autres maladies & infirmittez, entierement gueris par l'intercession d'icelle.

Or pour ce que l'inuention de cette sainte image a esté autant miraculeuse qu'admirable, & qui a grandement accru la deuotion du peuple enuers icelle. Je vous diray succinctement ce que j'en ay appris de personnes dignes de foy, afin de vous inviter avec moy de louer Dieu en ses Saints.

Auant que la ville de Colonne en Galice fut reduite en forteresse, & accommodée d'un Parlement qui la rend celebre pour le iour-d'huy. Il y eut vne troupe de pescheurs, qui ayans iettez leurs rets dans la mer, pensans y prendre du poisson en tirerent cette sainte Image, mais avec tant de peine à quinze Matelots qu'ils estoient, que comme il est dit des Apostres dans les saintes lettres, ils pensèrent rompre leur rets chargez de ceste seule Image sans poisson, ce qui les mist en telle admiration qu'ils en louerent Dieu sur le chap, se prosternerent deuant icelle, & la porterent dans le Conuent de nos Peres, qui la poserent reueremment dans l'une des Chappelle de l'E.

Eglise, où elle est encore à present reuerée, d'un chacun comme j'ay dit.

Ceste sainte Image est ordinairement couverte d'un rideau de taffetas bleu, qui se tire pour la faire voir aux Pelerins qui y arriuent de toutes parts. Il y a aussi vne lampe ardente qui y brulle iour & nuict que quelque personne deuote y entretient. Cette figure n'est que de bois, de la hauteur enuiron de deux pieds, & assez noire & obscure comme sont ordinairement toutes les Images miraculeuses, pour monstrier que Dieu ne cherche point la politesse ny la beauté exterieure aux Ames esleues, comme l'humilité & l'aneantissement, représenté par cette couleur basse. Je suis noire, mais ie suis belle disoit l'espouse aux Cantiques des Cantiques, qui est vne pensée bien contraire à celle du monde qui ne fait estat que de l'exterieure beauté simplement, comme Dieu de l'interieur qui se conserue sous la cendre de l'humilité & de la bassesse.

Quelques années après l'inuention de ceste Image, les Anglois qui auoient guerre contre l'Espagne, s'estans rendus maîtres de Colongne non encores fortifié comme il est à present, mirent le feu dans nostre Eglise qu'ils bruslerent pour la pluspart excepté l'Image qui resta en son entier du milieu des flammes, dequoy irrité ces meschans heretiques, la ietterent iusques à sept fois dans vn feu plus ardent qui ne luy fist aucun mal, ce que voyans, ils la mirent en piece, la briserent par morceaux & la ietterent derechef dans le feu, croyans qu'ayant

perdu sa forme le feu consumerait la matiere & par ainsi qu'ils resteroient victorieux, mais Dieu tout puissant qui ne peut estre vaincu de personne en conserva les piéces, les rassembla, & reſtablit l'Image de la ſainte Vierge, comme nous la voyons encôres de preſent dans noſtre Eglise dudit Colonne, ſans que le feu paroisse y auoir laiſſé marque qu'un peu de noirceur pour teſmoignage du miracle.

Les deuotions ſont tres-bonnes, mais il faut encôres penſer de ſon retour au logis, car après auoir veu Marie il faut voir Marte, & deſcendre de l'eſchelle de Iacob avec les Anges, pour y remonter avec eux, c'eſt le train de noſtre vie & le ſoin de nos penſées qui montent à Dieu & reuiennent à nous. O mon Dieu il le faut; auoir vn œil pour voir voſtre grandeur & vn autre pour conſiderer noſtre baiſſeſſe.

Les Peres Daniel & François s'eſtans ſuffiſamment contentez en leur deuotion & pris du repos après vn long travail avec leur petite compagnie. Il fut queſtion de trouſſer bagage & voir ſur le port ſ'il y auroit aucun Nauire preſt à faire voile pour la France, mais ne s'y en eſtant point trouué, Monſieur le Gouverneur leur fiſt preparer ſon Brigantin, & conduire exprés iuſques à la ville de Har, avec commandement de les loger & traicter honnorablement dans la maiſon de ville autant de temps qu'ils deſireroient, ce qui fut de tout point obſerué pendant 15. iours qu'ils y ſejournerent, car la ieuneſſe ne pouoit aduancer.

Ils furent non seulement regalez de tout ce qui leur faisoit besoin, mais mesme avant partir le bon gentil homme receut encor la piece en particulier, pour d'autres necessitez qui pourroient suruenir à sa famille, de maniere que l'on pouuoit dire que Dieu leur faisoit plouuoir la manne au milieu des deserts, tant estoit grande la charité de ce peuple enuers ces estrangers, sinon que le grand respect & la deuotion qu'ils ont à nostre Ordre, leur donnat l'enuie de les assister, car sans exageration, entre tous les Ordres, les Espagnols sont principalement estat des Religieux de saint François qu'ils reuerent comme Anges descendus du Ciel, desquels les grands tiennent à grace singuliere de pouuoir mourir ou du moins d'estre enseuelis dans leur habit, & icy des Dames que peur d'estre preuenues de la mort sans ceste faueur, en gardent sous clefs dans leur cabinet, aussi deuote à l'Ordre de ce grâd Saint qu'estoit deffunct Monsieur de Ragecourt gentil homme Lorrain, qui receut de nostre Pere Gardien de Mets, ce saint habit vn peu auant sa mort.

La mesme grace auoit esté conferée à Madame la Comtesse de Marcoufley, Gouvernante de la Prouince de Vosges, laquelle mourut (quoy que fort ieune) aussi saintement & autant desnuee des affections de la terre que i'aye iamais cognu personne de qualité, & pour ce que sa fin a esté fort edificatiue, côme sa vie fort honneste, & que quelques bonnes ames pourront faire leur profit des graces que

L'Ordre de
S. François
fort reueré
en Espagne

Le sieur de
Ragecourt
meurt & est
enterré en
nostre
habit.

La Côtresse
de Marcouf
ley demâde
de mourir
dans nostre
habit.

Dieu luy fist la disposant à la mort, i'en diray succinctement l'euénement à la gloire de nostre Seigneur, qui suivant les promesses faites à nostre Pere saint François, donne tousiours vne heureuse fin à ceux qui sont vraiment deuots en son Ordre.

Pieté du
Comte de
Marcouf-
Fy:

Cette Dame quoy qu'en apparence mondaine (& pleust à Dieu que les autres ne le fussent qu'en apparence,) estoit tres deuote aux enfans d'un si grand Patriarche, elle faisoit bien sa Cour, mais elle seruoit encor mieux à Dieu, car aux bonnes festes de l'année, elle ne manquoit iamais au deuoir d'une bonne Chrestienne, non plus qu'à donner largement aux pauures des biens que Dieu luy auoit largement presté, à quoy la portoit grandement deffunct Monsieur le Comte à qui j'ay souuent ouy dire qu'il vouloit luy mesme soigner pour son ame dès son viuant, comme il faisoit en effet, sans s'en attendre à ses heritiers, car comme il disoit, combien en voit on de trompez, ou plustost combien y en a il qui se trompent eux mesmes, attendans de faire par autrui ce qu'ils deuroient faire par eux mesmes. La chandelle qui va deuant vaut mieux que la torche qui suit après, vn peu partir en ce monde icy, vaut mieux qu'un long-temps en purgatoire, vn escu donné de son viuant que dix après sa mort, & puis qui sçait que les heritiers s'aquitteront fidellement de la volonté dernière du testateur.

Ils s'amusent à partager ses biens, on

dispute de son testament, on querelle ses créanciers & souuent on maudit son maluais ordre & les troubles qu'il leur a laissé après son trespas. O pauvres gens qui ne preuoyez pas à vos affaires, & encores moins à vostre salut pensez à vous. O vieux auaricieux, qui ne pouuez ouyr la voix du pauvre, vous oyrez la voix des diables qui crieront à vos oreilles, ton temps est passé, tes consolations ont pris fin, la rouille a mangé tes richesses, & les vers te charongne, il n'y a point de Paradis pour toy, que diras-tu, & toy femme mondaine à quoy penseras-tu à l'heure de la mort, qui t'est inuitable.

Je ne veux pas iuger de personne ny condamner aucun, mais j'ay fort douté du salut de plusieurs riches auares que j'ay veu mourir, & d'autres que ie cognois qui pensent moins en Dieu qu'en leurs richesses, & s'ils donnent l'aumosne aux pauvres, c'est si peu & si mesquinement que ie ne sçay s'ils y auront du merite. Il faut donner gayement si l'on donne, car Dieu aime le ioyeux doner, si on a peu, doner peu, si beaucoup, beaucoup, & tousiours de bonne volonté, comme il est dit en Tobie. Il y a mesmes de ces deuotes, qui ne sont charitables que du bout des leures, mais aussi sont elles bien esloignées du merite de celle de laquelle ie vay reprendre l'histoire dont voicy la suite.

Madame la Comtesse allant faire ses deuotions à Nostre-Dame de Liesse, eut vn songe la nuict, dont elle rumina fort des effects,

il luy sembloit mourir ayant deux Recollets à ses costez qui luy assistoient ; à son reveil, elle conta son songe à Madame de sainte Marie sa tante, laquelle pour l'heure n'en fist aucun estat, disant qu'elle n'y devoit adjoûter de foy. Vn an après le Pere Cyprian Gallicher estant fait Gardien de nostre Convent de Mets, fut visiter ladicte Dame à son chasteau de Goin, si-tost qu'elle l'eut enuissagé se tournant à l'une de ses Damoiselles suivante luy dit : la Rochette, voyla l'un des Peres que ie vis en songe allant à Nostre-Dame de Lieffe, & deslors en fit fort estat, l'excellence estoit qu'elle ne l'auoit iamais veu que ce iour là, ce qui luy fist esperer la verité de son songe.

L'année suivante estant de communauté en nostre Convent de Mets, ledit Pere Gardien me mena en deuotion à saint Nicolas, & au retour fustmes vn Lundy matin au chasteau de Goin pour y voir ladicte Dame, laquelle vn petit mal de teste auoit arrestée ce iour là dans son liç, plus tard qu'à l'ordinaire, car le precedent elle se portoit parfaitement bien, & sans apparence de maladie. Ayant sçeuë nostre venue par le sieur Bourcier Precepteur du ieune Comte son fils vnique, & à present F. Daniel Bourcier, celuy duquel ie fais mention dans ce voyage, elle ne dit autre chose sinõ. Les Peres sont venus pour m'assister à la mort, ie veux mourir fille de S. François & leur en demanderay l'habit, elle le demanda & le receut, & tous ses Sacremens, puis mourut le P. Gardien disant les recommandations de l'ame à l'un

des costez du liét, tandis que de l'autre ie l'exhortois à bien mourir, comme elle se rendant son ame entre les mains de son Createur, comme pieusement nous pouuons croire, avec cette dernière action de choisir la medaille de son Chappeler qu'elle tint entre les doigts en expirant, & prononçant le S. nom de Iesus.

Reuenons à nos Espagnols, ils tiennent à faueur de pouuoir baiser la corde ou l'habit d'un Frere Mineur, comme à grace singulier d'y pouuoir mourir, ie fus vn iour bien estonné qu'entrant en vne maison de condition au Duché de Luxembourg, les deux filles mesme du logis, nous vindrent receuoir à la porte, & baisèrent le bout de nostre habit, ce qui me fut fort extraordinaire pour n'auoir iamais veu vne pareille pratique en France, où il n'y a que les seules personnes pieuses & de condition qui fassent estat des Religieux.

Ie diray encor à la gloire de Dieu, & à la confusion des indeuôts, ce que j'ay appris d'un Pere Capucin reuenant nouvellement d'Espagne, que comme il logeoit ordinairement dans quelque vn de nos Couuents qui y sont fort frequents, passant par la Prouince de la Conception, au mesme Royaume, où nos Religieux gardent vn silence perpetuel, plus estroit qu'aucun autre Ordre qui soit dans l'Eglise, & pour cet effect ont presque tous leurs Couuent bastis en des lieux champestres, & esloignez des villes.

Il interrogea quelques villageois, com-

ment ils pouuoient nourrir des Conuents de Recollers, qui ne moissonnēt, ny ne font aucune prouision, veu qu'eux memes estoient pauvres & necessiteux, & n'auoient de quoy pour la pluspart que de leur petit labeur. Ils luy responderent, en verité mon pere, nous leur donnerions encor nostre cœur s'ils en auoient affaire.

M'entretenant vn iour sur mer avec vn Pilote Huguenot, homme d'esprit, & tres-honneste à sa mauuaise religion près, des voyages qu'il auoit fait avec les Holandois en diuers endroits du monde, m'alleua da profit que faisoient les Religieux dans les Indes, & qu'il ny auoit veu aucun Nauire d'Espagne, où il ny en eut tousiours quelque vn dedans, ce qui luy seruit aucune fois, car comme luy & tout son equipage se trouuerent vn certain temps en tres-grande disette & necessité de viures, sans sçauoir ou en pouuoir recouurer, les Holandois n'auoient point lieux de retraite en ces contrées là, & peu en d'autres, à cause de leur rudesse & cruauté à l'encontre des naturels du pays qu'ils traitent en bestes, comme il appert en l'Isle de Iaua Maior qu'ils ont prise sur le Matran Empereur du pays, car ils les tiennent presque tous enchainez deux à deux par les pieds, & ne leur permettent d'aller jamais en ville qu'il n'y aye vn soldat Holandois à leur queue, avec vn brin d'estocq en main (à quel valet) pour les tenir en bride & suite, comme si apres auoir perdu son bica

& sa liberté, il falloit encore estre traité en beste, & bastu en chien.

Ils aduiserent donc de donner la chasse au premier Nauire marchand Espagnol qu'ils rencontreroient, sous l'esperance qui ayans des Religieux dedans, ils auroient du credit assez pour leur en faire apporter de la plus prochaine ville, ce qui fut fait comme ils l'auoient proiecté, car ayant rencontré vne barque marchande, ils s'en rendirent les maistres, & l'arrestèrent iusques à tant que les Religieux qu'ils y trouuerent leur en eussent fait apporter, puis les laisserent aller sans leur faire de desplaisir, ny aux Marchands, à ce qu'il me dit. Quoy qu'il en soit, ie ne scay si nous aurions bien tant de credit icy, mais tousiours faut il aduouer qu saint François a grandement merité deuant Dieu, puis que les Huguenots mesmes qui ne font estat d'aucun Saint, le confessent, & s'estonnent du grand nombre de ses vrais Religieux, presque par tout establis, pour le salut des ames Indiennes.

Reuenons à nos pauvres voyagers laissez à la ville de Har, & ditons qu'ayans en vain cherché vn Nauire appareillé pour France, ils furent à la fin contraints d'aller à pied iusques à la ville de Fourolle, où ils trouuerent vne pinasse de Bayône en Lâguedoc, dans laquelle apres auoir conuenu de prix avec le Maistre (car il fallut icy comencer payer) ils s'embarquerent & firent voile le matin à la marée avec vn vent assez fauorable, mais qui

se changea soudain, sur les trois heures apres midy en vne tourmente si grande qu'elle les pensa tous submerger & engloutir au fond des eaux, car ayans leur gouuernail brisé, ils n'entendoient plus que l'heure d'estre iettez contre quelque rocher. Ils voyoient bien vn village nommé de saint Simphorien, & la terre qui ne leur estoit pas esloignée, mais comme le vent les dominoit, ils n'en purent oncques approcher iusques à ce que les tres-experimentez Pilotes & Nautoniers du lieu, les voyans infailliblement perdus, sans vn prompt secours, monterent trois chaloupes, & surmontans les tres perilleux flots de la mer les aborderent, & ayans accroché la pinasse, avec l'ayde du tout Puissant, la conduirent au port asseuré, où ils rendirent graces infinies à nostre Seigneur, de les auoir deliuré de tant de perils, & luy demanderent la vertu de patience pour le reste de leurs incommoditez, qui n'estoient pas petites en des personnes percées iusques aux os, des pluyes & orages, qui durerent iusques à la nuict, avec des furies si grandes, qu'il sembloit que les Cataractes du Ciel fussent ouuertes pour vn second deluge.

Ils seiournerent trois ou quatre iours dans ce village, pour se refaire de leur lassitude, apres quoy il fut question de partir, mais d'autant que les maux de la tourmente passée leur estoient encor tout recens, & que la diuersité des chemins leur sembloit adoucir

aucunement leur traual, ils prirent la routte par terre, surmonterent les mauuais chemins, & la difficulté des montagnes, non sans des peines tres-grandes, & arriuerent à la ville Domide, où ils furent parfaitement bien receus de Monsieur, & de Madame la Gouvernante qui leur firent tres-ample charité, & bon traictement, par l'espace de six semaines qu'ils furent contraincts de sejourner là, pour assister trois de leur compagnie tombez malades de fieures & de traual.

Si tost qu'ils commencerent de se mieux porter, ils se mirent en chemin pour poursuire leur voyage, car ils estoient encores à près de trois cens lieuës de Paris, & arriuerent de leur pied à Chichiou, où ils attendirent la commodité d'un vaisseau marchand qui chargeoit des oranges pour Nantes, dans lequel s'estans embarquez & fait voile par un temps tres-beau qui leur dura quelques iours, mais qui par sa faueur inconstante, se changea bien tost en vne tourmente si furieuse quelle les pensa tous perdre, si la prouidëe diuine ne les eut garantis, & tourné les vents qui par un bon-heur les jetterent dans les sables Dolonnes, où ils prirent terre, & louerent Dieu, qu'apres les auoir deliurez de tant de miseres, & assisté en tant de perils, il les auoit en fin fait surgir au port tant desiré, d'où nos pauures Religieux ayans pris congé de leur compagnie, s'en reuindrent doucement à Paris, rendre leur vœux, continuer leurs actions de graces

*Offres & courtoisies des Sauvages, aux
 François de Kebec, & de l'excellent
 equipage d'une barque prise par les
 Anglois.*

CHAPITRE XI.

A Pres que nous auons eu mené nos
 deux Peres à Paris, eschapez de tant
 de dangers, il nous a esté necessaire de re-
 tourner à Kebec, voir la contenance de nos
 gens affligez de toutes les disgraces que peut
 la necessité, mais qui fut soulagée à la fa-
 ueur de plusieurs Nations Sauvages qui les
 assisterent chacun selon son petit pouuoir.

A la my Ianuier 1679. les Montagnais
 commencerent à tuer de l'essan, dont ils fi-
 rent bonne part à nos François, particuliere-
 ment Choutmin, qui tout expres voulut ca-
 baner avec son frere Neogabinat dans les
 bois au tour de Kebec, pour les pouuoir as-
 sister de leur chasse, avec plus de falicité
 qu'ils n'eussent sçeu faire au loing. Il y eut
 aussi le sauuage Mantoucharche autrement
 nommé la Nasse, par les François à cause
 qu'il se seruoit tousiours d'une Nasse pour la

pesche de l'anguille, ce que ne font pas ordinairement les autres Sauvages, ayda fort aux Reuerends Peres Iesuites, comme fit aussi Choumin, & l'Hyuer estant passé il se vint habiter au desert desdits Peres Iesuites, où il laboura avec leur permission, vn bout de leur terre, qui auoit produit vn tres-beau bled quand les Anglois les prirent.

L'Hyuer ne fut pas moins loing que le precedent, car les neiges n'estoient pas encores fonduës à Pasques, qui estoit le 15. d'Auil cette année là, rûtefois elles ne durerent plus gueres après, car le 28 d'Auil l'on commença d'ouurer la terre, & le second iour de May l'on sema du bled froment, que l'on appelle en France blé d'artets.

Le renouveau fut assez beau & fauorable pour faire les semailles, mais ceux de l'habitation ne s'amusoient tousiours qu'après leur fort, fondans l'esperance de leur vie sur les Nauires, sans s'amuser à cultiuer, dont ils se repentirent après, mais avec vne trop legere punition d'vne negligence si grande, car les Nauires pouuoient perir, ou estre pris des ennemis, comme ils furent à la fin des Anglois.

Le mois de May s'escoula sans que l'on entendit aucune nouuelle de France, ce qui mit en peine tous les hyuernans à qui les dents croissoient comme l'herbe en bonne terre, faute d'auoir dequoy les employer, car selon leur calcul il deuoit estre arriué quelques Nauires dès le commencement du

mois, & eut esté bien nécessaire à ce coup que tous les viures defailloient, car de sept escuelles de grain que le sieur de Champlain auoit ordonné par semaine désle Noël passé pour chaque personne del'habitation, il en fallut retrancher plus de la moitié, & courir les bois iusques à cinq & six lieues loin, pour trouuer des racines de bon manger, car celles des environs de Kebec auoient esté toutes consommées.

Sceau de
Salomon
racine.

Il y a vne certaine racine entre les autres, laquelle nous appellons *Sigillu Salomonis*, sceau de Salomon, qui les ayda grandement, car elle est assez bonne, excepté qu'elle est vn peu forte mangée creuë, i'ay appris qu'elle est vn souverain remede contre les hemoroides, coupée en roüelles & portée au col sur la chair nuë en chappelets, dont vne Dame de Paris m'a asseurée en auoir esté guarie. Elle leur seruoit le plus souuent de pain, & d'autre fois ils l'accommodoient avec du glan, & vn peu de farine d'orge, avec le son & la paille, qu'ils faisoient bouillir & reduire en menestre, mais pour ce que le glan est fort amer en ces pays là, & ne se pouuoit manger sans y apporter de l'inuention, l'on faisoit vn peu bouillir l'amande dans de l'eau avec de la cendre par deux diuerses fois, puis le gland estant bien lauë & nettoyé de ces cendres, on le pilloit & mesloit parmy la farine d'orge, à demie cuitte pour en espessir la bouillie, dans laquelle l'on mesloit aussi du poisson de mince, quand l'on en auoit, mais

sans

sans sel, car il n'y en auoit plus à Kebec.

Le sieur de Champlain enuoya le sieur Boullé son beau frere avec quelques autres François vers Tadoûssac, pour voir si on y en pourroit faire, mais ayans expérimenté les eaux par le feu ils n'en purent tirer la plaine main, disans pour excuse, mais véritablemēt, que l'eau n'y estoit pas propre, bien qu'ils l'eussent, fait consommer dans des placques de plomb qu'ils y auoient portées, par l'ordre dudit sieur de Champlain.

Vne matinée à quoy on pensoit le moins tomba vne des tourelles du fort, qui fit croire aux François, comme à l'année passée d'un pareil accident, quel'on auoit bien tost des nouvelles de France, ou d'Angleterre, ce qui les resioit, car ils se soucioiēt assez peu pour lors d'où elles viendroiēt pourueu qu'ils fussent assistez, & tuez hors de leurs miseres.

Le sieur de Champlain voulant euitier aux fausses Propheties, fit promptement racommoder la tourelle, & enuoya quelque Matelots vers Gaspé voir s'il y auoit quelques Nauires François pour en tirer du secours, mais n'y ayant trouué personne, ils pescherēt quelques moulës, ramasserent vn reste de sel qu'ils trouuerent sur le galay, & puis s'en retournerent au sieur de Champlain, qui se repentant des negligēces passées qu'il touchoit au doigt, pria le P. Ioseph de luy prestre vn coing de nostre terre à esseter, ce qui luy fut non seulement accordé, mais d'en prédre ou il voudroit, mesme celle que nos Religieux

Vne tourelle
le du fort
tombe;

Le sieur de
Champlain
a recours au
P. Ioseph.

auoient désertée cette année là qu'il accepta, & y fit traualier son seruiteur.

Pressons de
nos seurs
pour enle-
mener.

Le sieur Corneille Commis du sieur de Caën en demanda aussi, & y vint traualier luy-mesme, puis 4 autres personnes lesquel- les nous accommodames d'une autre bonne estendue de terre, & dellors ces Messieurs com- mencerēt à cognoistre en effet, qu'ils deuoient auoir suiuy nostre premier conseil, qui auoit tousiours esté de labourer les terres, & creu- rent alors combien nos Religieux auoient eu de peines à accommoder celles de lesquelles ils iouissoient à présent du fruiet par leur bene- fice, non toutesfois sans en ressentir la pi- queure des mousquites & mouchérons, qui leur desfiguroient tout le visage.

Offre des
auages
de Gaspé.

Le sieur de Champlain qui auoit enuoyé de ses gens vers Gaspé, pour descouvrir s'il y au- roit quelques Nauires, desquels l'on pût rece- uoir quelques secours de viures, leur auoit aussi donné charge de scauoir des Sauuages de ces contrées là, s'ils pourroient nourrir quelques François iusques à l'arrinée des vais- seaux de France, à quoy les Sauuages pleins de bonne volonté leur respondirēt qu'ils en pourroient nourrir iusques à 20. & qu'ils les leur enuoyassent, & mesme des femmes & des enfans s'ils vouloient, desquels ils seroient en estat comme de leurs propres parens.

Cela resioit vn peu les François, mais non pas entierement, car ils croyoient que ces Sauuages en deussent demander dauantage, pour ce, disoient-ils, qu'ils n'estoient point

Dans la pauvreté, auoient abondance de bestes, & ne manquoient point de poisson.

Les Algoumequins, & Môtagnais plus pauvres de beaucoup, les voulurent neantmoins surpasser de courtoisie, & ne se laisser vaincre d'honnesteté en vne si belle occasion, car ils leur firent offre de nourrir 25. personnes des leur pendant l'Hyuer, & de plus Choumin & ses freres s'obligerét de demeurer autour de l'habitation, pour pouuoir plus commodément assister le reste, & leur porter de l'anguille, & la chasse, s'entend quand ils en auroiét.

Toutes ces belles offres, & ces liberalitez remontreroient assez la gẽtillesse, ou plustost cõme ils disent la bonté de leur cõur, qui nous doit seruir d'exemple. Il falloit neantmoins encore aduiser pour le reste de l'Esté iusqu'aux grains nouueaux, & fonder vne autre Natio pour y contribuer, car il n'est pas question de toujours fouller son hõste. C'est pourquoy

le sieur Chāplain au cõmencement du mois de Iuillet 1629. despescha vn François avec quelques Barbarès, vers la nation des Abenaguique peuples habitans du costé du Sud de l'habitation, lesquels cultiuent les terres à la maniere des Hurõs, & ont quelques villages.

Ce François estant là arriué, les fit haranguer par son Truchement, de la part du Gouverneur de Kebec, & demāder s'ils leur pourroient nourrir quelque François iusques au commencement de l'Esté prochain, & ce faisant ils les obligeroient à contracter amitié avec eux, & les maintenir à l'encontre de

Offre des
Algoume-
quins, &
Môtagnais

Nation des
Abenaguique
ue.

leur ennemis. Les Albenaquione ayans ouy la harangue de ce Truchement, tindrent conseil, & conclurent à la faueur des François, disans, que tres-volontiers ils en accepteroient iusques à 20 ou 15. desquels ils feroiēt estat, & les nourriroient cōme eux mesmes.

Nos Messagers les voyans de si bonne volonté leur firent demander s'ils pourroient encore ayder à l'habitation de quelques sacs de bled d'Inde, à quoy ils respondirent que non pour lors, mais vers le mois de Septembre, ou d'Octobre, que leur moisson seroit faite, & qu'en leur menant du bled, ils rameneroient les François qui voudroient venir demeurer avec eux.

Pendant que les vns traualloient pour asseurer la vie de ceux qui resteroient dans le pays, les sieurs Champlain, & du Pont, firent équiper vne barque du port, de 12. ou 14. tonneaux pour enuoyer aux costes, chercher des Nauirés, pour repasser en France vne partie de leurs gens, & au cas que l'on ne trouuaist aucun vaisseau à la coste, il y auoit ordre aux Chefs de se mettre au hasard de passer la mer, pour aller donner aduis à Messieurs de la Societé, de l'estat miserable auquel on estoit réduit.

Beaucoup desiroient bien d'aller chercher des Nauirés à la coste, mais peu se presentoiēt pour passer en France dans vn si petit vaisseau, mal assuré, & si mal pourueu de toutes choses necessaires qu'il ne se pouuoit moins, car premierement, il ny auoit ny pain, ny vin, ny

biscuit, fort peu d'eau douce, & encor moins
 de bois, à cause de la petitesse de la barque,
 pour de la viande & du poisson, ils n'en a- Barque mal
 uoient de prouision que par esperance de ce- pouruoir.
 luy qu'ils se promettoient des Sauuages de
 Gaspé, & des moluës qu'ils pourroient pes-
 cher à la coste, & sur le grand ban. De Pilotte
 assuré il ne s'en trouuoit point, & falloit se
 passer d'un assez peu experimenté, qu'estoit
 s'exposer à vn eminent danger de mort, &
 neantmoins encor si en trouua-il à la fin qui
 aymèrent mieux se mettre dans le hazard de
 perir dans la mer, que de mourir de faim sur
 la terre, desquels on fit choix de 12 comman-
 dez par le sieur Boulé beau frere du sieur de
 Champlain, qui volontairement s'exposerēt
 à ce danger, & mirent les voiles au vent aussi
 mal faites, & les cordages, que le reste de l'e-
 quipage, par vn temps assez beau.

Il se remarque chose admirable, & qui con-
 firme l'opinion de ceux qui tiennent que la
 goutte ne s'attache ordinairement qu'à ceux
 qui trauaillent peu, font bonne chere, ou qui
 ont fait des desbauches avec excez (i'ay neāt-
 moins veu le contraire en plusieurs, car les Le sieur de
 gouttes viennent de diuerses causes, & non Pont gout-
 pas tousiours des desbauches & de l'excez) teur.
 Le sieur du Pont graué vieillard aagé de plus
 de 70. ans, ne se porta iamais mieux que pen-
 dant cette misere, car auparauant il auoit
 presque tousiours les gouttes, ou du moins
 fort souuent. O mon Dieu nous sommes sou-
 uent cause de nos maladies, & aimons mieux

souffrir des incômoditez, que de nous mortifier des choses qui nous les peuuent causer comme il arriuoit à ce bon vieillard lequel estant ioual de son naturel, s'emportoit quelquefois au gré de ses amis, de boire vn bon coup sans eau, & puiscrioit à l'ayde contre la douleur de ses gouttes, qui furent bien appaisées par la diette que la necessité du pays luy fit prendre, de ne boire point de vin, & ne manger point de pain, ny sel, ny beurre, qui sont les principales nourritures de l'homme, avec la viande, ce qui le rendit tellement foible & debile, qu'il eut faict pitié, sinon qu'il ne sentoit point de douleur comme i'ay dit.

Dans cette necessité commune comme vn chacun portoit sa croix, qui plus, qui moins grosse, car au regard de quelqu'vns elle estoit allez legere, ou tout deuoit estre considéré, car les forces, ny les graces ne sont pas toutes egales en vn mesme suiet, l'appelle vn mesme suiet toutes les creatures faites à l'image d'un Dieu, pour ce que l'amour de ce Dieu, a diuerles prises chez elles, & y opere diuersement quoy que tousiours saintement. C'est ce qui faisoit croire à quelqu'vns que nos Religieux n'estoient pas dans les souffrances, puis qu'ils estoient cõtens des les mesmes incômoditez.

Vn Sauvage de nos amis nommé Neogabinat desirant assister nos Religieux, & n'ayant pas de quoy, mena le Pere Ioseph à la chasse des loups marins, aux Isles qui sont entre Kebec, & l'Isle aux Coudres, où ils en prindrēt deux

si grands qu'ils furent leur charge entiere, & puis s'estans pensé perdre d'un coup de vent qui leur donna en trauerfant la riuere, ils furent contrains de monter sur vn rocher avec leur charge, où ils concherent fort durement iusques au lendemain matin qu'ils se rendirent au Couuent.

Pour reuenir à la barque du sieur Boulé, où estoit pour Lieutenant le Cômis Desdames, ayât laissé avec les Sauvages ceux qui choisirent leur sejour, s'en allerent le long des costes, chercher quelques Nauires de cognoissance, auât de passer outre pour la France, mais s'estans approchez de Gaspé, ils rencontrerent fort fauorablemēt le sieur Esnery de Caën chargé de viures pour l'habitation, & d'ordre pour repasser de leurs gés, la ioye qu'ils eurent l'un l'autre de cette rencontre ne fut pas petite, car si ledit de Caën fut consolé entendans que tout se portoit bien à Kebec, à leur debilité prés, les autres furent encorres plus resiouys de leur secours, & d'apprendre que le sieur de Razilly estoit en chemin, avec ordre du Roy de venir combattre l'Anglois, & sauuer le pays.

Le sieur Boulé estant assuré d'un prompt secours, se remit sous voile pour en donner aduis à l'habitation apres que ledit de Caën eut fait charger sa barque de viures, & de munitions, afin que si l'Anglois arriuoit à Kebec auant ledit de Razilly, il y pût auoir de quoy se deffendre, & resister iusques à l'arriuée dudit de Razilly.

Nauire
Anglois.

Mais comme on estoit sur ces entrefaites, quelque Sauvages leur vindrét donner aduis de l'arriuée des Anglois dans le grand fleuve où ils auoient desia traité quantité de castors, ce qui fit diligenter Boulé, pour se rendre au plustost à l'habitation, & ayant auancé assez fauorablement, le lendemain matin ils apperceurent vn grand Nauire, avec vne barque attachée, sans pouuoir cognoistre d'où il estoit, les vns disoient que c'estoit là ce grand vaisseau qui conduisoit la barque des Reuerends Petes Iesuites, dont le sieur Emery de Caën leur auoit parlé, & d'autres au contraire soustenoient que c'estoit vn Nauire Anglois, & ne se trompoient pas.

Prise du
sieur Boulé
par les An
glois.

Le sieur Boulé dans cette incertitude, dit qu'il vouloit sçauoir que c'estoit, & commanda qu'on approchast, mais vn peu trop près, car les Anglois les voyans approcher & se venir brusler comme papillons à la chandelle, leur firent signe avec le chapeau qu'ils approchassent, & seroient les biens venus, mais sans parler, pour les attirer dans leurs filets, quelques François voyans ces signes se douterent incontinent du stratageme, & qu'ils estoient infailliblement Anglois, mais d'autres plus incredules voulurent tellemēt aduancer que pensans apres prendre la fuite, l'ennemi leur lascha sa barque en queue pour les prendre, mais en vain, à cause du vent qui leur estoit contraire, & falut s'en retourner à leur Nauire qui despecha en leur place vne

double chalouppe avec 20. ou 25. hommes tous frais & gaillards, qui en moins de 3. heures les atteignirent, prirent la barque & les firent tous prisonniers.

Les Anglois furent extrêmement ayse de ceste prise, & d'apprendre de nos hyuernants, l'estat de Kebec qui leur donna l'esperance de s'en rendre bien-tost les Maistres, ce qu'ils n'eussent pû faire sans l'assistance des Matelots François de ceste barque, lesquels ils contraignirent de conduire leur Navire à Kebec, autrement le sieur Emery de Caen y eut arriué le premier, & y estant les autres n'y eussent eu que faire & s'en fussent retournez avec leur courte honte, mais le mal-heur voulut que ledit de Caen fut tant contrarié des vents & du mauvais temps que n'estant pas arriué à temps luy mesme fut pris après Kebec, comme ie diray cy après.

Pendant que tout cecy se passoit à Gaspé & es contrées de Tadoussac, ceux de Kebec estoient dans les apprehensions de la venue des Hurons qu'on leur promettoit en bref, non qu'ils ne fussent bien ayse d'auoir leurs castors, mais à raison de 15. ou 20. François qu'ils auoient avec eux, lesquels leur seroient à charge & fort onereux pour leur peu de viures. C'est sans doute que l'on ne croyoit pas encor pour lors la venue des Anglois si près de Kebec, puis qu'ils se soucioient si fort de la venue des François, & qu'on auoit esté dans les termes de contraindre Coliart gendre de la Dame Hebert, de charger dans des chaloup-

pes deux pauvres femmes avec 4. ou 5. petits enfans dont le plus grand n'auoit pas de 8. a 9. ans pour les conduire à plus de six vingts lieues de costes chercher des Nauires pour les repasser en France.

A la fin nos Hurons arriuerent avec nos Religieux & tous leurs François, qui furent reçeus le plus hounestement & courtoisement que l'on peut, & auxquels l'on fist part des biens aussi bien que des miseres de la maison. Le Truchement Oliuier traita des Hurons quelques sacs de bled d'Inde pour le fort & l'habitation, nous en eumes deux à nostre part & les R.R.PP. Iesuites ce qui leur en faisoit besoin pour eux & leurs gens, & puis on n'eust plus que faire de rien traicter, car les Anglois parurent bien-tost après, qui les mirent hors de leurs miseres, pour rentrer en d'autres.

*Seconde arriuée des Anglois en Canada
& des propositions qu'ils firent au sieur
de Champlain pour auoir l'habitation
& en chasser les François.*

CHAPITRE XII.

VN Ieudy matin 19. iour de Iuillet 1629. quel'on croyoit l'ennemy plus esloigné, arriva fortuitement de Tadoussac au logis des R.R.PP. Iesuites, le fils d'un Sauuage nommé

la Nasse autrement Manitoucharche, cabannée proche la maison desdits Peres, & leur dit que trois Nauires Anglois paroïssoient proche l'Isle d'Orleans vne lieuë de l'habitation, & qu'il y en auoit encores six autres à Tadoussac, dequoy le sieur de Champlain auoit esté aduertty par vne autre voye.

Le Pere Ioseph qui eut aussi le mesme aduertissement s'en alla promptement à Kebec avec l'un de ses Religieux, pour sçauoir du sieur de Champlain & des autres Chefs ce qui seroit bon de faire, mais comme ils furent aduancez enuiron la moitié du chemin, ils rencontrèrent le R. Pere Brebeuf avec ordre des sieurs de Champlain & Du Pont, que tous se rendissent promptement dans le fort, ce qui fut fait non toutesfois sans quelque contradiction, car personne ne desiroit quitter sa maison & laisser là tout à l'abandon, sans voir de plus grandes preuues,

Et en attendant que les Anglois enuoyassent sommer la place tous les soldats & matelots se disposerent au combat, avec resolution de bien faire, car à ce qu'on disoit, il y auoit encore de la poudre pour tirer iusques à huit ou neuf cens coups de mousquets & seulement deux ou trois volées de canon, qui n'estoit pas, veu l'affiëre du lieu pour estre pris au premier iour.

Sur le flot, parut vne chaloupe ennemie ayant vn drapeau blanc, signal de sçauoir s'il y auroit lieu de seureté d'aller treuuer les François, les sommer & sçauoir

la resolution en laquelle ils estoient. Le sieur de Champlain en fit mettre vn autre au fort qui les fist approcher, car la courtoisie deuoir estre reciproque. Estans arriuez vn ieune gentil-homme Anglois mit pied à terre & ayant salué le sieur de Champlain luy presenta courtoisement vne lettre de la part des freres du General Quer, qui estoient à Tadoussac dont voicy la teneur.

*Lettre du
General
Quer au
sieur de
Champlain*

MON SIEUR, en suite de ce que mon frere vous manda l'année passée, que tost ou tard il auroit Kebec, n'estant secouru, il nous a chargé de vous assurer de son amitié, comme nous vous faisons de la nostre, & scachant tres bien les necessitez extremes de toutes choses auxquelles vous estes, que vous ayez à luy remettre le fort & l'habitation entre nos mains, vous assurant toutes sortes de courtoisie pour vous & pour les vostres, comme d'une composition honneste & raisonnable, telle que vous scauriez desirer, attendant vostre responce nous demeurerons Monsieur, vos tres-affectionnez seruiteurs, Louys & Thomas Quer. Du bord de Flibor ce 19. de Iuillet 1629.

Auant l'ouuerture de la lettre, le sieur de Champlain enuoya prier le Pere Ioseph de la Roche de luy seruir d'interprete & respondre au gentil-homme arriué, qui entendoit la langue Latine & non point du tout le François, après quoy il fut resolu de faire la responce comme s'ensuit.

MESSIEURS, la verité est, que les
 negligences ou contrarietez du mau-
 uais temps, & les risques de la mer, ont em-
 pesché le secours que nous esperions en nos
 souffrances, & nous ont osté le pouuoir d'em-
 pescher vostre dessein ; comme auions fait
 l'année passée, sans vous donner lieu de faire
 reussir vos preterentions, qui ne seront s'il vous
 plaist maintenant qu'en effectuant les offres
 que vous nous faictes d'une composition, la-
 quelle on vous fera scauoir en peu de temps
 après nous y estre resolu ; ce qu'attendant il
 vous plaira ne faire approcher vos vaisseaux à
 la portée du canon ; n'y entreprendre de met-
 tre pied à terre que tout ne soit resolu entre
 nous, qui sera pour demain. Ce qu'attendant
 ie demeureray Messieurs vostre affectionné
 seruiteur Champlain, ce dix-neufiesme de
 Iuillet 1629.

Ce gentil-homme ayant ses responces fut
 interrogé, mais vn peu tard, s'il y auoit guerre
 entre la France & l'Angleterre, à quoy il res-
 pondit que non, pourquoy donc dit le sieur de
 Champlain venez vous nous troubler icy,
 puis que nos Princes sont en paix. Puis le
 sieur de Champlain demanda au P. Ioseph s'il
 agréeroit d'aller treuuer les Capitaines An-
 glois, pour scauoir d'eux leur dernière resolu-
 tion & ce qu'ils auoient enuie de faire, ce qu'il
 accepta fort volontiers, & partit à mesme
 temps dans vne chaloupe, après auoir receu
 ses ordres de qui il appartenoit.

Responce
 du sieur de
 Champlain

Le P. Ioseph
 part pour
 Ambassa-
 deur vers
 les Anglois

Estant arriué au bord des Anglois où il fut receu & traité avec tout le bon accueil qui se pouuoit desirer, après les complimens rendus, Le Capitaine Louys Quer luy demanda qui l'amenoit & qu'elle estoit sa commission, à quoy le Pere respondit que le sieur de Champlain ayant veu la lettre du General son frere, l'auoit enuoyé chargé d'un mot de responce qu'il leur presenta, & pour sçauoir d'eux quel dessein ils auoient contre les François qu'ils menaçoient, en un temps de paix entre les deux Roys. L'autre luy repliqua qu'il ne vouloit autre chose d'eux, sinon que le sieur de Champlain luy remist ce iour là mesme le fort & l'habitation entre les mains, & en ce cas qu'il promettoit de repasser en France tous les François & de leur faire bon traitement, & que s'il ne le vouloit faire d'amitié, il sçauoit bien le moyen de l'y contraindre par force.

Le Pere le pria de donner un plus long delay & de ne se precipiter point en vne affaire si importante, d'autant que le sieur de Châplain ne pouoit traiter avec luy sans en auoir premierement communiqué avec les principaux des François, qui n'estoient pas pour lors dans la maison, & demandoit au moins 15. iour de delay pour les pouoir aduertir & ranger à Kebec, après quoy il luy donneroit contentement.

L'Anglois luy répartit : Monsieur ie sçay fort bien en quel estat vous estes reduits, vos gens sont allez pour la pluspart dans les bois chercher des racines pour viure. Nous auons

pris Monsieur Boulé que nous gardons à Tadoussac avec de vos gens, qui nous ont assuré de vostre extreme necessité, parquoy ie ne veux pas tant attendre. Le Pere luy repliqua; Monsieur donnez nous au moins huictaine, non dit le Capitaine Thomas Vice-Admiral, ie m'en vay presentement faire ruiner l'habitation à coups de canon, & son autre frere Monsieur, ie veux aujourdhuy coucher dans le fort, autrement ie feray le degast dans le pais. Le Pere leur dit doucement; Messieurs vous vous pourriez bien tromper si vous pensez vous hastier de la sorte, d'autant qu'il y a dans ce fort là environ cent hommes tous bien resolu de vendre leur vie, & peut estre y trouverez vous la mort & des disgraces pour des victoires, c'est pourquoy aduisez à ce qu'avez à faire, car ie vous puis assurer qu'ils ne manqueront pas de courage, & si tost que ie seray à terre vous en verrez l'experience, pour ce que gens à qui on veut oster iniustement & les biens & la vie, ont le courage & la force double, avec le sang eschauffé qui leur efface & leue toute crainte de la mort, & ne leur laisse aucune apprehension de quelque mal que ce soit, c'est pourquoy ie vous dis derechef que leur attaque vous sera dangereuse.

Lors le Capitaine Louys dit au Pere; Monsieur; retirez vous s'il vous plaist iusques sur le tillac, afin que j'aduise avec mon conseil à ce que j'ay affaire. Le Pere sortit de la chambre & les Anglois tindrent leur conseil de guerre, à la fin duquel ils l'appellerent & le

prierent d'aller rapporter au sieur de Champlain, qu'ils ne pouuoient differer dauantage que iusques à ce soir, & que s'il vouloit euitier au sang, qu'il fist luy mesme les Articles de capitulation, & luy enuoyast dans trois heures, autrement qu'il ne manqueroit pas de faire ses efforts. Pour vous autres Messieurs dit le Capitaine, ie vous prie de vous retirer chez vous, afin qu'il ne vous aduienne aucun desplaisir, car s'il arriue que iel'emporte de force vous ne seriez pas exempts dans le fort du malheur commun, ce que vous pouuez euitier estant chez vous, où ie vous assure qu'il ne vous fera fait aucun desplaisir, & pour plus d'assurance ie vous offre vn homme pour garder vostre logis, ou vn mot d'escriit qui vous seruira de sauuegarde.

Le Pere le remercia tres-affectueusement, & luy dit que ce seroit faire tort à sa parolle de ne s'y fier pas, puis le Capitaine luy fist voir toutes les munitions & armemens de guerre qu'il auoit dans ses vaisseaux, & le pria de rechef que tous nos Religieux se retirassent dans nostre Couuent.

Pour les R.R.PP. Iesuites qu'ils appelloient par derision Iudaites (nom qui leur doit tourner à gloire, car c'est vne espece d'honneur d'estre mesprisé par les meschans) ils dirent qu'ils deuoient bien remercier Dieu de ce qu'ils auoient eu le vent contraire ceste nuict là, d'autant qu'il auoit eu ordre de les aller saluer à coups de canon.

Le Pere luy dit, Monsieur il n'est ia besoin
de

de canon pour les auoir, car les pauures gens ne sont point fermez: Monsieur, luy respondit le Capitaine Louis, ie sçay bien quels sont ces gens là, vous les appelez pauures, mais ils sont plus riches que vous & auez tort de prendre leur cause; i'espere de faire la visite chez eux & d'y trouuer de fors bons castors & non chez vous. Voicy deux habitans de Kebec, parlant de Bailly autresfois Commis, & d'un nommé Pierre Raye Charron de son mestier, qui m'ont amplement instruit de tout ce que ie desirois sçauoir de Kebec puis se separant, le P. Ioseph reuint à terre rendre à Messieurs Champlain & du Pont de sa legation.

Le sieur de Champlain ayant esté acertené de la resolution des Anglois se retira au fort, où il dressa des articles de capitulation que ie n'ay pas iugé nécessaire d'inferer icy, ny celles que le sieur Querlby accorda, sinon que quelques vnes ont esté trouuées mauuaises & de dure digestion par les soldats & hyuernants, particulièrement celle où il est dit: pour les soldats & autres personnes; il leur sera donné chacun vingt escus, & n'emporteront aucune chose, ny armes ny bagages, & neantmoins il y en auoit qui auoient pour plus de 7. a 800. francs de marchandises, particulièrement ceux qui estoient reuenus des Hurons, c'est ce qui les fachoit fort & firent prier le sieur de Champlain par vn nommé le Grec truchemét, de ne point rendre la place & qu'ils estoient tous deliberez de se battre iusques à la mort, & de faire voir aux Anglois que s'ils estoient dis-

minuez de graisse qu'ils ne l'estoient de force ny de courage par le moyen duquel ils esperoient les chasser & deffaire, car quelle apparence disoient ils d'abandonner ainsi lachement ceste place sans coup ferir & laisser aux Anglois toutes nos marchandises & nos armes pour vingt escus, c'est ce que nous ne pouuons pas diger.

Ils en vindrent mesme iusques aux reproches, disans au sieur de Champlain qu'il ne devoit pas craindre de mourir ou d'estre fait prisonnier, ny de perdre en resistant, les mille liures de recompence & tout son equipage que les Anglois luy promettoient en se rendant, puis qu'il y auoit moyen de resister pour quelque temps en attendant secours qui n'estoit pas peut estre loin.

Ces paroles comme de raison piquerent au vif le sieur de Champlain, qui dit au Grec qu'il estoit vn mal-aduisé & ses compagnons mal sages, car comment veux-tu (dit-il) que nous resistions, n'ayans ny viures, ny munitions, ny aucune apparence de secours, estes vous lassés de viure ou bien furibonds voulez vous que vostre temerité l'emporte ou que la sagesse aye quelque credit sur vostre esprit vous croyez le dernier, obeïssiez donc à ceux qui desirent vostre bien & ne font rien sans prudence.

Il est vray que l'on estoit tres-mal pourueu de toutes choses necessaires à l'habitation mais l'ennemy estoit bien foible aussi, car le Pere Ioseph ayant bien consideré tout leur

equipage, il n'estoiét pas de plus de deux cens soldats & la plupart mal autrus, coquins, & gens qui n'auoient iamais porté les armes qui se fussent fait tuer comme canars, ou eussent bien-tost pris la fuite, ainsi se le promettoient nos gens.

Le temps mesme se rendoit fauorable à leur bonne volonté, car la marée baissoit, il faisoit vn grand vent de Surouest, & les ancrs challoient tousiours du costé de la France, tellement qu'il ne se trouuoit aucune assurance ny pour les Nauires ny pour les barques.

Nonobstant le sieur de Champlain trouua plus expedient de se rendre sans se battre que de se mettre dans le hazard de perdre la vie ou d'estre fait prisonnier en deffendant vne meschante place : il enuoya donc dire aux Anglois qu'ils se donnassent la patience iusques au lendemain matin qu'il les iroit trouuer, à condition qu'ils ne feroient aucune descente de nuit.

*De la prise de Kebec par les Anglois.
Du retour de nos Freres, des RR. PP.
Iesuites & de tous les hyuernans en
France & de deux filles Canadiennes
qu'on ne voulut embarquer.*

CHAPITRE XIII.

Prise de
Kebec par
les Anglois

LE matin venu qui estoit le Vendredy 20. de Juillet enuiron les neuf heures le sieur de Champlain alla dans le petit Nauire des Anglois, où le Capitaine Louys luy fist voir la commission qu'il auoit du Roy d'Angleterre de s'emparer du pais, puis les articles de la capitulation ayant esté signées de part & d'autre, ils mirent pied à terre avec vne partie de la flotte, qui furent cōduits par ledit Champlain dans l'habitation, de laquelle il les mist en possession & de là les mena au fort qu'il leur rendit de mesme.

Le Pere Ioseph le Caron superieur de nostre maison, ayant sçeu la reddition de Kebec enuoya promptement vn de ses Religieux au fort, supplier le Capitaine Louys de leur donner vn soldat pour la garde de nostre logis comme il auoit promis, à quoy obtemperant il leur en donna vn & au R. P. Brebeuf deux ou trois pour leur maison, qui furent suivis de leur Capitaine dès le lendemain avec quanti-

ré de ses soldats, qui firent vne raffe chez ces
pauures Peres de ce qu'ils trouuerét de meil-
leur & propre à butiner. Ils vindrent enfin
chez nous où le Capitaine receut la collation
des viures qu'il y auoit epuoyé de son bord,
car il scauoit bien que nous estions Reli-
gieux, fort pauures & qu'il cherchoit des Ca-
stors ou autres richesses chez nous, c'estoit
perdre temps, aussi ne s'en mist il pas en pei-
ne, & nous traicta en tout assez honorable-
ment fors vn Calice d'argent doré qui nous
fust desrobé; mais on n'a iamais sceu par qui,
car si le Capitaine Louys l'eut descouuert, il
l'eut fait infailliblement prendre à ce qu'il
nous protesta, c'est-ce qui nous en fist ne-
gliger la recherche, & de nous plaindre de-
quoy que ce soit sinon de voir les pauures
Sauuages abandonnez, car le seul interest
des freres mineurs doit estre celuy de Dieu,
& non à la terre.

Le Capitai-
ne Anglois
nous visita.

Vn Calice
nous fust
pris.

Tous les vaisseaux estans deschargez ils se
resolurent de faire partir le Samedy pro-
chain, l'vne des barques chargée des Castors
du magazin, & le lendemain vn autre petit
pour emmener quelques François, & aduer-
tir le General de ce qui s'estoit passé à la prise
de Kebec.

Le Dimanche matin les Anglois poserent
les armes d'Angleterre, à l'habitation & au
fort, avec le plus de solemnité qui leur fut
possible, ayans au prealable osté celles de
France. Apres midy le sieur de Champlain
les RR. PP. Iesuites, & tous les François de

Kebec furent commandez de s'embarquer pour Tadoussac dans les trois vaisseaux excepté le sieur du Pont, lequel pour son indisposition on laissa avec deux ou trois de ses seruiteurs pour le vaisseau qui nous embarqueroit, qui ne fut que six ou sept semaines apres.

Emery de
Caën com-
bat l'An-
glois du
quel il fut
pris.

Le vent ayant esté contraire, nos Anglois auancerent fort peu ce iour-là, mais de malheur pour le sieur Emery de Caën, ils rencontrèrent deux François qu'il enuoyoit descouvrir ce qui se passoit à Kebec, lesquels interrogez par le Capitaine Louys, & sceu comme le sieur Emery de Caën estoit au delà du cap de tourmente n'ayant pu aduancer d'auantage à cause des infortunes & disgraces qui l'auoient pensé submerger en chemin sans lesquelles il eut esté à Kebec premier, que les Anglois, & par ce moyen eut sauué le pays. Enuoya promptement vne chaloupe à son frere le Capitaine Thomas pour observer ledit de Caën qu'il chercha, mais en vain iusques à ce que de Caën ayât esté acertené de la prise de Kebec par les descouvertures qu'il fit des pataches & du nauires du Capitaine Thomas qui le cherchoit. Il alla effrontement combattre ledit Thomas, avec quarante hommes seulement, & quatre pieces de Canon, & le contraignit de quitter le Tillac, mais comme il estoit prest de l'aborder on dit que les huguenots de son equipage ne voulurent iamais aller contre leurs freres, & posèrent les armes bas, ce que voyans

les Anglois heureux de ceste lascheté, ils les
sommerent de se rendre par le moyen du
sieur de Champlain, qu'ils firent monter sur
le Tillac avec tous les autres François, qu'il
detenoit dans son bord ; mais qui ne peut es-
mouvoir ledit de Caën qui tascha de se saisir
de l'un des trois vaisseaux, par le moyen de
ses Catholiques pour se deffendre contre les
deux autres qui approchoient sans lesquels le
vaisseau attaqué par son courage estoit indu-
bitablement pris, ce qui ne luy réussit pas &
fallut à la fin se rendre, mais avec vne com-
position honneste & assez malheureuse, car si
ledit de Caën eut remporté la victoire, il eut
facilement repris Kebec, & le fort ou le Ca-
pitaine Louys faisoit travailler incessamment
pour s'asseurer tout le pays, mais il y auoit si
peu de viures pour son grand nombre, & si
peu d'esperance d'en pouuoir recouurer d'ail-
leurs à cause que les grands vaisseaux n'eus-
sent sceu monter de Tadoussac à leur secou-
rir qu'ils estoient pour se rendre bien tost, de
victorieux vaincus.

Or ie ne puis taire en passant qu'après que
ledit Caën eut esté conduit à Tadoussac, les
huguenots de son bord qui auoient posez les
armes lors qu'il estoit question de mener les
mains contre leurs freres, furent plus mal
traictez des Anglois mesmes, que les Catho-
liques qui s'estoient monstrez fidels à leur
chef & Capitaine, tant est odieuse à Dieu, &
au monde la desloyauté qui fit surnommer
du nom de traistres ces François mal affe-
ctionnez.

Pendant que le combat se donnoit entre le sieur de Caën & l'Anglois, le Capitaine Louys estoit fort en peine à Kebec de l'issuc de ce combat, & nous visitoit fort souuent avec tout plein d'honneste completion que nous luy rendions à point nommé, mais c'estoit avec vn visage assez triste de voir les pauvres Catholiques ainsi miserablement dechassez, & les Sauuages abandonnez, car on n'auoit plus d'esperance qu'au sieur de Rasilly qui ne paroissoit point.

Courtoisie
du General
Quer en
uers les ke-
coliers.

Quinze iours apres la prise de Kebec, le General Quer fut visiter nostre Conuent, où il fist la collation, & protesta à nos Religieux (esmeu peut-estre du bon recit que les François & Sauuages luy auoient fait d'eux) que si le Conseil d'Angleterre n'en eut autrement ordonné, il les eut laissé dans le pays pour-
suiure la conuersion des Sauuages, & qu'il approuuoit fort la Regle de S. François, qui ne thesaurise point en la terre, que demeurassions dans nostre Conuent, tant qu'il faudroit necessairement partir, & qu'aucun ne nous feroit de desplaisir qui vint à sa cognoissance sans vn exemplaire chastiment dequoy nos Religieux le remerciaient.

De plus il leur accorda de dire la sainte Messe tous les iours dans nostre Chapelle, & n'ayans point de vin le Capitain Louys son frere ne voulut point qu'on en vst d'autre que du sien qu'il nous enuoyoit fort librement & nous visitoit aussi souuér estant bien

ayse qu'on luy rendit la pareille, dont ie peux inferer qu'il n'estoit pas mauuais huguenot, il y eut mesme quelques Anglois qui assisterent à la sainte Messe, mais en cachette, car vn faulta nos rampars peur d'y estre surpris & descouuert Catholique.

Le 9. iour de Septembre 1629. toutes les despaches des Anglois, estans expedies ils firent partir le petit nauire pour la derniere fois dans lequel s'embarqua le sieur du Pont, le reste des François, & tous nos pauvres Religieux qui se rendirent à Tadoussac, où ils trouuerent le sieur de Champlain, & les RR. PP. Iesuites en bonne disposition à leur disgrace pres, & le iuste mescontentement du dit de Champlain de ce que les Anglois, contre leur promesse & le traicté signé, n'auoient jamais voulu embarquer pour France deux filles Sauvages qu'il auoit nourrie & fait instruire depuis deux ans sous esperance de les y faire conduire, car la troisieme qu'il auoit nommée la foy s'en estoit retournée parmy ceux de sa nation.

Nos Religieux eussent bien desiré auoir du credit assez pour donner lieu au bon dessein du sieur de Champlain, mais leur pouuoir ne portoit pas si haut. Il falloit calmer ou prieres ne seruoient de rien & attendu que le pays fut rendu aux François, ce que nos Religieux esperoient tellenēt, & d'y retourner dans quelques temps qu'ils se contenterent de passer seulement deux coffres, & de cacher le reste de leur vstencilles & emmeu-

Nos Religieux sont mis hors du Canada, par les Anglois.



Ornemens
qui nous
restent en
Canada.

blement en diuers endroits sous la terre & emmy les bois, le surplus de nos ornemens fut ferré dans vne caisse de cuir en vn lieu à part fort decemment, dont en voicy la liste.

Vn Calice d'argent doié se demontant en trois piéces avec son estuit, vn chasuble de taffetas de la Chine, deux aubes, 4. amis. Quelques ceintures : les coussins, le deuant d'Autel de camelot vert, deux barettes destain, 4. seruiettes, le fer à faire les Osties avec les outils pour les couper. Il y a aussi vn corporalier avec deux corporaux, vn voyle de tafetas, & deux n'appes d'Autel. De plus la cloche de quoy on se sert à l'habitation est de nostre Conuent de Paris. Desquels ornemens Messieurs de la Societé à present remis en possession du Canada se seruent à l'habitation pour la sainte Messe, ayans promis de nous en faire rendre d'autres en leur place, car ils font des aumosnes des pauvres mandiees par de nos Religieux, dont leurs Majestez y ont contribué, Monsieur & Madame de Pizieux & autres.

Les RR. PP. Iesuites y firent aussi des pertes notables, & beaucoup d'autres particuliers excepté le sieur de Champlain qui eut la pluspart de son bagage conserué duquel neantmoins il faisoit moins d'estat que de ces deux pauvres filles pour lesquelles il promettoit aux Anglois de leur rendre vne promesse de mille liures qu'ils luy deuoient faire donner en Angleterre à la charge de luy laisser conduire ces deux pauvres Sauvages en

France, comme elles le desiroient avec passion, mais il n'y eut pas moyen d'obtenir cela d'eux, car quelques desloyaux François l'empescherent disans qu'il n'estoit pas expedient, & qu'on feroit mieux de les retenir à Kebec, ce que tous les gens de bien trouuerent fort mauuais, ie ne veux pas iuger qu'ils eussent l'intention mauuaise, mais tousiours peut-on dire qu'ils empescherent vn fort grand bien.

Cependant les pauures filles ne faisoient que pleurer & ne vouloient, ny boire, ny manger de regret qu'elles voyent de ne faire vn si heureux voyage. Elles attaquerent vne fois vn certain François reuolté, & luy dirent assez brusquement c'est toy meschant qui avec cet autre desloyal François empeschez que n'allions en France avec Monsieur de Champlain qui nous a seruy de pere depuis vn si long-temps nous voulons estre baptisées & viure parmy les Chrestiens, & vous serez cause de nous en faire perdre l'occasion. Tu pense iouyr de nous, mais sçache que si tu m'en parle plus desormais que ie te donneray d'vn cousteau dans le ventre, & ne mourras que de mes mains, elles luy firent tout plein d'autres reproches, & l'assurerent qu'il se trompoit bien fort, & tous les autres meschans comme luy, de penser qu'elles deussent demeurer à Kebec, & qu'elles vouloient s'en retourner avec ceux de leur nation auxquels elles feroient leurs plaintes, dequoy ce François reuolté resta tout honteux, &

ne scauoit que respondre sinon qu'elles estoient folles.

Le sieur de Champlain les recommanda à Guillaume Coliart gendre de la Dame Herbert, afin qu'il en prist le soin, & les gouvernast comme ses filles propres, ce qu'il promist faire & l'effectua car il estoit tres-honneste homme & craignant Dieu, & auoit esté conseillé par nos Religieux de ne point quitter la maison de Kebec, puis que les Anglois luy faisoient vn party aduantageux, & qu'il y auoit esperance que les François y retourneroient bien-tost, le Roy n'estant pas pour en souffrir l'affront qu'il falloit dissimuler pour vn temps, & non pour vne eternité comme l'experience à fait voir du depuis à nostre contentement.

Les filles estant parties avec ledit Coliart, & quelques Anglois dans la premiere barque qu'il mist sous voile pour Kebec. Le 14. iour de Septembre, nos gens leuerent aussi l'ancre pour Angleterre & chercherent en vain le sieur de Rasilly pour le combattre qui ne se trouua point, mais ie voy pour moy qu'ils n'auoient pas enuie de le rencontrer, ny y derisquer en vn combat douteux ce qu'ils auoient gagné sur les François, & pour ce reprirent leur route, non sans quelques disgraces ordinaires à la mer, les grands vents, les orages & la mauuaise nourriture.

Le 18. Octobre, ils arriuerent au port de Plemus auquel ils sejournerent cinq ou six iours, de là nos Religieux furent conduits

avec quelques François à Londres, où ils en
mirent quelques vns à terre, & nos Reli-
gieux dans de meschans bachots iusques à
Douure, & de là à Calais où ils arriuerent
avec la grace de nostre Seigneur le Lundy
29. iour d'Octobre 1629. enuiron les dix heu-
res du matin, puis de leur pieds en nostre
Conuent de Paris, où ils rendirent graces à
Dieu qui auoit pris soin de leur conseruation
auquel soit honneur, gloire & louange au sie-
cle des siecles, Amen.

*Fin du 4. & dernier Liure de ce
present Volume.*



DECRETVM SAC.
Congregationis de Prop. Fid. ha-
bitæ die XXVIII. Februarij
M. DC. XXXV.

R Eferente Eminentissimo Montio, Sacra
Congregatio censuit, missionem Recolle-
ctorum Provincia Parisiensis ad Canadam
America Septentrionalis sub foel. rec. Pauli
V. institutam confirmandam esse, & ut de ca-
terois illa melius dirigatur, copiosoremque refe-
rat fructum, in primis censuit, eiusdem missio-
nis praefectum constituendum, & deputandum
esse Provinciale pro tempore protentorum Re-
collektorum cum facultate instituendi Vicarium,
seu Vicepraefectum dictae missionis, qui in dicta
Canada Provincia resideat, & missionarios ad
eiusdem Canadae populationes tum antea, tum
nuper repertas, ac in futurum reperiendas, ubi
tamen non sunt aliae missiones, dirigat, eorum-
que curam habeat, ac in disciplina regulari con-
tineat. Secundo, missionem propterea augen-
dam esse alijs viginti religiosis eiusdem Ordinis
ab eodem Provinciali, eiusque Diffinitorio cum
scitu, consensuque Nuntij Galliarum appro-
bandis, ac prout opus fuerit, unica, vel pluribus
vicibus ad praefatam Provinciam mittendis.
Tertio, eidem Provinciali pro tempore, uti pra-
dictae missionis Profecto, concedendas esse ad de-
cennium facultates, quae missionarijs indiarum

concedi consueverunt, cum potestate illas in totum, vel in parte communicandi dicto Vicario, seu Viceprefecto, ac missionariis veteribus, & novis, easque toties quoties opus fuerit, suspendendi, ac renocandi, prout missionis necessitas exegerit. Quarto, iniungendum esse eidem Provinciali, ut singulis annis à Viceprefecto relationem progressuum prædictæ missionis exquisit ad Eminentissimi. huius Sacre Congregationis Præfectum transmittendam. Quinto & postremo iussit pro prædictarum facultatum expeditione adiri sanctum Officium.



DECRET DE LA SACREE
*Congregation de la propagation de la
foy donné le 28. Fevrier de
l'année 1635.*

AV rapport de Monseigneur l'Eminentissime Cardinal Monty, la sacrée Congregation a ordonné que la mission des PP. Recollets de la Prouince de Paris, pour aller en l'Amerique Sptentrional, dicté communément Canada, & establie sous les auspices d'heureuse memoire Paul 5. deuoit estre confirmée, & afin que d'oresnauant elle soit mieux conduite & qu'elle apporte vn plus grand fruit, en premier lieu elle a trouué à propos que le P. Prouincial des susdits Recollets durant son temps fut estably & constitué Prefet de ladite mission avec tout pouuoir des'establi vn Vicaire ou Vice-prefet, le quel sera obligé de resider audit pays, & aura tout pouuoir sur tous les missionnaires qui seront audit pays de Canada descouuert de long-temps ou bien depuis peu, ou bien qui se descouurira à l'aduenir pourueu toutefois qu'ils n'ayent point d'autre mission, & aura soin d'eux & fera en sorte qu'ils se maintiennent en la discipline reguliere. En 2. lieu elle veut qu'avec le sceu & consentement du non resident en France ledit Pere Prouincial, & son definitoire augmentent la susdite mission
de

de vingt Religieux, lesquels ils pourront en-
uoyer tous à la fois ou bien à diuerfes fois
comme ils trouueront durant son temps à
propos. En 3. lieu elle concède audit Prouin-
cial prefet de la susmentionnée mission pour
l'espace de 10. ans, les mesmes Priuileges qui
sont concédés aux missionnaires des Indes
auec tout pouuoir d'en faire participant son
Vicaire ou Vice-prefet, & les missionnaires
mesmes tant de la vieille que de la nouvelle
mission en tout ou en partie, toute & quante
fois que bon luy semblera, & les en pourra
aussi suspendre & priuer mesme tout à fait
ainsi que la necessité de la mission le requera.
En 4. lieu elle enioint au mesme Prouin-
cial qu'il aye à tirer tous les ans de son Vice-
prefet la relation du progres de sa mission, la-
quelle il enuoyra à l'eminetissime Prefet de
cette sacrée Congregation: en dernier lieu
elle commande que pour l'exécution des
susdictes facultez on ait recours à la sainte
inquisition.

ANTHOINE BARBERIN, Cardinal
& Prefet.

Lieu du sceau.

FRANÇOIS INGOLVS, Secretaire,

SS





FACULTATES CON-
cessæ à sanctissimo D. N. D.
Vrbano diuina Prouidentia
Papa Octauo Prouinciali, pro
tempore Parisiorum præfecto
missionis ordinis Recollecto-
rum ad Prouinciam Canadæ
Americæ Septentrionalis.

1. **A**dministrandi omnia Sacramenta
etiam Parrochialia exceptis confirma-
tione, & ordine.
2. Absoluendi ab heresi, & schismate indes-
etiam Relapsos.
3. Absoluendi in foro conscientia à casibus re-
seruatis per quasunque constitutiones Aposto-
licus, & in specie per bullam in cœna Domini in-
iunctis iniungendis.
4. Dispensandi in tertio, & quarto simplici, &
mixto consanguinitatis, vel affinitatis in ma-
trimonijs contractis, nec non dispensandi cum
gentilibus & infidelibus plures exhores habenti-
bus, & post eorum conuersionem, & baptismum
quam ex illis maluerint retinere possint, nisi pri-
ma voluerit conuerti.
5. Declarandi prolem legitimam in præfatis
matrimonijs de præterito contractis susceptam.

6. Dispensandi in quacunque irregularitate ex delicto occulto, praterquam ex homicidio voluntario contracta, & relaxandi suspensiones quascunque à Religiosis secularibus, vel Regularibus praterquam ab homine impositas, & iniunctis inuincendis.

7. Comstandi vota simplicia exceptis voti castitatis, & Religionis.

8. Relaxandi iuramenta ob iustas causas.

9. Administrandi sacramenta sine ceremonijs solitis, non tamen necessarijs.

10. Vendi elege, & Chrismate veteribus, quando noua de facili haberi non possunt.

11. Benedicendi parmenta, Capellas, & cetera qua ad cultum diuinum spectans ubi non adhibetur sacra unctio.

12. Celebrandi missas quocumque loco decenti etiam subdio, & sub terra ante lucem, & hyeme una hora post meridiem in altari portatili sine obligatione inquirendi an sit fractura, aut cum reliquijs, vel sine quod de alijs altaribus intelligatur, bis in die ubi necessitas exposulauerit iuxta sacros Canones coram hereticis, infidelibus, & excommunicatis dummodo minister non in hereticis, & in casu necessitatis.

13. Deponendi habitum, & pecunie usum habendi ubi necessitas postulauerit.

14. Recitandi rosarium beatae Marie Virginis loco officij quando brexiarium non habuerit, vel non potuerit eo usi propter periculum vite.

15. Concedendi indulgentiam quadraginta dierum in festis de precepto, & prima Classis, & plenariam in diebus Natiuitatis Domini, &

*Assumptionis beata Maria Virginis, & semel
facientibus confessionem generalem iuorum pec-
catorum, & semper in mortis articulo.*

16. *Communicandi has facultates in toto vel in
parte vicario seu viceprefecto, ac alijs missiona-
rijs eiusdem ordinis ad Canadam America Se-
ptentrionalis Prouinciam transmissis, & ab eo-
dem Prouinciali eiusque definitorio, cum scitu,
& consensu Nūty Galliarum approbante trans-
mittendis & concessas renocandi toties quoties
opus fuerit.*

17. *Concedendi facultatem vicario, siue Vice-
prefecto dicta missionis in Canada residenti tan-
tum consecrandi calices, patenas, & altaria
portatilia oleo tamen ab Episcopo benedicto:
vtendi supradictis facultatibus in dicta Prouin-
cia Canada America Septentrionalis, & alijs
locis circumvicinis tantum.*

Feria quinta die 29. Martij, 1635.

*In generali Congregatione sancti officij habi-
tu in palatio Apostolico apud sanctum Petrum
sanctissimus D. N. D. Urbanus diuina Proui-
dencia Papa Octauus concessu supradictas fa-
cultates supradicto Prouinciali Parisiorum pro
tempore Recolletorum ad Decennium proxime
futurum.*

FRANCISCVS CARDINALIS
BARBERINVS.

Locus sigilli.

IOANNES ANTONIVS THOMAS, sanctæ
Romanæ, & vniuersalis inquisitionis
Notarius.

Registratum folio 176.



PERMISSION ACCORDEE
par nostre S. Pere le Pape Urbain hui-
etiesme, au Pronvincial des Recollets de
Paris Pr:fet de la Mission de Canada en
l'Amerique Septentrionale,

D'Administrer tous les Sacremens, mes-
me Parochiaux, excepté la Confirma-
tion & l'ordre.

D'absoudre *in foro conscientie*, de tous cas re-
seruez en toutes les constitutions Apo-
stoliques, quelles qu'elles soiét, & en spe-
cial par la Bulle, *in cœna Domini*, enioint
toujours ce qu'il faut enioindre.

D'absoudre de l'heresie & du schisme les
Indiens mesmes relaps.

De dispenser au 3. ou 4. degré simple ou mix-
te de consanguinité ou affinité és maria-
ges, & de dispenser avec les Payens ou in-
fidelles, ayans plusieurs femmes afin qu'a-
pres leur conuersion & le baptisme receu,
il puissent retenir celle qu'ils aymeront le
mieux, si d'aduanture la premiere ne se
veut pas conuertir.

De declarer legitimes les enfans qu'ils au-
ront eu és susdits mariages par icy deuant
contrâctez.

Dispenser de toute irregularité encouruë par
delit occulte excepté de celle qu'on con-
trâcte par l'homicide volontaire & remet-

tre toutes sortes de suspensions imposées
par Religieux seculiers ou reguliers. Ex-
cepte celles à l'homme enioint tousiours
ce qu'il faut enioindre.

Decommuier les vœux simples hors mis de
la chasteté & Religion.

Remettre les sermens pour iustes causes.

Administrier les Sacremens sans les cerem-
nies ordinaires mais non necessaires.

Vser des huiles & chresmes anciens quand
on n'en pourra auoir aysement de nou-
uelles.

Benire parements, Chapelles, & autres choses
qui regardent le culte diuin, où il ne faut
point vser d'Oction sacrée.

Celebrer les Messes en tout lieu honneste &
décent mesme descouvert & sous terre
auant iour, & l'hyuer à vne heure apres mi-
dy, sur vn Autel portatif, sans estre obligé à
prendre garde s'il est rompu, avec ou sans
reliques, ce qu'on doit entendre des au-
tres Autels, celebrer encor deux fois par
iour, quand la necessité le requerra selon
les sacrés Canons deuant les Heretiques
infidelles & excommuniez pourueu que
le Ministre ne soit pas heretique, & en cas
de necessité quitter l'habit & se seruir d'ar-
gent.

Reciter le Rosaire de la Vierge Marie, au
lieu de l'office quand on ne pourra auoir
de Breuiare où s'en seruir sans danger de
la vie.

Accorder l'Indulgence des 40. iours és festes
de Commandement, & premiere classe,
& pleniére és iours de la Natiuité de no-
stre Seigneur & Assumption de la Vier-
ge, & à ceux qui feront vne fois vne con-
fession generale de leurs pechez, & tous-
jours à l'article de la mort.

Communiquer ces mesmes permissions en
tout ou en partie au Vicaire ou Vice-pre-
fet, & autres missionnaires du mesme
Ordre qui seront enuoyez en Canada,
Prouince dans l'Amerique Septentrio-
nale par le susdit Prouincial, & son dissi-
nitore avec le sceu & consentement du
Nonce de France, & de les reuoker les
ayant concedées toutes & quantes fois
qu'il besoin sera.

Donner permission au Vicaire & Vice-pre-
fet de ladite mission en Canada, y resis-
dant seulement de consacrer Calices, pa-
teines & Autels portatifs, toutefois avec
huile benite par vn Euesque.

D'vser seulement desdictes permissions en la
Prouince de Canada en l'Amerique Se-
ptentrionale & autres lieux voisins d'i-
celles.

Le Ieudy vingt-neuf Mars 1635.

En la Congregation generale du saint Offi-
ce tenuë au Palais Apostolique à saint
Pierre.

Nostre S. Pere le Pape Urbain huitiesme a
conc edé les susdites permissions au Pro-
vincial qui sera des Recollets de la Prouin-
ce de Paris, pour le terme de dix ans.

FRANÇOIS CARDINAL BARBERIN.

La place du sceau.

Io. ANTOINE THOMARIUS, Notaire
de la sainte Eglise Romaine, &
de l'inquisition vniuerselle.

Enregistrée.

Fueillet 176.



T B L E
DES MATIERES
PLVS REMARQVA-
bles contenuës en l'Histoire
de Canada.

A



Couchement de femmes. 224.

331.342.

de l'Aduersité des gens de bien,

649. & suiuaus.

de l'Agnus Dei, 465. 466

de l'Aigle. Belles propriétés de

l'aigle, 736. & suiuaus, ennemy de tous les

autres oyseaux; insques à ses plumes mesmes,

736. 816. 818.

des Alcyons, 163

Algoumequins nation, 197. 198. Situation de
leur pays, 201. 202

Alouettes, 156

de l'Ame, 493. Créances des Hurons touchant
l'immortalité des ames, 493. 497. Croyent
toutes choses materielles auoir un esprit.
D'un rocher, 493. & suiuaus. Où l'ame va
apres le trépas de l'homme, selon leur opi-

Table

- nion*, 497. *Chemin des ames*, là mesme. De
l'estat des ames apres la mort, 499. Des pre-
sen: & aumosnes qu'ils font à leur intention,
 493. 496. 498. De certains esprits auxquels
 ils ont recours, 494. 495
des Ames des chiens & des choses inanimées,
 493. 495 496. 498. 514 642.
de l'Amerique. De sa premiere decouverte, 616
 627. Des conversions admirables que les Fre-
res Mineurs y ont operé, 627. & suiuañs.
 Des grands pays que le Roy d'Espagne y pos-
 sede, 629. & suiuañs.
Anglois. Leur arriuee à Canada. Se rendent
 maistres de Tadoussac & brust nt le Cap de
 tourmente 916. & suiuañs. Somment le sieur
 de Champlain de rendre l'habitation de Ke-
 bec. Sa response, 929. & suiuañs.
combat de François & Anglois, 951. 952. Pren-
 nent 4. nauires Basques, 952
seconde arriuee d'Anglois en Canada. Proposi-
 tions au sieur de Champlain pour auoir l'ha-
 bitation & en chasser les François, response
 dudit sieur de Champlain, 986. & suiuañs.
 S'emparent de Rebec. Chassent les François
 de Canada.
de l'Anguille. Moyen de la pescher parmy les
 Canadiens, 763. 764. comment les font
 seicher, 764. 765
des Anciens vieillards, voyés vieilleffe.
Animaux, des aisez ou principes de chaque es-
 pece, 500
des Animaux. Prouidence diuine en la seconsi-
 té des animaux peureux & bons à manger,

des Matieres.

<i>Et en la sterilité de ceux qui sont misérables à l'homme,</i>	724. 725.
<i>de la rebellion des bestes contre l'homme,</i>	726.
<i>nations payennes qui ne font point de mal aux animaux,</i>	726. & sui.
<i>hospital pour les animaux malades en bles-</i>	
<i>Je X,</i>	728
<i>des Animaux terrestres qui se trouvent communement en Canada, Et de ceux que l'on y fait passer d'icy,</i>	741. & sui.
<i>Bestes à quatre pieds ne peuvent viure en Afrique,</i>	742
<i>Annedda, arbre d'une vertu admirable contre toute sortes de maladie corporelle,</i>	665
<i>de l'Aparition des esprits,</i>	521. & sui.
<i>Le diable parle à une Indienne du Bresil,</i>	522.
<i>apparoit à un Nonne Recollet,</i>	523. 524
<i>Apollonius Thianens : response touchant ses voyages,</i>	314
<i>de l'Arc en Ciel.</i>	817
<i>Armoiries des Hurons,</i>	805
<i>Artillerie, de l'invention d'icelle,</i>	354
<i>Asnesse en Canada,</i>	163. 742. 743.
<i>Et asne com-</i>	
<i>bien vendu en Peru,</i>	743. 744
<i>Assemblées generales des Hurons,</i>	424.
<i>De la nation nentre,</i>	882
<i>Assihendo, poisson,</i>	762
<i>Assistagueronon nation,</i>	201
<i>isles Aïfores,</i>	125
<i>Atabacan une des divinites des Montagnais,</i>	
<i>504.</i>	
<i>Atty arbre. Commoditez que les Sauvages en tirent,</i>	783
<i>Auarice d'un riche,</i>	400
<i>Auare rendu deuot.</i>	100

Table

*Aueugles employez au trauail, 253. Du bail-
lement. Pourquoi on fait lors le signe de la
Croix, 845. des Bayennes. nation, 717. 718.
Des balenes, masles & femelles. De leur gros-
seur, 130. 131. grand ban. Description d'ice-
luy, 135. 136
ban Auere, 139. Baptesme d'un ieune Sauuage
auquelle diable apparut en diuerses formes,
543. & suiuaus. De la barbe de l'homme,
376. 850. Les Sauuages n'en portent & n'en
veulent point porter, l'ont en horreur, 376. &
suiuaus. Les Romains n'en portoient point,
379. S François n'en portoit pas, 380. Iuge-
ment du Pape Gregoire VII sur ce sujet,
380 femmes veluës, 381. Les sauuaiges ne
le font point, là mesme. Fille Saxonne bar-
buë & veluë par tout le corps, 382. 389.
Blanchefne, 42. & suiuaus.*

B

B *le montagne, 150
Bled d'Inde comment moulu & concafé
par les Sauuages pour le manger, 183. 185.
210. diuerse: especes de bled d'Inde, 210. de
sa substance, vertu & proprieté naturelle,
662. Comment semé, & comment croist,
282. 283 832.
Blancs, fruit, 778
du Boire, 222. 223
nation de Bois, 196. 197. comment s'accmmo-
dent le corps, 197
des Boies grand Vicaire de Pontoise, 56. Lettre*

des Matieres.

<i>an P. Denys l'amer Recollet en Canada,</i>	66.
<i>& suiuaus, Syndic & Procureur du Seminaire de Canada,</i>	63. 70. 71
<i>Boulé pris par les Anglois,</i>	981. & suiuaus.
<i>le P. Brebeuf Iesuite en Canada. Va aux Hurons,</i>	874. 875
<i>Brochees,</i>	762
<i>Brusle truchement des Sauvages. Sa mort,</i>	465.
<i>& suiuaus.</i>	
<i>des Bulles,</i>	754

C

<i>Cabanes des Sauvages comment faites, & de l'ordre qu'ils obseruent pour cabaner,</i>	248. & suiuaus, 262. & suiuaus. Incommoditez grandes que l'on y souffre, la melme.
<i>Cabanes des Hurons, comment faites</i>	248. & suiuaus. Preseance aux cabanes,
<i>le sieur de Caen</i>	92. 94. 96. 578. 579. 874. & suiuaus.
<i>de Calicut, Royaume grandement riche,</i>	615. 616.
<i>Camillus Tribun Religieux au fait de la guerre, ne se veut seruir de trahison,</i>	435. 436
<i>Canada par qui premierement decouvert,</i>	8
<i>Cause du peu d'auancement en la conuersion des Canadois,</i>	9. 10. La premiere fois que la Messe y fut dite par les P. Recollets.
<i>Deputation & requeste des habitans de Canada vers le Roy,</i>	72. & suiuaus. Remostrances au Roy & memoires des choses necessai-

Table

res pour l'entretien de l'entreprise des François en Canada,	86. & suivans.
Canada par qui & quand premierement decouvert, des voyages & decouvertes qui s'y sont faits depuis ce temps là jusques à present,	86 87.
Cause du peu de fruit qu'y ont fait les Religieux au spirituel.	168. 169
Ce qui est necessaire pour la conuersion des sauvages,	169. 170
Canadiens & Montagnais non larrons,	412.
Licence des filles Canadiennes, des richesses du pays,	413. des richesses 787. 788
Canadien baptisé,	91. & suivans.
Cananée Capitaine de Marine pris des Turcs,	842.
des Canots des Sauvages,	166. 792
Capitaines de Prouince & de guerre parmy les Harons,	422
du Caprice de S. François, & de sa vraye forme,	195. 196
du Capuchon peintu de certains Religieux,	830
des Capucins, de leur Ordre & Fondateur,	852. 853. 855 857.
Caribous ou asnes sauvages,	750
des Castors,	766. & suivans.
de la chasse des Castors,	769. 770
Cap de victoire,	174. 830
Cap de tourmente, 158. Bruslé par les Anglois,	916. & suivans.
Cap Breton,	140
le Cap. Cananée pris par les Turcs,	38. 39
Cedre,	783

des Matieres

des Cerfs,	753
de Champlain,	479. & suivans. 557. 558
de Champlain, 913. 914. 921. 924. 940. & suivi.	
de la Chandelle parmy les Hurons,	226
Chanterie de malade comment se fait,	198
frere Charles Recolet,	101. & suivans.
Chastiment de Dieu presagé,	915
Chat saunage,	747
d'un Chat qui fut donné aux Hurons,	838
Chaudieres de bois chez les Hurons & Cana- diens, comment font cuire leur chair,	287. 288.
faire Chaudiere à la Huronne,	177
du Cheual marin,	731
des cheueux ou chevelure des Sauvages & Ca- nadiens,	389 & suivans.
des Cheueux releuez, nation,	199. 200
des Chiens. De leur fidelité,	754
vice du Chien,	756
Chiens du Canada,	756. 757
des Chiens des Hurons,	537
Chiens mangez par les Sauvages,	810
de la Chine, Royaume.	615
des Chirurgiens parmy les Sauvages,	666
Choumin Saunage: sa bonté,	52. 53
du Ciel,	499. 500
Cigne.	740
Citrouilles. Maniere de les semer parmy les Hurons & Canadiens,	283. 284
de la Clemence. Belle action de Trajan,	401
Clemence des Hurons, là mesme.	
du Cocrocodile. Comment on le prend,	729. 730
Cochonnets en Canada,	162. 163

Table

Conseil, costume des Hurons en l'assemblée de leurs Conseils. Des deliberations qu'ils y font, 421. & suiuaus. Dinerité de Conseils parmy eux, làmesme.	
Conuerſion. Methode de conuertir les gros Chreſtiens.	99. 100
Conuerſion de Sauvages à la Religion Chreſtienne, 539. & suiuaus. Baptesme d'un ieune Montagnais, nonobſtant les empeſchemens du diable qui luy apparut ſous diuerſes formes, 543. & suiuaus.	
action & Charité admirable d'un Sauvage pour le baptesme d'un autre, 467. 468. Baptesme d'un Algoumequin, 567. & suiuaus.	
Harangue d'un Sauvage touchant l'affection qu'ils auoient au baptesme,	560. 565
Conuerſions de pluſieurs autres Sauvages,	585
& suiuaus, 592. & suiuaus.	
des Cordeliers de leur ordre. Leur Fondateur,	
852. 853. 855.	
Corbeau,	740
des Couleuvres,	773
Cour, point de vertu en Cour,	786
des Courriers,	884
de la Creation du monde. Opinion des Montagnais 505. De la creation de l'homme, & de la femme,	506

| D

Dances des Hurons, chansons & ceremonies ridicules,	304. & suiuaus.
Des dains,	754
	le

des Matieres.

le P. Daniel Recollet, s'embarque pour la nouvelle France. Pris par les Anglois, & renvoyé en France. Est auant disgraces, 945. & suiuaus. 958 & suiuaus.

du Deluge. Opinion des Montagnais, 506. 507

le P. Denis Iamet Recollet, va en Canada 11.

22. 58. 31. Lettre qu'il escrit au sieur de Boues grand Vicair de Pontoise, touchant leur establisement & logement en Canada, 57. & suiuaus.

Des Dames, 939. 940

Desespoir d'un heretique, 47. 48

le Diable singe des œuvres de Dieu, 233. 234

Des diables selon les Sauvages, 486

que le Diable dit quelquefois verité, 658

Diamans en Canada, 788

Dieu quelle est la creance des Sauvages, 485. & suiuaus.

Diuersité des Dieux parmy les Indiens, 487. 488

Creance des Miskoutins, 488. des Souris-

quois, 48 489. creance plaisante, 490. crean-

ce des Hurons, touchant le Createur, 490.

492. & suiuaus. creance des Montagnais, &

leurs vaines opinions touchant leurs trois

Dieux, 464. & suiuaus.

Dorade poisson, 133. 134

E

E Au benite, 554

Et bicerinis Sorciers, 176. Pourquoi appellez

sorciers, 193. 194. De leurs vestemens, & ca-

puce, 194. 195. 237. de leur lac & pays, 800.

Table

& suivans.

Echos,	17
de l'Eclair,	500
Escriture. Dieu en est le premier auteur, Moyse le second, 353. 354. Admirée par les sauvages, chausse de torin,	783
Escuelles des sauvages,	277
Ecurieux de trois sortes,	745
Einchataon poisson,	762
Eslans,	749
Elephant de mer, ou beste à la grand dent, 143. 144.	

Enfans. Les Hurons aiment leurs enfans, 323
De leur naissance. Comment traitez apres leur naissance. Ceremonies des Hurons envers leurs enfans nouveaux nés, 324 & suiv. comment nourris & eslevez par les Sauvages de Canada, 337. & suivans.

Endurcissent leurs enfans, 341 Ne succedent point aux biens du Pere, 342. honnesteté d'iceux, 343. 344 de leur instruction, 347. 348. De leur exercices tant des garçons que des petites filles, 349. 350

Enfans du soin que l'on doit avoir de leur donner une bonne nourrice, 314. & suivans. Loix qui obligent les meres à nourrir leurs enfans, 335. Alemandes louées pour nourrir elles mesmes leurs enfans, 3. 6

Enfãs qui pour n'avoir esté alaités par leurs propres meres n'ont point succedé à la Couronne de leurs Peres. 336. les Cimbres les endurcissent, 340. de l'instruction des enfans Romains, 344. & suivans. Peres cause de la perte de

des Matieres.

leurs enfans,	347
Enfans du diable ou beste puante,	748
Epimenidre peintre: re:ponse touchant son grand voyage,	2
des Esprits, 494. qu'il y en a qui dominent en vn lieu les autres en vn autre,	493. 496
Estropiez employez au travail,	254
Esturgeon,	762
Etechemins, nations,	152
Eternuer parmy les Hurons,	234
des Etreues,	845
des Estuues parmy les Sauvages, voyes Suerie.	
L'Extreme-Onction donnee pour la premiere fois en Canada,	31

F

Fabricius Consul Religieux en guerre. Ne vent se seruir de poison ny de trahison, 438.

Faim. Histoire estrange de deux Canadiennes qui tuerent leurs maris pour manger, 681. & Iuiuans. Vn Sauvage m'age son neveu, 690. punition des sultaites femmes, 691. & Iuiu. se raiennit quand il est trop vieil. Comment, 738 739

le Faucheur Parisien, 953. & Iuiuans. 958. & Iuiuans.

Fauquets, oyseaux, 136. moyen de les prendre, 137.

Femmes Huronnes ayans leurs mois comment se comportent, 202. 203 de leur exercice, 272. & Iuiuans, des Montagnaises, 273. 274. pais-

Table

bles en leur mesnage,	377.	modestes en leurs ieux, ioyes & pleurs,	277. 278.
chemens,	324. 331. 332		
Femme, de leur pieté & vertu,	270. 271.	pieté de la Royne, la mesme. Grand travail des fem- mes d'Egypte,	273
Femme. Pourquoi plus de femmes que d'hom- mes en Paradis,	747.	pourquoy les Turcs croyant les femmes bannies du Paradis,	848
Festins defendus à Rome,	289. 290.	costume des Rois de Perse,	290.
pratique des Romains,	291.	costume des Hurons & Canadiens,	291
& suiuaus. Modestie de Iules Cesar,	295	Festins de diuerses especes parmy les Canadiens,	296.
Festins de guerre parmy les sauvages,	299 300)	Femmes Huronnes ne font point de festins en leur particulier ; si font bien les Montagnai- ses.	300 301. 302
Festins des Canadiens Montagnais de diuerses sortes,	302.	des Algonnequins : comment ils inuitent au festin,	796. 797
Festin solennel pour le baptesme d'un ieune Sau- nage,	561. 563	Festin de Sauvages,	476. 477. 572
Peu cōment se fait parmy les Hurons & Mon- tagnais,	186 187	Fletans, poisson,	138
Fleurs de Canada,	164	Fleuve saint Laurens. De sa largeur lon- gueur & profondeur de sa source,	149. 150
du Flux & reflux de la mer comment & quand se fait,	511. & suiuaus		

des Matieres

Foy & serment qu'elle doit estre religieuse- ment gardée entre les Princes. Punition d'V- ladislav Roy de Hongrie,	433. 434
Fidelité des Sauvages,	439
la Foriere Capitaine Sauvage,	42. & suivans.
Foucher Capitaine François,	596. 597
Foucher mal traité des Anglois,	917. 919
Fouyne ou martre,	793
Fraizes fruit de Canada.	779
des François, pourquoy changent si souvent de mode en leurs habits,	849
François en grande nécessité en Canada, 39. 40. 46. 939. & suivans. 974. & suivans. Que- relle avec les Sauvages. 42. & suivans, de deux François tuez par un Montagnais de la recherche & poursuite qui en fut faite, 895. & suivans, chassez de Canada par les Anglois,	
le P. François Girard Recollet, s'embarque pour Canada, pris par les Anglois, renvoyé en France,	945. & suivans 958. & suiv.
de S. François, 610. & suivans. 617. 618. 380. de la diversité qu'il y a entre ses Religieux, 65. & suivans.	
Freres mineurs. De leurs missions & fruits en toutes les principales parties du monde, 610. & suivans 618. & suivans.	
Freres laic Cheualiers de S. François,	612. 613
Epistre du Pape Alexandre aux FF. Mineurs epars par tout le monde, 618. les saints lieux dediez aux FF. Mineurs, 620. pourquoy por- tent la barbe rase, 850. De l'ordre des Fre- res Mineurs,	852. & suivans.

Table
des Fruits plantes, arbres, du pays des Sauvages,
777. & suiuians.

G

- le F. **G**abriel Sagard auteur de cet Oeu-
ure va en Canada. Son depart de Pa-
ris, 112. & suiui. 153. 155. son arrivée à kebec,
159. 160. voyage aux Hurons, 172. & suiui.
Son arrivée au pays des Hurons, du bon accueil
qui luy fut fait par ces Sauvages, 205. & sui.
Rencontre qu'il y fait du P. Nicolas, visitent
ensemble le P. Ioseph, 216. & suiuians, s'habi-
tuent ensemble. Font un logement particulier
pour eux, 219. & suiuians, description de leur
cabane, 223 estimé & chery parmy les Hu-
rons, 226. & suiuians. 492. 493. 931. & suiui.
son retour des Hurons en Canada, 790. &
suiuians, se trouue en grand peril, 827. appelé
Capitaine par les Hurons, 831. son arrivée à
Kébec, 834. rapellé en France, 835. son depart
de Canada, & son voyage en France, 836. &
suiuians, Admis qu'il donne au Duc de
Montmorency Viceroy de Canada, touchant
les desordres de ce pays là, 860. 861
Gaspé baye de Gaspé. iardin de Gaspé, 145.
146.
du Gaty, compagnon du Lyon, 725. 731
le P. Georges le Baillif Recollet, en Canada, 64.
Deputé de Canada vers le Roy, 72. & suiuians.
le F. Geruais Recollet. 470. & suiuians. 567. &
suiuians. 928. & suiuians.
Gibar, voyes Balene.

des Matieres.

Glaces. Bancs de glace,	33
Godels, oyseau,	143
de la Conte,	981. 982
Grondins poisson,	118
Gruis en quantité aux Hurons,	739
Guerre 63 71. 432. 433. des gens de guerre, 433	
Guerre. Pourquoi les Hurons font la guerre.	
439 440. des generaux d'armées & Capitaines 441. font festin pour la guerre, 442.	
qualité de leurs guerres, comment ils font la guerre, 443. cruauté d'Americains, 444.	
comment les Hurons marchent à la campagne en guerre, 444 445 de leurs armes, & boucliers, 446. 447 leur signal de guerre, 444.	
Ordre qu'ils tiennent en guerre. Diligence de leurs Capitaines. 449. & suiuaus. moyen qu'ils tiennent pour obtenir du secours en guerre. 451. du retour des Sauvages de la guerre en leur pays: comment rece par leurs femmes, 456 & suiuaus. portent leurs beaux colliers en guerre. 459. 460 comment prennent un prisonnier de guerre. 460. cruauté enuers leurs prisonniers de guerre. 443. 444. 453. & suiuaus. 458. 461. & suiuaus. comment traittent les femmes & enfans de leurs ennemis. 454 cruauté des Mexicains enuers leurs prisonniers de guerre. Les sacrifient à leurs Idoles, 468. des Montagnais, 470. & suiuaus.	
le P. Guillaume Galeran Recollet, va en Canada, baptise vn Canadien. 91. & suiuaus.	

Table

H

H Arants,	155. 156
Hebert, & sa famille en Canada, molesté, 41. 161. 162. mort du sieur Hebert. Sa barangue auant sa mort.	590
la Dame Hebert.	558
des Hemorroides.	276
Hippotame, voyez Elephant.	
Hiroquois, ennemis des Hurons, en quel temps ils vont leur faire la guerre,	464. 823
Hiroquois ennemis mortels des Hurons.	214
Holandois perfides,	946. 947
des Honqueronons, ou sauvages de l'Isle, 812. & sui-uans.	
Houel Secrétaire du Roy,	10. 56
des Huguenots & de leurs Temples nouveaux,	348. 849
Huile de poisson,	638
Humeurs & complexion. De la diuersité d'humeurs qui se rencontrent entre diuerses nations, mesme entre diuerses personnes de mesme climat, 393. & sui-uans.	
Hurons, de leur chant, 176. 177. comme il faut se gouverner voyageant avec eux, 178. & sui-uans. travaux qu'il faut souffrir en chemin, 180. 181. façon de cabaner, 182. 183. de leur viure & manger, 183. 184. honnesteté à faire de l'eau, 185. saleté en leur boire & manger, 184. 185. 408. cachent leur bled-d'Inde sur le chemin en allant en voyage pour leur retour, 286	
humanité des Hurons, 188. 189. 221. 241. 659. façon de faire du feu, 186. 187. de l'amitié en-	

des Matieres.

tr'eux, 209. haissent les glorieux & superbes, 213. du soin qu'ils ont pour les moris, 214.
femmes Huronnes, souvent trauaillées par le Diable, 215. François comment appelle parmy eux, 221. 222. façon de saluër, 232. ayment & cherissent le petun, 233. vindicatifs, 234. 235. 409. 440. 440. 713. charitables enuers les necessiteux, 241. 242. 399. 400. 802. description de leur pays. 245. 246. nombre de peuple. De leurs villes, villages, & cabanes. 246. & suiuaus. transportent leurs villages, 247. 248 de leur prouision de poisson, 251. cachettes crainte de feu & des larrons. là mesme. de leurs exercices ordinaires. Des pauvres mendians & vagabons, 255. & suiuaus. grands ioueurs, 256. 257. s'estudient à estre courageux. Patience admirable, 268. 269. comment ils defrichent, sement, & cultiuent les terres, 281. & suiuaus. de leurs banquets & festins, tant de paix que de guerre, & des ceremonies qu'ils y obseruent. 291. & suiuaus. superstitieux en leurs songes, 297. grands chanteurs & danceurs, 304. charitables enuers leurs malades, voyés malade. paresseux, 409 larrons, 409. 410. ont recours aux Magiciens pour les choses de robees, 411. de leurs chefs & superieurs, 418. & sui. leurs maximes generales, 420. comment se gouvernent en leurs conseils & assemblees, 422. & suiuaus. ne iurent iamais criminellement, 424. 431. 440
Hurons superstitieux, 639. 640. aiment la gresse passionnement, 638.

Table

*un ienne Huron en France. Baptisé à Rouen.
Different à qui l'auroit en Canada entre les
Recollets, les Iesuites, & le sieur de Caen.
874. & suivans.*

I

- du B. I Aques de la Marque. 625*
Le P. Ian Dolbeau Recollet, 12. son
voyage en Canada, 22. 24. hyuene avec les
Montagnais, 26. revient en France, 40
du B. Iean de Capistran, 612. & suivans.
de F. Iean de Zumaragna premier Euesque de
Mexique. 631
les PP. Iesuites en Canada logez dans la mai-
son des PP Recollets, 552. 564. choisis par les
PP. Recollets pour estre seconde, en la mis-
sion de Canada 862. 866 leur reestablissement
en Canada. receus par les seuls PP. Recollets
De l'obligation qu'ils leur ont, 866. & suivans
de leur establisement aux Indes. 863
Ieu en grande recommandation parmy les sau-
uages, tant hommes que femmes, 256. & suiv.
defendu à Rome. 289
Ignierhonons, nation hyroquoise. 174
Imprimerie, de l'auteur & inuenteur d'icelle.
354
de l'Inde Orientale, de sa premiere decouverte
& conuersion à la Religion Chrestienne. 634.
635
de l'Inde Occidentale, de sa premiere decouver-
te & de sa conuersion à la Religion Chre-
stienne, 626. & suivans.
Ingratitude de l'homme plus grande que des be-

des Matieres.

<i>ffes brutes.</i>	726
<i>Iongleurs & Magiciens.</i>	475
<i>le P. Ioseph le Caron, Recollet, 12. 22. va au</i>	
<i>pays des Hurons, 27. en celuy des Petunens,</i>	
<i>29. son retour en Canada puis en France, 30.</i>	
<i>31. retourne en Canada, 32. & suiuaus 45.</i>	
<i>autre voyage aux Hurons. 51. va hyuerner</i>	
<i>avec les Sauuages, 101. habite au pais des</i>	
<i>Hurons: entre-venü de luy, del' Ambeur, &</i>	
<i>du P. Nicolas, 116. & suiu. 554, & suiuaus.</i>	
<i>sa charité enuers les Sauuages, 581. 584. &</i>	
<i>suiuaus. 593. & suiuaus. 834. renient en</i>	
<i>France, 871. retourne en Canada, 871. 872.</i>	
<i>874. & suiuaus. sa resolution de viure parmy</i>	
<i>les barbares, 928. & suiuaus. ambassadeur</i>	
<i>vers les Anglois. 989. 990</i>	
<i>le P. Ioseph de la Roche Daillon Recollet, va en</i>	
<i>Canada. 865. va aux Hurons, 874. 875. 880.</i>	
<i>881. son voyage aux Neutres, des disgraces</i>	
<i>qu'il y eut, 881. & suiuaus son retour à Kebec,</i>	
<i>933</i>	
<i>Iours sans aucune distinction parmy les Sauua-</i>	
<i>ges.</i>	486
<i>comptent les mois non les Iours.</i>	482
<i>le P. I. enée Piat Recollet, va en Canada, 91.</i>	
<i>92. va hyuerner avec les Sauuages, 96. 97. 101.</i>	
<i>& suiuaus. 106</i>	
<i>I Isles aux oyseaux: description. 141. des diuerses</i>	
<i>especes d'oyseaux qui y sont.</i>	142
<i>I Isle de sable.</i>	144
<i>I Isle saint Paul.</i>	140
<i>I Isle d' Anticosty.</i>	148
<i>I Isle aux alonges.</i>	156

Table

<i>Isle aux lievres.</i>	157
<i>Isle aux condres.</i>	158
<i>Isle d'Orleans.</i>	158
<i>Isles flotantes.</i>	189
<i>Inbile en Canada.</i>	50
<i>Justice, forme de Justice parmy les Sauvages.</i>	691.699

K

K *Ebec, & de l'habitation qu'y ont les François, 160. 161. des bastimens qui y sont, 166. sa situation, 166. 167 pris par les Anglois.*

L

<i>du Lac de S Ioseph.</i>	907
<i>du Lac des Bisiriniens, ou Ebiceriniens, 800. & sui-uans.</i>	150
<i>Lac des Skekaneronons.</i>	174
<i>Lac saint-Pierre.</i>	470. 471. 482. 554. & sui-uans, 585. & sui-uans.
<i>superieur des Iesuites en Canada, Lettres qu'il eserit au sieur de Champlain, & au P. Prouin-cial des Recollets.</i>	868. 869
<i>Langue, ou langage des Hurons, & Canadiens, combien difficile à apprendre, 555. 556. & sui-uans.</i>	364. 365
<i>du Langage des oyseaux.</i>	366
<i>de la Langue Mexique & du Pern.</i>	358
<i>de l'inconstance de la Langue Françoisse.</i>	119. 120
<i>des Larrons.</i>	

des Matieres.

du Lapin.	725
Lettres ou caracteres, les Hurons n'ont point de lettres labiales.	355.355
difficulté qu'il y a de leur apprendre la Langue Françoise.	355. & suivans.
du Lierre.	725.747
Limas de pierre.	821
le Lion recognoissant du bien que l'on luy fait.	726
de la Lionne.	725
Lys incarnat aux Hurons.	784.821
des Loix.	315.419
maximes & Loix des Hurons en general,	419.
420	
Lok y.	198
Loups ceruiers & communs.	747
Loups marins.	156.765
de la Lune.	501.502

M

M Al de terre.	40
des Maladies ordinaires qui nous arri- uent. 652. 653. remedes des Sauvages en leurs maladies, 655. & suivans, 660. 661. 666. & suivans.	
des Maladies sales & dangereuses, comment on traicte les malades, 669. 670. des fièvres chaudes. 670. 671. danses & chanteries pour telles maladies.	672. 673
dernier remede des Sauvages en leurs Maladies,	673. 674
remedes aux Maladies des Montagnais.	676.
677. escorce d'arbre d'une vertu admirable pour la bruslure.	678

Table

<i>Malades parmy les Hurons, 127. dances pour la guerison des malades, 304. & suiuaus, 657. font quelquefois dancier leurs malades. 308. charité grande des Hurons enuers leurs malades. 308. 309. 619. ceremonie ridicule & mauuaise pour leurs malades.</i>	313
<i>Maniti, voyez Elephant.</i>	
<i>du Manitou des Montagnais.</i>	305
<i>Manitou,</i>	110
<i>Manitoufion, iongleur ou sorcier.</i>	475
<i>de Marc Aurele.</i>	715. 716
<i>le C. de Marcouffey sa pieté. 966. de la Comtesse sa femme,</i>	265
<i>Margaus, oyseau.</i>	143
<i>Mariage. Contenance des anciens Alemans, 314 du mariage des Hurons, leurs ceremonies 315. & suiui. courtoisie des femmes enuers les nouvelles mariées. 318. degrez de consanguinité, dās lesquels les Hurons ne font point de mariage. 318. point de douaire. 319. du diuorce parmi les Hurons. là meime. ceremonies des Montagnais en leurs mariages.</i>	320. 321
<i>Mariage: le premier qui fut fait en Canada. 41</i>	
<i>Mariniers & Matelots peu deuots, 123. vie estrange & merueilleuse. 124. 125. plus de vieux mariniers que de laboureurs. 125. exercice en temps calme.</i>	125. 126
<i>de la Mariolaine.</i>	782
<i>Marsoins. 118. 135. presage & signe de tempeste.</i>	
124	
<i>Marsoins blancs.</i>	157
<i>Martagons.</i>	784
<i>des Masques & momeries.</i>	845

des Matieres.

<i>le P. Massé Iesuite.</i>	581. 592. & suivans.
<i>Mécaban Montagnais converti & baptisé.</i>	
<i>son exhortation à sa femme & à ses enfans</i>	
<i>avant sa mort.</i>	592. & suivans.
<i>Medecins des sauvages.</i>	655. 656
<i>de la Melancholie</i>	394. ingement de Cesar. 398.
<i>les sauvages l'ont en horreur.</i>	397
<i>du Mensonge. Loix establies contre le menteur.</i>	
<i>exemple d'un Payen veritable.</i>	405. 406
<i>Mer, reconnüe pour Divinité parmy les sauvages.</i>	488. de sa salure. 509. de son flux & reflux.
	511. & suivans.
<i>de la Mer douce des sauvages.</i>	643. 644
<i>Messe dite premierement aux Hurons par les</i>	
<i>P. P. Recollets.</i>	224
<i>du Meffon des Montagnais.</i>	504. & suivans.
<i>Meurtre impuny parmy les Hurons.</i>	235. 236
<i>de Mexique ville capitale du Royaume, nom.</i>	630
<i>des Mexicains cruauté barbare.</i>	468. 469
<i>Mines en Canada.</i>	789
<i>Miskou, pais ou nation de Sauvages.</i>	403
<i>Miskoutins.</i>	490
<i>Modestie au parler.</i>	398
<i>le Duc de Montmorency Viceroy de Canada,</i>	
<i>56. 861. 862</i>	
<i>des Monstres humains.</i>	370
<i>Montagne qui a un esprit selon l'opinion des</i>	
<i>Sauvages.</i>	807
<i>Mont nostre Dame.</i>	247
<i>ceremonies des Matelots en ce lieu là.</i>	148
<i>Montagnais Sauvages, leur maniere de cabaner.</i>	27. comment traittent leurs prisonniers

Table.

de guerre.	470. & suivans.
le Capitaine Morel. 32. 35 sa mort.	37
de la Mort.	700. 701
façon d'ensevelir les Morts parmy les Sauvages, Voyez Sepulture.	
des Mortiers dans lesquels les Sauvages pilent leur blé d'Inde.	275
des Moulûs.	138. 141
Mousquites, cousins & moucherons importuns en Canada 35 181. 190. 191. de quatre sortes, 191. de leur morsure.	191
du Magnét.	783
des Mulets.	727

N

N Apagabisco Manitousion, ou Medecin, sorcier des Sauvages, converty & baptisé, nommé par les François Trigatin. 567. & suivans. 917 sa charité, 927. & suiv.	
Nattes de iouc.	276
Nation de gens sans teste.	387. 388
petite Nation, appelez Quiennontateronons	825
Nauire, abus sur mer en la prise de Nauires,	127
coutume au rencontre d'un Nauire Royal.	28
le P. Nicolas, vicil Recollet, va en Canada, 112. & suivans. 112. 192. entrevenü avec l'Authéur aupays des Hurons, 216. vont visiter ensemble le P. Ioseph, 216. & suiv. sa mort.	874. 875.
de la Neige.	501
Nentres, nation, de leur pays, de leur façon de vivre,	

des Matieres.

<i>viure, & de leur gouvernement,</i>	882. & suiv.
<i>Nikycon.</i>	509
<i>Nipinoukhe,</i>	510
<i>Noyers & noirs aux Hurons?</i>	779. 780
<i>le P. Noiroi le suite,</i>	482. 864. 874. & suivans.
<i>sa mort.</i>	567
<i>Nom, de l'imposition des noms parmy les Hurons,</i>	
<i>327. & suivans. rarement disent leur nom, à</i>	
<i>mesme. comment nomment les Francois des-</i>	
<i>quels ils ne scauent point le nom, 327. 328. sau-</i>	
<i>uages changent quelquefois de nom,</i>	330
<i>des sur Noms parmy les Chrestiens.</i>	329. 330
<i>de Nostre Dame de Colonne en Espagne. Inuen-</i>	
<i>tion de son Image. Des miracles que Dieu y</i>	
<i>opere.</i>	962. & suivans.
<i>Nourrice. Combien importe pour le bien des en-</i>	
<i>fans, qu'elle soit bonne & vertueuse,</i>	334.
<i>& suivans.</i>	
<i>des Nûes.</i>	500

O

<i>l' O Rdrs de S. François fort reueré en Espa-</i>	
<i>gne, 965. & suivans. 967. des Holandois</i>	
<i>mesme.</i>	970
<i>Oignons,</i>	782
<i>Oiseaux en quantité en Canada,</i>	732
<i>de l'Oiseau mousche,</i>	733
<i>de l'Oiseau blanc,</i>	734
<i>Oiseaux au Soleil,</i>	725. 736
<i>des Oyes & Outardes.</i>	740
<i>Ok y ou Ondak y demons ou esprits.</i>	494. 495
<i>Ondachiera racine tres-veneneuse & dangeren-</i>	
<i>se.</i>	662

Ooxrat radine propre pour purger le cerueau

Vuu

Table

d'humours & pituite,	663 & suivans.
de l'Oraison. Devotion de l'Empereur Charles V.	514. 515. sauvages prennent plaisir à ouyr prier & chanter les PP. Recollets,
516. 517. devotion d'Auindaon Capitaine Huron,	518. 519. 520.
des prieres que l'on fait les uns pour les autres. Que l'on recoit plus de graces de Dieu priant pour antruy. que priant pour soy mesme. Exemple,	528. 529. les sauvages avoient recours aux prieres des PP. Recollets,
530. 531. prieres à Dieu pour le beau temps,	533
Otay, oiseau.	748
Ouynesque,	509
Ours blancs & noirs. 148. 750. bons à manger.	
751. engraissez par les sauvages.	752
Ours priuez,	804
Ours long temps sans manger.	752
Ours sans poisson.	155
nation des Ours,	208
Oscar, plante d'une vertu admirable parmy les sauvages.	660

P

le P. F. P	Acifique, Recollet. 12. son retour en France, & d'icy en Canada,	49. sa mort.	54. 55
Pain des Hurons de diuerfes façons.	284. 285		
Pain, conuertuy en pierre,	821		
Paniers des sauvages.	277		
Papillons en quantité.	818		
Pardonner à nos ennemis. Vertu admirable de Phocion.	713. 714		
Patates, racines,	129. 781. 782		

des Matieres.

de la Patience. Exemple admirable de Socrate.

402. *des Sauvages, là mesme.* 462. *des peuples du Peru.* 463

Patrie. L'amour de son pays naturel à vn chacun. Responſes diuerſes de pluſieurs grands perſonnages touchant leur pays, 243. 244. *leçon aux Religieux ſur ce ſujet.* 244

le P Paul Huet Recolleſt, va en Canada, 32. & ſuiuans. 45. 104.

Peinture en vſage parmy les Sauvages. 258

de la Penſee. Quelle eſt la pluſ profitable à ſalut, 846

Perdrix. 740

de la Perfection. 846

du Peru. & de ſes richesses. 787

de la Peſche du grand poiſſon parmy les Hurons, & des ceremonies qu'ils y obſeruent, 636. & ſuiuans.

ce qu'ils font du poiſſon. 637 638

preſchent les poiſſons, pour auoir bonne peſche.

641

offrent du petun en ſacrifice pour meſme eſſet.

642

Peſche d'anguille. 200

Petun en grande recommandation parmy les Hurons, 188. 233. 240. 661

façon de coler leurs Petunnoirs rompus. 261

ſacrifices de Petun parmy les ſauuages. 669

de Phocion. 714

Pierre Antoine Canadien conuertý, 865 939 937

des Pigmees. Qu'il y en a. 383. & ſuiuans.

Pin. Forest de pins. 804. 815

Piponnon Khe, 510

Table

des Pirates,	120. 121
Pirate Holandois,	115
Pirototois ou Magiciens. Façon de consulter le	
Diable 98. 657. 658. de leurs instrumens, 655.	
656. conuent traittent les malades,	657
le P. du Plessis Recollect,	49
de la pluye,	500
des Poires de Canada,	780
Poires conuerties en pierre,	821
des Poissons, 760. 761. de ceux qui se trouuent	
aux sauvages, 761. 762. & fuiuans.	
Poisson armé,	765. 766
Poisson volant,	134
Poisson moitié rouge,	134
Poisson qui a voix,	156
Poisson. Les Hurons n'en iettent pas les arrêtes	
au feu.	639
Pommes de Canada, espece de racine.	781
du Pont-Grané Capitaine,	46. 47. 56
Pont-Grané. Mort constante d'un sien fils, pris	
par les Holandois,	94. 948. 981
Pots de terre comment faits par les sauvages.	275
Porcs epics,	753
Poule d'Inde,	738
Precepteur. Qualité d'un bon Precepteur.	346
du Pourcean,	756
de la Pourceleine,	266
Predicateurs de poisson,	641
Principe ou ainez des animaux,	509
Principes des saisons.	510
des Prisons des sauvages,	830
de la Prosperité des meschans,	642. & fuiuans.
des Prunes,	780

des Matieres.

<i>Puants nation,</i>	201
<i>des Pucés.</i>	758

2

Q <i>Viennontateronom,</i>	209
-----------------------------------	-----

R

<i>de la</i>	
R <i>Ade.</i>	985
<i>Rançon d'un Roy admirable,</i>	787
<i>Raquetes aux pieds parmy les Sauvages,</i>	240.
241	
<i>de Ragecourt.</i>	965
<i>des Rats.</i>	757.758
<i>Rat d'Inde.</i>	776
<i>Rats musqués.</i>	771.772 826
<i>les PP. Recollets employez à la conuersion des Hurons & Canadois : qui les premiers: par qui.</i>	11.12
<i>mission du Pape donnée ausdits Religieux pour cét effect.</i>	12
<i>parentes du Roy à mesme fin.</i>	17
<i>de l'embarquement des quatre premiers Recollets. 22.23 la Messe dite par eux en Canada pour la premiere fois, 24.35. leur exercice, description & situation de leur maison, 57. & suivans.</i>	
<i>Remonstrance & memoires presentez au Roy par lesdits Religieux pour les affaires de Canada, 86. & suivans. de leur Couuent. 56.164.165</i>	
<i>les PP. Recollets habitnés au pays des Hurons. de leur pauvrete & vie ordinaire, 216. &</i>	

Table.

<i>suivans. visitez par les Sauvages à diverses intentions, 229. 230. assemblée des François pour estre instruits, 231. font une Royauté la veille des Roys. Festin. 231. 232. ont une maison en l' Acadie. 365. 366. disgrâce qui leur pensa arriver parmy les Hurons. 426 & suivans en bonne estime envers les Hurons. 530. & suivans. pourquoy portent la barbe rase. 858. de leur Ordre & fondateur. 852. 855. 856</i>	
<i>Religieux premiers employez aux conversions, leurs avantages dessus les Ecclesiastiques seculiers en cela. 7. 8</i>	
<i>du Religieux & solitaire, 846. 847. pourquoy tant de sorte de Religieux. 851</i>	
<i>de la Remore. 775</i>	
<i>Renards de trois sortes en Canada. 744. 745</i>	
<i>Requiens, poisson. 133</i>	
<i>Resurrection des morts parmy les Sauvages. 712. 713</i>	
<i>Riviere saint Charles. 163</i>	
<i>des trois Rivières. 173</i>	
<i>Rocmont Capitaine de Marine. 939. 945</i>	
<i>des Roses. 784</i>	

S

<i>de la Sageffe. 846</i>	
<i>Saguenay riviere. 152</i>	
<i>de la Santé, 652. & suivans pratique des Egyptiens. 652. pourquoy les Grecs demeureront long-temps sans Medecins. 652. 653. que la nature se debilité à mesure que la fin du monde approche. 653. 654</i>	

des Matieres.

regime des Sauvages pour conseruer leur santé.

655

Saut de Montmorency. 159

Saut saint-Louys. 176

Saut de la montagne. 819

Saut de la chaudiere. 819. 820

ceremonies superstitieuses des Hurons à ce Saut.

822

Saut, ou chute d'eau admirable. 822

Saut saint-Louys 827. 828

Sauvages consultent le diable en leurs maladies, moyens estranges pour guerir leurs malades,

97. 98. 657. 6, 8. mangent tout sans auoir soin

du lendemain. 106. 107. chantent dans le dan-

ger. 107 humanité de quelques Sauvages, 107.

108. ce qu'ils font pour auoir bon vent. 110.

comme il se fait gouverner voyageant avec

eux. 178. & suiuaus.

humanité de quelques Sauvages. 107. 108. ce

qu'ils font pour auoir bon vent. 110. comme il

se fait gouverner voyageant avec eux. 178. &

suiuaus. façon de cabaner. 182. 183. de leur

manger, 183. 184. de l'ordre qu'ils obseruent

pour cabaner & courir les bois, 261. 262. filles

desbauchées en opprobre parmy eux, 262. à qui

on coupe le nez. 352

Sauvages prient Dieu, 352. 353. de leur forme

couleur, & statue. 367. & suiuaus. de leurs

parure, ornemens, & Matachias, 371. & sui-

uaus. oysieux & paresseux, 375. de leur hu-

meur, vertu, & inclination naturelle, 396.

& suiuaus. de leurs vertus. 398. 399. charita-

bles envers ceux qui ne leur sont point enne-

V u u i i i j

Table

mis. 399. 400. tuent quelquefois leurs parens trop vieux, ou malades, pourquoy, cruauté de deux femmes qui mangent leurs maris. 679. & iuiuans. 690 de leur amitié. 792. comment decabanent apres auoir hyuerné en quelque lieu, & de leur depart de ce lieu en vn autre.	906. & iuiuans.
Seau de Salomon, ratine excellente contre les hemoroides.	976
Sel n'est point necessaire à la conseruation de la vie, n'y à la sante de l'homme.	223
Sepulture. Façon d'enseuelir les morts parmy les Hurons. 701 703 Montagnais, ou Canadiens, là mesme. Essedons. 303. Traciens, là mesme. festin pour les defauts, 702. pleurs des femmes. 703. 704	
Sepulture d'un Sauvage baptizé.	587. 588
du cannoy, cimetiere, chasses & enterrement. 705. ceremonies des Hurons, 706. 607. ceremonies des Corinthiens, & des peuples d'Asie. 705 706. Hurons font des presens à la vesue. 707. ceremonies des Montagnais & Canadiens.	708. 709
Sauuages combien religieux conseruateurs des biens & des os de leurs parens defunts, 709. 710. festin des morts entre les Canadiens, 710. 711 difference entre le sepulchre des Capitaines, & ceux des particuliers. 711. dueil & oraison funebre.	712
Sepulture des morts sur mer, & leur pompe funebre.	95. 122
Serment. Costume de faire serment parmy les Canadiens.	425
	mesprisent

des Matieres.

<i>mesprisent les faussaires.</i>	là mesme.
<i>de la Sobriété.</i>	652
<i>du soleil. 502. de son coucher: opinion des Hurons.</i>	
537. 538	
<i>Songes creux par les Sauvages. 297. 302. 303.</i>	
<i>Heresie à ce propos.</i>	là mesme.
<i>Souris de deux sortes.</i>	757
<i>Souriquois.</i>	488. 489
<i>Squek aneronons.</i>	176
<i>Suerie des Sauvages. 109. 110. 655. 668. 669.</i>	
<i>comment sont leurs estuues.</i>	668
<i>Superieur. Inuention pour eslire un Chef. 416.</i>	
<i>bon mot de S. Gregoire,</i>	417. 418
<i>costume des Sauvages à eslire un Chef & superieur.</i>	418. 419

T

T <i>Able de Roland, montagne. 145. pris par les Anglois.</i>	916. & suivans.
<i>Tadoussac, de son port.</i>	150. 151
<i>Tambour de Sauvages.</i>	474
<i>Tempeste grande.</i>	122. 123
<i>presages de Tempeste.</i>	124
<i>de la Tentation, qu'il faut resister aux tentations, non y adherer, 523. & suiv. Religieux grandement persecuté du Diable, 523. & suivans.</i>	
<i>de la Terre, & de sa grandeur.</i>	501. 537
<i>Terre tremblante.</i>	189
<i>des Tertiaires de l'ordre de S. Francois, 851. & suiv.</i>	
<i>Testament, & derniere volonté d'un Sauvage</i>	

Table

<i>mourant, nouvellement baptisé,</i>	604. & sui-
<i>uans les Hurons ne font point de testament,</i>	713. dernieres paroles de Phocion, 714. de
<i>Adarc Aurelle à son fils.</i>	715. 716
<i>nation des Testes peleees.</i>	238
<i>Tresor des Hurons.</i>	830
<i>Toca, espece de fruiët.</i>	779
<i>du Tonnerre.</i>	500. 537
<i>des Tortuës.</i>	772. 773. 804
<i>du Tourne-sol, & de l'huile que l'on en tire.</i>	784. 785
<i>Tourterelles.</i>	740. 741
<i>Trahison detestee par les Romains. Exemples admirables.</i>	435. & sui-uans.
<i>Traicté des François avec les Sauvages.</i>	48. 49
<i>du Travail. Loy des Atheniens pour ce suiet.</i>	
<i>Romains laborieux. Loix des Chinois contre les faineants.</i>	252. 253. 254
<i>Trespasés. Feste pour les morts & trespasés parmy les Hurons.</i>	718. 719 nettoient les os de leurs parens, & les mettent tous ensemble dans une fosse avec leurs plus beaux emmeublemens, des richesses que les parens donnent pour leur servir en l'autre monde. 719. & sui-uans.

V

<i>de la Vache combien chérie & respectée parmy les Bayennes.</i>	727
<i>le Duc de l'antidour Viceroy de Canada.</i>	862. 864. 866
<i>des Vefues. Coustume des Sauvages.</i>	825. 826
<i>de la Vengeance.</i>	406. 407. exemple de clemence

des Matieres.

<i>& de misericorde.</i>	407
<i>Vermisseaux parmy les Sauvages que les femmes mangent.</i>	759
<i>Vertu en estime parmy les Sauvages.</i>	298
<i>de la Vieillesse. Que la sagesse ne se rencontre que parmy les vieillards.</i>	415. 416
<i>Vignes & raisins parmy les Hurons, point de vin.</i>	217. 218. 781
<i>des Vignols. Les Sauvages en font des chaines & brassclets.</i>	267
<i>Ville saint- Gabriel aux Hurons.</i>	208
<i>Village de Canadiens à Tadoussac.</i>	152
<i>Vin brassé par les PP. Recollets au pays des Hurons.</i>	217. 228
<i>enuoyé pour la punition des hommes, selon Platon.</i>	294
<i>Voyage. Voyageur. Divers motifs de ceux qui voyagent,</i>	1. & suiv.
<i>motif de l'Auteur à entreprendre le Voyage des Hurons & Canada.</i>	5
<i>Voyage. Les Sauvages ne l'osent faire sans permission des superieurs.</i>	260
<i>Voxu Royaume d'Amerique.</i>	632. 633
<i>de l'Union de l'ame avec Dieu.</i>	846

T

Y <i>Urognerie. Coustume des Lacedemoniens,</i>	29. 295
<i>Toscaba, ou Tonscaba.</i>	490. 491. & suivans.

F I N.

0372

Fautes suruenues en l'Impression.

La datte de la Lettre patente du Roy obtenue par le R. P Polycarpe du Fay Gardien de Paris, mise à la page du premier liure a esté obmise, elle est dattee de l'an 1621. au mois de Iuin est signé POTIER.

Pag. 730. lig. 28. Normandie, lisez Noruegie.





E636

S129h

[R]

